


Chijnie ndo Jesucristo



Popoloca, San Luís Temalacayuca: Chijnie ndo Jesucristo New
Testament

Chijnie ndo Jesucristo
Popoloca, San Luís Temalacayuca: Chijnie ndo Jesucristo New
Testament

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source files dated 29 Jan 2022
ee37a138-f1b9-51ef-b60f-e89d6de4d06f

Contents

Mateo	1
Marcos	51
Lucas	82
Juan	134
Hechos	170
Romanos	213
1 Corintios	232
2 Corintios	250
Gálatas	262
Éfesios	269
Filipenses	276
Colosenses	281
1 Tesalonicenses	285
2 Tesalonicenses	289
1 Timoteo	292
2 Timoteo	297
Tito	301
Filemón	304
Hebreos	305
Santiago	320
1 Pedro	325
2 Pedro	331
1 Juan	334
2 Juan	339
3 Juan	340
Judas	341
Apocalipsis	343

Chijnie ndo Jesús chronga ndo Mateo

*Sen kuachrjenixin ndo Jesús
(Lc. 3:23-38)*

¹ Ji i sen kuachrjenixin ndo Jesucristo. Je e ndo kuachrjenixin ndo, ndo David ko ndo Abraham.

² Ndo Abraham ikjui ndotée ndo Isaac ko ndo Isaac ikjui ndotée ndo Jacob ko je e ndo ikjui ndotée ndo Judá ko sen kichuu ndo.

³ Ko ndo Judá ikjui ndotée ndo Fares ko ndo Zara ko janée sen ikjui jan Tamar. Ndo Fares ikjui ndotée ndo Esrom ko je e ndo Esrom ndotée ndo Aram.

⁴ Ndo Aram ikjui ndotée ndo Aminadab ko je e ndo ndotée ndo Naasón ko ndo Naasón ikjui ndotée ndo Salmón.

⁵ Ndo Salmón ikjui ndo ndotée ndo Booz ko janée ndo jan Rahab. Ndo Booz ikjui ndotée ndo Obed ko janée ndo Obed jan Rut. Ndo Obed ikjui ndo ndotée ndo Isaí.

⁶ Ko ndo Rey David, chjen en ndo Isaí, ko jan Betsabé, jan ikjui janchri e ndo Urías, ko ndo Rey David, me e sen ikjui ndotée ko janée ndo Salomón.

⁷ Ko ndo Salomón ikjui ndotée ndo Roboam ko je e ndo ndotée ndo Abías ko je e ndo Abías ikjui ndotée ndo Asa.

⁸ Ndo Asa ikjui ndotée ndo Josafat ko ndo Josafat ikjui ndotée ndo Joram ko ndo Joram ikjui ndotée ndo Uzías.

⁹ Ko ndo Uzías ikjui ndotée ndo Jotam ko ndo Jotam ikjui ndotée ndo Acaz ko ndo Acaz ndotée ndo Ezequías.

¹⁰ Ndo Ezequías ikjui ndotée ndo Manasés ko ndo Manasés ikjui ndotée ndo Amón ko ndo Amón ikjui ndotée ndo Josías.

¹¹ Ko ndo Josías ikjui ndotée ndo Jeconías ko kain xjan kichuu ndo. Sen bake e nchakon sabikao na sen israelita tjanya Babilonia, bikao na sen xranchi sen itji ndo achjiso ko nti a juinchenche e na sen ixra ko juenge a na sen na.

¹² Juexinja ti bije e na sen nti a tjanya me e, tjume e ndo Jeconías ikjui ndotée ndo Salatiel ko ndo Salatiel ikjui ndotée ndo Zorobabel.

¹³ Ko ndo Zorobabel ikjui ndotée ndo Abiud ko ndo Abiud ikjui ndotée ndo Eliaquim ko ndo Eliaquim ikjui ndotée ndo Azor.

¹⁴ Ko ndo Azor ikjui ndotée ndo Sadoc ko ndo Sadoc ikjui ndotée ndo Aquim ko ndo Aquim ikjui ndotée ndo Eliud.

¹⁵ Ko ndo Eliud ikjui ndotée ndo Eleazar ko ndo Eleazar ikjui ndotée ndo Matán ko ndo Matán ikjui ndotée ndo Jacob.

¹⁶ Ko ndo Jacob ndotée ndo José ko ndo José ndoxi e jan María ko je e jan María janée ndo Jesús, ndo Jesús, ndo nchekin in sen Cristo.

¹⁷ Itenoó sen xranchrjen kuachrjenixin ndo Abraham ko tjume e konoxin ndo David ko kaxon itenoó sen kuachrjenixin ndo David, ko tjume e ni tjanya Babilonia sabikao na sen israelita tjanée na ko tjume e jngo itenoó sen jongí e, tjume e jongí e ndo Cristo.

*Xranchi jongí e ndo Jesucristo
(Lc. 2:1-7)*

¹⁸ *Ja in jongí e ndo Jesucristo: Jan María, jan xrokjui janée ndo Jesús, ó tsijanchia ndo José jan. Ko xratintekao a kichuu sen, ó jiyá jan ichjan ixi juachaxien Espíritue ndo Dio.

¹⁹ Ndo José, ndo tsoña ndoxi e jan María, je e ndo naa xi tsango jian, méxin, imao tjaun ndo xrokuintu e ndo jan ixi tjaun a ndo xrokono e chujni.

²⁰ Ko ó tsixraxaon ndo jaña, nchakon naa ndo ángel ne e Ncháina tsikonoxin en ndo गया kotáchríen ndo ko ja in nichja ndo ángel:

—José, ja a ti kuachrjenixian ndo David, xrakon a ixi tsaye é jan María xranchi janchri a ixi ichjan xrochóna jan, xjan me e ixi juachaxien Espíritue ndo Dio tsjongéxin xjan.

²¹ *Ko jan María sinchejongí e jan naa xjan xi ko sinchekei ian xjan Jesús; jaña tsin in xjan ixi je e xjan tsantsje xjan ijié chóna chujni.

²² Kain ji i kon en ixi jaña tsichronga ndo Dio ngajin sen kuanichja chijnie Ndo ó sa ó. Ja in tsindachro ndo:

²³ Naa nchrichajan tseyá nchrichan ichjan,

ko xrochóna nchrichan naa ichjan,

ko je e xjan ndatsin in xjan Emanuel.

Ji i xrondachro: ndo Dio steku una ndo.

²⁴ Hora xingame e ndo José kuitikaon ndo nge e ti ndachro ndo ángel ne e Ncháina* Dio ko kuayé e ndo jan María xranchi janchri e ndo.

²⁵ *Xra kuintejuakao a kichuu sen, je e jan juinchejongí e jan naa ichjan ko ndo José juinchekei in ndo xjan Jesús.

2

Sen nchekuanxin nchanotsé kuitsje e xa xjan Jesús

¹ Tjajna Belén tikinixin en Judea, nti a jongíéxin ndo Jesús. Nchakon me e bake e naa xi rey bakin in Herodes, xi me e bakituan an nti a. Nchakon me e kuuí kaxin sen tsango no e nchekuanxin nchanotsé. Sen me e kuixin sen ndatsjonxin chjuya.

² Ko juanchangi sen:

—¿Tí no jii xjan tsijongí e xjan rey tsetuen en ni judío? Ixi bikona nchanotsée xjan ndatsjonxin chjuya, ko jui ina ixi tsajonna juasaya* ngajin xjan.

³ Ko xi rey Herodes kuin en xa me e, juinche a xa juaxruxin ko kaxon kain ni tjajna Jerusalén.

⁴ Tjume e xi rey Herodes kuiye e xa sen taana ícha tetuan an ko kain ni tjako ley, ko juanchangi e xa na ixi no xrojongíéxin ndo Cristo.

⁵ Je e na juatingíéxin na:

—Je e xjan tsjongíéxin xjan tjajna Belén tikinixin en Judea, jaña tsikjin sen kuanichjaxin chijnie ndo Dio ó sa ó:

⁶ Ja a tjajna Belén nunte e Judá,

á je a ja a naa tjajna ícha nchúin

ngakjen en ikaxin tjajna ícha ijié,

ko nti i tsachrjéxin naa ngisen ícha tsetuan an, ko je e ndo tsayakon en ndo tjajnána Israel.

⁷ Tjume e xi Herodes imao kuiye e xa sen nchekuanxin nchanotsé ko juanchangi xa ngisa konoxin nchanotsé.

⁸ Ko tjume e ndachro xa:

—Itjinta Belén, nti a tjanchangínta ixi ichjan me e, ko ti no tsinchínta xjan, nchenónanta ixi jan an kaxon itsji ngajin xjan tsajon juasaya.

⁹ Ko sen nchekuanxin nchanotsé kuin en sen nge e ichro xi rey ko sakuintekji sen ko nchanotsé bikon sen me e kuitao en sen nti a ko tjume e kuixin nchanotsé ngata a ti no jii je e xjan.

¹⁰ Ko sen nchekuanxin nchanotsé tsango ché e sen ixi bikon sen no bake e nchanotsé.

¹¹ Ko hora kuixin in sen nchia ko bikon sen xjan jikao xjan jan María, janée xjan, bake exin ntatuchi in sen, kuajon sen juasaya ngajin xjan ko kuantje e sen ntábuál tsikika o sen ko kuajon sen chika oro ko tsjo xraxe ko xroan mirra.

¹² Ko tjume e koxienxin sen ixi íxrokjan i sen ti jii xi Rey Herodes. Méxin, kua sen inaa cha o, sakjui sen tjanéen sen.

Sabinga sen tjajna Egipto

¹³ Ko nchakon sakuintekji sen nchekuanxin nchanotsé, tjume e naa ndo ángel ne e Ncháina konoxin गया kotáchríen ndo José ko ndachro ndo ángel:

—Tingatjen, satiko a ichjan ko janée xjan, satjinta tjanya Egipto. Ko nti a tinteenta ti xrondachrxjanjan jan an, ixi xi Herodes tjaun xa tsen en xjan.

¹⁴Tjume e ndo José kuaya ndo ko sabikao ndo ichjan ko janée xjan, tiie me e kua sen cha o sakjui sen tjanya Egipto.

¹⁵Nti a bake e sen, kuenjan xi Herodes. Jaña kon en ixi jaña tsichronga sen kuanichjaxin ndo Dio: “Tjanya Egipto bake e chjan na ko jan an kuiya a xjan.”

Xi Herodes kuetuan an xa ixi tsen en ichjan

¹⁶Hora kono e xi rey Herodes ixi sen nchekuanxin nchanotsé íkjan i sen xranchi kuetuen en xa sen, me e xi Herodes tsango koña o xa ko kuetuan an xa ixi tsen en kain xjan xi, xjan xrachóna i yuu nano ste tjanya Belén ko xjan ste ngande e tjanya kaxon. Jaña kuetuan an xa ixi jixraxaon xa nge e ndachro sen nchekuanxin nchanotsé.

¹⁷Ja in kon en ixi ti tsikjin ndo Jeremías, ndo kuanichja chijnie Dio, nchakon tsindachro ndo:

¹⁸Ja in kuin en chujni tée naa sen nichjaxin tjanya Ramá, tsango kuyako sen ko tsango tsjanga sen.

Me e nchri Raquel jitsjangaxin chjen en nchra.

Ko tjaun a nchra ixi xrojan ngisen sinchexáxin nchra ixi ó tsikinteken en chjen en nchra. Jaña jitaxin xroon.

Kjanxin sen tjanya Egipto

¹⁹Nti a kuintee sen tjanya Egipto kuenjan xi Herodes ko naa ndo ángel ne e Ncháina konoxin ndo ngajin ndo José ngaya kotáchrién ndo ko ja in ndachro ndo:

²⁰—Tingatjen ko satiko a ichjan ko janée xjan, ikjannta tjanya Israel ixi ó ndakuen en ni tjaun xrokóna xjan.

²¹Ko tjume e ndo José kuaya ndo ko sabikao ndo xjan ko janée xjan tjanya Israel.

²²Ko kono e ndo José ixi xi Arquelao, chjen en xi Herodes, tetuan an xa nunte Judea, ti baketuan an ndotée xa, xronka ndo José ixi xrokjui ndo nti a. Ko ixi tsichronga ndo Dio ixi kotachrin, méxin sakjui sen nunte tikinixin en Galilea.

²³*Ko tjanya ndatin in Nazaret, nti a kuintee sen. Jaña kon en ixi jaña tsichronga sen kuanichjaxin ndo Dio ó sa ó ko tsindachro sen ixi ndo Jesús xrojuinchekin in na ndo nazareno.

3

Ndo Juan Bautista nichja ndo chijnie ndo Dio

(Mr. 1:1-8; Lc. 3:1-9, 15-17; Jn. 1:19-28)

¹Nchakon me e ndo Juan Bautista kuiji ndo ti jii ijna nchese nunte Judea, nti a nichja ndo chijnie ndo Dio

²*ko ja in nichja ndo:

—Íkjan titikaonnta ndo Dio ixi ó tuinxin tsonoxin juachaxien ndo.

³Ndo Juan, me e ndo tsindachro ndo Isaías:

Tée naa sen tuyako ti jii ijna:

“Nchekonchjiannta cha o tsj xjn Ncháina ko nchenataoxinnta cha o.”

⁴Ko manta jitsáa ndo Juan Bautista tsikonchjianxin chjuen kucamello ko naa tjaú jingatoxin ndo. Ko ti bajine ndo jeoxón kuxru a ko tsjeen kunoa, kuntajie.

⁵Ko bakiji chujni Jerusalén ko ni Judea ko kueya chujni tjanya ste ngande e inda Jordán ko baki en na ti kuandachro ndo.

⁶Ko kuachronga na ti ndako a juinche e na ngajin ndo Dio ko tjume e ndo Juan bikitée ndo na ti jii ndajitinga ndatin in Jordán.

⁷*Ko bikon ndo Juan ixi kueya xi fariseo ko xi saduceo kuiji xa ixi tjaun na tsikitée xa kaxon, méxin, ndachro ndo:

—Ja anta tsikachrjenixinnta kunchee, ¿ngisen ntatjunta satsinge enta juañaue ndo Dio ti ó tuinxin tsji?

⁸Xrokonda ixi nduaxin tsjakonta ixi ó ti jian rinche enta ko titikaonnta Ncháina.*

⁹*Ko xrondachro anta ixi kuachrjenixinnta ndo Abraham ko jaña sinchejiénta asáanta ixi jan an ntatjunta ixi ixro ji i chao ndo Dio sinchéña ndo chujni tsachrjenixin ndo Abraham.

¹⁰*Ko jacha ó jichón en jacha xrochrijinxin nue e ntayua ixi kain ntaq tajon a itu jian xrokonda xrochrijin ntaq ko xroche ntaq.

¹¹ Ko nduaxin tjakonta ixí juincheni anta ti ndako a juinche enta ko jan an inda bikítéexinta. Ko ícha tjume e tsíj inaa ndo ícha tetuan an, ko jan an tikinixinna i tsiki an katée ndo, ko je e ndo tsikitéxinta ndo Espíritue ndo Dio ko xro i.

¹² Ko je e ndo ó jitika o ndo kachrintue ndo tsjenduaxin ndo noatrigo ko tsinchexin ndo no ti xineno ko tsake e ndo noa ti jii ntane to ko xineno tsjaaka ndo xineno, ko xro i me e nai a tsanga xro i.

Xranchi bikítée ndo Jesús
(Mr. 1:9-11; Lc. 3:21-22)

¹³ Ndo Jesús kujxin ndo nunte Galilea ko kuiji ndo ti jii ndajitinga ndatin in Jordán ti jii ndo Juan Bautista ixí tsikítée ndo Jesús.

¹⁴ Ko ndo Juan tjaun a ndo tsikítée ndo ndo Jesús ko ja in ndachro ndo:

—Xrokonda ja anta tsikiténinta jan an, ko ja anta tji ínta ngajin ixí jan an tsikítéenta.

¹⁵ Ko ndo Jesús juatingéixin ndo:

—Jaña xrokonda sinche ena jai, ixí jaña tsitikaonna kain ti kuetuan an ndo Dio.

Me e ndo Juan kuitikaon ndo.

¹⁶ Ko ndo Jesús bikítée ndo, tuinxin xenduaxin ndo inda ko me e xitje e ngajní* ko bikon ndo Espíritue ndo Dio xingajin xranchi naa kuntúá ko bake e ngata a ndo.

¹⁷ *Ko tuinxin kuin enni naa téé séen kujxin ngajní ko ndachro:

—Ji in chjan na tsango tjua a ko juaxruxin ritjén ngajin xjan.

4

Xixron anxrée tjaun xa tsakaon xa ndo Jesús
(Mr. 1:12-13; Lc. 4:1-13)

¹ *Tjume e Espíritue ndo Dio bikao ndo Jesús ngata a ijna nchese ko nti a Xixron anxrée tjaun xa tsakaon xa ndo Jesús.

² Bake e ndo ijna, ko yuukan nchakon ko tiie juinchekatse ñao ndo jinta, méxin kuen en ndo jinta.

³ Ko Xixron anxrée konchjiñe e xa ti jii ndo Jesús ixí tjaun xa tsakaon xa ndo, méxin ndachro xa:

—Síá nduaxin ja a Chjen en ndo Dio, ndache ixro me e xrokjan xro nutja.

⁴ Ko je e ndo juatingéixin ndo:

—Jitaxin xroon chijnie ndo Dio: “Je a je o nutja tsehónxin chujni. Kaxon kain chijnie ndo Dio, me e tsehónxin chujni.”

⁵ Tjume e Xixron anxrée bikao xa ndo Jesús tjajna tsango tjúa, tjajna Jerusalén, ko juinchengajin in xa ndo ti ícha nui ngata a ni ngo,

⁶ ko ndachro xa:

—Síá nduaxin ja a Chjen en ndo Dio, chrinka ti nunte ixí jitaxin xroon chijnie ndo Dio: Je e ndo tsetuen en ndo sen ángel tikinixin en ndo ixí xrotsengia sen ixí tsontengixin a tutáa ixro.

⁷ Ko je e ndo Jesús juatingéixin ndo:

—Kaxon ndachro chijnie ndo Dio: “Tsaké a naa nge e ixí tsikuan á chao sinche e ndo Dio.”

⁸ Ko ijngo nchakon bikao xa ndo Jesús ngata a ijna ícha noi ko juako e xa ndo kain tjajna jii ngata a nunte xasintajni* ko kain nge e ti tjintee chóna na.

⁹ Ko ndachro Xixron anxrée:

—Kain ji i xrotjá a síá ja a tsake exian ntatuchi ian ko xrochjánaña juasiaa.

¹⁰ Tjume e je e ndo Jesús ndachro ndo:

—Satjia ja a Xixron anxrée, ixí ndachro xroon chijnie ndo Dio: “Je o Ncháa ndo Dio xrokonda xrochje é ndo juasaya ko je o ngajin je e ndo tsitikaon.”

¹¹ Ko Xixron anxrée ngaxiton xa ko tjume e kuij kaxin sen ángel ngajin ndo Jesús ko kuayakon en sen ndo.

Ndo Jesús juangixin ndo xrée ndo nunte Galilea
(Mr. 1:14-15; Lc. 4:14-15)

¹² *Nchakon ndo Jesús kuin en ndo ixí ndo Juan xraxin in na ndo ndo achjiso, je e ndo ikjan ndo nunte Galilea.

¹³ *Ko kuitue a ndo tjajna Nazaret; sakjui ndo tjajna Capernaum, tjajna me e jii ngande e ndachaon tjenka nunte Zabulón ko Neftalí.

¹⁴ Ja in kon en xranche ti tsikjin ndo Isaías chijnie ndo Dio. Ja in tsindachro ndo:

† 3:16 ngajní cielo 3:17 Mt. 12:18; 17:5; Mr. 1:11; Lc. 9:35. 4:1 He. 2:18; 4:15. * 4:8 xasintajni mundo 4:12 Mt. 14:3; Mr. 6:17; Lc. 3:19, 20. 4:13 Jn. 2:12.

¹⁵ Nunte Zabulón ko nunte Neftalí ti jii cha o ngande e ndachaon tuenxin ndajitinga ndatin in Jordán, nunte Galilea ti ste ni chúxin a ndo Dio.

¹⁶ Chujni tjajna ste naxixe e bikon na jjié xro i, ko ni ste ti jii tsa on ne e xichononte,[†] xro i bingasáñe e na.

¹⁷ *Ko nchakon me e kuaxi juako ndo Jesús ko kuandachro ndo:

—Tintu enta ti ndako a kuanche enta xixi juachaxien ndo Dio jii ngajni ó tjenkanta jii.

Ndo Jesús kuiye e ndo noó sen kuatese kucheg ti jii ndachaon

(Mr. 1:16-20; Lc. 5:1-11)

¹⁸ Ndo Jesús jitatsinga ndo ngande e ndachaon ndatin in Galilea, nti a bikon ndo yuu sen, sen me e kichuu sen, naa ndo ndatin in Simón ko kuanchekin in na ndo Pedro, ko ndo kichuu ndo ndatin in ndo Andrés. Je e sen stetánka sen nocha a ngangí inda, ko kuansengi sen kucheg xixi je e sen ixra me e kuanche e sen.

¹⁹ Ko ndo Jesús ndache ndo sen:

—Xrokuiinta rua naninta ko jan an sintakuan annta xronichje enta chujni me e tsitikaon na najan an, ko xrokjui xranchi xrotsénta kucheg.

²⁰ Ko tuinxin kuintu e sen nocha a ko rué e sen ndo.

²¹ Ko kujii ndo Jesús ícha ndá a bikon ndo ljngo yuu sen, ko sen me e kaxon kichuu sen, naa ndo ndatin in Jacob ko inaa ndo ndatin in Juan, yui sen chjen en ndo Zebedeo ko yui sen stekao sen ndotée sen ngaxin in ntábarco xixi stetjaun sen nocha a tséxin sen kucheg. Tjume e ndo Jesús kuiye e ndo sen.

²² Ko je e sen tuinxin kuintu e sen ntábarco ko kuintu e sen ndotée sen ko rué e sen ndo Jesús.

Ndo Jesús nchekuen en ndo kueya chujni

(Lc. 6:17-19)

²³ *Ndo Jesús kuaji ndo nchijí nunte Galilea ko banchekuen en ndo chujni ngaxin in ningue ni israelita nguingu tjajna ti bakiji ndo ko kuanchekuen en ndo na chijni natjúá ti tetuan an ndo Dio ko kuanchexruen en ndo kain ichin ko kain ti tíin na.

²⁴ Ko kain ti ixra jian kuanche e ndo, me e kono e ni ste nunte Siria ko bika o na kain ni kuachónda ngixe i ichin ko ni chóna espíritu Xixron anxrée, ni bakendáa, ko ni jua i itji, ko ndo Jesús juinchexruen en ndo na.

²⁵ Ko kueya chujni kuarue e na ndo Jesús, ni nunte Galilea ko ni tjajna Decápolis ko ni tjajna Jerusalén ko nunte Judea ko ni kujxin tuenxin ndajitinga ndatin in Jordán.

5

Ndo Jesús nichja ndo ngata a ijna

¹ Ndo Jesús bikon ndo xixi xejo kueya chujni, me e kuajin in ndo ngata a ijna ko nti a bake e ndo nunte. Ko kaxon sen teyuu kuarue e ndo, konchjiñe e sen ngajin ndo.

² Tjume e ndo Jesús kuaxi nichja ndo ko ja in ndachro ndo:

Sen chaxro tsake e

(Lc. 6:20-23)

³ —Juaxruxin tsake e sen xraxaon xixi nduaxin xrokonde e sen ndo Dio xixi sen me e tsayé e sen juachaxin tsintee sen ti tetuan an ndo Dio.

⁴ Juaxruxin tsake e kain sen stechín xixi xrojan nge e ti ndako a kon en sen, ko je e ndo Dio tsajon ndo juachaxin xixi juaxruxin tsintee sen.

⁵ Juaxruxin tsake e sen nchejié a aséen xixi je e sen tsayé e sen nunte ti ó ndachro ndo Dio tsajon ndo.

⁶ Juaxruxin tsake e kain sen tjaun xranchi xrojuine o xrokui i chijnie ndo Dio xixi je e ndo Dio tsajon ndo ti jian गया aséen sen.

⁷ Juaxruxin tsake e sen tingijna sen kichuu, jaña ndo Dio kaxon tsikonóe e ndo sen.

⁸ Juaxruxin tsake e sen kuitikaon ko juinchetjúá aséen xixi je e sen nduaxin tsikon sen ndo Dio.

⁹ Juaxruxin tsake e kain sen stetingijna xixi tsinteketo a chujni ko ndo Dio sinchekin in ndo sen chjen en ndo.

¹⁰ *Juaxruxin tsake e sen chinga nchekao na xixi titikaon sen nge e tjaun ndo Dio, me e je e sen tikinxin en sen ngajni ti tetuan an ndo Dio.

[†] 4:16 **xichononte** muerte 4:17 Mt. 3:2. 4:23 Mt. 9:35; Mr. 1:39. 5:10 1Pe. 3:14.

¹¹*Juaxruxin take é ja anta ti chinga tuyaku anta na ko ningakon annta na ko tjangi anta na ixi kondanaxin jan an.

¹²*Chá anta ko juaxruxin take énta ixi ja anta tsaye enta naa nge e ícha jian jii ngajní. Ixi jaña juinçekao na sen sa ó, sen kuanichja chijnie ndo Dio.

*Ja anta xranchi xíjnta, ko xranchi xro i tingasáña
(Mr. 9:50; Lc. 14:34-35)*

¹³*Xranchi xíjnte e nunte xasintajni me e ja anta, ko siá xíjnta ijní a xíjnta, ¿xranchi tsojnín xíjnta íjngo?, ko jaña íxro an tsonda xíjnta, tsintji xíjnta, ko tsingatjangi na xíjnta.

¹⁴*Xro i tingasáñaxin nunte xasintajni me e ja anta. Naa tjanya jii ngata a naa íjña jua i tsemá tjanya.

¹⁵*Xro an ngisen sinčekakiin naa xro i ko tsake e sen xro i ngangí naa chikute. Na i, xro i take e xro i noi ngata a naa ntaq ixi sinchengasáña xro i kain chujni ste nchia.

¹⁶*Jaña ja anta kaxon nchengasáñe enta kain chujni jii ngandajinnta, me e tsikon chujni ti jian nche enta, jaña je e na tsajon na juasaya ngajin Ndotáina jii ngajní.

Ndo Jesús tjako ndo ley kuetuan an Ncháina

¹⁷Ja anta xraxaon anta ixi jan an jui i ixi sintama a ley kuajon ndo Moisés ko ti nge e ndachro ikaxin sen nichja chijnie ndo Dio. Na i. Jan an jui i ixi tsitika on kain ti kuetuan an ndo Dio ko sintakuan annta nge e xrondachro chujni me e.

¹⁸*Ko nduaxin xrontatjunta ixi xratsatsinga i ngajní ko nunte xasintajni, xro an ley kuetuan an ndo Dio tsomé e, ko ní naa letra tsachrjende a. Na i, kain ti ndachro chijní, me e xrokonda tson en.

¹⁹Ko ngisen tsitikaon a ko sinche a ti ndachro ley kuetuan an ndo Dio, maski naa ley nchín tsitikaon a sen, ko jaña sinčekuen en sen chujni, kaxon nchion juasie ndo Dio tsayé e sen ti jii ngajni tetuan an ndo Dio. Ko siá ndako tsitikaon sen ley kuetuan an ndo Dio ko jaña sinčekuen en sen chujni, ijíe juasie ndo Dio tsayé e sen nti a ti jitetuan an ndo Dio,

²⁰Méxin, jan an ntatjunta xrokonda tsango jian tsitikaonnta ndo Dio ícha ixi ni fariseo ko ni tjako ley kuetuan an ndo Dio, ko siá sinche anta ícha jian jua i tsixin innta ti tetuan an ndo Dio.

*Ndo Jesús juako ndo kondee juaña
(Lc. 12:57-59)*

²¹Ja anta ó kuin ennta ti kuituen en sen sa ó: “Jua i naatsóñaxónnta ni kichuunta, ixi ngisen sinche e jaña tsitsingata a sen ijíe.”

²²Ko jan an ndachrjan siá xrojan ngisen xraningakon en sen sen kichuu, sen me e tsitsingata a sen ijíe. Ko ngisen tsenge e kichuu teka, sen me e, ni tetuan an tsjankata a na sen ijíe. Ko ngisen xrondache sen kichuu ixi tsinchetjáña jaa sen, sen ndachro me e satsji sen ngangí xro i kain nchakon.

²³Méxin siá tsiku unta naa nge e tsajonxinnta juasianta ngajin ndo Dio ngaxin in ni ngo ko nti a xroxaxaonnta ixi xrojan sen kichuunta toña o anta sen,

²⁴nti ao tintu enta nge e ritikuunta ngata a altar, ko itjinta, tjaunnta sen ko tjanche enta sen juatitjáña kondeexin nge e kuqtona. Tjume e ikjannta ko tájonnta ti bikuunta ngajin ndo Dio.

²⁵Siá xrojan ngisen kuichro ijíe kontraanta, cháña tuinxin tjaunnta sen ko nchekonchjiannta ti stetoña oxinnta ixi xraya onta cha o, ko xratjaso anta ti jii xi nchéña ijíe ba tsituan an xa xi policia xroxaxin innta xa ndo achjiso.

²⁶Ko nduaxin ntatjunta ixi tsachrjexin anta ndo achjiso tsjengajanta na kain ti tasinkanta.

Ndo Jesús juako ndo ijíe tama ni chóna inaa nchri o inaa xi

²⁷Ja anta kuin ennta chijni tsikitue en sen sa ó ja in ndachro: “Chonda inta inaa nchri, nchri je a nchrinchri anta o je a xixi anta.”

²⁸Ko jan an ndachrjan ngixe i naa xi xrotsje e xa inaa nchri ko tsingakuexin xa nchra, me e ó juinche e xa ti ndako a ngaya aséen xa.

²⁹*Méxin siá ikuan ndatsjonxin jian sintekateya ixi sinche e ti ndako a, cháña tantsjengia ko ndá a tjanka, ixi cháña tsitjáña tu o cuerpoa ko je a tsitjáña nchijii ja a ti jii xro i nai a tsanga.

³⁰ *Ko siá tjáa ndatsjonxin jian sintekateya ixi sinche e ti ndako a, cháña tonchrijian tjáa ko ndá a tjanka ixi cháña tsitjáña tu o cuerpoa ko je a tsitjáña nchijí ja a ti jii xro i nai a tsanga.

Ndo Jesús ko sen tsikute e

(Mt. 19:9; Mr. 10:11-12; Lc. 16:18)

³¹ *Kaxon kuituen en sen sa ó ixi ngisen ítjaun a janchri e, chao tsonchjian naa xroon tsintuexin kichuu sen.

³² *Ko jan an ndachrjan ixi ngixe i xi ítjaun a nchrinchri e xa, ko tjaun xa tsintu e xa nchra, chao, je o siá nchrinchri e xa juincheye e nchra xa ixi inaa xi. Siá na i, me e je e xa xranchi xrojuinckateya xa nchra sinche e nchra ti ndako a. Ko xi tsute e naa nchri, nchri tsikintu e xixi e, xi me e tsama xa ijie kaxon, xranchi naa xi kuejuakao inaa nchri.

Ndo Jesús juako ndo ixi jua i sincheyani ixi je e ndo

³³ *Kaxon tsikin ennta ti kuetuen en sen sa ó: "Take anta ndo Dio xranchi nduaxin xrojuinche enta ti ndachronta ko nche anta; ja anta xrokonda sinche enta ti tsindachronta ngajin Ncháina."

³⁴ *Ko jan an ndachrjan ixi jua i tsakéenta ndo Dio ko nche anta ti ndachronta o ngixe i naa nge e ti jii ngajni ixi ngajni me e ntaxitueen ndo Dio, ti tetuanxin ndo.

³⁵ Ko kaxon jua i tsakéenta nunte xasintajni ko nduaxin a sinche enta ixi ngata a nunte nti i take e tutée ndo Dio, ko jua i xronichaxinnta ixi tjajna Jerusalén ixi tjajna me e tjajné ndo Dio, ndo Rey tsango tetuan an.

³⁶ Ko kaxon jua i tsakéexinnta jáanta ko nduaxin a sinche enta ti ndachronta, ixi ja anta chonda inta juachaxin xrondachronta ixi naa xrajaanta tsontjúá xra o tsontie xra.

³⁷ Méxin nchakon xrondachronta jaán, jaán tson en, o siá xrondachronta na i, na i tson en ixi kain ti ícha xronichjanta, me e nchekateyanta Xixron anxré.

Ndo Jesús juako ndo ixi jua i tsjenge eni

(Lc. 6:29-30)

³⁸ *Ó kuin ennta ixi kuandachro sen sa ó siá kuande ena iton ikonnta, ja anta kaxon tande enta iton ikon na. Ko siá iton kuantsjexin na nenonta, ja anta kaxon tande enta iton neno na.

³⁹ Ko jan an ndachrjan tetoko inta ni ña i, ko siá xrojan ni me e tsande e na itja na ngaya ikonnta, ndatsjonxin jian, takéenta ti ndatsjonxin ikjon kaxon.

⁴⁰ Siá xrojan ni ña i tsichro na ijie ixi tjaun na tsantsja anta na camisaanta, tájonnta kaxon chamaranta.

⁴¹ Ko siá xrojan ni tjaun tsamanta ti iye jitikao na naa kilómetro, ja anta tiku unta yuu kilómetro.

⁴² Siá xrojan ni tsjanchaka a ngajinnta, chje énta na, ko siá xrojan ngisen tjaun sinchek-jennta na xrojan nge e, tájonnta.

Ndo Jesús juako ndo ixi xrotjue ena chujni ningakoína

(Lc. 6:27-28, 32-36)

⁴³ *Ó kuin ennta kaxon ti kuandachro sen: "Tjue enta ni tjua anta ko ningakon ennta ni ningakon annta."

⁴⁴ Ko jan an ntatjunta ixi tjue enta ni ningakon annta, ko ndachenta ndo Dio sinchenchaon* ndo ni ndako a nichja anta, ko tingijnanta ni ningakon annta, ko ndachenta ndo Dio ixi sinchemé e ndo ti ndako a junta anta na ko ti chinga nichja na ixi ja anta ko ti benginta na.

⁴⁵ Me e ja anta xrokjannta chjen en Ndotáina jii ngajni, ndo tetuan an tsachrje chjiixro ngata a ni titikaon ndo ko ngata a ni ña i, ko kaxon nchekania ndo ichrin ngata a ni jian nche e ko ni ndako a nche e.

⁴⁶ Siá ja anta je o tjue enta ngisen tjua anta, ¿nge e tsjachanta ixi me e? Ixi ni tjejo tomi ne e xi tetuan an jaña nche e na kaxon.

⁴⁷ Siá je o jian nichje enta sen kichuunta, ¿á jian rinche enta, richronta? Jaña nche e ni chúxin a ndo Dio kaxon.

⁴⁸ Méxin tsango jian ko ndako nche enta kain nge e xranchi Ndotánta jii ngajni, jian nche e je e ndo ko jian ndo.

6

Ndo Jesús juako ndo kondee ti jian tsingijnani chujni

5:30 Mt. 18:8; Mr. 9:43. 5:31 Mt. 19:7; Mr. 10:4. 5:32 Mt. 19:9; Mr. 10:11, 12; Lc. 16:18; 1Co. 7:10, 11. 5:34 Stg.

5:12; Mt. 23:22. * 5:44 **sinchenchaon** bendecir

¹*Tingijna inta ni xrokonde e ixi je o tjaunnta tsikon chujni ti jian rinche enta. Siá jaña sinche enta, Ndotánta jii ngajni tsajon a ndo nge e tsjachanta.

²Méxin nchakon tsingijnanta naa ni nóa, ndache anta ikaxin chujni nge e juinche enta. Nche anta xranchi nche e ni tjako inaa ikon. Nchakon ste na gaya cha o o ni ngo, tingijna na ni nóa ixi tjaun na tsikon chujni nge e nche e na ixi jaña xrondachro chujni ixi tsango jian je e na. Ko jan an ndachrjan ixi ni me e ó kuayé e na ti tikinixin en na.

³Ko ja anta nchakon tsingijnanta naa ni nóa, imao nche enta, ko sen ícha tjentonta tsonoe a sen.

⁴Imao tingijnanta ni nóa ko ndotánta jii ngajni, ndo tsje e nge e nche enta imao, je e ndo tsajon ndo nge e tsjachanta ixi ti jian juinche enta.

*Ndo Jesús juako ndo xranchi xronichjani ngajin ndo Dio
(Lc. 11:2-4)*

⁵*Ko nchakon ja anta xronichje enta ndo Dio, nche anta xranchi nche e ni tjako inaa ikon, ni me e nche e na juaxruxin siin na nichje e na ndo Dio ngaxin in ni ngo ko gaya cha o, ixi jaña tsikon chujni nge e stenche e na. Ko jan an ndachrjan ixi ni me e ó chóna na nge e tikinixin en na.

⁶Ko ja anta nchakon xronichje enta ndo Dio, tixin innta ndointa, tije enta ntachja ko nti a nichje enta ndo imao. Ko je e ndo ó jitsje e ndo nge e nche enta imao ko je e ndo tsajon ndo nge e jian tsaye enta.

⁷Ko nchakon nichje enta ndo Dio, nichja inta xraje o ko xraje o chijni, xranchi nche e ni chúxin a ndo Dio, ixi je e na xraxaon na ixi siá itsjé xronichja na, me e tsin en ndo Dio.

⁸Ja anta nichja inta xranchi nche e je e na ixi Ndotánta ó no e ndo nge e xrokonda anta maski xratjanche anta ndo.

⁹Ja anta ja in nichje enta ndo Dio:
Ndotána, ja anta ritjennta ngajni, tsango tjúa ja anta.

¹⁰Jan anna tja onna tsji inta tsetuan annta ngata a nunte nti i ko tson en xranchi xrondachro ja anta ngata a nunte nti i, jaña kaxon tson en ngajni.

¹¹Tájonnta nutja sinena jai.

¹²Ko ja anta nchemé enta kain ti ndako a junta ana xranchi jan anna ntamá ana gaya aséenana ti ndako a juinchenana ikaxin chujni.

¹³Tintue anta ixi ti ndako a sinta ana,
ko tájon anta juachaxin ixi xrojan nge e sinchenana Xixron anxrée
ixi ja anta tituan annta kain nge e ko chondanta ijié juachaxin kain nchakon.
Jaña tson en.

¹⁴*Ko siá ja anta sinchemé enta gaya asáanta ti ndako a junta anta na, kaxon Ndotánta jii ngajni sinchemé e ndo ti ndako a juinche enta.

¹⁵Ko siá ja anta sinchemé anta gaya asáanta ti ndako a junta anta na, kaxon Ndotánta jii ngajni sinchemé a ndo ti ndako a juinche enta.

Ndo Jesús juako ndo kondee ti sinchekatsé ñaoni jinta

¹⁶Ja anta nchakon sinchekatsé ñaonta jinta, nche anta xranchi nche e ni tjako yuu ikon, ixi je e na juichenchúin ikon na, me e jaña tsikon chujni ixi je e na jinchekatsé ñao na jinta. Jan an nduaxin ntatjunta ixi ni me e ó kuayé e na ti tikinixin en na.

¹⁷Ja anta nchakon rinchekatsé ñaonta jinta, néma ikonnta ko jian tonchjiannta

¹⁸ixi jaña tsonoe a chujni ixi ja anta rinchekatsé ñaonta jinta. Je o Ndotánta jii ngajni tsonoe e ndo, ko je e ndo jitsje e ndo ti imao rinche enta, je e ndo tsajon ndo naa nge e tsjachanta.

*Ngajni jii kain ti nduaxin tjintee
(Lc. 12:33-34)*

¹⁹*Tasintja inta ti tjintee jii ngata a nunte nti i, ixi nti i ti i kuchji ko itjo kain nge e, ko xiche e chao tixin in xa ndointa ko tsee xa ti tjintee chondanta.

²⁰Chaña ngajni tasintjanta kain ti tjintee ixi nti a kuchji xro an nche e ba, ko nti a xro an nge e itjo, ko xiche e jua i tsee xa.

²¹Ixi ti no jii ti tsango tjintee chondanta, nti a tsake e asáanta kaxon.

*Xro i tingasáña anta
(Lc. 11:34-36)*

²²Ikonnta me e nchengasáña anta. Méxin, siá jian ikonnta, jian tsingasáña nchijí ja anta.

²³ Ko siá ikonnta je a jian, kaxon nchijí ja anta naxixe e tsake enta. Ko siá xro i chondanta je a xro i jian tingasáña, tsango naxixe e tsake enta.

Ndo Dio ko tomi

(Lc. 16:13)

²⁴ Xro an ngisen jian sinche e ixra ngajin yuu nché; xroningakon en sen naa nché sen o xrotjue e sen inaa nché sen, kaxon tsango jian sinche e sen ixra ngajin naa nché sen ko ngajin inaa nché sen, na i. Jua i sinche eni ixra ngajin ndo Dio ko xrotjue eni tomi.

Ndo Dio tayakon en ndo chjen en ndo

(Lc. 12:22-31)

²⁵ Jan an ntatjunta: Ta inta juachjaon ixi nge e sintenta o nge e tsi inta o nge e tsaritsiinta. ¿Á ícha tjintee nge e ti sintenta ixi ti chondanta juachaxin tsarichonnta? Xraxaonnta ixi ícha tjintee asáanta ko ti chondanta juachaxin tsarichonnta ixi ti tsaritsiinta ko ti sintenta.

²⁶ Tsje enta kuxe, je e ba tenga i ba ko tandá i ba ko tatsin a ba ti sine ba, ko Ndotáina jii ngajni tajon ndo nge e sine ba. Ko ja anta ícha tjinteenta ixi naa kuxe.

²⁷ ¿Ko ngixe i ja anta ixi tsango taanta juachjaon, á me e ícha tsojinenta xranchi ngusinexin naa metro?

²⁸ ¿Ko sonda tsango taanta juachjaon ixi nge e tsaritsiinta? Tsje enta xranchi tangi itsjo. Itsjo me e nche a tsjo ixra ko tjaun a tsjo manta,

²⁹ ko jan an ntatjunta ixi xi rey Salomón, xi kuachónda tsango itsjé nge e, kuitsa i xa xranchi itsjo me e.

³⁰ Ko siá ndo Dio jaña nchekitsáa ndo ika, ka jai jichón, ko ndúya xroche ka गया itja, ¿xranchi sinchekitsá inta ndo Dio ja anta ti chuntia inta ndo?

³¹ Méxin, ta inta juachjaon, ko ndachro anta ixi nge e sintenta o nge e tsi inta o nge e tsaritsiinta,

³² ixi chujni chúxin a ndo Dio tsango taa na juachjaon ixi me e. Ko Ndotáina jii ngajni, je e ndo ó no e ndo nge e xrokonda anta.

³³ Sa ó tjéenta juachaxien ndo Dio ko nche enta ti jian, ko tjume e je e ndo tsajon ndo kain nge e xrokonda anta.

³⁴ Ko ta inta juachjaon nge e tson en ndúya ixi nchakon ndúya, nchakon me e noa inta nge e juachjaon tsika o.

7

Tjankata inta ijie ngajin chujni

(Lc. 6:37-38, 41-42)

¹ Tjankata inta ijie ngajin ikaxin chujni ixi jaña ndo Dio kaxon tsjangata inta ndo ijie.

² *Ndo Dio tsjankata a ndo ijie ngajinnta xranchi ja anta tsjankata anta ijie ngajin ikaxin chujni. Ko xranchi sinche e ja anta jaña kaxon ndo Dio sinche e ndo ngajinnta.

³ Ja anta tikonnta naa xineno jingi ikon sen kichuunta ko tikon anta naa ntásiji jingi ikonnta.

⁴ Ko siá ja anta chondanta naa ntásiji jingi ikonnta, ¿xranchi xrondachenta sen kichuunta ixi ja anta tsantsjenginta xineno jingi ikon sen?

⁵ Ja anta ti yuu ikonnta nichjakuanta, sa ó tantsjenginta ntásiji jingi ikonnta ko tjume e chao tsikonnta tsantsjenginta xineno jingi ikon sen kichuunta.

⁶ Chje anta kunia kain ti tjúá tikinixin en ndo Dio ixi ba xrokjan ba ngajinnta ko sina anta ba ko naatsónaxónnta ba. Kaxon chje anta kuchinga ixro tjintee ndatin in perla ixi ba tsingatjangi ba ixro.

Tjanchianta ko tjéenta ko tinganta ntachja

(Lc. 11:9-13; 6:31)

⁷ Tjanchianta ko ndo Dio xrotjáanta ndo nge e tjaunnta. Tjéenta ko tsinchínta. Tinganta ntachja ko xroxitje e ntachja.

⁸ Ixi ngisen tjanchia, tayé e sen, ko ngisen tjéé, titja sen, ko ngisen tinga ntachja, xitje e ntachja.

⁹ ¿Á xrojan ja anta, xrochje énta chjan anta naa ixro sine xjan, siá jitanchia xjan naa nutja?

¹⁰ O, ¿xrochje énta xjan naa kunchee sine xjan, siá juanchia anta xjan naa kucheg?

¹¹ Ko ja anta ña inta, ko no anta chje énta chjan anta nge e ti jian, Ndotáina jii ngajni ícha jian ndo, ko je e ndo tsajon ndo nge e ícha jian tsayé e sen tjanchia ngajin ndo.

¹² *Ja anta nchekuunta chujni xranchi tjaunnta sinta anta na ixi jaña kuetuan an ley ne e ndo Moisés ko jaña ndachro xroon tsikjin sen kuachronga chijnie ndo Dio.

*Ntächja tsango ijno**(Lc. 13:24)*

¹³ Tixixinnta ntächja ijno. Ixi ntächja ko cha o tsitjáñaxin chujni, yui me e tsango iton ko kueya chujni nti a tixixin na.

¹⁴ Ntächja ko cha o tixixinni ngajni, me e tsango ijno ko tsjé a sen tixixin ntächja me e.

*Ti itu tajon ntää, me e tjatsuanxinni ntää**(Lc. 6:43-44)*

¹⁵ Tsjé enta jian ixi kueya ni ndachro ixi je e na nichja na chijnie ndo Dio ko nduaxin a. Je e na tetsáa na xranchi naa kutuchjon, ko ngaya aséen na nche e na xranchi naa kundanixra tsango jie e.

¹⁶ Ja anta jaiko tsichuxinnta na ixi ti nge e nche e na, xranchi ntächja a jua i tajon ntää tu uva o tu higo.

¹⁷ Méxin, kain ntää jian tajon ntää itu jian, ko ntää je a jian tajon ntää itu xro an xrée.

¹⁸ Naa ntää jian, ntää me e jua i tsajon ntää itu xro an xrée, ko ntää je a jian, ntää me e jua i tsajon ntää itu jian.

¹⁹ *Kain ntää tajon itu xro an xrée xrokonda xrochrijin ntää ko xroche ntää.

²⁰ *Ko jaña tsichuxinnta chujni kaxon ixi ti nge e nche e chujni.

*Kain a chujni tixin in ti tetuan an ndo Dio**(Lc. 13:25-27)*

²¹ "Kain a ni xrondachro: "Ja anta, Nchána", tsixin in na ti tetuan an ndo Dio. Je o sen titikaon ti tetuan an Ndotána jii ngajni, tsixin in sen nti a.

²² Nchakon tsij ti tetuan an ndo Dio, itsjé sen xrondachro sen: "Nchána, Nchána, jan anna nichjaxinna nombreanta ko nombreanta kuantsjexinna espíritu Xixron anxrée ko nombreanta juintaxinna kueya ixra ijié."

²³ Ko tjume e ndo Jesús xrondache ndo sen: "Jan an chuxin anta, ndá a itjinta, ja anta ti juinche anta ti ndako."

*Ndo Jesús nichjaxin ndo ixi nchia jita a itjao**(Lc. 6:47-49; Mr. 1:22)*

²⁴ Méxin ngisen tin en ko titikaon nge e ndachrjan, sen me e ste sen xranchi naa xi xraxaon jian ixi juinchekonchjian xa ndo a xa ngata a itjao*.

²⁵ Kuania ichrin, ko koyé inda tsaaka, ko soji kuji chrinto ngata a nchia me e, ko kuitsinga i nchia ixi ngata a ixro soji jita a nchia.

²⁶ Ko ngisen tin en nge e ndachrjan ko titikaon a na sen, sen me e nche e sen xranchi naa xi ninta ixi juinchekonchjian ndo a xa ti jii nchese.

²⁷ Ko tjume e kuji ichrin ko koyé inda tsaaka, ko kuji chrinto ngata a nchia me e; méxin kuitsinga nchia, ko tsango ijié juachjaon kon en ixi ngata a nchese juinchekonchjian xa nchia.

²⁸ *Ko hora juexin nichja ndo Jesús, chujni stetin en ndachro na ixi tsango ijié juachaxin chónda ndo ko chaxro juako ndo

²⁹ ixi juako ndo xranchi naa ngisen tsango ijié tituan an ko juako a ndo xranchi ni tjako ley.

8*Ndo Jesús juinchexruen en ndo naa xi chónda chin lepra**(Mr. 1:40-45; Lc. 5:12-16)*

¹ Hora xingajinxin ndo Jesús ijna, itsjé chujni rué e na ndo.

² Ko konchjine e naa xi ni e chónda xa ichin lepra ko bake exin ntatuchi in xa ngajin ndo Jesús ko ndachro xa:

—Nchána, siá tjaunnta chao sinchexruananinta —ichro xa.

³ Ko tjume e ndo Jesús bake e itja ndo ngata a xa ko ndachro ndo:

—Jaán tja on. Jai tsachrja a ichin ji in.

Ko juexin ndachro ndo jaña, je e xa tuinxin kuachrje e xa ichin me e.

⁴ Ko ndo Jesús ndache ndo xa:

—Xro an ngisen teki é ji in. Je o itjia ngajin xitaana ko tájuan juasiaa xranchi tsiketuan an ndo Moisés ixi jaña tsono e xitaana ixi ó koxruan an.

*Ndo Jesús juinchexruen en ndo naa chajan**(Lc. 7:1-10)*

⁵ Nchakon kuixin in ndo Jesús tjanya Capernaum, konchjiñe e naa xi capitán ne e Roma ko kuinóatée xa, ko ja in ndachro xa:

⁶ —Nchána, nía jii naa chán nchexrana ko je e chán níexin chán ichin jua i tontengini ko tsango tiín chán.

⁷ Me e ndo Jesús juatingíexin ndo:

—Jan an itsji sintaxruan an chán.

⁸ Ko xi capitán juatingíexin xa:

—Na i, Nchána, jan an tikinixinna i tsixin innta nía. Ja anta je o tetuen ennta ichin tsachrje ichin, ko je e chán tsoxrue en chán.

⁹ Jan an kaxon chonda ngisen tetuanna ko kaxon jan an chonda xi soldado tetuan an. Nchakon jan an tetuan an naa xi soldado ixi itsji xa xrojan no, je e xa titikaon xa. Ko jan an tetuan an inaa xa tsji xa nda i, ko je e xa tji xa. Ko kaxon tetuan an xi nchexrana xrojan nge e sinche e xa, ko je e xa nche e xa ti ndachrjan.

¹⁰ Ko kuin en ndo Jesús nge e ndachro xi capitán, tsango juinche e ndo juaxruixin nge e chro xa, ko ndache ndo chujni sterué e:

—Nduaxin xrontatjunta ixi xro an ngisen nchijí nunte Israel kujn an ja in nichja ko tsango chuntia xranchi xi ji i.

¹¹ *Jan an ntatjunta ixi tsji kueya chujni, ni tsj xin chjuya ko ni tsj xin retuya sineka o na ndo Abraham ko ndo Isaac ko ndo Jacob ti jii nchia tetuan an ndo Dio ngajni.

¹² *Ko kueya sen tikinixin en xrobake e sen nchia ti tetuan an ndo Dio, sen me e tsachrjexin sen nti a, ko nduja tsake e sen ti naxixe e ko nti a xrotsjanga sen ko tseto neno sen ixi tsango xroxronka sen.

¹³ Tjume e ndo Jesús ndache ndo xi capitán:

—Itjia ndúya, ko tson en xranchi ja a kuitikaoan.

Ko chán nchexrée xi capitán hora me e koxruen en chán.

Ndo Jesús juinchexruen en ndo jachée ndo Pedro

(Mr. 1:29-31; Lc. 4:38-39)

¹⁴ Ndo Jesús ikjui ndo ndo a ndo Pedro ko nti a bikon ndo janchée ndo Pedro jitsinga jan ko tsango yaa jan súa.

¹⁵ Me e ndo Jesús itsé ndo itja jan ko tuinxin kuachrje e jan súa, ko jaiko bingatjen jan juinchekonchjian jan nge e sine sen.

Ndo Jesús juinchexruen en ndo kueya sen ni e

(Mr. 1:32-34; Lc. 4:40-41)

¹⁶ Ko tiie me e bikao e na ndo Jesús kueya chujni chóna espíritue xi ña i ko je e ndo naáko chijn nichja ndo ko tuinxin kuachrje e na espíritue xi ña i, ko kaxon juinchexruen en ndo ikaxin ni ni e.

¹⁷ Ji i kon en ixi jaña tsichronga ndo Isaías chijnie ndo Dio ó sée: “Je e ndo kuama ndo ichin chondana ko je e ndo kuama ndo ti tiínna ko ti soji ana.”

Sen tjaun xrorué e ndo Jesús

(Lc. 9:57-62)

¹⁸ Hora bikon ndo Jesús ixi kueya chujni xejo ngandajin ndo, kuetuan an ndo ixi tsatsingatu e sen ndalago.

¹⁹ Ko naa xi tjako ley kuetuan an ndo Dio konchjiñe e xa ngajin ndo Jesús ko ndachro xa:

—Maestro, jan an tja on xrorua anta ko itsji ti no itsjinta.

²⁰ Ko juatingíexin ndo Jesús ko ndachro ndo:

—Kutuunta chóna ba itja^{*} tejuaxin in ba, ko kuxe chóna ba kakée ba. Ko Chjen en ndo Dio, xjan jongi e xranchi chujni, chóna i xjan ti no tsjokéexin xjan.

²¹ Ko naa sen chrikao ndo, ndachro sen:

—Nchána, chjánanta juachaxin tsjabaja ndotána.

²² Ko ndo Jesús juatingíexin ndo:

—Tuinxin rua naa ja a. Tintu é ni tsiken en tsjabaa kichuu na.

Ndo Jesús nichje e ndo chrinto ko inda ko ndabake e nda

(Mr. 4:35-41; Lc. 8:22-25)

²³ Ndo Jesús kuixin in ndo ntábarco ko sen teyuu chrikao ndo kaxon kuixin in sen.

²⁴ Kuania ichrin ko kují naa chrinto tsango soji ko ndachaon tsango soji jamangitaon nda. Ko ndo Jesús jijua ndo.

²⁵ Tjume e sen teyuu chrikao ndo Jesús ikjui sen juinhexingame e sen ndo ko ndachro sen:

—Nchána, tingijnaninta ixi xrojamangi ntábarco.

²⁶ Ko je e ndo ndachro ndo:

—¿Sonda stexronkanta, ja anta? ¿Á chuntia inta ndo Dio?

Tjume e bingatjen ndo ko kuyakutee ndo chrinto ko ndachaon ko tuinxin ndabake e nda.

²⁷ Ko sen rué e ndo ndastetsjeko sen ixi nge e kon en, ko ndachro sen:

—¿Ngixe e xi ji in?, ixi nichje e xa chrinto ko ndachaon ko titikaon nda.

Xi chónða espíritue Xixron anxrée ste tjajna Gadara

(Mr. 5:1-20; Lc. 8:26-39)

²⁸ Hora ndo Jesús kuiji ndo tuenxin ndachaon ti jii nunte Gadara, kuachrje kuji yuu xi ste ti no xrabaa ni tsiken en. Xi me e chónða xa espíritue Xixron anxrée ko tsango chinga nche e xa, me e xronka chujni, méxin tatsinga i na ti jii cha o me e.

²⁹ Ko xi me e kuaxi kuyako xa ko ndachro xa:

—¿Sonda nhexronkana, Jesús, Chjen en ndo Dio? ¿Á ó jui ia ixi sinchexronkana maski xrati a nchakon sinchéña ijie ngajinna?

³⁰ Tjenka nti a jii kueya kuchinga steneña ba.

³¹ Ko espíritue Xixron anxrée kuinóatée ngajin ndo Jesús ko ndachro:

—Siá tsantsjexianna nti i, tintunana tsixin inna kuchinga ste yá a.

³² Ko ndachro ndo Jesús:

—Chao tixin ia ngaxin in kuchinga.

Tjume e espíritue Xixron anxrée kuachrxexin xi me e ko kuixin in ngaxin in kain kuchinga. Ko kain kuchinga chrinka ba ti jii yaso e, ko kuitsingangi ba in da, ko nti a kjun en ba in da.

³³ Ko ni stetsje e kuchinga xronka na ko sablinga na sakjui na tjajna ko beki e na chujni nge e kon en kuchinga ko nge e kon en xi kuachónða espíritue Xixron anxrée.

³⁴ Ko kain ni tjajna me e ikjui na ngajin ndo Jesús ko hora bikon na ndo kuinóatée na ngajin ndo ixi satsjixin ndo tjajna nti a.

9

Ndo Jesús juinchexruen en ndo naa xi tsiken en tutée

(Mr. 2:1-12; Lc. 5:17-26)

¹ Tjume e ndo Jesús kuixin in ndo ntábarco ko kuatsinga ndo tuenxin ndalago ko kuiji ndo tjajnée ndo.

² Ko nti a kaxin chujni bikao e na ndo naa xi tsiken en tutée jitsingata a xa naa kania. Ko ndo Jesús bikon ndo ixi nduaxin chujni me e chuntia* na ngajin ndo, méxin nichje e ndo xi ni e ko ndachro ndo:

—Chjan na, take é juaxruxin, ixi kain ti ndako a juinche e, jan an ndachrjan ó komé e jía.

³ Tjume e kaxin ni nchekuen en chujni chijnie ndo Dio stendachro na ngaya aséen na:

—Xi ji i nichjangí e xa ndo Dio.

⁴ Ko ndo Jesús no e ndo nge e stexraxaon xa ngaya aséen xa, me e ndachro ndo:

—¿Sonda ndako a xraxaonnta ngaya asáanta?

⁵ ¿Nge e ícha tangi a xrondachroni: “Ti ndako a juinche e ó juintamá a”, o xrondacheni xi ji i: “Tingatjen ko tjasian ko tajia”?

⁶ Méxin, sintano anta ixi Chjen en ndo Dio, xjan jongí e xranchi chujni, tsango tituan an xjan ngata a nunte nti i ixi sinchemé e xjan ti ndako a juinche e chujni.

Tjume e ndache ndo xi ni e:

—Tingatjen, tama kani a ko satjia ndúya.

⁷ Ko xi tsiken en tutée bingatjen xa ko sakjui xa ndo a xa.

⁸ Ko kain ni ste nti a bikon na naa ixra tsango ijie kon en, xronka na ko kuaxi na kuajon na juasaya ngajin ndo Dio ixi tsango ijie juachaxin tsikajon ndo ngajin chujni ste ngata a nunte xasintajni.

Ndo Jesús kuiye e ndo ndo Mateo

(Mr. 2:13-17; Lc. 5:27-32)

⁹ Hora sakujixin ndo Jesús nti a, tjume e bikon ndo naa xi ndatin in Mateo jitayé e xa tomi ne e xi tituan an. Me e ndachro ndo Jesús:

—Ja a rua nana.

Ko je e xi Mateo bingatjen xa ko rué e xa ndo Jesús.

¹⁰ *Nchakon me e ndo Jesús ko sen teyuu chrikao ndo ikjui sen ndo a xi Mateo bijine sen, ko nti a ste ikaxin xi tayé e tomie xi tituan an ko ikaxin ni ndako a nche e.

* 9:2 chuntia tener fe 9:10 Lc. 15:1, 2.

11 Ko kaxin xi fariseo bikon xa ndo Jesús ngakjen en chujni me e, méxin juanchangi e xa sen teyuu chrikao ndo Jesús, ko ndachro xa:

—¿Sonda ndo ntakuan annta nekao ndo ni xenge e na tomie xi tituan an ko ni ndako a nche e?

12 Ko ndo Jesús kuin en ndo nge e stendachro na, me e juatingéxin ndo:

—Je a sen chao ste xrokonde e xi nchexruan; sen ni e, me e sen xrokonde e xa.

13 *Itjinta ko tanginta nge e jitaxin xroon chijnie ndo Dio ti ndachro: “Jan an tja on ixi ja anta tsikonóe enta chujni; je a je o tson inta iko ko xroche jnié ba, me e tsayá a.” Ja in ndachro chijnie ndo Dio. Ixi jan an jui a nti i ixi tsiya a chujni jian nche e. Na i. Jan an jui i ixi tsiya a chujni ndako a nche e ko je e na tsintu e na ti ndako a nche e na.

Kaxin chujni juanchangi na ixi ti nchekatse ñaoni jinta

(Mr. 2:18-22; Lc. 5:33-39)

14 Naa nchakon konchjiñe e sen chrikao ndo Juan Bautista ko juanchangi e sen ndo Jesús: —Sonda jan anna ko ni fariseo nanao ntekatsé ñao o na jinta, ko sen chrjiku unta, ¿sonda na i?

15 Tjume e juatingéxin ndo Jesús:

—Sen tsikiye e xi tsute e ko sen ste kiéé xa, ¿á chao xrotsjanga sen siá je e xa xrajíi xa ngajin sen? Ko tsijí nchakon satsjikao na xi tsute e, nchakon me e tsaxi sinchekatsé ñao sen jinta.

16 Xro an ngisen tjaon mantée ti tsikichje ko take e tu o manta natjúá ixi nchakon tsijma manta tsixe e ti natjúá ko ícha tsinchje ti ntaxi.

17 Ko jua i tsikia ndée tu uva ti nandá tsikoña ixran गया naa tjuanxran ntaxi ixi xroxruji xran ko tsinchje xran tjuanxran ntaxi ko íxro an tsonda tjuanxran ko kaxon tsintji xran. Méxin, xran natjúá xrokonda tsikia xran tjuanxran natjúá, jaña yui jian tsonda.

Ndo Jesús juinchexechón ndo naa ichjan ko juinchexruen en ndo naa nchri

(Mr. 5:21-43; Lc. 8:40-56)

18 Ko xrajnichja ndo Jesús, kuii naa xi tituen en sen tjajna judío bake exin ntatuchi in xa ngajin ndo ko kuinóatée xa:

—Nchrichajan na nandákua juexin kuen en nchrichan. Ko siá suixinnta itsjinta ko tsakée tjáanta ngata a nchrichan, je e nchrichan xroxechón nchrichan.

19 Ko ndo Jesús bingatjen ndo ko sabikao ndo sen kuarue e ndo.

20 Kaxon konchjiñe e naa nchri, ó teyuu nano níexin nchra jnié nchra ko imao konchjiñe e nchra tuenxin ndo Jesús ko itsé nchra ngande e manta jitsáa ndo.

21 Ixi je e nchra jaña tsixraxaon nchra:

—Maski ngande e manta jitsáa ndo Jesús xrotse, me e tsoxruanna.

22 Ndo Jesús tuinxin ngatjia ndo ko bikon ndo nchra, ko ndachro ndo:

—Chjan na, take é juaxruxin ja a ixi ti chuntiana me e jintaxruan an.

Ko je e nchra koxruen en nchra hora me e.

23 Ko hora kuiji ndo Jesús ndo a xi tituen en ni judío, bikon ndo ixi ó tsikiji ni tanoa ntaxro ixi itsji na tsijabaa na nchrichajan. Ko chujni ste nti a stetsjanga na.

24 Me e ndachro ndo Jesús:

—Tachrxixinnta nti i ixi xjan ji i tsiken a xjan; je o jijua xjan.

Ko je e na kuaxi juanoa na ndo.

25 Ko hora kuachrje chujni ste nti a, ndo Jesús kuixin in ndo ko itsé ndo itjáa xjan nchrichan tsiken en ko je e xjan xechón xjan ko tuinxin bingatjen xjan.

26 Ko tsango ijié ixra juinche e ndo Jesús, nchijií nunte me e kono e na.

Ndo Jesús juinchexruen en ndo yuu ni tikon a

27 Tjume e sajuixin ndo Jesús nti a ko yuu chujni tikon a jirué e na ndo, ko ja in stetoyako na:

—Tikonóa nananta, ja anta ti tsikachrxixinnta ndo David.

28 Ko kuixin in ndo Jesús naa nchia, tjume e konchjiñe e ni tikon a, ko ndo Jesús juanchangi e ndo na ko ndachro ndo:

—¿Á titikaonnta ixi jan an nduaxin sintaxruan annta?

Ko je e na juatingéxin na:

—Jaán, Nchána, jan anna chuntiana ngajinnta.

29 Tjume e ndo Jesús bake e ndo itjáa ndo ngata a ikon na ko ndachro ndo:

—Ja anta tsoxruan annta ixi chuntiana ngajin.

30 Ko tuinxin ó chao bikon na. Ko ndo Jesús kuetuan an ndo:

—Xro an ngisen teki énta ji in.

³¹ Ko je e n̄a kuachrjexón n̄a nti a, tuinxin beki ena kain chujni kuetan n̄a ko nchijíi nunte me e kono e n̄a nge e jian juinche e ndo Jesús.

Ndo Jesús juinchexruen en ndo naa xi nosin

³² Ko hora sakjui ni bakikon a, kaxin chujni bika o n̄a naa xi nosin ko chónnda xa espíritue Xixron anxrée.

³³ Ko hora kuantsje ndo espíritue Xixron anxrée, xi nosin chao kuaxi nichja xa. Ko kain chujni ste nti a xronka n̄a ixi kain nge e tsango ijié kon en nti a ko ndachro n̄a:

—Xro an nge e tsango ijié bakon en nchijíi nunte Israel xranchi ti kon en jaí.

³⁴ *Ko ni fariseo stendachro n̄a:

—Xi ji i tantsje xa espíritue Xixron anxrée ixi Xixron anxrée tsikajon xa juachaxin ngajin xi ji in.

Ndo Jesús bikonóe e ndo chujni

³⁵ *Ndo Jesús kuaji ndo itsjé tjanya, tjanya ijié ko tjanya nchínchín banhekuen en ndo chujni Israel ngaxin in ningue n̄a, ko chronga ndo ti juachaxin jian bikaoxin ndo ti tetuan an ndo Dio. Ko juinchexruen en ndo kain chujni kuachónnda ichin ko kain ti tiín n̄a.

³⁶ *Ko bikon ndo ixi itsjé chujni kuji nti a, ko tsango bikonóe e ndo n̄a ixi ichrj̄a n̄a xranchi kutuchjon chónnda i ngisen tsje e ba.

³⁷ *Tjume e ndache ndo sen teyuu chrikao ndo:

—Tsango itsjé nge e jii tsandáani, ko kueya i sen nche e ixr̄a ji i.

³⁸ Méxin tjanche enta nchée nunte ji i xroxruan an ndo itsjé sen nchexr̄a, sen tsandáa.

10

Ndo Jesús xruan an ndo sen teyuu chrikao ndo

(Mr. 3:13-19; Lc. 6:12-16)

¹ Ndo Jesús kuiye e ndo sen teyuu chrikao ndo ko chjée ndo sen ijié juachaxin ixi tsantsje sen espíritue Xixron anxrée jitueten en aséen chujni ko sinchexrj̄uen en sen kain ichin chónnda chujni ko kain ti tiín n̄a.

² Ja in kuin in ti teyuu sen kuinche e ndo Jesús, sen rué e ndo: sa ó ndo Simón, ndo juinchekin in sen Pedro, ko ndo kichuu ndo, ndo Andrés, kao ndo Jacobo ko ndo kichuu ndo ndatin in Juan, chjen en ndo Zebedeo.

³ Ko ndo Felipe, ndo Bartolomé, ndo Tomás, ndo Mateo, ndo kuaxenge e n̄a ti bajanchia xi tetuan an, ko ndo Jacobo, chjen en ndo Alfeo, ko ndo Lebeo, ndo tsikake e n̄a Tadeo.

⁴ Kaxon ndo Simón, ndo barué e ni cananista, ko xi Judas Iscariote, xi juinchekji ndo Jesús.

Ndo Jesús kuajon ndo ixr̄a ngajin sen teyuu

(Mr. 6:7-13; Lc. 9:1-6)

⁵ Ndo Jesús xruan an ndo sen teyuu ko ja in ndache ndo sen:

—Tji anta ngajin chujni je a judío ko tixin anta tjanya Samaria.

⁶ Ja anta itjinta ngajin chujni bingachrue xranchi kutuchjon, sen tixinixin en tjanya Israel.

⁷ Itjinta ko nchekuen ennta chujni ko ja in nichje enta n̄a: “Juachaxien ndo Dio jii ngajní ó tuinxin tsji.”

⁸ Sinchexruen ennta chujni ni e ko ni chónnda ichin lepra ko nchengatjennta ni tsiken en, tantsjenta espíritue Xixron anxrée ko ti juachaxin kuito annta kaxon nchikj̄ton ennta chujni.

⁹ Tiku inta tomi chika oro, plata o cobre,

¹⁰ *ko nchakon tsaanta cha o tiku inta nge e sintenta, ko nge e taritsíinta, tiku inta kaxon inaa kate xrochjanganta, ko tiku inta ntakuto ixi sen nche e ixr̄a tixinixin tsayé e sen ti sine sen.

¹¹ *Nchakon tsjasonta naa tjanya ijié o naa tjanya nchín, tjéenta naa ngisen nche e jian ko nti a tituan anta ndo a sen ti satsjixinjanta nti a.

¹² Hora tsixin innta naa ndo a sen, ja in tájonnta juajna: “Juaxruxin xrochónnda ngisen jii nchia ji i.”

¹³ Ko sen ndo a siá nduaxin jian aséen sen tsayé e sen juaxruxin, ko siá na i, satiku unta juaxruxin me e.

¹⁴ *Ko siá xrojan ngisen chro a tsitu anta ndo a sen ko chro a sen tsin en sen nge e nichjanta, tachrj̄xinnta tjanya o nchia me e ko tontsjenganta tutáanta, jaña tsintji inche ixi jaña tsjakoxinnta ixi je e n̄a chro a n̄a kuayé e n̄a nge e ichronta.

¹⁵ *Ko nduaxin ndachrjan ixi nchakon tsoña ijje ti tsjexinja kain nge e, ni tjajna Sodoma ko Gomorra tanto a tangi tson en na xranchi ni tjajna tjaun a na kuin en na ti ndachronta.

Chujni xraningakon en sen titikaon ndo Cristo

¹⁶ *Jai jan an xroxruan annta xranchi kutuchjon ngakjen en kundanixa. Méxin jaiko ko jian tsje enta xranchi kunchee ko kaxon nche enta xranchi kuntúá, nchejje a asáanta.

¹⁷ *Jian tsje enta ixi kaxin chujni xrotsénta na ko tsiku unta na ngajin ni tetuan an, ko ngaxin in ningue na, nti a tsikaonxinnta.

¹⁸ Ko tsikaannta na ngajin xi tetuan an ko ngajin xi rey ixi chuntianta ngajin. Ko nti a xronichjanta ixi titikaonninta, tsin en ni me e ko tsin en kaxon ni chúxin a ndo Dio.

¹⁹ Ko nchakon tsikaannta na ti ste xi tetuan an, ta inta juachxaon ixi nge e xrondachronta o nge e xronichjanta ixi hora me e ndo Dio tsajon ndo nge e xronichjanta,

²⁰ ixi je a ja anta xronichjanta; Espíritue Ndotánta xronichjaxin ixi ja anta.

²¹ *Chujni kichuu tsajon na juachaxin ixi tsen en ni kichuu na ko ndotata tsajon ndo chjen en ndo ixi tsóña na xjan. Ko ichjan xraningakon en xjan sen ndo a xjan ko tsajon sen ixi tsen en sen.

²² *Ko kaxon itsje chujni xroningakon annta ixi chuntianinta. Ko kain sen tsokuaxi en kain ji i ti tsjexinja kain nge e jii ngata a xasintajni, sen me e tsayé e sen juachaxin tsechón sen kain nchakon.

²³ Ko nchakon tsengixinnta na tjajna ji i, satinganta inaa tjajna. Ko nduaxin xrontatjunta xratsjexin a satsjinta ngujngu tjajna tikinixin en Israel, Chjen en ndo Dio, xjan jongí e xranchi chujni, xrokjan xjan tsii xjan nti i.

²⁴ *Naa ndo tjako ícha tjintee ndo ixi sen nchekuen en ndo, ko kaxon sen chónnda ni nchexra, ícha tetuan an je e sen ixi ni nchexrée sen.

²⁵ *Ko ngisen jitangi xroxraxaon sen ixi je o tjintee sen xranchi ndo nchekuen en sen, ko ni nchexra xroxraxaon na ixi je o tsituan an na xranchi nchéé na. Ixi siá ndotata juinchekin in na ndo Xixron anxrée, sen rué e ndo ícha jaiko sinchekin in na sen jaña.

Ngisen chao xroxrakon ennta

(Lc. 12:2-9)

²⁶ *Ja anta xro an ngisen xrakon enta, ixi kain ti jixratja xrokonda tsonoxin, ko kain ti jimá xrokonda tsono eni nge e me e.

²⁷ Ko siá xrontatjunta xrojan nge e imao, ja anta séen nichjanta tsin en kain chujni. Ko siá tseki anta naa nge e gaya ndatsjonnta, ja anta séen teki énta chujni.

²⁸ Xrakou anta chujni tsóña ntau eni ixi ni me e jua i tsóña na aséenni. Ja anta xroxrakon ennta ngisen chao xroxruan an asáanta ko ntau anta ti jiche xro i.

²⁹ ¿Á tuchji a yuu kuxechjan ixi naa tomi nchiín? Ko maski tjinte a ba, ninaa ba ten a ba siá Ndotánta Dio tsajon a Ndo juachaxin.

³⁰ Ko kaxon ndo Dio no e ndo ngijan in xrajaanta chondanta.

³¹ Méxin, ja anta xrakon anta ixi ja anta ícha tjinteenta ixi kain kuxe.

Sen tosue a ixi je e sen xrondachro sen ixi titikaon sen ndo Cristo

(Lc. 12:8-9)

³² *Ko siá ja anta xrondachronta ixi titikaonninta tsin en chujni, kaxon jan an xrontatjan Ndotána jii ngajni ixi nduaxin me e.

³³ *Ko ngisen xrondache chujni ixi jan an chuxin ana sen, jan an kaxon xrontatjan Ndotána jii ngajni ixi jan an chuxin a sen.

Kondeexin ndo Jesús tse to na

(Lc. 12:51-53; 14:26-27)

³⁴ *Xraxaon anta ixi jan an bikian juaxruxin ngata a nunte xasintajni. Na i. Jan an bikian ti tse to na.

³⁵ Kondanaxin jan an tsintekte to chujni; xi tse to xa ngajin ndotée xa, ko nchrichajan tse to nchrichan ngajin janée nchrichan, nchritakinda tse to nchra ngajin jachée nchra.

³⁶ Ko sen kichuunta, sen me e ícha xroningakon annta sen.

³⁷ *Ko ngisen ícha tjue e ndotée o janée, kaxon sen tjue e ícha xitsi e o nchrichje en sen, sen me e tikinixien a sen xrorua na sen.

³⁸ *Ko ngisen tsama i ntaçru, ko xroruana i sen, sen me e tikinixien a sen tsin in sen chujnina.

³⁹ *Ngisen tjaun a tsen en, sen me e tsen en sen, ko ngisen tsen en ixi jan an, ngajin sen me e jan an tsajon juachaxin tsechón sen kain nchakon.

Ngisen tsjacha tsayé e naa nge e tsango jian
(Mr. 9:41)

⁴⁰ *Ko nchakon xrojan ngisen xrondachro ixi chao tsatsinganta ngaxin in ndo a sen, sen me e xranchi xrokuayé e sen najan an, ko siá jan an tsayé ena sen kaxon Ndotána Dio, ndo xruan anna, tsayé e ndo sen.

⁴¹ Ngisen tsayé e ngaxin in ndo a naa sen nichja chijnie ndo Dio, sen me e tsayé e sen naa nge e tsango jian jii ngajni xranchi ti tsayé e sen nichja chijnie ndo Dio. Ko ngisen tsayé e naa chujni jian, chujni ndako nche e, sen me e kaxon tsayé e sen naa nge e jian jii ngajni xranchi ti tsayé e sen jian ko ndako nche e.

⁴² Ko ngisen tsajon nchíin ndakin tsi i naa chujni titikaonna, jan an xrotjá a sen me e naa nge e tsango tjintee tsayé e sen.

11

Sen bikao chijnie Ndo Juan Bautista
(Lc. 7:18-35)

¹ Ndo Jesús juexin ndache ndo sen teyuu chrikao ndo nge e sinche e sen, tjume e sakjui ndo kaxin tjajna bijako ndo chijnie ndo Dio, tjajna tikinixin en Israel.

² Ndo Juan Bautista jije e ndo ndo achjiso, kuin en ndo ixi ndo Cristo jinhexruen en ndo chujni ko jinche e ndo kaxin ixra ícha ijíé, méxin ndo Juan xruan an ndo yuu sen chrikao ndo ixi tsjanchangí e sen ndo Jesús.

³ Tjume e sakjui sen bijanchiangí e sen ndo ko ndachro sen:

—¿Á suixinnta ngisen ti ndachro ndo Dio xroxruan an ndo ngajinna o xrochon anna inaa sen?

⁴ Ko ja in juatingíexin ndo Jesús:

—Itjinta ko ndachenta ndo Juan nge e bikonta ko nge e kuin ennta.

⁵ Teki énta ndo ixi sen tikon a, ó tikon sen, sen ntarengo ó ichrji sen ko sen kuachónnda ichin lepra ó koxruen en sen, sen ntakuxro, tin en sen; kaxon sen tsiken en xechón sen ko sen nóa stetin en sen chijnie ndo Dio.

⁶ Ndo Dio sintanchaonnta ndo ti nduaxin rua naninta ko tintuna ininta.

⁷ Hora sakjui sen xruan an ndo Juan, ndo Jesús kuaxi ndache ndo chujni ngisen ndo Juan ko ndachro ndo:

—¿Ngisen kuitsje enta ti jii ijna? ¿Á kuitsje enta naa xi jixrato o xranchi naa ntatji tsijato o chrinto?

⁸ Siá na i, ¿nge e kuitsje enta? ¿Á bikonta naa xi jitsáa jeoxón manta tjintee? Xraxaonnta ixi chujni stetsáa manta tjintee, ni me e je o ste na nchiando a xi rey.

⁹ ¿Ngisen kuitsje enta tjume e? ¿Á bikonta naa xi jichrónga chijnie ndo Dio? Jaán nduaxin, ko jan an ntatjunta ixi ndo Juan ícha tjintee ndo ixi sen kuachronga chijnie ndo Dio ó sa ó.

¹⁰ Ji i ndo xroxruan an ndo Dio xranchi jichrónga xroon chijnie ndo ó sa ó:

Jan an xroxruan an naa ngisen tsitaon nti a tsikao sen chijnina,
ko sinchenataonxin sen cha o.

¹¹ Ko jan an nduaxin ndachrjan ixi kain sen jongí e ko bake e ngataon nunte nti i, ni naa sen tjinte a sen xranchi tjintee ndo Juan tikitée chujni. Ko naa sen ícha tjinte a jii ti tetuan an ndo Dio, sen me e ícha tetuan an sen ixi ndo Juan.

¹² *Nchakon kuaxi nichja ndo Juan Bautista chijnie ndo Dio, nchakon me e ko ti jai, tsango tangi setayé e sen chijnie ndo Dio ko ti tetuan an ndo, ko je o sen xronka i, sen me e tsjacha tsayé e juachaxien ndo Dio.

¹³ Itsjé sen kuanichja chijnie ndo Dio ko kaxon chijni tsiketuan an ndo Moisés ndachro kain ti xrokron en ti xrokuíjja ndo Juan.

¹⁴ *¿Á tsitikaonnta o na i?, ixi nchakon tsindachro ndo Dio ixi xroxruan an ndo ndo Elías, ji i jinichja ixi ndo Juan tikitée chujni.

¹⁵ Ko ngisen chónnda ndatsjon, sen me e chao tsin en sen ji i.

¹⁶ ¿Xranchi tsjako anta ti nche e chujni jichón jai? Nche e na xranchi nche e kaxin ichjan stesondaon ti jii ntaasin, ko ja in stetoyako xjan:

¹⁷ “Kuanooana ntaxro ko ja anta té anta. Itsjena sóen chujni tsiken en ko ja anta tsjanga inta.”

¹⁸ Ixi kuji ndo Juan juine a ndo ko kui a ndo ixi juinchekatsé ñao ndo jinta, ko ja anta ndachronta ixi espíritu Xixron anxrée chóna ndo.

¹⁹ Ko jui i jan an, Chjen en ndo Dio, xjan jongí e xranchi chujni, juiné ko kui i, ko ndachronta ixi tsango itsjé iné ko tsango yee ti i ko tjento ni tjáka tomie xi tetuan an ko ni ndako a nche e. Ko jian xraxaonnta ixi ti ixra jian ton en me e tjako ixi ndo Dio tsango ndo e ndo.

Tsango tangi tson en tjajna titikaon a
(Lc. 10:13-15)

²⁰ Tjume e ndo Jesús kuaxi kuyakutee ndo chujni ste nti a ixi tjajna me e juinchexruen en ndo kueya chujni ko ikaxin ixra ijié juinche e ndo ko chujni me e kuitikaon a na ko kuindoxin a na ti ndako a kuanche e na.

²¹ Tjume e ndachro ndo:

—Ja anta ti stenta tjajna Corazín ko ja anta ti stenta tjajna Betsaida, tsango tangi tson annta!, ixi siá xroxoxruen en kain ni ni e ko xrokon en kain ti jian ngajin tjajna Tiro ko tjajna Sidón xranchi ti kon en nti i, je e ni me e xrokuindoxin na ti ndako a kuanche e na ko xrokuitsáa na manta tiie ko xrokuintjíte e na ntesoki i jaa na ixi jaña xrojuako na nduaxin tjaun na isinche a na ti ndako a.

²² Méxin nduaxin xrontatjunta ixi nchakon tsoña ijie, ni tjajna Tiro ko ni tjajna Sidón, ícha tangi a tson en na xranchi ja anta.

²³ Ko ja anta chujni tjajna Capernaum, á xraxaonnta ixi ti jii ngajni tsajinnta. Na i, ja anta xroxingajinnta ti ste ni tsiken en, ixi siá tjajna Sodoma xroxoxruen en chujni ko xrokon en kain ti ixra ijié kon en ngajin tjanánte, tjajna me e xraxrobake e tjajna ngata a nunte jai.

²⁴ *Méxin nchakon tsjexin kain nge e, ndo Dio sinchéña ndo ijie ko ícha tangi tson annta ja anta ixi chujni tjajna Sodoma.

Xrokuiinta ngajin, me e tsjoka anta
(Lc. 10:21-22)

²⁵ Hora me e ndo Jesús nichja ndo ngajin Ndotée ndo ko ja in ndachro ndo:

—Ndotána, tjá anta juasiana, Nchéé ngajni ko nunte xasintajni, ixi ja anta kuemé enta chujni tsango no e ko ni tsango tsikangi xroon, ko juinchekue ennta kain ji i ngajin sen nchejié a aséen.

²⁶ Ndotána, jaña kon en ixi ja anta jaña fiaonnta.

²⁷ *Ko ndache ndo ni ste nti a:

—Kain nge e chjána Ndotána ko je o je e ndo chuxinna ndo jan an, Chjen en ndo, ko kaxon xro an ngisen chúxin je e ndo, je o Chjen en ndo, ko jan an, Chjen en ndo, nichja a chujni ixi jaña je e na tsichuxin na Ndotána.

²⁸ Ja anta ti richondanta juachjaon ko konchrjenta, Xrokuiinta ngajin jan an ko jan an tsajon juaxruxin tsjoka anta.

²⁹ Titikaonnta ti ndachrjan ko toña anta ko nchejié a asáanta xranchi jan an ntajie a aséenna, me e jaña chao juaxruxin tsinteenta.

³⁰ Ko ti ndachrjan sinche enta tangi a ko ixra tajon sinche enta, ixra me e tangi a xra.

12

Sen chrjikao ndo Jesús kuantsjengí sen trigo nchakon tjoké e na
(Mr. 2:23-28; Lc. 6:1-5)

¹ Naa nchakon tjoké e sen judío, ndo Jesús ko sen teyuu chrikao ndo kuatsinga sen ti jii naa nunte tsikinga noatrigo; sen teyuu chrikao ndo kuen en sen jinta, méxin kuaxi sen kuantsjengí sen trigo ko juine sen noa.

² Ko ni fariseo bikon na nge e stenche e sen teyuu chrikao ndo Jesús ko ndachro na:

—¿Á ritsje e nge e stenche e ni chrjiko a ixi jai nchakon tjoké eni?, jua i sinche e ni jaña.

³ Ko je e ndo juatingíexin ndo:

—¿Á noa inta nge e jitaxin xroon ti juinche e ndo rey David ko sen chrikao ndo, hora kuen en sen jinta?

⁴ Kuixin in sen ndo a ndo Dio ko juine sen nutja tixinixin en ndo, ko je e ndo David ko sen rué e ndo, je e sen tixinixin a sen xrojuine sen nutja me e; je o sen taana.

⁵ Kaxon, ¿á bikon anta xroon tsikjin ndo Moisés ti ndachro ixi ndotaana chao nche e ndo ixra ngaxin in ni ngo nchakon tjoké eni ko xro an ijie kuama ndotaana?

⁶ Ko nduaxin xrontatjunta ixi ngisen jinichja anta jai ícha tetuan an ixi ni ngo.

⁷ *Ko ja anta tienxin anta ti ndachro xroon chijnie ndo Dio: “Jan an ndo Dio tjaun a tson inta iko ko tsjaakanta jnié ba tsayá a jan an. Jan an tja on tsingijnanta ko xrotjue e

kichuunta”, siá xrokuienxinnta chijni ji i, xrojuankata inta ijie ngata a chujni xro an nge e sinká.

⁸ Ko Chjen en ndo Dio, xjan jongí e xranchi chujni, chónða xjan ijie juachaxin ngata a nchakon tjoké eni —ichro ndo Jesús.

Ndo Jesús juinchexruen en ndo naa xi tsixema itja

(Mr. 3:1-6; Lc. 6:6-11)

⁹ Ndo Jesús sakjuixin ndo nti a ko tjume e kuixin in ndo naa ningue ni judío.

¹⁰ Ko nti a jii naa xi tsixema naa itja ko nti a kaxon ste kaxin xi fariseo ko tjaun xa tsjankata a xa ijie ngajin ndo Jesús, méxin juanchangi e xa ndo:

—¿Á chao tsoxrue en naa sen ni e nchakon tjoké eni?

¹¹ *Ko ndo Jesús ndachro ndo:

—¿Á xrojan ja anta chondanta naa kutuchjon ko iko me e xrokuitsingaya ba naa tuye nchakon tjoké eni, á xrokjui anta ko xrokuantsjenta ba?

¹² Naa chujni icha tjintee xixi naa kutuchjon. Méxin, chao sinche eni ti jian maski nchakon tjoké eni.

¹³ Tjume e ndache ndo xi ni e:

—Tinxe tjáa.

Ko je e xa kuinxe itja xa ko itja xi me e tuinxin koxruen en.

¹⁴ Tjume e xi fariseo kuachrxjin xa ni ngo ko stetoñao xa ko stexraxaon xa xranchi sinche e xa xixi tsóña xa ndo Jesús.

Ndo Jesús, ndo tsikinche e ndo Dio

¹⁵ Ndo Jesús kono e ndo xixi nge e stexraxaon xi fariseo, me e sakjuixin ndo nti a ko kueya chujni rué e ndo ko juinchexruen en ndo kain chujni ni e,

¹⁶ ko kuetuen en ndo chujni rué e ndo xixi xrochronga i na ngisen je e ndo.

¹⁷ Ja in kon en xixi ó sée tsichronga ndo Isaías chijnie ndo Dio:

¹⁸ Ndo kaincha a, nti i jii ndo ngajinnta, ndo sinche e ixra ngajin, jan an tsango tjua a ndo ko je e ndo tsango nchexruxin en ndo aséenna, ko jan an tsakée espíritu ngata a ndo

xixi je e ndo xrochronga ndo chijnina ngajin kain tjajna jii ngata a nunte xasintajni, ko chijnina me e tsóñaxin ijie ngata a kain chujni tsitikaon ana.

¹⁹ Tsjakaxin a ndo ko xro an ngisen tsuyaku e ndo,

méxin tsien a na tée ndo ngaya cha o.

²⁰ Ko ísincheníe a ndo sen ó tsikoni e,

ko jua i naatsóñaxón ndo sen ó jite en.

Na i.

Je e ndo sinchesoji ndo aséen sen soji a

ko je e ndo sinche e ndo ixra tsija nchakon je e ndo sinchéña ndo ijie.

²¹ Ko kain chujni nunte xasintajni xrochuntia na ngajin ndo.

Jaña tsichronga ndo Dio ó seno.

Ni fariseo tjangi e na ndo Jesús

(Mr. 3:19-30; Lc. 11:14-23; 12:10)

²² Kaxin chujni bilka o na naa xi ni e xixi ndo Jesús sinchexruen en ndo xa. Xi me e tikon a xa ko nichja i xa xixi chónða xa espíritu Xixron anxrée. Ko ndo Jesús juinchexruen en ndo xa ko tuinxin nichja xa ko bikon xa.

²³ Ko kain chujni ste nti a xronka na ko tjanchangi e kichuu na:

—¿Á je a ji i ndo Jesús, ndo xroxruan an ndo Dio tsikachrxjenixin ndo David?

²⁴ *Ko kuin en xi fariseo xixi jaña stenichja na, méxin ndachro xa:

—Xi Jesús ji i tantsje xa espíritu ña i xixi chónða xa juachaxien Xixron anxrée, xi tsango ña i, xi tetuen en kain espíritu me e.

²⁵ Ko je e ndo no e ndo nge e stexraxaon xa, me e ndachro ndo:

—Xro an nación jii, xixi je o na tsinteketoka o kichuu na, ko siá jaña sinche e na, nación me e tsjexin. Ko naa tjajna ti tinteketoka o kichuu na, kaxon tuinxin ni me e xrochjeke e na ko tjajna me e tsitjáña tjajna. Kaxon naa ndo tata ko chjen en ndo, siá je o sen tsinteketoka o kichuu sen, sen nchia me e xrochjeke e sen ko tsitjáña sen.

²⁶ Ko siá Xixron anxrée je o xa tsantsje xa naa espíritu tikinixin en xa jixin in ngaxin in naa chujni, je o xa tsonchjejin xa ti tituan an xa.

²⁷ Ko ja anta ndachronta xixi jan an tantsje espíritu tikinixin en Xixron anxrée xixi je e xa chjána xa juachaxin. Siá nduaxin me e, ¿ngisen tajon juachaxin ngajin ni rua anta xixi je e na

tantsje na kaxon espíritue Xixron anxrée? Ni rua anta me e tjakoxin na ixi ja anta noa inta nge e nichjanta.

²⁸ Ko siá jan an ixi espíritue ndo Dio tantsjexin espíritu tikinixin en Xixron anxrée chóna chujni, me e xrondachro ixi juachaxien ndo Dio ó kuji ti ste ja anta.

²⁹ Xranchi xrojan chujni tee tjaun tixin in ndo a naa xi tsango soji ko tjaun tsee nge e jii ndo a xi me e, zá je a sa ó xrokonda tsitee xi ndo a ko tjume e tsantsje kain nge e jii ngaxin in ndo a xa?

³⁰ *Ngisen titikaon a najan an, sen me e ningakonna sen, ko ngisen tingijna i ixra nta a, sen me e tingakon en sen.

³¹ Méxin jan an ntatjunta chao tsumé e kain ti ndako a ko ti nichjangí chujni ngajin ndo Dio. Ko ngisen xronichjangí e Espíritue ndo Dio, sen me e jua i tsumé e ti ndako a nichja sen.

³² *Ko siá xrojan ngisen xronichjangí e Chjen en ndo Dio, xjan jongí e xranchi chujni, tsumé e kain ti nichjangí na ko ti ndako a juinche e na. Ko ngisen xronichjangí e Espíritue ndo Dio, nai a tsumé e ti ndako a nichja na.

*Ntaq tajon tu jian ko ntaq tajon tu xro an xrée
(Lc. 6:43-45)*

³³ *Naa ntaq jian tajon ntaq itu jian ko naa ntaq xro an xrée kaxon xro an xrée tu tajon ntaq. Méxin, naa ntaq tajon itu, itu tsichuxixinni ntaq.

³⁴ *Ja anta tsikachrenixinnta kunchee, zméxin, xranchi xronichjanta ti jian siá ja anta je a jiannta? Ixi chujni jian, nichja ti jian ko chujni ndako a nche e, nichja ti ndako a. Ixi ti nichja ro ani me e ti xjin aséemni.

³⁵ Naa chujni jian nichja nge e ti jian ixi jian aséen. Ko chujni jian i, ti ndako a nichja na, ixi ti ndako a jiá aséen na.

³⁶ Ko jan an ntatjunta ixi tsji nchakon tsjexin kain nge e, nchakon me e sinchéña ndo Dio ijie ngajin chujni tsinichja nge e ndako a.

³⁷ Ndo Dio sinchéña ndo ijie ngajin ngujngu chujni, ngisen tsinichja jian, sen me e tsumé e ti ndako a juinche e sen ko sen ndako a tsinichja, sen me e tangi tson en sen.

*Ni ndako a nche e, tjaun na ixi ndo Jesús tsjako ndo naa ixra ijie
(Mr. 8:12; Lc. 11:29-32)*

³⁸ *Tjume e kaxin xi fariseo ko ni tjako chijnie ndo Dio ndache na ndo Jesús:

—Ja anta ti tjakonta, tja onna tsjako naninta naa nge e xrochronga á nduaxin ndo Dio xruan annta.

³⁹ *Ko je e ndo Jesús juatingéxin ndo:

—Ja anta chujni ña i, ti chuntia inta ngajin ndo Dio, tjanchianta tsjako naa nge e xrochronga á nduaxin ndo Dio xruan anna ndo, ko jan an je o xrontatjunta nge e kon en ndo Jonás, ndo kuachronga chijnie ndo Dio ó sa ó.

⁴⁰ Ndo Jonás bake e ndo ngaya tse e naa kuballena ní nchakon ko ní tiie, jaña kaxon Chjen en ndo Dio, xjan jongí e xranchi chujni, xrokonda xroxrabaa xjan ní nchakon ko ní tiie.

⁴¹ Nchakon tsjexin kain nge e ko tsoña ijie, ni tjajna Nínive tsingatjen na ko tsjangí anta na ko ndo Dio tsjankata anta ndo ijie, ixi ni me e, ni tjajna Nínive, tuinxin kuindoxin na ti ndako a kuanche e na nchakon kuin en na chijnie ndo Dio tsichronga ndo Jonás. Ko ja anta tin ennta chijnina ko tindoxin anta ti ndako a nche enta ko jan an ícha tjinteena ixi ndo Jonás.

⁴² Kaxon nchri reina tsiki xjin no Níjin, naa tjajna tsango ikjín, kuji nchra kuin en nchra chijni kuanichja ndo Salomón, nchri me e tsjankata anta nchra ijie nchakon tsoña ijie, ixi ja anta titikaon anta ti nichja maski jan an ícha tjinteena ixi ndo Salomón.

*Espíritue Xixron anxrée ikjan
(Lc. 11:24-26)*

⁴³ *Nchakon tachrxexin naa chujni naa espíritue Xixron anxrée ko ichrji ti jii nunte xema ko titja i inaa chujni no tixin in ixi tsjoké e, me e ndachro:

⁴⁴ “Cháña xrokjanna nía ti kuachrxexin ko tsixin in nti a íjngo.” Ko ti ikjan espíritu ña i nchia me e, xro an ngisen jixin in nchia ko tjúa nchia.

⁴⁵ Tjume e itji espíritu ña i ko tikao íjngo yaato espíritu nche e ixra ngajin Xixron anxrée ícha ña i. Ko kain espíritu ña i tixin in ngaxin in chujni me e, ko chujni me e ícha chjinga tson en ixi ti nchakon kuachóna naakua espíritu ña i. Jaña tson en kain chujni ndako a nche e jai.

Janée ndo Jesús ko sen kichuu ndo

(Mr. 3:31-35; Lc. 8:19-21)

⁴⁶ Ko ndo Jesús xrainichja ndo ngajin chujni ste nti a, janée ndo ko sen kichuu ndo kuiji sen ti jii ndo ko stechón en sen nduja ixí tjaun sen xronichje e sen ndo.

⁴⁷ Ko naa sen jii nti a ndache sen ndo Jesús:

—Janáanta ko sen kichuunta stechón en sen nduja ixí tjaun sen xronichja anta sen.

⁴⁸ Ko je e ndo Jesús ndachro ndo:

—¿Ngisen nduaxin janána ko sen kichian?

⁴⁹ Tjume e juakoxin itja ndo ngajin sen teyuu chrikao ndo ko ndachro ndo:

—Sen jii i me e janána ko sen kichian,

⁵⁰ Ixi sen nche e nge e tjaun Ndotána jii ngajni, sen me e janána ko sen kichian.

13

Ndo Jesús juakoxin ndo chijni tinga ngaya chjaka

(Mr. 4:1-9; Lc. 8:4-8)

¹ Nchakon me e ndo Jesús kuachrxexin ndo nchia jii ndo, tjume e sakjui ndo ngande e ndachaon* ko nti a bake e ndo nunte ixí sinchekuen en ndo chujni.

² *Ko tsango kueya chujni konchjiñe e ixí tjaun na tsin en na nge e xronichja ndo. Méxin ndo Jesús kuajin in ndo naa ntábarco ko nti a bake e ndo nunte ko chujni kuiji na ti jii nchese ngande e inda.

³ Ko kueya chijni beki e ndo na ixí jaña tsienxin chujni nge e xronidachro ti nichja ndo, Ko kuaxi beki ndo naa chijni ko ndachro ndo:

—Sakjui naa xi bikenga xa,

⁴ ko hora jitenga xa, kaxin noatrigo kuintji noa ngatja cha o ko kuji kuxe juine ba noa.

⁵ Ko kaxin noa kuintji ngakjen en ixro ti ko a itsje inche, ko noa me e tuinxin kuachrje no ixí tjín a inche.

⁶ Ko hora kuachrje chjiixro, katrigo me e xe nte ka ko xema ka ixí yasoe a jii nue e ka.

⁷ Ko kaxin noa kuintji ngakjen en ntácha a ko hora kuangi no, ntácha a me e kuintue a ntácha kuangi no.

⁸ Ko kaxin noa kuintji noa ti jii inche jian, méxin tsango jian kóna noa. Ko kaxin katrigo kuachóna naa ciento noa, ko kaxin katrigo kuachóna níi ti ikán† noa, ko kaxin katrigo kuachóna ikánte noa.

⁹ Sen chao tin en, xrokonda tsin en sen jii i.

Sonda ndo Jesús nichjaxin ndo chijni

(Mr. 4:10-12; Lc. 8:9-10)

¹⁰ Tjume e sen teyuu chrikao ndo Jesús konchjiñe e sen ngajin ndo ko juanchangi e sen ndo:

—¿Sonda je o chijni tjakoexinnta chujni?

¹¹ Ko je e ndo Jesús ja in juatingexin ndo:

—Jan an beki anta kain chijni jimá kondee ti tetuan an ndo Dio, ko ngajin ni kaxin xronatjan i na.

¹² *Ngisen no e ícha jian chijni ne e ndo Dio, ndo Dio ícha sinchekuen en ndo sen. Ko ni tjaun a tsienxin chijni ti tetuan an ndo Dio, ndo Dio sinchemé e ndo ti nchion no e na.

¹³ Méxin jan an ntakuan ana ixí chijni, ixí ni tikon, jua i tsichuxin na ti tikon na, ko ni tin en, ti tin en na, tsienxin a na.

¹⁴ Jaña tson en ixí nge e tsichronga ndo Isaías, ndo kuanichja chijnie ndo Dio ó sa ó: Chujni jii in maski ícha tsin en na,

je e na tsienxin a na,

ko maski stetsje e na,

je e na tsikon a na.

¹⁵ Ixi aséen chujni jii i tsango tsikoncha

ko ndatsjon na jije e

ko steje e ikon na ixí jaña jua i tsikon na

ko jua i tsin en na,

méxin, jua i sintama a ti ndako a nche e na

ko jua i sintaxruan an na.

¹⁶ *Tjume e ndachro ndo Jesús:

—Ja anta ti rua naninta, tsango juaxrxin tinteenta ixí ndo Dio kuajon ndo juachaxin chao tikonnta ko tienxinnta ti nichja.

* **13:1 ndachaon** mar **13:2** Lc. 5:1-3. † **13:8 ikán** veinte **13:12** Mt. 25:29; Mr. 4:25; Lc. 8:18; 19:26. **13:16** Lc. 10:23, 24.

¹⁷ Ko nduaxin xrontatjunta ixi itsjé sen kuachronga chijnie ndo Dio ko ikaxin chujni tjúá aséen, xrojueña sen xrobikon sen ti tikon ja anta, ko bikon ja sen ko kuien a sen.

Chronga ndo Jesús xranchi xrondachro ti chijni
(Mr. 4:13-20; Lc. 8:11-15)

¹⁸ Jai tin ennta nge e xrondachro ti xi ikjui bikenga chjaka.

¹⁹ Ngisen tin en chijni chronga xranchi tetuan an ndo Dio ko tienxin a sen ti kuin en sen, me e tij Xixron anxrée nchetjáñajin xa sen, méxin tjáñe e sen ti kuin en sen, me e xrondachro ti noa kuin tij ngande e cha o.

²⁰ Ko noa kuitsinga ti jii ixro me e xrondachro ngisen kuin en chijni chronga xranchi tetuan an ndo Dio ko sen me e juinche e sen juaxruxin ti kuin en sen.

²¹ Ko kuienxin a sen ndako nge e xrondachro ti chijnie ndo Dio, méxin juaxruxin kuachónda sen tuinxin juexin ixi kuij juachjaon kondeexin ti kuitikaon sen ndo Dio, méxin kuachrjendáa sen.

²² Ko noa kuitsinga ti jii ntácha a me e xrondachro ngisen tin en chijnie ndo Dio ko tindoxin a sen ti ndako a nche e sen ko ícha nche e sen juaxruxin tomi ko kain ti tjintee jii ngata a nunte. Me e nche a sen ti jian.

²³ Ko noa kuitsinga ngata a inche jian me e xrondachro ngisen tin en chijnie ndo Dio ko tienxin sen ko taxi nche e sen ti tetuan an ndo Dio. Sen me e nche e sen xranchi kaxin katrigo tajon ka ngujngu ciento noa ko kaxin ka tajon ka níkán noa ko ikaxin ka tajon ikánte noa.

Ndo Jesús juakoxin ndo chijnie ka ña i kuangika o ka noa trigo

²⁴ Tjume e ndo Jesús juakoxin ndo inaa chijni ndachro ja in:

—Ti tetuan an ndo Dio ton en xranchi naa ngisen kuenga jian nunte e.

²⁵ Ko hora juexin nchakon, kain sen sakuintejua sen ko naa xi ningakon en sen, ikjui xa bikenga xa ngakjen en trigo naa tsee kaña i ndatin in cizaña, ko sakjui xa.

²⁶ Ko nchakon kuachrje ka trigo ko kuaxi kuajon ka tién ka, sen nchexra bikon sen ixi kaxon ika ña i tsikangi ka.

²⁷ Ko kuichronga sen ngajin nchée sen ko ndachro sen: “Nchána siá ja anta kuenganta noa trigo, noa jian, ¿ti no tsiki xin ika ña i tsikangika o noa jian?”

²⁸ Ko nchée sen juatinglexin: “Naa xi ningakonna tsijinche e ña.” Tjume e sen nchexra ndachro sen: “¿Á tjaunnta itsjina tsikantsjengina kaña i?”

²⁹ Ko ndachro nchée sen: “Na i, ixi hora tsantsjenginta ka ña i, ba tsantsjenginta ka trigo ixi naxraje o tsje e ka.

³⁰ Nchakon xroxexo noa, me e tsichuxinni noa trigo ko kaña i. Tintu enta ka tsangika o kichuu ka tsija nchakon xroxexo tsee. Me e tsetuan an sen nchexra sa ó tsjejo sen kaña i, ko tsjasintja sen kichuu ka ko tsjaaka sen ka ixi xro i, ko tjume e xroxraka noatrigo ko itsji noa ti tsasin inni noa.”

Ndo Jesús juakoxin ndo chijnie tsee mostaza

(Mr. 4:30-32; Lc. 13:18-19)

³¹ Ndo Jesús juakoxin ndo naa chijni ndachro ja in:

—Nchijí ti tetuan an ndo Dio ton en xranchi naa tsee ntáa mostaza tsikenga naa xi ngata a nunte e xa.

³² Ko tsee me e tsango nchíin tsee ko nchakon tsangi ntáa mostaza, ntáa me e ntáa ícha ijíe ixi ikaxin ntáa ko kuxe nchéña ba kakée ba ngata a chaan ntáa.

Ndo Jesús juako ndo chijnie ti nchetja in chu u

(Lc. 13:20-21)

³³ Ndo Jesús juakoxin ndo inaa chijni:

—Nchijí ti tetuan an ndo Dio ton en xranchi naa nchri itsé nchra nchíin chu u nchetja in itsjé chue nutja, ko nchion chu u me e nchetsjé chue nutja.

Ndo Jesús juinche e ndo ti tsindachro naa ndo kuachronga chijnie ndo Dio ó sa ó

(Mr. 4:33-34)

³⁴ Ndo Jesús juinchekuen en ndo chujni itsjé nge e ixi bakeki e ndo na ixi chijni; ko je o chijni banchekuenxin ndo na.

³⁵ Jaña ndo Jesús juinche e ndo nge e ndachro naa sen tsichronga chijnie Dio ó sa ó:

Jan an xronichja a chujni ixi chijni

ko tseki a na nge e ti jimá kuachónda ndo Dio, ti tsixrangixion juinchéña ndo nunte xasintajni.

Kaña i ko katrigo

³⁶ Juexin nichje e ndo Jesús chujni ste nti a, tjume e kuixin in ndo nchia, ko konchjiñe e sen teyuu chrikao ndo ko ndachro sen:

—Ndachjiniinta nge e xrondachro ti ika ña i bangika o ka trigo.

³⁷ Ko ndo Jesús ndachro ndo:

—Sen benga noatrigo me e Chjen en ndo Dio, xjan jongí e xranchi chujni.

³⁸ Ko chjaka xrondachro chujni ste ngata a nunte xasintajni. Ko noatje xrondachro chujni kuayé e juachaxin tsin in chjen en ndo Dio ko tsitikaon ti tetuan anje e ndo. Ko ika ña i me e chujni nche e xrée Xixron anxrée.

³⁹ Ko xi toña, xi kuenga kaña i me e Xixron anxrée. Ko ti tsandáani me e xrondachro nchakon tsoña kain ijje ko tsjexin kain nge e. Ko sen tsandáa me e sen ángel ne e ndo Dio.

⁴⁰ Ko kaxon ti xroxexo kaña i ko tsixintja kichuu ka ko xroche ka, me e xrondachro ti tsoña ijje nchakon tsjexin kain nge e.

⁴¹ Ko Chjen en ndo Dio, xjan jongí e xranchi chujni, tsetuen en xjan sen ángel ne e xjan itsji sen nchjii ti tetuan an ndo Dio, ko tsejo sen chujni ndako a nche e ko ni nchekateya ikaxin chujni sinche e ti ndako a.

⁴² Ko sen ángel me e tsjankaya sen chujni ña i ti jii xro i xranchi naa itja; nti a xrotsjanga chujni me e ko tse to neno na.

⁴³ Ko kain sen juinche e ti jian, sen me e tsongixin sen xranchi chjiixro ti tetuan an ndo Dio. Méxin siá chondanta ndatsjonnta, jian tienxinnta ji in.

Tomi jimá

⁴⁴ Ti jii no tetuanxin ndo Dio ton en xranchi tomi tsango tjintee jixrabaa. Ko naa ngisen kuitja tomi me e ko sen me e íjngo juabaa sen tomi. Ko tsango ché e sen, méxin sakjui sen kuinchekji sen kain ti chóna sen ko tomi tsjejo sen me e tse naxin sen nunte ti no jixrabaa tomi kuitja sen.

Naa ixro tsango tjintee.

⁴⁵ Kaxon ndo Jesús ndachro ndo:

—Ti jii ti tetuanxin Dio kaxon ton en xranchi naa xi tachrí ixro tsango chaxro.

⁴⁶ Ko nchakon kuitja xa naa ixro tsango tjintee, sakjui xa kuinchekji xa kain ti nge e tjintee kuachóna xa ko ikjan xa ko kue na xa ixro me e.

Ndo Jesús juakoxin ndo ixi naa nocha a tséxin na kuceh

⁴⁷ Tjume e ndachro ndo Jesús:

—Ti jii ti tetuan an ndo Dio jii xranchi naa nocha a, ko sen itsé kuceh tjanka ngi sen nocha a me e ixi xrotsé sen ngixe i kuceh jingi inda.

⁴⁸ Ko hora kaon nocha a, tantsjengi sen nocha a ngande e inda ko nti a tsinche e sen kuceh jian ko tenga sen ba ngayantaxra. Ko kuceh xro an xrée tjanka sen ba.

⁴⁹ Jaña tson en nchakon tsjexin kain nge e ngata a nunte xasintajni. Itsji sen ángel tsinche e sen chujni jian ko chujni ndako a nche e.

⁵⁰ Ko tsjánkaxin in sen ni ndako a nche e ti jii xro i nai a tanga ko nti a xrotsjanga na ko tse to neno na ixi tsango ijje juachjaon jii nti a.

Nge e natjuá ko nge e óntaxi

⁵¹ Ndo Jesús juanchangi ndo:

—¿Á tienxinnta kain ti rintakuan annta?

Ko je e sen juatinglexin sen:

—Jaán, Nchána, tianxinna.

⁵² Ko ndachro ndo:

—Kain sen tjako ley ne e ndo Dio ko taxi tienxin sen nge e xrondachro ti juachaxin tetuan an ndo Dio, sen me e nche e sen xranchi naa xi chóna itsje nge e ngaxin in naa nchia ijje, ko nti a tantsjexin xa ti natjuá ko tintaxi.

Ndo Jesús ikjui ndo tjajna Nazaret

(Mr. 6:1-6; Lc. 4:16-30)

⁵³ Ko hora juexin juinчекuen en ndo na kaxin chijni, ndo Jesús sakjuixin ndo nti a,

⁵⁴ ko kuuji ndo tjajné ndo, tjajna Nazaret. Kuaxi ndo juinчекuen en ndo chujni ngaxin in ningue ni Israel. Ko chujni me e xronka na ko stendachro na:

—Xi ji i, ¿ti no tsikitjxin xa kain ti nichja xa ko xranchi nche e xa kain ixra ijje?

⁵⁵ Ko ikaxin na stendachro na:

—¿Á je a ji i chjen en ndo José, ndo tame e ntaq, ko janée xa jan María ko xi kichuu xa, xi Santiago, José, Simón ko xi Judas?

⁵⁶ Ko tjajna nti i ste kaxin nchri kichuu xa. ¿Xranchi no e xa kain ji in ko xranchi nche e xa kain ti ixra ijje?

⁵⁷ *Ko ninaa ni ste nti a kuitikaon a na nge e juako ndo Jesús. Méxin ja in ndachro ndo:
 —Kain tjanya chujni tajon na juasie na ngajin naa ndo chronga chijnie ndo Dio. Ko ni tajajné ndo, na i, ko kaxon ni ndo a ndo tjaun a na tajon na juasie na.
⁵⁸ Ko ixi titikaon a ni tajajné ndo, méxin tsjé a chujni juinchexruen en ndo nti a.

14

Xranchi kuen en ndo Juan bikitée chujni

(Mr: 6:14-29; Lc: 9:7-9)

¹ Nchakon me e xi ndatin in Herodes Antipas, xi tituen en nunte Galilea, kuin en xa ti kuanichja chujni nge e jian kuanche e ndo Jesús.

² Ko naa nchakon ndache xa ni nchexrée xa:

—Xi Jesús me e xi Juan Bautista ko jai tsixechón xa. Méxin chóna xa ijié juachaxin nchexruen en xa chujni.

³ *Xi Herodes tsixraxin in xa ndo Juan, ngaxin in ndo a chjiso ko nti a tsikintee xa ndo ixi chika cadena kondeexin nchri Herodías, nchrinchri e xi Felipe, xi kichuu xi Herodes

⁴ ixi tsindache ndo xa:

—Ndako a juinche e ja a ixi kuantsje e xi kichuu, Felipe, nchrinchri e xa, nchri Herodías, ko kuta a nchra.

⁵ Xi Herodes tjaun xa naaxrokónaxón xa ndo Juan, ko jua i ixi kuaxrakon en xa chujni ixi kain ni tjanya me e titikaon na ixi je e ndo Juan me e naa ngisen nduaxin tjako chijnie ndo Dio.

⁶ Ko nchakon kuitja xa nano, juinchéña xa kiée xa, ko nchrixajo en xa, nchrichje en nchri Herodías, chaxro ité nchrichan ko bikon kain ni ikjui kiée xa. Ko tsango juinche e xa juaxruxin xranchi ité nchrichan,

⁷ méxin ndache xa nchrichan ko nichjaxin xa ngatoxin ndo Dio ixi nduaxin tsajon xa ngajin nchrichan ngixe i nge e xrojuanchia nchrichan.

⁸ Ko nchri Herodías juinchekateya nchra nchrichje en nchra, méxin ja in ndachro nchrichan:

—Chjánana ngaya naa laato jaa xi Juan tikitée chujni.

⁹ Ko xi rey Herodes tsango koni e aséen xa ixi ti juanchia nchrichan ixi je e xa tsindachro xa ixi nduaxin xrokuajon xa ti xrojuanchia nchrichan ko ixi kain ni ste nti a kuin en na, méxin kuituan an xa tson en xranchi ndachro nchrichan.

¹⁰ Ko kuetuan an xa ixi tsonchrijin na jaa xi Juan ngaxin in ndo achjiso.

¹¹ Ko tjume e bika o na jaa xi Juan ngaya naa laato ko kuayé e nchrichan, ko je e nchrichan kuajon nchrichan jaa xa ngajin janée nchrichan.

¹² Ko kuin en sen chrikao ndo Juan ixi jaña tsikon en, me e juirue e sen ndo ko juabaa sen ndo, ko tjume e kuichronga sen ngajin ndo Jesús nge e kon en.

Ndo Jesús kuajon ndo juine na ó mil chujni

(Mr: 6:30-44; Lc: 9:10-17; Jn: 6:1-14)

¹³ Ko hora kuin en ndo Jesús ixi jaña tsikon en ndo Juan, kuixin in ndo ngaxin in naa ntábarco ko sakjui ndo ti xro an chujni jii ixi je o ndo tjaun ndo tsake e ndo. Ko kain chujni kuin en ixi sakjui ndo ko kueya na kuachrjexin na tajajné na ko tutée na ruexin na ndo.

¹⁴ Ko hora kuachrjexin ndo Jesús ntábarco, bikon ndo ixi tsango itsjé chujni jii nti a, bikonóe e ndo na ko juinchexruen en ndo kain ni ni e tsikika o na.

¹⁵ Ko ó jitondaya nunte ko sen teyuu chrikao ndo Jesús konchjiñe e sen ngajin ndo, ko ndachro sen:

—Ó jitóndó ko nti i xro an nge e jii sinena. Cháña ndachenta na satsji na naa tjanya tsijée na naa nge e sine na.

¹⁶ Ko je e ndo Jesús ja in juatingíexin ndo:

—Na i. Xrokonda i satsji na. Ja anta chje énta na nge e sine na.

¹⁷ Ko je e sen juatingíexin sen:

—Xro an nge e chondana, je o na ó nutja ko yuu kuchee.

¹⁸ Ko je e ndo Jesús ndachro ndo:

—Kuaxinta nti i nge e chondanta.

¹⁹ Ko kuetuan an ndo chujni tsjoké e na ngata a kayua ko itsé ndo ti na ó nutja ko ti yuu kuchee ko tsje e ndo ngajni ko kuajon ndo juasie ndo ngajin ndo Dio. Tjume e konchrinjin ndo nu ko kuajon ndo nu ngajin sen teyuu chrikao ndo ko kao kuchee tsonchjeye e sen chujni.

²⁰ Ko kain na juine na jian, ko kaon na. Ko juexin juine kain chujni, sen teyuu chrikao ndo Jesús juejo sen ti xe e, teyuu ntaxra.

²¹ Ko ni juine xranchi na ó mil je o chujni xi, ko beki a sen sen nchri ko ichjan.

Ndo Jesús itji ndo ngataon inda

(Mr. 6:45-52; Jn. 6:16-21)

²² Ko tjume e kuituen en ndo Jesús sen teyuu chrikao ndo ko ndachro ndo:
—Tajiinta ntábarco ko tatsingato enta ndachaon. Jan an tsituna nti i xrontatjan chujni satsji na ko banchixon xrorua anta.

²³ Ko juexin chjeke e chujni, ndo Jesús sakjui ndo naa ijna je o ndo ixí nti a xronichje e ndo ndo Dio. Ko nti a je o ndo bake e ndo ko ó tiie.

²⁴ Ko ntábarco ó kuiji ntáa ngusine ndachaon ko kuaxi binga naa chrinto tsango soji ko inda jijamangitaon nda ko tjaun nda tsonjamangi nda ntábarco, ko ícha jitosoji chrinto.

²⁵ Ko ndúyo xranaxixe e ndo Jesús konchjiñe e ndo ti jii ntábarco ko jitixin tutée ndo ngata a nda.

²⁶ Ko sen teyuu chrikao ndo bikon sen naa ngisen jitixin tutée ngata a nda ko juatsuan i sen ndo, méxin tsango xronka sen ko kuyako sen séen:

—¡Naa ntacha an, naa ntacha an!

²⁷ Ko ndo Jesús tuinxin nichje e ndo sen:

—Xrakon anta ixí jan an jui i.

²⁸ Ko ndo Pedro juatinglexin ndo ko ndachro ndo:

—Nchána, siá nduaxin ja anta, tituan annta ixí jan an kaxon tsjixin tutéena ngata a inda ko tsjaso ti ritjennta.

²⁹ Ko ndo Jesús ndachro ndo:

—Xrokuia.

Ko tuinxin ndo Pedro xingajinxin ndo ntábarco ko kuaxi juixin tutée ndo ngata a nda ti no jii ndo Jesús.

³⁰ Ko chrinto soji juinchexronka ndo Pedro ko jitaxin jitenunte ndo chringi inda ko kuyako ndo:

—Nchána, ¡tingijnaninta!

³¹ Ko ndo Jesús tuinxin koka itja ndo ko itsé ndo ndo Pedro ko ndachro ndo:

—Pedro, ¿sonda tsango nchion chuntiana ko sonda xronka?

³² Ko tjume e yui sen kuajin in sen ntábarco ko tuinxin kuíxin chrinto.

³³ Ko sen stexin in ntábarco bake exin ntatuchi in sen ngajin ndo Jesús ko ndachro sen:

—¡Nduaxin Chjen en ndo Dio ja anta!

Ndo Jesús juinchexruen en chujni ni e nunte Genesaret

(Mr. 6:53-56)

³⁴ Tjume e juexin kuatsingatu e sen ndachaon ko kuiji sen nunte Genesaret.

³⁵ Ko chujni tjanya me e kuichúxin na ndo Jesús, ko juincheno e na kainxin tjanya ste nunte me e ixí ndo Jesús nti a jii ndo ko chujni me e bika o na kain ni ni e.

³⁶ Ko kuinóatée ni ni e ixí maski ngande e mantée ndo xrotsé na, ko nduaxin kain ni itsé mantée ndo, koxruen en na.

15

Ti nchekateya chujni ixí ti ndako a sinche e

(Mr. 7:1-23)

¹ Tjume e konchjiñe e kaxin xi fariseo ko kaxin xi tjako chijnie ndo Dio tsikí xin tjanya Jerusalén ko juanchangi e xa ndo:

² —¿Sonda sen chrijiku unta nche a sen nge e kuanche e sen tachrí ina ixí xrokonda sa ó sinéma itja sen ko tjume e sine sen?

³ Ko ndo Jesús juanchangi ndo:

—¿Sonda ja anta rue énta nge e kuanche e na ko jaña ndá a tintu enta nge e tsiketuan an ndo Dio?

⁴ Ixi ndo Dio ndachro ndo: “Chonde enta juasaya ndotánta ko janáanta ko tayakon ennta sen”, ko “Ngisen ndako a nichja ngajin ndotée sen ko janée sen, xrokonda tsen en sen.”

⁵ Ko ja anta ndachenta chujni ixí chao xrondache na ndotée na ko janée na: “Jan an jua i tsingijnanta ixí kain nge e chonda, ó ntatjan ndo Dio ixí je e ndo tsayé e ndo.”

⁶ Ko ngixe i chujni xrondachro jaña, íxrokonda i tsingijna ndotée ko janée. Ko ixí ja anta tjakonta jaña, méxin juinchemé enta nge e kuituan an ndo Dio ko ja anta nche enta nge e tsikituan an sen xranchrjen.

⁷ Ja anta ti tjako yuu ikonnta. Nduaxin ti sindachro ndo Isaías, ndo kuachronga chijnie ndo Dio ó sa ó:

⁸ Chujni tjanya ji i ndachro na ixí tajon na juasaya ngajin je o ixí ro a na, me e ti nichja na ko je a nduaxin,

ko ngaya aséen na titikaon a na.

⁹ Méxin, xro an tjintee ti chjána na juasaya
ixi je o tjako na nge e tetuan an chujni.

¹⁰ Ko ndo Jesús kuiye e ndo chujni ste nti a ko ndachro ndo:

—Tin ennta ti ntatjunta ko tiensinnta.

¹¹ Je a ti ine chujni me e sinchekitja aséen. Na i, ti nichja na ko ti nichjangí na me e ti nchekitja aséen na.

¹² Tjume e sen teyuu chrikao ndo Jesús konchjiñe e sen ngajin ndo ko ndachro sen:

—Xi fariseo koñao xa ixi nge e ndachronta.

¹³ Ko ndo Jesús juatingiexin ndo:

—Kain ika, ka benga i Ndotána jii ngajni, kain ka me e xrokonda tsachrjengixin nue e ka.

¹⁴ *Ta inta juachjaon ixi xi fariseo ña, ntakutsin xa ko ni rué e xa kaxon ntakutsin na. Ko sía naa xi ntakutsin tikao inaa xi ntakutsin, yui xa tsitsingaya xa naa tuye.

¹⁵ Ndo Pedro ndache ndo ndo Jesús:

—Ndachijininta nge e xrondachro chijni ji i.

¹⁶ Ndo Jesús ndachro ndo:

—¿Á kaxon ja anta tienxin anta?

¹⁷ ¿Á tienxin anta ixi kain nge e ti ineni itji ngaya tse eni ko tjume e tahrje?

¹⁸ *Ko ti ndako a nichja chujni ti xin ngaya aséen, ko me e nchekitja aséen na.

¹⁹ Ixi aséen chujni tahrjexin ti jian i ko kain ti ndako a xraxaon na, ti naatsóñaxón naa chujni, ko ti tsekao na inaa nchri, nchri je a nchrinchi e na, ko je o xraxaon na xrochóna itsjé nchri, ko ti tjauñ na tsee na, ko ti ncheya na ko ti tenge e kichuu na teka.

²⁰ Kain ji i me e nchekitja aséen chujni, ko maski tsitikaon a na ixi sinéma itja na hora sine na, je a me e tsamaxin na ijie.

Naa nchri tajna Canaán chuntia nchra ndo Jesús

(Mr: 7:24-30)

²¹ Tjume e ndo Jesús kuachrjexin ndo tajna Jerusalén ko sakjui ndo tajna Tiro ko tajna Sidón.

²² Ko naa nchri cananea jii ndo a nchra no nunte me e, kuij nchra ngajin ndo Jesús ko séen jitoyako nchra:

—Nchána, Chjen en ndo David, tikonóananinta ixi xjanchrichjan na chóna xjan naa espíritu Xixron anxrée ko tsango tangi jii xjan.

²³ Ndo Jesús juatengiexin a ndo. Ko sen teyuu chrikao ndo konchjiñe e sen ngajin ndo ko ndache sen ndo:

—Nchána, ndachenta nchra satsji nchra ixi tsango tuyako nchra ko jirua ina nchra.

²⁴ Ko ndo Jesús ndachro ndo:

—Ndo Dio xruan anna ndo tsingijna sen tjanána Israel ixi je e sen tsingachrue sen xranchi kutuchjon.

²⁵ Ko je e nchri cananea konchjiñe e nchra ko bake exin ntatuchi in nchra ngajin ndo Jesús, ko ndachro nchra:

—Nchána, jtingijnaninta!

²⁶ Ko ndo Jesús ndachro ndo:

—Ndako a jii tsantsje eni chjen enni nutja ko xrochjéeni kunia sine ba.

²⁷ Ko je e nchra ndachro nchra:

—Nchána, nduaxin me e. Ko kaxon kunia ine ba nutja tutu o titsingaxin ti neta a nchéé ba.

²⁸ Tjume e ndachro ndo Jesús:

—Nduaxin ja a tsango chuntiana. Tson en xranchi ja a tjauan.

Ko hora me e chjen en nchra tuinxin koxruen en xjan.

Ndo Jesús juinchexruen en ndo itsjé chujni ni e

²⁹ Ko ndo Jesús sakjuixin ndo nti a ko kuiji ndo ngande e ndachaon ndatin in Galilea. Tjume e kuiji ndo naa ijna ko nti a bake e ndo nunte.

³⁰ Ko itsjé chujni konchjiñe e na ngajin ndo ko bika o na chujni ntarengo ko ni tikon a ko ni nosin ko chujni ntamango ko ikaxin ni ni e bake e na tjenska tutée ndo Jesús ko je e ndo juinchexruen en ndo ni ni e me e.

³¹ Ko kain chujni ste nti a tsango xronka na ixi bikon na ixi ni nosin ó chao nichja na ko ni ntamango chao koxruen en na ko ni ntarengo ó chao itji na ko ni ntakutsin chao tikon na. Ko tjume e kuaxi na kuajon na juasie na ngajin ndo Dio ne e ni tajna Israel.

Ndo Jesús kuajon ndo juine noó mil chujni

(Mr. 8:1-10)

- ³² Tjume e ndo Jesús kuiye e ndo sen teyuu chrikao ndo ko ndachro ndo:
—Tsango tikonóa a kain chujni ji i xixi ó ní nchakon ste na ngajin ko chóna i na nge e sine na. Ko tjaun a xrontatjan na satsji na ndo a na ba tsjejeña na xixi jinta ngatja cha o.
- ³³ Ko sen teyuu chrikao ndo juatingéxin sen:
—Nti i ti stena, xro an ngisen jii, ¿ti no tsanchiana nge e sine na xixi tsango kueya na?
- ³⁴ Ko ndo Jesús juatingéxin ndo:
—¿Ngijan in nutja chondanta?
Ko je e sen ndachro sen:
—Yaato nutja ko kaxin kucheé nchínchín.
- ³⁵ Ko ndo Jesús kuituen en ndo kain chujni tsjoké e na ngata a nunte.
- ³⁶ Ko itsé ndo ti yaato nutja ko kucheé ichjan ko kuajon ndo juasie ndo ngajin ndo Dio. Ko kuaxi konchrijin ndo nutja ko chjé ndo sen teyuu chrikao ndo ko je e sen konchjeya sen nutja ko kucheé ngajin chujni ste nti a.
- ³⁷ Kain na juine na jian ko kaon na, ko xra xejo yaato ntaxra nutja tutu o ti tsikonchrijin ndo.
- ³⁸ Ko ni juine nchakon me e noó mil chujni xi. Ko beki a sen chujni nchri ko ichjan.
- ³⁹ Tjume e ndo Jesús chjé ndo na juajna ko sakjui na ko je e ndo kuajin in ndo ntábarco ko sakjui ndo no nunte Magdala.

16

Xi fariseo ko xi saduceo tjanche e xa ndo Jesús naa ixra ijie

(Mr. 8:11-13; Lc. 12:54-56)

- ¹ *Kaxin xi fariseo ko kaxin xi saduceo ikjui xa ngajin ndo Jesús xixi tjaun xa ndako a xronichja je e ndo, méxin ndachro xa xixi ndo Jesús xrojuakoxin ndo naa ixra ijie, me e xrokuatikaon xa xixi nduaxin je e ndo kuixin ndo xixi juachaxien ndo Dio.
- ² Je e ndo Jesús juatingéxin ndo ndachro ndo:
—Ó kóno ko ja anta tsje enta ngajni ko ndachronta: “Chaxro sinche e nchakon xixi játse ngajni.”
- ³ Ko ndúyo tsje enta ngajni ko ndachronta: “Jai chaxro a sinche e nchakon xixi játse ngajni ko tsango jii itjui tiie.” Ja anta tsango jian tienxinnta ngixranchi sinche e nchakon, ¿sonda tienxin anta nge e ixra nta a jan an xixi ji in tjxin xixi juachaxien ndo Dio?
- ⁴ *Ja anta na inta ko tjanchianta naa ixra ijie* tson en tsikonnta. Ko tsikon anta tson en ixra ijie me e, je o tsikonnta xranchi kon en ndo Jonás, ndo kuanichja chijnie ndo Dio ó sa ó. Tjume e ndo Jesús sakjui ndo ko kuintu e ndo ni ste nti a.

Ti tjakoxin ni fariseo

(Mr. 8:14-21)

- ⁵ Ndo Jesús ko sen teyuu chrikao kuatsingatu e sen ndachaon ndatin in Galilea ko sen teyuu chrikao ndo tsitjáne e sen nutja.
- ⁶ *Me e ndachro ndo Jesús:
—Jian tsje enta nge e xronachro ti chu u nchetja in nutjé xixi fariseo ko xi saduceo.
- ⁷ Ko sen teyuu chrikao ndo Jesús ndache kichuu sen:
—Ja in ichro ndo xixi tjáña na nutja.
- ⁸ Ko ndo Jesús kono e ndo nge e stendachro sen, méxin ndachro ndo:
—¿Sonda ndachronta xixi chonda inta nutja? Ja anta chuntia ininta, méxin nichjanta jaña.
- ⁹ *¿Á xraxaon anta o tienxin anta ti na ó nutja chjeye e na ó mil chujni juine na ko ngijan in ntaxra nutja xejo ti tsixe e?
- ¹⁰ *Ko, ¿á sintaxi añaaonta xixi yaato nutja konchjeye enta noó mil chujni juine ko ngijan in ntaxra juejonta ti nutja tsixe e?
- ¹¹ ¿Á kuienxin anta xixi jan an je a nutja rindachrjan hora ntatjunta xixi jian tsje enta nge e tjako xixi fariseo ko xi saduceo?
- ¹² Tjume e kuienxin sen teyuu chrikao ndo Jesús xixi je a kondee chu u nchetja in nutja jinichja ndo. Na i. Je e ndo jindachro ndo xixi ti nge e tjako xixi fariseo ko xi saduceo me e jian xrotsje e sen xixi ti nichja xa ndako a jii.

Chronga ndo Pedro xixi ndo Jesús me e ndo Cristo

(Mr. 8:27-30; Lc. 9:18-21)

¹³ Hora kuiji ndo Jesús nunte tjajna Cesarea de Filipino me e ndache ndo sen teyuu chrikao ndo:

—¿Nge e ndachro ni tjajna ixi Chjen en ndo Dio, xjan jongí e xranchi chujni?

¹⁴ *Ko je e sen ndachro sen:

—Kaxin na ndachro na ixi ja anta ndo Juan batikitée chujni ko ikaxin na ndachro na ixi ja anta ndo Elías ko ste ikaxin na ndachro na ixi ja anta ndo Jeremías o ngixe i inaa sen kuachronga chijnie ndo Dio ó sa ó.

¹⁵ Tjume e juanchangi ndo Jesús:

—¿Ko ja anta nge e chronta, ngisen jan an?

¹⁶ *Ko ndo Simón Pedro juatingíexin ndo ko ndachro ndo:

—Ja anta ndo Cristo, Chjen en ndo Dio, ndo jichón.

¹⁷ Ko ndo Jesús ndachro ndo:

—Juaxruxin take é ja a Simón, chjen en ndo Jonás, ixi xro an chujni juntano a ji in. Je e Ndotána jii ngajni juntano a.

¹⁸ Ko jan an sintaki ian ixro me e xrondachro Pedro, ko ngata a ixro ijié ji in tsakée ningona ko maski tsij juachjaon tsenxin chujni jua i tsitjáña ningona.

¹⁹ *Ko xrotjá a chika xitjeexin ntáchja ti tetuan an ndo Dio ko ja a tsayé e juachaxin chao kain tsintee nti i ngata a nunte xasintajni ko ti jii ngajni kaxon jua i xroxindanga; ko kain nge e xroxindanga nti i ngata a nunte xasintajni, jii juachaxin ixi ngajni chao xroxindanga.

²⁰ Tjume e ndo Jesús kuetuen en ndo sen teyuu chrikao ndo ixi tseki a sen ixi je e ndo, ndo Cristo.

Ndo Jesús chronga ndo ixi xrokonda tsen en ndo

(Mr. 8:31–9:1; Lc. 9:22-27)

²¹ Nchakon me e kuaxi ndo Jesús ndache ndo sen teyuu chrikao ndo ixi xrokonda satsji ndo tjajna Jerusalén ko nti a xi tetuan an ni ngo ko xitaana ko xi tjako ley ne e ndo Dio tsango sincheni e xa ndo ko naatsóñaxón xa ndo, ko nchakon nínxin xroxechón ndo.

²² Ko ndo Pedro kuantsjendáa ndo ndo Jesús ko kuaxi kuyakutee ndo ndo ko ndachro ndo:

—Nchána ndo Dio tsajon a juachaxin tson en me e, ko ja anta xro an nge e tson annta.

²³ Tjume e ndo Jesús ngatjia ndo ko ndache ndo ndo Pedro:

—Ndá a satjia ja a, Xixron anxrée. Tingakonna ia ti nge e tsónna ixi ja a tienxin a xranchi xraxaon ndo Dio. Ja a xraxaon xranchi xraxaon chujni.

²⁴ *Tjume e ndo Jesús nichje e ndo sen teyuu chrikao ndo, ko ndachro ndo:

—Síá xrojan ja anta tjaunnta xrorua naninta, xrokonda tsintu enta kain nge e tjakuexin asáanta, ko tamanta ntá cru ko rua naninta.

²⁵ *Ixi ngisen tjaun a tsen en, sen me e tsen en sen. Ko ngisen tsen en ixi kondanaxin jan an, sen me e tsitjáña i sen ko xrochóna sen juachaxin tsechón sen kain nchakon.

²⁶ Ixi, ¿nge e tsjacha naa sen síá tsetuen en sen nchijí nunte xasintajni ko xrochóna sen itsjé tomi, ko sinchetjáña aséen sen? Ixi tomi me e jua i tsjengaxin sen na ixi tsechón aséen sen.

²⁷ *Ko Chjen en Dio, xjan jongí e xranchi chujni, tsika o xjan ijié juachaxin ko ijié chjiixro ne e Ndotée xjan, ndo Dio, ko kaxon tsika o xjan sen ángel ne e ndo ko tjume e tsjenge e xjan na ngujngu chujni ixra juinche e ngata a nunte nti i.

²⁸ Ko nduaxin ntatjunta ixi kaxinnta ti stenta nti i xratsen anta ko tsikonnta xranchi tsij Chjen en ndo Dio, xjan jongí e xranchi chujni, tsika o xjan ijié juachaxin ko tsituan an xjan nti i.

17

Kuindoxin xranchi tsje eni ndo Jesús

(Mr. 9:2-13; Lc. 9:28-36)

¹ Kuatsingaja ikaon nchakon ndo Jesús sabikao ndo ndo Pedro ko ndo Jacobo ko ndo Juan, ndo kichuu ndo Jacobo; je o sen ikjui sen naa ijna tsango noi.

² Nti a ste sen ko tuinxin bikon sen ixi kuindoxin ndo Jesús. Ikon ndo jitóngíxin xranchi chjiixro ko manta jitsáa ndo tjúá manta xranchi naa xro i tóngíxin.

³ Ko kaxon bikon sen nti a jii ndo Moisés ko ndo Elías stetjao sen ndo Jesús.

⁴ Tjume e ndo Pedro ndache ndo ndo Jesús:

—Nchána, chao ndatsojana nti i. Ko síá tjaunnta sintáñana níi nchia, naa nchia ja anta ko naa nchia ndo Moisés ko naa nchia ndo Elías.

⁵*Ko xrajnichja ndo Pedro, naa itjuj tsango jitóngixin kuitsía sen ko ngakjen en itjuj me e kuin en sen naa téé inaa sen nichja ko ndachro sen ja in:

—Ji in chjan na tsango tjua a* ko tsango juaxruxin ritjén ixi ixrā jinche e je e xjan. Titikaonnta nge e nichja xjan.

⁶Hora kuin en sen chrikao ndo Jesús, tuinxin bake exin ntatuchi in sen ko bake e ikon sen ngata a inche ixi tsango xronka sen.

⁷Tjume e ndo Jesús konchjiñe e ndo ngajin sen, bake e itja ndo ngata a sen ko ndachro ndo:

—Tingatjennta ko xrakon anta.

⁸Ko tuinxin ikjan tsje e sen ti no jii ndo Jesús ko xro an ngisen bikon sen jikao ndo.

⁹Ko hora xingajinxin sen ijna, ndo Jesús kuetuen en ndo sen:

—Xro an ngisen teki énta nge e bikonta jai, hasta ti xroxechónjan Chjen en ndo Dio, xjan jongi e xranchi chujni.

¹⁰Ko sen teyuu chrikao ndo Jesús juanchangi e sen ndo:

—¿Sonda ndachro sen tjako ley kuituan an ndo Dio, ixi sa ó tsji ndo Elías ko tjume e tsji ngisen tsajon juachaxin tsechón chujni kain nchakon?

¹¹Ko ndo Jesús juatingéxin ndo:

—Nduaxin me e, sa ó tsji ndo Elías ixi je e ndo sinchekonchjian ndo kain nge e.

¹²*Ko jan an nduaxin xrontatjunta ixi ndo Elías ó kuji ndo, ko chujni kuichúxin a nā ndo, méxin chinga juinchekaon nā ndo. Ko jan an Chjen en ndo Dio, xjan jongi e xranchi chujni, jaña sinchenana kaxon ko tsango sinchenína nā.

¹³Me e sen teyuu chrikao ndo Jesús kuienxin sen ixi je e ndo jinichja ndo ixi ndo Juan bikitée chujni.

Ndo Jesús juinhexruen en ndo naa chjan chónda naa espíritu ña i
(Mr. 9:14-29; Lc. 9:37-43)

¹⁴Ko naa nchakon kuiji sen ti jii tsango itsjé chujni, me e konchjiñe e naa xi, xi me e bake exin ntatuchi in xa ngajin ndo Jesús ko ndachro xa:

¹⁵—Nchána, tikonóe énta chjan na ixi je e xjan chonda xjan ichin tendaa ko tsango tangi ton en xjan. Nanaunka titsinga xjan ngata a xro i ko ngangí inda.

¹⁶Bikian xjan nti i ko sen chrjiku unta jua i juinhexruen en sen xjan.

¹⁷Ko ndo Jesús ndache ndo sen teyuu chrikao ndo:

—Ja anta chujni ndako a xraxaon ko titikaon aninta jan an. ¿Ti ngisa xrokonda tsake e ngajinnta?, ko, ¿ti ngisa tsokuaxinna nge e nche enta? Kuaxinta xjan nda i.

¹⁸Ko tjume e ndo Jesús kuyakutee ndo espíritu xi ña i ko tuinxin espíritu me e kuachrxjin xjan ko ndakoxruen en xjan.

¹⁹Tjume e sen teyuu chrikao ndo Jesús ndá a kuiye e sen ndo ko juanchangi e sen ndo:

—¿Sonda jan anna jua i kuantjsena espíritu ña i?

²⁰*Me e ndo Jesús juatingéxin ndo:

—Ja anta chuntia ininta. Ko jan an nduaxin ntatjunta siá ja anta je o xrochuntianinta naanchion xranchi naa tseé ntamostaza tsango nchiin tseé, me e chao xrondachenta jnā ji in: “Ndá a tjia”; ko jaña xrokron en ixi ijnā xrokuitikaon jnā. Ko siá nduaxin xrochuntianinta, chao sinche enta kain ixrā tsetuan annta.

²¹Ixi kain espíritu kichuu ñā je o tachrxjin siá nduaxin xronichja naninta kain nchakon ko sinchekatse ñaonta jinta.

Íjngo chronga ndo Jesús ixi tsen en ndo
(Mr. 9:30-32; Lc. 9:43-45)

²²Xrasteyáa sen cha o nunte Galilea, ndo Jesús ndachro ndo ixi je e ndo Chjen en ndo Dio, xjan jongi e xranchi chujni, xrotsé nā ndo ko tsikao nā ndo ngajin ni tetuan an,

²³ko naatsónaxón nā ndo. Ko nchakon nínxin xrokonda xroxechón ndo. Ko ti ndachro je e ndo tsango juincheni e aséen sen teyuu chrikao ndo.

Ndo Jesús juenga ndo nā ti juanchia nā kondee ni ngo

²⁴Nchakon ndo Jesús ko sen teyuu chrikao ndo kuiji sen tjajna Capernaum, ni xenge e nā ne e ni ngo kuitsje e nā ndo Pedro ko juanchangi e nā ndo:

—Ndo ntakuan annta, ¿á tjenga ndo nā tomi ne e ni ngo?

²⁵Ko ndo Pedro juatingéxin ndo:

—Jaán, tjenga ndo na.

Ko hora ndo Pedro kuixin in ndo nchia ti ste kain sen, ndo Jesús sa ó nichja ndo ko ndachro ndo:

—Ndachijiana, Pedro, xi tetuan an ngata a nunte nti i, ¿ngisen tjanche e xa ixi xrokonda tsjenga na na? ¿Á ni tjañée xa o ni tsiki xin inaa tjaña?

²⁶ Ko ja in juatingéxin ndo Pedro:

—Ni tsiki xin inaa tjaña.

Ko ndachro ndo Jesús:

—Sen tjañée xrokonda i tsjenga sen na.

²⁷ Ko ixi tjaun a tsoñao na, itjia ti jii ndachaon ko tjanka ngia chika tséxinni kucheë ko kucheë sa ó xrotsé, tantje e ro a ba, ko tsinchia naa tomi ko tomi me e tjenga na ti tikinixin jan an ko ja a.

18

¿Ngisen ícha tjintee ti jii ngajni?

(Mr. 9:33-37; Lc. 9:46-48)

¹*Nchakon me e sen teyuu chrikao ndo Jesús konchjiñe e sen ngajin ndo ko juanchangi e sen ndo:

—¿Ngisen ícha tsitee ngajni ti tetuan an ndo Dio?

² Tjume e ndo Jesús kuiye e ndo naa chjan, ko bake e ndo xjan ngusine ti ste sen,

³*ko ndachro ndo:

—Nduaxin ntatjunta ixi siá tjaunnta tsixin innta ti tetuan an ndo Dio, xrokonda tsindox-innta ko tsaxi sinche enta xranchi nche e naa xjan nchiín.

⁴ Ixi ti tetuan an ndo Dio, sen ícha tjintee, nchejié a aséen sen xranchi naa chjan ji i.

⁵ Ko ngisen xrotjue e ko tsayé e sen naa chjan nchiín xranchi xjan ji i, me e nduaxin titikaonna sen, ko xrokjui xranchi xrokuaye ena sen jan an.

Chujni nchekateya ixi sinche e na ndako a

(Mr. 9:42-48; Lc. 17:1-2)

⁶ Siá xrojan naa xjan nchiín titikaonna jan an, ko kondeexin xrojan chujni, xjan me e xrojuinche e xjan ti ndako a, ni me e cháña xrotsé na naa ixro ijié ti tontsingaxin ko xrokuinnee na ixro tusin na, ko xrokuitsingangi na ndachaon ti yaso e.

⁷ Lastu nunte xasintajni ixi jii nge e sinchengachrue chujni ixi tsitikaon a na chijnie ndo Dio, ko lastu ni sinchekateya chujni ixi sinche e na ti ndako a.

⁸*Méxin siá kondeexin tjáanta o tutáanta, ja anta sinche enta ti ndako a, cháña tonchri-jinnta ko ndá a tjankanta, ixi maski xrochonda inta naa tjáanta o naa tutáanta tsarichonnta kain nchakon, ko xrochondanta yui tjáanta ko yui tutáanta ko jaña nchijínta itsjinta ti jiche xro i kain nchakon.

⁹*Ko siá ti tsikon ikonnta, kondeexin me e nche enta ti ndako a, cháña tantsjengi ikonnta ko ndá a tjankanta, ixi maski ntakutsinnta, ja anta tsarichonnta kain nchakon. Ko yuxin ikonnta xrochondanta, jaña satsjinta ngangi xro i ko nti a tsake enta kain nchakon.

Chijnie naa kutuchjon

(Lc. 15:3-7)

¹⁰*Ndachro anta ixi tjinte a kaxin xjanchínchín ji in, ixi xjan ji in, sen ángel ne e xjan, sen ste ngajni ti jii Ndotána, je e sen tjanchia sen ixi je e xjan.

¹¹ Ixi Chjen en ndo Dio, xjan jongí e xranchi chujni, kuji xjan bijée xjan chujni kuitjáña ko sinchemé e xjan jíee sen.

¹² ¿Nge e chronta? Siá naa xi chóna naa ciento kutuchjon ko siá kuitjáña naa ba, ¿a tsintue a xa nti a ti noventa y nueve ba ti jii ijna ko tjume e tsijée xa iko kuitjáña?

¹³ Ko siá tsitja xa kutuchjon me e, á je a ícha tsake e xa juaxruxin ixi kuitja xa iko kuitjáña ixi kain iko kuitjáña i.

¹⁴ Jaña kaxon Ndotána jii ngajni tjaun a ndo tsitjáña ninaa xjanchín ji i.

Xranchi xrotjaña ananta ti ndako a junta anta naa sen kichuunta

(Lc. 17:3)

¹⁵*Siá naa sen kichuunta xrojan ti ndako a junta anta sen, ja anta ko sen me e niche e kichuunta ti ja onta stenta, ixi ti ndako a junta anta sen. Siá kuitikaon sen nge e ndachronta, ja anta juachanta naa sen kichuunta.

¹⁶ Ko siá sen me e kuitikaon a sen, tiye enta naa o yuu sen kichuunta ixi sen me e tsin en sen nge e tsjaonta ko nge e sinchekonchjiaannta.

¹⁷ Ko sen ningakon annta, siá tsitikaon a sen sen kuiye enta, tjume e ndachenta sen ni ngo, ko siá tsitikaon a sen kaxon, tjume e indachro anta ixi sen me e kichuunta sen, sen me e ó ikjan sen xranchi naa chujni tjáka tomie xi Roma ko chúxin a na ndo Dio.

¹⁸*Ko nduaxin ndachrjan ixi siá tsajon anta juachaxin xroxindanga ijie yama naa chujni nti i ngata a nunte xasintajni, kaxon ngajni ti jii ndo Dio, je e ndo tsajon a ndo juachaxin tsoomé e ijie me e, ko kain ti tsajonnta juachaxin ixi tsoomé e ti ndako a junta anta na nti i ngata a nunte xasintajni, kaxon ndo Dio sinchemé e ndo ijie chóna na.

¹⁹*Kaxon ntatjunta ixi siá yuu ja anta ngata a nunte nti i ndako xronichje e kichuunta ixi xrojan nge e tsjanche enta Ndotána jii ngajni, Ndotána jii ngajni, je e ndo tsajon ndo nge e tsjanchianta.

²⁰Ixi ti no ste yuu o ní sen titikaonna, nti a tsake e jan an ngusine ti ste sen.

²¹*Tjume e konchjiñe e ndo Pedro ko juanchangi e ndo ndo Jesús:

—Nchána, ¿ngijan in sintama a ngaya aséenna nge e ti ndako a juinchenana sen kichian? ¿Á je o jaña yaatq vez?

²²Me e juatingéxin ndo Jesús ko ndachro ndo:

—Na i, je a je o yaatq. Jan an ndachrjan ní ti kán ko naa ti te tsoomé e ngaya asáan ti junta a sen.

Chijnie yuu ni sinká

²³Ti no tituan an ndo Dio me e xranchi naa nunte ijie tetuan an naa xi rey ko tjaun xa sinchéñaka o xa xinchexré e xa cuenta.

²⁴Ko kuaxi xa nchéña xa cuenta ko hora me e bika o na naa xi tsango itsjé sinká.

²⁵Ko xi sinká me e chóna i xa tomi tsjengaxin xa na ti sinká xa, méxin xi rey kuetuan an xa ixi tsochji xi sinká ko janchri e xa ko chjen en xa ngajin ni te na chujni ko ti tjintee chóna xa tsochji kaxon xroxengaxin na ti sinká xa.

²⁶Ko xi sinká bake exin ntatuchi in xa ngajin xi rey, ko kuinóatée xa ko ndachro xa: “Chonantina ko jan an tsjenga anta na kain ti tasinka anta.”

²⁷Ko xi rey bikonóe e xa xi sinká ko juinchemé e xa kain ti sinká xi me e, ko kuituan an xa tsajanda na xa ixi ó komé e ti sinká xa.

²⁸Ko sakjui xa ko hora me e kuetan xa inaa xi nchekao xa ixra, ko xi me e tsjé a sinká xa ngajin xi komé e ti kuasinká xa ngajin xi rey. Ko xi komé e ti sinká, soji itsé xa tusin xi sinke e xa ko ndachro xa: “¡Tjénganana na ti tasinkanana!”

²⁹Ko xi nchekao xa xra bake exin ntatuchi in xa ngajin xi komé e ti sinká ko kuinóatée xa: “Tikonónana ko jan an tsjenga a na kain ti tjasinká a.”

³⁰Ko xi komé e ti sinká chro a xa ko kuetuan an xa ixi tsije e xi sinke e xa ngaxin in ndo achjiso ko tsachrjexin a xa nti a hasta ti tsjengaja xa na kain ti sinká xa.

³¹Ko ikaxin xi nchekao xa ixra bikon xa nge e juinche e ti sinká, me e tsango juincheni e aséen xa, méxin kuintekji xa ngajin xi rey ko chronga xa nge e juinche e xi komé e ti sinká.

³²Tjume e xi rey kuetuan an xa tsixrakua xi komé e ti sinká ko ja in ndachro xa: “Ja a ti kuanche e xraña, tsango ña ia ja a, ixi jan an juintamá a kain ti kuasinká nana ixi ja a kuinóatáa ngajin.

³³Kaxon ja a xrobikonué e xi kuanchekua ixra xranchi jan an bikonóa a ja a.”

³⁴Tjume e xi rey kuetuan an xa tsikaon xi ña i ko tsjengaja xa na kain ti sinká xa. Jaña ichro xi rey ixi tsango koña xa.

³⁵Ndo Jesús juexin kueki ndo chijni ji i, me e ndachro ndo:

—Jaña kaxon Ndotána jii ngajni sinta anta ndo nguungu ja anta siá je a nduaxin sinchemé enta ngaya asáanta ti ndako a junta anta sen kichuunta.

19

*Ndo Jesús nichja ndo kondee ni tsikute e ko tintu e kichuu na
(Mr. 10:1-12; Lc. 16:18)*

¹Juexin nichja ndo Jesús kain ji i, tjume e sakjui ndo nunte Galilea ko kuiji ndo tjauna Judea, nunte jii chjuya ti jii indajitinga ndatin in Jordán.

²Nti a kueya chujni rué e ndo ko itsjé ni ni e juinchexruen en ndo.

³Ko tjume e kaxin xi fariseo konchjiñe e xa ngajin ndo Jesús ko juanchangi e xa ndo ixi tjaun xa ndako a xrojuatingéxin ndo, ko ja in ndachro xa:

—¿Á chao jaña naa xi sintu e xa nchrinchri e xa maski nchrinchri e xa xro an nge e ti ndako a juinche e nchra?

⁴Ko ndo Jesús ja in juatingéxin ndo:

—¿Á kuangi anta nge e ndachro xroon chijnie ndo Dio?, ixi “je e ndo juinchéña ndo kain chujni, xi ko nchri juinchéña ndo.”

⁵ Ko kaxon ndachro ndo: “Méxin chujni xi tsintu e xa ndotée xa ko janée xa ko tsute e xa nchrinchi e xa ko yui je e na í je a yuu na, ixi ó xranchi xrokjui naakua naa chujni.”

⁶ Méxin í je a yuu na. Na í. Jai ó xranchi naakua naa chujni, méxin xro an chujni tsonchjeya ni kute e, ni chjée ndo Dio juachaxin tsekao kichuu na.

⁷ *Ko xi fariseo juanchangi e xa ndo:

—¿Sonda tjume e ndo Moisés kuajon ndo juachaxin tsoña naa xroon ko xroon me e xronichja ixi chao tsintu e kichuu na?

⁸ Ko ndo Jesús ndachro ndo:

—Ndo Moisés kuajon ndo juachaxin tsonchjian xroon xrochjeyaxin xi ko nchri, ni stekao kichuu, ixi chujni tsango icha aséen nako tjaun a na tsitikaon na chijnie ndo Dio. Ko ti nchakon xrangixixión kain nge e, kuanche a na jaña.

⁹ *Méxin, jan an ndachrjan siá xrojan ja anta tjaunnta tsintu enta janchri anta ko siá janchri anta juitéxin a jan inaa xi, ja anta jua i tsintu enta jan ko chonda inta juachaxin ixi tsuta anta inaa nchri. Ko siá sinche enta jaña, ja anta tsamanta ijie. Kaxon ngixe i naa xi tsute e naa nchri, nchri kuayé e xroon chjeyaxin chujni, xi me e tsama xa ijie kaxon.

¹⁰ Tjume e sen teyuu chrikao ndo Jesús ndachro sen:

—Siá ni tintekute e jaña nche e na, cháña tsute ani.

¹¹ Méxin ndo Jesús ndachro ndo:

—Chijni ji i kain a sen tienxin sen chijni. Je o tienxin sen chjée ndo Dio juachaxin ixi tsute a sen.

¹² Nduaxin ji i, kaxin xi jua i tsute e xa, ixi ti xratsijongíexión xa jua i tsute e xa. Ikaxin xa juincheni e na xa, méxin jua i tsute e xa, ko jii ikaxin sen tjaun a sen tsute e sen ixi tjaun sen sinche e sen ixra ngajin ndo Dio, méxin ti rintakuan annta jai je o tsienxin sen tjaun sinche e jaña.

Ndo Jesús juinchenchaon ndo kaxin chjan

(Mr: 10:13-16; Lc. 18:15-17)

¹³ Tjume e bika o na kaxin ichjan ixi tjaun na tsake e itja ndo Jesús ngata a xjan ko xronichje e ndo ndo Dio ixi je e xjan. Ko sen teyuu chrikao ndo Jesús kuyakutee sen ni bika o xjan.

¹⁴ Ko je e ndo Jesús ndachro ndo:

—Tintu enta ichjan tsji xjan ngajin ko tingakuen anta xjan ixi sen sinche e xranchi nche e naa ichjan, sen me e tikinixin en sen tixin in sen ngajni ti tetuan an ndo Dio.

¹⁵ Juexin bake e itja ndo ngata a xjan, sakjuixin ndo nti a.

Naa chán chóna itsjé tomi nichje e chán ndo Jesús

(Mr: 10:17-31; Lc. 18:18-30)

¹⁶ Naa chajan kujj chán kuitsje e chán ndo Jesús ko juanchangi e chán ndo:

—Ja anta ti nchekuen ennta chujni tsango jiannta, ¿nge e xrokonda sinta a ixi tsayá a juachaxin tsarichón kain nchakon?

¹⁷ Ko je e ndo ja in juatingéxin ndo:

—¿Sonda ndachrúa ixi jan an jianna? Je o ndo Dio, je e ndo jian ndo. Ko siá tjaun nduaxin tsarichuan, xrokonda tsitikaon chijnie ndo Dio.

¹⁸ Ko je e chán ndachro chán:

—¿Ngixe e chijni me e?

Ko ndo Jesús ndachro ndo:

—Ko a juachaxin naatsónaxuan naa chujni, ko a juachaxin tsixintexian naa nchri chóna xixi e, ko a juachaxin ixi tse e, jua i sincheya ixi sincheni e inaa chujni.

¹⁹ Chónde e juasaya ndotáa ko janáa, kaxon tjue é chujni xranchi tjue e asáan.

²⁰ Ko je e chán ndachro chán:

—Kain chijni ji in kuitika on xrachiona. ¿Nge e ícha titjáña sinta a?

²¹ Ko ndo Jesús juatingéxin ndo:

—Siá nduaxin tjaun sinchetjúá asáan, nchekjia kain nge e tjintee chonda, ko tonchjiye e sen nóa kain tomia. Ko me e xrochóna ti tjintee jii ngajni. Tjume e tsji ia ko xrokjan ja a naa sen rua na.

²² Ko kuin en chán jaña, tsango koni e aséen chán, sakjui chán ixi tsango itsjé nge e ti tjintee chóna chán.

²³ Tjume e ndo Jesús ndache ndo sen teyuu chrikao ndo:

—Nduaxin xrontatjunta ixi tsango tangi tsixin in ngajni ti tetuan an ndo Dio, naa chujni chóna itsjé tomi.

²⁴ Ko nduaxin ntatjunta ixi ícha tangi a tsixin in naa kucamello ikon naa ntachika, ixi naa chujni chónda itsjé tomi tixin in ti tetuan an ndo Dio.

²⁵ Ko sen teyuu chrikao ndo kuin en sen nge e nichja ndo, tsango kuiye e ñao sen, ko juanchangi e kichuu sen:

—¿Ngisen tsjacha tsechón kain nchakon tjume e?

²⁶ Ko ndo Jesús jitsje e ndo sen, me e ndachro ndo:

—Chujni jua i tsechón na kain nchakon. Je o ndo Dio tajon ndo juachaxin tsechón chujni.

²⁷ Tjume e ndo Pedro ndachro ndo:

—Nchána, jan anna kuintu ana kain ti kuachondana ko rua ananta. ¿Jan anna nge e tsjachana?

²⁸ *Ko ndo Jesús juatingíexin ndo:

—Nduaxin ntatjunta nchakon tsji tsoña natjúá kain nge e, nchakon Chjen en ndo Dio, xjan tsijongi e xranchi chujni, tsake e xjan nunte ngata a ntaxitaon ti tsetuanxin xjan ko tsjako xjan ti ijié juachaxin chonda xjan, tjume e kaxon ja anta ti rue énta xjan xrochondanta teyuu ntaxitaon tsituanxinnta ko sinchéñaxinnta ijié ngajin ti teyuu tjanya ne e Israel.

²⁹ Ko kain sen kuintu e ndo a, ko sen kuintu e ndo kichuu ko jan kichuu, ndoté e o janée, janchri e o chjen en o nunte e ixi kuitikaonna sen ko rua na sen jan an, sen me e tsango itsjé nge e tsayé e sen ko kaxon tsechón sen kain nchakon.

³⁰ *Ko kueya sen jai tsango tetuan an sen, nchakon me e ítsetuan i sen. Ko kueya sen tjinte a jai, nchakon me e je e sen ícha tsetuan an sen.

20

Ndo Jesús juakoxin ndo kondee sen nche e ixra ngataon ijngi

¹ Ngajni tetuanxin ndo Dio me e tonoxin xranchi naa xi chónda naa ijngi tsango ijié ko ndúyo kuachrje xa bijée xa kaxin xinhexra ixi tsikonchrijin xa tu uva.

² Ko kuitja xa xinhexra ko konchjanka o kichuu xa ko xroxenge e xa na naa tomi ndatin in denario ngujngu nchakon ko tjume e xruan an xa xinhexra ngataon ijngi.

³ Ko kuachrje xa hora naa ne e nchakon ko bikon xa ikaxin chujni jii ngusine tjanya ko chónda i na ixra.

⁴ Ko ndache xa na: “Itjinta tikonchrijinnta tu uva ko jian tsjenga anta na.” Ko je e na ikjui na.

⁵ Tjume e ngusine nchakon bijée xa ikaxin xinhexra, ko kaxon ti hora nínxin ne e nchakon kuachrje xa juée xa xinhexra.

⁶ Ko kóndo kaxon kuachrje xa hora na ó, ikjui xa ngusine tjanya ko kuitja xa ikaxin ninhexra, ni xro an stenche e ko ndachro xa: “¿Sonda stenta nti i nguixin nchakon ko xro an ixra stenche enta?”

⁷ Ko je e na ndachro na: “Ixi xro an ngisen chjánana ixra, méxin nti i stena.” Ko je e xa ndachro xa: “Itjinta nche enta xrana ko jian tsjenga anta na.”

⁸ Ko ó kontie ko xi chjakée ndache xa xi tetuen en xinhexra: “Tiyé e xinhexra ko tjenge e xa na, tjangixinxian tjenge e na xi kjui ó kóndo ko tsjexixin xi kjui ndúyo.”

⁹ Ko sa ó konchjiñe e xi kuixin in xra hora na ó ko ngujngu xa kuayé e xa naa tomi denario.

¹⁰ Tjume e konchjiñe e xi kuaxi xra ndúyo ko xraxaon xa ixi je e xa xrojuacha xa ícha itsjé tomi, ko xraje o kuayé e xa naakua tomi denario.

¹¹ Ko hora kuayé e xa tomi, bake a xa juaxruxin ti juacha xa.

¹² Ko ndachro xa: “Ni kuji ó kóndo naakua hora juinche e na xra ko kaxon xenge e na na xraje o xranchi juacha jan anna ti junta ana ixra nchijiñ nchakon ngataon súa.”

¹³ Ko xi xrée ja in juatingíexin xa: “Jan an ndako rinta a, joína ixi xrojuenga anta na naa denario ko jaña kuaye enta.

¹⁴ Itsenta tomianta ko satjinta. Jan an tja on xrotjá a xi kuji ó kóndo xraje o xranchi ja anta.

¹⁵ Jan an, ¿á chonda i juachaxin ixi xrotjá a ngisen tja on tomína? O, ¿jitochjuya anta ixi ti jian rinta a jan an?”

¹⁶ *Méxin, ja in xrondachro chijni ji in: ni kuji ícha tjume e, ni me e ícha sa ó tsayé e na ti jian, ko ni kuji ícha sa ó, ni me e ícha tjume e tsayé e na ti jian tsajon ndo Dio ixi itsjé ni tsonchjiñe e ko kaxion ni tsinche e ndo.

Íjngo chronga ndo Jesús tsen en ndo
(Mr. 10:32-34; Lc. 18:31-34)

¹⁷ Hora sakjui ndo Jesús tjanya Jerusalén, kuachrjendaxin ndo ti ste chujni, je e ndo ko sen teyuu chrikao ndo ko ndache ndo sen:

¹⁸ —Jai stetajin ina tjanya Jerusalén ko nti a xrotsé na Chjen en ndo Dio, xjan jongí e xranchi chujni, ko tsajon na xjan ngajin xitaana tetuan an ko xi tjako ley ne e ndo Dio, ko tsjankata a na xjan ijié ko xrondachro na tsen en xjan.

¹⁹ Ko tsajon na xjan ngajin xi kuixin inaa tjanya ko ni me e tsjanoa na xjan ko tsikaon xjan ko tsasintjian na xjan ko nti a tsen en xjan ko nchakon nínxin xroxechón xjan.

Ti juanchia janée ndo Jacobo ko ndo Juan

(Mr. 10:35-45)

²⁰ Tjume e janée ndo Jacob ko ndo Juan, chjen en ndo Zebedeo, je e jan ko yui chjen en jan konchjiñe e sen ngajin ndo Jesús ko bake exin jan ntatuchi in jan ngajin ndo Jesús ko kuinóatée jan ngajin ndo.

²¹ Ko ndo Jesús juanchangi ndo:

—¿Nge e tjaun?

Je e jan ndachro jan:

—Tja on ixi nchakon tsake enta nunte ngata a ntaxitaunnta ko tsjakonta ijié juachaxin, tájonnta juachaxin ixi yui chjan na tsake e xjan ti tsake e ja anta, naa xjan ndatsjonxin jian ko naa xjan ndatsjonxin ikjon.

²² Tjume e ndo Jesús ndachro ndo:

—Ja anta noa inta nge e tjanchianta. ¿Á chao ja anta tsi inta ti tsango itsjá tsi i jan an ko ti itsjá me e xrondachro ti chinga sinchenana ko tsintji jnina ko tsen enna?

Tjume e sen teyuu chrikao ndo ndachro sen:

—Jaán, chao.

²³ Tjume e ndachro ndo Jesús:

—Jaán, nduaxin ja anta tsango chinga sinta anta na xranchi sinchenana jan an, ko ti tsake enta ndatsjonxin jian o ndatsjonxin ikjon, je o Ndotána tikinixin en ndo xrondachro ndo ngisen tsayé e juachaxin me e.

²⁴ Ko hora kuin en sen ite chrikao ndo Jesús, koña sen ngajin ndo Jacobo ko ndo Juan.

²⁵ *Tjume e ndo Jesús kuiye e ndo kain sen chrikao ndo ko ndachro ndo:

—Ja anta no anta ixi xi tetuan an tjanya, je e xa tituen en xa chujni ko xro an nge e nche e chujni siá xi tituan an tsajon a xa juachaxin ko xi tsango tituan an chujni xrokonda tsitikaon na nge e tituan an xa.

²⁶ *Ko ja anta jua i sinche enta jaña xranchi nche e je e na. Na i. Siá xrojan ja anta tjaunnta tsituan annta ícha, sa ó xrokonda tsitikaonnta nge e tsetuan annta sen kichuunta.

²⁷ Ko ngixe i ja anta ti tjaunnta ícha tsetuan annta, xrokonda tayakon ennta sen kichuunta ko xro an nge e tsjachanta.

²⁸ Jaña kaxon Chjen en Dio, xjan jongí e xranchi chujni, kui a xjan ixi chujni sinche e ixra ngajin xjan. Na i. Je e xjan kuíj xjan ixi tayakon en xjan chujni ko tsen en xjan ixi jaña tsantsjengí e xjan ijié chóna chujni.

Ndo Jesús juinchexruen en ndo yuu ni tikon a

(Mr. 10:46-52; Lc. 18:35-43)

²⁹ Ko kuachrjexin sen tjanya Jericó, itsjé chujni rué e ndo Jesús.

³⁰ Ko yuu ni tikon a ste na nunte ngande e cha o ko kuin en na ixi jitatsinga ndo Jesús, me e kuaxi kuyako na:

—Nchána, xjan kuachrjenixin ndo David, tikonóa naninta.

³¹ Ko chujni kuyakutee na ni tikon a ixi xrotenko na ko je e na ícha séen kuyako na:

—Nchána, xjan kuachrjenixin ndo David, tikonóa naninta.

³² Tjume e ndo Jesús kuíxin ndo, ko kuiye e ndo ni tikon a ko juanchangi e ndo na:

—¿Nge e tjaunnta sinta a?

³³ Ko je e na juate e na:

—Nchána, tja onna tsikonna.

³⁴ Ko ndo Jesús bikonóe e ndo na ko bake e itja ndo ngata a ikon na. Ko tuinxin bikon na ko kaxon je e na rué e na ndo.

21

Ndo Jesús kuixin in ndo tjanya Jerusalén

(Mr. 11:1-11; Lc. 19:28-40; Jn. 12:12-19)

¹ Ndo Jesús ko sen teyuu chrikao ndo kuiji sen ó tjenja tjanya Jerusalén, naa tjanya Betfagé, nti a jii ijna ndatin in Olivo, ko ndo Jesús kuetuen en ndo yuu sen chrikao ndo,

² ko ndachro ndo:

—Itjinta tjanya ji a, nti a tsinchíinta naa kuntajno, kunchri, jichroá ba ko naa kuntajnochjan jikao ba. Tonxindange enta ba ko tsikuunta yui ba.

³ Ko siá xrojan ngisen tsjanchange anta sonda satiku unta ba, ja anta ndachronta: “Ncháina xrokonde e ba ko tsjexin tsonde e ndo ba, je e ndo tsituan an ndo tsikianna ba.”

⁴ Jaña kon en ixi jaña ó tsikjin naa ndo kuachronga chijnie ndo Dio ó sa ó, ko ja in tsindachro ndo:

⁵ Ndachenta chujni tjanya Sión:

“Tsje enta ndo rey na anta ó kuji ndo ngajinnta,

ko je e ndo nchejié a aséen ndo,

naa kuntajno jita a ndo,

naa kuntajnochjan, chjen en naa kuntajno, ko tama.”

Jaña jitaxin xroon chijnie ndo Dio ó sa ó.

⁶ Ko sen chrikao ndo, ikjui sen, juinche e sen ti kuetuan an ndo Jesús.

⁷ Ko bika o sen kuntajno ko chjen en ba, ko bake e sen manta jitsáa sen ngata a ba, tjume e je e ndo kueta a ndo ba.

⁸ Ko tsango itsjé chujni ste nti a ko kuingo na manta stetsáa na ngata a cha o ko ikaxin na konchrijin na chaan ntaq yua ko bingó na ngatja cha o kaxon.

⁹ Ko kaxin chujni stetaon ko chujni sterué e na ndo Jesús ko ja in stetoyako na:

—Ijié juachaxin tikinixin en xjan kuachrjenixin ndo David. Tsango jian ndo kujxin ixi juachaxien Ndotáina jii ngajni. Ijié juachaxin tsayé e ndo.

¹⁰ Hora kuixin in ndo Jesús tjanya Jerusalén, kain chujni ste nti a xronka na ko ndachro na:

—¿Ngisen ji in?

¹¹ Ko itsjé na ndachro na:

—Ji i ndo Jesús chronga chijnie ndo Dio, ndo tjanya Nazaret tikinixin en nunte Galilea.

Ndo Jesús juinchetjúá ndo ni ngo

(Mr. 11:15-19; Lc. 19:45-48; Jn. 2:13-22)

¹² Ko ndo Jesús kuixin in ndo ningue ndo Dio ko kuantsje ndo kain ni stenchekji ko ni te na ngaxin in ni ngo. Ko konjamangi ndo ntaq jita a nge e nchekji na ko ti tasingixin na tomi ko ntaxitauen ni nchekji kuntúá.

¹³ Ko ndo Jesús ndachro ndo:

—Ja in ndachro xroon chijnie ndo Dio tsikjin sen kuachronga ó sa ó: “Nchanía, nchia nichjaxin chujni ngajin ndo Dio.” Jaña ndatin in nchia, ko ja anta juinchéñanta nchia tjauexiche e.

¹⁴ Ko ngaxin in ni ngo konchjiñe e ni ntakutsin, ni ntarengo ngajin ndo Jesús ko je e ndo juinchexruen en ndo na.

¹⁵ Ko kaxin xitaana tetuan an ko xi tjako chijnie ndo Dio bikon xa kain ni juinchexruen en ndo ko nge e juinche e ndo ko kuin en xa kaxin ichjan stetsje xjan ngaxin in ni ngo, ko ja in ichro ti stetsje xjan: “Ijié juachaxin tikinixin en ndo kuachrjenixin ndo rey David.” Ko xi stetin en tsango koñao xa

¹⁶ ko ja in ndache xa ndo:

—¿Á ritin én nge e stetsje xjan ji in?

Ko je e ndo ndachro ndo:

—Jaán, ¿ja anta á noa inta nge e ndachro xroon chijnie ndo Dio? Ko ja in ndachro xroon: Ro a xjan nchínchín ko xjan stetaki bakéenta ti juasaya jian xrotsje xjan.

¹⁷ Tjume e je e ndo kuachrxexin ndo tjanya Jerusalén sakjui ndo tjanya Betania ko nti a joke e ndo tiie me e.

Ndo Jesús ko ntaq tajon tu higo

(Mr. 11:12-14, 20-26)

¹⁸ Ndúyo kua sen cha o ko ikjan sen tjanya Jerusalén ko ndo Jesús kuen en ndo jinta.

¹⁹ Ko bikon ndo naa ntaq tu higo ngande e cha o ko konchjiñe e ndo ti jii ntaq, ko xro an itu kuitja ndo, je o ika chóna ntaq. Méxin ndache ndo ntaq:

—Kainko nchakon xro an itu xrochóna.

Ko ntaq tu higo tuinxin xema ntaq.

²⁰ Ko sen teyuu chrikao ndo Jesús bikon sen nge e kon en ntaq, me e xronka sen ko juanchangi e sen ndo:

—¿Sonda tuinxin xema ntaq tu higo?

²¹ *Ko ndo Jesús ndachro ndo:

—Nduaxin ntatjunta siá nduaxin xrochuntianta ko xro an nge e sinchengachrue asáanta, je a je o xranchi kon en ntaꝯ tu higo, chao sinche enta. Ja anta chao xronichje enta ijnꝯ jii in ko ja in xrondachenta nꝯ: “Satjixian nti i ko taritsinga ngia ndachaon”, ko jaña tson en.

²² Ko kain nge e tjaunnta, siá xronichje enta ndo Dio ko nduaxin xrochuntianta ngajin ndo, nduaxin tsaye enta nge e tsjanchianta.

Ijje juachaxin chónnda ndo Jesús

(Mr. 11:27-33; Lc. 20:1-8)

²³ Tjume e ndo Jesús kuixin in ndo ni ngo, ko juinchekuen en ndo chujni, me e konchjiñe e kaxin xitaana tetuan an ko kaxon kaxin xi judío, xi ícha tetuan an, ko juanchangi e xa ndo:

—¿Nge e juachaxin chonda ja a ixi ja in nche e ko ngisen tjáa juachaxin?

²⁴ Ko ja in juate e ndo Jesús:

—Kaxon jan an tsjanchangi anta naa nge e ko siá tsjatingíexinnta nge e tsjanchangi anta, jan an kaxon xrontatjunta ngisen chjána juachaxin.

²⁵ Ndo Juan ti kuikitée chujni, ¿no kuixin juachaxin me e? ¿Á ngajni o chujni kuituan an?

Tjume e jitjakaxin kichuu xa ko stendachro xa:

—Siá xrondachrona ixi ndo Dio tsiketuen en xi Juan, xrondachro xi ji i: “¿Sonda kuitikaon anta ti ndachro xi Juan?”

²⁶ Ko siá xrondachrona ixi chujni, kain ni tjajna tsoñao nꝯ ixi xi Juan ndachro nꝯ nichja xa chijnie ndo Dio.

²⁷ Tjume e juatingíexin xa:

—Nóna ina ngisen.

Ko ndo Jesús ndachro ndo:

—Jan an kaxon xrontatju inta ngisen chjána juachaxin rinta a ji i.

Ndo Jesús juakoxin ndo chijnie yuu xichájan

²⁸ Tjume e ndachro ndo Jesús:

—¿Nge e ndachronta ixi ti tseki anta? Bake e naa xi ko xi me e chónnda xa yuu cháje en xa, ko sa ó konchjiñe e xa ngajin naa cháje en xa ko ndachro xa: “Itjia nche é ixrꝯ chjaka ti jii ntaꝯ tu uva.”

²⁹ Ko juate e chán: “Na i, tjaun a itsji”, ichro chán. Ko tjume e kuindoxin chán ti jixraxaon chán ko kuitikaon chán ti ndachro ndotée chán.

³⁰ Ko tjume e kuitsje e xa inaa cháje en xa ko xraje o kuetuen en xa chán itsji chán ngataon ijngi ti jii ntaꝯ tu uva ko juate e chán: “Jan an chao itsji”, ichro chán. Ko jui a chán.

³¹ Tjume e juanchangi ndo Jesús:

—¿Ngixe e ti yuu chajan kuitikaon chán nge e kuetuan an ndotée chán?

Ko je e sen ndachro sen:

—Chán sa ó kuituen en.

Ko ndo Jesús ndache ndo sen:

—Ko nduaxin xrontatjunta ixi chujni tjanchia tomi xroxrajon ngajin xi tetuan an ko nchri chónnda kueya xi, ni me e ícha sa ó tsixin in nꝯ ti tetuan an ndo Dio ko tjume e ja anta.

³² *Ixi ndo Juan tikitée chujni, kuixi ndo ko ja anta kuitikaon anta ti chronga ndo, ko ni xenge e nꝯ ko nchri chónnda kueya xi, ni me e kuitikaon nꝯ ti ndachro ndo. Ko ja anta maski bikonta jaña, kuindoxin anta ko kuitikaon anta.

Xi nche e xrꝯ ña i

(Mr. 12:1-12; Lc. 20:9-19)

³³ Ndo Jesús ndachro ndo:

—Tseki anta inaa chijni. Xranchi naa xi kuenga itsjé ntaꝯ tu uva ngaya chjakée xa. Ko juinchéñe e xa ntaꝯ tu uva naa korra, ko inge xa ti no tsáñaxin ndée tu uva. Kaxon juinchekonchjian xa naa ntaꝯ ijje ti no xrotsjéxin xa nchijí jngi e xa.

‘Ko tjume e juatoya xa nunte me e ngajin kaxin ni nche e ixrꝯ ko nchakon xroxero tu uva je e nꝯ tsajon nꝯ ti tikinixin en xa ko tjume e sakjui xa ikjín.

³⁴ Ko nchakon kuaxi xejo tu uva, xi nunte e xruan an xa kaxin ni nchexrée xa tsjirué e nꝯ tu uva ti tikinixin en xa.

³⁵ Ko ni kuitu e ijngi chonda ntaꝯ tu uva, ndako a juinche e nꝯ ixi itsé nꝯ xi nchexrée xi nunte e, naa xa bikaon xa, inaa xa naakóñaxón nꝯ xa, ko inaa xa kuaxi nꝯ xa ixro ko xro an nge e kuajon nꝯ.

³⁶ Tjume e xi nunte e xruan an xa ikaxin xi nchexrée xa ko xraje o juinchekao nꝯ ni me e.

³⁷ ‘Ko tjume e xruan an xa cháje en xa ixi xraxaon xa xrochónde e nꝯ chán juasaya.

³⁸ Ko hora bikon na cháchjen en xi nunte e, ja in kuintejao na: “Chán ña tsitue e chán kain nge e chónða ndotée chán. Cháña naatsóñaxónna chán ixi jaña tsituejna kain nge e tikinixin en chán.”

³⁹ Tjume e itsé na cháchjen en xi nunte e ko kuantsjexin na chán chjaka ko naakóñaxón na chán.

⁴⁰ Tjume e ndo Jesús juanchangi e ndo sen ste nti a:

—Nchakon tsii Nchéé chjaka, ¿nge e sinchekao xa ni nchexra ña i?

⁴¹ Ko je e sen juatingéxin sen:

—Nchakon tsii nchéé ijngi me e tsikonóe a xa ni ña i ko naatsóñaxón xa na, ko tsjée xa ikaxin xinchexra tsitue e chjaka ko ni me e tsajon na itu tikinixin en xa.

⁴² Ko ndachro ndo Jesús:

—¿Á juinchekuanxin anta xroon chijnie ndo Dio tsikjin sen kuachronga ó sa ó?

Ixro chaxro jueña a ni ti te nchia,

ko jai ixro me e, ixro icha tjintee tsiki texin nchia.

Ko ndo Dio jaña juinchéña ndo,

me e ti chaxro stetikonna jai.

Jaña ichro chijnie ndo Dio.

⁴³ Méxin xrontatjunta juachaxien ndo Dio tsachrja a ja anta ko tsayé e ikaxin chujni juachaxin me e ko je e ni me e jian tsitikaon na ixi tsajon na nge e tikinixin en Ndo Dio.

⁴⁴ Ko ngisen tsitsingata a ixro me e naatsenxón sen, ko siá ixro me e tsitsingata a ixro naa chujni, naa tsontsingaxon chujni.

⁴⁵ Ko xitaana tetuan an ko xi fariseo kuin en xa chijni juakoxin ndo Jesús, me e kuienxin xa ixi kondeexin je e xa ti ndachro ndo.

⁴⁶ Me e tjaun xa xrotsé xa ndo Jesús ixi tsjje e xa ndo, ko jua i juinche e xa ixi ni tjajna ndachro na ixi je e ndo Jesús nichja ndo chijnie ndo Dio.

22

Kia kute e sen

¹ Íjngo ndo Jesús kuaxi juako ndo ixi chijni ko ndachro ndo:

² —Ti no tetuan an ndo Dio me e xranchi naa chijni nichja ixi naa ndo rey juinchéña ndo naa kia ixi tsute e chjen en ndo.

³ Ko xruan an ndo xi nchexrée ndo tsikiye e xa chujni tsii na kia; ko ni me e chro a na kujj na.

⁴ Ko íjngo kuetuen en ndo xi nchexrée ndo ko ndachro ndo: “Ndachenta na ixi ó konchjian ti sine na, kain iko juntao ó kuen en ba ko kain nge e ó chao jii tsintekii na kia”, jaña kuetuan an ndo rey.

⁵ Ko ni kuiye e ndo kia kuitikaon a na. Naa xi kuiye e ndo sakjui xa chjakée xa ko inaa xa sakjui xa kuitsje e xa ixra chónða xa.

⁶ Ko ikaxin na itsé na xi bikao juajnéé ndo rey ko bikaon xa ko naakóñaxón na xa.

⁷ Tjume e ndo rey kuin en ndo nge e juinchekao na xi xruan an ndo, me e tsango koñaio ndo ko kuetuen en ndo xi soldadoe ndo ko naakóñaxón xi soldado ni ña i me e ko juaaka xa tjajnéé na.

⁸ Tjume e ndache ndo ni nchexrée ndo: “Kain nge e ó konchjian ixi sen tsute e ko ni kuiya a tsi a na ixi tikinixien a na tsii na kia.

⁹ Méxin, itjinta cha o tachrxjexin chujni tjajna ko ndachenta ngixe i chujni tsii na kia.”

¹⁰ Ko ni nchexra sakjui na ko juejo na itsjé chujni, ni jian ko ni ña i, ko kia me e tsango itsjé chujni xejo.

¹¹ Hora kuixin in ndo rey ti ste ni kujj kia, bikon ndo naa xi jitsá i manta take e ni itji kia.

¹² Me e ndachro ndo: “Ja a, ¿sonda kuixi ian nti i ko tsikake a manta tetsáa ni itji kia ngajin sen tsute e?” Ko xi me e xro an nge e juatingéxin xa.

¹³ *Tjume e ndo rey kuiye e ndo ni stetaya ti sine chujni ko ndachro ndo: “Itsenta xi ña ko tinteenta tutée xa ko itja xa ko tjankanta xa nduja ti naxixe e; nti a xrotsjanga xa ko tse to neno xa.”

¹⁴ Tjume e ndachro ndo Jesús:

—Ja in ton en ixi kueya ni tjaun tixin in ti tetuan an ndo Dio ko je e ndo tsjé a sen tsinche e ndo.

Ti tsjengani na ngajin xi tetuan an
(Mr. 12:13-17; Lc. 20:20-26)

¹⁵ Tjume e xi fariseo sakuntekji xa ko juao kichuu xa xranchi sinche e xa ixi ndo Jesús ndako a xronichja ndo naa nge e ixi jaña chao tsjankata a xa ndo ijje.

¹⁶ Méxin xruan an xa kaxin xi nchekuen en xa ko kaxin xi nchexrée xi Herodes ixi tsjanchangí e xa ndo Jesús ja in:

—Maestro, konónana ixi ja anta je o ti nduaxin nichjanta, ko ndako tjakonta chijnie ndo Dio, ko ja anta ta inta juachjaon nge e nichja chujni, ixi ja anta tsje enta aséen chujni.

¹⁷ Méxin nge e chronta, ¿á chao tsjenge eni na xi tetuan an kuí xin tjajna Roma?

¹⁸ Ko ndo Jesús no e ndo ixi ndako a stexraxaon xa, me e ndachro ndo:

—Ja anta ndako a xraxaonnta. ¿Sonda tjaunnta ixi jan an ndako a xronichja?

¹⁹ Chjánanta naa tomi xengaxin na.

Ko je e na kuajon na naa tomi ndatin in denario.

²⁰ Tjume e ndo Jesús juanchangi e ndo xa:

—¿Xranchi ndatin in ko ngisen ikon jinito tomi ji i?

²¹ Ko je e na juatingíexin na:

—Xi César tetuan an Roma, me e xi ikon.

Ko je e ndo ndachro ndo:

—Chje énta xi César nge e tjanchia xa ko chje énta ndo Dio nge e tikinixin en ndo.

²² Ko kuin en na ja in, me e xraxaon na:

—Xi ji in tsango no e xa.

Tjume e sakuuntekji na.

¿Á nduaxin xroxechónni?

(Mr. 12:18-27; Lc. 20:27-40)

²³ *Ko xraje o nchakon me e, kuntekii kaxin xi ndatin in saduceo, xi titikaon a ixi xroxechón chujni, ko juanchangi e xa ndo Jesús:

²⁴ —Ja anta ti nchekuen ennta chujni, nge e chronta ti tsindachro ndo Moisés ixi siá naa xi tsen en xa ko tsintue a xa chjan ngajin janchri e xa, xi kichuu xa xrokonda tsute e xa nchrinchri e xi kuen en, ko siá xrochónna na ichjan, ichjan me e xrokjui xranchi chjen en xi kuen en.

²⁵ Bake e ngakjen en jan anna yaato xi, ko xi me e kichuu xa. Ko xi sa ó kute e xa ko kuen en xa ko kuichónna i janchri e xa ichjan, me e xi kichuu xa kute e xa nchrinchri e xi kuen en.

²⁶ Ko jaña kon en xi yuxin, kaxon xi nínxin, ko kain yaato xa.

²⁷ Ko kain xa kuen en xa ko kaxon je e nchra kuen en nchra.

²⁸ Nchakon xroxechón kain chujni tsiken en, ¿ngixe e ti yaato xa tsoña ndoxi e nchra ixi kain xa kute e xa nchra?

²⁹ Tjume e ndo Jesús juatingíexin ndo:

—Ja anta, ¿á tsango noa inta nge e ichro xroon chijnie ndo Dio ko á chuxin anta juachaxien ndo?

³⁰ Ixi nchakon xroxechón kain chujni, xro an ngisen tsute e nti a, ko xro an sen xroxrajon ixi tsute e sen, ixi sen xroxechón tsintee sen xranchi sen ángel ne e ndo Dio ste ngajni.

³¹ Chijnie ndo Dio? Ixi je e ndo ja in ndachro ndo:

³² “Jan an ndo Dio, ndo titikaon ndo Abraham ko ndo Isaac ko ndo Jacob.” Ndo Dio je a ne e ni tsiken en. Na i. Je e ndo ndo Dio ne e ni stechón.

³³ Ko ni kuin en nge e nichja ndo xraxaon na ixi je e ndo tsango no e ndo ko jian nichja ndo.

Chijnie ndo Dio, chijnie ícha tetuan an

(Mr. 12:28-34)

³⁴ Kain xi fariseo kono e xa ixi ndo Jesús jian juatingíexin ndo ngajin xi saduceo ko juinchekita ndo xa, méxin juejo kichuu xi fariseo

³⁵ ko naa xi fariseo, naa xi ícha no e ko tjako xa chijnie ndo Dio, juanchangi e xa ndo Jesús ixi tjaun xa ndako a xrojuatingíexin ndo:

³⁶ —Maestro, ¿ngixe e chijnie ndo Dio ti ícha tetuan an?

³⁷ Ndo Jesús ndachro ndo:

—“Ja anta xrotjue enta ndo Dio ixi nichijí asáanta ko ti xraxaonxinnta.”

³⁸ Jí in chijnie sa ó ko ícha tjintee kuetuan an ndo Dio.

³⁹ Ko chijnie yuxin xraje o ndachro chjni: “Xrotjue enta ni kichuunta xranchi tjue enta asáanta.”

⁴⁰ *Yui chijni ji in ti kuetuan an ndo Dio kuachrjenixin kain ti kuetuan an ndo, ti juako ndo Moisés, ko kain ti juako sen kuachronga chijnie ndo Dio ó sa ó.

¿Ngisen kuachrjenixin ndo Cristo?

(Mr. 12:35-37; Lc. 20:41-44)

⁴¹ Ko xra ste kain xi fariseo, ndo Jesús juanchangi e ndo xa

⁴² ko ja in juanchangi ndo:

—¿Nge e xraxaonnta ixi ndo Cristo? ¿Ngisen kuachrjenixin ndo?

Ko je e xa ndachro xa:

—Ndo Cristo tsikachrjenixin ndo ndo David.

⁴³ Tjume e ndo Jesús ndachro ndo:

—Ndo David nichjaxin ndo ixi Espíritue ndo Dio ko ndachro ndo: “Nchána”,

⁴⁴ Me e ja in nichja Nchána Dio ngajin Nchána:

“Take énta ndatsjonxin jian ti ritjén jan an,

ko chon énta ti tsakeja kain ni ningakon annta ngangí tutáanta.”

⁴⁵ ¿Xranchi ndo Cristo xrokuachrjenixin ndo ndo David ko je e ndo David ndachro ndo ixi Nchéé ndo ndo Cristo?

⁴⁶ Ko jua i juate e nináa xi ste nti a ti juanchangi ndo Jesús ko ti hora me e kuaxi í xro an nge e juanchangi e xa ndo.

23

Ndo Jesús juangí e ndo xi tjako ley ko xi fariseo

(Mr. 12:38-40; Lc. 11:37-54; 20:45-47)

¹ Ko kuaxi ndo Jesús nichje e ndo chujni kao sen teyuu chrikao ndo, ko ja in ndachro ndo:

² —Xi tjako ley chijnie ndo Dio ko xi fariseo xraxaon xa ixi je e xa ícha jian no e xa chijnie juako ndo Moisés.

³ Méxin, kain nge e tsituan an xa titikaonnta ko nche enta me e, ko nche anta xranchi nche e je e xa ixi je e xa ndachro xa naa nge e ko je e xa nche a xa ti ndachro xa.

⁴ Ixi je e xa tetuan an xa ti tsango tangi sinche e chujni, ko je e xa titikaon a xa naa nchichjaon ko tingijna i xa chujni ixi tsitikaon na kaxon.

⁵ *Ko kain ti jian nche e xa tjaun xa tsikon chujni ko nche e xa juaxruxin take e xa nganito ntatjen xa ko ntachaan xa kaxin chajua iton, nti a tsikjin xa chijnie ndo Dio ko manta tetsáa xa tsikake e xa kueya chajua ícha jié ixi ti tetsáa ikaxin chujni.

⁶ Ko nchakon itji xa ni ngo o xrojan kia tjaun xa ixi chujni jian sinchesaye e na xa.

⁷ Ko ngataon ndasin ko ngaya cha o tjaun xa ixi chujni tsajon na juajna ko xrochónde e na xa juasaya* ko sinchekin in na xa xi tjako chijnie ndo Dio.

⁸ *Ko ja anta tjanča inta ixi chujni xrontatjunta na sen nchekuen en chujni ja anta, ixi ja anta naakua naa ndo nchekuan annta me e ndo Cristo ko kain ja anta kichuunta.

⁹ Ko xro an ngisen ndachenta ndotánta ngata a nunte nti i ixi naakua naa Ndotánta chondanta, ndo jii ngajni.

¹⁰ Ko ndachro anta ixi ja anta ritaun enta chujni ixi je o ndo Cristo me e ndo jitaon en chujni.

¹¹ *Ngisen ícha tjaun tsituan an, sen me e xrokonda xrokjan sen chujni nche e xráanta.

¹² *Ixi ngisen ícha sinchejié aséen, sen me e ícha nunte tsintee sen, ko sen nchejié a aséen, sen me e ícha tsetuan an sen.

¹³ *Ko lastu ja anta ti nchekuen ennta chujni ko ja anta fariseo, ti tjako yuu ikonnta, ti tije énta ntáçhja ti tetuan an ndo Dio ixi tsixin a chujni ko ja anta tixin anta ko tintue anta tixin in ikaxin chujni tjaun tixin in.

¹⁴ *Ko lastu ja anta ti nchekuen ennta chujni ko ja anta chujni fariseo, ti tjako yuu ikonnta, ko tantsje enta nchri ka an ndo a nchra, ko tjaunnta tsikon chujni ixi tsango nichje enta ndo Dio. Méxin ja anta ícha tangi tson annta.

¹⁵ *Lastu ja anta ti nchekuen ennta chujni ko ja anta chujni fariseo, ti tjako yuu ikonnta, ko tatsinganta ndachaon ko tsango ichrjinta ixi tsjachanta naa chujni tsitikaon ti tjakonta, ko nchakon juachanta chujni me e, tsango chinga nchekuen ennta na, ko chujni me e ícha ndako a nche e chujni ko chujni me e ícha tikinixin en chujni xrochexin xro i ixi ja anta.

¹⁶ *Lastu ja anta ixi tjakonta ko ja anta ndakútsinnta. Ndachro ja anta nchakon xrojan chujni xrondachro ixi sinche e xrojan nge e ko ni ngo xronichjaxin sen ko ndachro ja anta ixi tjinte a me e. Ko siá chika oro jii ngaxin in ni ngo xronichjaxin sen, ja anta ndachronnta ixi chijnie me e tjintee ko nduaxin xroxenga na.

¹⁷ Tsango ninta ja anta ko ntakutsinnta. ¿Á tsango tjintee chika oro o á tsango tjintee ni ngo juinchetjúáxin chika oro?

¹⁸ Kaxon ndachro ja anta: “Xrojan chujni xrondachro ixi sinche e xrojan nge e ko xronichjaxin sen altar ko ja anta ndachronta ixi tjinte a me e. Ko siá xrondachro sen ixi sinche e sen xrojan nge e ko xronichjaxin sen nge e chjée sen ndo Dio ngata a altar me e ti tjintee ichro ja anta ko me e xrondachro ixi nduaxin xroxenga na.”

¹⁹ Tsango ninta ja anta ko ntakutsinnta. ¿Á tsango tjintee nge e xrochje énta ndo Dio?, o, ¿á ícha tsango tjintee altar ti tontjúáxin nge e tsajonnta?

²⁰ Ixi ngisen xrondachro ixi sinche e xrojan nge e ko xronichjaxin sen altar, je a nichjaxin sen je o altar. Na i. Kaxon nichjaxin sen kain nge e jii ngata a nti a.

²¹ Me e ngisen xrondachro ixi sinche e sen xrojan nge e ko xronichjaxin sen ni ngo, je a nichjaxin sen je o ni ngo. Na i. Kaxon nichjaxin sen ndo Dio jii nti a.

²² *Méxin, ngisen xronichjaxin sen ngajni, me e kaxon nichjaxin sen trono ne e ndo Dio ko ngisen jitetuan an nti a.

²³ Lastu ja anta ti tjakonta ley ko ja anta chujni fariseo. Ja anta ndako a xraxaonnta. Ja anta chje énta ndo Dio ti ite nge e tikinixin tsajonnta ne e kamenta ko anís ko comino. Ko titikaon anta ti nge e tjako ley: ti jian xrokonda sinche enta ko ti xrokonda tsikonóe enta sen kichuunta ko ti xrochuntianta ndo Dio. Kain ji i xrokonda sinche enta ko kaxon ti nge e tikinixin en ndo Dio tsajonnta.

²⁴ Ja anta ntakutsinnta, ti nchekangi enta kuchjisen nchín ixi tsinga inta ba, ko ja anta tinganta naa kucamello tsango jiié.

²⁵ Lastu ja anta ti tjakonta ley ko ja anta chujni fariseo. Ja anta ndako a xraxaonnta. Ja anta tsango nchetjúánta tuenxin vaso ko laato, ko ngaxin in tsango kitja ixi xraxaonnta xrotsénta nge e je a tikinixin anta.

²⁶ Ja anta chujni fariseo tsango ntakutsinnta. Sa ó xronchetjúánta ngaxin in vaso ko laato ko me e tsontjúá tuenxin.

²⁷ *Lastu ja anta ti tjakonta ley ko ja anta fariseo. Ndako a xraxaonnta. Ja anta stenta xranchi naa tuye tsixrabaa chujni, tsango chaxro tsje e nduja, ko ngaxin in jikaon nte e chujni tsiken en ko kain nge e tjúa í.

²⁸ Jaña ja anta tjaunnta chujni tsikon na ixi ja anta tsango jiannta, ko ngaxin in asáanta ndako a xraxaonnta ko ña inta.

²⁹ Lastunta ti tjakonta ley ko ja anta fariseo. Ja anta ndako a xraxaonnta. Ja anta ti juincheñanta lápida ti tsixrabaa sen kuanichja chijnie ndo Dio ó sa ó ko chaxro nchetsojinnta ixro jita a tuye ne e sen tjúa aséen.

³⁰ Ko ja anta ndachronta siá xrobake enta nchakon bake e sen tachrí anta xrobinginja inta sen kóña sen juako chijnie ndo Dio.

³¹ Ko jaña ja anta ndachronta ixi nduaxin ja anta tsikachrxjinnta sen kóña sen kuanichja chijnie ndo Dio ó sa ó.

³² Méxin, jai ja anta tjaunnta sinchejxinnta ti kuanche e sen tachrí anta.

³³ *¡Ja anta ti tsikachrxjinnta kunchee! ¿Xranchi satsinge enta nchakon xrochexinnta xro i?

³⁴ Méxin, jan an xroxruan an chujni xrochronga chijnie ndo Dio ko chujni tsango no e ko chujni nduaxin tjako chijnie ndo. Ko ja anta naatsóñaxónnta sen ko tankanitonta sen ntáuru ko ikaxin sen tson inta sen ngaxin in ni ngo ko tsenginta sen tjajna ko tjajna.

³⁵ Ko méxin, ja anta tsamanta ijie ti ne e sen jian kuenxin ngata a nunte ó sa ó. Ko tsamanta ijie ixi ti kuaxi kuen en sen jian xrangíxixín ndo Abel, ndo jian, ko kain sen hasta ti ndo Zacarias, chjen en ndo Berequias, kóñaxinnta tjenka altar ni ngo.

³⁶ Ko nduaxin ntatjunta ixi kain ijie me e tsama chujni jii jai.

Tsjanga ndo Jesús
(Lc. 13:34-35)

³⁷ Tjume e ndachro ndo Jesús:

—Jerusalén, Jerusalén, ja anta ti ton innta sen tjako chijnie ndo Dio ko tóñaxinnta ixro sen xruan an ndo Dio ngajinnta. Jan an tsango tja on xrojuejunta xranchi naa kuchika tejo chjen en ba chringi nene e ba ko ja anta tjaun anta.

³⁸ Ko jai ndo Dio tsintu anta ndo.

³⁹ Ko jan an ntatjunta ixi í tsikon aninta jan an íjngo tsitjaja nchakon xrondachronta: “Tsango jian ngisen kuji ixi juachaxien Ncháina.”†

24

*Ndo Jesús chronga ndo ixi xrojamangi ni ngo
(Mr. 13:1-2; Lc. 21:5-6)*

¹ Hora kuachrjexin ndo Jesús ni ngo, konchjiñe e sen teyuu chrikao ndo ixi tsanchangí e sen ndo Jesús xranchi tsikonchjian ni ngo.

² Tjume e ndo Jesús ndachro ndo:

—¿Á stetsje enta nchijíi tjatu o ji in? Ko jan an nduaxin ntatjunta ixi kain ji in xrochjejin, ko xro an ixro tsake e ngata a inaa ixro, kain xrochjejin.

*Nge e tson en nchakon tsjexin kain nge e
(Mr. 13:3-23; Lc. 21:7-24; 17:22-24)*

³ Tjume e ikjui sen ti jii ijna Olivo ko nti a ndo Jesús bake e ndo nunte ko sen chrikao ndo konchjiñe e sen ko ja in ndachro sen:

—Ndachronta ngisa xrojamangi ni ngo ko, ¿nge e tson en nchakon tsji inta íjngo, ko nchakon tsjexin kain nge e jii ngata a nunte xasintajni?

⁴ Ko ja in juate e ndo Jesús:

—Jan tsje enta ixi xro an ngisen sintaya anta.

⁵ Ixi tsii kueya chujni xronichja na xranchi jan an ko ja in xrondachro na: “Jan an ndo Cristo.” Ko sincheye e na kueya chujni.

⁶ Ko tsin ennta steteto kaxin tjajna ko kaxon tsin ennta ixi tsaxi tse to ikaxin tjajna, ja anta xrakon anta ixi kain ji i xrokonda tson en ko xra je a tsjexin kain nge e ngata a nunte.

⁷ Naa tjajna tse to ngajin inaa tjajna ko naa xi tituan an tse to xa ngajin inaa xi tituan an. Ko tsango itsjé chujni tsoni e na ko tsango tsatse na jinta ko tsango tsontengi nunte ngixe i tjajna.

⁸ Kain ji i je o nandá xrangíxixín ti ijíe juachjaon tson en chujni.

⁹ *Ko nchakon me e xrotsénta na ixi tsikaonnta ko kaxinnta naatsóñaxónnta na ko itsjé chujni xroningakon annta kondanaxin jan an.

¹⁰ Ko nchakon me e itsjé sen íxrochuntia ina sen ko je o sen tsjangí e kichuu sen ixi tsango xrochónde e kichuu sen juaña.

¹¹ Ko kueya xi xrondachro xa ixi je e xa nichja xa chijnie ndo Dio ko jaña sincheye e xa kueya chujni.

¹² Ko ixi tsango tsonkueya ni ndako a nche e, méxin kaxon sen titikaonna íxrotjue a kichuu sen.

¹³ *Ko kain sen xrochuntiana jan an ko tsokuaxi en sen ti chinga sinchekaon na sen, sen me e tsjacha sen tsechón sen kain nchakon.

¹⁴ Ko chijni ji i ti tjako jan an tsono e kain chujni jii ngata a nunte xasintajni, ixi jaña kain tjajna, je e na tsono e na ngisen jan an, tjume e tsjexin kain nge e.

¹⁵ Nchakon tsikonnta tsii xi tsango ndako a nche e ko tsake e xa ngaxin in ni ngo tsango tjúa, ji in ti ó tsichronga ndo Daniel jitaxin chijnie ndo Dio. Méxin ngisen nchekuanxin xroon ji in xrokonda tsienxin sen.

¹⁶ Nchakon me e sen ste nunte Judea xrokonda tsinga sen ti jii ijna.

¹⁷ *Ko ngisen jii ngata a nchando a, xroxingajin a sen tsjirué e sen xrojan nge e.

¹⁸ Ko sen ste ngataon ijngi, íxrokjan i sen ixi tsikao sen ti tsetsáa sen.

¹⁹ Ko lastu sen nchri, sen steyá chjen en ko sen stenchekaki ichjan nchakon me e.

²⁰ Nichje enta ndo Dio ixi nchakon tsinge enta ti chinga tson en, je a nchakon tania ichrin o je a nchakon tjoké e chujni.

²¹ *Ixi tsake e ijíe juachjaon ngata a chujni, xranchi bake a xra ti xrangíxixión nunte xasintajni, ko tsoen a ícha tjume e.

²² Ndo Dio tsango tjue e ndo sen kuinche e ndo, méxin nchakon tsii ijíe juachjaon, tsonchjen a juachjaon me e, ixi siá na i, kain sen tsen en sen.

²³ Méxin siá xrojan ngisen xrondachro: “Tsje enta nti i jii ndo Cristo”, o “Tsje enta noyá a jii ndo”, titikaon anta na.

²⁴ Ixi tsonoxin kaxin xi xrondachro xa je e xa ndo Cristo ko kaxin xa xrondachro xa ixi je e xa nichja xa chijnie ndo Dio ko tsjako xa ijíe juachxin ko ijíe íxra sinche e xa, jaña tjauan xa sincheye e xa chujni tsikinche e ndo Dio.

²⁵ Ó sa ó ntatjunta nge e tson en.

²⁶ *Méxin, siá xrontatjunta na: “Tsje enta ti jii ntajie, nti a jii ndo Cristo”, tji anta. O xrondachro na: “Jii ndo ngaxin in nchia”, titikaon anta.

²⁷ Ixi xranchi tachrjexin xro i tóngíxín ndatsjonxin chuya ko ti jii xro i ti tetaonxin nchakon, jaña tsikon chujni nchakon tsii Chjen en ndo Dio, xjan jongí e xranchi chujni.

28 *Ixi ti no jitsinga ti tsiken en, nti a xroxexo kuntachrjen.

Nchakon xrokjan Chjen en ndo Dio

(Mr. 13:24-37; Lc. 21:25-33; 17:26-30, 34-36)

29 *Ko tsatsinga ti chinga tson en chujni, nchakon me e chjiixro ítingsaña i chjiixro ko tsonaxixe e. Ko nchanitjao ítsajon a chjixrue, ko nchanotsé tsitsingaxin nchanotsé ngajni ko kain nge e jii ngajni tsontengi.

30 *Ko tjume e tsonoxin ti jii ngajni naa nge e xrochronga ixi ikjan Chjen en ndo Dio, xjan jongí e xranchi chujni. Ko kain chujni jii ngata a nunte tsango xroxronka na ixi tsikon na Chjen en ndo Dio tsii xjan ngakjen en itjuí ko tsika o xjan ijié juachaxin ixi tsango tituan an xjan.

31 Ko xroxruan an xjan sen ángel ne e xjan ixi séen tsanoa sen tjao e sen, me e xroxexo kain chujnie xjan tsj xjn nganoó lado nunte xasintajni.

32 Tanginta chijnie naa ntáa tu higo: nchakon taxi xechji ntáa, ko tajon ntáa kayua me e xrondachro ixi ó tsaxi tsii ichrin.

33 Jaña nche e ja anta kaxon, nchakon tsikonnta tsatsinga kain ji i, me e tsono anta ixi Ncháina ó tuinxin tsii ndo.

34 Ko nduaxin ntatjunta ixi kain ji i sa ó xrokonda tson en, ko chujni jichón jai xratsen a na.

35 Ngajni ko nunte xasintajni tsitjáña. Ko chijni nichja jan an, nai a tsitjáña chijni.

36 *Ko ngiora ko ngixe e nchakon tsii ndo xro an ngisen no e, ni sen ángel ste ngajni noe a sen, ni jan an, Chjen en ndo Dio, nóna i. Je o Ndotána, me e ndo no e.

37 *Ko xranchi kon en nchakon bake e ndo Noé jaña tson en nchakon tsii Chjen en ndo Dio, xjan jongí e xranchi chujni.

38 Ixi nchakon xra chrete a chujni inda, je e na bajine na ko baki i na, bakute e na ko bakajon kichuu na ixi tsute e na, ko kuii nchakon kuixin in ndo Noé ntábarco,

39 ko kuienxin a na nge e xrokron en, kuija ichrin ko inda sabikao na ko kjun en na inda. Jaña tson en nchakon tsii Chjen en ndo Dio, xjan jongí e xranchi chujni.

40 Ko xranchi nchakon me e jaña tsake e yuu xi ngataon ijngi, naa xa satsikao ndo xa ko i naa xa tsitu e xa.

41 Yuu nchri jita o nchra, naa nchra satsikao ndo nchra ko inaa nchra tsitu e nchra.

42 Jian tsje enta ixi noa inta ngiora tsi i Ncháina.

43 *Ja anta xrokuienxinnta ji in ixi nché e naa nchia, siá xrokono e xa ngiora tiie tsii naa xiche e ixi tsee xa, je e nché e nchia xrokuejua i xa ixi tsintue a xa xiche e tsixin in xa ko tsee xa.

44 Méxin, ja anta tarichrin anta ixi Chjen en ndo Dio, xjan jongí e xranchi chujni, tsii xjan hora ja anta xraxaon anta.

Xinhexra titikaon ko xinhexra titikaon a

(Lc. 12:41-48)

45 *Naa xinhexra, xi jian titikaon, xi me e tituen en xa xinhexrée nché e xa ko tsajon xa nge e sine ni nhexra hora xrokonda sine na.

46 Juaxruxin tsake e xinhexra, xi titikaon, ixi nchakon tsii nché e xa tsitja ndo xa ixi jinche e xa nge e kuituen en xa.

47 Ko nduaxin xinhexra me e tsayé e xa ijié juachaxin tsituan an xa ngata a kain ti tjintee chóna nché e xa.

48 Ko siá xinhexra ña i xroxraxaon xa ixi nché e xa tsonchrjen en tsii

49 ko tsaxi xa tsóña xa xinchekao xa xra ko tjume e tsaxi xa tsi ikao ko sinekao xa ni tsikuan,

50 ko nchakon tsii nché e xi nhexra ña i, ngiora ko nchakon ti je e xa noe a xa

51 ko nché e xa tsituan an ixi tsikaon xa ko xroxruan an xa ti ste kain ni ña i ko nti a xrotsjanga xa ko tse to neno xa ixi tsango xroxronka xa.

25

Ndo Jesús juakoxin ndo ixi ite nchrichajan

1 *Ndo Jesús ndachro ndo:

—Ti tetuan an ndo Dio tson en xranchi kon en ti ite nchrichajan, nchrichan ikjui ti kute e chujni, ko kain je e nchrichan itsé nchrichan ti tikia ndaxi e ko kuachrje nchrichan kuichón en nchrichan ndo tsute e.

2 Na ó nchrichan me e tsango jian titikaon nchrichan ko na ó nchrichan tsango se e nchrichan.

³ Ko nchrichan se e bikao nchrichan ti no tikia ndaxi e ko tsikikao a nchrichan yee ndaxi e xrohexin xro i.

⁴ Ko nchrichan jian titikaon bikao nchrichan ti no tikia ndaxi e ko kaxon bikao nchrichan ícha ndaxi e ixi tsanga i xroie nchrichan.

⁵ Ko konchrjen en ndo tsute e, ko je e nchrichan itja jaa nchrichan ko kuejua nchrichan.

⁶ Ko ngusine tiie kuin en nchrichan nichja kaxin chujni: “Ó kuji ndo tsute e, tachrjenta ixi ó kuji ndo.”

⁷ Me e kain nchrichajan bingatjen nchrichan ko kuaxi bikia nchrichan ndaxi e.

⁸ Ko na ó nchrichan se e, juanchia nchrichan ndaxi e ngajin na ó nchrichan jian titikaon: “Chjánananta nchíin ndaxi e ixi jitanga xroinana.”

⁹ Ko nchrichan jian titikaon ndachro nchrichan: “Na i, ixi batsitjáña ina ndaxi e jan anna ko ja anta. Cháña itjinta tike nanta ndaxi e ti no nchekji na nda.”

¹⁰ Ko na ó nchrichan se e, nandá kuachrje nchrichan bike na nchrichan ndaxi e, ko je e ndo tsute e kuji ndo. Ko nchrichan na ó, jian titikaon, kuixinkao nchrichan ndo tsute e, ko bije e ntachja.

¹¹ *Ko tjume e kuji na ó nchrichan se e, ko kuaxi ndachro nchrichan: “Ja anta ti tsuta anta, tantje enta ntachja ixi tsixin inna.”

¹² Ko je e ndo ja in juatingíexin ndo: “Jan an nduaxin ntatjunta ixi chuxin anta.”

¹³ Ko ndo Jesús ndachro ndo:

—Tarichrin anta ko jian tsje enta ixi noa inta ngixe e nchakon ko ngiora tsii Chjen en ndo Dio, xjan jongi e xranchi chujni.

Ndo Jesús juakoxin ndo ixi tomi

¹⁴ *Tjume e ndachro ndo Jesús:

—Ti no tituan an ndo Dio tson en xranchi naa xi satsji xa ikjin, me e kuiye e xa xinchexrée xa ko bake e xa ngaya itja xinchexrée xa kain ti tjintee chóna xa ixi xinchexrée xa sinchenche e xa tomi xra.

¹⁵ *Ko naa xinchexrée xa kuayé e xa na ó mil tomi, ko inaa xinchexrée xa kuayé e xa yuu mil tomi, ko xi nínxin kuayé e xa naa mil tomi. Ko xi tomie kuajon xa tomi ngajin xinchexrée xa xranchi bikon xa chjakon en xinchexrée xa. Ko juexin kuajon xa tomi, tjume e sakjui xa ikjin.

¹⁶ Ko xi kuayé e na ó mil tomi juinchenche e xa tomi xra ko juacha xa íjngo na ó mil tomi.

¹⁷ Jaña kaxon xi kuayé e yuu mil tomi juacha xa íjngo yuu mil tomi.

¹⁸ Ko xi kuayé e naa mil tomi ikjui xa ko juinchéña xa naa tuye ko juabaa xa tomie nchée xa.

¹⁹ *Ko kuatsinga itsjé nano ikjan nchée xinchexra me e, ko juinchéñaka o kichuu xa kuenta.

²⁰ Ko sa ó kuji xi kuayé e na ó mil tomi ko chjée xa nchée xa íjngo na ó mil tomi ti juacha xa ko ndachro xa: “Ja anta chjánanta na ó mil tomianta ko jan an juacha íjngo na ó mil tomi.”

²¹ Tjume e nchée xinchexra me e ndachro: “Chao jian juinche e ja a, xinchexráana, ixi jian kuitikaoan. Ti kueya i tomi tjá a ko jian juinche e, ko jai ícha kueya tsaye é. Take é juaxrxin ja a.”

²² Tjume e kuji xi kuayé e yuu mil tomi ko ndachro xa: Yuu mil tomi chjánanta ko nti i jii íjngo yuu mil tomi juacha.

²³ Tjume e nchée xa ndachro: “Chao juinche e ja a, xinchexráana, ixi ja a jian kuitikaoan. Ko maski tsjé a kuayé e, jian juinchenche e tomi xra, ko jai ícha itsjé tsaye é. Tatsinga ko juaxrxin tsojuna.”

²⁴ Tjume e kuji xi kuayé e naa mil ko ndachro xa: “Nchána jan an nóna ixi ja a chujni tsango jintá ixi taye é nge e tikinixian ia ko tjejua ti no benga ia.

²⁵ Méxin, xronkana ko ikjui juabaa tomia, taye é tomia. Nti i jii tomi.”

²⁶ Tjume e juate e nchée xinchexra me e ko ndachro xa: “Ja a xinchexra tsango ña ia ko tsango sa a. Sía no a ixi jan an tsango jintana ko tandáa ti no benga i ko tjejo ti no kuintjía tsee,

²⁷ cháña xrokuajuan tomina ngajin ninchexra banco. Nti a xrojuinchenche e na tomina xra, ko nchakon xrojui i jan an xrokuaya a chjen en tomina.”

²⁸ Kaxon ja in ndachro xa: “Tantsje enta xi ji in tomi chóna xa ko chje énta xi chóna ite mil tomi

²⁹ *ixi ngisen chóna itsjé tomi, je e sen tsayé e sen ícha, ko ngisen tsjé a chóna, ti tsjé a chóna sen kaxon ti me e tsachrje e sen.

³⁰ *Ko xinchexra ña i, xi se e, tjankanta xa nduja ti naxixe e, nti a xrotsjanga xa ko tse to neno xa.”

Tsoñe e ijię chujni ste nunte xasintajni

³¹ *Nchakon xrokjan Chjen en ndo Dio, xjan jongí e xranchi chujni, tsika o xjan ijię juachaxin ixi tsango tsituan an xjan ko tsijj kain sen ángel ko tjume e tseta a xjan ntaxitaon ko xrochóna xjan ijię juachaxin.

³² Ko nti a xroxexo kain chujni ne e kain tjajna nunte xasintajni, nti a tsantsjendexin xjan ngjngu chujni, xranchi nche e sen tingatjia kutuchjon, tantsjendáa sen kutuchjon ko nango tsake e kubito.

³³ Ko tsake e xjan kutuchjon ndatsjonxin jian ko kubito ndatsjonxin ikjon.

³⁴ Tjume e ndo rey xronache ndo sen ste ndatsjonxin jian: “Xrokujiinta ti juinchenchaonnta Ndotána ixi tsaye enta ti jintakiton annta ndo, ti juincheña ndo nchakon xrangixixión kóna nunte xasintajni,

³⁵ ixi kuen enna jinta ko ja anta chjánanta juiné, ko kuen enna inda ko kuajonnta nge e kui i, kuaji xranchi naa chujni kujxin ikjín ko ja anta kuajonnta ti no jokéna.

³⁶ Ko chonda i nge e tsaria ko ja anta juinchekitsiininta, ko konína ko ja anta juasotsjenaninta, ko ndo achjiso bake é ko juasonta bikitsjenanta.”

³⁷ Ko tjume e sen nche e jian ndachro sen: “Nchána, ęngisa bikona kuen ennta jinta ko kuajonna nge e jintenta?, ko, ęngisa bikona ixi kuen ennta inda ko kuajonna nge e kui inta?”

³⁸ ęKo ngisa bikonanta xranchi naa ni kujxin ikjín ko kuajonna ti no joká anta? ęKo ngisa bikona ixi chonda inta nge e tsarianta ko jan anna jintakitsananta?”

³⁹ ęKo ngisa bikona koni anta o bake enta ndo achjiso ko juasotsja ananta?”

⁴⁰ Ko ndo Rey xronachro ndo: “Nduaxin ntatjunta nchakon bingijnanta naa sen kichuunta, sen ícha nóa, me e xranchi xrobingijnaninta jan an.”

⁴¹ Tjume e ndo Rey kaxon xronache ndo ni ste ndatsjonxin ikjon: “Ja anta ti yamanta ijię, satjixinnta ti ritjén jan an ko itjinta ti jii xro i nai a tsanga jichón en xrochexin Xixron anxrée ko kain ni ángel ne e xa.

⁴² Ixi kuen enna jinta ko ja anta kuajon anta juiné ko kuen enna inda ko kuajon anta inda kui i.

⁴³ Kuaji xranchi naa ni kujxin ikjín ko ja anta kuajon anta ti no xrojukéna ko kuachonda i manta tsaria ko ja anta xro an nge e chjánanta tsaritsa a, konína ko bake é ndo achjiso ko ja anta juaso anta tsjenanta.”

⁴⁴ Tjume e je e na kaxon xronachro na: “Nchána, ęngisa bikona ixi kuen ennta jinta ko kuen ennta inda ko tja inanta, ko xranchi ni kujxin ikjín ko chonda inta nge e tsarianta ko ni anta ko jija anta ndo achjiso ko jan anna bingina inanta?”

⁴⁵ Tjume e Ndo Rey ja in tsjate e ndo: “Nduaxin ntatjunta ixi siá bingijna inta naa chujni kichuunta, naa ni ícha nóa, me e xranchi jan an xrojuinchenaninta.”

⁴⁶ Ko ni ña i satsji na ti no tsikaon na kain nchakon. Ko sen jian nche e itsji sen ti tsechón sen kain nchakon —jaña chronga ndo Jesús.

26

Ni ningakon en ndo Jesús juao na xranchi naatsóñaxón na ndo

(Mr. 14:1-2; Lc. 22:1-2; Jn. 11:45-53)

¹ Juexin chronga ndo Jesús kain ji i, tjume e nichje e ndo sen teyuu chrikao ndo, ko ndachro ndo:

² —Ja anta no anta ixi titjáña yuu nchakon tsaxi kia pascua ko Chjen en ndo Dio, xjan jongí e xranchi chujni, tsajon na xjan ixi tsenito na xjan ntacru.

³ Tjume e kain xitaana ícha tetuan an ko xi tjako ley ne e ndo Dio ko xi tachrú tetuan an tjajna judío, jua o kichuu xa ti ntasien ndo a xitaana ícha tetuan an ndatin in Caifás.

⁴ Ko nti a juao na xranchi sincheye e na ndo Jesús ko xrotsé na ndo ixi tjaun na naatsóñaxón na ndo.

⁵ Ko kaxon ndachro na:

—Kain nchakon tsonchrjen en kia, xro an nge e sinchekuuna xi Jesús ixi batsoñao chujni tjajna.

Naa nchri bingamá nchra ndo Jesús inda chaxro xraxe

(Mr. 14:3-9; Jn. 12:1-8)

⁶ Ndo Jesús jii ndo tjajna Betania ndo a ndo Simón, ndo kuachóna chinlepra.

⁷ *Me e konchjiñe e naa nchri ngajin ndo Jesús, ko bika o nchra naa xroxrao jitjiá inda chaxro xraxe, nda me e tsango tjintee nda. Tjume e je e nchra bingamá nchra nda ngata a jaa ndo.

⁸ Ko sen teyuu chrikao ndo Jesús, hora bikon sen nge e juinche e nchra, tsango koña o sen nchra ko ndachro sen:

—¿Sonda juinchexienxian inda xraxe ña?

⁹ Cháña xrokúchji nda ko kueya tomi xrokuajon na ixi je e nda ko tomi me e xrochjeje e ni nóa.

¹⁰ Ndo Jesús kuin en ndo nge e stendache sen nchra, me e ndachro ndo:

—¿Sonda toña enta nchra? Ti juinche e nchra ngajin, me e naa ixra tsango jian.

¹¹ Sen nóa kain nchakon xrochondanta sen, ko jan an íse a tsake e ngajinnta.

¹² Ixi ti bingamána nchra inda chaxro xraxe, me e xrondachro juinchekonchjianna nchra ixi xroxraabaana.

¹³ Ko nduaxin ntatjunta ixi nchakon tsin en chujni chijnina nguixin ngata a nunte xasintajni, kaxon xroxraxaon na ixi je e nchra bingamána nchra nda chaxro xraxe.

Xi Judas juinchejki xa ndo Jesús

(Mr. 14:10-11; Lc. 22:3-6)

¹⁴ Tjume e naa xi teyuu chrikao ndo Jesús, ndatin in xa Judas Iscariote, ikjui xa kuitsje e xa xitaana ícha tetuan an

¹⁵ ko ndachro xa:

—¿Ngijan in xrochjánana ko jan an tsingijna xrotséna ndo Jesús?

Ko xitaana tetuan an juenga xa na ngajin xi Judas, ní ite* tomi chika plata.

¹⁶ Ko nchakon me e kuaxi xi Judas tjée xa ngiora tsajon xa ndo Jesús ngajin na.

Ndo Jesús ko sen teyuu chrikao ndo juine sen kónkjín me e

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Nchakon xrangixín kia ne e nutja chonda i nge e tjainxin nio, sen teyuu chrikao ndo Jesús konchjiñe e sen ngajin ndo ko ndachro sen:

—Ndachrona, ¿no tjaunnta tsonchjian sinexinna nutja kia Pascua?

¹⁸ Tjume e je e ndo ndachro ndo:

—Itjinta tjjajna ijié, ndo a naa xi ko ja in ndachenta xa: “Ndachro ndo nchekuannana: Íse a tsake e ngata a nunte xasintajni, méxin nchanduya tja on sineki an sen ntakuan an ti nutja kia Pascua.”

¹⁹ Ko sen teyuu chrikao ndo Jesús juinchekonchjian sen ti sine sen kia Pascua xranchi je e ndo kuituan an ndo.

²⁰ Hora kontie ndo Jesús bake ekao ndo sen teyuu ti jii mesa,

²¹ ko xra stene sen, je e ndo ndachro ndo:

—Nduaxin xrontatjunta ixi naa ja anta tsajonninta ngajin ni ningakonna.

²² Ko me e juincheni e aséen sen ko ngujngu sen teyuu chrikao ndo kuaxi ndachro sen:

—Nchána, ¿á jan an sinta a jaña?

²³ Ko je e ndo juatingíexin ndo:

—Ngisen nekian ngaya latona, me e sen sinchekjina.

²⁴ Ko nduaxin Chjen en ndo Dio, xjan jongí e xranchi chujni, tsen en xjan xranchi nichja xroon konchjine ndo Dio, ko lastu xi sinchejki xjan. Cháña xi me e xrojongíe a xa ngata a nunte xasintajni.

²⁵ Ko ndachro xi Judas, xi sinchejki ndo Jesús:

—Ja anta ti nchekuannaninta, ¿á jan an sintakjinta?

Ko ndachro ndo Jesús:

—Ja a ndachrua.

²⁶ Ko xrastene sen, ndo Jesús itsé ndo naa nutja ko kuajon ndo juasaya ngajin ndo Dio. Tjume e konchrijin ndo nio ko konchjeya ndo nio ngajin sen chrikao ndo ko ndachro ndo:

—Itsenta nutja ko intentá nio, ixi nutja ji in xranchi xrokjui cuerpona.

²⁷ Tjume e itsé ndo naa vaso jitjiá ndée tu uva ko kuajon ndo juasaya ngajin ndo Dio ko chjée ndo sen ko ndachro ndo:

—Tin innta kainnta

²⁸ Ixi ji in ndée tu uva me e xrokjui xranchi jnina, jni konchjianxin ley natjúá, ko tsintji jni kondeexin itsjé chujni ko jaña tsoMéxin ti ndako a juinche e na.

²⁹ Ko jai ntatjunta ixi ítsi a ndée tu uva íjngo, ti tsijija nchakon tsojuna ti jii juachaxin tetuan an ndo Dio. Ko nchakon me e tsi i ndée tu uva natjúá íjngo.

Ndo Pedro xrondachro ndo chúxin a ndo ndo Jesús

(Mr. 14:26-31; Lc. 22:31-34; Jn. 13:36-38)

³⁰ Ko juexin itsje sen naa soon, tjume e sakuintekji sen ijna Olivo.

³¹ Nti a ndachro ndo Jesús:

—Tíe jai kain ja anta íxrochuntia ininta ixi ndachro xroon chijnje ndo Dio: “Sintani a ndo tingatjia kutuchjon ko kutuchjon xrochjeke e ba.”

³² *Ko nchakon xroxechónna tsitao annta itsjina nunte Galilea.

³³ Ko ndo Pedro ndachro ndo:

—Maski kain sen tsintu anta sen, jan an na i.

³⁴ Ko ndo Jesús juatingíexin ndo:

—Nduaxin xrontatjua ja a tíe jai, xraxrotsje a kuntaxichiká ní vez, ja a xrondachrora ixi chuxin ana.

³⁵ Ko ndachro ndo Pedro:

—Maski naatsóñaxónna na, jan an xrondachrjan i chuxin anta.

Ko kain sen chrikao ndo jaña ndachro sen kaxon.

Ndo Jesús nichje e ndo Ndotée ndo ti jii ijngi Getsemani

(Mr. 14:32-42; Lc. 22:39-46)

³⁶ Tjume e kuiji ndo Jesús ko sen chrikao ndo ti jii naa huerto ndatin in Getsemani ko ndache ndo sen:

—Nti i tinteenta ko jan an itsji xronichja a Ndotána.

³⁷ Tjume e sabikao ndo ndo Pedro ko yui chjen en ndo Zebedeo ko tsango kuaxi koni e aséen ndo.

³⁸ Ko ndache ndo sen:

—Tsango jitoni e aséenna xranchi ti xrokue enna. Ja anta nti i tituan anta ko tarichrin anta.

³⁹ Ko sakjui ndo ícha kjínxin ko bake exin ntatuchi in ndo ko kuisée ndo ti ngata a inche ko ja in nichje e ndo ndotée ndo:

—Ndotána, siá chao, tájonnta juachaxin ixi tsi a ti tsango itsjá jitjiá copa ji i. Ko ntatjunta ixi tsoen a xranchi jan an tja on. Na i. Ja anta nche enta xranchi ja anta tjaunnta.

⁴⁰ Ko tjume e ikjan ndo Jesús ti no kuintu e ndo sen ko je e sen stejua sen. Ko ja in ndache ndo ndo Pedro:

—¿Á jua i kuarichonnta naa hora?

⁴¹ Nichje enta ndo Dio ko tarichrin anta ixi jaña sinchengachrue a Xixron anxrée asáanta ixi espírituanta tjée ndo Dio ko ntau anta tjaun a.

⁴² Tjume e sakjui ndo íjngo ko ó yuxin kuinóatée ndo ngajin Ndotée ndo, ko ndachro ndo:

—Ndotána, siá xrokonda tsi i ti itsjá jitjiá copa ji i ko jaña tjaun ja anta, jan an tsitika on.

⁴³ Ko ikjan ndo ti no ste sen ko je e sen stejua sen ixi tsango chjé e sen kotachrin.

⁴⁴ Ko sakjui ndo íjngo ko nínxin nichje e ndo Ndotée ndo ko xraje o kuinóatée ndo.

⁴⁵ Tjume e ikjan ndo ti ste sen chrikao ndo ko ndachro ndo:

—¿Á xrarichrinnta ko stetjoka anta? Ó kuitja hora Chjen en ndo Dio, xjan jongí e xranchi chujni, tsajan na xjan गया itja chujni ña i.

⁴⁶ Tingatjennta sachjina ixi ó kuji xi sinchekjina ko jai tsajonna xa.

Xraxin in na ndo Jesús ndo achjiso

(Mr. 14:43-50; Lc. 22:47-53; Jn. 18:2-11)

⁴⁷ Ko xrajnichjao ndo Jesús, kuji xi Judas, naa xi teyuxin chrikao ndo, ko tsango itsjé chujni bika o xa, ni steyá ntaa ko chika espada, ni me e tsixrúa an xitaana tsango tetuan an ko ni tahríi ne e tjaña judío.

⁴⁸ Ko xi Judas, xi juinchekji ndo Jesús, ja in tsindache xa na:

—Xi tsetoxin jan an, me e xi xrotsénta.

⁴⁹ Tjume e konchjiñe e xa ngajin ndo Jesús ko ndachro xa:

—¿Á chao ritjennta, ja anta ti nchekuannaninta?

Ko kuétoxin xa ndo.

⁵⁰ Ko ndo Jesús ndachro ndo:

—¿Nge e tjaun ja a, xi tjento jan an?

Ko tjume e konchjiñe e na itsé na ndo.

⁵¹ Ko naa sen teyuu chrikao ndo Jesús kuantse ja chika espada ko konchrinjin xa ndatsjon naa xinchexrée xitaana tetuan an.

⁵² Ko tjume e ndachro ndo Jesús:

—Xraxi ian chika ña गया tjuje é chika, ixi kain sen tjayaxin chika espada, chika espada tsexin sen kaxon.

⁵³ ¿Nge e chrua ja a, á jua i tsjanchá a Ndotána ko je e ndo xroxruanna ndo teyuu ejército sen ángel?

⁵⁴ Ko siá xrokuij sen ángel, jaña íxrokuen a ti nichja xroon chijnie ndo Dio ó seno.

⁵⁵ *Tjume e ndo Jesús ndache ndo ni kuij itsé ndo:

—Ja anta ya anta ntaa ko chika espada xranchi xrotsénta naa xiche e. Ngujngu nchakon bake e ngaxin in ni ngo ixi ntakuan annta ko tsé aninta.

⁵⁶ Ko kain ji i jaña xrokonda tson en, ixi jaña chronga sen tsikjin xroon chijnie ndo Dio ó sa ó.

Tjume e kain sen chrikao ndo Jesús sabinga sen ko je o ndo kuitu e ndo.

Bikao na ndo Jesús ngajin ni nchéña ijie

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Tjume e ni tsé ndo Jesús bikao na ndo ngajin xitaana ícha tetuan an ndatin in Caifás, ko nti a ste kain ni tjako ley ne e ndo Dio ko xi tetuan an ni ngo.

⁵⁸ Ko ndo Pedro imao jirué e ndo ko kuiji ndo ti ntasién ndo a xitaana tetuan an ko hora kuixin in ndo nti a, bake e ndo tjenja ti ste xi stendáa nti a ixi tjaun ndo xrotsje e ndo nge e tson en.

⁵⁹ Ko xitaana ícha tetuan an ko xi tachrí, ni me e tjaun na tsjankata a na ndo Jesús ijie maski nduaxin a ti ndachro na ixi tjaun na naatsónaxón na ndo.

⁶⁰ Ko xro an ti ndako a kuitja na, maski kuiji kueya chujni juangí e na ndo. Ko ni me e ncheya na, ko tjume e kuij íjngo yuu ni nduaxin a nichja,

⁶¹ *ko ndachro na:

—Xi Jesús ji i kuin anna ndachro xa: “Jan an chao tsonchjejin ningue ndo Dio, ko je o ní nchakon sintakonchjianxin ni ngo íjngo.”

⁶² Ko xitaana ícha tetuan an bingatjen xa ko juanchangi e xa ndo Jesús:

—¿Á tsjatee a ti nge e ichro ni tjangi a?

⁶³ Ko ndo Jesús nichja i ndo. Ko ndachro xitaana ícha tetuan an:

—Jan an tituan an ixi nombrée ndo Dio, ndo jichón, ixi xrondachijiana, ¿á ja a ndo Cristo, Chjen en ndo Dio?

⁶⁴ Ko ndo Jesús ja in juatingíexin ndo:

—Ja a ndachijiana jaña. Ko jan an kaxon xrontatjua ixi jai tsaxi tsikonnta Chjen en ndo Dio, xjan jongí e xranchi chujni, tsake e xjan ndatsjonxin jian ti jii ndo Dio, ndo tsango tituan an, ko tsikonnta xjan tsj xjn xjan ngajni ngakjen en itjuj.

⁶⁵ Ko xitaana ícha tetuan an, tsango koña xa ko kuinchje xa manta jitsáa xa ko ndachro xa:

—Xi i tsango nichjangí e xa ndo Dio. ¿Nge e ícha tjaunnta tsin ennta? Íxrokonda i xi tangi. Ti kuin enna nichjangí e xa ndo Dio, ixi me ó.

⁶⁶ ¿Nge e ichro ja anta?

Ko ni kaxin ja in juate e na:

—Xi i chóna xa ijie, xrokonda tsen en xa.

⁶⁷ Tjume e kuaxi na bikitée na ndo ndatée na गया ikon ndo ko ikaxin na kuande e na iton ikon ndo.

⁶⁸ Ko ndachro na:

—Siá nduaxin ja a ndo Cristo, ndachrua ngisen kuanda a iton.

Ndo Pedro ndachro ndo ixi chúxin a ndo ndo Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Ko ndo Pedro jii ndo ti jii ntasién nchia, ko konchjiñe e naa nchri nche e ixra nti a ko ndachro nchra:

—Ja a kaxon kuajiku a xi Jesús, xi nunte Galilea.

⁷⁰ Ko kain ni ste nti a kuin en na nge e juate e ndo Pedro:

—Jan an chuxin a xi ña.

⁷¹ Tjume e ndo Pedro kuachrje ndo nduja ko tjenga ntachja inaa nchri bikon nchra ndo ko ndache nchra kain ni ste nti a:

—Xi ji i kaxon chrikao xa xi Jesús ne e tjajna Nazaret.

⁷² Tjume e ndo Pedro ndachro ndo íjngo ixi je e ndo chúxin a ndo ndo Jesús:

—Ndo Dio no e ndo ixi jan an chuxin a xi ña.

⁷³ Ko nchion tjume e ni ste nti a, konchjiñe e na ti jii ndo Pedro ko ja in ndachro na:

—Ja a nduaxin kuajiku a xi Jesús ixi kaxon nichja xranchi je xa.

⁷⁴ Ko ndo Pedro kuaxi benga ndo teka ko ndachro ndo:

—Jan an chúxin a xi ña.

Ko hora me e itsje kuntaxichiká.

⁷⁵ Ko ndo Pedro xraxaon ndo ti nichja ndo Jesús: “Ko xraxrotsje a kuntaxichiká níi vez, ja a xrondachrua ixí chuxin ana.” Tjume e ndo Pedro kuachrje ndo nduja ko tsango tsjanga ndo.

27

Bikao na ndo Jesús ngajin xi Pilato

(Mr. 15:1; Lc. 23:1-2; Jn. 18:28-32)

¹ Ko ngasáña, kain xitaana tetuan an ko xi tachríi tetuan an tjajna judío juao kichuu xa xranchi sinche e xa ixí naatsóñaxón xa ndo Jesús.

² Ko kuintexin na ndo Jesús ino ko bikao na ndo ngajin xi Poncio Pilato, xi tetuan an kuxin tjajna Roma.

Kuen en xi Judas

³ *Tjume e xi Judas, xi tsjinchekji ndo Jesús, bikon xa ixí naatsóñaxón na ndo, me e juincheni e aséen xa, ko ikjui xa bijinchekjan xa ti níite tomi chika plata tsikayé e xa, ti kuajon xitaana tsango tetuan an ko ni tachríi.

⁴ Ko ndachro xa:

—Jan an ndako a juinta a ixí juentakji naa xi tsango jian.

Ko je e na juate e na:

—Jan anna kondana ina me e. Ja a no a nge e nche e.

⁵ Tjume e xi Judas juanka xa tomi chika plata ngaxin in ni ngo ko sakjui xa kuisintjianxin xa ixí ino tusin xa.

⁶ Ko xitaana tetuan an juejo xa tomi ko ndachro xa:

—Tomi ji i jua i tsake e na tomi ngaya ti tinga ofrenda, ixí tomi ji in yaa tomi jnié chujni.

⁷ Ko juao na kondee tomi, tjume e kue na na ijngi ndatin in Nunte xi Nchéña Ichi ixí nti a tsjabaa na chujni tsikí xin inaa tjajna.

⁸ Ko nchakon jai jaña tin in nunte me e: Nunte Chóna Ijnjí.

⁹ Jaña kon en nge e tsikjin ndo Jeremías, ndo kuachronga chijnie ndo Dio ó sa ó: “Kua na níi ite tomi chika plata, tomi xengaxin na ixí xi kuen en, (ña ti tsindachro ni tjajna Israel tjintee xa),

¹⁰ tomi me e kuenaxin na nunte ndatin in xi Nchéña Ichi, ixí jaña kuituanna Ncháina.*”

Xi Pilato juanchangi e xa ndo Jesús

(Mr. 15:2-5; Lc. 23:3-5; Jn. 18:33-38)

¹¹ Ndo Jesús jii ndo ngajin xi icha tetuan an ko ja in juanchangi e xa ndo:

—¿Á ja a Rey ne e ni judío?

Ko ndo Jesús ndachro ndo:

—Ja a ndachrua.

¹² Ko kain xitaana tetuan an ko xi tachríi tetuan an tjankata a na ndo ijje ko je e ndo Jesús xro an nge e juate e ndo.

¹³ Tjume e xi Pilato juanchangi xa:

—¿Á kuin en kain nge e ichro na, juinche e?

¹⁴ Ko ndo Jesús xro an nge e juatingíexin ndo, méxin xi tetuan an xronka xa ko noe a xa nge e sinche e xa.

Stetoyako na ixí tsen en ndo Jesús

(Mr. 15:6-20; Lc. 23:13-25; Jn. 18:38–19:16)

¹⁵ Ko kia Pascua xi tetuan an ngujngu nano bakajanda xa naa xi jixin in ndo achjiso, naa xi tjaun chujni tsachrje.

¹⁶ Ko xi jii ngaxin in ndo achjiso, naa xi tsango ña i, ndatin in Barrabás.

¹⁷ Ko nti a ste itsje chujni, tjume e xi Pilato juanchangi e xa na:

—¿Ngisen tjaunnta tsajanda, á xi Barrabás o xi Jesús nchekin innta Cristo?

¹⁸ Ko xi Pilato no e xa ixí tsango tochjuye e na ngajin ndo Jesús, méxin tjaun na tsen en ndo.

¹⁹ Ko xi Pilato jita a xa xitaon ti no tonchjianxin ijje ko nchrinchri e xa tsixrua an nchra naa juajna ngajin xa:

—Xro an nge e nchekua ndo Jesús ixí tsango tjúa aséen ndo ixí nakonkjin tsango chinga kuxinaxin kondee je e ndo.

²⁰ Ko xitaana tetuan an ko ni tachrí tetuan an juinchekateya nā chujni ixi tsjanche e nā xi Pilato tsajanda xa xi Barrabás ko naatsóñaxón nā ndo Jesús.

²¹ Ko tjume e xi Pilato íjngo nichje e xa kain chujni ste nti a ko ndachro xa:

—¿Ngisen tjaunnta tsajanda?

Ko je e nā juatingíexin nā:

—Tajanda xi Barrabás.

²² Tjume e xi Pilato juanchangi xa:

—¿Nge e sintakian xi Jesús, xi nchekin innta Cristo?

Ko kain nā kuyako nā:

—¡Tjankanitua xa ntācru!

²³ Tjume e xi Pilato ndachro xa:

—¿Me nge e juinta anta xi ji in?

Ko je e nā ícha sēen kuyako nā ko ndachro nā:

—¡Tjankanitua xa ntācru!

²⁴ Ko xi Pilato bikon xa ixi chujni ítitikaon a nā nge e ichro je e xa ixi je e nā ícha kuyako nā, méxin juanchia xa inda ko juné ma itja xa ko kain me e stetikon chujni ste nti a ko ndachro xa:

—Jan an tsama i ijje ti tsen en xi ji i, ixi xro an nge e sínká xa. Ja anta ti tsamanta ti tsen en xa.

²⁵ Ko kain chujni ste nti a ja in juatingíexin nā:

—Jan anna ko chjan nana tsamana ijje ko jnié xi ña.

²⁶ Ko tjume e xi Pilato kuantsje xa xi Barrabás ko kuetuan an xa ixi tsikaon ndo Jesús ko tjume e tsjankanito nā ndo ntācru.

²⁷ Ko xi soldadoe xi Pilato bikao nā ndo Jesús ti jii ntasien nchia tituanxin nā ko nti a xejo kain xi soldado.

²⁸ Tjume e kuantsje e nā ndo manta jiá ndo ko juinchekake e nā ndo naa manta játsetié.

²⁹ Ko bakę e nā ngata a jaa ndo naa corona tsikonchjianxin ntacha a ko bakę e nā ngaya itja ndo ti ndatsjonxin jian naa ntakuto. Ko tjume e take exin ntatuchi in nā ko tjanoa nā ndo ko ndachro nā:

—Kain nchakon tsake e, ndo rey tituen en ni judío.

³⁰ Ko tikitée nā ndatée nā ngaya ikon ndo ko itsé nā ntāq jiá itja ndo, me e tande e nā ntāq jaa ndo.

³¹ Ko juexin juano nā, tjume e kuantsje e nā ndo manta játsetié ko juinchekitsa nā ndo mantée ndo. Tjume e bikao nā ndo ixi tsenito nā ndo ntācru.

Kuasintjian nā ndo Jesús ko nti a kuen en ndo

(Mr. 15:21-32; Lc. 23:26-43; Jn. 19:17-27)

³² Ko hora stetachrjeka o nā ndo Jesús, nti a jii naa xi tjajna Cirene, ndatin in xa Simón, ko kuetuen en nā xa tsama xa ntācru ti no tsake e nā ndo Jesús.

³³ Ko ti kuiji nā ti no ndatin in Gólgota, (me e xrondachro Ntajaa ni tsiken en).

³⁴ Nti a chjée nā ndo Jesús tsi i ndo nchúin vinagre tsikintekjanxin xroqñ tsjá ko je e ndo tsjexion ndo xroqñ me e, ko kui a ndo.

³⁵ Hora juexin bake e xi soldado ndo Jesús nganito ntācru, tjume e sondaonxin xa ixro ixi jaña tsono e xa ngisen tsjacha tsitue e manta jiá ndo ixi jaña tson en xranchi tsinichja sen kuachronga chijnie ndo Dio ó sa ó, ko ja in tsindachro sen: “Chjeye e nā mantána ko sondaonxin nā ixro ngata a manta.”

³⁶ Tjume e xi soldado nti a kuitu e xa ixi tsendáa xa ndo Jesús.

³⁷ Ko bake e nā naa ntāq ícha noixin ti jii jaa ndo, nti a jitaxin nge e kondeexin kóña nā ndo:

“Ndo Jesús, ndo Rey tikinixin en ni judío.”

³⁸ Kaxon kuenito nā yuu xiche e nganito ntācru, naa xa ndatsjonxin jian ko í naa xa ndatsjonxin ikjon ti jii je e ndo.

³⁹ Ko ni stetatsinga nti a chinga ndache nā ndo ko nchetengi jaa nā,

⁴⁰ *ko ndachro nā:

—Ja a ndachrua ixi tsonjamangia ni ngo ko níko nchakon sinchekonchjian ni ngo íjngo, cháña xingajinxian ntāq ña siá nduaxin ja a Chjen en ndo Dio.

⁴¹ Kaxon xitaana tetuan an ko xi tjako ley ko xi fariseo ko ni tetuan an tjajna, kain nā juanoa nā ndo Jesús, ko stetjao nā:

⁴² —Ikaxin nā bingijna xi ña ko je e xa jua i xingajinxin xa ntācru. Siá je e xa Rey ne e ni Israel, ko siá xroxingajinxin xa ntācru, me e tsitika onna xa.

⁴³ Je e xa chún̄tia xa ngajin ndo Dio, je e ndo tsingijna ndo xa siá nduaxin je e ndo Dio tjue e ndo xa ixi je e xa ndachro xa: “Jan an Chjen en ndo Dio.”

⁴⁴ Kaxon xiche e stenito ntácru chinga ndache xa ndo Jesús.

Kuen en ndo Jesús

(Mr. 15:33-41; Lc. 23:44-49; Jn. 19:28-30)

⁴⁵ Ko xrangusine nchakon ko kuiji hora nún̄xin konaxixe e ngata a nunte xasintajni.

⁴⁶ Ko hora me e ndo Jesús séen ndachro ndo:

—Elí, Elí, ¿lama sabactani? —ji i xrondachro: Ndotána, Ndotána, ¿sonda jan on kuintunan-inta?

⁴⁷ Ko kaxin ni ste nti a kuin en nã nge e ichro ndo, me e ndachro nã:

—Ndo kuanichjaxin chijnie ndo Dio, ndo Elías jitiye e xi Jesús.

⁴⁸ Ko naa xi jii nti a itsé xa naa manta ko juinchetjao xa vinagre ko bãkẽ e xa ikon naa ntasé ko chjée xa ndo Jesús xrokui i ndo.

⁴⁹ Ko ikaxin ni ste nti a ndachro nã:

—Chon én, tsikonna á tsii ndo Elías tsingijna ndo xi Jesús.

⁵⁰ Tjume e ndo Jesús séen kuyako ndo ijngo, ko me e juexin kuen en ndo.

⁵¹ Ko hora me e kaxon velo jii ngaxin in ni ngo ti jingakuenxin luga tsango tjúá, chrinjin ngusinexin xrangixixión noi hasta ti nunte. Ko hora me e kontengi nunte ko chjenga ixro.

⁵² Ko xitje e tuye ti xrabaa chujni ko itsjé sen tsikitikaon ndo Dio, sen tjúá aséen, xechón sen.

⁵³ Nchakon xechón ndo Jesús, tjume e sen xechón, kuij sen tjajna Jerusalén, tjajna tjúá, ko nti a itsjé chujni bikon ixi je e sen tsixechón sen.

⁵⁴ Ko xi centurión ko xi soldado jindaa ndo Jesús, bikon xa ixi kontengi nunte ko kain nge e kon en, tsango xronka xa, ko ndachro xa:

—Xi ji i nduaxin Chjen en ndo Dio.

⁵⁵ *Ko kjinxin stestsje e kueya nchri, nchri tsirue e ndo Jesús tsikj xjn tjajna Galilea, nchri me e kuayakon en ndo hora bika o nã ndo.

⁵⁶ Ngakjen en ni ste nti a jii jan María Magdalena ko jan María, janée ndo Jacobo ko ndo José, ko janée chjen en ndo Zebedeo.

Ndo Jesús xrabaa ndo

(Mr. 15:42-47; Lc. 23:50-56; Jn. 19:38-42)

⁵⁷ Hora kontie, kuij naa xi chón̄da tsango itsjé tomi, kuixjn tjajna Arimatea, xi me e ndatin in xa José. Kaxon xi me e juinchekuen en ndo Jesús xa.

⁵⁸ Ko xi José ikjui xa ngajin xi Pilato, bijanchia xa cuerpoe ndo Jesús ko xi Pilato kuajon xa juachaxin.

⁵⁹ Tjume e xi José ikjui xa ko kuajin xa ndo Jesús ko kuintsía xa ndo naa manta tjúá.

⁶⁰ Ko bãkẽ e xa cuerpoe ndo गया naa tuye natjúá tsikoña nganito naa itjao ko kuincheka xa naa ixro ijíe bijeexin itjao ko tjume e sakjui xa.

⁶¹ Ko nti a jii jan María Magdalena ko inaa jan María, ste sen nunte ti jii tuye.

Xi soldado jindaa tuye jixrabaa ndo Jesús

⁶² Ko ndúyaxin ti nchakon tjoké e sen tjajna Israel, xitaana tetuan an ko xi fariseo kuitsje e nã xi Pilato

⁶³ *ko ndachro nã:

—Jan anna stextraxa onna ixi xi Jesús, xi kuancheya, ti xra jichón xa ndachro xa: “Nchakon tsen enna, jan an xroxechónna nchakon nún̄xin.”

⁶⁴ Méxin, xruan an xi soldado tsendáa xa tuye kaní nchakon, ixi bã tiie tsjii ni bajikao xi Jesús ko tsee nã cuerpoe xa ko tjume e xrondache nã chujni tjajna ixi xechón xa. Ko me e ícha tsitikaon nã xi Jesús.

⁶⁵ Tjume e ndachro xi Pilato:

—Ñã ste xi soldado. Ja anta itjinta ko jian tije enta tuye ti tsijabaa nã xi Jesús.

⁶⁶ Ko je e nã ikjui nã ko bãkẽ e nã naa ixro ijíe bijeexin tuye ko bãkẽ e nã naa seña ngata a ixro ko nti a kuintu e nã kaxin xi soldado ixi tsendáa xa tuye.

28

Ndo Jesús xechón ndo

(Mr. 16:1-8; Lc. 24:1-12; Jn. 20:1-10)

¹ Kuatsinga nchakon tjoké e sen tjajna judío. Xratingasáña i nchakon xrangixixín semana, kuij jan María Magdalena ko inaa jan María kuitsje e sen ti tsixrabaa ndo Jesús.

² Ko hora me e kontengí nunte ixi naa ndo ángel ne e ndo Dio xingajinxin ngajní ko je e ndo kuintjian ndo ixro jijeexin itjaq ko bake e ndo ngata a ixro me e.

³ Ko ndo ángel me e tóngíxin ndo ko manta jiá ndo tsango tjúá xranchi chrinta.

⁴ Ko xi soldado ste nti a, hora bikon xa ndo ángel, tsango xranga xa ko tjaun xrokuin-teken en xa ixi tsango xronka xa.

⁵ Ko ndo ángel me e ja in nichje e ndo sen nchri:

—Ja anta sen nchri, xrakon anta. Jan an nóna ixi tjéenta ndo Jesús, ndo kuenxin nganito ntacru.

⁶ Ko a ndo nti i, ixi je e ndo ó xechón ndo xranchi chronga ndo ó sa ó. Xrokuiinta ko tsje enta ti no baké e na ndo.

⁷ Ko tuinxin satjinta tindachenta sen bajikao ndo ixi je e ndo ó xechón ndo ko je e ndo ó sakuitaon ndo tjajna Galilea. Nti a tsikonnta ndo. Me e ntano anta.

⁸ Ko sen nchri kuachrxjexin sen ti no tsixrabaa ndo Jesús, ko stexronka sen ko steché e sen. Tjume e nteeto sakjui sen kuichronga sen ngajin sen chrikao ndo Jesús.

⁹ Ko je e ndo Jesús konoxin ndo ko kuajon ndo juajna ngajin sen nchri. Ko je e sen konchjiñe e sen ngajin ndo ko joa sen tutée ndo, ko kuajon sen juasie sen.

¹⁰ Tjume e je e ndo ndachro ndo:

—Xrakon anta, ko satjinta tikeki enta sen kichuuna ko itsji sen tjajna Galilea, nti a tsikonxin sen.

Ti chronga xi soldado

¹¹ Ko hora sakjui sen nchri, kaxin xi soldado jindaa ti tsixrabaa ndo Jesús sakjui xa tjajna Jerusalén kuichronga xa ngajin xitaana tetuan an kain nge e kon en.

¹² Tjume e xitaana tetuan an nichje e xa xi tetuan an tjajna ko juao na ixi xrochjée na kueya tomi xi soldado.

¹³ Ko ndache na xi soldado:

—Ja anta ndachronta ixi ó tiie me e itsenta kotachrin ko stechrinnta, me e kuji ni chrikao xi Jesús, ko kuee na cuerpoe xa, jaña chronta.

¹⁴ Ko siá tsono e xi tetuan an nunte Israel, jan anna xronichja ana xa ixi tsoña a xa ngajinnta.

¹⁵ Ko xi soldado kuayé e xa tomi ko juinche e xa xranchi kuituan an xitaana. Ko ti kon en nchakon me e ni tjajna Israel jaña teki na hasta ti nchakon jai.

Ti kuetuan an ndo Jesús

(Mr. 16:14-18; Lc. 24:36-49; Jn. 20:19-23)

¹⁶ *Ko ti tenaa sen chrikao ndo Jesús sakjui sen ijna nunte Galilea ixi jaña tsiketuan an ndo.

¹⁷ Ko hora bikon sen ndo, kuajon sen juasaya ngajin ndo ko kaxin sen xratitikaon a sen ixi á je e ndo o na i.

¹⁸ Ko ndo Jesús konchjiñe e ndo ko ndachro ndo:

—Ijié juachaxin chjana ndo Dio ngajní ko ngata a nunte xasintajni,

¹⁹ *méxin, itjinta kain tjajna jii ngata a nunte xasintajni ko nchekuen ennta kain chujni chijnina ixi jaña tsitikaonna na kaxon. Ko ni tsitikaon, tikitéenta na ixi juachaxien Ndotána ko nombrée Chjen en ndo ko Espíritue ndo.

²⁰ Ko nchekuen ennta sen ixi tsitikaon sen kain nge e kuetuan an. Ko jan an tsake e ngajinnta kain nchakon hasta tsjexinja nunte xasintajni. Jaña tson en.

Chijnie ndo Jesús chronga ndo Marcos

Nichja ndo Juan Bautista chijnie ndo Dio ngata a ijna

(Mt. 3:1-12; Lc. 3:1-9, 15-17; Jn. 1:19-28)

¹ Ja in xrangixixin chijni jian ne e ndo Jesucristo, chjen en ndo Dio.

² Xranchi jitaxin xroon tsikjin ndo profeta Isaías, ndo tsichronga chijnie ndo Dio ó sa ó, ko ja in ndachro xroon:

Jan an xroxruan an naa ngisen xrochronga chijnina,

ndo me e tsitao an nti a

ixi sinchekonchjian an ndo cha o.

³ Ko tsin ennta naa tée sen tsake e ntajie,

ko tsuyako sen ko xrondachro:

“Nchekonchjiannta cha o tsixin in Ncháina,

tantje enta naa cha o nao.”

⁴ Ji i kon en nchakon kujj ndo Juan Bautista, bake e ndo ntajie bikitée ndo chujni. Juinçekuen en ndo na ixi xrokonda tsindoxin na ti ndako a kuanche e na ko xrobikitée na ixi jaña xrokomé e ijje chóna na.

⁵ Kueya na kujxin na nunte Judea ko tjanya Jerusalén kujj na ti bake e ndo Juan ixi tsin en na nge e ndachro ndo ko chronga na nge e ndako a juinche e na, ko ndo Juan bikitéexin ndo na ndajitinga ndatin in Jordán.

⁶ Mantée ndo Juan tsikoña ixi chjuen kucamello ko tjua jingatoxin ndo kaxon tsikoña tue é iku. Ko bajine ndo kuchjua ko tsjeen kunoa jii ntajie.

⁷ Ko ndo Juan juinçekuen en ndo na chijnie ndo Dio ko ndachro ndo:

—Tuenxinna jan an jirué e naa ngisen chóna ícha ijje juachaxin ixi najan an. Ixi jan an chonda i juachaxin tsoxindanga a tjuée katée ndo.

⁸ Jan an bikitéexinta inda ko je e ndo tsijj ndo tsikitéxinnnta ndo Espiritue ndo Dio.

Ndo Juan bikitée ndo ndo Jesús

(Mt. 3:13-17; Lc. 3:21-22)

⁹ Nchakon me e ndo Jesús kuachrxjexin ndo tjanya Nazaret nunte Galilea ko ndo Juan bikitéexin ndo ndo Jesús ndajitinga ndatin in Jordán.

¹⁰ Ko hora kuachrxjengixin ndo Jesús inda, tuinxin bikon ndo xitje e ngajni ko espíritue ndo Dio xingajin xranchi naa kuntúa ko bake e ngata a jaa ndo Jesús.

¹¹ *Ko kuin en na nichja naa tée sen kujxin ngajni, ndachro:

—Ja a chjan na ko jan an tsango tjua anta. Ko jan an juaxruxin ritjén ixi ja a.

Xixron anxrée tjaun xa xrojuincheye e xa ndo Jesús

(Mt. 4:1-11; Lc. 4:1-13)

¹² Ko tjume e Espíritue ndo Dio bikao ndo Jesús ngata a ijna.

¹³ Nti a bake e ndo Jesús yuu ikán nchakon ko nti a jii iku jie e ko Xixron anxrée tjaun xa xrojuincheye e xa ndo. Ko tjume e sen ángel kujj sen kuayakon en ndo Jesús.

Ndo Jesús tjangixin ndo nchekuen en ndo chujni

(Mt. 4:12-17; Lc. 4:14-15)

¹⁴ Juexinja xraxin in na ndo Juan ndo achjiso, tjume e ndo Jesús sakjui ndo nunte Galilea ko juinçekuen en ndo na chijni jian xranchi jii ti no tetuan an ndo Dio.

¹⁵ *Ko ndachro ndo:

—Ó kujj nchakon, tsijj juachaxien ndo Dio. Méxin tintu enta nge e ndako a xraxaonnta ko titikaonnta chijni jian.

Ndo Jesús kuiye e ndo noó sen itsé kuchee

(Mt. 4:18-22; Lc. 5:1-11)

¹⁶ Ndo Jesús jitji ndo ngande e inda nunte Galilea ko bikon ndo ndo Simón ko ndo kichuu ndo Simón ndatin in Andrés. Je e sen stetsé sen kuchee ko stetjanka sen nocha a chringi inda.

¹⁷ Ko ndachro ndo Jesús:

—Rua naninta, ko xrotjá anta ixra xrotsénta chujni ixi tsitikaonna na.

¹⁸ Ko tuinxin kuintu e sen nocha a tséxin sen kuchee ko rué e sen ndo Jesús.

¹⁹ Ko kJín a kuiji ndo Jesús ko bikon ndo ndo Jacobo ko ndo kichuu ndo, Juan, chjen en ndo Zebedeo. Je e sen ko ndotée sen stejá sen naa ntábarco stenchekonchjian sen nocha a ti tséxin sen kucheg.

²⁰ Ko tjume e ndo Jesús kuiye e ndo sen kaxon. Ko tuinxin kuintu e sen ndotée sen, ndo Zebedeo, ko je e ndo kuituekao ndo xinhexra ko ntábarco. Ko ndo Jacobo ko ndo Juan rué e sen ndo Jesús.

Naa xi bachóna espíritue Xixron anxrée

(Lc. 4:31-37)

²¹ Ko tjume e kuiji sen tjajna Capernaum ko nchakon sábadó, nchakon tjoké e na, kuixin in ndo Jesús ningue Israel ko kuaxi ndo juinchekuen en ndo chujni nti a.

²²*Ko ni ste nti a xronka na xranchi tjako ndo ixi chijnie ndo chóna ijíe juachaxin ko je a xranchi nichja ni tjako ley.

²³ Ko ngaxin in ni ngo me e jii naa xi chóna espíritue Xixron anxrée ko séen kuyako xa ko ndachro xa:

²⁴—Tintunana, Jesús tjajna Nazaret. ¿Á jui ia ixi sinchetjáñana? Jan an chuxian ko nóna ixi ja a naa ngisen ícha tjúá tsixrua an ndo Dio.

²⁵ Ko ndo Jesús kuyakutee ndo espíritue xi ña i, ko ndachro ndo:

—Tenkua, ko tachrxexian aséen xi ña.

²⁶ Ko espíritue Xixron anxrée juanka xi me e nunte ko kuyako xa séen ko kuachrje espíritue me e.

²⁷ Ko kain na xronka na ko ndache kichuu na:

—¿Ngisen ji i? ¿Nge e chijni natjúá nichja xa? Je e xa chóna xa ijíe juachaxin ko tetuen en xa espíritue Xixron anxrée ko titikaon espíritue.

²⁸ Ko nchijíi nunte Galilea kono e na xranchi nchexruen en ndo Jesús chujni ko xranchi nichja ndo.

Ndo Jesús juinchexruen en ndo jachée ndo Simón Pedro

(Mt. 8:14-15; Lc. 4:38-39)

²⁹ Tjume e ndo Jesús kuachrxexin ndo ni ngo, ko sakjui ndo ndo a ndo Simón ko ndo Andrés, ko sabikao ndo ndo Jacobo ko ndo Juan.

³⁰ Ko jachée ndo Simón jitsinga jan, níxin jan súa, ko ndache sen ndo Jesús nge e chóna jan.

³¹ Ko ndo Jesús konchjiñe e ndo ti jitsinga jan ko itsé ndo itja jan ko juinchengatjen ndo jan. Ko tuinxin kuachrje e jan súa ko kuajon jan juine sen.

Ndo Jesús juinchexruen en ndo kueya ni ni e

(Mt. 8:16-17; Lc. 4:40-41)

³² Ko ó kuitaon nchakon ko kontie, ko bikao na ni ni e ko ni chóna espíritue Xixron anxrée ti jii ndo Jesús

³³ ko nchijíi tjajna xra o na ngandangi nduja nchia ti jii ndo.

³⁴ Ko ndo Jesús juinchexruen en ndo kain ni ni e, ni chóna ngixe i ichin ko kuantsje ndo itsjé espíritue Xixron anxrée. Ko kuintue a ndo xronichja xa ixi je e xa no e xa ngisen je e ndo.

Ndo Jesús juinchekuen en ndo ni ste nunte Galilea

(Lc. 4:42-44)

³⁵ Ko nandá jitingasáña kuaya ndo Jesús, kuachrxexin ndo tjajna me e, sakjui ndo naa nunte xro an ngisen ste, nti a xronichje e ndo ndotée ndo jii ngajni.

³⁶ Ko tjume e ndo Simón ko sen chrikao ndo juée sen ndo

³⁷ ko hora kuitja sen ndo ndachro sen:

—Kain na stetjéenanta.

³⁸ Ko ndachro ndo Jesús:

—Sachjina ikaxin tjajna tjenka nti i ixi kaxon nti a xronichja chijni jian, ixi me ó juixin jan an.

³⁹*Ko jaña nchijíi nunte Galilea kuaji ndo kain ni ngo ko chronga ndo chijnie ndo Dio ko kuantsje ndo espíritue Xixron anxrée chóna chujni.

Ndo Jesús juinchexruen en ndo naa xi níxin chinlepra

(Mt. 8:1-4; Lc. 5:12-16)

⁴⁰ Ko naa xi níxin chinlepra konchjiñe e xa ngajin ndo Jesús ko bake exin ntatuchi in xa ko kuinóatée xa ngajin ndo, ko ndachro xa:

—Siá tjaunnta, chao nchexruannanta.

- ⁴¹ Ko ndo Jesús bikonóe e ndo xa ko bake e ndo itja ndo ngata a jaa xa ko ndachro ndo:
—Jaán tja on; toxruan an.
- ⁴² Ko jaña ndachro ndo ko tuinxin koxruen en xa.
- ⁴³ Ko ndo Jesús kuetuen en ndo xa ixi satsji xa ko ndachro ndo:
- ⁴⁴ —Xro an ngisen teki é ixi koxruan an. Itjia ngajin xitaana ixi ó koxruan an ko tájuan ti tikinixin kuituan an ndo Moisés, ko jaña tsikon kueya na ixi koxruan an.
- ⁴⁵ Ko xi koxruen en sakjui xa ko kuaxi beki e xa kain na xranchi koxruen en xa. Méxin, ndo Jesús imao bakixin in ndo kain tjajna ko bakitu e ndo ti xro an ngisen jii ko itsjé na bajé na ndo.

2

Ndo Jesús juinchexruen en ndo naa xi jua i itji
(Mt. 9:1-8; Lc. 5:17-26)

- ¹ Ko kuatsinga ikaxin nchakon ko tjume e ndo Jesús ikjan ndo tjajna Capernaum. Ko kono e na ixi bake e ndo naa nchia nti a.
- ² Ko kueya chujni konchjiñe e ngajin ndo Jesús ko kuitja i nchia kuixin in na ko kaxon tsango tsjé chujni jii nduja nchia. Ko ndo Jesús banchekuen en ndo na chijnie ndo Dio.
- ³ Ko tjume e kuji noó xi bikao xa naa xi jua i nchetengi tutée.
- ⁴ Méxin, jua i konchjiñe e xa ti jii ndo Jesús ixi kueya na ste nti a. Ko kuajin in xa ngata a nchia ko konxrato xa ngata a nchia ko nti a juinchexingajinxin xa xi ni e jita a kania.
- ⁵ Ko ndo Jesús bikon ndo ixi xi me e tsango chuntia xa ko ndache ndo xi ni e:
—Chjan na, ó tjañana kain ti ndako a juinche e.
- ⁶ Ko kaxin xi tjako ley ste xa nti a, stexraxaon xa:
- ⁷ “¿Sonda jaña nichja xi ji i? Nichjangí e xa ndo Dio. Ixi xro an ngisen sinchemé e ijie; je o ndo Dio chao sinchemé e ndo ijie chóna chujni”, jaña stexraxaon xa.
- ⁸ Ko ndo Jesús ó no e ndo nge e stexraxaon xa, méxin ndachro ndo:
—¿Sonda jaña xraxaonnta?
- ⁹ ¿Nge e ti ícha tangi a xrontatjan xa ixi komé e ti ndako a juinche e xa, ó tsingatjen xa ko xrotsé xa kanie e xa ko tsaxi tsaji xa?
- ¹⁰ Méxin, jai tsjako anta ixi jan an Chjen en ndo Dio, xjan jongí e xranchi chujni, chonda xjan juachaxin ngata a inche ko tsantsje xjan ijie chóna chujni.
Ko ndo Jesús ndache ndo xi ni e:
¹¹ —Jan an ntatjua tingatjen ko itsé kania a ko satjia ndúya.
- ¹² Ko stetsje e kain na ixi tuinxin bingatjen xi ni e ko itsé xa kanie e xa ko kuachrxexin xa nchia, ko sakjui xa. Ko kain ni ste nti a xronka na ko kaxin na kuajon na juasie na ngajin ndo Dio ko ndachro na:
—Nai a bikona jaña kon en.

Ndo Jesús kuiye e ndo ndo Mateo
(Mt. 9:9-13; Lc. 5:27-32)

- ¹³ Ko tjume e ndo Jesús sakjui ndo ngande e inda ko itsjé chujni konchjiñe e na ti jii ndo ko je e ndo juinchekuen en ndo na.
- ¹⁴ Ko jitatsinga ndo nti a, bikon ndo ndo Mateo, chjen en ndo Alfeo, jii ndo ti xengaxin i na tomi tayé e xi tjajna Roma ko ndo Jesús ndachro ndo:
—Rua nana.
Ko ndo Mateo bingatjen ndo ko tuinxin rué e ndo ndo Jesús.
- ¹⁵ Ko tjume e ndo Jesús bake e ndo ndo a ndo Mateo, ko kuajon sen nge e sine ndo. Ko kaxon ste kueya xi xenge e na ko ikaxin ni chóna ijie ko juinekao na ndo Jesús ko kao sen teyuu chrikao ndo.
- ¹⁶ Ko kaxin xi tjako ley ko xi fariseo bikon xa ixi ndo Jesús jinekao ndo kain xi xenge e na ko ikaxin ni chóna ijie, ko juanchangi e xa sen teyuu chrikao ndo Jesús, ko ndachro xa:
—¿Sonda xi tjako anta nekao xa ko tikao xa xi xenge e na ko ni chóna ijie?
- ¹⁷ Ko ndo Jesús kuin en ndo nge e ndache xa sen teyuu chrikao ndo me e ndachro ndo:
—Ni nía a xrokonde a na xinchexruan. Je o ni ni e xrokonde e na xinchexruan. Jui a jan an ixi tsiya a ni ndako nche e. Jui i ixi tsiya a ni chóna ijie.
- Juanchangi e sen ndo Jesús naa nge e*
(Mt. 9:14-17; Lc. 5:33-39)
- ¹⁸ Naa nchakon sen chrikao ndo Juan Bautista ko xi fariseo juinchekatse ñao na jinta nguixin nchakon, ko kuji kaxin na nichje e na ndo Jesús ko ndachro na:
—¿Sonda ni chrikao ndo Juan ko ni fariseo nchekatse ñao na jinta ko ni chrjiko a ja a, na i?
- ¹⁹ Ko ja in juatingíexin ndo Jesús:

—¿Á xrojuinchekatsé ñao nã jinta, ni tsikiye e xi kute e nchakon tsikiñ nã kiéé xa? Na i xixi xrastekao nã xa.

²⁰ Ko tsij nchakon xrotsé nã xi tsikute e, satsikao nã xa, ko tjume e ni kuiye e xa sinchekatse ñao nã jinta.

²¹ Xro an ngisen tonchrijin tu o manta natjúá ko take e nã ti manta tsitje. Siá jaña sinche e nã, tsichje manta tsitje ko í xro an tsona manta natjúá.

²² Kaxon jua i tsikia xran vino natjúá ngaya tjuanxran ntãxi, xixi siá jaña tson en, tsichje tjuanxran me e, ko ixran ko tjuanxran ndatsitjáña. Méxin, xran natjúá xrokonda tsikia xran naa tjuanxran natjúá, ko jaña kayui nge e tsitjáña i.

Konchrinjin sen noatrigó naa nchakon tjoké e ni judío

(Mt. 12:1-8; Lc. 6:1-5)

²³ Naa nchakon sábadó tjoké e ni judío, ndo Jesús ko sen teyuu chrikao ndo kuatsinga sen tjenka naa ijngi tsikenga nã noatrigó ko sen teyuu chrikao ndo kuaxi sen konchrinjin sen kaxin itjin trigo.

²⁴ Ko kaxin xi fariseo juanchangi e xa ndo Jesús:

—¿Sonda sen chrijiko a stenche e sen naa ixrã tikinixin a sinche eni nchakon tjoké eni?

²⁵ Ko ndachro ndo Jesús:

—¿Á noa inta ti ndachro xroon jitaxin chijnie ndo Dio chronga xranchi juinche e ndo David ko sen bikao ndo, naa nchakon kuen en sen jinta?

²⁶ Méxin, nchakon bake e xi Abiatar, xitaana tetuan an, je e ndo David kuixin in ndo ndo a ndo Dio ko juine ndo nutja tikinixin en ndo Dio ko kaxon kuajon ndo nio juine kain sen bikao ndo. Ko nutja me e je o xitaana chóna xa juachaxin sine xa nio.

²⁷ Kaxon ndachro ndo Jesús:

—Kóña nchakon tjoké eni xixi xrokonda tsjoké e chujni, je a xixi xrokuajonni juasieni ngajin nchakon me e.

²⁸ Ko jan an Chjen en ndo Dio, xjan jongí e xranchi chujni, chóna juachaxin tsetuan an nge e tson en nchakon tjoké eni.

3

Ndo Jesús juinchexruen en ndo naa xi tsixema itja

(Mt. 12:9-14; Lc. 6:6-11)

¹ Ko tjume e ndo Jesús kuixin in ndo ndo a ndo Dio íjngo. Ko nti a bake e naa xi tsixema naa itja.

² Ko konchjiñe e kaxin xi stetsaya xa ndo Jesús xixi tsikon xa á sinchexruen en ndo xi me e, nchakon tjoké e nã xixi jaña tsjankata a xa ndo Jesús ijje.

³ Ko ndo Jesús ndache ndo xi tsixema itja:

—Tingatjen ko take é ngusine nti i.

⁴ Ko juanchangi e ndo Jesús ni ste nti a, ko ndachro ndo:

—Nchakon tjoké eni, ¿á chao sinche eni ti jian, o á chao sinche eni ti ndako a? ¿Á chao tsingijnani naa ngisen?, o, ¿á naatsóñaxónni naa chujni?

Ko je e nã tenko nã.

⁵ Ko ndo Jesús koña ndo, ko bikon ndo kain ni ste nti a, me e koni e aséen ndo xixi tsango ícha aséen nã. Ko ndache ndo xi ni e:

—Tinxé tjáa.

Ko je e xa kuinxe itja xa, ko hora me e koxruen en itja xa.

⁶ Ko xi fariseo kuachrxjin xa nti a ko ikjui xa ti ste ni tjento xi Herodes ko juao kichuu xa xranchi naatsóñaxón xa ndo Jesús.

Kueya nã ste nã ngande e inda

⁷ Ko ndo Jesús ko sen teyuu chrikao ndo sakjui sen ngande e inda. Ko kueya nã jirué e nã sen, ni tsikí xjin nunte Galilea ko kaxon nunte Judea

⁸ ko tjajna Jerusalén ko nunte Idumea ko ikaxin nã tsikí xjin nã ton en inda jitinga ndatin en Jordán ko kaxon ni tsikí xjin no tjajna Tiro ko tjajna Sidón. Ko kain nã tsikin en nã ixrã ijje juinche e ndo Jesús ko kaxon tjaun nã tsikon nã me e.

⁹*Tjume e kuituen en ndo sen teyuu chrikao ndo xixi nti a xrochon en naa ntãbarco. Ko hora tsango xrokuixintja nã ndo xrokuixin in ndo ntãbarco

¹⁰ xixi kueya nã tsijinchexruen en ndo, ko kain ni ni e kuixintja nã ndo xixi tjaun nã xrotsé nã ndo.

¹¹ Ko kaxin nã chóna nã espíritue Xixron anxrée ko hora bikon nã ndo Jesús bake exin nã ntatuchi in nã ngajin ndo. Ko kuyako espíritue Xixron anxrée ko ndachro:

—Ja a chjen en ndo Dio.

¹² Ko ndo Jesús kuyakutee ndo espíritue Xixron anxrée ko ndachro ndo ixi xrochronga i xa ngisen je e ndo.

Ndo Jesús juée ndo teyuu sen tsajikao ndo

(Mt. 10:1-4; Lc. 6:12-16)

¹³ Tjume e kuajin in ndo Jesús naa ijna, ko nti a kuiye e ndo sen tjaun ndo xrokuajikao ndo ko konchjiñe e sen ngajin ndo.

¹⁴ Ko kuinche e ndo teyuu sen tsajikao ndo ixi tsetuen en ndo sen satsji sen xrochronga sen chijni jian.

¹⁵ Ko kuajon ndo juachaxin sinchexrjuen en sen ni ni e ko tsantsje sen espíritue Xixron anxrée chóna na.

¹⁶ Ko sen teyuu kuinche e ndo ja in ndatin in sen: ndo Simón, ndo juinchekin in ndo Jesús Pedro;

¹⁷ ko ndo Jacobo ko ndo kichuu ndo, ndo Juan, sen me e chjen en ndo Zebedeo. Kaxon sen me e juinchekin in ndo Jesús Boanerges me e xrondachro chjen en ti Tjateé.

¹⁸ Ko ndo Andrés, ndo Felipe, ndo Bartolomé, ndo Mateo, ndo Tomás, ndo Jacobo, chjen en ndo Alfeo, ko ndo Tadeo ko inaa ndo Simón, ndo tikinixin naa partido romano ndatin in cananista,

¹⁹ ko xi Judas Iscariote, xi juinchejki ndo Jesús.

Ndachro na ixi ndo Jesús chóna ndo juachaxien Xixron anxrée

(Mt. 12:22-32; Lc. 11:14-23; 12:10)

²⁰ Ko tjume e ndo Jesús ko sen teyuu chrikao ndo kuixin in sen naa nchia. Ko íjngo kueya na xra o na nti a ko jua i juine ndo Jesús ko sen teyuu chrikao ndo.

²¹ Ko kono e sen ndo a ndo Jesús ixi nti a jii ndo ko kuij sen ixi satsikao sen ndo ixi ndachro sen je e ndo tsinchetjáña jaa ndo.

²² *Ko kaxon kuij kaxin xi tjako ley tsikj xin tjajna Jerusalén ko ndachro xa:

—Xi ji i chóna xa juachaxien Beelzebú, Xixron anxrée, xi tetuen en kain espíritue ña i, méxin, chao tantsje xa espíritue Xixron anxrée.

²³ Ko ndo Jesús kuiye e ndo xi ndachro me e ko ja in juakoxin ndo:

—¿Xranchi Xixron anxrée je o xa tsantsje xa espíritue xa?

²⁴ Siá naa tjajna, je o na tsetoka o kichuu na, jua i tsintekao kichuu na jian.

²⁵ Ko ni stekao kichuu naakua nchia, siá ningakon en kichuu na, kaxon jua i tsekao kichuu na ndako.

²⁶ Ko kaxon jaña siá Xixron anxrée tsetoka o xa juachaxin chóna xa, ndatsitjáña juachaxin me e.

²⁷ Xro an ngisen chao tixin in ndo a naa xi soji ixi tsee na nge e chóna xa. Sa ó xrokonda xrokuintee na xi soji ixi chao tsee na nge e chóna xa.

²⁸ Nduaxin ntatjunta ixi ndo Dio chao sinchemé e ndo kain ijje chóna chujni ko kain nge e ndako a tsinichja na.

²⁹ *Ko ngisen xronichja ndako a ixi Espíritue ndo Dio jua i tsomé e ijje me e, ni xronichja me e, kain nchakon tsama na ijje.

³⁰ Jaña ichro ndo Jesús ixi ni me e tsindachro na ixi je e ndo chóna ndo espíritue Xixron anxrée.

Janée ndo Jesús ko xi kichuu ndo

(Mt. 12:46-50; Lc. 8:19-21)

³¹ Ko tjume e janée ndo Jesús ko xi kichuu ndo kuiji sen ti jii ndo Jesús ko nduja nchia ste sen, kuituen en sen naa xi tsikiye e xa ndo Jesús.

³² Ko sen ste ngajin ndo Jesús, ndache sen ndo:

—Janáanta ko xi kichuunta ste sen nduja ko nichja anta sen.

³³ Ko ndo Jesús ndachro ndo:

—¿Ngisen janána ko ngisen sen kichian?

³⁴ Ko jitsje e ndo kain ni ste nti a ko ndachro ndo:

—Sen ji i me e sen janána ko sen kichian.

³⁵ Kain sen nche e nge e tjaun ndo Dio, sen me e sen kichian ko janána.

4

Ndo Jesús juako ndo kondee xi bikenga

(Mt. 13:1-9; Lc. 8:4-8)

¹ *Tjume e ndo Jesús ijngo juangíxin ndo juinçekuen en ndo na ngande e ndalago. Ko nti a xro o itsjé chujni ti jii ndo. Ko je e ndo kuixin in ndo naa ntábarco jita a inda, ko nti a bake e ndo nunte. Ko kain na kuitu e na ngande e inda.

² Ko itsjé nge e juinçekuen en ndo na. Ko ndachro ndo:

³ —Tin ennta ji i: Naa xi kuikenga tsee,

⁴ ko kaxin tsee kuenga xa kuitsinga tsee ngande e cha o. Ko kuji kuxe juine ba tsee.

⁵ Ikaxin tsee kuitsinga tsee ti jii kueya ixro, ti ko a itsjé inche, ko taka kuachrje ika ixi tjin a inche,

⁶ ko nchakon kuachrje chjiixro ichján ka ko xema ka ixi yasoe a jii nue e ka.

⁷ Ko kaxin tsee kuitsinga tsee ti jii ntácha a. Ko ntácha a icha kuangi ntáa. Me e xrabaatja ka ko ndakuangi a ka.

⁸ Ko ícha tsee kuitsinga ngata a inche jian, me e tsee chaxro kuangi ka. Ko tsango kueya tsee kuajon ika me e; naa kuajon ikánte tsee, ko inaa ka kuajon níikán tsee, ko inaa kuajon naa ciento tsee.

⁹ Ko ndachro ndo Jesús:

—Ngisen tjaun tsin en, tsin en sen jian.

Ndo Jesús chronga ndo nge e xrondachro ti nichja ndo

(Mt. 13:10-17; Lc. 8:9-10)

¹⁰ Ko nchakon kuitu e ndo Jesús je o ndo, sen ste tjenka ndo ko sen teyuu chrikao ndo juanchangi e sen ndo nge e xrondachro nge e beki ndo.

¹¹ Ko je e ndo Jesús ndachro ndo:

—Ndotána tjaun ndo tsienxinnta ti noa inta ti tetuan an je e ndo. Ko ni kaxin tsekiexinni na xranchi tekini naa chijni,

¹² ixi maski tikon na ko tin en na ko jaña tsienxin a na ixi tsindoxin a na ti ndako a nche e na, xrokjan i na ngajin ndo Dio ko jaña je e ndo tsantsje a ndo ijje chónda na.

Ndo Jesús ndachro ndo nge e xrondachro ti xi bengá noatrigó

(Mt. 13:18-23; Lc. 8:11-15)

¹³ Ko tjume e ndache ndo sen:

—¿Á tienxin anta xranchi xrondachro nge e beki anta? Siá na i, ¿xranchi tsienxinnta ikaxin nge e tseki anta?

¹⁴ Sen kuikenga tsee me e jii xranchi naa ngisen juinçekue enni chijnie ndo Dio.

¹⁵ Ko kaxin sen me e xranchi tsee kuitsinga ngande e cha o, ixi kuin en sen chijnie ndo Dio, ko tjume e kuji Xixron anxrée ko nchetjáñajin xa sen.

¹⁶ Ikaxin tsee kuitsinga ti jii ixro, me e sen kuin en chijnie ndo Dio ko juaxruxin bake e sen,

¹⁷ ko sé a kuitikaon sen ixi kuji juachjaon ngata a sen ko koñao e na sen ixi kuitikaon sen chijnie ndo Dio, méxin kuintu e sen ti kuitikaon sen ndo.

¹⁸ Ko tsee kuitsinga ngakjen en ntácha a me e sen tin en chijnie ndo Dio,

¹⁹ ko ícha nche e sen tjée sen tomi ko ícha rué e sen ti jii juaxruxin. Kain ji i tingakon en ixi tsin en sen chijnie ndo Dio, ko nche a sen ti tjaun ndo.

²⁰ Ko tsee kuitsinga ti jii inche jian, sen me e tayé e sen chijnie ndo Dio ko titikaon sen kain ti ndachro ndo ko jian nche e sen ngajin ndo Dio. Sen me e ste sen xranchi tsee kuajon ikánte tsee, ko ikaxin sen xranchi tsee kuajon níikán tsee, ko ikaxin sen xranchi tsee kuajon naa ciento tsee.

Ndo Jesús juako ndo no take e naa xro i tingasáña

(Lc. 8:16-18)

²¹ *Ko kaxon ndachro ndo Jesús:

—¿Á xrochóndani naa xro i ko xro i me e á tsemáni xro i ngangí naa ntacájón o tsake eni xro i ngangí naa ntáa tejuata ani? Na i, je a me e sinche eni. Xrokonda nui tsake eni xro i me e ixi chao tsingasáña xro i.

²² *Méxin, xro an nge e ti jimá tsonoxin a ko xro an nge e imao tsonoe a na xrojan nchakon ixi kain nge e tsonoxin ixi xro i.

²³ Ko ngisen tjaun tsin en, tsin en sen jian.

²⁴ *Ko kaxon ndachro ndo:

—Méxin, ja anta tin ennta jian. Xranchi ja anta tájonnta nge e ngajin ikaxin na, jaña ndo Dio xrotjáanta ndo kaxon, ko ícha itsjé xrotjáanta ndo.

²⁵ *Ni itsjé chónda, ndo Dio tsingijna ndo xrochónda na ícha. Ko ni xro an nge e chónda, ndo Dio tsantsje e ndo na ti nge e chónda na.

Ndo Jesús juako ndo xranchi tsangi tsee

²⁶ Ko kaxon ndachro ndo Jesús:

—Ti juachaxin tetuanxin ndo Dio jii xranchi naa ngisen tikenga nunte.

²⁷ Ko maski tejua sen ko taya sen ko tatsinga kaxin nchakon ko kaxin tiie, tsee kuenga sen tachrje tsee ko tangi tsee. Ko sen kuenga noe a sen xranchi kon en ji i.

²⁸ Ixi inche je o nche juinche e ixra. Sa ó tachrje chaan no, ko tjume e ntée, ko tjume e ticha ko tóna tsee.

²⁹ Ko nchakon ticha tsee me e xrokonda xrochrijin tsee.

Ndo Jesús juako ndo chijnie ti tsee mostaza

(Mt. 13:31-32; Lc. 13:18-19)

³⁰ Ko kaxon ndachro ndo Jesús:

—¿Nge e xrondachro ti juachaxin tetuan an ndo Dio?

³¹ Naxre o xranchi naa tsee ndatin in mostaza tsikenga naa xi jngi e xa. Ji i naa tsee ícha nchín ixi kain tsee jii xasintajni.

³² Ko ti tsikinga tsee, tangi ka ko ikjan naa ntãa ícha jiié ixi ikaxin ntãa jii ngata a nunte. Ko kaxon chaan ntãa tangi ícha noi, ko kuxe tjanga ba ko chao nchéña ba kakée ba chringi tsauen ntãa.

Nge e xrondachro ti juako ndo Jesús

(Mt. 13:34-35)

³³ Jaña ndo Jesús juinchekuen en ndo kain na, ko beki ndo kueya nge e xranchi chao xrokuienxin na.

³⁴ Ko kainxin nge e juinchekuen en ndo na beki ndo xranchi naa chijni. Ko juexin juinchekuen en ndo na, tjume e ndache ndo sen teyuu chrikao ndo xranchi xrondachro kain ti beki ndo.

Ndo Jesús kuetuen en ndo chrinto ko inda

(Mt. 8:23-27; Lc. 8:22-25)

³⁵ Ko nchakon me e ó kóndo ndache ndo Jesús sen teyuu chrikao ndo:

—Tsatsingatu ena ndalago.

³⁶ Ko tjume e kuintu e sen kain ni ste nti a ko sabikao sen ndo Jesús ngaxin in ntãbarco ko kaxon ikaxin ntãbarco sakjui ntãa.

³⁷ Ko tuinxin kuji naa chrinto soji ko tsango juinchetengi inda ko ntãbarco kuaxi bikia ntãa inda ko kuaxi konuntengi ntãbarco.

³⁸ Ko ndo Jesús ndakuejua ndo ícha ndá a ngaxin in ntãbarco ko jikjón ndo naa noxra. Ko juinchexingame e sen ndo, ko ndachro sen:

—¡Maestro! ¿Á ta inta juachjaon ixi xrokjuina inda?

³⁹ Ko je e ndo bingatjen ndo, ko kuyakutee ndo chrinto ko inda ko ndachro ndo:

—Tenkua ko ndatake e.

Ko tuinxin je e inda ndabake e inda ko chrinto kaxon.

⁴⁰ Ko ndache ndo je e sen:

—¿Sonda xrakonnta? ¿Á xrachuntia antana jan an?

⁴¹ Ko je e sen xronka sen ko ndache kichuu sen:

—¿Ngixe i xi ji in ixi tituen en xa chrinto soji ko inda ko kayui titikaon ngajin xa?

5

Naa xi jii nunte Gadara chóna kueya espíritu Xixron anxrée

(Mt. 8:28-34; Lc. 8:26-39)

¹ Ko tjume e kuatsingatu e sen ndalago, ko kuji sen nunte Gadara.

² Ko ndo Jesús xingajinxin ndo ntãbarco ko tuinxin naa xi konchjiñe e xa ngajin ndo ko kuixi xa ti jii itjaq* ti tsixrabaa chujni ko chóna xa espíritu Xixron anxrée.

³ Xi me e bake e xa ti ste itjaq ti tsixrabaa chujni tsiken en, ko xro an ngisen chao tokuaxin en itsé xa ko jua i tsitexin xa nochika.

⁴ Ko itsjé vez bakichruaxin na tutée xa ko itja xa ixi nochika, ko je e xa bakonchrindaon xa chika. Ko xro an ngisen tjacha tjintee xa.

⁵ Bakaji xa tiie ko nchakon ti jii ijnã ko ti tsixrabaa chujni ko nti a kuyako xa ko ixro tande e xa ntakuin xa.

⁶ Ko ikjin bikon xa ndo Jesús ko binga xa konchjiñe e xa ko bake exin ntatuchi in xa ngajin ndo

⁷ ko séen kuyako xa:

* 5:2 itjaq cueva

—¿Sonda nchexronkana Jesús, chjen en ndo Dio jii ngajní? Jan an tjaun a sinchexronkana.

⁸ Jaña ndachro xa ixi tsindachro ndo Jesús:

—Ja a espíritu ña i, tachrxexian xi ña.

⁹ Ko ndo Jesús juanchangi e ndo espíritu me e:

—¿Xranchi ti ian?

Ko je e espíritu me e ja in juatingíexin:

—Jan anna ndatin inna Legión ixi tsango itsjé jan anna.

¹⁰ Ko kain espíritu Xixron anxrée kuinóatée ngajin ndo Jesús ixi xroxruan i ndo espíritu satsji ikjín.

¹¹ Ko tjenka nti a jii naa ijna steneña itsjé kuchinga.

¹² Ko kuinóatée kain espíritu Xixron anxrée ko ndachro:

—Tituan an satsjina ti ste kuchinga, ko tájuan juachaxin tsixin inna ngaxin in ba.

¹³ Ko tuinxin ndo Jesús kuajon ndo juachaxin. Ko kain ti espíritu Xixron anxrée kuachrxexin xi me e, ko kuixin in espíritu ngaxin in kuchinga. Ko kain ko ste nti a xranchi yuu mil ba. Ko kain ba binga ba ko kuitsingangi ba ti yaso e jii ndalago ko kjun en ba inda.

¹⁴ Ko tjume e xi stetsje e kuchinga xrakon xa ko binga xa kuindache xa ni tjajna nge e kon en ko kaxon kuindache xa ni ste ngataon ijngi nge e kon en. Ko tjume e itsjé nã kuitsje e nã nge e kon en nti a.

¹⁵ Ko hora kuiji nã ti jii ndo Jesús, bikon nã ixi nti a jii xi kuachóna kain espíritu Xixron anxrée ko jii xa nunte ko jiá xa manta ko ó ndako xraxaon xa, ko bikon nã me e xronka nã.

¹⁶ Ko kain ni bikon nge e kon en, kueki nã xranchi kon en xi kuachóna espíritu Xixron anxrée ko nge e tsikon en kuchinga.

¹⁷ Ko kuaxi nã kuinóatée nã ngajin ndo Jesús ixi satsjixin ndo nti a.

¹⁸ Ko ndo Jesús kuajin in ndo ntábarco ko ti xi kuachóna espíritu Xixron anxrée kuinóatée xa ixi kao xa xrokjui xa.

¹⁹ Ko ndo Jesús kuajon a ndo juachaxin ixi kao xa itsji xa ko ndachro ndo:

—Satjia ko teki é kain sen ndúya kain nge e juinche e ndo Dio ngajian ko xranchi bikonóa a ndo.

²⁰ Ko xi me e sakjui xa ko kuaxi beki e xa kain ni tjajna tikinixin en Decápolis kain nge e juinche e ndo Jesús ngajin xa. Ko kain ni kuin en tsango xronka nã.

Koxruen en naa xjanchrichjan ko naa nchri

(Mt. 9:18-26; Lc. 8:40-56)

²¹ Ijngo ndo Jesús kuixin in ndo ntábarco ko sakjui ndo tuenxin ndalago, ko nti a kueya nã konchjiñe e nã ngajin ndo ko je e ndo ndi ao kuitu e ndo ngande e nda.

²² Ko tjume e kuiji naa xi baketuan an naa ni ngo judío, xi me e ndatin in xa Jairo. Ko hora bikon xa ndo Jesús, bake exin ntatuchi in xa ngajin ndo,

²³ ko ja in kuinóatée xa:

—Xjanchrichjan na jite en xjan. Ixudio ichjina nía, takée tjáanta ngata a xjan ixi tsoxrueen en xjan.

²⁴ Ko tjume e ndo Jesús sabikao ndo xa ko tsango itsjé nã rué e nã ko kuixintja nã ndo Jesús.

²⁵ Ko ngakjen en kain ni me e konchjiñe e naa nchri ni e, ó teyuu nano níexin nchra jnié nchra.

²⁶ Ko je e nchri me e juinchexienxin nchra ngajin xinchexruan kain ti bachóna nchra, ko ninaa xinchexruan jua i juinchexruen en xa nchra ko ícha bakoni e nchra.

²⁷ Ko ó tsikin en nchra nge e beki nã ti juinche e ndo Jesús, me e je e nchra kuiji nchra ko tuenxin nã konchjiñexin nchra ko itsé nchra mantée ndo Jesús

²⁸ ixi ndachro nchra: “Síá je o xrotse ngande e mantée ndo, me e tsoxrueanna.”

²⁹ Ko tuinxin kuixin jnié nchra, me e kono e nchra ixi ó koxruen en nchra.

³⁰ Ko ndo Jesús kono e ndo ixi juachaxien ndo koxruenxin naa ngisen, me e ngatjia ndo ko juanchangi e ndo ni ste nti a:

—¿Ngisen itséna?

³¹ Ko je e sen juatingíexin sen ko ndachro sen:

—Maestro, kueya nã jii ngandajinnta ko tonchekanta nã, ¿sonda tjanchangínta ngisen itsé mantoanta?

³² Tjume e bingatjia ndo ko tsje e ndo nguixin ixi tsono e ndo ngisen itsé mantée ndo.

³³ Ko je e nchra xronka nchra ko jixranga nchra ixi koxruen en nchra, ko konchjiñe e nchra ti jii ndo ko bake exin ntatuchi in nchra ngajin ndo ko chronga nchra kain nge e kon en nchra.

³⁴ Ko ndachro ndo Jesús:

—Chjan na, ja a koxruan an ixi chuntiana. Jai juaxruxin satjia ixi ó koxruan an.

³⁵ Ko xrajnichja ndo Jesús, kuⁱⁱ kaxin ni ku^{ix}in ndo a xi Jairo, xi baketuan an ni ngo ko ndache na xa:

—Xjannchrichja anta ó kuen en xjan; í chje anta ndo maestro ixra.

³⁶ Ko je e ndo Jesús kuin en ndo nge e ndachro na, ko ndache ndo xi tetuan an ni ngo:

—Xrakon a ja a, je o titikáoanna.

³⁷ Ko kuajon a ndo juachaxin ixi kain sen itsji sen, je o ndo Pedro ko ndo Jacobo ko ndo Juan, ndo kichuu ndo Jacobo, me e sen bikao ndo.

³⁸ Ko hora kuiji sen ndo a xi tetuan an ni ngo, bikon sen ixi stetsjanga na ko stetaxin na xjan juachjaon ko stetoyako na.

³⁹ Ko kuixin in ndo Jesús nchia, ko ndachro ndo:

—¿Sonda tuyakonta ko tsjanganta? Je e xjan tsiken a xjan; je o jijua xjan.

⁴⁰ Ko je e na juanoa na ndo, méxin kuetuan an ndo ixi kain na satsji na nduja ko je o kuituekao ndo ndotée xjan ko janée xjan ko sen ní, sen chrikao ndo, ko je e sen kuixin in sen ti jii xjan.

⁴¹ Ko ndo Jesús itsé ndo itja xjan ko ngigue e ndo nichjexin ndo xjan, ko ndachro ndo:

—Talita, cumi —me e xrondachro: Xjannchrichjan, tingatjen.

⁴² Ko xjan me e tuinxin bingatjen xjan ko kuaji xjan ixi xjan me e kuachóna xjan teyuu nano, ko kain ni jii nti a tsango xronka na.

⁴³ Ko ndo Jesús kuetuan an ndo ixi xro an ngisen tseki e na nge e kon en. Ko kaxon kuetuan an ndo xrochjée na xjan nge e sine xjan.

6

Ndo Jesús bake e ndo tjanya Nazaret

(Mt. 13:53-58; Lc. 4:16-30)

¹ Ko tjume e ndo Jesús kuachrxjexin ndo tjanya nti a ko sakjui ndo tjanée ndo tjanya Nazaret ko kaxon rué e sen teyuu chrikao ndo.

² Ko kuiji sábado, nchakon tjoké e na, ko kuaxi ndo juinçekuen en ndo na ngaxin in ningue ni israelita nti a. Ko kueya na kuin en na nge e tjako ndo, me e xronka na ko ndachro na:

—¿No kuitjaxin xi ji i nge e tjako xa?, ko, ¿ngisen juinçekuen en xa ti nichja xa ko ixra ijié nche e xa?

³ ¿Á je a ji i xi carpintero ko janée xa ndatin in María, ko xi kichuu xa xi Jacobo, ko xi José, ko xi Judas, ko xi Simón? ¿Á stekui ana nchrikichuu xa nti í?

Méxin, kuitikaon a na nge e ichro ndo.

⁴*Ko ndachro ndo Jesús:

—Kain tjanya kain chujni tajon na juasaya ngajin naa ndo nichja chjnie ndo Dio; ko sen tjanée ndo, na i, ko kaxon sen ndo a ndo tajon a sen juasaya ngajin ndo.

⁵ Méxin, nti a xro an ixra jian juinche e ndo, je o bake e itja ndo ngata a jaa kaxin ni ni e ko juinçexruen en ndo na.

⁶ Ko tsango xronka ndo ixi kuitikaon a na. Ko tjume e sakjui ndo kaxin tjanya nchínchin ste tjenja nti a ko juinçekuen en ndo na.

Ndo Jesús xruan an ndo teyuu sen

(Mt. 10:5-15; Lc. 9:1-6)

⁷ Ko tjume e ndo Jesús kuiye e ndo sen teyuu sen chrikao ndo ko kuaxi kuetuan an ndo ixi yuu sen itsji sen ko kaxon kuajon ndo juachaxin ixi chao tsantsje sen kain espíritu Xixron anxrée chóna chujni.

⁸ Ko kuetuen en ndo sen ixi xro an nge e tsikao sen ti tsaa sen cha o. Je o naa ntakuto tsjixin sen ko me ó tsikao sen. Ko tsikau a sen ti tsinga nge e ko nge e sine sen ko tsikau a sen tomi.

⁹ Ko je o kate jichjanga sen ko je o manta jiá sen tsikao sen.

¹⁰ Ko kaxon ndachro ndo:

—Nchakon tsixin innta naa nchia nti ao tsitu anta hasta tsachrxjexinjanta tjanya me e.

¹¹*Ko siá tsjasonta xrojan tjanya ko tsajon a na juachaxin tsitu anta nti a ko xrochro a na tsin en na nge e tjakonta, ja anta tachrxjexinnta tjanya me e ko tontsjenganta inche yaa kateanta, me e tsjakoxinnta ixi ndako a juinche e na ngajinnta. Ko nduaxin ndachrxjan ixi nchakon sinchéña ndo Dio ijié ngajin chujni, ícha tangi tson en ni tjanya me e, ixi ni tjanya Sodoma ko ni tjanya Gomorra.

¹² Ko sakjui sen ko ndache sen na ixi xrokonda tsindoxin na nge e nche e na ko tsintu e na ti ndako a nche e na.

¹³ *Ko kaxon kuantsje sen itsje espíritu Xixron anxrée kuachóna kaxin na. Ko ngata a jaa itsje ni ni e bake e sen ndaxi e ko jaña koxruen en na.

Kuen en ndo Juan Bautista

(Mt. 14:1-12; Lc. 9:7-9)

¹⁴ *Ko xi rey Herodes kuin en xa kain nge e jian kuanche e ndo Jesús ixi kain na teki na xranchi ije juachaxin chóna ndo, me e ndachro xa:

—Ndo Juan Bautista ó tsixechón ndo ixi xraje o juachaxin chóna xi ji i.

¹⁵ Ko kaxin na ndachro na:

—Ji i ndo Elías kuachronga chijnie ndo Dio.

Ko ikaxin na ndachro na:

—Ji i naa ndo kuachronga chijnie ndo Dio ó sa ó.

¹⁶ Ko kuin en xi Herodes ko ndachro xa:

—Ji in ndo Juan, ndo kuetuan an konchrinjin na jaa ndo, ndo me e ó tsixechón ndo.

¹⁷ *Ko xi Herodes tsiketuan an xa ixi tsitexin ndo Juan ixi nochika ko tsixraxin in na ndo ndo achjiso ixi jaña tsjanchia nchri Herodías. Je e nchri Herodías, nchrinchri e xi Felipe xikichuu xi Herodes, ko je e xi Herodes kua xa nchri me e xranchi xrokjui nchrinchri e je e xa.

¹⁸ Ko ndo Juan ja in tsindache ndo xi Herodes:

—Xro an juachaxin jii ixi ja a xrochóna nchrinchri e xi kichuuu.

¹⁹ Méxin nchri Herodías tsango koña o e nchra ndo Juan ko tjaun nchra xrokóña nchra ndo, ko jua i juinche e nchra me e

²⁰ ixi xi Herodes xrakon en xa ndo Juan ixi kuan o xa ixi ndo Juan naa ngisen tsango jian ko tjúa aséen. Méxin, chro a xa tsajon xa juachaxin ixi je e nchri tsjaya nchra. Ko maski xi Herodes tienxin a xa jian kain ti kuandachro ndo Juan, tjaun xa icha xrokuin en xa ti nge e juako ndo.

²¹ Ko nchri Herodías juacha nchra nchakon kiée xi Herodes. Tsikiye e xa ni tetuan an tjajna ko ni tetuen en xi soldado ko ikaxin ni tetuan an nunte Galilea ixi tsji na kiée xa.

²² Ko nchrichje en nchri Herodías kuixin in nchrichan ti ste na, ko ité nchrichan, ko tsango juaxruxin bake e xi Herodes ko kain ni stenekao xa nti a. Ko je e xi Rey Herodes ndache xa nchrichan me e:

—Tjanchiana nge e tjauan ko jan an xrotja á.

²³ Ko je e xa nichjaxin ngatoxin ndo Dio ixi nduaxin tsajon xa ngixe i nge e tsjanchia nchrichan maski ngusine tjajna tetuan an xa.

²⁴ Ko je e nchrichan kuachrje nchrichan ko ndache nchrichan janée nchrichan:

—¿Nge e tsjanchia?

Ko janée nchrichan ndachro jan:

—Tjanchia jaa xi Juan Bautista.

²⁵ Ko je e nchrichajan jaiko ikjan nchrichan ti jii xi rey, ko ndachro nchrichan:

—Jan an tja on xrochjána jaa xi Juan Bautista ngaya naa laato.

²⁶ Ko je e xi rey tsango koni e aséen xa ixi jaña juanchia nchrichan ixi tsindáchro xa ngatoxin ndo Dio tsajon xa kain ti tjanchia nchrichan ko tsikin en kain ni ste nti a, méxin, í jua i xrondachro xa na i.

²⁷ Ko tuinxin kuetuen en xa naa xi soldado ixi tsjikao xa jaa ndo Juan.

²⁸ Ko xi soldado sakjui xa ndo achjiso ko konchrinjin xa jaa ndo Juan ko juankaya xa naa laato jaa ndo ko chjée xa nchrichajan ko je e nchrichan biken en nchrichan janée nchrichan.

²⁹ Ko kuin en kain sen chrikao ndo Juan ixi jaña tsikon en, me e juirue e sen cuerpo e ndo ko juabaa sen ndo.

Ndo Jesús kuajon ndo nge e juine na ó mil chujni xi

(Mt. 14:13-21; Lc. 9:10-17; Jn. 6:1-14)

³⁰ Ko tjume e sen tsixrua an ndo Jesús ikjan sen ti jii ndo ko beki sen kain ti juinche e sen ko kain ti nichja sen.

³¹ Ko ndachro ndo Jesús:

—Tsachrjendána sachjina ntajie ti xro an ngisen ste ko nti a tsjokajna nchín.

Jaña ndachro ndo ixi kueya na itji na ko tji na ko ko a tiempo sine sen.

³² Ko ndo Jesús ko sen teyuu chrikao ndo, je o sen kuixin in sen naa ntábarco sakjui sen naa nunte xro an nge e jii.

³³ Ko kueya nā bikon nā ixi sakjui sen ko ndo Jesús nti a kaxon jitji ndo, me e kuachrxjin nā tǵajné nā ko binga nā, méxin sa ó kuiji nā ngande e ndalago ko nti a stechón en nā ndo Jesús.

³⁴ *Ko hora kuachrxjin ndo ntabarco, bikon ndo ixi kueya nā jichón en nā nti a, méxin bikonóe e ndo nā ixi ste nā xranchi kutuchjon chóna i ngisen tsje e ba. Ko juangíxin ndo juinchekuen en ndo nā kueya nge e.

³⁵ Ko ó kóno ko sen teyuu chrikao ndo Jesús konchjiñe e sen ngajin ndo, ko ndachro sen: —Ó kóno ko xro an nge e jii nti i.

³⁶ Ndachenta nā ixi satsji nā naa nchia o naa tǵajna kǵin a ste, ko tse na nā nge e sine nā ixi xro an nge e chóna nā.

³⁷ Ko ndo Jesús juatingíxin ndo:

—Ja anta tǵajonnta nge e sine nā.

Ko je e sen ndachro sen:

¿Á tǵajonnta tse nana yuu ciento denario nutja ixi tsajonna sine nā?

³⁸ Ko ndo Jesús juanchangi ndo:

—Titsje enta ngijan in nutja chondanta.

Ko kuitsje e sen ko ndachro sen:

—Jii na ó nutja ko yuu kuchee.

³⁹ Ko kuetaan an ndo ixi kain nā xrobake e nā nunte ngata a kayua.

⁴⁰ Ko jaña xrochjeya nā tsachrjendáa nguungu ciento na ko nguungu cincuenta nā.

⁴¹ Ko ndo Jesús kua ndo ti na ó nutja ko yuu kuchee ko tsje e ndo ngajni ko kuajon ndo juasie ndo ngajin ndo Dio ko konchrinjin ndo nutja ko chjée ndo sen teyuu chrikao ndo ixi tsonchjeya sen sine kain ni ste nti a; kaxon konchrinjin ndo ti yuu kuchee ko konchjeya sen ixi sine kain nā.

⁴² Ko kain nā juine nā ko konkje e nā.

⁴³ Ko juexin juine nā ko sen teyuu chrikao ndo Jesús juejo sen tutu o nutja ko kuchee tsixe e ko juinchekaon sen teyuu ntaxra ti nutja ko kuchee.

⁴⁴ Ni juine me e xranchi na ó mil xi.

Ndo Jesús itji ndo ngataon ndalago

(Mt. 14:22-27; Jn. 6:16-21)

⁴⁵ Ko tuinxin ndache ndo Jesús sen teyuu chrikao ndo ixi tixin in sen ntabarco ko tsatsingatu e sen ndalago no jii tǵajna Betsaida. Ko je e ndo xrakuitu e ndo nichje e ndo kain ni ste nti a.

⁴⁶ Ko juexin nichje e ndo nā, sakjui ndo naa iǵnā ixi tsinichje e ndo ndo Dio.

⁴⁷ Ko ó kóno ko kontie ko ntabarco me e kuiji nā ngusine ndalago, ko je e ndo Jesús je o ndo kuintu e ndo nunte nti a.

⁴⁸ Ko bikon ndo ixi tsango tangi tikao sen nā ixi tsango soji jitinga chrinto ko me e rué e ndo sen. Ko tutée ndo jitixin ndo ngata a nda ko konchjiñe e ndo ti ste sen ko juinche e ndo xranchi xrokuitaon ndo.

⁴⁹ Ko hora bikon sen jitji ndo ngata a inda, tsango xraxaon sen ixi bikon sen naa chrintoe chujni tsiken en, ko kuyako sen

⁵⁰ ixi kain sen bikon sen ndo ko ícha xronka sen. Ko je e ndo nichja ndo, ko ndache ndo sen:

—Xronka inta, jan an jui i.

⁵¹ Ko je e ndo kuixin in ndo ntabarco ti ste sen, ko chrinto tuinxin ndabake e chrinto. Ko je e sen ícha xronka sen ixi jaña kon en

⁵² ixi tsikiexin a sen ti juinche e ndo Jesús nchakon kuajon ndo itsjé nutja ixi xracha aséen sen me e kuitikaon a sen ndo.

Ndo Jesús juinchexruen en ndo naa xi ni e nunte Genesaret

(Mt. 14:34-36)

⁵³ Ko kuatsingatu e sen ndalago ko kuiji sen nunte Genesaret ko nti a kuenchrua sen ntabarco ngande e inda.

⁵⁴ Ko tuinxin ti kuachrxjin sen inda, ni ste nti a kuichúxin nā ndo Jesús.

⁵⁵ Ko je e nā kuichronga nā nchiji nunte nti a, méxin kuaxi nā bikao nā itsjé ni ni e, ni jitsingata a kania ko bikao nā ti jii ndo Jesús.

⁵⁶ Ko kain ti no ikjuu ndo, tǵajna nchín ko tǵajna ijié, o ngayá chjaka me e bika o nā kain ni ni e ko bake e nā ngande e cha o. Ko ni ni e tinóatée nā ngajin ndo Jesús ixi je o xrotsé nā ngande e mantée ndo me e koxruen en nā.

7

Nge e nchekitja aséen chujni
(Mt. 15:1-20)

¹ Tjume e kaxin ni fariseo ko kaxin ni bajako chijnie ndo Dio kuixin na tjajna Jerusalén konchijne e na ti jii ndo Jesús.

² Je e na bikon na ixi kaxin sen chrikao ndo Jesús junéma i itja sen, jaña juine sen, méxin kuaxi na juankata a na sen ijje.

³ (Ixi xi fariseo ko kain ni judío kuanéma tja na xranchi kuanche e ni tachrí e na, ni xranchrjen, ixi sa ó banéma na itja na ko tjume e ine na.

⁴ Ko hora kjanxin na ndasin, sa ó xrokonda néma na itja na ko tjume e sine na. Ko kaxon banéma na vaso ko ichi ko cazuela chika ko kuajonta a na cama, jaña kuanche e na ko kaxon ikaxin nge e ixi jaña kuituan an ni tachrí e na xranchrjen.)

⁵ Méxin, xi fariseo ko xi tjako chijnie ndo Dio ja in juanchangi e xa ndo Jesús:

—¿Sonda sen chrjiko a ja a, néma i sen itja sen hora ine sen.

⁶ Ko juatingéxin ndo Jesús ko ndachro ndo:

—Nduaxin ti tsindachro ndo profeta Isaias ixi ja anta ndako a xraxaonnta, ko ja in ndachro xroon tsikjin ndo:

Ni tjajna ji i je o ro a na nichjanaxin na ngajin,
je a nduaxin ixi aséen na xraxaon na.

⁷ Méxin, xro an tjintee juasaya* tajon na ngajin,
ixi je o tjako na nge e tetuan an chujni.

⁸ Ko ja anta tsikintu enta nge e tsiketuan an ndo Dio ko rue énta nge e kuanche e na, méxin né manta ichi, ko vaso ti xinnnta, ko kaxon ikaxin nge e nche enta.

⁹ Ko kaxon ndachro ndo Jesús:

—Ja anta rue énta nge e kuanche e na ko jaña ndá a tintu enta nge e tsiketuan an ndo Dio.

¹⁰ Ndachro chijnie ndo Dio tsikjin ndo Moisés: “Xrochonde enta juasaya ndotánta ko janánta”, ko kaxon tsindachro ndo “Ngisen ndako a nichja ngajin ndotée o janée xrokonda tsen en sen.”

¹¹ Ko ja anta ndachenta chujni ixi chao xrondache na ndotée na ko janée na: “Ndotána, janána, jua i tsingijnananta ixi kain nge e chondana me e kóna corbán”, (me e xrondachro ixi kain tomina ó tjá a ndo Dio).

¹² Ko siá xrondachronta jaña, ja anta ndachronta xrokonda i tsingijnanta ndotánta o janánta.

¹³ Ko jaña titikaon anta nge e tsiketuan an ndo Dio ko ja anta titikaonnta nge e kuanche e na sa ó. Ko kaxon nche enta ikaxin nge e ndako a.

¹⁴ Ko ijngo kuiye e ndo Jesús chujni ste nti a, ko ndachro ndo:

—Tin ennta kainnta ti ntatjunta ko tienxinnta ji i.

¹⁵ Je a ti ineni nchekitja aséenni. Ti tachrxexin aséenni me e nchekitjani.

¹⁶ Ti tjaunnta tsin ennta, tin ennta.

¹⁷ Ko ndo Jesús kuintu e ndo kain na, ko je e ndo ko sen teyuu chrikao ndo kuixin in sen nchia. Ko juanchangi e sen ndo nge e xrondachro ti juinchekuen en ndo na.

¹⁸ Ko ndachro ndo Jesús:

—¿Á kaxon ja anta tienxin anta? ¿Á noa inta ixi ti nge e ineni je a me e nchekitja aséenni?

¹⁹ Ixi ti ineni tji a ngaya aséenni. Me e satsji ngaya tse eni ko tjume e tachrje.

Me e xrondachro ixi ti nge e ineni, nchekitja i aséenni.

²⁰ Ko ndachro ndo Jesús:

—Ko ti nge e tachrxenixin aséen chujni me e nchekitja aséen.

²¹ Kain ji i tachrxenixin aséen chujni: ti ndako a xraxaon na, ti chóna na inaa ngisen je a janchri e na o ndoxi e na, ti tjaun na tsitexin na inaa ngisen, ti naatsónaxón kichuu na,

²² ti tje na, ti tochjuye e na nge e chóna inaa chujni, ti ndako a nchekao kichuu na, ti ncheya na, ti tsango chjinga nche e na, ti tochjio na, ti nchejié aséen na, ko ti ndakua i xraxaon na.

²³ Kain ti ndako a me e tachrxenixin ngaya aséen na, ko me e ti nchekitja aséen chujni.

Naa nchri kuixin ikjin chuntia† nchra ndo Jesús
(Mt. 15:21-28)

²⁴ Ko tjume e ndo Jesús kuachrxexin ndo nti a ko sakjui ndo nunte tjajna Tiro ko tjajna Sidón. Ko kuixin in ndo naa nchia ixi tjaun a ndo xrokono e na ixi nti a jii ndo. Ko jua i kuemá ndo.

* 7:7 juasaya respeto, honor † 7:23 chuntia tener fe

²⁵ Ko tjume e janée naa nchrichajan, chónnda nchrichan espíritue Xixron anxrée kuin en jan ixi nti a jii ndo Jesús, ko tuinxin kuiji jan ko bake exin jan ntatuchi in jan tutée ndo Jesús.

²⁶ Jan me e ikjín kuixín jan, nunte Sirofenicia, ko kuinóatée jan ngajin ndo Jesús ixi xrokuantsje ndo espíritue Xixron anxrée chónnda nchrichajen en jan.

²⁷ Ko ndo Jesús ndachro ndo:

—Sa ó tintu enta ichjan sine xjan. Ndako a jii xrokuantsje eni xjan nutja ko xrochjéeni kunia sine ba.

²⁸ Ko je e jan juatingíexin jan:

—Nduaxin me e, Nchána. Ko kunia jingi ba mesa ine ba nutja titu o ti tintjí ichjan.

²⁹ Ko ndachro ndo Jesús:

—Chao ndachrua. Satjia ixi espíritue Xixron anxrée ó kuachrxexin nchrichajan an.

³⁰ Ko hora kuiji jan ndo a jan, bikon jan ixi nchrichajen en jan ó jian jitsingata a xjan ti jijua xjan ixi ó tsikachrje espíritue Xixron anxrée.

Ndo Jesús juinchexruen en ndo naa xi tien a ko nichja i

³¹ Ko tjume e ndo Jesús kuachrxexin ndo tjajna Tiro ko kuatsinga ndo tjajna Sidón ko kaxin tjajna tikinxin nunte Decápolis ko kuiji ndo ti ndalago Galilea.

³² Ko nti a bikao na naa xi tien a ko jua i nichja xa. Ko kuinóatée na ngajin ndo Jesús ixi tsake e itja ndo ngata a jaa xa me e tsoxrúen en xa.

³³ Ko tjume e ndo Jesús kuachrxendaka o ndo je e xi tien a ti xro an ngisen ste. Ko dedue itja ndo Jesús xrxin in ndo ndatsjon xi tien a. Ko kaxon dedue itja ndo bikitée ndo ndatée ndo ko bake e ndo dedue ngata a nejen xi nichja i.

³⁴ Ko tjume e tsje e ndo nui ngajní ko kuabaa ndo ko nichje e ndo xi tien a, ko ndachro ndo:

—¡Efata! —me e ngigue e sen xrondachro: ¡Xitje e!

³⁵ Ko tuinxin xitje e ndatsjon xi tien a ko kuin en xa ko koxruen en nejen xa, ko jian nichja xa.

³⁶ Ko ndo Jesús kuetuan an ndo ixi xro an ngisen xrobe ki nge e ti kon en. Ko maski jaña kuetuan an ndo, je e na ícha beki na.

³⁷ Ko me e tsango xronka kain na ko ndachro na:

—Tsango jian kain nge e nche e ndo. Ni tien a, tin en na ko ni nichja i, nichja na.

8

Ndo Jesús kuajon ndo juine noó mil chujni
(Mt. 15:32-39)

¹ Ko nchakon me e kueya na konchjiñe e na ngajin ndo Jesús. Ko chónnda i na nge e sine na. Ko ndo Jesús kuiye e ndo sen teyuu chrikao ndo, ko ndachro ndo:

² —Tsango tikonóa a kain ni ste nti i ixi ó ní nchakon ste na ngajin ko chónnda i na nge e sine na.

³ Ko siá tsétuan an na satsji na ndo a na ko xrane a na, ngatja cha o tsjejeña na ixi xrane a na ixi kaxin na tsango ikjín tsikí xín na.

⁴ Ko juatingíexin sen chrikao ndo:

—¿No tsí xín nge e xrojuine kain ni ji i ixi xro an nchia jii nti i?

⁵ Ko juanchangi e ndo Jesús:

—¿Ngijan in nutja chondanta?

Ko je e sen juatingíexin sen:

—Yaato nutja chondana.

⁶ Ko ndo Jesús kuetuen en ndo kain na ixi tsake e na nunte. Ko kua ndo ti yaato nutja ko kuajon ndo juasaya ngajin ndo Dio ko konchrxinjin ndo nio ko chjée ndo sen teyuu chrikao ndo ixi tsonchjeya sen ngajin kain ni ste nti a.

⁷ Ko kaxon kaxin kucheé nchínchín chónnda sen. Ko ndo Jesús kuajon ndo juasaya ko kuetuan an ndo tsonchjeya sen kucheé kaxon.

⁸ Ko kain na juine na ko konkje e na. Ko juejo sen tutu o nge e tsixe e ko juinchekaon sen yaato ntaxra.

⁹ Ko noó mil na juine na. Ko tjume e ndo Jesús ndache ndo na ixi satsji na.

¹⁰ Ko je e ndo ko sen teyuu chrikao ndo kuixin in sen naa ntábarco ko sakjui sen no nunte Dalmanuta.

Xi fariseo tjanchia xa ixi ndo Jesús sinche e ndo naa ixra ijie
(Mt. 16:1-4; Lc. 12:54-56)

11 *Ko kuji kaxin xi fariseo ko kuaxi xa juao xa ndo Jesús ko juanchia xa ixi xrojuakoxin ndo naa ixra ijié* tsj xin ngajni ixi tjaun na tsono e na á nduaxin chao sinche e ndo.

12 *Ko ndo Jesús kuabaa ndo ko ndachro ndo:

—¿Sonda ní ji i tjanchia na sinta a naa nge e ijié? Nduaxin ndachrjan ixi xro an nge e sinta a tsikon na.

13 Ko kuintu e ndo na nti a, ko kuixin in ndo ntábarco ko sakjui ndo tuenxin ndalago.

Nge e nchetja in nutjée xi fariseo

(Mt. 16:5-12)

14 Ko tjáñe e sen tsikikao a sen nge e sine sen. Naakua nutja chóna sen ngaxin in ntábarco.

15 *Ko ndo Jesús kuetuen en ndo sen:

—Jian tsje enta ixi nge e nchetja in nutjée xi fariseo ko nutjée xi Herodes.

16 Ko sen teyuu chrikao ndo ndache kichuu sen:

—Jaña ichro ndo ixi tsikiko ina nutja.

17 Ko je e ndo no e ndo nge e tjao kichuu sen ko ndachro ndo:

—¿Sonda tjao kichuunta ixi chonda inta nutja? ¿Á noa inta ko xratiénxin anta? ¿Á icha asáanta méxin titikaon anta ndo Dio?

18 *¿Á tikonxin a ikonnta?, ko, ¿á tienxin a ndatsjonnta? ¿Á sintaxi añanta?

19 Nchakon konchrinjin na ó nutja juine na ó mil chujni, ¿ngijan in ntaxra ti tutu o nutja xejo?

Ko je e sen juatingéxin sen:

—Teyuu ntaxra.

20 Ko íjngo ndachro ndo Jesús:

—Ko nchakon konchrinjin yaátō nutja juine noó mil chujni, ¿ngijan in ntaxra ti tutu o nutja xejo?

Ko ndachro sen:

—Yaátō ntaxra.

21 Ko ndo Jesús ndachro ndo:

—Méxin, ¿á xratiénxin anta?

Ndo Jesús juinchexruen en ndo naa xi tikon a

22 Ko kuji sen tjajna Betsaida, ko kuji kaxin na bika o na naa xi tikon a. Ko kuinóatée na ngajin ndo Jesús ixi xrojuinchexruen en ndo xa.

23 Ko ndo Jesús itse ndo itja je e xi tikon a ko kuachrendaka o ndo xa ngande e tjajna. Ko bikitée ndo ndatée ndo ikon xi me e ko bake e itja ndo ngata a xa ko juanchangi e ndo xa:

—¿Á ó tikuan nchín?

24 Ko ndachro je e xi tikon a:

—Tikon chujni, ko tikon na xranchi naa ntayua ichrji.

25 Ko ndo Jesús bake e itja ndo íjngo ngata a ikon xa. Ko je e xa tsje e xa ko koxruen en xa ko chao bikon xa kain nge e.

26 Ko ndo Jesús kuetuan an ndo ixi satsji xa ndo a xa, ko ndachro ndo:

—Ikjan ia tjajna íjngo ko xro an ngisen teki é ji in.

Ndo Pedro ndachro ndo ixi ndo Jesús, ndo Cristo

(Mt. 16:13-20; Lc. 9:18-21)

27 Ko tjume e ndo Jesús ko sen teyuu chrikao ndo sakjui sen tjajna nchín tjenka tjajna Cesarea de Filipino. Ko ngatja cha o juanchangi e ndo Jesús sen chrikao ndo ko ndachro ndo:

—¿Nge e ichro na, ngisen jan an?

28 *Ko je e sen ndachro sen:

—Kaxin na ndachro na ixi ja anta ndo Juan Bautista ko ikaxin na ndachro na ixi ja anta ndo profeta Elías ko ikaxin na ndachro na ixi ja anta naa sen profeta kuachronga chijnje ndo Dio ó sa ó.

29 *Ko tjume e ndo Jesús juanchangi e ndo sen:

—Ko ja anta, ¿nge e ndachronta, ngisen jan an?

Ko juatingéxin ndo Pedro ko ndachro ndo:

—Ja anta ndo Cristo tsixrua an ndo Dio.

30 Ko kuetuan an ndo Jesús ixi xro an ngisen tseki e sen ji i.

Ndo Jesús ndachro ndo ixi ó tsen en ndo

(Mt. 16:21-28; Lc. 9:22-27)

³¹ Ko juangíxin ndo Jesús ndache ndo sen ixi je e ndo chjen en ndo Dio, xjan jongí e xranchi chujni, xrokonda tsango tangi tson en ndo ko kain xi tetuan an ni ngo ko kain xitaana tetuan an ko kain ni tjako ley tsoñao e na ndo. Ko ni me e naatsóñaxón na ndo ko nchakon nínxin xroxechón ndo.

³² Kain ji i jian chronga ndo. Ko tjume e ndo Pedro kuantsjendáa ndo ndo Jesús ko kuyakutee ndo ndo.

³³ Ko ngatjia ndo Jesús tsje e ndo kain sen chrikao ndo ko kuyakutee ndo ndo Pedro, ko ndachro ndo:

—¡Satjixian nti i, Xixron anxrée! Ja a xraxaon a xranchi xraxaon ndo Dio. Ja a xraxaon xranchi xraxaon chujni.

³⁴ *Ko ndo Jesús kuiye e ndo sen teyuu chrikao ndo ko sen tsikonchjiñe e ngajin ndo ko ndachro ndo:

—Síá xroxan ngisen tjaun xorrua na, xrokonda xrotjáñe e sen kain nge e ícha tjaun sen ko xorrua na sen kain nchakon, maski tangi tson en sen.

³⁵ *Ni tjaun tsitjáña i, ni me e nduaxin tsen en na; ko ni tsen en ixi titikaonna na jan an ko chijni jian nichja, ni me e tsechón na kain nchakon.

³⁶ ¿Nge e tsjacha naa ngisen xrochóna kain nge e jii ngata a nunte nti i ko ndatsitjáña aséen sen?

³⁷ ¿Ngijan in tsjenga sen na ixi tsechón sen?

³⁸ Ixi sen tsosue e ixi titikaonna sen ko kao chijni nichja, stetikon ni ndako a nche e ko ni chóna ijie, kaxon chjen en ndo Dio, xjan jongí e xranchi chujni, tsosue e xjan ko xrondachro xjan ixi chúxin a xjan sen nchakon tsetuan an xjan ti jii juachaxin ijie chóna Ndotée xjan ko kain sen ángel.

9

¹ Ko kaxon ndachro ndo Jesús:

—Nduaxin rintatjonta ixi kaxin ni ste nti i xratsen a na, tsikonja na tsij juachaxien ndo Dio.

Ndo Jesús kuindoxin ikon ndo

(Mt. 17:1-13; Lc. 9:28-36)

² *Kuatsinga ikjaon nchakon ko tjume e ndo Jesús sabikao ndo ndo Pedro, ndo Jacobo ko ndo Juan kuajin in sen naa ijna nui. Ko nti a bikon sen kuindoxin ikon ndo Jesús.

³ Ko manta ja ndo ikjan tsango tjúa, ko ngata a nunte nti i xro an ngisen xrojuinéma manta jaña ixi tsango tjúa bikoni.

⁴ Ko bikon sen nti a jii ndo Elías ko ndo Moisés stetjao sen ndo Jesús.

⁵ Ko ndo Pedro ndache ndo ndo Jesús:

—Maestro, chao stena nti i. Sintakonchjianna ní tsa on; naa tsa on ja anta ko naa tsa on ndo Moisés ko naa tsa on ndo Elías.

⁶ Jaña ichro ndo ixi kain sen tsango xronka sen, ko ndo Pedro noe a ndo nge e nichja ndo.

⁷ *Ko tuinxin kuij naa itjuj bake e ngata a ti ste sen. Ko ngakjen en itjuj me e kuin en sen naa tée naa ngisen nichja:

—Ji in chjan na tsango tjua a. * Tin ennta nge e xrondachro xjan.

⁸ Ko ikjan tsje e sen ko xro an ngisen bikon sen; je o ndo Jesús jii nti a.

⁹ Ko tjume e xingajinxin sen ijna me e, ko kuetuan an ndo Jesús ixi tsekia a sen ikaxin chujni nge e bikon sen tsijija nchakon xroxechón je e ndo chjen en ndo Dio, xjan jongí e xranchi chujni.

¹⁰ Méxin, je o sen no e sen ji i ko beki a sen nge e bikon sen ko stetjao sen nge e xrondachro ti xroxechón ndo íjngo.

¹¹ *Ko juanchangi e sen ndo Jesús:

—¿Sonda ndachro ni tjako ley ixi sa ó xrokui ndo Elías ko tjume e xrokui ndo Cristo?

¹² Ko ndachro ndo Jesús:

—Nduaxin tsij ndo Elías sa ó ko sinchekonchjian ndo kain nge e. ¿Ko nge e xrondachro xroon jitaxin chijnie ndo Dio?, ixi tsango tangi tson en chjen en ndo Dio, xjan jongí e xranchi chujni, ko tsitikaon a na xjan.

¹³ Ko ntatjunta ixi nduaxin ó kuij ndo Elías, ko tangi juinchekao na ndo xranchi je e na tjaun na, jaña jitaxin xroon chijnie ndo Dio ixi jaña tson en.

Ndo Jesús juinchexruen en ndo naa chajan

(Mt. 17:14-21; Lc. 9:37-43)

¹⁴ Ko hora kjan sen ti kuitu e kaxin sen chrikao ndo Jesús, bikon sen ixí kueya nã ste nã ngandajin sen. Ko kaxon kaxin ni tjako ley stetjao nã sen.

¹⁵ Ko tuinxin hora bikon nã ndo Jesús kain nã xronka nã, ko binga nã ikjui nã ti jii ndo, ko kuajon nã juajna.

¹⁶ Ko ndo Jesús juanchangi e ndo nã ko ndachro ndo:

—¿Nge e stetjaunnta sen chrijiki an?

¹⁷ Ko naa xi jingakjen en ni ste nti a juatingíexin xa:

—Maestro, nti i bikian chjan na chónda xjan espíritue Xixron anxrée tintue a xjan nichja xjan.

¹⁸ Ko ti no jii xjan, espíritue Xixron anxrée itsé xjan ko tjanka xjan nunte, ko tuchrjo tí xín ro a xjan ko ndachro neno xjan ko tsango toncha xjan. Ko jan an kuinóatána ngajin sen chrijiku unta xrokuantsje sen espíritue Xixron anxrée ko jua i juinche e sen.

¹⁹ Ko ndo Jesús juatingíexin ndo:

—Ja anta titikaon anta jian ndo Dio. ¿Ti ngisa xrokonda tsake e ngajinnta? ¿Ngisa chao tsaxinta sinche enta ixra? Tikuunantana chán nti i.

²⁰ Ko bika o sen chán. Ko hora bikon espíritue Xixron anxrée ndo Jesús kuaxi kontsjenga espíritu chán, ko juanka espíritu chán ngata a inche ko jamangitaon chán ko kuachrje tuchrjo ro a chán.

²¹ Ko ndo Jesús juanchangi e ndo ndotée chán:

—¿Á ó sée jaña ton en chán?

Ko ndachro ndotée chán:

—Xranchio chán bakon en chán jaña.

²² Ko nanaó espíritue Xixron anxrée tjanka chán ti jii xro i ko tjanka chán ti jii inda ixí tjaun espíritu naatsóñaxónna chán. Ko ixudio tikonóa nananta ko tingijnananta.

²³ Ko ndachro ndo Jesús:

—¿Á chao titikaonnta ndo Dio? Siá titikaonnta ndo Dio, chao tson en kain nge e.

²⁴ Ko tuinxin séen nichja ndotée chán, ko ndachro:

—Jan an titika on. Tingijnana ixí jaña ícha tsitika on.

²⁵ Ko tjume e bikon ndo Jesús ixí kueya nã konchjiñe e nã. Ko kuyakutee ndo espíritue Xixron anxrée chónda chán me e, ko ndachro ndo:

—Ja a espíritue ti tintue a nichja nã ko ti tintue a tin en nã. Jai jan an ntatjua tachrjexian chajan ji i ko tintu é chán ko íkjan ia.

²⁶ Ko je e espíritue Xixron anxrée kuyako ko kontsjenga espíritu chán íjngo, ko kuachrje espíritu. Ko je e chán ndako naa ni tsiken en kuitu e chán, ko kueya nã ndachro nã ixí ó kuen en chán.

²⁷ Ko ndo Jesús itsé ndo itja chán ko juinchengatjen ndo chán.

²⁸ Ko ndo Jesús ko sen teyuu chrikao ndo kuixin in sen naa nchia ko je e sen juanchangi e sen ndo:

—¿Sonda jua i kuantsjena espíritue Xixron anxrée?

²⁹ Ko ndachro ndo Jesús:

—Espíritu je o tachrjexin ixí xronichje enta Ndotána ko sinchekatse ñaonta jinta.

Íjngo ndachro ndo Jesús ixí tsen en ndo

(Mt. 17:22-23; Lc. 9:43-45)

³⁰ Hora sajuixin sen nti a, kuatsinga sen no nunte Galilea. Ko ndo Jesús tjaun ndo ixí xro an ngisen tsono e ste sen nti a

³¹ ixí tjaun ndo sinchekuen en ndo sen chrikao ndo. Ko ndache ndo sen:

—Jan an chjen en ndo Dio, xjan jongí e xranchi chujni, xrotséna nã ko tsikaanna nã ngajin ni tituan an ko naatsóñaxónna nã. Ko nchakon nínxin xroxechónna.

³² Ko je e sen kuienxin a sen nge e ti ndachro ndo ko noe a sen á chao xrojuanchangí e sen ndo nge e xrondachro ji i.

¿Ngisen ícha tjintee?

(Mt. 18:1-5; Lc. 9:46-48)

³³ Ko tjume e kuiji sen tjajna Capernaum; ko hora ste sen nchia nti a, ndo Jesús juanchangi e ndo sen:

—¿Nge e stetjao kichuunta ti steyána cha o?

³⁴ *Ko je e sen tenko sen ixí ngatja cha o stetjao sen ixí ngisen ícha tjintee.

³⁵ *Ko tjume e ndo Jesús bake e ndo nunte ko kuyie e ndo ti teyuu sen chrikao ndo, ko ndache ndo sen:

—Siá xrojan ja anta tjaunnta ícha tjinteenta, xrokonda sinchenchiin asáanta ko tsingijnanta kain chujni.

³⁶ Ko tjume e kuiye e ndo naa chjan ko bake e ndo xjan ngusine ti ste sen, ko ndachro ndo:

³⁷ *—Ngisen tjue e naa ichjan xranchi xjan ji i xixi titikaonna sen, sen me e kaxon tjue e sen najan an, ko sen tjue e najan an, tjue e sen ngisen xruan anna jui i.

Ni je a ningakoína, ni me e tingijnana na

(Lc. 9:49-50; Mt. 10:42)

³⁸ Ko ndo Juan ndachro ndo:

—Maestro, bikona naa ngisen tantsje espíritue Xixron anxrée xixi juachaxiannta. Ko ntatjanna sen me e í sinche a sen jaña xixi je e sen chrjikui ana sen.

³⁹ Ko ndo Jesús ndachro ndo:

—Tingakuen anta sen me e xixi xro an ngisen, sen nche e naa ixra jian xixi juachaxinna, sen me e jua i ndako a xronichja sen xixi jan an.

⁴⁰ *Sen ningakoína ina, sen me e chao tsingijnana.

⁴¹ *Ko ngisen xrotjáanta naa vaso inda xixi nduaxin titikaonntana, nduaxin ndachrjan xixi tsayé e sen nge e jian.

Jian tsje enta xixi sinche anta ti ndako a

(Mt. 18:6-9; Lc. 17:1-2)

⁴² *Ko ngisen sinchekateya naa ichjan titikaonna jan an sinche e xjan ti ndako a, ni me e cháña xrokuintexin na tusin na naa xrochri ijíe ko xrokuitsingangi na ndachaon.

⁴³ *Ko siá tjáanta sinchexinnta ti ndako a, cháña xrokonchrijinnta tjáanta xixi cháña naakua tjáanta xrokuixin innta ti tsechónni kain nchakon xixi xrochondanta yui tjáanta ko saxrokjuinta ti jii xro i nai a tsanga,

⁴⁴ ti jii kutsindo ten a ko ti jiche xro i tsanga i.

⁴⁵ Ko kaxon tutáanta xrojuinchexinnta ti ndako a, xrokonchrijinnta tutáanta xixi cháña naakua tutáanta xrokuixixinnta ti tsechónni kain nchakon xixi siá xrochondanta yui tutáanta ko saxrokjuinta ti jii xro i nai a tsanga,

⁴⁶ ti jii kutsindo ten a ko ti jiche xro i tsanga i.

⁴⁷ *Ko siá ikonnta sinchexinnta ti ndako a, cháña xrokuantsjengínta ikonnta xixi naakua ikonnta xrochondanta ko jaña xrokuixin innta ti tetuan an ndo Dio ti tsechónni kain nchakon xixi yui ikonnta saxrokjuinta ti jiche xro i nai a tsanga,†

⁴⁸ ti jii kutsindo ten a ko ti jiche xro i tanga i.

⁴⁹ *Ko kain chujni xrokonda tangi tson en sen xixi me e tsingijna sen, xranchi xíjnta tingijna tsojníxin nge e sineni.

⁵⁰ *Xíjnta jian xíjnta. Ko siá xíjnta ijní a xíjnta, jua i tsonda xíjnta. Ja anta xranchi xíjnta tinteenta, méxin juaxuxin tsariku unta kain chujni.

10

Ndo Jesús ndachro tsintue a na janchri e na

(Mt. 19:1-12; Lc. 16:18)

¹ Tjume e ndo Jesús kuachrjexin ndo tjajna Capernaum, sakjui ndo nunte Judea nangoxin ndajitinga Jordán. Ko kueya na xra o na ti jii ndo ko je e ndo juinchekuen en ndo na xixi me e kuanche e ndo.

² Ko kaxin xi fariseo konchjiñe e xa ngajin ndo ko juanchangi e xa ndo xixi tjaun xa ndako a xrojuatingíexin ndo. Ko juanchangi xa á chao tsintu eni janchri eni.

³ Ko ndo Jesús juatingíexin ndo, ko ndachro ndo:

—¿Nge e kuetuan an ndo Moisés?

⁴ *Ko ndachro xa:

—Ndo Moisés kuajon ndo juachaxin xixi tsoña naa xroon tsayé e nchri xixi chao tsintu e xa nchra.

⁵ Ko ndo Jesús ndachro ndo:

—Jaña kuetuan an ndo Moisés xixi ja anta ícha asáanta ko titikaon anta.

⁶ Ko ti xraxrangíxixión juinchéña ndo Dio kain nge e, juinchéña ndo naa xixi ko naa nchri xixi xi tsintu e xa ndotée xa ko janée xa ko tsekao xa janchri e xa.

⁸ Ko tjume e yui sen tsoña sen xranchi naakua naa chujni. Méxin, í je a yuu sen, ó naakua sen jai.

⁹ Ko jaña siá juachaxien ndo Dio ikjan sen naakua chujni, méxin inaa chujni jua i xrondachro xixi xrochjeya sen.

9:37 Mt. 10:40; Lc. 10:16; Jn. 13:20.

9:40 Mt. 12:30; Lc. 11:23.

9:41 Mt. 10:42.

9:43 Mt. 5:30.

9:47 Mt. 5:29.

† 9:47 xro i nai a tsanga infierno

9:50 Mt. 5:13; Lc. 14:34, 35.

10:4 Mt. 5:31.

¹⁰ Ko hora ste sen nchia, sen teyuu chrikao ndo íjngo juanchangi e sen ndo nge e xrondachro ji i.

¹¹ *Ko ndo Jesús ndachro ndo:

—Siá naa xi tsintu e xa janchri e xa ko xrochóna xa inaa nchri, xi me e ndako a jinche e xa xixi ó tsikute e xa nchrinchri e xa.

¹² Ko kaxon siá naa nchri tsintu e nchra ndoxi e nchra ko xrochóna nchra inaa xi, kaxon je e nchra índako a jinche e nchra.

Ndo Jesús bake e ndo itja ndo ngata a kaxin ichjan
(Mt. 19:13-15; Lc. 18:15-17)

¹³ Kaxin na bika o na ichjan nchínchín xixi tsake e ndo Jesús itja ndo ngata a jaa xjan. Ko sen chrikao ndo Jesús kuyakutee sen ni bika o ichjan me e.

¹⁴ Ko bikon ndo Jesús jaña stenche e sen, méxin, koña ndo ko ndachro ndo:

—Tintu enta ichjan tsii xjan ngajin ko tingakuen anta xjan, xixi ti no tetuan an ndo Dio tsikinixin en sen nche e xranchi ichjan.

¹⁵ *Ko xrontatjunta xixi ngisen xrokjan i xranchi naa ichjan nchín jua i tixin in sen ti tetuan an ndo Dio.

¹⁶ Ko tjume e joa ndo kain ichjan ko bake e itja ndo ngata a jaa xjan ko juinchenchaon ndo xjan.

Naa xi chóna kueya ti tjintee nichja xa ngajin ndo Jesús
(Mt. 19:16-30; Lc. 18:18-30)

¹⁷ Ko hora sakjui ndo Jesús, jitinga naa xi kuji xa ko bake exin xa ntatuchi in xa ngajin ndo Jesús, ko juanchangi xa:

—Maestro jian ja a, ¿nge e sinta a jan an xixi tsarichóna kain nchakon?

¹⁸ Ko tjume e ndo Jesús ndachro ndo:

—¿Sonda ndachrua xixi jianna jan an? Naakua ngisen jian, je o ndo Dio jian ndo.

¹⁹ Ja a ó no a kain ti kuetuan an ndo Dio: “Ncheye a nchrinchri a, tónai a chujni, tema ia, tjangie a chujni siá jinche e ti jian, ncheye a na ko tájuan juasiaa ngajin ndotaa ko janáa.”

²⁰ Ko je e xi me e ndachro xa:

—Maestro, kain ji i ó juinta a xranchiona.

²¹ Ko ndo Jesús tsje e ndo xa ko tsango tjue e ndo xa. Ko ndachro ndo:

—Xra titjaña naakua nge e sinche e. Satjia ko nchekjia kain nge e chonda ko tonchjeye e ni nóa tomi me e. Jaña xrochonda nge e icha tjintee ngajni. Ko tjume e tsji ia ko rua nana.

²² Ko kuin en xa jaña ko tsango kuechín xa ko sakjui xa, xixi tsango kueya nge e kuachóna xa.

²³ Ko ndo Jesús tsje e ndo ni ste nti a, ko ndache ndo sen teyuu chrikao ndo:

—Tsango tangi tixin in ni chóna itsjé nge e ti tetuan an ndo Dio.

²⁴ Ko xronka sen chrikao ndo Jesús xixi jaña ndachro ndo. Ko ndachro ndo íjngo:

—Ni chuntia ti nge e chóna, tsango tangi tixin in na ti tetuan an ndo Dio.

²⁵ Ícha tangi a xixi tsatsingatuxin naa ko camello ikon ntachika xixi naa ni chóna kueya nge e xrokuixin in na ti tetuan an ndo Dio.

²⁶ Ko je e sen kuin en sen jaña ko tsango xronka sen. Ko juanchangi e kichuu sen:

—¿Ngisen chao tixin in ti tetuan an ndo Dio?

²⁷ Ko ndo Jesús tsje e ndo sen, ko ndachro ndo:

—Ti nge e jua i sinche e chujni, ndo Dio chao sinche e ndo kain nge e.

²⁸ Ko ndo Pedro ndachro ndo:

—Kainna kuintu ana kain nge e chondana xixi rua ananta.

²⁹ Ko ndo Jesús ndachro ndo:

—Nduaxin ntatjunta xixi xrojan ngisen tintu e ndo a o xi kichuu, o nchri kichuu, o ndotée, o janée, o janchri e, o chjen en, o nunte e, xixi kuitikaonna sen jan an ko titikaon sen chijni ndachrjan,

³⁰ sen me e icha itsjé nge e tsayé e sen nti i ko xrochóna sen inaa ciento icha itsjé nge e. Kueya nchia xrochóna sen ko tsikon sen itsjé chujni xranchi ni kichuu sen ko xranchi janée sen ko xranchi chjen en sen ko tsayé e sen itsjé nunte. Ko maski tangi tson en sen ngata a nche nti i, tjume e ngajni tsechón sen kain nchakon.

³¹ *Ko kueya ni tituan an jai, nchakon tsjexin kain nge e ítsituan i na. Ko itsjé ni tjinte a jai, nchakon me e icha tsetuan an na.

Ninxin chronga ndo Jesús xixi tsen en ndo
(Mt. 20:17-19; Lc. 18:31-34)

³² Tjume e yaa sen cha o satji sen tjajna Jerusalén ko ndo Jesús kuitaon ndo nti a. Ko sen chrikao ndo stexronka sen sterué e sen. Ko ndo Jesús kuiye e ndo je o sen teyuu, ko kuaxi ndo ndache ndo sen xranchi tson en ndo.

³³ Ko ja in ndachro ndo:

—Jai satsjina tjajna Jerusalén. Ko tjume e jan an, chjen en ndo Dio, xjan jongí e xranchi chujni, xrotséna nã tsikaanna nã ngajin xitaana tetuan an ko xi tjako ley. Ko ni tetuan an tsajon nã juachaxin ixi tsikaon nã. Tjume e tsikaanna nã ngajin ni je a judío

³⁴ ko je e nã tsjanoana nã, tsande ena itja nã ikon, tsikitéena nã ndatée nã ko naat-sóñaxónna nã. Ko nchakon nínxin xroxechónna ñjngo.

Ndo Jacobo ko ndo Juan tjanchia sen naa nge e
(Mt. 20:20-28)

³⁵ Ko tjume e ndo Jacobo ko ndo Juan, chjen en ndo Zebedeo, konchjiñe e sen ngajin ndo Jesús ko ndachro sen:

—Maestro, tjancha ananta naa nge e.

³⁶ Ko juanchangi ndo Jesús:

—¿Nge e tjaunnta?

³⁷ Ko ndachro sen:

—Nchakon tsake enta ti tetuan an, tájonnta juachaxin ixi naa jan anna tsake ena ndat-sjonxin jian ti tsake enta ja anta ko inaa jan anna tsake ena ndatsjonxin ikjon.

³⁸ *Ko tjume e ndo Jesús ndache ndo sen:

—Ja anta noa inta nge e tjanchianta. ¿Á chao tsikixin annta ti tangi tsónna jan an?

³⁹ Ko je e sen juatingíexin sen:

—Jaán chao tsikixinnãna.

Ko ndo Jesús ndache ndo sen:

—Nduaxin tangi tson an ja anta xranchi tangi sinchena nã jan an.

⁴⁰ Ko jan an jua i xrontatjunta ixi naa ja anta tsake enta ti ndatsjonxin jian ko inaanta tsake enta ti ndatsjonxin ikjon ti tsake e jan an ixi ó sa ó jitaxin ngisen tsake e nti a.

⁴¹ Ko ikaxin sen ite,* sen chrikao ndo Jesús, kuin en sen ixi jaña tjanchia ndo Jacobo ko ndo Juan ko kuaxi sen koñaõ sen ngajin sen yuu.

⁴² *Ko tjume e kuiye e ndo Jesús kain sen ko ndache ndo sen:

—Ó no anta ixi ni tetuan an xasintajni† tsango tetuen en nã kain chujni ko kain ni tsango tetuan an, ni me e tsango nchejié aséen nã ko chjinga nchekao nã chujni.

⁴³ *Ko ja anta sinche anta jaña. Na i. Siá xrojantta tjaunnta tsituan annta xrokonda tsingijnanta ni kichuunta.

⁴⁴ Ko xrojantta tjaunnta ícha xrochondanta juachaxin, me e xrokonda tsitikaonnta nge e tsituan annta ikaxin chujni.

⁴⁵ Ixi chjen en ndo Dio, xjan jongí e xranchi chujni, kui a xjan ixi chujni sinche e xra ngajin xjan. Na i. Je e xjan kuij xjan ixi sinche e xjan ixra ngajin chujni ko tsen en xjan ixi kain chujni tsechón sen.

Ndo Jesús juinchexruen en ndo xi Bartimeo
(Mt. 20:29-34; Lc. 18:35-43)

⁴⁶ *Ko tjume e kuiji sen tjajna Jericó. Ko ndo Jesús ko sen chrikao ndo ko kueya nã kuachrxjexin nã tjajna nti a. Ko nti a jii naa xi jua i tikon ndatin in xa Bartimeo ko ndotée xa ndatin in Timeo. Take e xa ngande e cha o ko tjanchiaka a xa.

⁴⁷ Ko je e xa kuin en xa ixi ó jitonchjiñe e ndo Jesús tjajna Nazaret, ko kuaxi xa kuyako xa ko ndachro xa:

—Jesús, ndo kuachrjenixin ndo David, tikonóa nanta.

⁴⁸ Ko kueya nã kuyakutee nã xa ko ndache nã xa xrotenko xa. Ko je e xa ícha séen kuyako xa ko ndachro xa:

—Ja anta, ndo kuachrjenixinnta ndo David, tikonóa nanta.

⁴⁹ Ko chón en ndo Jesús ko kuetuen en ndo nã:

—Tiye enta xi me e.

Ko tjume e kuiye e nã je e xi tikon a ko ndache nã xa:

—Xrakon a, tingatjen ixi jitiya a ndo Jesús.

⁵⁰ Ko nango kuintu e xa ti jitsáa xa ko chrinka xa bingatjen xa ko konchjiñe e xa ti jii ndo Jesús.

⁵¹ Ko ndo Jesús juanchangi e ndo xa:

—¿Nge e tjauan sinta a ixi ja a?

Ko xi tikon a ndachro xa:

—Maestro, tja on tsikon.

⁵² Ko ndo Jesús ndache ndo xa:

—Jai chao satjia. Ó koxruan an ixi chuntiana.

Ko je e xi tikon a tuinxin chao bikon xa ko rué e xa ndo Jesús.

11

Ndo Jesús kuixin in ndo tjajna Jerusalén

(Mt. 21:1-11; Lc. 19:28-40; Jn. 12:12-19)

¹ Hora jitonchjiñe e sen tjajna Jerusalén, tjenka tjajna Betfagé ko tjajna Betania tjenka iijná ndatin in olivo, ndo Jesús kuetuen en ndo yuu sen chrikao ndo,

² ko ndachro ndo:

—Itjinta tjajna jii yá a ko hora tsjasonta nti a tsinchínta naa kuntajno jichroá ba ko me e xra xro an ngisen teta a ba. Toxindange enta ba ko tsikuunta ba.

³ Ko siá xroxan ngisen tsjanchange anta sonda tonxindange enta ba, ndachenta sen: “Nchéeni xrokonde e ndo ba ko tjume e tsonkjanna ba.”

⁴ Ko je e sen ikjui sen ko kuitja sen kuntajno jichroá ba tjenka nchia ko konxindange e sen ba.

⁵ Ko kaxin ni ste nti a juanchangi na:

—¿Sonda tonxindange enta kuntajno ña?

⁶ Ko je e sen juatingíexin sen xranchi ndachro ndo Jesús. Ko je e na kuajon na juachaxin tsikao sen ba.

⁷ Ko tjume e sabikao sen kuntajno me e ti jii ndo Jesús ko kuake e sen manta ngata a ba manta stetsáa sen ko ndo Jesús kueta a ndo ba.

⁸ Ko kaxon itsjé na kuantsje na manta stetsáa na ko bingó na manta ngaya cha o ti tsatsinga ndo Jesús. Ko ikaxin na konchrinjin na chaan ntayua ko bingó na ngaya cha o.

⁹ Ko ni jítitaaon cha o ko ni sterué e kuaxi na kuyako na ixi tsango ché e na ko ndachro na:

—Juasaya tayé e ndo Dio. ¡Tsango jian ngisen jítij ixi juachaxien ndo Dio!

¹⁰ Tsango jian ngisen jítij juachaxien ndo Dio ixi je e ndo jitika o ndo juachaxin baki-tuan an ndo xrachrejina David. Juasie ndo Dio jii ngajni.

¹¹ Ko ndo Jesús kuuji ndo tjajna Jerusalén ko kuixin in ndo ni ngo ícha tetuan an ko tsje e ndo ngxixin ngaxin in nti a. Ko ó kóndo ko ndo Jesús ko sen teyuu chrikao ndo sakjui sen tjajna Betania.

Ndo Jesús koñao e ndo ntaq higo ixi tajon a ntaq itu

(Mt. 21:18-19)

¹² Tjume e ndúyaxin kjanxin sen tjajna Betania ko ndo Jesús kuen en ndo jinta.

¹³ Ko bikon ndo ikjin jii naa ntaq higo chónda kayua ko kuitsje e ndo á chónda ntaq itu. Ko bikon ndo ixi xro an tu chónda ntaq, je o ika ixi je a nchakuen itu.

¹⁴ Ko ndo Jesús nichje e ndo ntaq me e:

—Í xro an ngisen sine itu tsajuan.

Ko sen teyuu chrikao ndo kuin en sen jaña ndachro ndo.

Ndo Jesús juinchetjúa ndo ni ngo

(Mt. 21:12-17; Lc. 19:45-48; Jn. 2:13-22)

¹⁵ Ko kuuji sen tjajna Jerusalén ko ndo Jesús kuixin in ndo ni ngo ko juangíxin ndo kuantsje ndo kain ni stenčekji ko kain ni stete na. Ko juanka ndo mesa tjasingixixin na tomi ko ntaxitauen ni stenčekji kuntúá,

¹⁶ ko kuintue a ndo ni ste nti a tsatsingaka o na nge e ngaxin in ni ngo.

¹⁷ Ko juinčekuen en ndo na, ko ja in ndachro ndo:

—Jitaxin xroon chíjnie ndo Dio: “Nia ji i ndatin in nchia xronichjaxin chujni kain tjajna ngajin jan an”, ko ja anta juinčekjannta nchia itjaq ne e xiche e.

¹⁸ Ko xitaana tetuan an ko ni tjako ley kuin en na ji i, ko kuaxi xraxaon na xranchi naatsónaxón na ndo Jesús, ko xrakon na ixi itsjé chujni juinche e na juaxruxin ixi nge e juinčekuen en ndo na.

¹⁹ Ko ó kóndo kuachrjexin ndo nti a ko sakjui ndo.

Tsixema ntaq tajon tu higo

(Mt. 21:20-22)

²⁰ Ko kuatsinga sen ti jii ntaq tajon tu higo ko bikon sen ixi ó tsixema ntaq ixi nue e ntaq.

²¹ Ko ndo Pedro sintaxiñao ndo ti ndache ndo Jesús ntaq higo ko ndachro ndo:

—Maestro, tsje enta ntaq tu higo koyakutéenta najna ko jai ó tsixema ntaq.

²² Ko ndo Jesús juatingíexin ndo:

—Chuntianta ndo Dio.

²³ *Nduaxin ntajtunta ixi siá xrojan ja anta xrondachenta ijna ji i: “Satjixian nti i ko tisinga ngia ndachaon”, ko ixi nchijí asáanta xrochuntianta ngajin ndo Dio ko tson en ti tjanchianta.

²⁴ Méxin, jaña ntajtunta ixi kain nge e tsjanche enta ndo Dio, siá nduaxin xrochuntianta ixi tsaye enta me e, jaña tson en ko nduaxin tsaye enta.

²⁵ *Ko hora nichje enta ndo Dio ko xroxraonnta ixi ningakon ennta xrojan ngisen, cháña jian xrotjáña anta nge e junta anta na ixi jaña ndotánta jii ngajni kaxon xrotjáñe e ndo ijie chondanta.

²⁶ Ko siá xrotjáña inta ijie chónnda na, ndotánta jii ngajni kaxon xrotjáñe a ndo ti ijie chondanta.

*Tjanchangí e na ndo Jesús nge e juachaxin chónnda ndo
(Mt. 21:23-27; Lc. 20:1-8)*

²⁷ Ko tjume e lkjan sen tjajna Jerusalén lingo. Ko ndo Jesús kuaji ndo ngaxin in ni ngo, ko konchijie e xitaana tetuan an ko xi tjako ley ko xi tetuan an ni ngo,

²⁸ ko je e xa juanchangi e xa ndo Jesús:

—¿Nge e juachaxin chonda ixi nche e ji i? ¿Ngisen tjáa juachaxin ixi jaña nche e?

²⁹ Ko ndo Jesús juatingíexin ndo ko ndachro ndo:

—Kaxon jan an tsjanchangi anta naa nge e, siá tsjatingíexinnta nge e, xrontatjunta nge e juachaxin chónnda jan an.

³⁰ ¿Ngisen xruan an ndo Juan ixi tsikitée ndo chujni? ¿Á ndo Dio?, o, ¿á chujni? Tjate enta.

³¹ Ko je o xa juao kichuu xa:

—Siá xrondachrona ixi ndo Dio tsixrúa an xi Juan, tjume e tsjanchangi xi ji i sonda kuitikaon ana xi Juan.

³² ¿Ko siá xrondachrona ixi chujni tsixrúa an xi Juan, já tsoñaon na?

Ko xrakon en xa ni tjajna ixi kain na kuitikaon na ixi ndo Juan nduaxin kuanichja ndo chijnie ndo Dio.

³³ Ko tjume e ndache xa ndo Jesús:

—Nóna ina.

Ko ndachro ndo Jesús:

—Ko kaxon jan an xrondachrjan i ngisen chjána juachaxin ixi nta a ixra ji i.

12

*Ndo Jesús juako ndo xranchi kaxin xi nche a xa ixra jian
(Mt. 21:33-46; Lc. 20:9-19)*

¹ Tjume e ndo Jesús ijngo beki ndo naa chijni, ko ndachro ndo:

—Bake e naa xi, kuenga xa jngi e xa ntaa tu uva ko juinchéñe e xa naa korra ko inge xa naa tuye no tsoñaxin xran vino. Kaxon juinchéña xa naa tjatu o nui, nti a tsajin in na tsendáa na jngi e xa.

“Tjume e kuajon xa ijngi ngajin ikaxin na ixi sinche e na ixra ko sakjui xa ikjin.

² Ko kuij nchakon tsaxi tsandáa na itu, ko je e xa xruan an xa naa sen nche e xrée xa itsji sen tsjanchia sen itu tikinixin en xa.

³ Ko ni juinche e ixra ijngi itsé na sen tsixrúa an xi jngi e, ko juaya na ngajin sen, ko xro an itu chjée na sen ko bengi na sen.

⁴ Ko tjume e xi nunte e xruan an xa inaa sen nche e xrée xa ngajin na. Ko kuij sen nti a ko ni chónnda ijngi kuaxi na sen ixro ko juincheni e na jaa sen ko kuyakutee na sen.

⁵ Ko tjume e xi nunte e xruan an xa inaa ngisen kuitsje e nti a. Ko sen me e kuij sen nti a ko naakóñaxón na sen me e. Ko lingo xruan an xa ikaxin sen nche e xrée xa, kuitsje e sen, ko juaya na ngajin kaxin sen ko ikaxin sen naakóñaxón na sen.

⁶ ‘Ko xi nunte e chónnda xa naakua chjen en xa, tsango tjue e xa xjan. Ko xruan an xa chjen en xa ikjui xjan kuitsje e xjan nunte ixi xraxaon xa: “Chjan na, jaán icha tsitikaon na xjan.”

⁷ Ko ni chónnda ijngi juao kichuu na: “Xjan ji i tsitu e xjan kain nge e. Naatsóñaxónna xjan, ko jaina tsituina kain nge e.”

⁸ Ko jaña itsé na xjan, naakóñaxón na xjan ko kuantsjexin na xjan ngataon ijngi.

⁹ Ko juanchangi ndo Jesús ko ndachro ndo:

—¿Nge e sinche e xi nunte e? Tsii xa ko naatsóñaxón xa ni chónnda nunte e xa, tjume e tsajon xa jngi e xa ngajin inaa ngisen sinche e ixra.

¹⁰ ¿Á juincheckuanxin anta ti jitaxin xroon chijnie ndo Dio? Ndachro:

Ixro jueña o a ni juinchekonchjian tjatu o, jai xro me e ikjan xro, ixro icha tetuan an.

¹¹ Jaña juinche e Ncháina ndo Dio, ko ji i tsango chaxro tikonni.

¹² Ko ni tituan an tjaun na xrotsé na ndo Jesús ixí kuienxin na ixí kain ti ndachro ndo nichja ndo ixí je e na me e. Ko xro an nge e juinche e na ixí xrakon en na ni tjajna ko kuintu e na ndo ko sakjui na.

*Á chao xroxenge e na ni tituan an
(Mt. 22:15-22; Lc. 20:20-26)*

¹³ Tjume e xruan an na ikaxin ni fariseo ko ni nche e xrée xi Herodes ixí tsjanchangi e na ndo Jesús kaxin nge e ixí tjaun na ndako a tsjatingíexin ndo ko jaña tsjankata a na ndo ijie.

¹⁴ Ko kuiji na ti jii ndo ko ndachro na:

—Maestro, nónana ixí ja a nichja ti nduaxin ko ta ia juachjaon ixí nge e xroxraxaon chujni ixí nduaxin nchekuen én na chijnie ndo Dio. Méxin, ndachijiana, ¿á chao tsjengana na ngajin xi tetuan an, tomi tjanchia xa, o na i?

¹⁵ Ko ndo Jesús no e ndo jian nge e stexraxaon xa, ko ndachro ndo:

—¿Sonda tjaunnta ndakua i tsjatengiixin? Tikuunta naa tomi xrotsja a.

¹⁶ Ko je e na chjé na ndo naa tomi ixí xrotsje e ndo. Ko juanchangi ndo:

—¿Ngisen ikon jiníto tomi ji i ko ngisen jitaxin tomi?

Ko je e na juatingíexin na:

—Xi tetuan an, xi César.

¹⁷ Ko juate e ndo Jesús ko ndachro ndo:

—Chje énta xi tetuan an nge e tikinixin en xa; ko chje énta ndo Dio nge e tikinixin en ndo. Ko xrakon xa ixí jaña juate e ndo Jesús.

*Juanchangi na á nduaxin xroxechón chujni tsiken en
(Mt. 22:23-33; Lc. 20:27-40)*

¹⁸ *Ko tjume e xi saduceo kuitsje e xa ndo Jesús ixí je e xa xraxaon xa nduaxin a xroxechón ni tsiken en ko ja in juanchangi e xa ndo Jesús:

¹⁹ —Maestro, ndo Moisés tsikjin ndo xroon ó sa ó ndachro siá tsen en naa xi ko kuintu e janchri e xa, ko xro an ichjan kuachóndaka o xa janchri e xa, xi kichuu xi kuen en xrokonda tsute e xa nchri ka an, ko ichjan xrochóndaka o xa nchrikan an xrokjan xranchi chjen en xi kuen en.

²⁰ Ko bake e yaato xi kichuu xa. Ko xi sa ó kute e xa janchri e xa. Tjume e kuen en xa, ko xro an ichjan kuachónda xa.

²¹ Ko tjume e xi yuxin kute e xa nchri ka an, ko kaxon kuen en xa. Ko xro an ichjan kuichónda xa. Ko tjume e xi nínxin kute e xa nchri ka an ko jaña xraje o kon en.

²² Ko jaña kon en ngajin kain xi yaato. Kain xa ndakuen en xa ko xro an ichjan kuintu e xa. Ko kaxon je e nchra ndakuen en nchra.

²³ Méxin, nchakon xroxechón kain chujni tsiken en, ¿ngisen kuanduá ndoxi e nchra ixí kain yaato xi kute e nchra?

²⁴ Ko juate e ndo Jesús:

—Ndako a xraxaonnta ixí tienxin anta nge e ndachro xroon chijnie ndo Dio ko chuxin anta juachaxien ndo.

²⁵ Nchakon xroxechón chujni tsiken en, sen me e tsute a sen ko tsajon a sen chjen en sen ixí tsute e xjan ixí chujni tsiken en xranchi sen ángel tsintee sen ngajni.*

²⁶ Ko ti xroxechón chujni tsiken en, ¿á tsje anta nge e ichro xroon tsikjin ndo Moisés ti chronga xranchi nichjaxin ndo Dio ti ntaá yua yaa xro i? Ko ja in kuin en ndo Moisés: “Jan an ndo Dio titikaon ndo Abraham ko ndo Isaac ko ndo Jacob.”

²⁷ Méxin, ndo Dio je a naa ndo Dioe ni tsiken en. Na i. Ndo Dio me e ndo Dioe sen jichón. Ko ja anta tienxin anta ko ndako a xraxaonnta.

*Nge e icha tjintee kuetuan an ndo Dio
(Mt. 22:34-40)*

²⁸ Tjume e kuij naa xi tjako ley ko kuin en xa xranchi stetjao na ndo Jesús ko kuin en xa jian juate e ndo. Ko juanchangi xa ko ndachro xa:

—¿Nge e ti icha tjintee sikítuan an ndo Dio?

²⁹ Ko ndo Jesús juatingíexin ndo:

—Ti icha tjintee sikítuan an ndo Dio ja in ndachro: “Tinnta kainnta ni Israel ixí Ncháina† ndo Dio naáko ndo jii ko ko a inaa ngisen.

³⁰ Ko ixi nchijí asáanta ko ti xraxaonnta xrotjuexinnta ndo Dio.” Me e ti ícha tjintee tsiketuan an ndo Dio.

³¹ Ko ti chijni yuxin tsiketuan an ndo Dio ja in ndachro: “Xrotjue enta kichuunta xranchi tjue enta asáanta.” Ko a inaa nge e ícha tjintee ti tsiketuan an ndo Dio.

³² Tjume e juate e xi tjako ley, ko ndachro xa:

—Ndako ndachrua, Maestro, nduaxin naakua ndo Dio jii ko ko a inaa ngisen.

³³ Nóna ixi nchijí aséenni ko ixi ti xraxaonni ko ixi nchijí je eni xrotjuexinni ndo Dio ko xrotjue eni ni kichuuni xranchi tjue eni aséenni. Me e ícha tjintee ixi kain iko xrokóñani xrokuayé e ndo Dio.

³⁴ *Ko bikon ndo Jesús ixi jian juate e xa, ndachro ndo:

—Ja a íkjín a ritjén ti jii juachaxien ndo Dio.

Ko kain na xronka na ko íxro an ngisen juanchangi e ndo ícha nge e.

¿Ngisen kuachrjenixin ndo Cristo?

(Mt. 22:41-46; Lc. 20:41-44)

³⁵ Tjume e ndo Jesús bake e ndo ni ngo juinchekuen en ndo chujni. Ko juanchangi ndo ko ndachro ndo:

—¿Sonda ni tjako ley ndachro na ixi ndo Cristo naa xjantié ndo David?

³⁶ Ixi Espíritue ndo Dio bingijna ndo David ko ndachro ndo:

Ndo Dio ndache ndo Nchána:

“Take é ndatsjonxin jian ti no tituan an jan an, tsjexinja tsitjáña kain ni ningakon an.”

³⁷ ¿Xranchi ndo Cristo xrokjui xjantié ndo David?, ko ndo David ndachro ndo ixi ndo Cristo Nchée je e ndo.

Ko kain chujni juaxruxin bake e na ti kuin en na ti beki ndo Jesús.

Ndo Jesús chronga ndo xranchi nche e ni tjako ley

(Mt. 23:1-36; Lc. 11:37-54; 20:45-47)

³⁸ Tjume e ndo Jesús nichja ndo ko ndachro ndo:

—Tsje enta xranchi nche e ni tjako ley ixi je e na nche e na juaxruxin ixi stejá na manta ícha jine ko tjaun na ixi kain ni tjajna tsajon na juasie ngajin je e na nchakon ichrji na ngataon ndasin.

³⁹ Je e na tjée na ntaxitaon ícha jian tseta a na ngaxin in ni ngo. Ko kaxon nchakon itji na kia tjaun na tsake e na ti no ícha jian.

⁴⁰ Ko tantsje e na nchri ka an ndo a nchra. Ko tjume e seen nichje e na ndo Dio ixi tsin en chujni nge e ndachro na ko jaña xroxraon chujni ixi je e na jian na. Ni me e ícha tangi tson en na.

Tomi kuajon naa nchri ka an

(Lc. 21:1-4)

⁴¹ Naa nchakon ndo Jesús bake e ndo ngaxin in ni ngo tjenka ti tingachjian tomi. Ko jitsje e ndo take e na tomi ngaya ntaa. Ko ni chóna itsjé tomi kuajon na tsjé tomi.

⁴² Ko kaxon kují naa nchri ka an nóa ko kuajon nchra yuu tomi nchínchin, tomi tjinte a.

⁴³ Ko tjume e ndo Jesús kuiye e ndo sen chrikao ndo, ko ndachro ndo:

—Nduaxin ntatjunta ixi nchri ka an, nchri nóa ícha tjintee bikon ndo Dio tomi ti kuajon nchra ixi ti kuajon ikaxin na.

⁴⁴ Ixi ni kaxin je o tomi tsixe e kuajon na. Ko je e nchri nóa kuajon nchra kain tomi chonda nchra xrojuinixin nchra.

13

Ndo Jesús chronga ndo tsitjáña ni ngo

(Mt. 24:1-2; Lc. 21:5-6)

¹ Tjume e nchakon kuachrjexin ndo Jesús ni ngo ijíé, ndachro sen chrikao ndo:

—Maestro, tsango chaxro ixro ko chaxro nchia tsikonchjian.

² Ko juate e ndo Jesús ko ndachro ndo:

—¿Á tükuan nchia ijíé tsikonchjian? Tsiji nchakon ninaa ixro tsitue a ngata a inaa ixro, kain tsitjáña.

Nge e tson en ti tsjexixin nunte xasintajni

(Mt. 24:3-28; Lc. 21:7-24; 17:22-24)

³ Ko tjume e sakjui sen ngata a ijna Olivo jna jii ngajinxin* ni ngo. Nti a bake e ndo Jesús, ndo Pedro, ndo Jacobo, ndo Juan, ko ndo Andrés ko juanchangi e sen ndo, ko ndachro sen:

- ⁴—Ndachijinanta ngisa tson en kain ji in ko nge e tsonoxin ixí jaña tsonónana.
- ⁵ Ko ndo Jesús juate e ndo ko ndachro ndo:
—Tsje enta jian ixí xro an ngisen sintaya anta.
- ⁶ Kueya nã tsij nã xrondachro nã ixí je e nã ndo Cristo. Ko jaña sincheye e nã kueya chujni.
- ⁷ Ko nchakon tsin ennta ixí tseto naa tjanya ngajin inaa tjanya ko tsóña kichuu nã, ja anta xronka inta ixí xrokonda tson en me e. Ko xratsitjáña i xasintajni.
- ⁸ Naa tjanya tsetoka o inaa tjanya ko xi tetuan an tjanya tsinteké to xa. Ko itsjé no tson tengi nunte ko kueya tjanya tsatse nã jinta. Ji i ti xrangíxixín tsij ijíe juachjaon.
- ⁹ *Ko ja anta soji take énta ixí tsiku unta nã ti jii xi tetuan an ko ngaxin in ni ngo nti a tsjaya nã ngajinnta. Kaxon tsikaannta nã ti jii xi gobernador ko xi rey ixí chuntianta ngajin jan an; ko jaña tsjakoxinnta ngajin je e nã ixí titikaonninta jan an.
- ¹⁰ Ko xratsitjáña i xasintajni, xrokonda tsin en kain tjanya chijni jian tsantsje ijie.
- ¹¹ Hora tsiku unta nã ti jii xi tetuan an, ta inta juachjaon nge e tsjate enta. Ja anta xronichjanta nge e tsajon ndo Dio nchakon me e, ixí je a ja onta xronichjanta. Espíritue ndo Dio xronichjaxin ixí ja anta.
- ¹² Kaxin chujni tsikaan nã ni kichuu nã ixí tsóña nã nã. Ko jaña kaxin nã tsikaan nã chjen en nã ixí tsóña nã xjan ko ikaxin nã xraningakon en nã ndotée nã ko janée nã ko tsikaan nã nã ixí tsen en nã.
- ¹³ *Kaínko ni xasintajni xroningakon annta nã ixí titikaonninta. Ko sen nduaxin titikaonna jan an ko tsoguaxi en sen ti tsijija nchakon tsjexin kain nge e, sen me e tsayé e juachaxin tsechón sen kain nchakon.
- ¹⁴ Sen sinchekuanxin xroon chijnie ndo Dio xrokonda tsienxin sen jian ji i: nchakon tsikonnta tsake e naa xi tsango ña i ti no tikinixin a xrobake e xa, xranchi tsindachro ndo profeta Daniel, ko ni jii nunte Judea nchakon tsikon nã me e, satsinga nã ijnã tsikemá nã.
- ¹⁵ *Ko ni jii ngata a nchia íxroxingajin a nã, tixin in nã nchia tsantsje nã xrojan nge e.
- ¹⁶ Ko ni jii ngataon ijngí íxrokjan i nã xrotsé nã nge e tsetsáa nã.
- ¹⁷ Ko nchakon me e lastu nchri yaa ichjan ko nchri stenčekaki chjen en.
- ¹⁸ Xrojuinche enta ndo Dio ixí je a nchakuen ikin xrokron en ji i.
- ¹⁹ *Ko nchakon me e ijíe juachjaon tson en nã, xranchi nai a tsikon en ti juangíxixín ndo Dio juinchéña ndo xasintajni ko tsoen a jaña íjngo.
- ²⁰ Ko siá Ncháina ndo Dio xrokuajon a ndo juachaxin ixí sé a tsonchrjen en ji i, íxro an ngisen xrokuechón. Ko tjue e ndo sen tsikinche e ndo, méxin xro an itsjé nchakon tsochrje en ji i.
- ²¹ Ko siá xrojan ngisen xrontatjunta: “Tsje enta, nti i jii ndo Cristo”, o xrondachro nã: “Tsje enta, nda a jii ndo”, titikaon anta nã.
- ²² Ixi tsij kaxin nã xrondachro nã ixí je e nã ndo Cristo ko kaxon kaxin nã ndako a tsjako nã ko tsjakoxin nã naa ixrã ijíe ixí tjaun nã sincheye e nã chujni ko kaxon ngajin sen titikaon ndo Dio.
- ²³ Ko ja anta tsje enta jian ixí ó ntatjunta sa ó nge e tson en.
- Tsij Chjen en ndo Dio, xjan jongí e xranchi chujni*
(Mt. 24:29-35, 42-44; Lc. 21:25-36)
- ²⁴ *Nchakon tsatsinga juachjaon, chjiixro tsonaxixe e, ko nchanitjao ítsingasáña i.
- ²⁵ *Ko kaxin nchanotsé tsitsingaxin ngajni ko kain juachaxin jii ngajni xroxranga.
- ²⁶ *Tjume e tsikonnta tsij Chjen en ndo Dio, xjan jongí e xranchi chujni, ngakjen en itujj ko tsjako ndo ijíe juachaxin chónnda ndo.
- ²⁷ Ko tsetuen en ndo sen ángel satsji sen nchijí ngata a nche ixí tsja o sen kain sen tsikinche e ndo Dio.
- ²⁸ Xraxaonnta nge e beki anta ixí ntãã tu higo. Nchakon tachrje ika chaan ntãã, ó no anta ixí íse a tsij nchakon súa,
- ²⁹ jaña kaxon nchakon tsikonnta jiton en kain ji i, me e ó no anta ixí ó kujj nchakon tsjexin xasintajni.
- ³⁰ Méxin, nduaxin ntatjunta ixí kain ji i sa ó tson en, ko xratsen a ni jii ngata a nunte.
- ³¹ Ko ngajni ko xasintajni tsitjáña ko chijnina tsitjáña i, nduaxin jaña tson en.
- ³² *Ko nchakon ko hora tson en ji i, xro an ngisen no e, ni sen ángel jii ngajni ni kaxon Chjen en ndo Dio, xjan jongí e xranchi chujni, noe a sen nchakon tson en ji i. Je o Ndotána no e ndo.
- ³³ Méxin tsje enta jian ko xronichje enta ndo Dio ixí noa inta ngisa ko ngiora tson en kain ji i.

³⁴*Xranchi naa ngisen satsji ikjín, tintu e sen ndo a sen, sa ó tetuan an sen ngujngu ixra sinche e ni nche e xrée sen. Ko kuetuen en sen naa xi tsendáa xa nchia ko kain nge e.

³⁵Méxin, ja anta tarichrin anta ixi noa inta ngisa xroxjan nchée nchia, á naa tsondo o á naa tiie o á ngusine tiie o hora itsje kuntaxichiká o á tsingasáña,

³⁶ko banchexin tuinxin tsji sen ndo a tsitjanta sen stechrinta.

³⁷Ti ntatjunta, jaña kain nã ixi xrotsje e nã jian xranchi tsake e nã.

14

Tjao nã xranchi xrotsé nã ndo Jesús

(Mt. 26:1-5; Lc. 22:1-2; Jn. 11:45-53)

¹Xratitjáña yuu nchakon tsaxi kia pascua ti sine nã nutja chóna i ti tja in nutja.

Tjume e xitaana tetuan an ko ni tjako ley xraxaon nã xranchi sincheya nã ixi xrotsé nã ndo Jesús ko naatsóñaxón nã ndo.

²Ko ndachro nã:

—Je a nchakon kia sintu una ji i ixi batsoñao kain chujni.

Naa nchri bikitée nchra aceite chaxro xraxe jaa ndo Jesús

(Mt. 26:6-13; Jn. 12:1-8)

³*Tjume e ndo Jesús bake e ndo tjajna Betania ndo a ndo Simón, ndo kuachóna chinlepra. Ko hora jine ndo Jesús, tuinxin kuji naa nchri bika o nchra naa xroxrao jitjiá nda chaxro xraxe tsjo nardo, tsango tjintee. Ko nchri me e kuantje e nchra xro ko bikitée nchra jaa ndo Jesús nda me e.

⁴Ko sen ste nti a koñao e sen nchra ko ndachro sen:

—¿Sonda juinchexienxin nchra inda chaxro xraxe?

⁵Cháña xrojuinckji nchra nda me e, ixi níi ciento tomi denario, ko tjume e xrojuinckitun en nchra ni nóa.

⁶Ko ndachro ndo Jesús:

—Tintu enta nchra, ¿sonda tuyakutéenta nchra? Je e nchra juinche e nchra naa nge e jian ngajin.

⁷Ni nóa kain nchakon tsariku unta nã, ko chao tsingijnanta nã xrojan nchakon. Ko jan an kain a nchakon tsake e ngajinnata.

⁸Ko je e nchra ó juinche e nchra nge e ti xrokonda xrojuinche e nchra. Sa ó bingamána nchra xrojan ixi xroxraabaana.

⁹Nduaxin ndachrjan ixi kain ti no tsin en nã chijni jian, nchijji ngata a nche tsin en nã kaxon nge e juinche e nchri ji i, ko xroxraxaon nã nchra ixi jaña juinche e nchra.

Xi Judas juinckji xa ndo Jesús

(Mt. 26:14-16; Lc. 22:3-6)

¹⁰Tjume e xi Judas Iscariote, naa xi teyuu sen chrikao ndo Jesús, kuitsje e xa xitaana tetuan an ixi xrochronga xa xranchi xrotsé nã ndo Jesús.

¹¹Ko je e nã bake e nã juaxrxuxin ixi kuin en nã nge e ndachro xi Judas ko ndachro nã tsajan nã tomi tsayé e xa. Ko tjume e kuaxi xraxaon xa xranchi sinche e xa ixi xrotsé nã ndo Jesús.

Juinekao sen ndo Jesús

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹²Nchakon xrangixixín kia sine nã nutja chóna i ti tja in nio, nchakon me e tóña nã kutuchjon sine nã kia pascua. Ko sen teyuu chrikao ndo Jesús juanchangi e sen ndo:

—¿Ti no tjaunnta sintakonchjianxinna ti sinena kia pascua?

¹³Tjume e kuetuen en ndo yuu sen chrikao ndo, ko ndachro ndo:

—Itjinta tjajna Jerusalén ko nti a tsetannta naa xi yama nchixran jitjiá inda. Rue énta xa

¹⁴ti nchia tixin in xa, ko ndachenta xi ndo a: “Kuetuan an ndo nchekuannãna: ¿Ti no jii nchia sinexin ndo kia pascua ko sen teyuu chrikao ndo?”

¹⁵Ko tjume e je e xa tsajan xa naa nchia yuxin jii noi ko nti a ó jii kain nge e. Nti a nchekonchjianxinnta ti sinena.

¹⁶Tjume e je e sen sakjui sen tjajna Jerusalén ko kuitja sen xranchi tsindachro ndo Jesús. Ko nti a juinckekonchjianxin sen ti sine sen kia pascua.

¹⁷Tjume e ó kóno kuji ndo Jesús ko sen teyuu chrikao ndo.

¹⁸Ko hora stene sen, ndachro ndo Jesús:

—Nduaxin ndachrjan ixi naa ja anta rineki an nti i sinckekjininta.

¹⁹Ko je e sen kochín sen. Ko kuaxi ngujngu sen juanchangi e sen ndo:

—¿Á jan an ngisen sinche e me e?

- ²⁰ Ko juate e ndo Jesús ko ndachro ndo:
—Xi me e naa sen teyuu rineki an ngaya latona.
- ²¹ Chjen en ndo Dio, xjan jongí e xranchi chujni, tson en xjan xranchi nichja xroon chijnie ndo Dio. Ko lastu xi sinchekji ndo ixi ícha jian xrojongíe a xi me e.
- ²² Ko stene sen, ndo Jesús kua ndo naa nutja, ko kuajon ndo juasaya ngajin ndo Dio. Ko tjume e konchrijin ndo nutja ko konchjeje e ndo sen. Ko ndachro ndo:
—Intenta, ji i cuerpona.
- ²³ Ko kaxon kua ndo naa vaso ko kuajon ndo juasaya ngajin ndo Dio ko chjée ndo sen ko kain sen kui i sen.
- ²⁴ Tjume e ndachro ndo:
—Ji i jnina chronga ixi nduaxin tsaxi tsituan an naa ley natjúá ícha tjintee, jnina tsintji jni ixi tsitjáñaxin ijie chónnda kain chujni.
- ²⁵ Nduaxin ndachrjan ixi ítsi a jan an ndée tu uva íjngo, hasta ti tsijija nchakon tsojuna ti tetuan an ndo Dio. Ko nchakon me e tsi i ndée tu uva natjúá.
- Ndo Jesús chronga ndo ixi ndo Pedro xrondachro ndo chúxin a ndo ndo Jesús*
(Mt. 26:30-35; Lc. 22:31-34; Jn. 13:36-38)
- ²⁶ Ko juexin itsje sen naa soon ngajin ndo Dio, tjume e sakjui sen ijna Olivo.
- ²⁷ Ko ndo Jesús ndachro ndo:
—Tiie jai kainnta tsintunaninta ko tson en xranchi ndachro xroon chijnie ndo Dio: “Naatsónaxón na sen tingatjia kutuchjon, ko je e ba xrochjeke e ba.”
- ²⁸ *Ko nchakon xroxechónna, jan an tsitaa annta cha o itji nunte Galilea.
- ²⁹ Ko ndachro ndo Pedro:
—Maski kain sen tsintu anta sen, jan an tsintua inta.
- ³⁰ Ko ndachro ndo Jesús:
—Nduaxin xrontatjua ixi jai tiie xraje a yuu xrotsje kuntaxichíká, ja a níi xrondachrua ixi chuxin ana.
- ³¹ Ko séen juate e ndo Pedro ko ndachro ndo:
—Maski tsen enna, xrondachrjan i chuxin anta.
Ko jaña ndachro kain sen.
- Ndo Jesús nichja ndo ngajin ndo Dio ti huerto Getsemaní*
(Mt. 26:36-46; Lc. 22:39-46)
- ³² Tjume e kuiji sen naa huerto ndatin in Getsemaní. Ko kuetuen en ndo Jesús sen chrikao ndo:
—Tituan anta nti i, jan an itsji xronichja a ndo Dio.
- ³³ Tjume e ndo Jesús sabikao ndo ndo Pedro ko ndo Jacobo ko ndo Juan. Ko kuaxi tsango koni e aséen ndo xranchi ndaxrokuen en ndo.
- ³⁴ Ko ndache ndo sen:
—Tsango koni e aséenna ixi kain nge e tsónna. Nti ó tituan anta, tarichrin anta.
- ³⁵ Ko tjume e sakjui ndo ícha kjínxin ko bake exin ndo ntatuchi in ndo ko kuaxi kuinóatée ndo ngajin ndo Dio ixi xrokuajon ndo Dio juachaxin ixi xrokuatsinga i ndo juachjaon me e.
- ³⁶ Ko ndachro ndo:
—Ja anta Ndotána. Ja anta chondanta kain juachaxin ko tjancha anta ixi tsatsinga i jan an juachjaon ji i. Ko tsoen a xranchi jan an tja on. Na i, tson en xranchi ja anta tjaunnta.
- ³⁷ Ko tjume e ikjan ndo ti kuintu e ndo sen ko kuitja ndo sen stejua sen. Ko ndache ndo ndo Pedro:
—Simón Pedro, ¿á richrian? ¿Á jua i kuarichuan maski naa hora?
- ³⁸ Jai xingama anta ko nichje enta ndo Dio ixi tsajon a ndo juachaxin ixi Xixron anxrée sintaya anta xa. Espirituanta tjée ndo Dio ko ntau anta soji a.
- ³⁹ Tjume e sakjui ndo íjngo kuinóatée ndo ngajin ndo Dio. Ko xraje o nichja ndo.
- ⁴⁰ Tjume e ikjan ndo ko kuitja ndo sen stejua sen íjngo ko jua i tantje e ikon sen ixi tsango chjée sen kotachrin. Ko noe a sen nge e tsjate e sen.
- ⁴¹ Ko nínxin sakjui ndo ko ikjan ndo ko ndachro ndo:
—¿Á xrastechrinnta ko stetjoka anta? Jai ó kuiji hora ixi Chjen en ndo Dio, xjan jongí e xranchi chujni, tsajon na xjan ngajin ni ña i.
- ⁴² Tingatjennta sachjina ixi ó jitijí ngisen sinchekjina.

Itsé na ndo Jesús
(Mt. 26:47-56; Lc. 22:47-53; Jn. 18:2-11)

⁴³ Xrajnichja ndo Jesús, tuinxin kuji xi Judas, naa xi teyuu chrikao ndo. Ko kueya na bijikao xa teyá na chika espada ko ntaá. Ni me e tsixrua an xitaana tetuan an ko xi tjako ley ko xi tetuan an ni ngo.

⁴⁴ Ko xi Judas, xi juincheckji ndo, tsindachro xa:

—Xi tsetoxin, xi me e isenta ko satiku unta.

⁴⁵ Tjume e kuji xi Judas ko tuinxin konchjiñe e xa ngajin ndo Jesús ko ndachro xa:

—Maestro, Maestro.

Ko kuitoxin xa ndo.

⁴⁶ Ko ni kuijikao xa itsé na ndo Jesús, sabikao na ndo.

⁴⁷ Ko naa sen jii nti a kuantsje chika espada konchrinjin sen ndatsjon naa xi nche e xrée xitaana tetuan an.

⁴⁸ Ko ndo Jesús ndachro ndo:

—¿Sonda bikuunta chika yao ko ntaá xrotséxinninta xranchi xrokjui naa xiche e?

⁴⁹ *Kain nchakon bake e ngajinnata ti jii ni ngo jintakuan annta, ko, ¿sonda tsé aninta nti a? Ko xrokonda jaña tson en xranchi nichja xroon chijnie ndo Dio.

⁵⁰ Ko kain sen chrikao ndo Jesús kuintu e sen ndo ko sakjui sen.

Naa chajan sabinga chán

⁵¹ Naa chajan kaxon jirué e chán nti a, ko je o naa manta jitsía chán, ko itsé na chán.

⁵² Ko je o mantée chán tsitsé na ko turuchu chán sabinga chán.

Ndo Jesús konchjiñe e ndo ti jii ni tetuan an

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Tjume e sabikao na ndo Jesús ndo a xitaana tsango tetuan an. Nti a tsixra o kain xitaana tetuan an ko ni tachrii tetuan an ni ngo ko ni tjako ley.

⁵⁴ Ko ndo Pedro ikjín jiruéexin ndo ko kuiji ndo ti ntsien ndo a xitaana tsango tetuan an. Nti a jiche xro i. Ko xi policía stendajin xa xro i jixraxru e xa, ko kaxon ndo Pedro jixraxru e ndo.

⁵⁵ Ko xi tetuen en xitaana ko kain xi ícha tetuan an juée na ngisen xrojuankata a ijie ngajin ndo Jesús ixi jaña naatsóñaxón na ndo. Ko kuitja i xa ijie ngajin ndo

⁵⁶ Ixi itsjé na ndachro na ti nduaxin a ko tjankata a na ndo ijie ko je a xraje o nge e ndachro na.

⁵⁷ Ko bingatjen kaxin ni juankata a ndo ijie ko ndachro na:

⁵⁸ *—Jan anna kujin an ixi ndachro xi Jesús tsonchjejin xa ni ngo tsjincheckkonchjian chujni, ko nchakon nínxin sincheckonchjian xa ni ngo íjngo ko je a chujni sincheckonchjian.

⁵⁹ Maski jaña ndachro na ko je a xraje o kuanichja kain na.

⁶⁰ Ko xi tetuen en xitaana bingatjen xa ti ste kain na ko juanchangi e xa ndo Jesús:

—¿Á xro an tsjatengiéxian ja a ti ijie tjankata a na?

⁶¹ Ko ndo Jesús tenko ndo, xro an nge e juate e ndo. Ko xitaana tetuan an ndachro xa íjngo:

—¿Á ja a ndo Cristo, Chjen en ndo Dio tsango tjúa?

⁶² Ko ndachro ndo Jesús:

—Jaán, jan an. Ko naa nchakon ja anta tsikonnta Chjen en ndo Dio, xjan jongí e xranchi chujni, tsake e xjan ndatsjonxin jian ti jii ndo Dio, ndo chóna ijie juachaxin ko je e xjan tsj xín ndo ngajni ngakjen en itjuí.

⁶³ Ko xitaana tetuan an kuinchje xa ti jitsáa xa ixi tsango koña xa ko ndachro xa:

—Íxrokonda i ixi ikaxin na xrochrona na ti ndakua i nche e xi ji i.

⁶⁴ Ja anta ó kuin ennta ixi nichjangí e xa ndo Dio. ¿Nge e ndachrona?

Ko kain na juatingiéxian na, xrokonda tsen en ndo.

⁶⁵ Tjume e ikaxin na kuaxi na bikitée na ndo ndatée na. Ko kuaxi na bije e na ikon ndo ko kuande e na ndo itja na ko juanchangi e na ndo:

—Ndachrua ngisen juaya ngajian.

Tjume e xi policía kondee ni ngo kuande e xa itja xa ngaya ikon ndo Jesús.

Ndo Pedro ndachro ndo ixi chúxin a ndo ndo Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Ko ndo Pedro jii ndo ti jii ndásin. Ko tjume e kuji naa nchri nche e ixra ngajin xitaana tetuan an.

⁶⁷ Ko bikon nchra jixraxru e ndo Pedro ngande e xro i nti a. Ko jian jitsje e nchra ndo ko ndachro nchra:

—Ja a kaxon chrijko a xi Jesús kujxin tjajna Nazaret.

⁶⁸ Ko ndo Pedro ndachro ndo:

—Na i. Jan an chúxin a xi me e. Nóna i nge e ndachrúa.
 Tjume e kuachrxexin ndo nti a sakjui ndo nduja. Ko tuinxin itsje naa kuntaxichiká.
⁶⁹ Ko íjngo bikon nchra ndo ko ndache nchra ni ste nti a:
 —Xi me e naa xi chrikao xi Jesús.
⁷⁰ Ko ndachro ndo Pedro íjngo:
 —Na i.
 Ko ícha tjume e ni ste nti a ndache na ndo Pedro:
 —Nduaxin ja a kaxon tsikjixian tjajna Galilea íxi ja a nichja xranchi nichja ni tjajna me e.
⁷¹ Ko ndo Pedro kuaxi ndo bengá ndo teka ko ndachro ndo:
 —Chúxin a xi ndachronta.
⁷² Ko tuinxin ndo Pedro kuin en ndo yuxin itsje kuntaxichiká. Ko xraxaon ndo xranchi tsindachro ndo Jesús: “Xraje a yuu xrotsje kuntaxichiká, ja a nínxin xrondachrúa chuxin ana.” Me e xraxaon ndo ko tsjanga ndo íxi ndako a juinche e ndo.

15

Ndo Jesús kuiji ndo ngajin xi Pilato

(Mt. 27:1-2, 11-14; Lc. 23:1-5; Jn. 18:28-38)

¹ Tjume e ó bingasáña ko xitaana tetuan an kao ni tachríi, ko ni tjako ley ko kain ni tetuan an ni ngo, xra o kain na juintejaio kichuu xa ko juexin itsé na ndo Jesús sabikao na ndo ngajin xi Pilato.

² Ko xi Pilato juanchangi e xa ndo Jesús ko ndachro xa:

—¿Á ja a Rey tetuan an ni judío?

Ko ja in juatingéxin ndo Jesús:

—Ja a ndachrúa.

³ Tjume e xitaana tetuan an bankata a xa ndo íjie.

⁴ Ko xi Pilato juanchangi xa íjngo, ko ndachro xa:

—¿Ja a, sonda xro an nge e tjabatéxian? Itsjé íjie tjankata a na.

⁵ Ko ndo Jesús xro an nge e juatingéxin ndo. Tjume e xi Pilato noe a xa nge e sinche e xa.

Ndo Jesús xrokonda tsen en ndo

(Mt. 27:15-31; Lc. 23:13-25; Jn. 18:38—19:16)

⁶ Ko kia me e xi Pilato xrokonda tsajanda xa naa xi jii ngaxin in ndo achjiso, ngixe i xi tsjanchia chujni tjajna.

⁷ Ko ngaxin in ndo achjiso jii naa xi ndatin in Barrabás, ko ikaxin ni ña i tsikitikaon a xi tetuan an ko naatsikóñaxón xa kaxin chujni.

⁸ Ko kuij kueya na juanche e na xi Pilato íxi xrojuinche e xa xranchi ton en kain nano.

⁹ Ko juatingéxin xi Pilato:

—¿Á tjaunnta tsajanda satsji xi Rey tetuen en ni judío?

¹⁰ Jaña ichro xa íxi je e xa no e xa íxi xitaana tetuan an tochjuye e xa ngajin ndo Jesús, méxin tsité na ndo.

¹¹ Ko xitaana tetuan an juincheateya xa kain chujni jii nti a, ko ndache xa na íxi tsjanchia na ngajin xi Pilato íxi xrokuajanda xa xi Barrabás.

¹² Tjume e xi Pilato juanchangi xa, ko ndachro xa:

—Ko xi nchekin innta Rey tetuen en ni judío, ¿nge e tjaunnta tson en xa?

¹³ Ko je e na juatingéxin na, ko stetoyako na:

—¡Tjankanitua xa ntacru!

¹⁴ Ko xi Pilato juanchangi e xa na:

—¿Nge e ndakua i juinche e xi ji in?

Ko ícha séen kuyako na tjanchia na:

—¡Tjankanitua xa ntacru!

¹⁵ Ko xi Pilato tjaun xa sinche e xa nge e tjaun na, ko kuajon xa juachaxin tsajanda na xi Barrabás ko kuetuan an xa íxi xrojuaya na ngajin ndo Jesús ko kuajon xa juachaxin íxi xi soldado satsikao xa ndo Jesús tsenito xa ndo ntacru.

¹⁶ Tjume e xi soldado sabikao xa ndo Jesús ngaxin in ntasien nchatituan an. Nti a xejuxin kain xi soldado.

¹⁷ Ko nti a juincheake e na ndo Jesús naa manta játsetié ko bake e na ngata a jaa ndo naa corona tsikóñaxin ntacha a.

¹⁸ Tjume e juangéxin kuyako xi soldado, ko ndachro xa:

—Kain nchakon tsechón Rey tituen en ni judío.

¹⁹ Ko ixi naa ntasé tande e xa jaa ndo Jesús, ko ndatée xa bikitée xa ndo. Ko bake exin ntatuchi in xa ko nchexin xa xranchi xrokuajon xa juasaya* ngajin ndo.

²⁰ Ko juexin juanoa xa ndo kuantsje e xa ndo manta játsetié jáá ndo ko juinchekeya xa ndo mantée ndo íjngo. Ko kuantsjexin xa ndo nti a sabikao xa ndo ixi tsenito xa ndo ntá cru.

Kuenito xa ndo Jesús ntá cru

(Mt. 27:32-44; Lc. 23:26-43; Jn. 19:17-27)

²¹ *Ko nchakon me e naa xi tsikj xjn tjajna Cirene, ndatin in xa Simón, xi ji in ndotée xi Alejandro ko xi Rufo, xi me e jitj xjn xa chjaka, ko kuatsinga xa nti a. Ko xi soldado juinчекama xa xi me e ntá cru, ntáa yama ndo Jesús.

²² Tjume e sabikao xa ndo Jesús ijnā ndatin in Gólgota, ko Gólgota xrondachro ngigüe e nā ntajaa chujni.

²³ Ko nti a chjée nā ndo vino tsijinчentekjan nā xroān mirra xrokui i ndo Jesús, ko je e ndo kui a ndo.

²⁴ Tjume e xi soldado kuenito xa ndo Jesús nganito ntá cru. Ko juexin ji i, sondaonxin xa ixro ixi jaña tsono e xa ngisen tsjacha tsitu e ngujngu manta jiá ndo.

²⁵ Ko ó las nueve ti kuasintjian xa ndo nganito ntá cru.

²⁶ Ko nganito ntáa jii ndo Jesús tsikake e nā naa ntáa nchíin tsikjin nā kondeexin ti tsen en ndo ko ja in ndachro:

“Xi i Rey tetuen en ni judío.”

²⁷ Ko kaxon kuasintjian nā nganito ntá cru yuu xiche e, naa xi bake e nā ndatsjonxin jian ti jii ndo Jesús ko inaa xa bake e nā xa ndatsjonxin ikjon ti jii ndo.

²⁸ Jaña kon en xranchi jitaxin xroon chijnie ndo Dio ti ndachro: “Xranchi naa ni chóna ijie juinчекao nā ndo.”

²⁹ *Ko ni stetatsinga nti a juanoa nā ndo ko nichjangí e nā ndo ko tingatjia jaa nā ko ndachro nā:

—Ja a ndachrua tsonchejia ni ngo, ko níiko nchakon sinчekonчjianxian ni ngo íjngo.

³⁰ Siá nduaxin sinche e me e, xingajinxian ntá cru.

³¹ Ko xitaana tetuan an ko xi tjako ley juanoa xa ndo, ko ja in juao kichuu xa:

—Inaa nā bingijna xi ji in ko je e xa jua i tingijna aséen xa.

³² Siá nduaxin je e xa ndo Cristo, Rey tetuen en tjajna Israel, tsikonna xroxingajinxin xa ntá cru ko jaña tsitikaonna xa.

Ko kaxon xi ste nganito ntá cru nichjangí e xa ndo.

Kuen en ndo Jesús

(Mt. 27:45-56; Lc. 23:44-49; Jn. 19:28-30)

³³ Tjume e ngusine nchakon konaxixe e nchijii nunte xasintajni ti kuijija hora nínxin kóndo.

³⁴ Ko hora me e séen ndachro ndo Jesús:

—Eloi, Eloi, ¿lama sabactani? —ngigüe e nā xrondachro: Ndotána, Ndotána, ¿sonda kuintunantana?

³⁵ Ko kaxin ni ste nti a kuin en nā nge e ndachro ndo, me e ndachro nā:

—Tin ennta, jitiye e xa ndo Elías, ndo kuachronga chijnie ndo Dio ó sa ó.

³⁶ Tjume e naa xi jii nti a binga xa kua xa tu o manta ko juinchetjao xa ixi vinagre, ko ixi naa ntáa ijie kokaxin xa manta ti jii ro a ndo Jesús ixi xrokui i ndo me e. Ko ndachro xa:

—Xrochon enna á nduaxin tsijj ndo Elías sinчexingajin ndo xa.

³⁷ Ko ndo Jesús séen kuyako ndo ko kuen en ndo.

³⁸ Ko velo jijeexin ni ngo kuinchje nui hasta ti nunte.

³⁹ Ko xi capitán romano jindaa xa ti jii ndo Jesús, bikon xa juexin kuen en ndo ko ndachro xa:

—Nduaxin xi ji i Chjen en ndo Dio.

⁴⁰ *Kaxon nti a ste kaxin nchri, ikjín stetsjexin nchra, nchri me e: jan María Magdalena, jan María, janée ndo ndatin in Jacobo, ndo chjiaxon, ko ndo José. Ko kaxon jan Salomé.

⁴¹ Ko sen nchri me e rué e sen ndo Jesús ko kuayakon en sen ndo nchakon bake e ndo tjajna Galilea ko nti a jii ikaxin nchra, nchri rué e ndo ti sakjui ndo tjajna Jerusalén.

Xrabaa ndo Jesús

(Mt. 27:57-61; Lc. 23:50-56; Jn. 19:38-42)

⁴² Tjume e ó kóndo nchakon xrangixixín nchakon tjoké e nā,

* 15:19 juasaya respeto, honor 15:21 Ro. 16:13. 15:29 Mr. 14:58; Jn. 2:19. 15:40 Lc. 8:2, 3.

⁴³ *kuij* naa ndo ndatin in José, *tjajné* ndo ndatin in Arimatea. Ndo me e kaxon tetuan an ndo ti *tjajné* ni judío. Je e ndo me e *jichón* en ndo *tsij* juachaxien ndo Dio ko xrakon a ndo *kuitsje* e ndo xi Pilato ko juanchia ndo satsikao ndo *cuerpoe* ndo Jesús.

⁴⁴ Ko xi Pilato xronka xa *ixi ó juexin* tsiken en ndo Jesús, *méxin*, *kuiye* e xa xi *capitán* ko juanchangi e xa xi me e á *nduaxin* tsiken en ndo.

⁴⁵ Ko chronga xi *capitán* *ixi nduaxin ó juexin* kuen en ndo Jesús. Ko *kuin* en xi Pilato *jaña*, ko *kuajon* xa juachaxin *ixi tsikao* ndo José *cuerpoe* ndo Jesús.

⁴⁶ *Tjume* e ndo José *tsike* na ndo manta *chaxro* ko *ikjui* ndo *juinchexingajin* ndo *cuerpoe* ndo Jesús, ko *kuintsía* ndo ndo Jesús manta. *Tjume* e *bake* e ndo *cuerpoe* ndo Jesús ti no *tsinge* na *ngaxin* in naa *itjao*. Ko naa *ixro ijíe* *bijeexin* ndo *itjao* me e.

⁴⁷ Ko jan *María Magdalena* ko jan *María*, *janée* ndo José, *bikon* sen no *bake* e na *cuerpoe* ndo Jesús.

16

Xechón ndo Jesús

(Mt. 28:1-10; Lc. 24:1-12; Jn. 20:1-10)

¹ *Tjume* e *kuatsinga* *nchakon* *tjoké* e na, jan *María Magdalena* ko jan *María*, *janée* ndo *Jacobo*, ko jan *Salomé* *kue* na sen *xroan* *chaxro* *xraxe* *ixi tsingamá* sen *cuerpoe* ndo Jesús.

² Ko, *nchakon* *xrangixixin* semana *sakjui* sen ti no *tsixrabaa* ndo.

³ Ko je e sen *nchri* *stetjao* *kichuu* sen:

—*¿Ngisen* *tsingijnana* *tsintjian* *ixro jijeexin* *itjao*?

⁴ Ko ti *kuiji* sen *nchri* *bikon* sen *ixi ixro ijíe* *jijeexin* *itjao**, *ó tsikontengi* *ixro*.

⁵ Ko je e sen *nchri* *kuixin* in sen *itjao* me e, ko *bikon* sen naa *chajan* *jii chán* *nunte* *ndatsjonxin* *jian* ko *jiá* *chán* manta *jiné* ko *tjúá*, ko je e sen *nchri* *xronka* sen.

⁶ Ko je e *chán* *ndachro* *chán*:

—*Xronka* *inta*. *¿Á tjéenta* ndo Jesús, ndo *tsiki xin* *tjajna* *Nazaret*, ndo *kuenito* na *ntacru*? Je e ndo *ó xechón* ndo, *i* ko a ndo *nti* i. *Tsje* *enta* ti no *bake* e na ndo.

⁷ **Sajinta*, *ndachenta* sen *bajikao* ndo ko kao ndo *Pedro* *ixi* ndo Jesús *sakuitaon* ndo *nunte* *Galilea* ko *nti* a *tsikonnta* ndo *xranchi* *tsintatjunta* ndo.

⁸ Ko sen *nchri* *sajuixin* sen ti no *tsixrabaa* ndo Jesús, *stexronka* sen ko *stexranga* sen. Ko *xro* an *ngisen* *ndache* sen *nchri* ti *nge* e *tsikikon* sen *ixi* *tsango* *xronka* sen.

Ndo Jesús konoxin ndo ngajin jan María Magdalena

(Jn. 20:11-18)

⁹ *Nchakon* *xechón* ndo Jesús, *nchakon* *xrangixixin* semana sa *ó konoxin* ndo *ngajin* jan *María Magdalena*, jan *tsikantsjexin* ndo *yaato* *espíritue* *Xixron* *anxrée*.

¹⁰ Ko je e jan *sakjui* jan, *beki* e jan sen *chrikao* ndo *ixi* je e sen *jitoni* e *aséen* sen ko *stetsjanga* sen.

¹¹ Ko *kuin* en sen *ixi jaña* *tsikikon* jan ko *kuitikaon* a sen ti *ndachro* jan.

Ndo Jesús konoxin ndo ngajin yuu sen kuachrijkao ndo

(Lc. 24:13-35)

¹² Ko *tjume* e *yuu* sen *bikon* ndo Jesús, ko *jéexin* *bikon* sen ndo. Sen me e *jitji* sen *cha* o *itji* *chjaka*.

¹³ Ko je e sen *kuichronga* sen *ngajin* sen *kaxin*; ko *kaxon* je e sen *kuitikaon* a sen.

Ndo Jesús kuetuen en ndo sen kuajikao ndo, ixra sinche e sen

(Mt. 28:16-20; Lc. 24:36-49; Jn. 20:19-23)

¹⁴ *Tjume* e *konoxin* ndo *ngajin* sen *tenaá* *kuajikao* ndo ti *stene* sen. Ko *nichje* e ndo sen *sonda* *tsikitikaon* a sen *nge* e *chronga* sen *tsikikon* ndo *ixi* je e ndo *ó tsixechón* ndo.

¹⁵ *Ko *ndache* ndo sen:

—*Itjinta* *nchijí* *nunte* *xasintajni* *nchekuen* *ennta* *kain* na *chijni* *jian* *ixi* *tsayé* e na *juachaxin* *tsechón* na *kain* *nchakon*.

¹⁶ Sen *tsitikaon* ko *tsikitée*, sen me e *tsitjáña* i sen. Ko ni *tsitikaon* a, ni me e *tangi* *tson* en na.

¹⁷ Ko sen *tsitikaonna* jan an, sen me e *chao* *sinche* e sen naa *ixra* *jian*, *ixi* *tsayé* e sen *juachaxin* *tsantsje* sen *espíritue* *Xixron* *anxrée* *chón*da *kaxin* na ko *kaxon* *xronichja* sen *jéé* *ngigua*.

¹⁸ *Maski* *kunchee* *xrotsé* sen, *xro* an *nge* e *tson* en sen, ko *maski* *xrokui* i sen *xroan* *yua*, *tsen* a sen. *Kaxon* *tsake* e *itja* sen *ngata* a *jaa* ni ni e ko ni ni e *tsoxruen* en na.

* 16:4 *itjao* *cueva* 16:7 Mt. 26:32; Mr. 14:28. 16:15 Hch. 1:8.

Ndo Jesús kuajin in ndo ngajní
(Lc. 24:50-53)

¹⁹*Tjume e juexin nichja Ncháina Jesús ngajin sen, je e ndo kuajin in ndo ngajní. Ko nti a bake e ndo ndatsjonxin jian ti jii ndo Dio.

²⁰Ko sakjui sen ko juako sen chijni jian, chijni nchemé e ijje chóna chujni. Ko Ncháina[†] Jesús bingijna ndo sen ko juachaxien ndo juinchexin sen ixra jian, ixi jaña tsonoexin chujni ixi nduaxin chijnie ndo Dio nchekuen en sen na. Jaña tson en.

Chijnie ndo Jesús chronga ndo Lucas

Xrangíxin xroon ji i

¹ Kueya nã tjaun nã ndako xrokjin nã kain nge e nduaxin kon en nchakon bake e ndo Jesús ngajinna

² xranchi juinchekuaína sen, sen xrangíxixión bikonxin ikon sen kain nge e juinche e ndo Jesús ko kuaxi sen chronga sen ti nichja ndo.

³ Jan an kaxon juanchangi jian kain nge e tsikon en xrangíxixión bake e ndo Jesús. Ko jai xrokjin annta, Teófilo, kain nge e xranchi tsikon en naa ko naa,

⁴ ixi tsichuxinnta jian kain nge e tsijnchekuan annta sen.

Naa ndo ángel kuij ndo chronga ndo ixi tsjongí e ndo Juan Bautista

⁵ Nchakon bake e xi Herodes baketuen en xa nunte Judea, nti a bake e naa ndotaana bakin in Zacarías, kuachrjenixin ndo xitaana bakin in Abías. Ko janchri e ndo Zacarías bakin in jan Elisabet, ndotáchrí e jan kaxon xranchrjen ndotaana Aarón.

⁶ Yui sen jian kuanche e sen xranchi tjaun ndo Dio ko baktikaon sen kain ti nge e kuetuan an ndo. Méxin, xro an ngisen chao xrondachro ixi je e sen chónnda sen ijje.

⁷ Ko xro an chjan kuachónnda sen ixi jan Elisabet kuituen a jan xrochónnda jan chjan, ko je e sen ó tachríi sen.

⁸ Ko tjume e naa nchakon ndo Zacarías ko xitaana, sen nche e ixrã xranchi je e ndo, kuetuen en sen tsajon sen juasie sen ngajin ndo Dio.

⁹ Xranchi kuanche e xitaana nchakon me e, ndo Zacarías kuayé e ndo ixrã tixin in ndo ngaxin in nchia tjúá ndo a ndo Dio ixi tsjaaka ndo tsjoxraxé.

¹⁰ Nchakon juaaka ndo tsjoxraxé ngaxin in ndo a ndo Dio, kain ni ste nduja nichje e nã ndo Dio.

¹¹ Ko tuinxin ndo Zacarías bikon ndo naa ndo ángel xruan an ndo Dio ko siin ndo ángel nangoxin jian tjenja altar ti iche tsjoxraxé.

¹² Hora bikon ndo Zacarías ndo ángel me e, je e ndo chrinkaxrakon ndo.

¹³ Ko ndo ángel nichja ndo ko ndachro ndo:

—Zacarías xrakon a, ixi ndo Dio kuin en ndo nge e juanchia, méxin, janchri a Elisabet sinchejongí e jan naa xjan xi ko ja a sincheki ian xjan Juan.

¹⁴ Ko ja a xrochónnda juaxruxin ko kueya nã xroché e nã ixi tsjongí e xjan me e.

¹⁵ Ko chjan an ijje tsake e xjan ngajinxin ndo Dio. Ko xro an vino ko ninaa xran tsi a xjan, ko tsango xrochónnda xjan Espíritue ndo Dio ti xrajijá xjan ngaya tsë e janée xjan.

¹⁶ Ko je e xjan sinchekuen en xjan ni tjajna Israel, ko kueya nã xrokjan nã tsitikaon nã ndo Dio.

¹⁷ Je e ndo Juan tsitaon ndo tsjendue e ndo cha o tsi xín Ncháina, ko xrochónnda ndo xraje o juachaxin xranchi kuachónnda ndo profeta Elías, ko xronichje e ndo aséen ndotée ichjan tsoñao a nã ngajin chjen en nã, ko kain ni titikaon a ndo Dio tsono e nã xranchi tsitikaon nã ndo ko jian sinche e nã ixi tsij Ncháina Cristo.

¹⁸ Ko je e ndo Zacarías juanchangi e ndo ndo ángel ko ndachro ndo:

—¿Xranchi tsonóna ixi tson en ti ndachronta? Ixi jan an ó tsango tachrína ko kaxon janchri na ó nachríi jan.

¹⁹ Ko je e ndo ángel juatingíexin ndo:

—Jan an Gabrielna, ko nta a kain nge e tetuan an ndo Dio. Ko kuetuanna ndo tsi i ko xrontatjua nge e jian tson en.

²⁰ Ko ixi kuitikaon a ti ndachrjan, méxin, tsonosian ko jua i xronichja xroxetjaja nchakon tson en me e.

²¹ Ko kain ni stechón en nduja ndo a ndo Dio ixi tsachrje ndo Zacarías, stexraxaon nã sonda jitonchrjen en ndo ngaxin in ndo a ndo Dio.

²² Ko hora kuachrje ndo, í jua i nichja ndo. Ko xraxaon nã ixi xrojan nge e bikon ndo Zacarías ngaxin in ndo a ndo Dio. Ko je e ndo ixi je o itja ndo tjakoxin ndo nge e tjaun ndo ixi nosin ndo.

²³ Ko juexin xetja nchakon juinche e ndo Zacarías ixrã ngaxin in ndo a ndo Dio, sakjui ndo ndo e ndo.

²⁴ Ko tjume e jan Elisabet, janchri e ndo Zacarías, yaa jan chjan. Ko íkuachrjexin a jan ndo e jan na ó nchanitjao, ko jixraxaon jan:

²⁵ “Jaña ndo Dio kuajon ndo juachaxin ixi xrochónnda chjan ko ítsjanao ina nã jai.”

Ndo ángel chronga ndo ixi tsjongí e xjan Jesús

²⁶ Kuatsinga ikjaon nchanitjao ko ndo Dio xruan an ndo ndo ángel Gabriel itsji ndo naa tjainée tjanya Galilea ndatin in Nazaret

²⁷ *ixi nti a xronichje e ndo naa nchrichajan ndatin in María ko je e nchrichan xrachuxin a nchrichan nináa xi. Je e nchrichan tsjate e nchrichan tsute e nchrichan naa xi ndatin in José, kuachrjenixin xa ndo rey David.

²⁸ Ko ndo ángel me e kuixin in ndo ndo a jan María, ko ndachro ndo:

—Jan an jui i tjá anta juajna ixi ndo Dio ícha tjua anta ndo ko Ncháina Dio jii ngajinta, ícha juintanchaonnta ndo ixi ikaxin nchri!

²⁹ Ko xronka je e nchrichajan ko ikuienxin a nchrichan nge e juajna kuajon ndo ángel.

³⁰ Ko je e ndo ángel ndachro ndo:

—María, xrakon anta, ixi ndo Dio ícha tjua anta ndo.

³¹ *Ko jai tseyá naa chjan ngaya tseenta ko sinchejongí enta naa xjan xi ko sinchekin innta xjan Jesús.

³² Ko je e xjan tsango tsetuan an xjan, ko tsin in xjan chjen en ndo Dio jii ngajni. Ko je e Ncháina ndo Dio xrochjée xjan juachaxin tsetuan an xjan xranchi baketuan an ndotáchri e xjan xranchrjen, ndo David.

³³ Ko je e xjan tsetuan an xjan tjanya Israel kain nchakon ko ti tsetuan an xjan ítsjexin a.

³⁴ Ko jan María juanchangi e jan ndo ángel, ndachro jan:

—¿Xranchi tson en ji i, ixi jan an rikian i xi?

³⁵ Ko juatingíexin ndo ángel, ndachro ndo:

—Espiritue ndo Dio tsii ngajinta ko juachaxien ndo sinchekitsáanta ndo xranchi naa tsa on. Ko xjan tsjongí e xrochóna i xjan ijie, ko ndatsin in xjan chjen en ndo Dio.

³⁶ Ko kaxon jan kichuunta Elisabet yaa jan chjan maski ó nachrii jan. Ko jai, nchri bandachro na jua i xrochóna chjan, jai ó ikjaon nchanitjao yaa jan xjan.

³⁷ Méxin juachaxien ndo Dio, chao tson en kain nge e.

³⁸ Ko ndachro jan María:

—Jan an nta a xrée Ncháina Dio; méxin jan an tsitika on kain nge e kuetuanna ndo xranchi ja anta ndachronta.

Ko juexin nichja ndo ángel, sakjui ndo.

Jan María kuitsje e jan jan Elisabet

³⁹ Kaxon nchakon me e, jan María nteeto sakjui jan naa tjanya ngata a ijna nunte Judea.

⁴⁰ Ko kuiji jan tjanya nti a kuixin in jan ndo a ndo Zacarías ko jan Elisabet ko kuajon jan juajna ngajin jan Elisabet.

⁴¹ Hora kuin en jan Elisabet juajna, xjan yaa jan chrinka xjan ngaya tse e jan, ko je e jan Elisabet tsango kuayé e jan juachaxien Espiritue ndo Dio.

⁴² Ko tjume e jan Elisabet séen nichja jan ko ndachro jan:

—Ndo Dio juinchenchaoan ndo ícha ixi ikaxin nchri, ko kaxon juinchenchaoan ndo chjan an.

⁴³ ¿Ngisen jan an ixi jui a kuitsjena ja a, janée Ncháina?

⁴⁴ Ixi hora kuin an juajnaa, chrinka chjan na ngaya tse e ixi ché e xjan.

⁴⁵ Ijii juaxruxin chonda ixi kuitikaoan nge e tson en, xranchi ndachro ndo Dio.

⁴⁶ Ko tjume e jan María ndachro jan:

Aséenna tajon juasaya ngajin Ndotána Dio.

⁴⁷ Ko juaxruxin ritjén ixi ndo Dio kuantsjena ndo ijie.

⁴⁸ Ndo Dio xraxaon ndo sinche e ndo jian ngajin,

jan an naa nchri nóa nche e ixra ngajin ndo.

Ko jai tsaxi xrondachijina na ndo Dio juinchechaoan ndo.

⁴⁹ Ndo Dio chóna ndo kain juachaxin,

ko juinche e ndo ijii nge e ngajin

ixi je e ndo tsango tjúa ndo.

⁵⁰ Ko je e ndo kain nchakon tikonóe e ndo kain ni tajon juasie ngajin je e ndo.

⁵¹ Je e ndo soji ndo ixi juinche e ndo kain nge e

ko kuantsje e ndo juachaxin chóna kain ni nchejii aséen.

⁵² Ko kuantsje e ndo kain juachaxin chóna ni tetuan an

ko juinchejii ndo kain ni nóa ixi je e na xrochóna na juachaxin.

⁵³ Ko kuajon ndo kain nge e jian kuayé e ni chóna i

ko xro an nge e kuajon ndo ngajin ngisen kueya chóna.

⁵⁴ Je e ndo bingijna ndo ni tjanya Israel, ni nche e xrée ndo;

ko bikonóe e ndo na,

⁵⁵ ixi jaña ndache ndo sen tachrí e na xranchrjen, ndo Abraham ko kain ni tsachrjenixin ndo.

⁵⁶ Ko jan María kuitu e jan ndo a jan Elisabet ní nchanitjao, ko tjume e ikjan jan ndo a jan.

Jongí e ndo Juan Bautista

⁵⁷ Ko kuij nchakon sinchejongí e jan Elisabet chjen en jan, ko juinchejongí e jan naa xjan xi.

⁵⁸ Méxin, ni ste tjenka ndo a jan ko ni nchando a jan, ikjui na kuitsje e na jan ko kuintee na juaxruxin ngajin jan ixi kono e na ixi ndo Dio tsango bikonóe e ndo jan.

⁵⁹ Kuitja ijní nchakon, kuij na ixi tsayé e ichjan chji e ni judío, ko tjaun na xrokuin in xjan Zacarías xranchi tin in ndotée xjan.

⁶⁰ Ko ndachro janée xjan:

—Na i. Xrokonda tsin in xjan Juan.

⁶¹ Ko je e na juatingéxin na:

—¿Sonda tsin in xjan jaña? Xro an sen ndúya tin in na jaña.

⁶² Tjume e itja na juanchangéxin na ndotée xjan xranchi tjaun ndo tsin in xjan.

⁶³ Ko je e ndo juanchia ndo tu o ntáa ko ikjin ndo: “Je e xjan tsin in xjan Juan.” Ko kain ni ste nti a xronka na.

⁶⁴ Ko tuinxin íjngo kuaxi nichja ndo Zacarías, ko kuaxi kuajon ndo juasie ndo ngajin ndo Dio.

⁶⁵ Kain ni ste tjenka nchando a sen xronka na, ko kain tjajna ngata a ijna Judea kuin en na nge e kon en.

⁶⁶ Ko kain ni kuin en nge e kon en, xraxaon na ko ndachro na:

—¿Nge e ixra sinche e ichjan ña?

Ko nduaxin ndo Dio tsango jii ndo ngajin xjan.

Ndo Zacarías itsje ndo

⁶⁷ Ko ndotée xjan ndo Zacarías me e ícha kuayé e ndo juachaxien Espíritue ndo Dio ko nichja ndo chijnie ndo Dio ko ndachro ndo:

⁶⁸ Juasie Ndotáina Dio titikaon ni tjajna Israel

ixi je e ndo kuij ndo tsingijna ndo tjajnée ndo.

⁶⁹ Ko je e ndo xruan an ndo ngisen ícha soji tsingijna tsachrjengéxin ijie chóna chujni,

naa sen kuachrjenixin ndo David, ngisen juinche e ixra ngajin ndo Dio.

⁷⁰ Jaña nichja ndo Dio nichjaxin ndo sen chronga chijnie ndo Dio ó sa ó

⁷¹ ndache ndo sen ixi tsingijna ndo tsantsje e ndo juachaxin kain ni ningakojna.

⁷² Ko tsikonóe e ndo sen tachrí ina kuintee sa ó,

ko xraxaon ndo ti juao ndo sen tjajnée ndo ó sa ó.

⁷³ Ko ji i tsindache ndo Dio ndo tachrí ina xranchrjen, ndo Abraham

⁷⁴ ixi tsingijnana ndo ixi tsitua i xi ningakojna,

ko chao sinche ena ixra ngajin ndo Dio ko xroxrakon ana,

⁷⁵ ixi ícha tjúa tsake e aséejna ko jian tsitikaonna chijnie ndo Dio,

ko tsojuna ngajin ndo Dio kain nchakon.

⁷⁶ Ko ja a, chjan na, ja a xrokjan naa ngisen xronichja chijnie ndo Dio jii noi,

ko ja a sa ó tsitaon en Ncháina,*

ko ja a sinchenataonxian chaoé ndo,

⁷⁷ ixi tsono e ni tjajnée ndo ixi sinchemé e ndo kain ijie chóna na

ko tsajon ndo juachaxin tsitjáña i na.

⁷⁸ Ixi je e Ndotáina Dio tsango tjaunna ndo ko tsango tikonóa ina ndo,

ko je e ndo tsajon ndo xro i tsingasáñajna kain nchakon,

⁷⁹ ko tsajon ndo xro i tsingasáñaxin kain ni jii ti tsango naxixe e.

Ko je e ndo tsake e ndo tutéjna ngata a cha o tajon juaxruxin.

⁸⁰ Ko je e xjan bangí xjan ko konsoji aséen xjan. Ko bake e xjan ngataon ijngi ti xro an ngisen ste, xetjaja nchakon konoxin xjan ngajin ni tjajna Israel.

2

Jongí e xjan Jesús

(Mt. 1:18-25)

¹ Nchakon me e bake e naa xi ícha baketuan an ko bakin in xa Augusto César, ko je e xa kuetuan an xa ixi tsixintaxin kain na ixi tsono e xa ngijan in chujni chóna kain tjajna.

² Méxin, ti sa ó kuixintaxin chujni xi Cirenio baketuan an xa nunte Siria.

* 1:76 Ncháina Señor Ncháina Jesús o Ncháina Dio

³ Ko kuetuen en nã kain nã satsji nã tjanya tikinixin en nã ixi nti a tsixintaxin nã.

⁴ Méxin, ndo José kuachrjexin ndo tjanya Nazaret tikinixin en Galilea, ko sakjui ndo tjanya Belén nunte Judea ti tsijongíexin ndo David, ixi ndo José kuachrjenixin ndo ndo tachrí e ndo xranchrjen, ndo David.

⁵ Méxin sakjui ndo José tjanya Belén, je e ndo ko janchri e ndo jan María. Ko je e jan María ó yaa jan ichjan.

⁶ Ko nchakon jii sen tjanya Belén, kuitja nchakon tsjongí e chjen en jan María.

⁷ Ko nti a kuixin in sen naa nchia ti tejua iko ixi kuitja i sen nchia no tsitu e sen. Méxin, nti a jongíexin chjen en jan María, xjan sa ó, ko je e jan kuintsía jan xjan manta ko bãkë e jan xjan ngaya ti nexin iko.

Sen ángel ko ni stendáa kutuchjon

⁸ Tiie me e tjenka tjanya Belén kaxin nã stendáa nã kutuchjoen nã ngataon ijngi.

⁹ Me e tuinxin konoxin naa ndo ángel xruan an ndo Dio, ko bika o ndo chjiixrué ndo Dio juinchengasáña nguixin ngandajin nã; ko je e nã tsango xronka nã.

¹⁰ Ko je e ndo ángel ndache ndo nã:

—Xrakon anta ixi jan an bikian juajna jian, méxin, xrochondanta juaxruxin ko kain ni tjanya kaxon.

¹¹ Tjajnée ndo David jai jongíexin naa chjan, xjan me e sinchemé e xjan kain ijje chónda chujni, ko je e xjan Ncháina Cristo.

¹² Itjinta tjanya, nti a tsinchíainta xjan jitsjía xjan manta ko jii xjan ti no nexin iko.

¹³ Xrajíi ndo ángel, tuinxin konoxin ícha kueya sen ángel kuixin sen ngajní,* ko itsje sen ko kuajon sen juasaya ngajin ndo Dio jii ngajní, ko ndachro sen:

¹⁴ Juasie ndo Dio jii ngajní ixi tsango chónda ndo juachaxin!

Ko juaxruxin tsintee kain ni ste ngata a nunte, kain ni titikaon ndo.

¹⁵ Ko tjume e kain sen ángel sakjui sen ngajní, ko ni stetsje e kutuchjoen ndache kichuu nã:

—Ichjina tjanya Belén, tsitsje ena nge e kon en nti a xranchi ndachro ndo ángel xruan an ndo Dio.

¹⁶ Ko nteeto sakjui nã bikitsje e nã jan María ko ndo José, ko ichjan jii xjan ti tejua iko.

¹⁷ Hora bikon nã xjan, beki nã kain ti ndachro ndo ángel kondée je e xjan

¹⁸ ko tsango xronka kain chujni kuin en ti ndachro nã.

¹⁹ Ko je e jan María jixraxaon jan ngaya aséen jan kain nge e kon en.

²⁰ Ni stetsje e kutuchjoen ikjan nã ti kuintu e nã kuée nã, ko kuajon nã juasaya ngajin ndo Dio ixi kain nge e kuin en nã ko bikon nã, kain nge e kon en xranchi ndachro ndo ángel.

Ndotée xjan Jesús bikao sen xjan tjanya Jerusalén

²¹ *Nchakon kuitja xjan Jesús ijní nchakon, chjée sen xjan chji e ni tjajnée xjan ko juinchekin in sen xjan Jesús, xranchi kuetuan an ndo ángel ngajin jan María nchakon xrayá i jan xjan.

²² Kuitja nchakon chao jii jan María xranchi tsiketuan an ley tsikjin ndo Moisés, ko tjume e je e jan ko ndo José sabikao sen xjan tjanya Jerusalén ixi ndo Dio sinchenchaon† ndo xjan.

²³ Ko jaña juinche e sen xranchi jitaxin xroon kuituan an ndo Dio: “Kain xjan xi, xjan kóña sa ó, tikinixin en xjan ndo Dio.”

²⁴ Méxin, jan María ko ndo José sakjui sen ndo a ndo Dio ixi bikao sen iko tsen en nti a xranchi jitaxin xroon tsituan an ndo Dio tson en, méxin xrokuajon sen yuu kuntúá najni o yuu kuxenta.

²⁵ Nchakon me e tjanya Jerusalén bake e naa ndo tachríi ndatin in Simeón. Je e ndo tsango jian ndo, ko bakajon ndo juasaya ngajin ndo Dio, ko chón en ndo xroxruan an ndo Dio ngisen tsingjina tjanya Israel. Méxin Espíritue ndo Dio jii ngajin ndo Simeón

²⁶ ko Espíritue ndo Dio juincheno e ndo Simeón ixi xratsen a ndo tsikonja ndo ndo Cristo, ndo xroxruan an ndo Dio.

²⁷ Ko tjume e Espíritue ndo Dio juinhexraxaon ndo Simeón xrokjui ndo ndo a ndo Dio. Ko nchakon me e kuíi jan María ko ndo José bikao sen xjan Jesús ngaxin in ndo a ndo Dio ixi kuitikaon sen xranchi tsiketuan an ley.

²⁸ Ko tjume e ndo Simeón joa ndo xjan Jesús ko kuajon ndo juasaya ngajin ndo Dio ko ndachro ndo:

²⁹ Jai, Ncháina, ó kuitja ti ndachronta.

Jai chao tájonnta juachaxin juaxruxin tsen en nã,

³⁰ ixi ó bikon ngisen kuíi tsantsje kain ijje chondana,

* 2:13 ngajní cielo 2:21 Lc. 1:31. † 2:22 sinchenchaon bendecir

³¹ ko ja anta tsixruan annta xjan
ko kain tjanya tsichuxin na xjan.

³² Je e xjan xro i tsingasaña ngajin kain tjanya, ni je a tjanya Israel,
ko tsajon na juasaya ngajin tjanánta Israel ixi nti a konoxin xjan Jesús.

³³ Ko ndo José ko jan María, janée xjan Jesús, xronka sen ixi jaña ndachro ndo Simeón
xranchi sinche e xjan Jesús.

³⁴ Ko tjume e ndo Simeón juinchenchaon ndo sen ko nichje e ndo jan María, janée xjan
ko ndachro ndo:

—Chjan an me e tsika o itsjé nge e tangi tsikonni. Méxin, kueya ni tjanya Israel, kaxin na
tsitikaon a na ko ikaxin na tsitikaon na chijnie xjan ko jian tsake e na.

³⁵ Ko jaña tsonoxin xranchi xraxaon ngujngu aséen na. Ko kain nge e tson en sintani a
xranchi naa chika yao tsatsingatu u asáan ja a, María.

³⁶ Ko kaxon nti a bake e naa janachri profeta, nichja jan chijnie ndo Dio ko ndatin in jan
Ana. Ndotée jan bakin in ndo Fanuel, ko je e ndo, ndo tachri e ndo xranchrjen, ndo Aser.
Je e jan Ana ó tsango nachrii jan, ko xranchríhajan jan tsikute e jan ko bekao jan ndoxi e
jan je o yaato nano.

³⁷ Ko jai ó ka an jan ko noókán ko noó nano chónða jan. Ko tachrxexin a jan ni ngo ndo a
ndo Dio; ko ndi ao bake e jan tiie ko nchakon bakajon jan juasaya ngajin ndo Dio; ko kaxin
nchakon bajine a jan ixi nichje e jan ndo Dio.

³⁸ Ko nchakon me e jan Ana konchjiñe e jan ko juangíxin jan kuajon jan juasie jan ngajin
ndo Dio, ko kuaxi jan nichja jan ixi xjan Jesús, nichje e jan kain ni stechón en nchakon
xroxruan an ndo Dio ngisen tsingijina ni tjanya Jerusalén.

Ndotée xjan Jesús kjanka o sen xjan tjanya Nazaret

³⁹ *Nchakon juexin juinche e jan María ko ndo José kain nge e ndachro chijnie ndo Dio,
ikjan sen tjanée sen Nazaret, nunte Galilea.

⁴⁰ Ko xjan Jesús ícha bangi xjan, ko ícha konsoji xjan, ko ícha no e xjan jian kain nge e ixi
ndo Dio bakajon ndo juachaxin ngajin xjan.

Kuitja sen xjan Jesús ngaxin in ni ngo

⁴¹ Ndo José ko jan María, janée xjan Jesús, bakji sen tjanya Jerusalén kain nano ixi tsake e
sen nti a ti kia pascua.

⁴² Ko nchakon kuitja xjan Jesús teyuu nano, je e sen ko je e xjan sakjui sen tjanya Jerusalén
xranchi kuituen en sen ixi kia pascua.

⁴³ Nchakon juexin kia pascua, kua sen cha o itji tjanée sen. Ko xjan Jesús tsikitu e xjan
nti a tjanya Jerusalén, ko ndo José ko jan María, janée xjan, konoe a sen tsikitu e xjan.

⁴⁴ Je e sen xraxaon sen ixi xjan Jesús jitji xjan ngakjen en sen kaxin, ko sakjui sen nchijí
naa nchakon. Ko tjume e juée sen xjan ngajin ni kichuu sen ko ni chúxin sen.

⁴⁵ Ko kuitja i sen xjan, méxin ikjan sen tjanya Jerusalén ko juée sen xjan nti a.

⁴⁶ Ko nchakon ninxin kuitja sen xjan ngaxin in ni ngo ndo a ndo Dio. Nti a jii xjan nunte
ngusine kain sen tjako chijnie ndo Dio ko jitin en xjan ti ndachro sen, ko jitjanchiangí e
xjan sen.

⁴⁷ Ko kain chujni jitin en ti ndachro xjan, xronka na ixi tsango jian no e xjan ko jian tjate e
xjan kain nge e tjanchangí e sen xjan.

⁴⁸ Ko xronka ndo José ko janée xjan hora bikon sen ti jii xjan ngusine sen no e. Ko janée
xjan ndachro jan:

—Chjan na, ¿sonda jaña juinche e? Ndotáa ko jan an yaana juachjaon chrjitéena ja a.

⁴⁹ Ko juatingíexin xjan Jesús:

—¿Sonda tjééninta? ¿Á noa inta ixi jan an xrokonda sinta a xrée Ndotána?

⁵⁰ Ko je e sen kuienxin a sen nge e ndachro xjan.

⁵¹ Ko tjume e sabikao sen xjan Jesús tjanée sen, tjanya Nazaret, ko xjan Jesús baktikaon
xjan sen. Ko jan María, janée xjan, gaya aséen jan xraxaon jan kain nge e kon en.

⁵² Ko ícha bangi xjan ko ícha kono e xjan, ko ijié juachaxin kuajon ndo Dio ngajin xjan, ko
kain na tsango tjue e na xjan.

3

Ndo Juan bake e ndo ngata a jna

(Mt. 3:1-12; Mr. 1:1-8; Jn. 1:19-28)

¹ Ó chónða tena ó nano baketuan an xi Tiberio César, ko xi Poncio Pilato baketuan an xa
nunte Judea, ko xi Herodes baketuan an xa nunte Galilea, ko xi kichuu xi Herodes ndatin in

Felipe baketuan an xa nunte Iturea ko nunte Traconite, ko xi Lisantias baketuan an xa nunte Abilinia.

² Ko xi Anás ko xi Caifás xitaana ícha tetuan an. Nchakon me e ndo Dio, nichje e ndo ndo Juan, chjen en ndo Zacarías, xjan bake e ntajje.

³ Ko ndo Juan ikjui ndo kain tjanja ngande e inda jitinga ndatin in Jordán ko ndache ndo kain nã ixi xrokonda tsintu e nã ti ndako a nche e nã ko tsikitée nã ixi ndo Dio jaña sinchemé e ndo kain ijje chónda nã.

⁴ Jaña jitaxin xroon tsikjin ndo profeta Isaías ndachro:

Naa tée sen nichja ntajje tuyako ko ndachro:

“Nchekonchjiantta cha o tsaji Ncháina, tantje enta naa cha o nao itji.

⁵ Ko kain tsaaka tsingachjian inche, ko kain jnã ko kain ngande e jnã, jian tsonataunxin; ko kain cha o nango itji, xroxendue e cha o ko kain cha o nataonxin a, tsonataunxin cha o.

⁶ Méxin, kain ni ste ngata a nunte nti i tsono e nã ngisen xruan an ndo Dio, tsantsje ndo ijje chónda chujni.”

⁷ *Nchakon me e kueya nã bakonchjiñe e nã ixi ndo Juan tsikitée ndo nã, ko je e ndo ndache ndo nã:

—Jja anta tsikachrjenixinnta kunchee! ¿Ngisen ntatjunta satsinge enta juañaue ndo Dio ti ó tuinxin tsji?

⁸ *Xrokonda tsindoxinnta ti ndako a nche enta ko jian titikaonnta ti tetuan an ndo Dio. Ko Ndachro anta: “Jan anna ícha jianna ixi kuachrjenixinnta ndo Abraham.” Ko jan an nduaxin ntatjunta ixi ndo Dio chao sinchéña ndo ixro ji i xrokjan xjantié ndo Abraham.

⁹ *Méxin, ó jichón en chikajacha xrochrjixinnta, nue e ntaã xrochrjixinnta. Méxin kain ntaã tajon a itu cháña tsjánka nã ntaã ko tsaa ntaã xro i.

¹⁰ Ko tjume e juanchangi e nã ndo Juan ko ndachro nã:

—¿Nge e xrokonda sinta ana?

¹¹ Ko juatingéxin ndo Juan ko ndachro ndo:

—Ngisen chónda yuu manta xrochjée sen naa manta ni xro an nge e chónda. Ko ngisen chónda nge e sine xrochjée sen ni chónda i.

¹² *Ko konchjiñe e kaxin ni xenge e i nã tomi tjanchia xi tetuan an ko kaxon tjaun nã tsikitée nã, méxin, juanchangi e nã ndo Juan:

—Maestro, ¿nge e xrokonda sinta ana jan anna?

¹³ Ko je e ndo ndachro ndo:

—Je o tjanchianta ti nduaxin sínká nã.

¹⁴ Ko kaxon kaxin xisoldado juanchangi e xa ndo Juan:

—Kaxon jan anna, ¿nge e sinta ana?

Ko je e ndo juatingéxin ndo:

—Tantsje anta chujni nge e chónda nã, ko nchexronka inta nã ixi nge e juinche a nã, ko take énta juaxruxin ixi je o tomi tjachanta.

¹⁵ Kain ni ste nti a tjao nã ixi je e ndo Juan á ndo Cristo ndo.

¹⁶ Ko ndo Juan ndache ndo kain nã:

—Jan an nduaxin ntatjunta ixi jan an tikitéxinnta inda, ko tsji naa ngisen tsikitéxinnta ndo ixi Espíritue ndo Dio ko xro i. Ko je e ndo ícha ijje juachaxin chónda ndo ixi juachaxin chonda jan an. Jan an tikinixinna i tsoxindanga a tjuée katée ndo.

¹⁷ Ko je e ndo ó bika o ndo naa kachrintu ixi tsjenduaxin ndo noatrigo ixi tsachrjekje en xineno. Tsjatsi in ndo kain noatrigo ti tikinixin tsji in no, ko kain xineno tsjánka ndo ti xro i jua i tsanga.

¹⁸ Jaña ndachro ndo Juan ko ndache ndo nã ikaxin nge e ko chronga ndo chijni jian.

¹⁹ *Ko kaxon kuyakutee ndo Juan xi Herodes, xi tetuan an, ixi jikao xa nchri Herodías, nchrinchri e xikichuu xa, xi ndatin in Felipe, ko kaxon ndo Juan koñaõ ndo ngajin xi Herodes ixi ícha nge e ndako a juinche e xa.

²⁰ Ko xi Herodes kuitikaon a xa, ko ícha chinga juinche e xa ko kaxon bije e xa ndo Juan ndo achjiso.

Bikitée ndo Jesús

(Mt. 3:13-17; Mr. 1:9-11)

²¹ Ko nchakon xrajitikitée ndo Juan kueya nã, kaxon kuji ndo Jesús bikitée ndo. Ko hora jinichja ndo Jesús ngajin ndo Dio xitje e ngajni

²² *ko Espíritue ndo Dio xingajin xranchi naa kuntuá ko bake e ba ngata a jaa ndo Jesús ko kuin enni nichja naa ngisen jii ngajni ndachro:

—Ja a chjan na ko tsango tjua a.* Ko jan an ritjén juaxrxin ngajian.

Kain ndotáchri e xranchrjen ndo Jesús

(Mt. 1:1-17)

²³ Ndo Jesús kuachóna ndo xranchi ikánte nano nchakon ti juangixin ndo xrée ndo.

Ko kain na xraxaon na ixi je e ndo Jesús chjen en ndo José.

Ko ndo José chjen en ndo Elí,

²⁴ ko ndo Elí chjen en ndo Matat,

ko ndo Matat chjen en ndo Leví,

ko ndo Leví chjen en ndo Melqui,

ko ndo Melqui chjen en ndo Jana,

ko ndo Jana chjen en ndo José.

²⁵ Ko ndo José chjen en ndo Matatías,

ko ndo Matatías chjen en ndo Amós,

ko ndo Amós chjen en ndo Nahum,

ko ndo Nahum chjen en ndo Esli,

ko ndo Esli chjen en ndo Nagai,

²⁶ ko ndo Nagai chjen en ndo Maat,

ko ndo Maat chjen en ndo Matatías,

ko ndo Matatías chjen en ndo Semei,

ko ndo Semei chjen en ndo José,

ko ndo José chjen en ndo Judá.

²⁷ Ko ndo Judá chjen en ndo Juana,

ko ndo Juana chjen en ndo Resa,

ko ndo Resa chjen en ndo Zorobabel,

ko ndo Zorobabel chjen en ndo Salatiel,

ko ndo Salatiel chjen en ndo Neri.

²⁸ Ko ndo Neri chjen en ndo Melqui,

ko ndo Melqui chjen en ndo Adi,

ko ndo Adi chjen en ndo Cosam,

ko ndo Cosam chjen en ndo Elmodam,

ko ndo Elmodam chjen en ndo Er.

²⁹ Ko ndo Er chjen en ndo Josué,

ko ndo Josué chjen en ndo Eliezer,

ko ndo Eliezer chjen en ndo Jorim,

ko ndo Jorim chjen en ndo Matat.

³⁰ Ndo Matat chjen en ndo Leví,

ko ndo Leví chjen en ndo Simeón,

ko ndo Simeón chjen en ndo Judá,

ko ndo Judá chjen en ndo José,

ko ndo José chjen en ndo Jonán,

ko ndo Jonán chjen en ndo Eliaquim.

³¹ Ndo Eliaquim chjen en ndo Melea,

ko ndo Melea chjen en ndo Mainán,

ko ndo Mainán chjen en ndo Matata,

ko ndo Matata chjen en ndo Natán.

³² Ndo Natán chjen en ndo David,

ko ndo David chjen en ndo Isaí,

ko ndo Isaí chjen en ndo Obed,

ko ndo Obed chjen en ndo Booz,

ko ndo Booz chjen en ndo Salmón,

ko ndo Salmón chjen en ndo Naasón.

³³ Ndo Naasón chjen en ndo Aminadab,

ko ndo Aminadab chjen en ndo Aram,

ko ndo Aram chjen en ndo Esrom,

ko ndo Esrom chjen en ndo Fares,

ko ndo Fares chjen en ndo Judá.

³⁴ Ko ndo Judá chjen en ndo Jacob,

ko ndo Jacob chjen en ndo Isaac,
 ko ndo Isaac chjen en ndo Abraham,
 ko ndo Abraham chjen en ndo Taré,
 ko ndo Taré chjen en ndo Nacor.
³⁵ Ndo Nacor chjen en ndo Serug,
 ko ndo Serug chjen en ndo Ragao,
 ko ndo Ragao chjen en ndo Peleg,
 ko ndotée ndo Peleg me e ndo Heber,
 ko ndo Heber chjen en ndo Sala.
³⁶ Ndo Sala chjen en ndo Cainán,
 ko ndo Cainán chjen en ndo Arfaxad,
 ko ndo Arfaxad chjen en ndo Sem,
 ko ndo Sem chjen en ndo Noé,
 ko ndo Noé chjen en ndo Lamec.
³⁷ Ndo Lamec chjen en ndo Matusalén,
 ko ndo Matusalén chjen en ndo Enoc,
 ko ndo Enoc chjen en ndo Jared,
 ko ndo Jared chjen en ndo Mahalaleel,
 ko ndo Mahalaleel chjen en ndo Cainán.
³⁸ Ndo Cainán chjen en ndo Enós,
 ko ndo Enós chjen en ndo Set,
 ko ndo Set chjen en ndo Adán,
 ko ndo Adán chjen en ndo Dio.

4

Xixron anxrée tjaun xa xrojuincheye e xa ndo Jesús
 (Mt. 4:1-11; Mr. 1:12-13)

¹ Ndo Jesús tsango chóna ndo juachaxien Espíritue ndo Dio, ko tjume e kjanxin ndo ti jii inda jitinga ndatin in Jordán. Ko Espíritue ndo Dio bikao ndo ntajie.

² Nti a bake e ndo yuu ikán nchakon, ko kain nchakon me e juine a ndo, ko tjume e kuen en ndo jinta ko Xixron anxrée tjaun xa xrojuincheye e xa ndo.

³ Ko je e Xixron anxrée ndache xa ndo Jesús:

—Siá nduaxin ja a chjen en ndo Dio, ndache ixro ji i xrokjan ixro nutja.

⁴ Ko juatingéxin ndo Jesús ko ndachro ndo:

—Ndachro xroon jitaxin chijnie ndo Dio: “Je a je o nutja tsechónxin chujni. Kaxon ixi chijnie ndo Dio tsechónxin na.”

⁵ Ko tjume e Xixron anxrée bikao xa ndo Jesús ngata a naa ijná ícha nui ko juako e xa ndo kain tjajna jii ngata a nunte.

⁶ Ko ndachro Xixron anxrée:

—Jan an xrotjá a juachaxin ko kain ti tjintee chóna kain tjajna ixi jan an kuayá a kain ji i, ko chao xrotjá a kain ji i ngajin ngisen jan an tja on.

⁷ Méxin siá ja a tsake exian ntatuchi ian ko xrochjana juasaya, kain ji i tsaye é.

⁸ Ko juatingéxin ndo Jesús ko ndachro ndo:

—Tingaxintuan satjia, Xixron anxrée ja a. Ndachro chijnie ndo Dio: “Tsájuan juasaya ngajin Ncháa ndo Dio, ko je o ngajin je e ndo sinche é ixra.”

⁹ Ko tjume e Xixron anxrée bikao xa ndo Jesús tjajna Jerusalén, ko juinçekajin in xa ndo ti ícha nui ngata a ni ngo ko ndachro xa:

—Siá nduaxin ja a chjen en ndo Dio, chrinka ti nunte;

¹⁰ ixi ndachro chijnie ndo Dio:

Ndo Dio tsetuen en ndo sen ángel ixi xrotsengia sen,

¹¹ ko ngaya itja sen tsake e, ixi tsontengéxin a tutáa ixro.

¹² Ko ndo Jesús juatingéxin ndo ndachro ndo:

—Kaxon ndachro chijnie ndo Dio: “Tsaké a naa nge e ixi tsikuan á chao sinche e ndo.”

¹³ Ko Xixron anxrée jua i juincheye e xa ndo Jesús, ko je e xa sajuixin xa ti ndo Jesús kaxin nchakon.

Juangéxin Ndo Jesús juinçekuen en ndo chujni nunte Galilea
 (Mt. 4:12-17; Mr. 1:14-15)

¹⁴ Ko tjume e Ndo Jesús ikjan ndo nunte Galilea ko tsango chóna ndo juachaxien Espíritue ndo Dio. Ko kain ni nti a teki na kain ti juinche e ndo Jesús.

¹⁵ Ko je e ndo juincheckuen en ndo chujni chijnie ndo Dio ngaxin in ni ngo ste kain tjanya nti a, ko kain na kuajon na juasaya* ngajin ndo.

*Ndo Jesús bake e ndo tjanya Nazaret
(Mt. 13:53-58; Mr. 6:1-6)*

¹⁶ Ko tjume e ndo Jesús sakjui ndo tjanya Nazaret, ti no bangixin ndo. Ko nchakon sábadó tjoké e na, kuixin in ndo ningue ni israelita ixi jaña kuanche e ndo. Ko bingatjen ndo Jesús ixi sincheckuanxin ndo ti jitaxin xroon chijnie ndo Dio.

¹⁷ Ko chjée na ndo xroon tsikjin ndo kuanichjatin chijnie ndo Dio ó sa ó, ndo Isaías. Ko je e ndo kuantje e ndo xroon ko juée ndo ti jitaxin ja in:

¹⁸ Espíritue ndo Dio jii ngata ana,
ko kuayá a juachaxin xronichja chijnie ndo tsayé e ni nóa.

Xruan ana ndo ixi sintaxruan an ni tangi ste,

ko tsantsje jíee ni steje e,

ko sintaxruan an ni tikon a;

ko tsingijna ni stechrúa,

¹⁹ ko xrontatjan na ixi kuji nchakon tsingijna na ndo Dio ko tsantsje ndo ijié chóna na.

²⁰ Ko tjume e ndo Jesús bije e ndo xroon, ko kuajon ndo xroon ngajin xi jinche e ixra ni ngo, ko je e ndo bake e ndo nunte. Ko kain ni ste nti a jian stetsje e na ndo.

²¹ Ko kuaxi nichja ndo:

—Jai kuitja nchakon ndachro chijnie ndo Dio, chijni kuin ennta.

²² Ko kain na stetjao kichuu na kondee xranchi jian jinichja ndo, ko xraxaon na tsango chaxro ti nge e nichja ndo. Ko juanchangi e kichuu na:

—¿Á je a xi ji i chjen en ndo José?

²³ Ko ndo Jesús ndache ndo na:

—Nduaxin xrondachijintana chijni ji i: “Ja a xi nchexruan, ja ua toxruan an.” Ko kaxon xrondachijintana: “Ti kuin ana juinche e tjanya Capernaum, jaña nche e kaxon nti i tjanya.”

²⁴*Ko xrajnichja ndo, ko ndachro ndo:

—Nduaxin xrontatjunta xro an sen profeta nichja chijnie ndo Dio, tsitikaon na ndo ni tjanyaé ndo.

²⁵ Ko jan an nduaxin ntatjunta ixi bake e itsjé nchri ka an nunte Israel nchakon bake e ndo profeta Elías, naa ndo kuanichja chijnie ndo Dio ó sa ó, nchakon me e kui a ichrin ní nano kutu o ko tsango bake e jinta nchiji tjanya nti a.

²⁶ Ko ndo Dio xruan i ndo ndo Elías xrokuitsje e ndo ngxie i nchri ka an tjanya Israel. Na i. Xruan an ndo ndo Elías itsji ndo ngajin naa nchri ka an bake e tjanya Sarepta, tjenja tjanya Sidón ixi tsingijna ndo nchra.

²⁷ Kaxon nunte Israel kuintee kueya chujni níexin ichin lepra nchakon bake e ndo profeta Eliseo, ko xruan i ndo Dio ndo Eliseo ngisen xrokuitsje e ndo ngxie i chujni níexin ichin lepra nti a. Je o ndo Naamán kuixin tjanya Siria, me e ndo koxruen en.

²⁸ Ko kain ni ste ngaxin in ni ngo kuin en na jaña, ko tsango koñaó na.

²⁹ Bingatjen na ko kuantsjexin na ndo Jesús nti a, ko bikao na ndo ngande e tjanya ngata a ti ijna ícha nui ixi tjaun na xrojuinchengandatjen na ndo ijna me e.

³⁰ Ko je e ndo Jesús kuatsinga ndo ngakjen en na ko sakjui ndo.

*Naa xi bachóna xa espíritue Xixron anxrée
(Mr. 1:21-28)*

³¹ Ko tjume e ndo Jesús sakjui ndo tjanya Capernaum, naa tjanya tkinixin en tjanya Galilea ko kain sábadó nchakon tjoké e na nchekuen en ndo ni ste nti a.

³²*Ko ni stetin en juinche e na juaxruxin xranchi kuancheckuen en ndo na ixi chijnie ndo chóna ijié juachaxin.

³³ Ko ngaxin in ni ngo nti a jii naa xi chóna espíritue Xixron anxrée ko séen kuyako xa ko ndachro xa:

³⁴ —Tintunana, Jesús tjanya Nazaret. ¿Á jui ia ixi sinchetjáña? Jan an chuxian ixi ja a naa ngisen ícha tjuá xruan an ndo Dio.

³⁵ Tjume e ndo Jesús kuyakutee ndo espíritue Xixron anxrée, ko ndachro ndo:

—jTenkua, ko tachrxexian xi ña!

Tjume e je e espíritue Xixron anxrée juanka xi me e nunte ngatoxin ikon kain ni ste nti a. Ko tjume e kuachrje espíritue Xixron anxrée ko juinchenie a xa xi me e.

³⁶ Kainko na xronka na, ko ndache kichuu na:

* 4:15 juasaya respeto, honor 4:24 Jn. 4:44. 4:32 Mt. 7:28, 29.

—¿Nge e chijni jian nichja ndo Jesús? Ixi je e ndo chónda ndo ijié juachaxin ko tetuen en ndo espíritue Xixron anxrée ko titikaon, tachrje ko satji espíritu.

³⁷ Ko kain tjajna nti a binga chijni xranchi nchexruen en ndo Jesús kain nã ko xranchi nichja ndo.

Ndo Jesús juinchexruen en ndo jachée ndo Simón Pedro

(Mt. 8:14-15; Mr. 1:29-31)

³⁸ Tjume e ndo Jesús kuachrjexin ndo ni ngo ko sakjui ndo ndo a ndo Simón Pedro. Ko jachée ndo Pedro tsango niéxin jan súa. Méxin, kuinóatée sen ngajin ndo Jesús ixi sinchexrjuen en ndo jan.

³⁹ Ko ndo Jesús kuisée ndo ti jitsinga jan, ko kuyakutee ndo súa ko je e súa kuachrje súa. Ko tuinxin bingatjen jan ko kuajon jan juine sen.

Ndo Jesús juinchexruen en ndo kueya ni ni e

(Mt. 8:16-17; Mr. 1:32-34)

⁴⁰ Ko kuitaon nchakon, kain ni chónda ni ni e, niéxin nã ngixe i ichin, bikao nã nã ti jii ndo Jesús; ko je e ndo bake e ndo itja ndo ngata a ngujngu nã, ko koxruen en kain nã.

⁴¹ Ko itsjé ni ni e kuantsjexin ndo espíritue Xixron anxrée ko hora tachrje espíritu tuyako ko ndachro:

—Ja a chjen en ndo Dio.

Ko ndo Jesús kuyakutee ndo espíritue Xixron anxrée ko kuintue a ndo xronichja xa ixi je e xa no e xa ixi je e ndo Jesús, ndo Cristo.

Ndo Jesús juinchekuen en ndo ni ste nunte Galilea

(Mr. 1:35-39)

⁴² Ko ó bingasáña je e ndo Jesús kuachrjexin ndo tjajna me e, ko sakjui ndo nunte xro an chujni ste. Ko je e nã juée nã ndo ko ikjui nã ti no jii ndo. Ko tingakon en nã ndo ixi tjaun a nã satsji ndo inaa tjajna.

⁴³ A je e ndo Jesús ndachro ndo:

—Jan an xrokonda itsji ikaxin tjajna ixi xrontatjan nã xranchi tsayé e nã ti tetuan an ndo Dio ixi me e juixin jan an.

⁴⁴ Ko jaña kuaji ndo Jesús kain ni ngo tikinxin en nunte Galilea ko ndache ndo nã chijnie ndo Dio.

5

Kueya kuchee itsé sen

(Mt. 4:18-22; Mr. 1:16-20)

¹ *Naa nchakon ndo Jesús jii ndo ngande e ndalago ndatin in Genesaret ko kueya nã kuixintja kichuu nã ixi tjaun nã tsin en nã chijnie ndo Dio.

² Ko bikon ndo jii ngande e inda yuu ntábarco tsikintu e ni itsé kuchee ko je e nã stenéma nã nocha a tséxin nã ba.

³ Ko je e ndo bajin in ndo naa ntábarcoe naa xi ndatin in Simón, ko ndo Jesús ndache ndo xa ixi tsoncheka xa ntãá ícha ngusine inda. Ko bake e ndo nunte ngata a ntábarco ko kuaxi ndo juinchekuen en ndo kain ni ste nti a.

⁴ Ko juexin juinchekuen en ndo nã, tjume e ndache ndo xi Simón:

—Tiku a ntábarco ti ícha yaso e inda, ko tjankanta nocha a chringi inda ixi xrotsénta kuchee.

⁵ *Ko ndo Simón juatingíexin ndo:

—Maestro, nguixin tiie stenta ana ixrã ko xro an kuchee itséna. Ko síá ja anta ndachronta, jaña sinta ana.

⁶ *Ko je e sen kuitikaon sen nge e ichro ndo Jesús. Ko tsango kueya kuchee bingachjian nocha a ko jítaxin jichrindaon no.

⁷ Ko tjakaxin kichuu sen steyá inaa ntábarco ixi tsonchjiñe e sen tsingijna kichuu sen. Ko kuji sen ko juinchekaon sen yui ntábarco ko je e ntãá kuchjen en ntãá ko ó xrojamangi ntãá ixi kueya kuama ntãá.

⁸ Ko bikon ndo Simón Pedro nge e kon en, bake exin ndo ntatuchi in ndo ko ndachro ndo: —Tingaxintuan, Nchána Jesús, ixi jan an tjúá i aséenna.

⁹ Méxin, ndo Simón ko sen ste ngajin ndo xronka sen ixi kueya kuchee itsé sen.

¹⁰ Kaxon xronka ndo Jacobo ko ndo Juan, chjen en ndo Zebedeo, sen me e tingijna ndo Simón nche e sen ixrã. Ko ndo Jesús ndachro ndo:

—Xronka ia, sa ó kuatse kuchee ko jai tsaxia xronichje e chujni kondeena jan an.

¹¹ Ko bikao sen ntábarco ngande e inda. Ko kuintu e sen ntáa ko kain nge e kuachónnda sen ko sakjui sen rué e sen ndo Jesús.

*Ndo Jesús juinchexruen en ndo naa xi níexin ichin lepra
(Mt. 8:1-4; Mr. 1:40-45)*

¹² Naa nchakon bake e ndo Jesús naa tjanya, kuji naa xi níexin xa ichin lepra. Ko bikon xa ndo Jesús, méxin, konchjiñe e xa ko bake exin ntatuchi in xa ko kuiséya xa ngata a nunte ko kuinóatée xa ko ndachro xa:

—Ja anta nchexruannanta siá jaña tjaunnta.

¹³ Ko ndo Jesús bake e ndo itja ndo ngata a xa ko ndachro ndo:

—Jaán tja on; sintaxruan an.

Ko tuinxin koxruen en xa.

¹⁴ Ko je e ndo kuetuan an ndo ngajin xa:

—Xro an ngisen teki é ixi ó koxruan an. Itjia ngajin xitaana ixi ó koxruan an ko tájuan ti tikinixin kuituan an ndo Moisés ko jaña tsikon kueya na ixi koxruan an.

¹⁵ Ko kono e kain tjanya chijnie ndo Jesús, ko kueya na konchjiñe e na ngajin ndo ixi tsin en na nge e ndachro ndo, ko sinchexrjuen en ndo chin en na.

¹⁶ Ko je e ndo Jesús bakachrjendáa ndo nanaó ti xro an chujni jii ixi kuanichje e ndo ndotée ndo jii ngajni.

*Ndo Jesús juinchexruen en ndo naa xi jua i itji
(Mt. 9:1-8; Mr. 2:1-12)*

¹⁷ Naa nchakon ndo Jesús juinchekuen en ndo chujni ko nti a ste kaxin xi fariseo ko kaxin xi tjako ley, tsiki xin xa kain tjanya nunte Galilea ko nunte Judea ko tjanya Jerusalén. Ko ndo Jesús juako ndo juachaxien ndo Dio ixi juinchexruen en ndo itsjé chujni ni e.

¹⁸ Nchakon me e kuji kaxin na bika o na naa xi jitsingata a kania, xi me e jua i nchetengi tutée xa. Ko tjaun na xrokuixin in na kao xi ni e ngaxin in nchia ixi xrobake e na xa ngajin ndo Jesús.

¹⁹ Ko jua i kuixin in na ixi kueya na ste na ngaxin in nchia. Ko tjume e bajin in na ngata a nchia ko konxtrato xa ngata a nchia, ko nti a juinchexingajinxin na xi ni e jiá kania ngusine kain ni ste tjenka ndo Jesús.

²⁰ Ko ndo Jesús bikon ndo ixi chujni me e tsango chuntia na ko ndache ndo xi ni e:

—Jan an ó juintemá a kain ti ndako a juinche e.

²¹ Ko tjume e kain xi tjako ley ko xi fariseo kuaxi xraxaon xa: “¿Ngisen xi ji i, ixi ndako a nichja xa ko nichjangí e xa ndo Dio? Ixi xro an chujni tsantsje ijie; je o ndo Dio chao tsantsje ndo ijie chónnda na.”

²² Ko ndo Jesús ó no e ndo nge e stexraxaon xa, méxin, ndachro ndo:

—¿Sonda jaña xraxaonnta?

²³ ¿Nge e ícha tangi a xrontatjan xi ni e? ¿Á ícha tangi a xrontatjan xa ixi ó komé e ti ndako a juinche e xa?, o, ¿á tsingatjen xa ko tsajixin xa tutée xa?

²⁴ Méxin, jai tsjako anta ixi jan an, chjen en ndo Dio, xjan jongí e xranchi chujni, chonda juachaxin ngata a nunte tsantsje ijie chónnda chujni.

Ko tjume e ndo Jesús ndache ndo xi ni e:

—Jan an ntatjua ja a tingatjen ko itsé kania a ko satsjia ndúya.

²⁵ Ko tuinxin bingatjen xi jua i itji ko stetsje e kain na, ko itsé xa kanie e xa ti baketa a xa ko sakjui xa ndo a xa ko jitajon xa juasaya ngajin ndo Dio.

²⁶ Ko kain ni ste nti a xronka na ko kaxon kuajon na juasaya ngajin ndo Dio, ko xrakon na stendachro na:

—Jai bikona naa nge e ícha jié juinche e ndo Dio.

*Ndo Jesús kuiye e ndo ndo Mateo
(Mt. 9:9-13; Mr. 2:13-17)*

²⁷ Ko tjume e ndo Jesús kuachrjexin ndo nchia, ko bikon ndo naa xi xenge e i na ndatin in Mateo, jii xa ti xengaxin i na ko ndo Jesús ndache ndo xa:

—Xrokuia, ichjina.

²⁸ Ko xi Mateo, bingatjen xa ko kuintu e xa kain nge e, ko rué e xa ndo Jesús.

²⁹ Ko tjume e xi Mateo bake e xa naa kia ijie ndo a xa ixi tsajon xa juasie xa ngajin ndo Jesús. Ko kaxon ste kueya xi xenge e i na ko ikaxin chujni chónnda ijie ko juinekao na ndo Jesús.

³⁰ *Ko itsjé xi fariseo ko xi tjako ley kuaxi xa nichjangí e xa ti ni chrikao ndo Jesús, ko ndachro xa:

—¿Sonda rinteku unta ko tiku unta xi xenge e i na ko ni chónnda ijie?

³¹ Ko juatingíexin ndo Jesús ko ndachro ndo:

—Ngisen níe a xrokonde a xinchexruan; ni ní e ícha xrokonde e na xa.

³² Jui a ixí tsiya a ni jian. Jui i ixí tsiya a ni chónða ijíe, ko tsitikaon na ndo Dio.

Sonda sen chrjikao ndo Juan nchekatseñaao sen jinta

(Mt. 9:14-17; Mr. 2:18-22)

³³ Ko tjume e je e na juanchangi e na ndo Jesús ko ndachro na:

—Sen chrikao ndo juan ko xi fariseo ne a sen nchakon nichja sen ngajin ndo Dio ko, ¿sonda sen chrjiko a ja a kain nchakon ine sen ko ti i sen?

³⁴ Ko ndachro ndo Jesús:

—¿Á xrojuine a ni tsikiye e xi kute e, ni kuji kiée xa? Já jaán ixí xrastekao na xa.

³⁵ Ko tsii naa nchakon satsikao na xi tsikute e, ko tjume e je e sen sine a sen.

³⁶ Kaxon juako ndo naa nge e, ko ndachro ndo:

—Xro an ngisen tonchrijin tu o manta natjúá ko tjaun ti tsikichje manta ntaxi. Siá jaña sinche e na, tsitjáña manta natjúá; ko kaxon manta natjúá ndako a tsikonni manta ti manta ntaxi.

³⁷ Kaxon jua i tsikia xran vino natjúá tjuanxran ntaxi, ixí tsichje tjuanxran, ko ixran ko tjuanxran ndatsitjáña.

³⁸ Méxin, xran natjúá xrokonda tsikia xran tjuanxran natjúá, ko jaña kayui tsitjáña i.

³⁹ Ko kaxon xro an ngisen tsi i xran ntaxi, ko tjume e tsi i na xran natjúá, ixí xrondachro na: “Ícha jian xran ntaxi.”

6

Sen chrikao ndo Jesús tonchrijin sen trigo

(Mt. 12:1-8; Mr. 2:23-28)

¹ Naa nchakon sábadó tjoké e ni judío, ndo Jesús ko sen teyuu chrikao ndo kuatsinga sen tjenja kaxin ijngi tsikenga na trigo, ko sen teyuu chrikao ndo konchrijin sen kaxin tin trigo, ko konte nga sen trigo ixí itja sen ko juine sen.

² Ko kaxin xi fariseo juanchangi xa ndachro xa:

—¿Sonda stenche enta ti tikinixin a sinche eni nchakon tjoké eni?

³ Ko ndachro ndo Jesús:

—¿Á juinchequanxin anta nge e ndachro xroon jitaxin chijnie ndo Dio, xranchi juinche e ndo David ko kain xi bikao ndo naa nchakon tsango kuen en sen jinta?

⁴ Ndo David kuixin in ndo ndo a ndo Dio ko itse ndo nutja ti tikinixin en ndo Dio ko juine ndo nio, ko kaxon kuajon ndo nio juine kain xi bikao ndo. Ko nutja me e je o xitaana chónða xa juachaxin sine xa nio.

⁵ Ko kaxon ndachro ndo Jesús:

—Chjen en ndo Dio, xjan jongí e xranchi chujni, chónða ndo juachaxin tseten en ndo xranchi tson en nchakon tjoké eni.

Naa xi jua i nchetengi itja xa

(Mt. 12:9-14; Mr. 3:1-6)

⁶ Inaa sábadó nchakon tjoké e ni judío, kuixin in ndo Jesús ningue ndo Dio ko kuaxi ndo juinchekuen en ndo na chijnie ndo Dio. Ko nti a jii naa xi jua i nchetengi itja xa ti jian.

⁷ Ko xi tjako ley ko xi fariseo stetsjaya xa ndo Jesús ixí tjaun xa tsikon xa á sinchexrjuen en ndo xi me e nchakon sábadó tjoké e na, ixí jaña tsjankata a xa ndo Jesús ijíe.

⁸ Ko ndo Jesús ó no e ndo nge e stexraxaon aséen xa, méxin, ndache ndo xi ni e itja:

—Tingatjen ko take e ngusine nti i.

Ko tjume e bingatjen xi me e ko bake e xa ngusine ti ste kain na.

⁹ Ko je e ndo Jesús ndache ndo ikaxin na:

—Jan an tsjanchangí anta, ¿nge e chao sinche eni nchakon tjoké eni, á sinche eni jian o sinche eni ndako a? ¿Á tsingijnani chujni o á tsóñani chujni?

¹⁰ Ko tjume e ndo Jesús tsje e ndo kain ni ste nti a ko ndache ndo xi ni e:

—Tinxé tjáa.

Ko je e xa kuinxé itja xa, ko hora me e koxruen en itja xa.

¹¹ Ko ikaxin na tsango koñaon na ko stetjao kichuu na xranchi xrotsé na ndo Jesús.

Ndo Jesús kuinche e ndo teyuu sen tsajikao ndo

(Mt. 10:1-4; Mr. 3:13-19)

¹² Ikaxin nchakon tjume e ndo Jesús ikjui ndo ti jii naa ijna ixí nti a xronichjexin ndo ndo Dio, ko nchijí tiie juao ndo ndotée ndo.

¹³ Ko ti bingasáña nichje e ndo sen rué e ndo, ko kuinche e ndo teyuu sen, sen me e ikjan apóstol tsajikao ndo.

¹⁴ Ko sen me e ja in ndatin in sen: ndo Simón, me e ndo Jesús juinchekin in ndo Pedro; ko xikichuu ndo ndatin in Andrés; ndo Jacobo, ndo Juan, ndo Felipe ndo Bartolomé,
¹⁵ ndo Mateo, ndo Tomás, ndo Jacobo, chjen en ndo Alfeo, ndo Simón, banchekin in na Zelote,

¹⁶ ndo Judas chjen en ndo Jacobo ko ndo Judas Iscariote, ndo juinчекji ndo Jesús.

Ndo Jesús juinчекuen en ndo kueya na chijnie ndo Dio

(Mt. 4:23-25)

¹⁷ Ko ndo Jesús ko ti teyuu sen xingajinxin sen ngata a jna ko kujj sen ngataon naa ijngi, ko nti a ste ikaxin sen rué e ndo. Ko kaxon kueya na konchjiñe e na, kujjxin na kueya tjajna nunte Judea ko tjajna Jerusalén ko nguixin ngande e ndalago ti jii tjajna Tiro ko tjajna Sidón. Kain na kujj na ixi tsin en na ti nichja ndo Jesús ko tsoxruenxin na ichin chóna na.

¹⁸ Ko ni chóna espíritue Xixron anxrée kaxon koxruen en na.

¹⁹ Ko kain na tjaun na xrotsé na ndo Jesús ixi no e na juachaxin tachrxjin je e ndo chao sinchexrjuen en kain na.

Juaxruxin ko juachjaon

(Mt. 5:1-12)

²⁰ Ko tjume e ndo Jesús xendua ndo tsje e ndo sen teyuu chrikao ndo ko ndachro ndo:

—Juaxruxin tsake enta ti nóanta ixi tsaye enta juachaxin tsixin innta ti tetuan an ndo Dio.

²¹ Juaxruxin tsake enta ti jai chonda inta nge e sintenta, ko tjume e xrochondanta ti jian.

²² *Juaxruxin tsake enta ti jai tsjanganta, ixi tjume e xrocha anta.

²² *Juaxruxin tsake enta ti jai ningakon annta na ko tsjanoanta na, chinga xrontatjunta na, ko xrondachro na ixi ña inta ixi titikaonntana jan an, Chjen en Ndo Dio, xjan jongí e xranchi chujni.

²³ *Nchakon tson en kain juachjaon me e, tsango juaxruxin ko chaxro tsake enta, ixi tsaye enta naa nge e ícha jian jii ngajni. Jaña juinche e sen tachrí anta ngajin sen kuachronga chijnie ndo Dio.

²⁴ *Lastunta ja anta ti kueya chondanta ixi ó juexin ti juaxruxin bake enta.

²⁵ *Lastunta ti chondanta kueya nge e sintenta ixi tsji nchakon tsatsenta jinta.

*Ko lastunta ti jai tjanonta ko chá anta ixi tsji nchakon xrotsjanganta ixi tsaye enta ijie juachjaon.

²⁶ *Lastunta ja anta ixi jai kain chujni chaxro nichja anta na ixi jaña kaxon kuanichje e ni tachrí anta chujni ndako a bajako chijnie ndo Dio.

Xrokonda xrotjaunnta ngisen ningakon annta

(Mt. 5:38-48; 7:12)

²⁷ *Ko ja anta ti tin ennta ti ntatjunta: Tjue enta ngisen tjaun anta, ko nche enta jian ngajin ni ningakon annta.

²⁸ Tjanche enta ndo Dio ixi chaxro tsintee ngisen chinga nichja anta, ko tjanche enta ndo Dio ixi ni ndako a nche e ngajinnta.

²⁹ Siá xrojan ngisen tsande e na tjá na ikonnta, tintu enta tsande e na naa nango. Ko siá xrojan ngisen tsantsja anta chamaraanta, kaxon tájonnta camisáanta.

³⁰ Ko siá xrojan ngisen tsjanchara anta nge e chondanta, tájonnta; ko siá xrojan nge e tsantsja anta na, íncheniaxin anta.

³¹ *Ja anta nche enta ngajin na xranchi tjaunnta sinche e na ngajinnta.

³² Siá ja anta je o tjue enta ngisen chaxro nichja anta, ndo Dio nche a ndo juaxruxin me e, ixi kain ni chúxin a ndo Dio ko ni ndako a nche e, jaña nche e na.

³³ Ko siá je o nche enta ti jian ngajin ngisen nche e jian ngajinnta, ndo Dio nche a ndo juaxruxin me e, ixi kain ni chúxin a ndo Dio jaña nche e na kaxon.

³⁴ Ko siá nchekjennta na xrojan nge e chondanta je o ngajin ngisen chao xrokjan annta nge e juinчекjennta, ndo Dio nche a ndo juaxruxin me e ixi kaxon ni chúxin a ndo Dio nchekjen kichuu na xrojan nge e ko jaña tjaun na xrokjen en na kaxon.

³⁵ Ko ja anta xrotjue enta ngisen ningakon annta, ko sinche enta jian ngajin ni tjaun anta. Kaxon sinchekjennta na naa nge e, ko xro an nge e xrochon ennta tsaye enta. Jaña ja anta tsaye enta naa nge e jian ixi ja anta xrokjannta chjen en ndo Dio jii ngajni, ixi je e ndo Dio kaxon jaña nche e ndo, tajon ndo kueya nge e ngajin ni tajon a juasaya ko ni ndako a nche e.

³⁶ Tikonóe énta chujni, xranchi Ndotáina jii ngajni tikonóe e ndo chujni.

Tjankata inta ijie inaa chujni

(Mt. 7:1-5)

³⁷ *Tjankata inta ijie ngajin na, me e kaxon ndo Dio tsjangata inta ndo ijie ngajinnta. Nche anta ixi tangi tson en naa chujni ko jaña kaxon ndo Dio tsetuan i ndo ixi tangi

tson annta. Tjáña anta nge e ndako a junta anta na, jaña kaxon ndo Dio xrotjáñe e ndo ti ndako a juinche enta.

³⁸ Ko tájonnta nge e xrokonde e ikaxin na, ko ndo Dio xrotjáanta ndo kain ti xrokonda anta. Ko sinchekaon ndo costáanta jian, tsonteto costa jian, tsontsjenga ndo ko jian xrokaon ixi ícha xrotjáanta ndo. Méxin siá juaxruxin kuajonnta, jaña tsaye enta kaxon.

³⁹ *Ko ndo Jesús kaxon juako ndo ja in:

—¿Á chao naa ngisen tikon a xrotsé e itja inaa ni tikon a? ¿Á je a tsandatjen yui na गया tuye?

⁴⁰ *Méxin, naa ngisen rué e, je a ícha no e sen ixi ti ndo nchekuen en sen. Ko nchakon tsitja sen jian, me e tsake e sen xranchi ndo juinchekuen en sen.

⁴¹ ¿Sonda tsje enta xineno jii ngangí ikon sen kichuunta ko tsje anta ntaa ti chónnda ikonnta?

⁴² Siá tikon anta ntaa jii ngangí ikonnta, ¿sonda xrondachenta sen kichuunta: “Chon én tsantsjengi xineno jii ngangí ikuan”? ¿Ko ja anta ndako a xraxaonnta! Cháña sa ó tantsjenginta ntaa jii ngangí ikonnta, ko jaña chao tsikonnta jian tsantsjenginta xineno jii ngangí ikon sen kichuunta.

Ntaa tajon tu tatsuanxinni ntaa ixi itu tsajon ntaa

(Mt. 7:17-20; 12:33-35)

⁴³ *Ko xro an ntaa jian tsajon naa itu xro an xrée, ko ntaa xro an xrée jua i tsajon ntaa naa itu jian.

⁴⁴ *Nanaá ntaa tatsuanxinni ntaa ixi itu tajon ntaa. Ixi ntaacha a jua i tsajon ntaa tu higo, ko kachá a jua i tsajon ka tu uva.

⁴⁵ *Ni jian nichja na nge e jian jii गया aséen na; ko ni ña i ndako a nichja na ixi nichja na ti chónnda na गया aséen na. Ixi kain nge e chónnda na गया aséen na me e nichja ro a na.

Nchia kui te ngata a itjao ko nchia kui te ngata a nchese

(Mt. 7:24-27)

⁴⁶ *Ko ja anta, ¿sonda ndachronta ixi jan an Ncháanta ko titikaon anta nge e tetuan annta?

⁴⁷ Kain chujni tonchjiñe e na ngajin jan an, ko tin en na ti natjan na ko titikaon na,

⁴⁸ ni me e ste na xranchi naa xi tsijnchekonchjian naa nchia ko sa ó inge xa ixi ngata a itjao tsi te xa nchia. Ko nchakon koyeé inda, ko soji kuincheka o inda nchia me e, ko xro an kon en nchia ixi soji jii nchia ngata a itjao.

⁴⁹ Ko ni tin en ti ndachrjan ko titikaon a na, ni me e ste na xranchi naa xi juinchekonchjian naa nchia ngata a nchese. Ko nchakon koyeé inda, ko soji kuincheka o inda nchia me e, jamangi. Ko jaña chjenjin nchia me e.

7

Ndo Jesús juincheruen en ndo xi nchexré capitán romano

(Mt. 8:5-13)

¹ Ko juexin nichja ndo Jesús, ikjan ndo tjajna Capernaum.

² Nti a bake e naa xi capitán romano bachónnda xa naa xi nchexra ko tsango tjaun xa xi me e. Ko je e xi nchexra ni e xa ko ó jite en xa.

³ Ko xi capitán kuin en xa nichja na nge e jian juinche e ndo Jesús, ko tjume e xro an xa kaxin ni judío tetuan an tsijé na ndo Jesús, tsinóatée na ixi xrokuij ndo ko xro-juincheruen en ndo xi nchexré xi capitán.

⁴ Ko je e na konchjiñe e na ngajin ndo Jesús ko kuaxi kuinóatée na ngajin ndo ko ndachro na:

—Tsango jian xi capitán ko ja anta chao xrobingijnanta xa,

⁵ ixi je e xa tjaun xa tjananana, tjané ni judío, ko kuetuan an xa konchjian ningonana.

⁶ Ko ndo Jesús ikjui ndo ko ó jitonchjiñe e sen ndo a xi capitán, ko tjume e xi capitán kuetuan an xa ngajin kaxin na itsji na tsindache na ndo Jesús:

—Xi capitán tjaun a xa xrotjáanta xa ixra, ko ndachro xa ixi tikinixin a xa tsixin innta ndo a xa

⁷ ko kaxon tikinixin a tsijj xa xronichja anta xa. Méxin, je o tájonnta juachaxin ixi xi nchexré xa tsoxrue en xa.

⁸ Je e xa kaxon xrokonda tsitikaon xa ngisen tetuen en xa, ko kaxon chónnda xa juachaxin tetuan an xa ngajin kain xisoldadoe xa. Ko nchakon tetuen en xa naa xisoldadoe xa satsji xa, je e xa itji xa. Ko nchakon tetuan an xa ixi tsijj naa xi soldado je e xa tui xa. Ko nchakon tetuen en xa naa xi nchexra, je e xa titikaon xa.

⁹ Ko kuin en ndo Jesús, ko xronka ndo ixi jaña ndachro xa, ko je e ndo konkjan tsje e ndo ti sen sterué e ndo, ko ndachro ndo:

—Nduaxin ntatjunta, xro an ni israelita kuitja chuntiana xranchi xi capitán ji i.

¹⁰ Ko tjume e ni nche e ixra ngajin xi capitán ikjan na nchia, ko bikon na xi ni e ko ó tsikoxruen en xa ko íxro an ichin chónda xa.

Ndo Jesús nchexchón ndo xitsi e naa nchri ka an

¹¹ Ko tjume e ndo Jesús sakjui ndo naa tjanya ndatin in Naín, bikao ndo sen teyuu chrikao ndo ko kueya ni konchjiñe e ngajin ndo.

¹² Ko nchakon kuiji sen ngande e tjanya me e, ndo Jesús bikon ndo jitika o na naa chujni tsiken en xroxrabaa, chán me e naa chjen en naa nchri ka an, naakua xjan me e bachónda nchra. Ko tsango itsjé ni tjanya jitikao na nchra tsixrabaa chán.

¹³ Hora bikon ndo Jesús nchri me e, bikonóe e ndo nchra ko ndachro ndo:

—Ítsjanga ia.

¹⁴ Ko tjume e ndo Jesús konchjiñe e ndo ko bake e ndo itja ndo ngata a ntaq jái chán, ko ni jitikao ntaq chón en na. Ko ndo Jesús ndache ndo chán tsiken en:

—Jan an ntatjua: ¡Chajan tingatjen!

¹⁵ Ko tjume e chán tsiken en xendua chán ko bake e chán ko juangíxin chán nichja chán, ko jaña ndo Jesús kuajon ndo chán ngajin janée chán.

¹⁶ Ko nchakon bikon na jaña kon en, kain na tsango xronka na ko juangíxin na kuajon na juasie na ngajin ndo Dio ko ndachro na:

—Ndo Dio xruan an ndo naa ndo nichja chijnie ndo, ndo me e tsango chónda ndo juachaxin.

Ko kaxon ndachro na:

—Ndo Dio kuij ndo tsingijna ndo tjanée ndo.

¹⁷ Ko nguixin nunte Judea ko kain tjanya jii ngandajin nunte Judea kono e na nge e jian juinche e ndo Jesús.

Sen xruan an ndo Juan

(Mt. 11:2-19)

¹⁸ Sen chrikao ndo Juan beki e sen ndo kain nge e juinche e ndo Jesús ko tjume e kuiye e ndo yuu sen chrikao ndo,

¹⁹ ko xruan an ndo sen tsitsje e sen ndo Jesús tsjanchangí e sen ndo á je e ndo ngisen tsij, o á xrochon en sen tsij inaa ngisen.

²⁰ Ko sen xruan an ndo Juan konchjiñe e sen ngajin ndo Jesús, ko ndachro sen:

—Ndo Juan xruan anna ndo tsjanchangí ananta á ja anta ndo Cristo tsij, o xraxrochon anna inaa ngisen tsij.

²¹ Ko nchakon kuiji sen, ndo Jesús juinchexruen en ndo tsango itsjé ni chónda ichin, ko kuantsje ndo espíritue Xixron anxrée chónda kaxin na, ko kaxon juinchexruen en ndo itsjé ni tikon a.

²² Méxin, ndo Jesús ndache ndo sen xruan an ndo Juan:

—Itjinta, tindachenta ndo Juan ti bikonta ko ti kuin ennta: ni tikon a, chao tikon na, ko ni ntarengo chao ichrji na, ko ni kuachónda ichin lepra, jai íxro an ichin chónda na, ko ni bakien a, chao tin en na, ko ni kuen en, jai xechón na, ko ni nóa kuin en na chijni jian ixi tsachrje ijie chónda na.

²³ Ko sen xrotjáñe a xrochuntiana, sen me e juaxruxin tsintee sen.

²⁴ Nchakon sakjui sen tsixrua an ndo Juan, ndo Jesús kuaxi ndo ndache ndo kain ni kuitu e nti a kondee ndo Juan, ko ndachro ndo:

—Nchakon ikjuinta ntajie kuitsje enta ndo Juan, ¿xranchi xraxaonnta xrobikonnta ndo? ¿Á bikonta ndo xranchi naa ntatji tjatu o chrinto?

²⁵ ¿Na i, nge e xrobikonnta? ¿Á xrobikonnta naa xi jái manta tsango tjintee? ¡Na i, je a me e! Ja anta ó no anta ixi ngisen jái manta tjintee ko chónda itsjé nge e, ni me e ste na ndo a naa xi rey tetuan an.

²⁶ Méxin, ¿nge e kuitsje enta? ¿Á xrobikonnta naa ngisen chronga chijnie ndo Dio? ¡Jaán, nduaxin me e, ko xi me e ícha chónda juachaxin ixi sen banichja chijnie ndo Dio sa ó!

²⁷ Ndo Juan me e ngisen kuij xranchi jitaxin xroon chijnie ndo Dio sa ó:

Jan an xroxruan an naa ngisen xrochronga chijnina

ko je e ndo sinchenataonxin ndo cha o, ko sinchekonchjian ndo cha o ngajinnta.

²⁸ Jan an rintatjonta ixi kain ni kuij sa ó chronga chijnie ndo Dio, xro an ngisen kuachónda juachaxin xranchi juachaxin chónda ndo Juan Bautista. Ko maski, ngisen chónda i itsjé juachaxin ti tetuan an ndo Dio, ícha ijie sen ixi ndo Juan.

²⁹ *Nchakon kuin en nā ji i, kain nā ko kain xi xenge e i nā tsikikite ndo Juan kuitikana nā ixi ndo Dio tsango jian ndo.

³⁰ Ko xi fariseo ko xi tjako ley chro a xa ixi ndo Juan xrobikitée ndo xa, tjaun a xa ti ndo Dio xrobingijna ndo xa.

³¹ Ko ndo Jesús ndachro ndo:

—¿Xranchi tsjakoxin chujni ste jai? ¿Ste nā xranchi tsjakoxinni ti nche e chujni?

³² Ste nā xranchi ichjan nchínchín take e xjan nunte sondaon xjan ngataon ndasin ko tuyaku e kichuu xjan ko ndachro xjan: “Jan anna kuanoana ntaxro ko ja anta té anta, jan anna itsjena soon ti chónDani juachjaon ko ja anta tsjanga inta.”

³³ Ko kuij ndo Juan Bautista, ko juine a ndo nutja ko kui a ndo xran vino, ko ja anta ndachronta ixi je e ndo chónDa ndo naa espíritué Xixron anxrée.

³⁴ Ko tjume e jui i jan an, Chjen en ndo Dio, xjan jongí e xranchi chujni, ko iné ko ti í, ko ja anta ndachronta ixi jan an tsango iné ko tsango ti í ko tjento kain ni ndako a nche e ko kain xi xenge e i nā.

³⁵ Ko ti tsango no e ndo Dio me e tjakoxin chjen en ndo Dio.

Ndo Jesús jii ndo ndo a naa xi fariseo tin in Simón

³⁶ Naa xi fariseo ndache xa ndo Jesús itsji ndo ndo a xa sinekao ndo xa. Ko ndo Jesús ikjui ndo nti a ko bake e ndo ti jii mesa.

³⁷ *Ko tjana me e jii naa nchri, nchri me e tsango kueya ijie kuachónDa nchra. Ko kono e nchra ixi ndo Jesús kuij ndo sine ndo ndo a xi fariseo me e, ko je e nchra ikjui nchra nti a ko bikao nchra naa xroxrao jichre inda chaxro xraxe tjintee.

³⁸ Ko konchjiñe e nchra ti jii tutée ndo Jesús ko bake exin nchra ntatuchi in nchra ko tsjanga nchra. Méxin, quintjí ndakon nchra tutée ndo Jesús, ko tjume e xrajaa nchra juinchexemaxin nchra tutée ndo, ko kuitoxin nchra tutée ndo, ko tjume e bingamá nchra inda chaxro xraxe tutée ndo.

³⁹ Ko bikon xi fariseo tsikiye e ndo Jesús, ko je e xa xraxaon xa: “Á nduaxin ndo ji i naa ndo chronga chijnie ndo Dio, siá nduaxin me e, je e ndo xrokono e ndo ngisen jinéma ixi ndakon tutée ndo, ko ngisen nchri ji i; xrokono e ndo ixi nchri ji i tsango ndako a nche e nchra.”

⁴⁰ Ko tjume e ndo Jesús ndache ndo xi fariseo:

—Simón, jan an xrontatjua naa nge e.

Ko xi fariseo juate e xa:

—Ndachijiana, Maestro.

⁴¹ Ko ndo Jesús ndachro ndo:

—Bake e yuu xi sínká tomi ngajin naa xi tjatuya tomi. Naa xi sínká na ó ciento tomi, ko naa xi sínká tu o ciento tomi.

⁴² Ko jua i kuintejuenga xa nā. Ko xi tjatuya tomi juinchemé e xa ti sínká kayui xi me e.

Ndachro ndo Jesús:

—Jai ndachijiana ja a, ¿ngixe e xi ícha tjue e xi tjatuya tomi?

⁴³ Ko juate e xi Simón ndachro xa:

—Jan an xraxa on ixi xi ícha bikonóe e xa, xi sínká ícha tomi.

Ko ndo Jesús ndachro ndo:

—Jaán, nduaxin.

⁴⁴ Ko ndo Jesús tsje e ndo nchri me e ko ndache ndo xi Simón:

—Tsje é nchri ji i. Jan an kuixin in ndúya ko chjána iana inda tsijmaxin tutéena; ko nchri ji i juinéma nchra tutéena ixi ndakon nchra, ko juinchexemaxin nchra xrajaa nchra.

⁴⁵ Ja a kuitoxin ana ti jui i ndúya, ko je e nchra, xrakuixi in ndúya jítitoxin nchra tutéena.

⁴⁶ Ja a bake a ndaxi e ngata a jáana; ko je e nchra bake e nchra inda chaxro xraxe tutéena.

⁴⁷ Méxin, jan an ntatjua ixi ti kueya sínká nchra ó komé e, ko méxin, ícha tjaunna nchra; ko ngisen sinka i ijie, kaxon je a ícha tjaunna nā.

⁴⁸ Ko tjume e ndo Jesús ndache ndo nchri me e:

—Kain ti ndako a juinche e ó komé e.

⁴⁹ Ko kain nā tsikonchjiñe e ti jii ndo Jesús tjenka mesa kuaxi nā ndache kichuu nā:

—¿Ngisen ji i, ixi nchemé e xa ti ijie chónDa nā?

⁵⁰ Ko tjume e ndo Jesús ndache ndo nchra:

—Ja a chuntiana ko kuitikaonna, méxin ijie kuachonda komé e ijie; méxin, jai juaxruxin satjia.

8

Nchri bakingijina ndo Jesús

¹ Ko tjume e, ndo Jesús kuaji ndo itsjé tjanya ijié ko itsjé tjanya nchúin kuachronga ndo ixi kuij juachaxien ndo Dio. Ko chrikao ndo sen teyuu kuinche e ndo.

² *Ko kaxon nti a sterué e kaxin nchri tsikantsje e ndo espíritu Xixron anxrée kuachóna nchra ko tsikantsje ndo kain ichin kuachóna nchra. Ko naa nchri me e ndatin in María Magdalena, nchri me e kuantsjexin ndo yaato espíritu Xixron anxrée.

³ Ko kaxon nti a bake e nchri Juana, janchri e naa xi ndatin in Chuza, xi me e kuanche e xa xrée xi Herodes; ko kaxon nti a bake e nchri Susana ko ikaxin nchri bakingijina nchra ndo Jesús ko kuajon nchra nge e juine sen.

Ndo Jesús tjako ndo xranchi naa xi bikenga trigo ngataon ijngi

(Mt. 13:1-9; Mr. 4:1-9)

⁴ Ko xejo kueya na, kuij x̄in na kueya tjanya ko konchjiñe e na ngajin ndo Jesús. Me e je e ndo beki ndo naa chijni:

⁵ —Naa xi bikenga tsee, ko kaxin tsee kuitsinga ngande e cha o. Ko kuatsinga chujni ko ngatjangi na tsee. Ko kuij kuxe juine ba tsee.

⁶ Ko kaxin tsee kuitsinga ngakjen en ixro ko kuachrje ka, ko bangi a ka ixi xro an itjao* ko inche chóna nue e ka.

⁷ Ko kaxin tsee kuitsinga ti jii ntacha a. Ko ntacha a ícha bangi ntaja. Me e xrabaatja ka ko bangi a tsee.

⁸ Ko ícha tsee kuitsinga ngata a inche jian, me e bangi ka ko itsjé tsee kuajon ka, xranchi naa ciento tsee kuajon nguñgu ka.

Jaña nichja ndo Jesús, ko tjume e séen ndachro ndo:

—Ngisen chao tin en, tsin en sen jian.

Ndo Jesús chronga ndo sonda juako ndo chijni

(Mt. 13:10-17; Mr. 4:10-12)

⁹ Ko sen teyuu chrikao ndo Jesús juanchangi sen:

—¿Nge e xrondachro chijni juako ndo?

¹⁰ Ko je e ndo Jesús ndachro ndo:

—Ja anta kuaye enta juachaxin tsienxinnta ti noa inta, ti tetuan an ndo Dio. Ko chujni kaxin, na i. Méxin, jan an nichjaxin naa chijni, ixi maski tsikon na ko tsin en na, tsienxin a na.

Ndo Jesús ndachro ndo nge e xrondachro ti binga tsee

(Mt. 13:18-23; Mr. 4:13-20)

¹¹ *Ko ji i xrondachro chijni ntatjunta: Ti tsee me e chijnie ndo Dio.

¹² Tsee kuitsinga ngande e cha o me e xrondachro ngisen tin en chijnie ndo Dio. Ko Xixron anxrée nchetjáñajin xa na ko titikaon a na, méxin, tsitjáña na.

¹³ Tsee kuitsinga ti jii ixro me e xrondachro ngisen kuin en chijnie ndo Dio ko bake e na juaxruxin, ko sé a kuitikaon na ixi kuij juachjaon ko ngaxiton na.

¹⁴ Tsee kuitsinga ngata a ntacha a me e xrondachro ngisen tin en chijnie ndo Dio ko hora satji na tjáñe e na nge e kuin en na ixi yaa na juachjauen tomi ko ícha tjue e na ti juaxruxin, ko nche a na ti tjaun ndo Dio.

¹⁵ Ko tsee kuitsinga ti inche indá xrondachro ngisen tayé e chijnie ndo Dio ngaxin in aséen na ko titikaon na ti ndachro ndo ko soji tjintee na.

Ndo Jesús juako ndo no tsake e xro i

(Mr. 4:21-25)

¹⁶ *Xro an ngisen tsjaaka naa xro i ko tsake e na xro i chringi naa ichi o chringi ntaja tejuata a na. Xrokonda tsake e na xro i noi ixi kain ni tixin in nchia chao tsikon na ti tingasáña.

¹⁷ *Xro an nge e jimá tsonoxin a, ko xro an nge e imao tsonoa ani inaa nchakon ixi kain nge e tsonoxixin ixi xro i.

¹⁸ *Méxin, ja anta tin ennta jian; ngisen ó no e naa nchúin, ndo Dio tsingijina ndo tsono e sen ícha, ko ti ngisen xro an no e, ti jixraxaon na ixi no e na kaxon me e tsachrje e na.

Janée ndo Jesús ko xi kichuu ndo

(Mt. 12:46-50; Mr. 3:31-35)

¹⁹ Tjume e janée ndo Jesús ko kaxin xi kichuu ndo kuiji sen ti jii ndo Jesús, ko jua i konchjiñe e sen ixi tsango itsjé chujni ste nti a.

²⁰ Ko tjume e naa xi kuindache xa ndo Jesús:

—Janáanta ko xi kichuunta ste sen nduja, ko nichja anta sen.

²¹ Ko ndo Jesús ndachro ndo:

—Sen tin en chijnie ndo Dio ko titikaon, sen me e janána ko sen kichian.

Ndo Jesús ícha tituan an ndo

(Mt. 8:23-27; Mr. 4:35-41)

²² Naa nchakon ndo Jesús kuajin in ndo naa ntábarco ko ndache ndo sen teyuu chrikao ndo:

—Tsatsingato ena ndalago.

Ko tjume e sakjui sen.

²³ Ko jitji sen ngataon inda, ko je e ndo kuejua ndo. Ko tuinxin kuji naa chrinto soji ko ntábarco stejá sen kuaxi bikia ntáa inda ko tjaun ntáa xrojамangi ntáa.

²⁴ Ko konchjiñe e sen ti jii ndo ko juinchexingame e sen ndo ko ndache sen ndo:

—¡Maestro, Maestro! ¡Sen enna ixi xrojамangi ntáa stejána ko xrokjoinna inda!

Ko je e ndo bingatjen ndo ko kuyakutee ndo chrinto ko inda ko tuinxin ndabake e nda.

²⁵ Ko ndo Jesús ndache ndo sen:

—¿Sonda chuntia intana?

Ko je e sen xronka sen ko ndastetsjeko sen ko stendache kichuu sen:

—¿Ngisen ji i ixi tetuen en ndo chrinto soji ko inda, ko je e inda ko chrinto titikaon?

Naa xi jii nunte Gadara

(Mt. 8:28-34; Mr. 5:1-20)

²⁶ Tjume e kuji sen nunte ndatin in Gadara ti jii tuenxin ndalago ngajinxin nunte Galilea.

²⁷ Ko ndo Jesús xingajinxin ndo ntábarco ko tuinxin naa xi kuachrjexin tjajna nti a konchjiñe e xa ngajin ndo Jesús. Ko xi me e tsango sée kuachóna xa espíritue Xixron anxrée. Ko xro an manta jíá xa, ko je a nchia bake e xa; bake e xa ngakjen en itjao ti bajabaa na ni tsiken en.

²⁸ Hora bikon xa ndo Jesús, bake exin xa ntatuchi in xa ngajin ndo ko kuyako xa ko ndachro xa:

—Jesús, chjen en ndo Dio, ¿sonda nchexronkana? Tjanča ana xro an nchenana.

²⁹ Jaña ndachro xa ixi tsango itsjé espíritue Xixron anxrée tsachrjexin xa xi me e. Ko ó sée espíritue Xixron anxrée baketuen en xa xi me e ko bakichruaxin na tutée xa ko itja xa ixi nochika, ko je e xa bakonchrindaon xa nochika ko espíritue Xixron anxrée banchekinga xa chrika a ijna ti xro an chujni ste.

³⁰ Ko tjume e ndo Jesús juanchangi e ndo xi me e:

—¿Xranchi ti ian?

Ko je e xi ndachro xa:

—Jan anna ndatin inna Legión.

Jaña ndachro xa ixi tsango itsjé espíritue Xixron anxrée bake e ngaxin in aséen xa.

³¹ Ko kain espíritue Xixron anxrée juanche e ndo Jesús ixi xroxruan a ndo satsji espíritu ti tuye yaso e.

³² Ko ijna nti a steneña itsjé kuchinga, ko kain espíritue Xixron anxrée juanchia ngajin ndo Jesús ixi je e ndo tsajon ndo juachaxin tixin in kain espíritu me e ngaxin in kuchinga. Ko ndo Jesús kuajon ndo juachaxin.

³³ Ko kain espíritue Xixron anxrée kuachrjexin xi me e ko kuixin in ngaxin in kuchinga. Ko kain kuchinga binga ba ko kuitsingangi ba ti yaso e jii ndalago ko kjon en ba inda.

³⁴ Ko kain xi stetsje e xa kuchinga, bikon xa jaña kon en ba, ko je e xa tsango xronka xa ko binga xa kuindache xa ni tjajna nge e kon en ko kaxon kuindache xa ni ste ngataon ijngi.

³⁵ Ko kain ni me e kuji na kuitsje e na nge e kon en nti a. Ko hora kuji na ti jii ndo Jesús, bikon na nti a jii xi kuachrjexin kain espíritue Xixron anxrée. Jii xa tjenka tutée ndo Jesús, ko ó jíá xa manta, ko ndako xraxaon xa, ko kain na xronka na.

³⁶ Ko kain na bikon na nge e kon en nti a ko chronga na xranchi koxruen en xi bachóna espíritue Xixron anxrée.

³⁷ Méxin, kain ni nunte Gadara juanche e na ndo Jesús ixi satsjixin ndo nti a, ixi je e na tsango xronka na. Méxin, ndo Jesús kuajin in ndo ntábarco ko sakjui ndo.

³⁸ Ko xi kuachrjexin kain espíritue Xixron anxrée kuinóatée xa ixi xrokuajon ndo juachaxin tsikao ndo xa. Ko ndo Jesús kuetuen en ndo xa tsitu e xa, ko ndachro ndo:

³⁹ —Ikjan ndúya, ko teki é na kain nge e juinche e ndo Dio ngajian.

Ko xi me e sakjui xa ko beki e xa kain na nguixin tjajna ti juinche e ndo Jesús ngajin xa.

Koxruen en naa xjan nchrichjan ndo ko naa nchri

(Mt. 9:18-26; Mr. 5:21-43)

⁴⁰ Nchakon ikjan ndo Jesús tuenxin ndalago, kain ni ste nti a tsango ché e nã ixi kuiji ndo Jesús, ixi kain nã stehón en nã ndo.

⁴¹ Ko tjume e kuiji naa xi ndatin in Jairo, xi me e baketuan an xa ni ngo judío nti a. Bake exin xa ntatuchi in xa ngajin ndo Jesús ko kuinóatée xa ngajin ndo ixi xrokjui ndo a xa

⁴² Ixi xjanchrichje en xa, xjan naakuaxon chóna xa, chóna xjan teyuu nano ko jite en xjan. Ko tjume e ndo Jesús sakjui ndo ndo a xi Jairo ko tsango itsjé nã rué e nã ndo ko kuixintja nã ndo Jesús.

⁴³ Ko ngakjen en kain chujni me e nti a konchjiñe e naa nchri bani e nchra, teyuu nano níxin nchra jnié nchra, ko juinchexienxin nchra kain ti bachóna nchra ngajin xi nchexruan, ko ninaa xinchexruan jua i juinchexruen en nchra.

⁴⁴ Nchri me e konchjiñe e nchra tuenxin ndo Jesús ko itsé nchra ngande e mantoe ndo ko tuinxin kuixin jnié nchra.

⁴⁵ Ko ndo Jesús juanchangi ndo:

—¿Ngisen itséna?

Ko kain nã ndachro nã ixi xro an ngisen itsé ndo. Méxin, ndo Pedro ko kain sen jitikao ndo ndachro sen:

—Maestro, kueya nã ste nã ngandajian ko sinteeto nã, méxin, ¿sonda tjanchangia ngisen itsé?

⁴⁶ Ko ndo Jesús ndachro ndo:

—Xrojan ngisen itséna, ixi konóna juachaxin kuachrxjinna ixi koxruenxin naa ngisen.

⁴⁷ Ko nchri me e bikon nchra kono e ndo Jesús, ko konchjiñe e nchra ti jii ndo ko jixranga nchra ko xrakon nchra, ko bake exin ntatuchi in nchra tutée ndo Jesús. Ko ngatoxin[†] ikon kain ni ste nti a ndachro nchra xranchi itsé nchra mantoe ndo Jesús ko xranchi tuinxin koxruen en nchra.

⁴⁸ Ko tjume e ndo Jesús ndache ndo nchra:

—Ja a koxruan an ixi chuntiana. Jai juaxruxin satjia.

⁴⁹ Xrajnichja ndo Jesús, kuiji naa ngisen kuixin ndo a xi Jairo, xi baketuan an ni ngo nti a; ko ndache nã xa:

—Chjan an ó kuen en xjan; Ítajon a ixrã ngajin ndo maestro.

⁵⁰ Ko tjume e kuin en ndo Jesús, ko ndache ndo xi Jairo:

—Xronka ia; je o titikáoanna, chjan an tsoxruen en xjan.

⁵¹ Ko ti kuiji sen ndo a xi Jairo, ndo Jesús kuachrxjendaka o ndo, ndo Pedro ko ndo Jacobo, ko ndo Juan, kuixin in sen nchia ko kao ndotée ko janée xjanchrichjan.

⁵² Ko kain ni ste nti a stetsjanga nã ko yaxin nã xjan juachjaon. Ko ndo Jesús ndache ndo nã:

—Tsjanga inta; xjanchrichjan tsiken a xjan; je o jijua xjan.

⁵³ Ko je e nã juanoa nã ndo Jesús, ixi kain nã no e nã kuen en xjan.

⁵⁴ Ko tjume e ndo Jesús itsé ndo itja xjan ko séen ndachro ndo:

—Ja a xjanchrichjan, tingatjen.

⁵⁵ Ko je e xjan xechón xjan íjngo, ko tuinxin bingatjen xjan. Ko ndo Jesús kuetuan an ndo xrochjée sen xjan sine xjan.

⁵⁶ Ko janée xjan ko ndotée xjan tsango xrakon sen, ko ndo Jesús kuetuen en ndo nã ixi xro an ngisen tseki e nã jaña kon en.

9

Ndo Jesús xruan an ndo teyuu sen chrikao ndo ixi itsji sen xrochronga sen chijnie ndo Dio (Mt. 10:5-15; Mr. 6:7-13)

¹ Ko tjume e ndo Jesús kuetuan an ndo tsonchjiñe e sen teyuu chrikao ndo, ko kuajon ndo juachaxin ixi chao tsantsje sen kain espíritue Xixron anxrée chóna nã, ko sinchexrjuen en sen ni ni e.

² Ko kuetuan an ndo satsji sen sinchekuen en sen nã kondee juachaxin tetuan an ndo Dio ko sinchexrjuen en sen ni ni e.

³ Ko ndachro ndo:

—Xro an nge e tiku unta ti tsaanta cha o, tiku inta ntakuto, tiku inta puxa, nutja, tomi ko tiku inta yuu manta, je o manta rianta.

⁴ Ko nchakon tsjasonta xrojan nchia tsixin innta ko tsitu anta nti a tsijija nchakon satsjixinnta tjajna me e.

[†] 8:47 ngatoxin delante de

⁵ *Siá tsjasonta xrojan tjanya ko tsajon a na juachaxin tsinteenta nti a, ja anta tachrxj-innta tjanya me e, ko tontsjenganta inche yaa tutáanta, me e tsjakoxinnta xixi ndo Dio tsjankata a ndo ijje ngajin ni tjanya me e.

⁶ Ko tjume e sakjui sen kain tjanya nchínchín, ko ndache sen na chijni jian xranchi ndo Dio tsantsje ijje chóna na ko juinchexruen en sen ni ni e.

Kuen en ndo Juan Bautista

(Mt. 14:1-12; Mr. 6:14-29)

⁷ *Xi Herodes, xi kuetuan an nti a, kono e xa kain nge e jian banche e ndo Jesús, ko je e xa tsango xronka xa, noe a xa nge e xraxaon xa xixi kaxin na ndachro na xixi ó tsixechón xi Juan Bautista.

⁸ Ko ikaxin na ndachro na xixi ndo kuachronga chijnie ndo Dio ó sa ó, ndo Elías, konoxin íjngo, ko ikaxin na ndachro na xixi inaa ndo kuachronga chijnie ndo Dio kuji ícha sa ó, ko jai xechón ndo íjngo.

⁹ Ko ndachro xi Herodes:

—Jan an kuetuan an chrinjin jaa xi Juan; méxin, ¿ngisen xi ji i xixi kujn an tsango itsjé nge e jian nche e xa?

Ko xi Herodes tsango tjaun xa xrokuitsje e xa ndo Jesús.

Ndo Jesús kuajon ndo nge e juine na ó mil xi

(Mt. 14:13-21; Mr. 6:30-44; Jn. 6:1-14)

¹⁰ Ko tjume e ikjan sen xruan an ndo Jesús ko beki e sen ndo kain ti juinche e sen. Ko tjume e ndo Jesús sabikao ndo sen ti xro an ngisen ste, tjenka tjanya Betsaida.

¹¹ Ko hora kono e na no jii ndo ko je e na rué e na ndo, ko ndo Jesús kuajon ndo juachaxin kuitu e na nti a. Ko chronga ndo kondée juachaxin tetuan an ndo Dio ko juinchexruen en ndo kain ni ni e.

¹² Ko ó kóndo, konchijne e sen teyuu chrikao ndo, ko ndachro sen:

—Ndachenta kain na xixi satsji na kaxin tjanya tjenka nti i, tse na na ti sine na ko tsjoké e na xixi nti i xro an nge e jii.

¹³ Ko ndo Jesús ndache ndo sen:

—Ja anta tájonnta nge e sine na.

Ko je e sen ndachro sen:

—Xro an nge e chondana, je o chondana na ó nutja ko yuu kucheé, ¿á tjaunnta xixi tsike nana nge e sine kain na?

¹⁴ Xixi kain ni me e, je o ni xi xranchi na ó mil chujni. Ko ndache ndo Jesús sen teyuu chrikao ndo:

—Ndachenta na tsintee na nunte, ngujngu yuukante na.

¹⁵ Ko jaña juinche e sen ko kuintee na nunte kain na.

¹⁶ Ko tjume e ndo Jesús kua ndo na ó nutja ko yuu kucheé ko tsje e ndo ngajni, ko kuajon ndo juasie ndo ngajin ndo Dio. Ko konchrinjin ndo nutja ko kucheé ko chjéé ndo sen teyuu chrikao ndo. Ko je e sen konchjeya sen nutja ko kucheé, kuayé e kain ni ste nti a.

¹⁷ Ko kain na juine na ko kaon na jian, ko juexin juine kain na, sen teyuu chrikao ndo Jesús juejo sen teyuu ntaxra tutu o nutja tsixe e.

Ndo Pedro ndachro ndo xixi ndo Jesús ndo Cristo

(Mt. 16:13-19; Mr. 8:27-29)

¹⁸ Naa nchakon ndo Jesús tsikachrxjendáa ndo ko kuinichje e ndo ndo Dio, ko jikao ndo sen teyuu chrikao ndo, ko je e ndo juanchangi e ndo sen:

—¿Nge e ndachro chujni, ngisen jan an?

¹⁹ *Ko je e sen ndachro sen:

—Kaxin na ndachro na xixi ja anta ndo Juan Bautista; ko ikaxin na ndachro na xixi ja anta ndo profeta Elías; ko ícha na ndachro na xixi ja anta naa sen profeta tsixechón.

²⁰ *Ko tjume e ndo Jesús juanchangi e ndo sen:

—Ko ja anta, ¿nge e ndachrona, ngisen jan an?

Ko ndo Pedro ndachro ndo:

—Ja anta ndo Cristo, chjen en ndo Dio.

Ndo Jesús ndachro ndo xixi je e ndo tsen en ndo

(Mt. 16:20-28; Mr. 8:30-9:1)

²¹ Ko ndo Jesús tsango kuetuen en ndo sen xixi xro an chujni xronache sen ngisen je e ndo.

²² Ko tjume e ndo Jesús ndache ndo sen:

—Jan an, chjen en ndo Dio, xjan jongí e xranchi chujni, xrokonda tsango tangi sinchena na, ko kain xi tetuan an ni ngo, ko kain xitaana tetuan an ko kain xi tjako ley, tsofaona na. Ko naatsóñaxónna na, ko nchakon nínxin xroxechónna íjngo.

²³ *Juexin ndachro ndo ji i, ndache ndo kain ni ste nti a:

—Siá xrojan ngisen xrorua na, xrokonda tsintu e sen ti ícha tjue e sen ko xrorua na sen kain nchakon, maski tangi tson en sen.

²⁴ *Ko ni tjaun xro an tson en, sinchetjáña aséen na; ko ngisen tsen en ixi titikaonna sen, sen me e tsechón sen kain nchakon.

²⁵ ¿Nge e tsjacha na siá xrochóna na kain nge e jii ngata a nunte ko sinchetjáña na aséen na?

²⁶ Méxin, ngisen tosue e ixi titikaonna sen ko chijni nichja, kaxon jan an, Chjen en ndo Dio, xjan jongí e xranchi chujni, xrondachrjan ixi chúxin a sen nchakon tsikian ijíé juachaxin ko chjiixro chóna Ndotána ko kain ángel ne e ndo.

²⁷ Nduaxin ntatjunta ixi kaxin ni ste nti i jai, xratsen a na tsikonja na juachaxien ndo Dio.

Kuindoxin xranchi tsje e ndo Jesús

(Mt. 17:1-8; Mr. 9:2-8)

²⁸ Kuatsinga ijní nchakon ti ndachro ndo Jesús kain ji i, ko tjume e je e ndo kuajin in ndo naa ijna ixi xronichje e ndo ndo Dio ko bikao ndo ndo Pedro ko ndo Jacobo ko ndo Juan.

²⁹ Ko hora jinichje e ndo Jesús ndo Dio, ngayakon ndo Jesús kuindoxin ko ti jitsáa ndo ikjan xranchi chjiixro ixi tsango tóngixin.

³⁰ Ko tjume e konoxin yuu sen stetjao ndo Jesús, ko sen me e ndo Moisés ko ndo Elías.

³¹ Ko nguixin ngandajin ti ste sen tsango chaxro bingasáña ko stetjao sen xranchi tson en ndo Jesús ko xranchi tsen en ndo tjajna Jerusalén.

³² Ko maski ndo Pedro ko sen stekao ndo tsango chjé sen kotachrin, je e sen stetsje e sen ko bikon sen juachaxin chóna ndo Jesús, ko bikon sen sen yuu jikao ndo.

³³ Ko hora saxrokjui sen, ndo Pedro ndache ndo ndo Jesús:

—Maestro, jian stena nti i. Sintáñana ní tsa on nchúin; naa tsa on ja anta, ko naa tsa on ndo Moisés, ko naa tsa on ndo Elías.

Ko ndo Pedro noe a ndo nge e ndachro ndo.

³⁴ Ko xrainichja ndo kuji naa itjuj kuitsia sen ko xrakon sen ixi kuitu e sen ngakjen en itjuj.

³⁵ *Ko tjume e ngakjen en itjuj me e kuin en sen naa ngisen ndachro:

—Ji i chjan na tsango tjua a. Tin ennta ti ndachro xjan.

³⁶ Juexin nichja ndo Dio, bikon sen ndo Jesús je o ndo jii ndo nti a. Ko je e sen tenko sen, ko xro an ngisen beki e sen nge e bikon sen.

Ndo Jesús juinchexruen en ndo naa chajan

(Mt. 17:14-21; Mr. 9:14-29)

³⁷ Ndúyaxin ti xingajinxin sen ijna, tsango itsjé na jichón en na ndo Jesús ngatja cha o.

³⁸ Ko naa xi jii ngakjen en ni me e nichja xa ko ndache xa ndo Jesús:

—Maestro, tinóatána ixi tikitsje enta chjan na ixi naakua xjan chonda ko ni e xjan.

³⁹ Chóna xjan espíritue Xixron anxrée ko itsé xa xjan ko nchekoyako xa xjan, ko titsinga xjan ko tuchrjo ti xin ro a xjan. Tsango ncheni e xa xjan ko tsango chrjen tajanda xa xjan.

⁴⁰ Jan an ó kuinóatána ngajin sen chrjiku unta ixi xrokuantsje sen espíritu, ko jua i kuantsje sen.

⁴¹ Ko ndo Jesús ndachro ndo:

—Ja anta chuntia intana ko titikaon anta! ¿Ti ngisa xrokonda tsake e ngajinnta ko sintakuan annta? Tikuunta chán nti i.

⁴² Ti konchjiñe e chán ti jii ndo Jesús, espíritue Xixron anxrée me e juinchekuendaa chán, ko juanka chán ngata a nunte. Ko ndo Jesús kuyakutee ndo espíritu, ko me e kuachrje espíritu ña i ko koxruen en chán ko ndo Jesús kuajon ndo chán ngajin ndotée chán.

⁴³ Ko kain ni ste nti a tsango xronka na ixi bikon na juachaxin ijíé chóna ndo Dio.

Ndo Jesús íjngo chronga ndo tsen en ndo

(Mt. 17:22-23; Mr. 9:30-32)

Kain na xrastexronka na ixi ixra ijíé juinche e ndo Jesús, ko tjume e je e ndo ndache ndo sen teyuu chrakao ndo:

⁴⁴ —Tin ennta jian ti xrontatjunta, ko tjáña inta. Chujni xrotséna na jan an, chjen en ndo Dio, xjan jongí e xranchi chujni, tsikaanna na ti jii xi ña i.

⁴⁵ Ko je e sen kuienxin a sen nge e ndachro ndo, ixi xrakuajon a ndo Dio juachaxin xrokuienxin sen. Ko je e sen xrakon sen ko í juanchangíe a sen ndo nge e xrondachro ti ndachro ndo.

¿Ngisen ícha tetuan an?

(Mt. 18:1-5; Mr. 9:33-37)

⁴⁶ *Ko tjume e sen teyuu chrikao ndo Jesús, juangíxin sen juao kichuu sen ixi ngisen ti je e sen ícha tetuan an.

⁴⁷ Ko ndo Jesús kono e ndo nge e xraxaon sen. Ko tjume e joa ndo naa chjan ko bake e ndo xjan tjenka ndo,

⁴⁸ *ko ndache ndo sen:

—Ngisen tsayé e ichjan ji i ixi titikaonna sen; sen me e tayé e sen jan an kaxon. Ko ngisen tsayé ena jan an, kaxon tsayé e ngisen xruan anna. Méxin, ngisen ícha tjinte a ngakjen ennta, sen me e ícha tjintee sen ti tetuan an ndo Dio.

Chujni je a ningakoína, ni me e tsingijnana ixrā ntu una

(Mr. 9:38-40)

⁴⁹ Ko tjume e ndo Juan ndache ndo ndo Jesús:

—Maestro, jan anna bikona naa xi ixi juachaxiannta jitantsje xa espíritue Xixron anxrée; ko jan anna ntatjanna xa ixi ísinche a xa jaña, ixi je e xa chrijko iana xa.

⁵⁰ Ko ndachro ndo Jesús:

—Tingakuen anta ni me e, ixi ni ningakona ina, je e nā tsingijnanta nā.

Ndo Jesús kuyakutee ndo ndo Jacobo ko ndo Juan

⁵¹ Ko tjume e konchjiñe e nchakon satsji ndo Jesús nio ti jii ndotée ndo, ko xraxaon ndo itsji ndo tjanya Jerusalén.

⁵² Je e ndo xruan an ndo kaxin sen kuitaonxin sen cha o sa ó, ko sen me e ikjui sen naa tjanya nunte Samaria bijée sen naa nchia ti tsjoké e ndo Jesús ko kao je e sen.

⁵³ Koi jan an, chjen en ndo Dio, xjan jongí e xranchi chujni, jui a ixi sintatjáña chujni. Na i. Jan an jui i ixi tsantsjen ijié chónða nā ixi tsechón nā kain nchakon.

⁵⁴ Hora kono e ndo Jacobo ko ndo Juan ixi ni samaritano jua i tsajon nā juachaxin, je e sen ndache sen ndo Jesús:

—¿Ncháña, á tjaunnta ixi tsjanchiana xroxingajinxin xro i ngajní sinchetjáña kain ni me e xranchi juinche e ndo profeta Elías ó sa ó?

⁵⁵ Ko tjume e ndo Jesús ngatjia tsje e ndo sen, ko kuyakutee ndo sen, ko ndachro ndo:

—Ja anta noa inta ngixe e espíritu chondanta.

⁵⁶ Ixi jan an, chjen en ndo Dio, xjan jongí e xranchi chujni, jui a ixi sintatjáña chujni. Na i. Jan an jui i ixi tsantsjen ijié chónða nā ixi tsechón nā kain nchakon.

Ko tjume e sakjui sen inaa tjanya.

Ngisen tjaun xrorué e ndo Jesús

(Mt. 8:19-22)

⁵⁷ Nchakon stetji sen ngatja cha o, naa xi ndache xa ndo Jesús:

—Jan an tja on xrorua anta nguixin ti no satsjinta.

⁵⁸ Ko ndo Jesús ndache ndo xi me e:

—Kain kutuunta chónða ba tjaue tixin in ba, ko kain kuxe chónða ba kakée ba, ko jan an, chjen en ndo Dio, xjan jongí e xranchi chujni, chonda i ti no tsarichrin.

⁵⁹ Ko lñgo ndo Jesús ndache ndo xi me e:

—Ja a rua nana.

Ko xi me e juate e xa ndachro xa:

—Tájonnta juachaxin tsijabaja ndotána.

⁶⁰ Ko juatingíexin ndo Jesús ndachro ndo:

—Tintu enta chujni tsiken en tsjabaa kichuu nā; ko ja anta itjia ko ndachenta chujni xranchi jii juachaxin tetuan an ndo Dio.

⁶¹ Ko tjume e inaa xi ndache xa ndo Jesús:

—Jan an tja on xrorua anta; tintunanta xrontatjan sen nía.

⁶² Ko ndachro ndo Jesús:

—Ngisen teka ninge, ko ikjan sen tsje e sen, sen me e jua i sinche e ixrā ti tetuan an ndo Dio.

10

Ndo Jesús xruan an ndo setenta chujni

¹ Tjume e ndo Jesús kuinche e ndo níikán ko te chujni, ko je e ndo xruan an ndo sen, yuyu sen, tsitaon sen satsji sen kain tjajna ko nguixin ti no tjaun ndo xrokjui ndo.

² *Ko ndachro ndo:

—Nduaxin nta tjunta, ícha tsikoña noa jai, ko sen sinche e ixrã tsjé a sen. Méxin tinóatáanta ngajin nchéé nunte xroxruan an ndo itsjé sen sinche e ixrã.

³ *Satjinta ixí jan an xruan annta itsjinta xranchi kutuchjon ngakjen en kundanaxra.

⁴ Tiku inta bolsa, tomi, kate ko xro an ngisen chje énta juajna ngatja cha o.

⁵ Ti tsjasonta naa nchia, sa ó tájonnta juajna ko ndachronta: “Juaxruxin tsake e ni ste nchia ji i.”

⁶ Ko siá xrojan ni nchia tikinixin tsayé e nã juaxruxin, me e ícha juaxruxin tsayé e nã xranchi ndachronta; ko siá na i, juaxruxin me e xrokjan ngajinnta.

⁷ *Ti tsjasonta naa tjajna, tituan anta je o naakua nchia ko intenta ko tin innta ti xrotjáanta ni nchia me e, ixí ngisen nche e ixrã tikinixin xroxenge e nã i nã. Ko tji anta naa ko inaa nchia.

⁸ Ti tsjasonta naa tjajna ko ni ste nti a jian tsiya anta nã, intenta kain nge e xrotjáanta nã.

⁹ Nchexrue ennta ni ni e ste tjajna me e, ko ndachenta nã: “Í kjín a jitií juachaxin tsetuan an ndo Dio.”

¹⁰ *Ko siá tsjasonta naa tjajna ko tsaya inta nã jian, ja anta tachrjenta cha o ko ndachronta:

¹¹ *—Inche tjanáanta itsé tuténana, tontsjengana ixí tsjakoxinna ixí ja anta ko jan anna chonda ina nge e xrotsje ena ixí ja anta kuitikaon anta ndo. Ko tono anta ixí juachaxin tetuanxin ndo Dio ó kjín a jii juachaxin.”

¹² *Jan an nta tjunta nchakon tsjexin nunte xasintajni ícha tangi tson en ni tjajna me e ixí nge e kon en ni tjajna Sodoma ó sée.

Kaxin tjajna kuitikaon a

(Mt. 11:20-24)

¹³ *Tsango tangi tson annta ja anta ni tjajna Corazín! ¡Ko tsango tangi tson annta ja anta, ni tjajna Betsaida! Ixi siá ti ijié nge e junta a ngajinnta nti i xrokron en ngajin ni tjajna Tiro ko tjajna Sidón, ni me e ó sée xrokuindoxin nã ti ndako a juinche e nã ko xrotsjanga nã. Ko xrokueyá nã manta tiie ko xrobake e nã ntesoki i ngata a jaa nã.

¹⁴ Méxin nchakon tsjexin nunte nti i, ícha tangi tson annta ja anta ixí ti tson en ni tjajna Tiro ko tjajna Sidón.

¹⁵ Ko ja anta tjajna Capernaum, ¿á xraxaonnta itsjinta ti jii ndo Dio? Na i, je a jaña tson en, ja anta xroxingajinnta ti jii xro i xrochexin chujni titikaon a.

¹⁶ *Ko ndachro ndo Jesús:

—Ngisen tsitikaon ti xrondachro ja anta, kaxon tsitikaonna nã jan an. Ko ngisen tsitikaon a ti xrondachronta, kaxon tsitikaon ana nã. Ko chujni tsitikaon a nã jan an, kaxon tsitikaon a nã ngisen xruan anna jui i.

Ikjan sen setenta

¹⁷ Tjume e ikjan sen níikán ko te chujni ko tsango juaxruxin ste sen, ko ndachro sen:

—Ncháanana, kain espíritue Xixron anxrée titikaonna hora nichjana ixí juachaxiannta.

¹⁸ Ko ndachro ndo Jesús:

—Jaán, jan an bikon xranchi xingajinxin Xixron anxrée ngajni xranchi naa tóngíxin.

¹⁹ Jan an tjá anta juachaxin tsingatjanginta kunchee ko kulantajoon, ko tsixinte anta ti ña i, ko xro an nge e tson annta.

²⁰ Ko take anta juaxruxin ixí espíritue Xixron anxrée titikaon ngajinnta. Ícha juaxruxin tinteenta ixí xranchi tin innta ó jitaxin ngajni.

Ndo Jesús nichja ndo ngajin ndotée ndo jii ngajni

(Mt. 11:25-27; 13:16-17)

²¹ Ko hora me e Espíritue ndo Dio kuajon ngajin ndo Jesús juaxruxin ko ché e ndo nichje e ndo ndotée ndo jii ngajni ko ndachro ndo:

—Tajon juasaya ngajin ja anta Ndotána, Nchéé nunte ko ngajni, ixí kuajonnta juachaxin ixí ngisen noe a xrokuienxin nã nge e kondee ngajni ko juinchenoe anta ni tsango no e ko ni tsango tienxin. Jaña, juinche e ja anta Ndotána ixí jaña tjaunnta.

²² *Ko nichje e ndo sen nti a ko ndachro ndo:

—Ndotána chjána juachaxin ixi tetuan an kain nge e. Xro an ngisen no e ngisen chjen en je e ndo. Je o Ndotána chúxin ndo ngisen chjen en ndo. Ko xro an ngisen chúxin ngisen je e ndo, je o chjen en ndo, ko jan an tincha a ngisen tjaun xrochuxin Ndotána.

²³ Ko tjume e ndo Jesús tsje e ndo sen teyuu chrikao ndo ko je o sen ndache ndo sen:

—Juaxruxin ste ni bikonxin ixi ikon nge e bikon ja anta.

²⁴ Ntatjunta ixi itsjé sen kuanichja sen chijnie ndo Dio ko itsjé sen rey tjaun sen xrobikon sen ti bikonta, ko bikon a sen. Ko tjaun sen xrokuin en sen xranchi ritin ennta jai, ko kuien a sen.

Ndo Jesús tjako ndo ti junche e xi tjajna Samaria

²⁵ *Ko tjume e naa xi tjako ley tjajna Israel bingatjen xa nichje e xa ndo Jesús ixi tjaun xa tsono e xa á nduaxin no e ndo Jesús, ko juanchangi xa ndachro xa:

—Maestro, ¿inge e sinta a jan an ixi tsarichón kain nchakon?

²⁶ Ko ndachro ndo Jesús:

—¿Nge e jitaxin chijnie ndo Dio? ¿Nge e tienxian?

²⁷ Ko je e xa ndachro xa:

—Ley ndachro: “Tjue enta Ncháanta ndo Dio ixi nchijí asáanta, ko nchijí ja anta ko nchijí ti xraxaonxinnta; ko tjue enta ni kichuunta xranchi tjue enta asáanta.”

²⁸ Ko tjume e ndo Jesús ndachro ndo:

—Chao ndachrua. Síá ja a sinche e ji i, tsechón asáan kain nchakon.

²⁹ Ko xi tjako ley tjaun xa xrojuakoxin xa ixi icha jian no e xa, méxin ndache xa ndo Jesús íjngo:

—¿Ngisen ni kichuuna?

³⁰ Ko tjume e ndachro ndo Jesús:

—Naa xi kuixin xa tjajna Jerusalén jitji xa tjajna Jericó, ko ngatja cha o bingakon en xa kaxin xiche e, ko kue e na xa kain nge e chóna xa ko kain ti jitsáa xa, ko juaya na ngajin xa, xranaáxrokóñaxón na xa. Ko tjume e sakjui na.

³¹ Ko tjume e naa xitaana judío jitji xa xraje o cha o, ko bikon xa jitsinga xi me e, ko xitaana konchjino xa ko sakjui xa.

³² Ko kaxon no nti a jitatsinga naa xi levita, ko bikon xa xi jitsinga, ko kaxon konchjino xa.

³³ Ko kaxon nti a jitji naa xi kuixin nunte Samaria, ko bikon xa jitsinga xi judío, ko je e xa bikonóe e xa xi me e.

³⁴ Ko konchjiñe e xa tjenka xa, ko juinchexruen en xa ixi aceite ko vino kain ti no tsikoni e xa, ko kuetsía xa jian ti no tsikoni e. Ko tjume e juinçeketa a xa xi kuntajnoé xa ko sabikao xa xi ni e naa nchia tjokéexin na, ko nti a je e xa kuayakon en xa xi ni e.

³⁵ Ko nchakon sakjui xa, kuantsje xa yuu tomi ko juenga xa i na ngajin xi ndo a, ko ndachro xa: “Tayakon én xi ji i, ko siá sinchexienxian icha tomi ixi je e xa, jan an tsjenga a na nchakon xrokjanna.”

³⁶ Méxin ndachijiana, ¿ngisen ti ní xi ji i nduaxin tjue e xa xi juincheni e xiche e?

³⁷ Ko xi tjako ley ndachro xa:

—Xi bikonóe e xi ni e.

Ko tjume e ndachro ndo Jesús:

—Méxin ja a kaxon itjia ko nche e jaña.

Ndo Jesús ikjui ndo ndo a jan Marta ko jan María

³⁸ *Tjume e ndo Jesús sakjui ndo, ko kuiji ndo naa tjajna nchíin. Nti a jii naa jan ndatin in Marta ko kuajon jan juachaxin kuitu e ndo ndo a jan.

³⁹ Ko je e jan Marta chóna jan naa jan kichuu jan ndatin in María. Ko je e jan María bake e jan tjenka tutée ndo Jesús stetin en jan nge e jindachro ndo.

⁴⁰ Ko jan Marta tsango xraxaon jan sinçekonchjian jan nge e sine sen ko chóna jan itsjé xra, méxin konchjiñe e jan ngajin ndo Jesús ko ndachro jan:

—¿Nchána, á xraxaon a ixi jan kichuuna tintuna jan jan on rinta a kain ixra? Ndache jan tsingijnana jan.

⁴¹ Ko ndo Jesús ndache ndo jan Marta:

—Marta, Marta, ja anta tsango yaanta juachjaon ixi kain ixra chondanta,

⁴² ko jii naakua nge e tsango tjintee. Ko jan María kuitja jan nge e icha jian, ko xro an ngisen tsantsje e jan ji i.

11

*Ndo Jesús juako ndo xranchi xronichje eni ndo Dio
(Mt. 6:9-15; 7:7-11)*

¹ Naa nchakon ndo Jesús jinichje e ndo ndotée ndo, ndo Dio, ko juexin nichja ndo, tjume e naa sen chrikao ndo ndachro sen:

—Nchána, nchekuannaninta xranchi xronichja ana ndo Dio xranchi ndo Juan juako e ndo chujnie ndo.

² Ko ndachro ndo Jesús:

—Nchakon nichje enta ndo Dio, ndachronta:

Ndotáina Dio ritjennta ngajní,

tsango tjúá ja anta.

Ja anta tetuan annta ngajinna.

Nche enta xranchi tjaunnta ngata a nunte nti i, xranchi nche enta ngajní.

³ Ko ja anta tájonnta nutja sinena kain nchakon.

⁴ Ko nchemé enta kain ti ndako a nta ana, xranchi jan anna tjáñanana ti ndako a juinchenana na.

Tájon anta juachaxin ngajin Xixron anxrée ixi sinche e xa tsitexinna ti ndako a.

⁵ Ko kaxon ndachro ndo Jesús:

—Take kona ixi naa ja anta chondanta naa xi tjentonta, ko ngusine tiie xrokjuinta ndo a xa ko xrondachenta xa: “Amigo, nchekjenna níi nutja,

⁶ ixi kuíi naa xi chúxin, kuíxin xa ikjín, ko kuíi xa nía ko jan an xro an chonda xrotjá a xa.”

⁷ Ko siá tsjate e xi jii ngaxin in nchia xrondachro xa: “Chjánai ana ixra; ó jije e nchia ko chjan na ko jan an ó sintechrina; jua i tsaya xrotjá a nge e.”

⁸ Ko ntatjunta siá chro a xa tsaya xa xrotjáanta xa nge e tjaunnta maski tjentonta xa, tsaya xa xrotjáanta xa kain nge e xrokonda anta ixi itjaun a xa ícha xrokuiye enta xa.

⁹ Méxin, jan an ntatjunta: Tjanchianta ko ndo Dio tsajon ndo; tjéenta nge e ko tsinchíinta; tinganta ntachja, ko tsantje e ndo.

¹⁰ Ixi ngisen tjanchia nge e, tsayé e sen; ko ngisen tjéé, sen me e tsitja sen; ko ngisen tinga ntachja, xitje e ntachja.

¹¹ ¿Á xrojan ja anta chondanta chjan anta ko tjanchia xjan nutja, á xrochje énta xjan naa ixro? O, ¿tjanchia xjan kucheé ko xrochje énta xjan naa kunchee?

¹² ¿O tjanchia xjan joja ko xrochje énta xjan naa kuntanchia?

¹³ Méxin, siá ja anta maski jian inta no anta chje énta chjan anta nge e jian, ícha Ndotáina ndo Dio jii ngajní tsajon ndo Espíritue ndo ngajin sen tsjanche e ndo!

*Ndachro na ixi ndo Jesús chóna ndo juachaxien Xixron anxrée
(Mt. 12:22-30; Mr. 3:19-27)*

¹⁴ Naa nchakon ndo Jesús kuantsje ndo naa espíritue Xixron anxrée tsijinchenosin naa xi. Ko hora kuachrje espíritue Xixron anxrée, je e xi chao nichja xa. Tjume e kueya ni ste nti a xronka na ixi jaña juinche e ndo Jesús.

¹⁵ *Ko kaxin na ndachro na:

—Xi ji in tantsje xa espíritue Xixron anxrée ixi chóna xa juachaxien Beelzebú, me e Xixron anxrée, xi tetuen en kain espíritu ña i.

¹⁶ *Ko ikaxin na tjaunna na xrotsje e na á nduaxin no e ndo Jesús, méxin juanche e na ndo xrojuinche e ndo naa ixra jjié ixi juachaxien ndo Dio jii ngajní.

¹⁷ Ko je e ndo no e ndo nge e stexraxaon na, ko ndachro ndo:

—Xrojan tjajna je a naxraje o xraxaon ni tjajna me e ko te to kichuu na, ndatsitjáña, ko ni ste naa nchia, siá je a naxraje o xraxaon na, kaxon jua i tsintee na.

¹⁸ Jaña kaxon, siá Xixron anxrée tətəka o xa ni kichuu xa, tsitjáña juachaxin chóna xa. Ja in ndachrjan, ixi ja anta ndachronta ixi jan an tantsjexin espíritue Xixron anxrée ixi juachaxien xa.

¹⁹ Ko siá jaña xrokjuí, ¿ngisen chjéé ni chrjiku u ja anta juachaxin tsantsje na espíritu ña i? Méxin, je e na xrondachro na ndako a jii nge e stexraxaonnta.

²⁰ Ko siá jan an tantsjexin espíritue Xixron anxrée juachaxien ndo Dio, me e xrondachro ixi ti tetuan an ndo Dio ó kuíi ngajinnta.

²¹ Nchakon naa xi tsanga yaa xa ntatjo ko jindaa xa ndo a xa, xro an nge e tsitjáña.

²² Ko nchakon tii inaa xi ícha tsanga ko tsetəka o xa xi nchéé nchia ko tsjacha xa, ko tsantsje e xa kain chika yama xi ndo a, ko satsjikao xa kain nge e chóna xi ndo a ko tsonchjeya ngajin ni chúxin xa.

²³ *Ngisen titikaon ana jan an, ni me e ningakonna; ko ngisen tingijna i ixra nta a, ni me e tingakon enna.

*Naa espíritue Xixron anxrée íjngo ikjan
(Mt. 12:43-45)*

²⁴ *Ko naa espíritue Xixron anxrée kuachrxjin aséen naa chujni, satji ti jii nunte xema tijée no tsjoké e. Ko kuitja i ti no tsjokéexin, je e espíritu jixraxaon: “Jan an xrokjanna nía ti kuachrxjin.”

²⁵ Ko nchakon ikjan espíritue Xixron anxrée, tjume e tixin in aséen chujni ti kuachrxjin, ixi bikon xa ni me e ste na xranchi naa nchia tsikajon na ko chaxro tsje e.

²⁶ Ko tjume e espíritue Xixron anxrée tirué e yatq espíritu ícha ña i, ko kain espíritu tixin in ngaxin in aséen ni me e. Ko tjume e ícha tangi ton en na ixi sa ó.

Ngisen nduaxin juaxruxin jii

²⁷ Ko ndo Jesús jimichja ndo kain ji i, ko tjume e naa nchri ste ngakjen en na nti a, nichja nchra ndachro nchra séen:

—¡Tsango juaxruxin jii nchri juantajongí a ko juentakangia!

²⁸ Ko ndachro ndo Jesús:

—¡Ícha juaxruxin tsintee chujni tin en nge e ndachro ndo Dio ko titikaon!

*Ni ndako a xraxaon juanchia na naa nge e ijie
(Mt. 12:38-42; Mr. 8:12)*

²⁹ *Tjume e itsjé na konkueya na ngandajin ndo Jesús, ko je e ndo juangíxin nichja ndo ko ndachro ndo:

—Kain ni ste jai, je e na ña i na ko tjanchia na tsikon na naa nge e ijie; ko xro an nge e sinta a; je o nge e kon en ndo profeta Jonás, ndo kuachronga chijnie ndo Dio sa ó.

³⁰ Xranchi konoxin ndo Jonás ngajin ni kuintee tjajna Nínive ixi xrokuiexin na, jaña kaxon konoxinna jan an, Chjen en ndo Dio, xjan jongí e xranchi chujni, ixi tsikon kain ni jii jai.

³¹ Nchakon tsoña ijíee kain ni ste jai, nchri reina tsiki xín naa nunte ícha níjin tsingatjen nchra ko tsjankata a nchra ijie ni ste jai ixi nchri reina me e tsiki xín tsango ikjin ixi xrokuin en nchra ti juako ndo Salomón. Ko jai nti i ritjén jan an ngajinnta ko ícha chonda juachaxin ixi juachaxin kuachónnda ndo Salomón.

³² Ko ni kuintee tjajna Nínive kaxon tsingatjen na nchakon tsoña ijie ngajin kain chujni, ko tsjankata a na ijie ni ste jai ixi kain ni tjajna Nínive kuindexin na ko kuintu e na ijie kuachónnda na nchakon kuin en na chijnie ndo Dio tsichronga ndo Jonás ó sée. Ko jai nti i ritjén jan an ngajinnta ko ícha chonda juachaxin ixi juachaxin kuachónnda ndo Jonás.

*Ikonni, me e xro i tingasáña cuerpoeni
(Mt. 5:15; 6:22-23)*

³³ *Xro an ngisen tjaaka naa xro i ko tsemá sen xro i me e, ko kaxon take a na xro i ngaxin in naa ntaq. Noi take e na xro i ixi kain ni tixin in nchia tsikon na ti tingasáña.

³⁴ Jaña ikonni xranchi naa xro i tingasáña cuerpoeni. Méxin, siá jian ikonnta, kaxon nguixin cuerpoanta tingasáña. Ko siá na i, jian a ikonnta, kaxon nguixin cuerpoanta naxixe e jii.

³⁵ Tsje enta jian ixi á chao jii xro i chondanta, á je a ti naxixe e stenta.

³⁶ Méxin, siá nchijíi cuerpoanta chónnda ti tingasáña, ko je a tu o chónnda naxixe e, jaña nchijíinta jian tingasáña xranchi xrochondanta naa xro i chaxro tingasáña.

*Ndo Jesús tuyakuté e ndo xi fariseo ko xi tjako ley
(Mt. 23:1-36; Mr. 12:38-40; Lc. 20:45-47)*

³⁷ Ndo Jesús juexin ndachro ndo kain ji i, tjume e naa xi fariseo kuinóatée xa ngajin ndo Jesús ixi itsji ndo ndo a xa sineka o xa ndo. Tjume e ikjui ndo Jesús ndo a xa ko kuixin in ndo ko bake e ndo ti jii mesa.

³⁸ Ko je e xi fariseo xrakon xa ixi bikon xa ixi ndo Jesús bake e ndo juine ndo ko konti a ndo inda itja ndo xranchi kuanche e kain ni judío.

³⁹ Ko ndo Jesús ndachro ndo:

—Ja anta xi fariseo nchetjúánta tuenxin vaso ko laoto, ko ti ngaya asáanta jikaon kain ti chjuya anta ko ña inta.

⁴⁰ ¡Ja anta nintanta! ¿Á noa inta ixi ngisen juinchekonchjian cuerpo, kaxon juinchekonchjian ngaxin in cuerpo?

⁴¹ Siá ixi nchijíi asáanta chje énta ni nóa nge e chondanta, kaxon jaña nchijíi asáanta tsontjúá.

⁴² '¡Tsango tangi tson annta ja anta fariseonta! Ixi ja anta chje énta ndo Dio ti texin parte ka menta ko kain kaxroan, ika ko itu ineni ko nche anta nge e jian xrojuinche enta ko tjao anta ndo Dio, méxin chao xrochje énta ndo Dio nge e chondanta ko kaxon xrotjáña inta sinche enta kain nge e jian.

⁴³ '¡Tsango tangi tson annta, ja anta fariseonta! Ja anta tjaunnta tsaye enta xitaon ícha chaxro ngaxin in ni ngo, ko tjaunnta ixi kain na xrotjáanta juajna ngatja cha o.

⁴⁴ '¡Tsango tangi tson annta ja anta xratjakonta ley ko ja anta fariseonta ixi ja anta nche anta xranchi ndachronta! Ixi ja anta xranchi tuye tsixrabaa ni tsiken en stenta ko tikon a na tuye me e ko ta tu na tuye ko noe a na ixi nti a tsixrabaa chujni.

⁴⁵ Ko tjume e naa xi tjako ley ndache xa ndo Jesús:

—Maestro, ti ndachronta jaña, xranchi jan anna tuyakutéentana.

⁴⁶ Ko ndachro ndo Jesús:

—¡Kaxon ja anta tsango tangi tson annta, ja anta xro tjakonta ley! Ixi ja anta tetuen ennta na sinche e na nge e tsango tangi ko jua i sinche e na me e. Ko ja anta tingijna inta na sinche e na kain ti tetuan annta.

⁴⁷ '¡Tsango tangi tson annta xi ja anta nchekonchjiannta tjatu o tsango chaxro ngata a ti jixrabaa kain sen profeta tsichronga chijnie ndo Dio sa ó, ko me e ni ndotáchri anta xranchrjen tsikoña na sen!

⁴⁸ Ko jaña ja anta tjakonta ixi chao ti tsijinche e ndotáchri anta xranchrjen sa ó, ixi je e na tsikoña na sen profeta ko jai ja anta nchekonchjiannta tjatu o chaxro ngata a ti jixrabaa sen me e.

⁴⁹ 'Ko ndo Dio tsango jian no e ndo, méxin, ndachro ndo: “Xroxruan annta ngisen xrochronga chijnina ko ngisen tsjako ngajinnta, ko ja anta naatsóñaxónnta sen ko ikaxin sen chinga sinchekuunta sen.”

⁵⁰ Méxin, ndo Dio tsjankata a ndo ijie ngajin ni jii jai ixi kain sen profeta kuinteken en ko kuintj jnie sen, ti xra xrangixixión konchjian nunte ko ti nchakon jai;

⁵¹ xranchakon kuen en ndo Abel ko hasta ti kuen en ndo Zacarías, ndo kóñaxin na ngusine ti jii altar ko ni ngo. Méxin, ntatjunta, ndo Dio tsjankata a ndo ijie ngajin ni ste jai ixi xranchi kuen en kain sen sa ó.

⁵² '¡Tsango tangi tson annta ja anta xro tjakonta ley! Ixi ja anta chondanta xroon jitaxin kain ti tetuan an ndo Dio ko ja anta tjaun anta titikaonnta, ko tingijna inta ni tjaun tsitikaon.

⁵³ Juexin ndachro ndo Jesús kain ji i, tjume e xi tjako ley ko xi fariseo tsango koña o xa ngajin ndo Jesús, ko tjume e juanchangi e xa ndo Jesús tsango itsjé nge e,

⁵⁴ ixi xrobikon xa siá je e ndo xronichja ndo naa nge e ndako a ixi chao xrobankata a xa ijie ngajin ndo.

12

Ndo Jesús ndachro ndo nge e tson en ni fariseo

¹ *Tjume e xejo kueya na, tsango kueya na stetateyá kichuu na. Ko je e ndo Jesús kuaxi nichja ndo sa ó ngajin sen teyuu chrikao ndo ko ndachro ndo:

—Nche anta xranchi nche e xi fariseo, ixi ndachro xa ko nichja xa jian ko ti ndachro xa, nche a xa.

² *Ixi xro an nge e nche e chujni tsemá, kain nge e ti nche e chujni ti jimá, kain me e naa nchakon tsonoxin.

³ Méxin, kain ti imao tsinichjanta, tsij nchakon tsonoxin; ko kain ti tsinichjanta imao ngaxin in nchia, tsajin in na nchia tsuyako na tsin en kain chujni.

Ngisen xroxrakon enni

(Mt. 10:28-31)

⁴ 'Jan an ntatjunta ixi tjento kichuuna, xrakuen anta ngisen naatóñaxón cuerpoeni ixi me ó chao sinche e na.

⁵ Jan an xrontatjunta ngisen xroxrakon ennta: xrakon ennta ndo nduaxin tsantsja anta asáanta ko chóna ndo juachaxin xroxruan annta ndo ti xro i xrochexin kain ni ndako a nche e. Je o ngajin je e ndo xroxrankana.

⁶ '¿Á tuchji a na ó kuxechjan ixi yuu tomi nchínchín? Ko je e ndo Dio tjáñe a ndo ninaa ba.

⁷ Ko ngujngu ja anta Ndotáina Dio je e ndo no e ndo ngijan in xrajaanta chondanta; je e ndo beki ndo naa ko naa ka. Méxin, ja anta xrakon anta, ixi ja anta ícha tjinteenta ixi kueya kuxechjan.

Ngisen tsovue a xrondachro chuxinna ngatoxin ikon chujni
(Mt. 10:32-33; 12:32; 10:19-20)

⁸ Jan an ntatjunta ixi kain sen xrondachro chuxinna ngatoxin ikon chujni, kaxon jan an, chjen en ndo Dio, xjan jongí e xranchi chujni, xrontatjan kain sen angéel ndo Dio ixi jan an kaxon chuxin sen.

⁹ Ko ni xrondachro chuxin ana na ngatoxin ikon chujni, jan an kaxon xrondachrjan ngajin sen angéel kondee ndo Dio ixi chúxin a sen kaxon.

¹⁰ *Ko xrojan ni xronichja ndako a kondee najan an, chjen en ndo Dio, xjan jongí e xranchi chujni, xrachao tsové e jiee ni me e; ko ni xronichja ndako a kondee espíritué ndo Dio, ni me e tsango tangi tson en na ko tsové a jieena na.

¹¹ *Ko nchakon tsiku unta na ngajin ni ste ni ngo, o ngajin xi sinchéña ijie, o naa xi tetuan an, ta inta juachjaon ixi nge e tsjatingíexinnta o nge e xrondachronta,

¹² ixi Espiritue ndo Dio sintakuan annta ko xrondachro nge e tsjatingíexinnta.

Ti ndakua i xraxaon naa ni chóna tomi

¹³ Tjume e naa xi jii ngakjen en kueya na ndache xa ndo Jesús:

—Nchána, ndache xi kichian xrochána xa ngusinexin ti kuintu e sen nía.

¹⁴ Ko je e ndo Jesús ndache ndo xa:

—¿Ngisen ndachro ixi jan an sintaña ijie ngajinnta ko tsonchjeya anta ti kuintu e ni ndúinta?

¹⁵ Ko kaxon ndache ndo kain ni stetin en:

—Ko xroxraxaon anta ixi xrochondanta itsjé nge e ko itsjé tomi. Ixi je a ti itsjé xrochondanta, me e xrotjáanta juaxruxin.

¹⁶ Ko kaxon ndo Jesús beki e ndo na naa chijni:

—Bake e naa xi kuachóna xa itsjé nge e. Ko chjakée xa kóna kueya trigo, méxin, kueya juatsi in xa.

¹⁷ Ko je e xa jixraxaon xa: “¿Nge e sinta a ixi íko a no tsengachjian kain trigo juaka?”

¹⁸ Ko ndachro xa: “Ó nóna nge e sinta a. Tsonjamangi kain nchia nchíin ko sintaña kaxin nchia ícha ijie ko nti a tsjatsiin kain trigo kóna.”

¹⁹ Ko xrontatjan aséenna: “Kueya nge e kuatsían ko chonda itsjé nge e tsarichonxian itsjé nano. Inte ko ti ia, tjoka a ko take é juaxruxin.”

²⁰ Ko je e ndo Dio ndache ndo xa: “Ja a ndako a xraxaon ko tienxin a, ixi tiie jai tsen én ko tsitjáña asáan ko, ¿ngisen tsonde e kain ti kuatsían?”

²¹ Ko jaña tson en kain ni ícha tjaun xrochóna tomi ko kain nge e jii ngata a nunte ko xro an nge e chóna na ngajin ndo Dio.

Ndo Dio tayakon en ndo kain chjen en ndo
(Mt. 6:25-34)

²² Ko tjume e ndache ndo Jesús sen teyuu chrikao ndo:

—Jan an ntatjunta ta inta juachjaon ixi nge e sintenta ko nge e tsaritsiinta.

²³ Ícha tjintee ti tsechónni ixi nge e sineni, ko cuerpoeni ícha tjintee ixi manta tsetsáni.

²⁴ Tsje enta xranchi jii kunta a. Tenga i ba ko xro an noa tatsi in ba, ko chóna i ba no tsechjianxin no, ko ndo Dio tajon ndo nge e ine ba. ¿Á je a ícha tjinteenta ja anta ixi kuxe?

²⁵ Maski ja anta, ícha taanta juachjaon, jua i tsarichonnta ícha nchakon.

²⁶ Siá jua i nche enta nge e ícha tangi a, ¿sonda yaanta juachjaon ixi ti ícha tangi?

²⁷ Tsje enta xranchi tangi itsjo, tsjo me e nche a tsjo ixra ni tjaun a tsjo manta. Ko jan an ntatjunta ixi ndo rey Salomón, maski ícha chaxro kuetsaa ndo, kuetsa i ndo xranchi naa itsjo me e.

²⁸ Siá ndo Dio nchekitsáa ndo ika, maski jai jichón ka ngataon ijngi ko ndúya ó xroche ka, ko á je a ícha chaxro sinchekitsáanta ndo ja anta ti chuntia inta ndo.

²⁹ Méxin, ja anta ta inta juachjaon ixi nge e sintenta o nge e tsi inta.

³⁰ Ixi ngisen chúxin a ndo Dio ícha tjaun na xrochóna na kain nge e. Ko ja anta chondanta Ndotánta jii ngajni, ko je e ndo ó no e ndo kain nge e xrokonda anta.

³¹ Ko ja anta cháña sa ó tjéenta ti tetuan an ndo Dio, ko je e ndo tsajon ndo kain nge e xrokonda anta.

Tsango tjintee nge e xrochondana ngajni
(Mt. 6:19-21)

³² Kutuchjonna xrakon anta. Maski kueya inta, Ndotánta jii ngajni, tjaun ndo tsake enta ngajin ndo.

³³ Nchekjinta ti chondanta ko chje énta tomi ni nóa; ko tjume e nchekonchjianta puxa tichje a, ixi jaña xrochondanta ti ícha tjintee ngajni, ko me e kain nchakon tsake e ko tsjexin a. Ixi nti a jua i tixin in xiche e ko tj a kuchji.

³⁴ Ixi ti no tsake enta ti tjintee chondanta, nti a tsake e asáanta kaxon.

Xrotjá inta kotachrin, tsarichonnta

³⁵ *Kainko nchakon jian xrotsje enta ko nchekanga inta xro i jii ngaya asáanta.

³⁶ *Ja anta take énta xranchi naa xi nche e ixra, xi jichón en xa xrokjan nchéé xa, ndo tsj xin ti tsikute e na. Ixi hora tsj nchéé xa ko tseyá ndo, je e xa tuinxin tsantje e xa ntachja tixin in ndo.

³⁷ Tsango juaxruxin tsintee kain ngisen nche e ixra nchakon xrokjan nchéé na ko tsitja ndo na stehón na, tsikejua i na. Ko jan an ntatjunta, ixi je e ndo tsajon ndo juachaxin tsake e na ti jii ntachaon* ko tsajon ndo nge e sine na.

³⁸ Ijje juaxruxin tsintee na maski tsj ndo ngusine tiie o tsingasañaja ixi stehón en na ndo ko tsikejua i na.

³⁹ *Ko tienxinnta ji i: siá xi nchéé naa nchia xrokono e xa nge e hora tsj xiche e, je e xa xrokuejua i xa hora me e, ko xrokuintue a xa tsj xiche e ndo a xa.

⁴⁰ Ja anta kaxon tarichrin anta; ixi jan an, chjen en ndo Dio, xjan jongí e xranchi chujni, tsji i naa nchakon ko ja anta noa inta ngixe e nchakon ko ngixe i hora tsji i.

Yuu xi nche e xra, naa xi jian, ko naa xiña i

(Mt. 24:45-51)

⁴¹ Ko tjume e ndo Pedro juanchangi e ndo ndo Jesús:

—Ncháina Jesús, ti ndachronta ji i, zá tsienxin kain na o jan onna tsianxinna?

⁴² Ko juatingíexin ndo Jesús:

—Naa xi jian tetuan an ni nche e ixra, me e xrondachro ixi je e xa xrotsje e xa nchia ko tsajon xa sine kain ni ste nchia me e.

⁴³ Chaxro tsono e aséen xi me e nchakon tsj nchéé xa ko tsichuexin xa ixi jinche e xa ti kuituen en xa.

⁴⁴ Jan an ntatjunta ixi ndo tetuen en nchia tsake e ndo xi kuitikaon ixi je e xa tsetuan an xa kain ixra ko kain nge e chóna ndo ndo a.

⁴⁵ Ko siá xi sinche e kain ixra me e xroxraxaon xa ixi nchéé xa tsonchrjen en tsj ndo, ko tsaa xa ndako a sinchekao xa ni nchexra, ni nchri ko ni xi tituen en xa, ko je e xa take e xa sine xa ko tsi i xa ko xrokoan xa,

⁴⁶ Ko nchakon ko hora xraxaon a xa tsj nchéé xa, ndo tetuen en nchia, tjume e je e ndo tsoña o ndo ngajin xa ko tsikaon xa ko tsengi ndo xa. Xranchi tson en xi me e, jaña tson en kain ni titikaon a ndo Dio.

⁴⁷ Xi nche e ixra, siá no e xa nge e tjaun nchéé xa sinche e xa ko je e xa titikaon a xa ti kuituen en xa, xi me e tsanga tsikaon xa.

⁴⁸ Ko xi noe a ixi ti ndako a jinche e xa, xi me e ícha tsikaon a xa. Méxin, ngisen ícha kueya kuayé e, sen me e ícha kueya xrokonda tsajon sen. Ko sen ícha kueya no e, sen me e ícha kueya xroxranche e sen.

Je a naxraje o xraxaon na kondee ti juako ndo Jesús

(Mt. 10:34-36)

⁴⁹ Jan an jui i ixi sintakakiin xro i ngata a nunte nti i. ¡Ko jan an ó tja on xrojuag xro i jai!

⁵⁰ *Xrokonda nge e tsango tangi sinchena na, ko jai jitoni e aséenna tsijija nchakon tson en me e.

⁵¹ Siá ja anta xraxaonnta ixi jan an bikian juaxruxin ngata a nunte nti i, ntatjunta na i. Méxin jée xroxraxaon nguungunta.

⁵² Ixi nchakon xrangixixin jai ko kaxin nchakon tsj na ó ni ste naa nchia, ni me e xrochjeya na. Nii na tsoña o e na ni yuu ko ni yuu tsoña o e na ni níi.

⁵³ Ko ndotata xraningakon en ndo chjen en ndo, ko ichjan xraningakon en xjan ndotée xjan. Ko janána xraningakon en jan nchrichje en jan, ko nchrichje en jan xraningakon en xjan janée xjan. Jancha a xraningakon en jan nchritakinde e jan ko nchritakinda xraningakon en nchra jachée nchra.

Ngajni tjakoxin xranchi tson en nchakon tsj

(Mt. 16:1-4; Mr. 8:11-13)

⁵⁴ Ndo Jesús kaxon ndache ndo na:

—Ko nchakon tikonnta tsonchjian itjuj ti no tetaonxin nchakon, ja anta ndachronta ixi ó tsj chrin, ko jaña ton en.

⁵⁵ Ko nchakon chrinto t̄j x̄in no n̄jin, ja anta ndachronta tsania súa, ko jaña ton en.

⁵⁶ ¡Ja anta ndako a xraxaonnta! Ja anta ó no anta ko chuxinnta nge e ton en ngajni ko ngataon ijngi, ko ja anta noa inta ko tienxin anta nge e jiton en nchakon stenta.

T̄etokui anta ni kichuunta

(Mt. 5:25-26)

⁵⁷ ¿Sonda nchekonchjian inta ja onta ti nchekuu kichuunta?

⁵⁸ Siá xrojan ngisen tsjankata anta ijīe ko xrokonda itsjinta ngajin xi nchekonchjian ijīe, cháña naa tjaoxon kichuunta ti xrayáanta cha o ko xratjaso anta ti jii xi tetuan an. Ixi siá tsjasonta nti a, xi nchéña ijīe xroxraxin innta xa ndo achjiso.

⁵⁹ Ko jan an ntatjunta ixi tsachrxexin anta nti a tsjengajanta kain tomi chondanta.

13

Xrokonda tsindoxin n̄a ko sinche e n̄a ti jian

¹ Nchakon me e konchjīne e kaxin n̄a ngajin ndo Jesús ko beki e n̄a ndo xranchi juinche e xi Pilato ixi tsiketuan an xa kuen en kaxin xi tsik̄j x̄in nunte Galilea. Ko jnié xa tsikintji ti no chexin jnié iko ti bakajonxin n̄a juasaya ngajin ndo Dio.

² Ko ndo Jesús juatingíexin ndo:

—¿Á xraxaonnta ixi je e xa ícha kueya ijīe s̄inká xa ixi kain ni t̄jajnée xa ni Galilea, méxin jaña kon en xa?

³ Jan an ntatjunta ixi na i. Ko siá ja anta tsindoxin anta xranchi nche enta ko xranchi xraxaonnta, kainnta jaña tsinteken ennta kaxon.

⁴ O, ¿á xraxaonnta kaxon ni itejní kuen en, ni xratja torre Siloé? ¿Á ni me e ícha ijīe kuachónda n̄a ixi ikaxin ni bake e t̄jajna Jerusalén?

⁵ Jan an ntatjunta na i. Ko siá ja anta tsitikaon anta ti tetuan an ndo Dio, ja anta jaña tsinteken ennta kaxon.

Ntāa tu higo tajon a ntāa itu

⁶ Tjume e ndo Jesús beki e ndo sen:

—Naa xi kuachónda xa naa ntāa tu higo ngataon ijngi. Ko ikjui xa kuitsje e xa ntāa á chónda ntāa itu, ko xro an itu kuitja xa.

⁷ Ko tjume e ndache xa xi tsje e jngi e xa: “Ó chónda ní nano titsja a ntāa ji i ko xro an itu titja. Méxin cháña tonchrijian ntāa, xruenxon jita a ntāa ngata a nunte na.”

⁸ Ko xi tsje e ijngi ndachro xa: “Ja anta, tintu enta ntāa nano ji i; jan an sintandá inche tutée ntāa ko tsjánka ko tsjána ko tsjána xineno tsitjo.

⁹ Ko xrotsje ena á tsajon ntāa itu. Ko siá na i, me e ché xrochrijin ntāa.”

Ndo Jesús nchexruen en ndo naa nchri jisé

¹⁰ Naa nchakon tjoké e ni judío, ndo Jesús juinчекuen en ndo n̄a chijnie ndo Dio ngaxin in naa nchando e ndo Dio.

¹¹ Ko nti a jii naa nchri ni e itejní nano. Espíritue Xixron anxrée tsijatju o nchra, méxin jisé nchra, ko jua i xendua nchra.

¹² Ndo Jesús bikon ndo nchra, ko kuiye e ndo nchra ko ndachro ndo:

—Ja a nchri jai kuachrje ichin kuachonda.

¹³ Ko tjume e je e ndo bake e ndo itja ndo ngata a nchra, ko tuinxin je e nchra xendua nchra ko kuaxi nchra kuajon nchra juasaya ngajin ndo Dio.

¹⁴ Ko xi tetuan an ni ngo koñāo xa ixi ndo Jesús juinчexruen en ndo nchra nchakon tjoké e n̄a. Méxin je e xa ndache xa kain ni ste nti a:

—Jii ikjaon nchakon tikinixin tson en ixr̄a; nchakon me e tsji inta tsoxruan annta, ko jai nchakon tjoké eni tikinixin a tson en ji i.

¹⁵ Ko tjume e ndo Jesús ndache ndo xa:

—Ncheye a asáanta. ¿Á toxindange anta kuxinta anta o kuntajnoanta ko tiku unta ba tsi i ba inda nchakon tjoké eni?

¹⁶ Ko nchri ji i xjantié ndo Abraham, Xixron anxrée tsikintexin xa nchra ixi ichin tejní nano ko, ¿á tikinixin a tsoxrue en nchra nchakon tjoké eni?

¹⁷ Jaña ndachro ndo Jesús, méxin kaxin n̄a ningakon en n̄a ndo ixi juinchesue e ndo n̄a; ko ni ste nti a tsango juaxruxin ste n̄a ixi bikon n̄a tsango nge e ijié juinche e ndo.

Ndo Jesús juako ndo kondee naa tsēg mostaza

(Mt. 13:31-32; Mr. 4:30-32)

¹⁸ Ko tjume e ndachro ndo Jesús:

—¿Xranchi jii ti tetuan an ndo Dio?

¹⁹ Me e jii ndako naa tsee mostaza. Naa xi bengata tsee me e jngi e xa. Ko bangi ka ko kóña naa ntaq ijié ko kuxe juinchéña ba kaké ba ngata a chaan ntaq me e.

Ndo Jesús juako ndo kondee ti tja in nutja
(Mt. 13:33)

²⁰ Ko kaxon ndachro ndo Jesús:

—¿Nge e chao tsikonxinni ti tetuan an ndo Dio?

²¹ Me e xranchi ti nchetja in nutja ní medida ikuen tsitsé naa nchri ko jaña jua in chu u.

Ntáchja ijno
(Mt. 7:13-14, 21-23)

²² Sakjui ndo Jesús no tjanya Jerusalén, ko kuatsinga ndo itsjé tjanya ijié ko tjanya nchíin ko juincheken en ndo na chijnie ndo Dio.

²³ Ko bake e naa xi juanchangi e xa ndo Jesús ko ndachro xa:

—¿Á kain a chujni xrochóna juachaxin tsechón kain nchakon?

Ko ndo Jesús ndachro ndo:

²⁴ —Xakon annta tsixixinta ixi ntáchja ijno, ixi ntatjunta itsjé na tjaun na tixin in na nti a ko jua i tixin in na.

²⁵ Ko tjume e ndo ndo a tsingajten ndo ko tsije e ndo ntáchja ko ja anta tsitu anta nduja, tsinganta ntáchja ko xrondachronta: “Tantje enta ntáchja.” Ko je e ndo xrondachro ndo: “Jan an nóna i no juixin ja anta.”

²⁶ Ko tjume e ja anta tsjangixinta xrondachronta: “Jan anna kui ina ko juinena ngajinta, ko ja anta juinchekuannanta chijnie ndo Dio ngatja cha o tjaminana.”

²⁷ Ko je e ndo xrondachro ndo: “Jan an ó ntatjunta nóna i no juixinnta. Satjixinta ti ritjén jan an, ja anta ndako a nche enta.”

²⁸ *Nti a ja anta xrotsjanganta ko tseto nenonta nchakon tsikonnta ndo Abraham, ko ndo Isaac, ko ndo Jacob, ko kain sen profeta bake e sa ó, ste sen ngajni ti tetuan an ndo Dio, ko ja anta tsake enta nduja.

²⁹ Ixi tsj xjin chujni kain nunte; chuya, retuya, ku e ko no níjin ko tsake e na sine na ti tetuan an ndo Dio.

³⁰ *Méxin itsjé na jai xro an juachaxin chóna na, ko je e ni me e ícha ijié juachaxin xrochóna na; ko kaxin na jai tsango ijié juachaxin chóna na, ko ni me e íxro an juachaxin xrochóna na.

Ndo Jesús tsjanga ndo ixi tjanya Jerusalén
(Mt. 23:37-39)

³¹ Nchakon me e ikjui kaxin xi fariseo ko ndache xa ndo Jesús:

—Satjixinta nti i, ixi xi rey Herodes tjaun xa naatsónaxónnta xa.

³² Ko ndo Jesús ndachro ndo:

—Satjinta ko ndachenta xi me e, xi ndako a nche e: “Jai ko ndúya xratsantsje espíritu Xixron anxrée chóna chujni, ko sintaxruan an ni ni e, ko níxin nchakon ó sintajexin xraña.”

³³ Ko xrokonda xratsaji jan an jai ko ndúya ko tjenki, ixi kain sen profeta chronga chijnie ndo Dio xrokonda tsenxin sen tjanya Jerusalén.

³⁴ ¡Ja anta tjanya Jerusalén, ja anta tónanta kain sen chronga chijnie ndo Dio ko taxinta íxro sen xruan an ndo Dio kuji xrobingijnanta! ¡Jan an nanaunka fia on xroxra unta xranchi naa kuchika tja o ba chjen en ba ngangí nine e ba, ko ja anta chro anta!

³⁵ Méxin xrokono anta ixi nchianduinta je o ncha tsitu e ncha; ko xrontatjunta i tsikon antana tsija nchakon ja anta xrondachronta: “Tsango jian ngisen kuixin juachaxien ndo Dio.”

14

Ndo Jesús juinchexruen en ndo naa xi tsikatjuya

¹ Naa sábado nchakon tjoké e na, ndo Jesús ikjui ndo ndo a naa xi fariseo tetuan an, ko nti a chjé na ndo juine ndo. Ko nti a ste ícha xi fariseo stetsjaya xa ndo Jesús.

² Kaxon nti a jii naa xi tsikatjuya xa.

³ Ko ndo Jesús juanchangi e ndo xi tjako chijnie ndo Dio ko xi fariseo:

—¿Á jii juachaxin sinchexruen enni naa ni ni e nchakon tjoké eni?

⁴ Ko je e xa tenko xa. Tjume e ndo Jesús itsé ndo itja xi ni e, ko juinchexruen en ndo xa ko ndache ndo xa chao satsji xa.

⁵ *Tjume e ndo Jesús ndache ndo xi fariseo:

—¿Ngixe e ja anta, siá naa kuntajnoanta o naa kuxinta anta tsitsingaya ba naa tuye, á tsantsje anta ba maski nchakon tjóké eni?

⁶ Ko xi fariseo jua i juatingíexin xa nge e ndachro ndo Jesús.

Chujni tsikiye e na tsijí na kíeé ni tute e

⁷ Ndo Jesús jitsje e ndo ixí kain ni konchjiñe e ti kíeé na, juéé na ntaxitaon jian jii ti mesé ni tsikute e, ko tjume e je e ndo ndachro ndo:

⁸ —Nchakon itsjinta naa kíeé ni tsute e, tjé anta ntaxitaon jii ícha tjenka ni tsikute e, ixí nchéxin tsijí naa ngisen ícha tetuan an ko ni me e xrokonda tsake e na nti a.

⁹ Ko ngisen kuiya anta ikjuinta kia xrontatjunta na: “Tingatjénxinta ti ntaxitaon rita anta ixí ña tsake e naa ngisen ji i.” Ko tjume e ja anta tsingatjennta ko tsake enta ti ntaxitaon jii ícha no ndá a ko tsoa anta.

¹⁰ Méxin naa ngisen xrondachro tsji inta naa kíeé na, ja anta cháña take énta ntaxitaon ícha no ndá a, ixí jaña ni ntatjunta jui inta kia xrontatjunta na: “Ja anta tatsinganta ti ntaxitaon jii ícha tjenka ni kute e.” Jaña ja anta tsaye enta ícha juasaya ngajinxin* kain ni ste nti a.

¹¹ *Ixi ni ícha sinchejié aséen, ni me e tjinte a na ko tsayé a na juachaxin tsetuan an na; ko ngisen nchejié a aséen, sen me e ícha tsayé e sen juachaxin tsetuan an sen.

¹² Ko ndo Jesús ndache ndo xi tsikiye e ndo tsijí ndo kíeé xa:

—Ja anta nchakon sinchéñanta naa kia, tiye anta chujni tjentonta, sen ndointa, sen kichuunta, sen ste tjenka ndointa chóna itsjé tomi, ixí sen me e chao sinchéña sen inaa kia ko tsiya anta sen itsjinta sinteku unta sen, ko jaña je e sen sinchekjan sen ti juine sen ndointa.

¹³ Méxin, nchakon ja anta sinchéñanta naa kia, tiye enta ni nóa, ni jua i itji, ni jua i tontengi je o, ko ni ntakutsin.

¹⁴ Ko jaña ícha juaxruxin xrochondanta asáanta, ixí maski ni me e jua i tsjenga anta na na. Nchakon xroxechón kain ni jian juinche e, ndo Dio tsjenga anta ndo na nge e jian juinche enta ngajin ni nóa.

Ndo Jesús juakoxin ndo xranchi kon en naa kia ijié

¹⁵ Kuin en naa xi jii tjenka mesa ko ndache xa ndo Jesús:

—Tsango juaxruxin tsake e ni sine ti tsake e kia ti tetuan an ndo Dio.

¹⁶ Ko ndo Jesús ndache ndo xi me e:

—Naa xi bake e xa naa kia ijié, ko kuiye e xa itsjé na tsijí na sine na.

¹⁷ Ko kuji hora sine na, ko xi me e xruan an xa naa xi nchexrée xa tsjirué e xa kain ni ndache xa tsijí ixí o chao jii kain nge e.

¹⁸ Ko kain ni me e kuaxi na ndache na xi kuetuan an xa kueya ko ndachro na ixí jua i tsijí na. Xi sa o ndachro xa: “Jan an kue na naa nunte, ko xrokonda tsitsja a nunte; toña o anta ixí tsji a.”

¹⁹ Ko ndachro inaa xa: “Jan an kue na na o yuntee kuxinta, ko xrokonda xrotsja a á chao nche e ba ixra; méxin, ndachrjan toña o anta ixí tsji a.”

²⁰ Ko inaa xa ndachro xa: “Jan an nandá kuténa, méxin, jua i itsji.”

²¹ Ko xi nchexra ikjan xa ngajin xi tsixrua an xa tsjirué e xa na ko chronga xa kain ji i. Ko je e xa kuin en xa nge e tsichro ni xrokui sine, ko koña o xa ko ndache xa xi nchexrée xa: “Jaiko itjia kain cha o ko kain ndasin chóna tjajna ji i, ko tikua nti i kain ni nóa ko ni jua i itji, ko ni jua i tontengi je o, ko ni tikon a.”

²² Tjume e je e xi nchexra ndachro xa: “Ó juinta a xranchi kuetuannanta, ko xrají ni tsintee ícha chujni.”

²³ Ko tjume e je e xi tetuan an ndache xa xi nchexra: “Itjia kain cha o ko kain cha o tatu ka ngande e tjajna, ko nchekateya na tsijí na, ixí jaña xrokaon nía.

²⁴ Jan an ndachrjan tjaun a tixin in ninaa ni kuiya a ícha sa o tsijí na sine na.”

Tangi rué eni ndo Jesucristo

²⁵ Tsango itsjé na rué e na ndo Jesús ko je e ndo ngatjia ndo ko ndache ndo na:

²⁶ *—Siá xrojjan ja anta tjaunnta xroruéna, xrokonda ícha xrotjaunninta jan an ixí ndotánta, o janánta, o janchri anta, o chjan anta, o nchrikichuunta o xi kichuunta, ko kaxon je a ícha xrotjue enta asáanta. Ko siá ícha xrotjaunnta jan an, chao xrokjannta sen chujnina.

²⁷ *Ko ngisen tsatsinga i juachjaon tsatsinga jan an ti tsen en na nganito ntacru, ni me e jua i xrokjan na sen chujnina.

* **14:10 ngajinxin** delante de **14:11** Mt. 23:12; Lc. 18:14. **14:26** Mt. 10:37. **14:27** Mt. 10:38; 16:24; Mr. 8:34; Lc. 9:23.

²⁸ Siá xrojannta tjaunnta sinchekonchjiannta naa tjatu o tsango noi, zá tsake anta sa ó xroxraxaonnta ngijan in tomi xrokonda tsonchjianxin tjatu o me e?, ko, zá chondanta kain tomi xrokonda tsjexixin tsonchjian tjatu o?

²⁹ Ixi siá na í, je o kuitenta ixro tseta a tjatu o ko juexin tomi, ko í juexin a juinchekonchjiannta tjatu o me e, ko kain ni tsikon tsjanoanta na ixi juexin a kuitenta tjatu o.

³⁰ Ko ni me e xrondachro na: “Xi ji i juangíxin xa juinchekonchjian xa tjatué e xa ko jue a xa kuite xa tjatu o.”

³¹ O naa xi rey xrokonda itsji xa ko tse tō xa ngajin inaa xi rey, zá je a sa ó xroxraxaon xa ixi á chao ixi ite mil xi soldado chóna xa, tse tō xa ngajin xi rey chóna ikán mil xi soldado?

³² Xi rey me e xraxaon xa ixi jua i tsjacha xa ngajin xi rey ti kueya xi soldado chóna xa, méxin xroxruan an xa kaxin na tsikao na juajna ngajin xi rey chóna kueya xi soldado ixi xrají xa ikjín, ko jaña tsetō a xa.

³³ Jaña, ja anta kaxon siá tsintue anta kain ti chondanta, jua i xrokjannta chujnina.

Nchakon xíjnta tojní a xíjnta

(Mt. 5:13; Mr. 9:50)

³⁴ Xíjnta tsango jian xíjnta tojnínin ti ineni ko nchakon sinchejní a xíjnta, ¿nge e tsojnínin ti sineni?

³⁵ Méxin nchakon tsojní a xíjnta ninge o tsonda xíjnta, tsintjini xíjnta ixi íxro anxrée xíjnta. Ngisen tin en, tsin en sen jian.

15

Juako ndo Jesús naa chijni kondee naa kutuchjon tsikitjáña

(Mt. 18:10-14)

¹ *Konchjiñe e xi xenge e i na tomi ti tjanchia xi tetuan an, ko kaxon kueya ni ndako a nche e konchjiñe e na ngajin ndo Jesús ixi tsin en na ti ndachro ndo.

² Tjume e xi fariseo ko xi tjako chijni kuetuan an ndo Dio nichjangí e na ndo Jesús, ko ndachro na:

—Xi Jesús tjento xa kain ni ndako a nche e ko nekao xa na.

³ Méxin ndo Jesús juako ndo naa chijni ngajin na:

⁴ —Ngixe e ja anta, chondanta naa ciento kutuchjon, ko sinchetjáña naa ba, zá tsintue anta ko noventa y nueve ngataon ijngi ko itsjinta tsijéenta iko kuitjáña ko tsinchjanta ba?

⁵ Ko nchakon tsinchínta ba, ja anta tsake enta juaxruxin ko tsamanta ba ngata a ntachaannta,

⁶ ko nchakon tsjasonta ndointa, tsiye enta ni tjentonta ko kain ni ste tjenka ndointa ko xrondachenta na: “Jai tsojuna juaxruxin ixi ó kuitja kutuchjonna, iko kuitjáña.”

⁷ Jan an ntatjunta, xraje o jaña Ndotáina jii ngajni ko kain sen ángel tsango ché e sen ixi naa ngisen ndako a juinche e ó titikaon sen chijnie ndo Dio ixi ni noventa y nueve jian nche e, íxrokonda i tsindoxin na.

Ndo Jesús juako ndo naa chijni kondee naa nchri

⁸ Ko kaxon ndachro ndo Jesús:

—Naa nchri chóna nchra ite tomi ko juinchetjáña nchra naa tomi, je e nchra sinchekakiin nchra xro i ixi tsjée nchra tomi juinchetjáña nchra ko tsajon nchra nguixin ngaxin in nchia tsitjaja nchra tomi juinchetjáña nchra.

⁹ Ko hora tsitja nchra tomi, tsiye e nchra kain nchri tjento nchra ko kain ni ste tjenka ndo a nchra ko xrondache nchra kain na: “Tújuna juaxruxin ixi ó kuitja tomi jintatjáña.”

¹⁰ Jan an ntatjunta kaxon ngajni kain sen ángel ne e ndo Dio ste sen juaxruxin nchakon naa ngisen ndako a juinche e tindoxin sen ko ikjan sen ngajin ndo Dio ko titikaon sen chijnie ndo.

Ndo Jesús juako ndo kondee naa chajan

¹¹ Ko kaxon ndachro ndo Jesús:

—Naa xi kuachóna xa yuu chajan.

¹² Ko chán yuxin ndache chán ndotée chán: “Tata, chjánanta tomi ko nge e tikinixin tsayá a jan an.” Ko tjume e je e ndo konchjeya ndo yui cháje en ndo ti tikinixin en chán.

¹³ Tsjé a nchakon kuatsinga, je e chán juinchejki chán ti kuayé e chán ko juejo chán kain tomi, ko tjume e sakjuí chán inaa tjajna ikjín ko juinche e chán kain ti ndako a, ko juinchexienxin chán kain tomi kuayé e chán.

¹⁴ Ko jue e chán juinchexienxin chán kain tomi, ko tjume e kuji nchakon kain ni tjajna me e tsango kuate se nã jinta ko je e chán tsango tangi kuatsinga chán kaxon.

¹⁵ Ko tjume e ikjui chán bijanchia chán ixrã ngajin naa xi tjajna nti a. Ko xi me e kotuen en xa chán itsji chán ngataon jngi e xa xrotsje e chán kuchinga.

¹⁶ Ko je e chán tsango baken en chán jinta, ixi xro an nge e jii sineni ko tjaun chán xrojuine chán tjaja bajine kuchinga.

¹⁷ Méxin bake e chán xraxaon chán ko ndachro chán: “¡Itsjé ni nchexrã ste nã ndo a ndotána! ¡Ko je e nã chónda nã itsjé nge e sine nã, ko jan an nti i jiteenxinna jinta!

¹⁸ Tsingatjen ko satsji ti jii ndotána ko xrontatjan ndo: Tata, jan an juinta a ti ndako a ngajin ndo Dio jii ngajni ko ngajinnta kaxon.

¹⁹ Ítikinixin a tsin inna chja annta; je o xrokjanna xranchi naa xi nchexráanta, naa xi xro an tjintee.”

²⁰ Tjume e kua chán cha o ikjan chán ndo a ndotée chán. Ko xrakjin jitiji chán, ndotée chán bikon ndo chán ko bikonóe e ndo chán ko binga ndo ti no jiti chán ko joa ndo chán ko kuetoixin ndo chán.

²¹ Ko tjume e je e chán ndache chán ndotée chán: “Tata, jan an juinta a ti ndako a ngajin ndo Dio jii ngajni ko ngajinnta kaxon. Méxin, ítikinixin a tsin inna chjan anta.”

²² Ko je e ndotée chán ndache ndo ni nchexrée ndo: “Taka tikuunta manta ícha jian ko tjintee ko nchekitsáanta chjan na; ko kaxon tsikuunta kuchaningo tseyá itja xjan, ko take énta xjan kate ícha tjintee.

²³ ¡Tsikuunta kuxinta ícha ntao ko to inta ba sintena ko sinchéñana kia!

²⁴ Ixi chjan na ji i xranchi xrokuen en xjan ko jai xechón xjan. Je e xjan kuitjáña xjan ko jai ikjan xjan. Nchéñana kia ko tújúna juaxruxin.”

²⁵ “Ko chán sa ó ngataon ijngi jinche e chán ixrã. Ko hora ikjan chán konchjiñe e chán nchia, kuin en chán jii soon ko steté nã.

²⁶ Me e kuiye e chán naa xi nchexrã ko juanchangi e chán xa: “¿Sonda jii kia?”

²⁷ Ko xi nchexrã me e ndachro xa: “Ikjan chán kichuunta, ko ndotánta kuatuan an ndo kuen en kuxinta ícha ntao ixi ikjan chán ko xro an nge e tsikon en chán.”

²⁸ Ko chán sa ó tsango koñao chán, ko chro a chán tixin in chán nchia. Ko je e ndotée chán kuachrje ndo ko juinchetsen en ndo ñao chán ixi tixin in chán nchia.

²⁹ Ko je e chán ndache chán ndotée chán: “Ja anta no anta ngijan in nano rinta a ixrã ngajinnta ko nai a nichjangí anta, ko ja anta ninaa kubitochjan chjána inta xrojuineki an xi tjento.

³⁰ Ko jai kuji chjan anta ji i, xjan ndako a juinchexienxin kain tomi ko kain nge e chje énta xjan, juinchexienxin xjan kain tomi kuayé e xjan ngajin nchri ndako a nche e, ko ja anta kon inta kuxinta ícha ntao ko juinchéñe enta xjan kia.”

³¹ Tjume e je e ndo ndache ndo chán sa ó: “Chjan na, ja a kain nchakon ritjén ngajin, ko kain ti chonda jan an, ja a tikinixin an.

³² Ko jai xrokonda tsojuna juaxruxin ko sinchéñana kia ixi xjan kichuua xrokjui xranchi ó kuen en xjan, ko jai xechón xjan ko je e xjan kuitjáña xjan, ko jai kuichuee xjan.”

16

Ndo Jesús juako ndo naa chijni kondee naa xi nche a jian

¹ Ndo Jesús beki e ndo sen teyuu chrikao ndo:

—Bake e naa xi chónda itsjé tomi, ko xi me e kuachónda xa naa xi bakeki kain tomi ko kain nge e kuachónda xa. Ko naa nchakon ikjui kaxin nã kuindache nã xi tomie ixi xi nchexrée xa tsango nchexienxin xa tomi ko nge e bake e गया itja xa.

² Ko tjume e xi tomie kuiye e xa xi nchexrée xa ko ndache kichuu xa: “¿Á nduaxin nche e xranchi bekinana jan an, nchexienxinkua tomina ko nge e chonda jan an? Jai ndachijiana nge e juinche e ixi kain nge e bakéé गया tjáa ko tomi bake kia ixi ja a ísinche a ixrã ngajin.”

³ Ko tjume e xi bakeki tomi bake e xa xraxaon xa: “¿Nge e sinta a jai ixi je e nchána tsantsjena xa ixrã? Jan an ísoji ina sinta a ixrã ngataon ijngi, ko tsosua na tsjanchaka a.

⁴ Ó nóna nge e sinta a nchakon i xrochonda ixrã ixi ni sinke e nchána tsiya na nã ndo a nã.”

⁵ Ko tjume e kuiye e xa ngujngu ni sinke e xi nchée xa. Ko je e xa juanchangi e xa xi kuji sa ó: “Ja a, ¿ngijan in tasinka ngajin nchána?”

⁶ Ko je e xa juatingéxin xa: “Jan an tasinka cien barril tikia ndaxi e ko tasinka ndaxi e me e.” Ko je e xi teki tomi ndachro xa: “Ítsé xroon ti jitaxin ti tasinka ko nchéñana tuinxin inaa xroon xrondachro je o tasinka cincuenta ntãbarril.”

⁷ Tjume e xi teki tomi juanchangi e xa inaa xi sínká: “Ja a, ¿ngjian in tasinka?” Xi me e juatingixin xa: “Cien costa noatrigio.” Ko tjume e je e xi teki tomi ndachro xa: “Itsé xroon ti jítaxin nge e tasinka ko tasintaxian je o tasinka noó ikán* costa.”

⁸ Tjume e xi tomie kono e xa nge e juinche e xi nchexrée xa, xi teki tomi, ko ndachro xa ixi xi ji i jaiko xraxaon xa nge e sinche e xa ixi kain ni ngata a nunte, ni chúxin a chijnie ndo Dio, ícha ña i na ixi tsingijna na ni naxraje o ndakua i nche e xranchi je e na ko sen titikaon chijnie ndo Dio, na i.

⁹ Jan an ntatjunta chijni ji i: tonda anta kain tomi ko kain nge e richondanta ngata a nunte nti i, ko tomi me e tsjachaxinnta chujni tsjentonta, ixi nchakon tsjexin kain nge e ko kain tomi, ja anta tsaye enta nchia jii ngajni tsarixi inta kain nchakon.

¹⁰ Ngisen tayakon en ti kueya i chónnda sen, kaxon chao tayakon en sen ti kueya xrochónnda sen, ko ngisen jua i tayakon en ti kueya i, kaxon jua i tayakon en sen ti kueya.

¹¹ Méxin siá jua i xrotsje enta jian tomi ko kain nge e jii ngata a nunte nti i, ¿ngisen tsake e ngaya tjáanta tomi nduaxin tjintee?

¹² Ko siá jua i xrotsje enta jian tomie inaa chujni, ¿ngisen xrotjá anta tomi nduaxin tikinixin annta?

¹³ *Ni nchexra jua i xrochónnda na yuu sen tituen en na, ixi xraningakon en na naa xi tituen en na ko xrotjue e na inaa xa, o chaxro tsitikaon na ngajin naa xa ko xronichjangí e na xi yuxin. Jaña kaxon jua i sinche e na ixra ngajin ndo Dio ko kaxon ícha xrotjue e na tomi.

¹⁴ Ko xi fariseo tsango tjue e xa tomi, méxin juanoa xa ndo Jesús ixi nge e ndachro ndo.

¹⁵ Ko ndo Jesús ndachro ndo:

—Ja anta tjaunnta tsono e na ixi jian ja anta ko je a nduaxin me e, ixi ndo Dio chúxin ndo asáanta. Méxin nge e tsango tjue e chujni, ndo Dio nche a ndo juaxruxin.

Ícha jian tsitikaonni chijnie ndo Dio

¹⁶ *Chijni kuayé e ndo Moisés ko kain ti tsindachro kain sen profeta me e chijnie ndo Dio. Chijni me e baketuan an ko kuachronga kain sen nche e xrée Ndo Dio kuiijja nchakon kuij ndo Juan, ndo bikitée na. Ko jan an tjá anta chijni jian chronga xranchi jii ngajni ti tetua an Ndo Dio. Méxin kain ni kuayé e chijni ji i tsango nche e na nge e ixi tixin in na ti no tetuan an ndo Dio.

¹⁷ *Ko jan an ntatjunta ixi ícha tangi a tsitjáña ngajni ko nunte nti i ixi tsitjáña naa letrée chijnie Ndo Dio.

Ndo Jesús juako ndo ixi chujni tsikute e jua i tsintu e kichuu na

(Mt. 19:1-12; Mr. 10:1-12)

¹⁸ *Siá naa xi tsikute e naa nchri ko tsij nchakon tsintu e xa janchri e xa ko tsute e xa inaa nchri, xi me e ndakua i jinche e xa ixi kuitikaon a xa ley kuetuan an ndo Dio. Kaxon, xi tsute e naa nchri tsikintu e ndoxi e nchra, xi me e kaxon ndakua i jinche e xa.

Xi chónnda itsjé tomi ko xi Lázaro, xi nóa

¹⁹ Bake e naa xi chónnda itsjé tomi ko teya xa manta tjintee, ko kain nchakon take e xa kia.

²⁰ Ko nduja ndo a xi me e bake e naa xi nóa bakin in Lázaro; xi me e tsango ni e xa, ko nchijji ntau e xa jirenga.

²¹ Ko kunia tonchjiñe e ba tuni ba ntau e xi nóa. Ko je e xa tjaun xa sine xa kain ti tsixe e ine xi chónnda itsjé tomi.

²² Ko tjume e naa nchakon xi nóa kuen en xa ko sen ángel sabikao sen xa ti juaxruxin ti jii ndo Abraham, ti jii kain sen jian. Ko kaxon xi chónnda itsjé tomi kuen en xa ko juabaa na xa.

²³ Ko xi kuachónnda itsjé tomi kaxon ikjui xa ti ste ni tsiken en ko tsango tangi ste na nti a. Je e xa tsje e xa noi ko ikjín bikon xa ti jii ndo Abraham ko xi Lázaro.

²⁴ Tjume e kuyako xa ko ndachro xa: “Tata Abraham, tikonóananta, ko xruan annta xi Lázaro sinchetjao xa dedue xa ixi inda ko tsij xa sinchetjao xa nejen ixi tsango tangi ritjén chringi xro i nti i.”

²⁵ Ko ndo Abraham ndache ndo xa: “Chjan na, xraxaon ixi tsango jian bake e ngata a nunte, ko tsango kueya nge e chaxro kuachonda, ko xi Lázaro tsango tangi bake e xa nti a. Ko jai je e xa nti i jii xa juaxruxin ko ja a tangi ritjén ti jii xroi.

²⁶ Ko kaxon jii naa yaso e tsango ijie ngusine ti ste jan anna ko ja anta. Méxin sen ste nti i maski xrotjaun sen xrokji sen tsingijnanta sen, jua i itsji sen; ko ni ste nti a jua i tsij na nti i ti ste jan anna.”

²⁷ Tjume e ndachro xi kuachónnda itsjé tomi: “Tata Abraham, jan an tinóatána, xruan annta xi Lázaro itsji xa ndo a ndotána

* 16:7 ikán veinte 16:13 Mt. 6:24. 16:16 Mt. 11:12, 13. 16:17 Mt. 5:18. 16:18 Mt. 5:32; 1Co. 7:10, 11.

²⁸ixi nti a ste na ó xi kichian, ko jan an tja on sincheno e sen xa chijnie ndo Dio, ko jaña jian tsitikaon xa, ko je e xa tsi a xa nti i ti jii xro i.”

²⁹Ko ndachro ndo Abraham: “Xi kichuua chónða xa xroon ti jitaxin tsikjin ndo Moisés, chijnie Ndo Dio ko ti tsinichja kain sen profeta. Sinchekuanxin xa ko tsitikaon xa xroon me e.”

³⁰Ko xi kuachónða itsjé tomi ndachro xa: “Na i, tata Abraham, tsitikaon a xa. Cháña xruan annta naa ngisen ó ndakuen en xronichje e sen xa, me e tsitikaon xa ko tsindoxin xa.”

³¹Tjume e ndachro ndo Abraham: “Siá tjaun a na tsitikaon na chijnie Ndo Dio tsikayé e ndo Moisés jitaxin xroon ko ti tsichronga kain sen profeta, maski tsikon na naa chujni ndakuen en ko xroxechón chujni, tsitikaon a na kaxon.”

17

Nge e nchekateyanta ixi sinche enta ti ndako a

(Mt. 18:6-7, 21-22; Mr. 9:42)

¹Ndo Jesús ndache ndo sen teyuu chrikao ndo:

—Itsjé nge e jii nchekateyani ixi sinche e ni ti ndako a, ko, ícha tangi tson en ngisen kondeexin sinche eni ti ndako a!

²Ni me e xrokuite e tusin na naa ixro ijíé ti tontsingaxin ko xrokuitsingangi na ndachaon ixi jaña ísinche a na ixi naa chjan xranoe a xrojuinche e xjan ti ndako a.

³*Taanta juachjaon ixi ja anta sinche anta ti ndako a, ko siá naa ni kichuunta sinche e ti ndako a ngajinnta, tuyakutéenta na; ko siá ísinche a na ti ndako a ngajinnta, ja anta tjáña anta nge e juunta anta na.

⁴Maski yaato ndakua i sinta anta na naa nchakon, ko yaato xrondachro na tjáña anta nge e juunta anta na, xrokonda yaato xrotjáña anta ja anta kaxon nge e juunta anta na.

Ti chúntiani Ndo Dio me e nche e ícha soji tsinteeni

⁵Sen kuajikao ndo Jesús ndache sen Ndo:

—Tingijnaninta ixi ícha xrochuntiana ngajinnta.

⁶Ko je e Ndo Jesús ndachro ndo:

—Siá ja anta xrochuntiana ndo Dio naa nchinchjaon xranchi naa tsee ka mostaza, ja anta xrondachenta naa ntayua: “Ja a tachrjengíxian inche nti i, ko xenga ngangí ndachaon”, ko ntaja me e tsitikaon ntaja.

Nge e xrokonda sinche e naa xi nchexra

⁷Siá naa ja anta, chondanta naa xi nchexra ko xi me e tsikikao xa ngataon ijngi yunta o kuitsje e xa kutuchjoanta, ko ikjan xa tondó, zá xrojan ja anta xrondachenta xa: “Xrokuia take é sinte?”

⁸Na i, ja anta xrondachenta xi nchexra me e: “Xakon an nchéñanana sine, ko tikia sine ko tsi i, ko tjume e take é sinte ja a.”

⁹Ko, zá kaxon tájonnta juasaya ngajin xi nchexra ixi kuitikaon xa nge e kuituen ennta xa?

¹⁰Jaña kaxon ja anta, ti tsjexin sinche enta kain ti kuetuan annta ndo Dio, xrondachronta: “Jan anna xi nchexra xro an tundana; ixi je o juunta ana ixra tikinixinnana sinta ana.”

Ndo Jesús juinhexruen en ndo ite xi kuachónða chinlepra

¹¹Ndo Jesús tingakitji ndo tjajna Jerusalén, kuatsinga ndo itsjé tjajna tikinixin en nunte Samaria ko nunte Galilea.

¹²Ko tjume e kuiji ndo tjenka naa tjajna, ko tjajna me e kuachrjexin ite* xi níexin chinlepra. Ko konchjiñe a xa tjenka ndo, ikjion kuíxi xa.

¹³Ko xi ni e me e kuyako xa ndache xa ndo:

—Jesús, Maestro, tikonóa nananta!

¹⁴Ko hora bikon ndo Jesús xi ni e ndachro ndo:

—Itjinta ko tjakonta ngajin xi taana tjako ley.

Ko xranchi stetji xi ni e, kuachrje chin en xa ko koxruen en xa.

¹⁵Ko naa xi ni e me e, bikon xa ixi koxruen en xa, ikjan xa ko kuajon xa juasaya ngajin ndo Dio.

¹⁶Bake exin xa ntatuchi in xa ngajin ndo Jesús, ko kuisée xa ngata a nche, kuajon xa juasaya ngajin ndo. Ko xi me e, xi tjajna Samaria.

¹⁷Ko tjume e ndachro ndo Jesús:

—¿Á je a ite xi koxruenxin ichin lepra? ¿No ste xi kaxin?

¹⁸¿Á je o xi ji i, xi kuixin ikjin, ikjan xa chjée xa juasaya ndo Dio?

¹⁹ Ko tjume e ndo Jesús ndache ndo xi me e:

—Tingatjen ko satjia; ixi nduaxin chuntia† ndo Dio, méxin koxruan an.

Tsij nchakon tsitian an Ndo Dio

(Mt. 24:23-28, 36-41)

²⁰ Ko tjume e xi fariseo juanchangi e xa ndo Jesús, ngisa tsij nchakon tsetuan an ndo Dio, ko ndo Jesús juatingéxin ndo:

—Nchakon tsij ti tsetuan an ndo Dio, ni chúxin a ndo jua i tsikon na ti tetuan an ndo.

²¹ Jua i xrondachro na: “Nti i jii”, o “no ji a jii”, ixi ti tetuan an Ndo Dio jii ngaya aséen ni titikaon.

²² Ko tjume e ndache ndo sen teyuu chrikao ndo:

—Tsij nchakon xrotjaunnta tsikonnta, maski naakua nchakon, chjen en ndo Dio, xjan jongí e xranchi chujni, ixi kain juachaxien xjan, ko itsikon anta.

²³ Ko xrontatjunta na ixi nti i jii ndo o no jia a jii ndo, ko ja anta tji anta ko rue anta na.

²⁴ Xranchi tikonni tóngixin ko tsingasaña nchijí ngajni, jaña tson en nchakon xrokjanna jan an, chjen en ndo Dio, xjan jongí e xranchi chujni.

²⁵ Ko xrokonda tsango tangi tsónna ko ni jii jai tsitikaon a na ko xrotjaun ana na jan an.

²⁶ Méxin xranchi kon en nchakon bake e ndo Noé, jaña tson en kaxon nchakon xrokjanna jan an, chjen en ndo Dio, xjan jongí e xranchi chujni.

²⁷ Ixi nchakon bake e ndo Noé, kain na bajine na ko baki i na ko bakute e na ko bakajon na chjen en na tsute e xjan. Ko ti kuitja nchakon kuixin in ndo Noé ntábarco ko kuania ichrin, kain na kuitu e na nduja ko kuen en na.

²⁸ Jaña kon en kaxon nchakon bake e ndo Lot, ni me e bajine na ko baki i na, bake na na ko banchekji na, bakenga na ko banchekonchjian na nchia.

²⁹ Ko nchakon kuachrxjin ndo Lot tjajna Sodoma, kuaniaxin ngajni xro i ko ndagaa azufre, ko me e kuenzin kain na.

³⁰ Jaña tson en nchakon xrokjanna jan an, chjen en ndo Dio, xjan jongí e xranchi chujni.

³¹ *Ko nchakon me e xrojan ngisen jii ngata a ndo a, ko xrojan nge e kuintu e na ngaxin in nchia, xroxingajin a na xrotsé na nge e jii ngaxin in nchia. Ko siá xrojan ngisen jii ngataon ijngi, cháña xrokjan ina na ndo a na.

³² Xraxaonnta xranchi kon en janchri e ndo Lot.

³³ *Ni icha tjaun chaxro tsake e ngata a nunte nti i, ni me e tsitjáña na, ko ngisen tsjée ixi titikaon sen chijnie ndo Dio, sen me e sinchetjáña i sen aséen sen.

³⁴ Jan an ntajtunta ixi tiie me e, ti yuu ngisen stejua ngata a naa kania, naa na tsajin in na ngajni ko inaa na tsitu e na.

³⁵ Kaxon, siá jii yuu nchri steta o nchra, naa nchra tsajin in nchra ngajni ko naa nchra tsitu e nchra.

³⁶ Yuu xi jinche e xa ixra ngataon ijngi, naa xa tsajin in xa ngajni ko naa xa tsitu e xa.

³⁷ Ko tjume e chujni kuin en ji i, juanchangi e na ndo Jesús ko ndachro na:

—¿Tinó tsoenxin ti rindachronta?

Ko ndo Jesús juatingéxin ndo:

—Ti jii cuerpoe ti tsiken en, nti a tjangataon kuntachrjen.

18

Ndo Jesús juako ndo kondee nchri ka an tjanchia nchra ijie

¹ Ndo Jesús juinchekuen en ndo sen teyuu chrikao ndo ixi kain nchakon xronichje e sen ndo Dio ko tsonchrjen a sen sinche e sen me e.

² Méxin ja in nichja ndo:

—Bake e naa xi juez, kuachónde a xa juasaya ndo Dio, ko chónde a xa juasaya ngajin chujni.

³ Ko tjajna me e bake e kaxon naa nchri ka an, nchri me e nanao bakji nchra ngajin xi juez na ixi tjanchia nchra tsoñe e nchra ijie ngajin naa xi baketoka o nchra.

⁴ Tsango kueya vez ikjui nchra kuitsje e nchra xi juez me e ixi sinchéña xa ijie, ko je e xa juinche a xa nchra kuenta, ko tjume e xraxaon xi juez me e: “Maski jan an chonda i juasaya ndo Dio ko chonda i juasaya chujni,

⁵ ixi nchri ka an ji i nanao tji nchra tjanchia nchra ijie ko tsango tajondaxin nchra ixra, jan an cháña sintaña ijie ngajin nchra ixi jaña ítsi a nchra ícha.”

⁶ Ko ndachro ndo Jesús:

—Jaña ndachro xi juez na i.

⁷ Méxin, ¿á je a ndo Dio ícha tsingijna ndo kain sen kuinche e ndo ti tinóatée sen ngajin ndo tíie, nchakon? ¿Á tsonchrjen en ndo tsjate e ndo?

⁸ Jan an ndachrjan ixi je e ndo tuinxin tsingijna ndo sen. Ko nchakon xrokjanna jan an, Chjen en ndo Dio, xjan jongí e xranchi chujni, ¿á xratsitja ngisen ngata a nunte nti i xrochuntia ngajin jan an?

Ndo Jesús beki ndo naa chijni kondée xi fariseo ko xi tjáka tomi

⁹ Ko tjume e ndo Jesús beki ndo inaa chijni ngajin kaxin ni xraxaon ixi je e na tsango jian na, ko batjaun a na ni kaxin. Ko ndachro ndo:

¹⁰ —Yuu xi ikjui xa ni ngo kuinichje e xa ndo Dio. Naa xi fariseo, ko naa xi tjáka tomie tjajna Roma.

¹¹ Ko xi fariseo me e siin xa, jinichje e xa ndo Dio ja in: “Ndotána Dio, juasianta ixi jan an chonda i ijje xranchi xiche e, xiña i, ko xi ncheye e jancri e ko xranchi xi tjáka tomi ji i.

¹² Jan an ntakatsa a aséenna yuu nchakon nguungu semana, ko tantsjendáa tomi ti tjacha nguungu semana tikinixin en Ndo Dio.”

¹³ Ko xi tjáka tomi siin xa nchion ikjín ko jiséya xa nunte, tjendua i ikon xa noi, ko tandé e xa ntakuin xa ko ndachro xa: “¡Ndotána Dio, tikonóananinta ixi chonda ijje!”

¹⁴ *Ko jan an ndachrjan ixi xi tjáka tomi, ícha jian ikjan xa ndo a xa ixi ndo Dio juinchemé e ndo kain íjee xa, ko xi fariseo na i. Méxin ngisen ícha tojié, ícha tjinte a na ngajin ndo Dio. Ko ngisen tojié a, Ndo Dio ícha xrotjue e ndo sen.

Ndo Jesús juinchenchaon ndo ichjan

(Mt. 19:13-15; Mr. 10:13-16)

¹⁵ Kaxon itsjé na bikao na chjen en na ti jii ndo Jesús ixi je e ndo tsake e ndo itja ndo ngata a jaa xjan. Ko sen teyuu chrikao ndo, kuaxi sen kuyakutee sen ni bikao chjen en.

¹⁶ Ko ndo Jesús kuiye e ndo sen ko ndachro ndo:

—Tintu enta ichjan tsji xjan ngajin, ko tingakuen anta xjan. Ixi ngisen tayé e ti tetuan an ndo Dio, sen me e, ikjan sen xranchi naa ichjan.

¹⁷ Nduaxin xrontatjunta ngisen xrokjan i xranchi naa chjan, jua i tsayé e sen ti tetuan an ndo Dio.

Naa xi tsango tetuan an juao xa Ndo Jesús

(Mt. 19:16-30; Mr. 10:17-31)

¹⁸ Naa xi tetuan an ningue ni judío juanchangi e xa ndo Jesús ko ndachro xa:

—Maestro, jian ja anta, ndachronta, ¿inge e sinta a ixi tsjacha tsarichón kain nchakon?

¹⁹ Ko tjume e ndo Jesús ndachro ndo:

—¿Sonda ndachijiana ixi jianna? Xro an ngisen jian, je o Ndo Dio jian ndo.

²⁰ Ó no a chijnie ndo Dio: “Xrochonda ia inaa nchri, tónia a chujni, tema ia, je a xruxenon tjankata a ijje inaa chujni, ko chónde e juasaya ndotáa ko janáa.”

²¹ Ko je e xa ndachro xa:

—Kain ña ó juinta a, xranchiona.

²² Ko kuin en ndo Jesús nge e ichro xa, ko je e ndo juatingéxin ndo:

—Xratitjáña naa nge e sinche e. Nchekjia kain nge e chonda ko tonchjeye é ni nóa tomi me e, ko xrochónda nge e ícha tjintee ngajni. Ko tjume e tsji ia rua na.

²³ Ko xi me e kuin en xa nge e ichro ndo ko tsango kuechín xa ixi itsjé nge e tjintee chónda xa.

²⁴ Ko ti bikon ndo Jesús ixi tsango kuechín xa, ndachro ndo:

—¡Tangi tixin in naa ngisen chónda itsjé tomi ti tetuan an Ndo Dio!

²⁵ Ícha tangi a tixin in naa kucamello ikon naa ntachika ixi naa ngisen chónda itsjé tomi tixin in ti tetuan an ndo Dio.

²⁶ Ko ni kuin en ji i ndachro na:

—¿Ngisen chao tixin in ti tetuan an ndo Dio tjume e?

²⁷ Ko juatingéxin ndo Jesús:

—Nge e jua i sinche e chujni, Ndo Dio chao sinche e ndo.

²⁸ Ndo Pedro ndache ndo ndo Jesús:

—Nchána, jan anna kuintu ana kain ti kuachondana ko rua ananta.

²⁹ Ko ndo Jesús juatingéxin Ndo:

—Jan an nduaxin ntatjunta ixi ngisen kuintu e ndo a, ndotée, ko janée, xjan kichuu, o jancri e, chjen en ixi kondéexin chijnie Ndo Dio ko nge e tetuan an ndo,

³⁰ sen me e ícha itsjé nge e tsayé e sen jai ti jichón sen ngata a nunte nti i, ko kaxon tsayé e sen nchakon tsji ti tsechónni kain nchakon.

Ndo Jesús t̄jngo ndachro ndo tsen en ndo

(Mt. 20:17-19; Mr. 10:32-34)

³¹ Ndo Jesús kuiye e ndo sen teyuu chrikao ndo ko ndachro ndo:

—Jai satsjina t̄ajna Jerusalén. Ko nti a tsoenxin kain ti tsik̄jin sen profeta ó sa ó xranchi sinchekaona, chjen en ndo Dio, xjan jongí e xranchi chujni.

³² Ko ni me e tsajon n̄ xjan ngajin ni je a t̄ajna judío ko ni me e tsjanoana xjan, ko chinga xrondache n̄ xjan, ko tsikitéena n̄ xjan ndatéé n̄.

³³ Tsaxi n̄ xjan nt̄ā ko iton ko naatsóñaxón n̄ xjan. Ko nchakon n̄n̄xin xroxechón xjan.

³⁴ Ko sen teyuu chrikao ndo Jesús kuienxin a sen ti nichja ndo, ixi jua i xrokuienxin sen.

Ndo Jesús juinchexruen en ndo t̄ajna Jericó naa xi jua i tikon

(Mt. 20:29-34; Mr. 10:46-52)

³⁵ Ko nchakon ndo Jesús ko sen teyuu chrikao ndo kuiji sen tjenka t̄ajna Jericó, ko ngande e cha o bake e naa xi jua i tikon ko jit̄janchiaka a xa.

³⁶ Ko je e ti xi tikon a kuin en xa ixi jitatsinga itsjé n̄, méxin juanchangi xa nge e jiton en.

³⁷ Ko ndache n̄ xa ixi ndo Jesús t̄ajna Nazaret jitatsinga ndo nti a.

³⁸ Ko t̄jume e je e xa séen kuyako xa:

—Jesús, kuachrjenixinnta ndo David, tikonóananinta!

³⁹ Ko ni stetaon nti a koñao e n̄ xa ko ndachro n̄ ixi xrotenko xa ko je e xa ícha séen kuyako xa:

—ija anta kuachrjenixinnta ndo David, tikonóananinta!

⁴⁰ Ko t̄jume e ndo Jesús chón en ndo ko kuetuan an ndo ixi tsika o n̄ xi tikon a. Ko bika o n̄ xa ti jii ndo, ko t̄jume e je e ndo Jesús juanchangi e ndo xa:

⁴¹ —¿Nge e t̄jauan sinta a ixi ja a?

Ko xi tikon a juatingíexin xa:

—Nchána, jan an t̄ja on tsikon.

⁴² Ko ndo Jesús ndachro ndo:

—¡Chao tsikuan!, ixi chuntia me e koxruan an.

⁴³ Hora me e xi jua i bakikon chao bikon xa, ko rué e xa ndo Jesús, ko jitajon xa juasaya ngajin ndo Dio. Ko kain ni bikon nge e juinche e Ndo Jesús kaxon kuajon n̄ juasaya ngajin ndo Dio.

19

Ndo Jesús ko xi Zaqueo

¹ Ko Ndo Jesús kuiji ndo t̄ajna Jericó ko kuixin in ndo t̄ajna me e.

² Ko nti a bake e naa xi chóna itsjé tomi ndatin in xa Zaqueo. Xi me e tetuen en xa xi tjejo tomie xi tetuan an t̄ajna Roma.

³ Ko je e xa t̄jaun xa tsikon xa ndo Jesús. Ko jua i tikon xa ndo ixi tsango itsjé n̄ jii n̄ nti a, ko je e xi Zaqueo jin̄ e xa.

⁴ Méxin binga xa kuitaon xa ko kuajin in xa naa nt̄ā ndatin in sicómoro, ti no tsatsinga ndo Jesús.

⁵ Ko hora kuatsinga ndo Jesús, tsje e ndo noi ti jii xi Zaqueo ko ndachro ndo:

—Zaqueo, jaiko xingajian ixi jai xrokonda tsituna ndúya.

⁶ T̄jume e xi Zaqueo jaiko xingajin xa, ko tsango juaxruxin bake e xa ixi ndo Jesús tsitu e ndo ndo a xa.

⁷ Ko kain n̄ bikon n̄, ko kuaxi n̄ nichja n̄ ixi sonda ndo Jesús itsji ndo tsikitu e ndo ndo a naa xiña i.

⁸ Ko t̄jume e xi Zaqueo ndache xa ndo Jesús:

—Nchána, jai xrotj̄a a ni nóa ngusinexin kain nge e chonda, ko siá xrojan ngisen juin-taya a ko kue é tomie n̄, jan an tsonkjan an n̄ noóxin ícha ti kuantsja a n̄.

⁹ Ko ndo Jesús ndache ndo xi Zaqueo:

—Jai ndo Dio tsantsje ndo jee ni ste nchia nti i, ixi kaxon xi ji i kuachrjenixin xa ndo Abraham.

¹⁰ *Méxin, jan an chjen en ndo Dio, xjan jongí e xranchi chujni, jui i bijée ngisen tsikitj̄aña ko tsantsje ijie chóna sen.

Ndo Jesús t̄jako ndo chijnie tomi

(Mt. 25:14-30)

¹¹ Ko ndajitin en n̄ nge e jindachro ndo Jesús ko beki ndo naa chijni juakoxin ndo, ixi ó kuiji ndo tjenka t̄ajna Jerusalén, ko ixi je e n̄ xraxaon n̄ ixi ndo Dio ó tsaxi ndo tsetuan an ndo ngata a nunte nti i.

¹² Méxin ndachro ndo:

—Bake e naa xi, xi me e chjen en kaxin ni tetuan an ko sakjui xa ikjín inaa nunte ixi nti a je e xa xrokjan xa rey, ko tjume e xrokjan xa tjajnëe xa.

¹³ Ko ó xrokuachrxjexin xa tjajnëe xa, méxin kuiye e xa ite xi nchexrée xa ko chjée xa xi nchexrā kaxin tomi ngujngu xa, ko ndachro xa: “Nchejinche enta tomi ji i ixrā xrokjanjan jan an.”

¹⁴ Ko ni tjajnëe xi me e ningakon en nā xa, méxin xruan an nā kaxin ni xrondachro: “Tjaun ana xi ji i xrokjan xa rey tsetuannāna.”

¹⁵ Ko tjume e, juexin kuayé e xa juachaxin ikjan xa rey, ko nchakon ikjan xa tjajnëe xa kuetuan an xa tsij ni nchexrée xa, ni chjeye e tomi, ixi tjaun xa tsono e xa ngijan in juacha tomi kuajon xa ngajin ngujngu nā.

¹⁶ Xi ícha tuinxin konchjiñe e ndachro xa: “Nchána, tomi chjánāna juacha íjngo ite tomi xranchi chjánāna.”

¹⁷ Ko je e xi rey ndachro xa: “Chao; jian juinche e ixrā, ixi jian juinchejinche e ti kueya i tjá a, méxin jai xrotjá a juachaxin tsitian an ite tjajna.”

¹⁸ Tjume e konchjiñe e inaa xi nchexrā ko ndachro xa: “Nchána, ti tomi chjánāna juacha tomi íjngo na ó tomi xranchi chjánāna.”

¹⁹ Xraje o jaña ndachro xi rey xranchi ndache xa xi sa ó kuji: “Jan an xrotjá a juachaxin tsetuan an na ó tjajna.”

²⁰ Ko tjume e konchjiñe e inaa xi nchexrée xa ko ndachro xa: “Nti i jii tomia chjánāna. Jan an kuatsiin tomi ngaya naa panito

²¹ ixi jan an xronkana ixi ja a naa xi tsango ntue e, ko tatsían nge e je a na a, ko tatsían ti no benga ia.”

²² Tjume e xi rey ndachro xa: “Ja a je a naa xi nchexrā jian, ixi ti ndachrua ja ua kuama ijje. Siá ó no a ixi jan an tsango ntuena, ixi tja o ti no xro an nge e bakée, ko tatsiin ti no benga i,

²³ ¿sonda bikan ia tomina naa nchia nchejinchexina tomi ixrā ixi jaña nchakon xrojui i xrokuaya tomina ko ti juacha tomi?”

²⁴ Ko ndache xi Rey ni ste nti a: “Tantsje enta xi ji i tomi kuayé e xa ko tájonnta tomi ngajin xi chónda ite tomi.”

²⁵ Ko je e nā ndachro nā: “Nchána, ¿sonda tsayé e je e xa siá ó chónda xa ite tomi?”

²⁶ *Ko xi Rey ndachro xa: “Jan an ntatjunta, ngisen chónda itsjé, sen me e ícha tsayé e sen, ko ni xro an chónda ko maski ti nchiín chónda nā tsachrje e nā.

²⁷ *Ko kain ni ningakonna, ni tjaun ana ixi jan an xrokuaya a juachaxin tsetuan an ngata a nunte nti i, tikuunta nā nti i ixi tsikon xranchi tsen en nā.”

Ndo Jesús kuixin in ndo tjajna Jerusalén

(Mt. 21:1-11; Mr. 11:1-11; Jn. 12:12-19)

²⁸ Juexin ndachro ndo Jesús kain ji i, íjngo kua ndo cha o itji tjajna Jerusalén.

²⁹ Ko tjume e kuji sen tjenja tjajna Betfagé ko tjajna Betania, tjenja ijnā ndatin in Olivo, je e ndo kuetuen en ndo yuu sen chrikao ndo

³⁰ ko ndache ndo sen:

—Itjinta nchia ste no yá a, ko ti tsjasonta nti a tsinchínta naa kuntajno jichroá ba nti a ko xraxo an ngisen teta a ba. Tonxindange enta ba ko tikuunta ba nti i.

³¹ Ko siá xrojan ngisen tsjanchangí anta ko xrondachro nā: “¿Sonda tonxindange enta kuntajnona?”, ja anta tjatingíexinnta: “Nchánāna xrokonde e ndo ba.”

³² Ko sen xruan an ndo ikjui sen ko kuitja sen kuntajno xranchi ndachro ndo.

³³ Ko stetoxindange e sen kuntajno me e, kuji ni kuntajnoé ko ndachro nā:

—¿Sonda tonxindange enta kuntajnona?

³⁴ Ko je e sen juatingíexin sen:

—Ixi Nchánāna xrokonde e ndo ba.

³⁵ Ko tjume e bika o sen ba ti no jii ndo Jesús, ko bake e sen ti tetsáa sen ngata a ba ko juinçekita a sen ndo kuntajno.

³⁶ Ko ti jitatsinga ndo, bingó nā ti tetsáa nā ngatja cha o ti jitatsinga ndo Jesús.

³⁷ Ko stetonchjiñe e sen ti xingajinxinni ijnā Olivo, tsango itsjé nā sterué e nā ndo Jesús ko ché e nā, méxin séen kuyako nā stetajon nā juasaya ngajin ndo Dio ixi tsango itsjé nge e jian bikon nā juinche e ndo Jesús.

³⁸ Ko séen ndachro nā:

—¡Itsjé juachaxin chónda ndo Rey, ndo jitij tsixrua an ndo Dio! ¡Chaxro ko ijje juaxruxin tsake e ngajní ko ijje juasaya tsayé e ndo Dio!

³⁹ Tjume e kaxin xi fariseo ste xa ngakjen en ni nti a ndachro xa:

—Maestro, tetuen én chujnia xrotenko nā.

⁴⁰ Je e ndo Jesús juatingíexin ndo ko ndachro ndo:

—Jan an ntatjunta ixi siá xrotenko chujnina, ixro tsaxi ixro xronichja ixro.

⁴¹ Ti kuiji ndo Jesús tjajna Jerusalén, bikon ndo tjajna, je e ndo tsjangaxin ndo tjajna me e,

⁴² ko ndachro ndo:

—¡Siá nchakon jai ja a xrokuichuxianna, xrokuaye é ijié juaxruxin! Ko jai ja a tienxin a ixi jije e ikuan.

⁴³ Ko tsijj nchakon tangi ngajian ixi tsijj kaxin tjajna xroningakon an ko tsija a nã ko tsingakon an nã nguixin ngandajian, ko tsë tã nã ngajian.

⁴⁴ Ko tsjacha nã tsóña nã, ja a ko kain chjan an, ko kain tjatu o ndúya tsonchjejin nã, tsintue a nã ninaa ixro ngata a inaa ixro. Ixi ja a kuichuxin a nchakon kuij ndo Dio ngajian.

Ndo Jesús juinchetjúá ndo ni ngo Jerusalén

(Mt. 21:12-17; Mr. 11:15-19; Jn. 2:13-22)

⁴⁵ Nchakon kuixin in ndo Jesús ngaxin in ni ngo ijié jii tjajna Jerusalén, kuaxi ndo kuantsje ndo kain ni stenchekji ko ni stete na nti a.

⁴⁶ Ko ndachro ndo:

—Chijnie ndo Dio ndachro: “Nía ndatin in nchia nichjanaxinna sen”, ko ja anta juinchekjannta ncha ndo e xiche e.

⁴⁷ *Kain nchakon bake e ndo Jesús ngaxin in ni ngo me e, ko banchekuen en ndo chujni chijnie ndo Dio. Ko xitaana baketuan an, ko kain xi tjako ley, ko kain xi baketuan an tjajna me e jitjee nã xranchi tsóña nã ndo Jesús.

⁴⁸ Ko kuitja i nã xranchi tsóña nã ndo Jesús ixi kain nã stetin en nã nge e jichro ndo.

20

Juachaxin chóna Ndo Jesús

(Mt. 21:23-27; Mr. 11:27-33)

¹ Naa nchakon ndo Jesús juinchekuen en ndo nã ngaxin in ni ngo ijié, xranchi ndo Dio tsantsje ndo ijié chóna nã. Hora me e kuiji kaxin xitaana, xi ícha tetuan an, ko xi tjako ley, ko kaxon kaxin xi tetuan an.

² Ko ndache xa ndo Jesús:

—Ndachijiana ngisen tjáa juachaxin ixi jaña nche e o, ¿ngisen tjáa juachaxin ji i?

³ Ko ndo Jesús juatingíexin ndo ko ndachro ndo:

—Kaxon jan an tsjanchangi anta naa nge e ko tjatingíexinnta.

⁴ ¿Ngisen xruan an ndo Juan, ndo bikitée chujni? ¿Á ndo Dio o chujni?

⁵ Ko kuaxi xa tjakaxin kichuu xa ko ndachro xa:

—¿Nge e tsjatingíexinna? Siá xrondachrona ixi ndo Dio tsixrua an xi Juan, xi Jesús xrondachro xa: “¿Sonda kuitikaon anta xa tjume e?”

⁶ Ko siá xrondachrona ixi chujni xruan an xa, kain ni ste nti i tsoña nã ko tsaxinna nã ixro, ixi no e nã ixi xi Juan naa ndo profeta.

⁷ Méxin je e xa juatingíexin xa:

—Nóna ina ngisen xruan an xi Juan.

⁸ Tjume e ndachro ndo Jesús:

—Kaxon jan an xrontatju inta ngisen chjána juachaxin nta a ji i.

Ndo Jesús juako ndo naa chijni kondee xi nchexra ña i

(Mt. 21:33-44; Mr. 12:1-11)

⁹ Ndo Jesús kuaxi ndo nichja ndo chijni ji i ko ndachro ndo:

—Bake e naa xi benga ntãã tu uva nunte e xa, ko tjume e kuajon xa nunte ngajin inaa xi sinche e xa ixra ko sakjui xa kaxin nano.

¹⁰ Ko kuij nchakon xroxero itu me e, xruan an xi nunte e naa xi nchexrée xa ixi xrokuayé e xa itu tikinixin en xi nunte e. Ko je e xi kuayé e nunte xro an nge e kuajon xa, ko juaya xa ngajin xi xrokuayé e itu ko bengi kichuu xa.

¹¹ Tjume e xruan an xi nunte e inaa xi nchexrée xa. Ko kaxon jaña juinchekao nã xa, juaya nã ngajin xa ko kuyakutee kichuu xa, ko xro an nge e kuayé e xa.

¹² Ko tjume e xi nunte e xruan an xa inaa xi nchexrée xa. Ko kaxon xi me e xraje o juinchekao nã xa ko bengi nã xa.

¹³ *Ko tjume e xi nunte e ndachro xa: “¿Nge e sinta a? Xroxruan an chjan na, xjan tsango tjua a. Ko siá tsikon nã chjan na tsitikaon nã ko tsajon nã juasaya* ngajin xjan.”

¹⁴ Ko je e xi kua nunte, bikon xa chjen en xi nunte e, ndache xa xi kaxin xi nche e ixra: “Xjan ji i tsayé e xjan nunte e ndotée xjan, méxin naatsóñaxón nã xjan ixi tsintueina kain nge e tikinixin en xjan.”

15 Ko tjume e kuantsjexin na xjan ngata a nunte ko naakóñaxón na xjan.

Ko ndo Jesús ndachro ndo:

—¿Nge e sinche e xi nunte e ngajin ni nchexra ña i?

16 Je e xa itsji xa ko naatsóñaxón xa xi kua nunte, ko tsajon xa nunte e xa ngajin ikaxin na.

Hora kuin en na ji i, ndachro na:

—¡Ndo Dio tsajon a juachaxin tson en ji i!

17 Ko ndo Jesús jitsje e ndo na ko ndachro ndo:

—Méxin, ¿nge e xrondachro xroon chijnie ndo Dio ti jitaxin ja in?

Ixro jueña a ni nchekonchjian nchia,

ixro me e ikjan ixro icha tjintee.

18 Ko ngisen tsitsingata a ixro ji i, ni me e tsaki kain nte e na. Ko siá ixro tsitsingata a ixro ngata a naa ngisen, ni me e xrokjan na xranchi inche.

Ti xroxenge e xi tetuan an

(Mt. 21:45-46; 22:15-22; Mr. 12:12-17)

19 Ko tjume e kain xitaana baketuan an ko xi tjako ley tjaun xa xrotsé xa ndo Jesús ixi kuienxin xa contre xa nichja ndo. Ko jua i itsé xa ndo ixi xrakon en xa ni tjajna.

20 Méxin xruan an xa kaxin xi xrotsjaya xa ndo Jesús ko xi me e sinche e xa xranchi ngisen tsango jian ko nduaxin a, xi me e stechón en xa ixi nchéxin tsin en xa xronichja ndo Jesús naa nge e ndakua i xixi jaña tsjangi e xa ndo ngajin xi tetuan an.

21 Méxin juanchangí xi stetsjaya ndo Jesús:

—Maestro, nóna ixi kain ti nichjanta ko ti tjakonta me e ti nduaxin ko ti tjaun ndo Dio, ko ja anta tinche anta kaxion chujni, ixi ja anta tjue enta kain na.

22 Ko jai ndachijnnta: ¿á chao tsjengana na ngajin xi tetuan an, o á na i?

23 Ko ndo Jesús kono e ndo ixi ndako a stexraxaon xa, méxin ndachro ndo:

—¿Sonda tjaunnta sincheyananta?

24 Tjako nanta naa tomi. ¿Ngisen ikon jinito nti i, ko nge e jitaxin?

Ko je e xa juatingéxin xa ko ndachro xa:

—Ikon xi César.

25 Méxin ndachro ndo Jesús:

—Chje énta xi César ti tikinixin en xa, ko chje énta ndo Dio ti tikinixin en ndo tsayé e ndo.

26 Ko juacha i xa sinchenichja xa ndo Jesús ninaa nge e ndako a ngatoxin ni tjajna jitin en. Ko je e xa juinche e xa juaxruxin xranchi juatingéxin ndo, méxin tenko xa.

Xranchi xroxechón chujni

(Mt. 22:23-33; Mr. 12:18-27)

27 *Ko tjume e kuiji kaxin xi saduceo kuitsje e xa ndo Jesús. Ko xi saduceo me e titikaon a xa ixi xroxechón chujni tsiken en. Méxin ndache xa ndo Jesús:

28 —Maestro, ndo Moisés tsikjin ndo xroon ndachro siá naa xi tsikute e, ko ndakuen en xa ko xro an ichjan kuachóna xa ngajin janchri e xa, xi kichuu xi kuen en xrokonda tsute e xa ngajin nchri ka an me e, ko xrochóna xa ichjan, ko xjan me e xrokjan xjan xranchi chjen en xi kuen en.

29 Bake e yaato xi, xi me e kichuu xa. Ko xi sa ó kute e xa janchri e xa ko ndakuen en xa ko xro an ichjan kuachóna xa ngajin janchri e xa.

30 Ko xi yuxin kute e xa nchri ka an, ko kaxon ndakuen en xa ko xro an ichjan kuachóna xa ngajin nchra.

31 Ko tjume e xi nínxin kute e xa nchri ka an me e, ko xraje o ndakuen en xa. Ko jaña kon en kain ti yaato xa. Kain xa kuen en xa ko xro an chjan kuachóna xa ngajin nchra.

32 Ko tjume e je e nchra kuen en nchra kaxon.

33 Méxin nchakon xroxechónni, ¿ngixe i ti yaato xi kuen en xrokjan xixi e nchra, ixi kain yaato xa, kute e xa nchri me e?

34 Tjume e juatingéxin ndo Jesús:

—Nti i ngata a nunte, xi ko nchri tute e na.

35 Ko ni tsikinixin satsji ngajni xroxechón na, nti a tsute a na.

36 Ixi nti a ítsen a chujni, nchakon me e chujni xrokjan sen xranchi sen ángel, ko ni me e xrokjan na chjen en ndo Dio ixi ndo Dio juinchexechón ndo na.

37 Ko kaxon ndo Moisés juako ndo kondée ti xroxechón chujni, ikjin ndo ti jitaxin xranchi naa ntaá kjuáa xro i ko che a ntaá, nti a ndachro ndo Moisés ixi ndo Dio me e ndo Dio titikaon ndo Abraham, ndo Isaac, ko ndo Jacob.

38 Ko ndo Dio je a ndo Dio ne e chujni ndatsiken en. Ndo Dio, ndo Dio ne e chujni stechón, ixi je e ndo tikon ndo kain na jichón na.

39 Ko kaxin xi tjako ley ndachro xa:

—Maestro jian ndachrona.

⁴⁰ Ko xronka xa ko íxro an nge e juanchangi e xa ndo.

Ngisen kuachrjenixin Ndo Cristo

(Mt. 22:41-46; Mr. 12:35-37)

⁴¹ Ndo Jesús ndachro ndo:

—¿Á nduaxin ndachro chujni ixí ndo Cristo kuachrjenixin ndo ndo David?

⁴² Ndo David tsikjin ndo xroon Salmos ko ndachro ndo:

Nchána ndo Dio ndache ndo Nchána:

“Take é tjenkana ndatsjonxin jian,

⁴³ tsake ejan ni ningakon an chringi tutáa.”

⁴⁴ Ko siá ndo David ndache ndo ndo Mesías Nchána, ¿sonda tjume e ndo Cristo xrokjan chjen en ndo David?

Ndo Jesús tjangi e ndo xi tjako ley

(Mt. 23:1-36; Mr. 12:38-40; Lc. 11:37-54)

⁴⁵ Kain nã stetin en nã ti nichja ndo Jesús ngajin sen teyuu chrikao ndo:

⁴⁶ —Tsje enta jian xranchi nche e xi tjako ley ko nche anta xranchi je e xa, je e xa nche e xa juaxrxin take e xa manta jine, ko tjaun xa tsajon nã juajna ngajin xa ngataon ndasin, ko take e xa ícha tjenka ngaxin in ni ngo, ko nchakon itji xa kia tjaun xa tsake e xa ti xitaon ícha jian.

⁴⁷ Ko ixí juancheya xa tantsje e xa nchri ka an ndo a nchra ko tjume e nchexion xa, sée nichje e xa ndo Dio. Xi me e ícha tangi tson en xa nchakon sinchéña ndo Dio ijje.

21

Tomi kuajon naa nchri ka an

(Mr. 12:41-44)

¹ Ndo Jesús jii ndo ngaxin in ni ngo ijje ko jitsje e ndo ixí itsjé ni chónda kueya tomi ko kueya nge e, kuij nã ko bake e nã tomi ngaya ntãa tingachjian tomi.

² Ko bikon ndo Jesús kuij naa nchri ka an ko nóa nchra, nchri me e bake e nchra yuu tomi nchínchin, tomi tjinte a.

³ Ko ndo Jesús ndachro ndo:

—Jan an duaxin ntatjunta ixí nchri ka an nóa, ícha tjintee tomi bake e nchra ixí ti kuajon ikaxin nã,

⁴ ixí je e nã kuajon nã ti nge e xe e chónda nã, ko je e nchri nóa kuajon nchra kain tomi xrojuinexin nchra.

Ndo Jesús ndachro ndo ixí xrochjejin ni ngo

(Mt. 24:1-2; Mr. 13:1-2)

⁵ Kaxin nã stetjao nã ixí ni ngo ijje tsango chaxro ixro tsiki texin ni ngo, ko chaxro jitsje e nge e tsikajon nã ngajin ndo Dio. Ko ndo Jesús ndachro ndo:

⁶ —Tsjí nchakon kain nge e tikonnta tsitjáña, kain xrochjejin ko ninaa ixro tsitu e ngata a inaa ixro.

Nge e tson en nchakon tsitjáña nunte xasintajni

(Mt. 24:3-28; Mr. 13:3-23)

⁷ Juanchangi e nã ndo Jesús:

—Maestro, ¿ngisa tson en ji i? ¿Ko nge e tsjakoxin ixí jaña tson en?

⁸ Ndo Jesús ndachro ndo:

—Tsje enta jian ixí xro an ngisen sintaya anta. Ixi tsjii kueya nã xrondachro nã ixí je e nã ndo Cristo nã, ko xrondachro nã: “Ó tsitjáña nunte.” Ja anta titikaon anta ti ndachro ni me e ko rue anta nã.

⁹ Nchakon tsin ennta ixí stetóña kichuu naa tjajna ko inaa tjajna, ko kaxon kaxin tjajna steteto nã, xronka inta ixí kain ji i sa ó xrokonda tson en ko xratsitjáña i nunte.

¹⁰ Ko ndo Jesús ndachro ndo ikaxin nge e:

—Tseto naa tjajna ko inaa tjajna, naa xi tetuan an naa tjajna ngajin inaa xi tetuan an inaa tjajna.

¹¹ Ko itsjé no tsanga tsontengi nunte, ko tsango tsatse nã jinta ngata a nunte, ko kaxon tsango itsjé ichin tsjii ngata a nã, ko tsango chinga nge e tsikonni ngajni ko tsango sinchexronkana.

¹² Ko kain ji i xratsuen a, ixí sa ó tsenginta nã, ko ndako a sinta anta nã ko xrox-raxin innta nã ndo achjiso ko tsingakjinnta nã ngajin ni tituan an ni ngo ko tsikaannta nã ngajin xi tetuan an, kondanaxin jan an.

¹³ Ko kain ji i sinta anta na, ko jaña ja anta chao xrondachronta ixi titikaonntana jan an.
¹⁴ *Ja anta ta inta juachjaon ko xraxaon anta xranchi tsjatingéxinnta ti nge e tsjan-changi anta na.

¹⁵ Ixi jan an xrontatjunta nge e tsjate enta, chijni jian tsaye enta, ko ninna ni ningakon annta jua i tsjatingéxin na.

¹⁶ Ko kaxon ndotánta, janáanta o xi kichuunta o ngxixe i inaa ni ndointa, tsajon na juachaxin naatsóñaxónnta na.

¹⁷ Ko kain ngisen xroningakon annta ixi titikaonntana.

¹⁸ Ko maski jaña tson en, ninna xrajaanta tsitjáña i.

¹⁹ Soji tinteenta, me e jaña tsjachanta tsarichonnta kain nchakon.

²⁰ *Ko nchakon tsikonnta ixi tjajna Jerusalén tsixindajin xi soldado, ja anta tsono anta ixi íse a xrochjejin nchijíi tjajna me e.

²¹ Tjume e ni jii nunte Judea xrokonda tsingana satsji na ngata a jna. Ko ni ste tjajna Jerusalén kaxon xrokonda satsjixin na nti a ko ni ste ngataon ijngi íxrokjan i na tjajna.

²² Ixi kain nchakon me e tsango tsikaon ni titikaon a, ko ijíe juachjaon tsake e, xranchi jitaxin xroon chijnie ndo Dio.

²³ ¡Lastu kain nchri jía ichjan nchakon me e, ko nchri chóna ichjan stetaki! Ixi tsango ijíe juachjaon tsake e nchijíi ngata a nunte, ixi tsango tsikaon ko tangi tson en ni tjajna me e.

²⁴ Ko kaxin sen tsóñaxin na sen ixi chika espada ko kaxin sen xrotsé na sen satsikao na sen ndo achjiso inaa tjajna. Ko ni chúxin a ndo Dio tsingatjangi na tjajnée ndo, tjajna Jerusalén, tsitjaja nchakon xrokjan chjen en ndo Dio.

Tsii chjen en ndo Dio, xjan jongí e xranchi chujni

(Mt. 24:29-35, 42-44; Mr. 13:24-37)

²⁵ *Tjume e tsonoxin nge e tson en chjiixro ko nchanitjao ko nchanotsé. Ko ngata a nunte xasintajni* kain tjajna tsaa na juachjaon, ko xroxranka na ixi tsanga tsontengi ko xroxruin ndachaon.

²⁶ Tsango xroxronka na ko tsontye e na kondeexin xraxaon na nge e tson en ngata a nunte, ko kaxon kondeexin kain nge e jii ngajni tsontengi.

²⁷ *Ko tjume e tsikon na ndo Jesús, chjen en ndo Dio, xjan jongí e xranchi chujni, tsii ndo ngata a naa itjuj ko tsika o ndo ijíe juachaxin tsetuan an ndo ko kaxon tsango ijíe chjiixro tsika o ndo.

²⁸ Ko nchakon xroxrangíxin tson en kain ji i, take énta juaxruxin, ko tsikonnta ixi ndo Cristo ó kují ndo tsantsjen ndo ijíe chondanta.

²⁹ Ko ndachro ndo Jesús inaa chijni:

—Tsje enta xranchi jii ntaa tajon itu higo ko ikaxin ntaa.

³⁰ Nchakon tsikonnta jixechji ntaa, me e no anta ixi ó tsaxi sinche e súa.

³¹ Jaña kaxon nchakon tsikonnta ixi tsaxi tson en ngajni kain ji i, tsono anta ixi tuinxin tsii ti tsetuan an ndo Dio ngata a nunte.

³² Jan an nduaxin ntatjunta ixi sa ó tson en kain ji i, ko xratsen a chujni jii jai ngata a nunte.

³³ Ngajni ko nunte xasintajni tsatsinga, ko ti nichja jan an tsatsinga i, nduaxin tson en.

³⁴ Tsje enta xranchi take énta; xraxaon anta ixi je o xrotjaunna sintenta, xrokoannta ko ti ícha tajon juaxruxin ngata a nunte nti i ko ixi kondeexin me e tsonoa inta ó kují nchakon tsji i.

³⁵ Ixi nchakon me e tson en xranchi take e naa nocha a itsé kulano, jaña tson en ngajin kain ni ste ngata a nunte.

³⁶ Méxin tsejua i asáanta, ko jian tantje e ikonnta, ko kain nchakon nichje enta ndo Dio ixi jaña chao tsatsinganta juachjaon tsii, ko jaña chao tsonchjiñe enta ngajin chjen en ndo Dio, xjan jongí e xranchi chujni.

³⁷ *Taanchakon ndo Jesús banchekuen en ndo na chijnie ndo Dio ngaxin in ni ngo ko tiie bakitu e ndo ti ijna ndatin in Olivo.

³⁸ Ko kain ni tjajna, ndúyo bakonchjiñe e na ti jii ni ngo ixi tjauun na tsin en na ti ndachro ndo Jesús.

22

Imao juao na xranchi xrotsé na ndo Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ó jitonchjiñe e nchakon xrangíxin kia ti sine na nutja chóna i ti tja in nio, ko kia me e ndatin in Pascua.

² Kaxin xitaana xi tetuan an ko xi tjako ley stexraxaon xa xranchi tsóña xa ndo Jesús ixi ste xrakon en xa ni tñajnéé xa.

³ Ko Xixron anxrée kuixin in aséen xi Judas kaxon ndatin in Iscariote. Xi me e naa xi teyuu sen bajikao ndo Jesús.

⁴ Ko xi Judas ikjuí xa ngajin xitaana, xi tetuan an, ko xi stendáa ni ngo ko kuintejao xa xranchi tsingijina xa xrotsé nã ndo Jesús.

⁵ Ko xi ste ni ngo tsango bake e xa juaxruxin ko juao xa ixi xrochjée nã xi Judas tomi ixi tsingijina xa.

⁶ Ko xi Judas kutuexin xa ko jichón en xa xrochronga xa ngiora chao xrotsé nã ndo Jesús nchakon xro an ngisen jii.

Sen teyuu juinekao sen ndo Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Ko kuíi nchakon kia pascua sine sen nutja chóna i ti tja in nio, ko nchakon me e xrokonda tsen en naa kutuchjon sine sen.

⁸ Ko ndo Jesús xruan an ndo ndo Pedro ko ndo Juan ko ndachro ndo:

—Itjinta nchekonchjiannta ti sintena kia Pascua.

⁹ Ko je e sen juanchangi e sen ndo Jesús:

—¿Tinó tjaunnta tsonchjian ti sintena?

¹⁰ Je e ndo ndachro ndo:

—Hora tsixin innta tñajna ijié, tsetannta naa xi yama xa naa nchixréen inda. Rue énta xa ti nchia tixin in xa.

¹¹ Ko ndachenta xi ndo a: “Ndo nchekuannãna ndachro ndo: ¿Ti no jii nchia sinexinna, jan an ko sen teyuu tajikia an, jai kia Pascua?”

¹² Ko je e xi ndo a tsjako anta xa naa nchia ijié, nchia yuxin jii ngata a noi, ko nchia me e ó chóna nchia kain nge e. Nti a nchekonchjianxinnta ti sintena.

¹³ Ko je e sen sakjuí sen ko kuitja sen kain nge e xranchi ndachro je e ndo. Ko nti a juinchekonchjian sen ti sinekao sen ndo Jesús kia Pascua.

¹⁴ Ko kuitja hora sine sen, ndo Jesús ko ti sen teyuu chrikao ndo kuíi sen nti a ko bake e sen ti jii ntachaon.

¹⁵ Tjume e ndo Jesús ndachro ndo:

—Jan an tsango jueña o sinekuu kichuuna kia Pascua ti xratsen ana!

¹⁶ Ixi jan an ntatjunta í sine a kia ji i tsija nchakon tsetuan an ndo Dio.

¹⁷ Ko tjume e itsé ndo naa copa jitjiá vino ko kuajon ndo juasie ndo ngajin ndo Dio, ko ndachro ndo:

—Tin innta ti jitjiá copa ko tonchjeye e kichuunta.

¹⁸ Jan an ntatjunta ixi tsj a vino tsija nchakon ti tsetuan an ndo Dio.

¹⁹ Ko tjume e itsé ndo nutja ko kuajon ndo juasie ndo ngajin ndo Dio, ko konchrinjin ndo nio ko konchjeye e ndo sen ko ndachro ndo:

—Ji i cuerpona tsájon tsen en ixi ja anta. Nche enta ja in, me e xraxaonxinnintana jan an.

²⁰ Ko juexin juine sen nutja kaxon kuajon ndo copa jitjiá vino ko ndachro ndo:

—Ti jitjiá copa ji i xrondachro nge e natjúá tsixintaxin ixi jnina tsintji ixi ja anta.

²¹ Ko xi sinchekjina nti i jii xa, rinekj an xa ngata a ntachaon.

²² Méxin chjen en ndo Dio, xjan jongí e xranchi chujni, xrokonda tson en xjan xranchi jitaxin xroon, ko, ícha tangi tson en xi sinchekji xjan!

²³ Ko tjume e sen teyuu chrikao ndo kuaxi sen juaxaxin kichuu sen ixi ngisen sinche e me e.

Ngisen ícha tjintee

²⁴ *Ko tjume e juaxaxin kichuu sen ixi ngakjen en sen, ngisen ícha tjintee.

²⁵ Tjume e ndachro ndo Jesús:

—Kaxin xi chúxin a ndo Dio tsango tetuan an xa ngajin ni tñajnéé xa, ko xi tituan an ndachro xa ixi tsango jian xa ko tingijina xa tñajnéé xa.

²⁶ *Ko ja anta nche anta jaña. Ixi ngisen ícha tjintee, ícha tsitikaon sen xranchi naa chajan, ko chujni ícha tetuan an, me e sinche e ixra xranchi naa xi nchexra.

²⁷ *Méxin, ¿ngisen ícha tetuan an, á sen take e sine, o sen tajon sine ngajin ni jii ntachaon? Ngisen sine ti jii ntachaon, ni me e ícha tetuan an nã, ko jan an ritjén ngajin ja anta xranchi naa ni nchexra.

²⁸ *Ko ja anta bake enta ngajin jan an kain nchakon ko bikonta kain nge e tangi kuatsinga.

²⁹ Méxin jan an tjá anta juachaxin tsetuan annta xranchi juachaxin kuayá a chjána Ndotána,

³⁰*ko ja anta sintenta ko tsi inta ti jii ntachaon tsétuan an; tsake enta nti a tsetuan annta ko sinchéñanta ijie ngajin teyuu tjanya kuachrjenixin ndo Israel.

Ndo Jesús chronga ndo nge e sinche e ndo Pedro
(Mt. 26:31-35; Mr. 14:27-31; Jn. 13:36-38)

³¹Kaxon ndachro ndo Jesús:

—Simón, Simón, Xixron anxrée juanchia xa juachaxin tsontsjenga xa xranchi noa trigo.

³² Ko jan an kuinóatána ngajin Ndotána ixi ja a nduaxin xrochuntiana. Ko nchakon xrokjan tsitikaonna, tingijna sen kichuua ixi kaxon tsitikaon sen ko soji tsintee sen.

³³ Ko ndo Simón ndachro ndo:

—Nchána, jan an xrorua anta ti no tsiku unta na ko siá tsija anta kaxon jan an, ko siá ja anta tsen ennta, kaxon jan an tsen ena.

³⁴ Ko juatingíexin ndo Jesús:

—Pedro, jan an ntatjua ixi jai xraxrotsje a kuntaxichiká, ja a xrondachrua ní vez chuxin ana.

Kuú hora tangí sinchekaon na ndo Jesús

³⁵*Tjume e ndo Jesús juanchangi e ndo sen chrikao ndo:

—Nchakon xruan annta, bikon inta puxa, nge e tsinga tomi, ko kate ko, ¿á xrojan nge e xrokonda anta?

Ko je e sen juatingíexin sen:

—Na i, xro an nge e.

³⁶ Ko tjume e ndachro ndo Jesús:

—Ko jai je a jaña tson en; ngisen chóna tomi, tsama sen tomie sen, ko kaxon puxa tsengachjian sen nge e sine sen; ko ngisen chóna i espada sinchekji sen noxrée sen ko tse na sen chika.

³⁷ Jan an nduaxin ntatjunta ixi xrokonda tangi tsónna xranchi ndachro chijnie ndo Dio: “Xranchi naa xi ndako a nche e, bikona ndo.” Méxin kain ti jitaxin xroon ixi jan an, xrokonda jaña tson en.

³⁸ Tjume e sen chrikao ndo ndachro sen:

—Nchána nti i jii yuu chika espada.

Ko ndachro ndo Jesús:

—Ó chao, í nichja inta ícha.

Ndo Jesús nichja ndo ngajin ndotée ndo

(Mt. 26:36-46; Mr. 14:32-42)

³⁹ Tjume e ndo Jesús kuachrjexin ndo tjanya Jerusalén ko sakjui ndo ti jii ijna ndatin in olivo xranchi kuanche e ndo, ko sen chrikao ndo rué e sen ndo.

⁴⁰ Ko hora kuíji sen nti a, ndachro ndo:

—Ja anta nichje enta ndo Dio ixi tsingijnanta ndo ixi xro an ijie tsamanta.

⁴¹ Ko tjume e ndo Jesús kuachrjendáa ndo kjínxin xranchi ti tjankani naa ixro, ko nti a bake exin ndo ntatuchi in ndo ko nichje e ndo ndotée ndo, ndo Dio.

⁴² Ko ndachro ndo:

—Ndotána, siá tjaunnta, tsatsinga kain nge e tangi tsónna ko tsoen a xranchi jan an tja on, tson en xranchi tjaun ja anta.

⁴³ Ko tjume e konoxin naa ndo ángel kuíxin ngajni ixi sinchesoji ndo aséen ndo Jesús.

⁴⁴ Ko ixi tangi jiton en aséen ndo Jesús, ícha soji nichje e ndo ndotée ndo ko bakintji ndachjién ndo ngata a nche xranchi ndua gota ijni.

⁴⁵ Hora juexin nichje e ndo Jesús ndotée ndo, ko bingatjen ndo kuitsje e ndo ti jii sen kuajikao ndo, kuitja ndo sen stejua sen ixi ijie juachjaon chóna aséen sen.

⁴⁶ Méxin ndachro ndo:

—¿Sonda stechrinna? Xingama anta, ko nichje enta ndo Dio ixi tsingijnanta ndo sinche anta nge e ndako a.

Itsé na ndo Jesús tsije e na ndo

(Mt. 26:47-56; Mr. 14:43-50; Jn. 18:2-11)

⁴⁷ Xrajnichja ndo Jesús, kuí kueya na ko jitaon xi Judas, xi me e naa xi teyuu sen bajikao ndo. Ko konchjiñe e xi me e ngajin ndo Jesús ko kuitoxin xa ndo.

⁴⁸ Ko tjume e ndo Jesús ndache ndo xi Judas:

—Judas, ¿á ixi kuitoxiana me e xrondachro sinchekjiana, jan an chjen en ndo Dio, xjan jongí e xranchi chujni?

⁴⁹ Ko sen chrikao ndo Jesús, bikon sen nge e jiton en me e juanchangi e sen ndo:

—Ncháina,* ¿á tsjayana ngajin ni ji i xixi chika espada?

⁵⁰ Ko naa sen chrikao ndo Jesús juincheni e sen naa xi nchexrée xitaana, xi ícha tetuan an, naa chrinjinxon ndatsjon xa ti jian.

⁵¹ Ko ndo Jesús ndache ndo sen chrikao ndo:

—Ó chao, tintu enta xa.

Ko tjume e ndo Jesús itsé ndo ndatsjon xi me e, ko juinchexruen en ndo xa.

⁵² Tjume e ndo Jesús ndache ndo xi tetuen en xitaana, ko xi tetuen en ni ngo ko ikaxin sen tetuan an, xi kuji itsé xa ndo Jesús:

—¿Sonda bikuunta ntaq ko espada xrotséxinninta xranchi jan an xrokjui naa xiche e?

⁵³ *Kain nchakon bake e ngajinnta ngaxin in ni ngo, ko xro an juinche enta. Ko jai oránta xixi tsitikaonnta xi tetuen en ti naxixe e.

Ndo Pedro xrondachro ndo xixi chuxin a ndo ndo Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Ko tjume e itsé na ndo Jesús, ko sabikao na ndo ndo a xitaana, xi ícha tetuan an. Ko ndo Pedro kjinxin jirué e ndo.

⁵⁵ Ko juaaka na xro i ngusine ntasién nchia me e ko kuendajin na xro i. Ko kaxon ndo Pedro bake e ndo ngakjen en na nti a.

⁵⁶ Tjume e naa nchri nche e ixra nchia ngajin xitaana, ti bikon nchra ndo Pedro nti a ti jii xro i, ndachro nchra:

—Kaxon xi ji i chrikao xa xi Jesús.

⁵⁷ Ko ndo Pedro ndachro ndo:

—Na i, chuxin a xi me e.

⁵⁸ Ko tjume e kuji inaa xi ko bikon xa ndo Pedro ko ndachro xa:

—Ja a kaxon naa xi tajikao xi Jesús.

Ko ndo Pedro ndachro ndo:

—Na i, nduaxin a me e.

⁵⁹ Kuatsinga xranchi naa hora ko tjume e ndachro inaa xi:

—Nduaxin xi ji i chrikao xa xi Jesús, xixi kaxon je e xa xi nunte Galilea.

⁶⁰ Ko ndachro ndo Pedro:

—Nóna i nge e ndachronta.

Ko xrajnichja ndo itsje naa kuntaxichiká.

⁶¹ Ko tjume e je e ndo Jesús konkjan ndo tsje e ndo ndo Pedro, ko ndo Pedro xraxaon ndo xixi jaña tsindachro ndo Jesús: “Xraxrotsje a kuntaxichiká ja a xrondachrua níi vez chuxin ana.”

⁶² Ko tjume e ndo Pedro kuachrje ndo nduja ko tsango tsjanga ndo.

Tjanao na ndo Jesús

(Mt. 26:67-68; Mr. 14:65)

⁶³ Ko xi soldado ti stendáa xa ndo Jesús juaya xa ngajin ndo ko juanoa xa ndo.

⁶⁴ Ko bjje e xa ikon ndo ko tande e xa iton ngaya ikon ndo ko tjanchangi xa:

—¡Ndachrua ngisen kóña!

⁶⁵ Ko tsango chinga ndache xa ndo, ko kuyakutee xa ndo.

Ndo Jesús jii ndo ngajin xi tetuan an ni ngo

(Mt. 26:59-66; Mr. 14:55-64; Jn. 18:19-24)

⁶⁶ Ko ndúyaxin xra o kain xi tetuan an ni ngo, ko xi taana tetuan an, ko kain xi tjako ley ko bikao xa ndo Jesús ti ste xi tetuan an nti a ko ndachro xa:

⁶⁷ —Ndachijiana, ¿á ja a ndo Cristo?

Ko je e ndo ndachro ndo:

—Síá jaán xrondachrjan, ja anta tsitikaon anta.

⁶⁸ Ko síá tsjanchangi anta naa nge e, ja anta tsjatengéxixi anta, ko tsajanda intana satsji.

⁶⁹ Ko jan an, chjen en ndo Dio, xjan jongí e xranchi chujni, xrajai tsake e ndatsjonxin jian ti jii ndo Dio chóna kain juachaxin.

⁷⁰ Ko tjume e kain xi ste nti a juanchangi e xa ndo Jesús ko ndachro xa:

—¿Á ja a nduaxin chjen en ndo Dio tjume e?

Ko ndo Jesús juatingéxixi ndo:

—Jaán, ja anta ó ndachronta.

⁷¹ Ko tjume e ndachro xa:

—Íxrokonda i xronichja ikaxin na. Jan anna ó kuin anna nge e nichja xi ji i.

* 22:49 Ncháina Señor Ncháina Jesús o Ncháina Dio 22:53 Lc. 19:47; 21:37.

23

Ndo Jesús jii ndo ngajin xi Pilato

(Mt. 27:1-2, 11-14; Mr. 15:1-5; Jn. 18:28-38)

¹ Tjume e kain xa bingatjen xa ko sabikao xa ndo Jesús ngajin xi Pilato.

² Ko nti a kuaxi juankata a xa ijie ngajin ndo Jesús, ko ndachro xa:

—Jan anna kuitjana xi ji i juinchexronka xa ni tjananana. Ko ndachro xa ixí xrokonda i tsjengana i na ngajin xi tetuan an Roma, ko kaxon ndachro xa ixí je e xa ndo Cristo, ko je e xa naa rey tetuan an.

³ Ko tjume e xi Pilato juanchangi e xa ndo Jesús:

—¿Á ja a Rey tituen en ni judío?

Ko ndo Jesús ndachro ndo:

—Ja a ndachrua.

⁴ Ko tjume e xi Pilato ndache xa xitaana tetuan an ko ni bikao ndo Jesús:

—Xro an ijie titja jan an ngajin xi ji i.

⁵ Ko kain ni ste nti a ícha séen kuyako na ko ndachro na:

—Je e xa juincheye e xa kain ni tjananana ixí jée tjako xa. Ko kuaxi juako xa nunte Galilea, ko jai ó nti i tjana Judea tjako xa.

Bikao na ndo Jesús ngajin xi Herodes

⁶ Ko kono e xi Pilato ji i, ko juanchangi xa á ndo Jesús kujixin ndo nunte Galilea.

⁷ Ko ndachro na ixí nti a tkinixin en ndo, me e xi Pilato kuetuan an xa ixí satsikao na ndo Jesús ngajin xi Herodes ixí xi me e tituan an nunte Galilea, ko nchakon me e xi Herodes tsikij xa tjana Jerusalén.

⁸ Ko ti bikon xi Herodes ndo Jesús, tsango bake e xa juaxruxin ixí ó sée tjaun xa xrokuichuxin xa ndo ixí tsikin en xa nge e jian kuanche e ndo, ko tjaun xa xrobikon xa naa ixra ijie* xrojuinche e ndo Jesús.

⁹ Ko xi Herodes juanchangi e xa ndo Jesús itsjé nge e ko je e ndo xro an nge e juatingéxin ndo.

¹⁰ Ko kaxon nti a konchijne e itsjé xitaana tetuan an ko itsjé xi tjako ley ko tsango kueya ijie tjankata a xa ndo Jesús.

¹¹ Ko tjume e xi Herodes ko kain xi soldadoe xa kuaxi xa chinga juinchekao xa ndo Jesús, ko juanoa xa ndo, ko tjume e juinchekitsa xa ndo manta tetsáa xi rey. Tjume e xi Herodes kuetuan an xa satsikao na ndo Jesús ngajin xi Pilato jingo.

¹² Nchakon me e xi Pilato ko xi Herodes kuaxi tjento kichuu xa ixí seno kuaningakon en kichuu xa.

Xi tetuan an ndachro xa tsen en ndo Jesús

(Mt. 27:15-26; Mr. 15:6-15; Jn. 18:39–19:16)

¹³ Tjume e xi Pilato kuiye e xa xitaana tetuan an ko kain ni tetuen en ni judío, ko ni tjana,

¹⁴ ko ndache xa na:

—Ja anta bikuunta xi ji i, ko ndachrona ixí nchexronka xa ni tjana, ko ja anta kuin ennta nge e juanchangi a xa, ko jan an kuitja i ijie ngajin xa, xranchi ja anta ndachrona.

¹⁵ Kaxon xi Herodes kuitja i xa ijie ngajin xa, méxin jingo xruan an xa xi ji i nti i. Ko ó bikonta ixí xro an ijie chóna xa tsikinixin tsen en xa.

¹⁶ Ko tsetuan an tsikaon xa, ko tjume e tsajon juachaxin satsji xa.

¹⁷ Ko kia me e, xi Pilato xrokonda tsajanda xa naa xi jixin in ndo achjiso.

¹⁸ Ko kain na kuaxi na kuyako na:

—¡Tajanda ia xi ji i! ¡Tja onna tsajanda xi Barrabás satsji xa!

¹⁹ Ko xi Barrabás jixin in xa ndo achjiso ixí juinchexronka xa ni tjana Jerusalén ko naakónaxón xa chujni.

²⁰ Ko xi Pilato jingo ndachro xa tsajanda xa ndo Jesús.

²¹ Ko je e na ícha séen kuyako na:

—¡Tjankanitua xa ntacru! ¡Tjankanitua xa ntacru!

²² Nínxin juanchangi xi Pilato:

—¿Nge e ndako a juinche e xi ji i? Jan an titja i ijie tsikinixin tsenxin xa. Jan an tsetuan an tsikaon xa, ko tjume e tsajanda xa satsji xa.

²³ Ko je e na ícha séen kuyako na ko ndache na xi Pilato tsjankanito xa ndo Jesús ntacru. Séen kuyako na ko kaxon kuyako kain xi taana, xi tetuan an, ko juacha na nge e tjaun na.

²⁴ Méxin xi Pilato juinche e xa xranchi tjanchia na.

* 23:8 naa ixra ijie milagro

²⁵ Ko kuajanda xa xi Barrabás xranchi tjaun nã, xi bake e ngaxin in ndo achjiso, xi juinchexronka ni tjajna ko naatsikõñaxón xa chujni. Ko xi Pilato kuajon xa ndo Jesús ixi sinchekao nã ndo xranchi tjaun nã.

Juankanito nã ndo Jesús ntã cru

(Mt. 27:32-44; Mr. 15:21-32; Jn. 19:17-27)

²⁶ Hora jitikao nã ndo Jesús ixi tsjankanito nã ndo ntã cru, itsé nã naa xi tjajna Cirene ndatin in xa Simón. Xi me e nandá tsikj xjn xa chjakée xa ko juinchekama nã xa ntã cru ko jirué e xa ndo Jesús.

²⁷ Ko jirué e kueya ni tjajna, ko kaxon jirué e itsjé nchri stetsjanga nchra ko stetoyako nchra ixi yaa nchra juachjaon ixi ndo Jesús.

²⁸ Ko ndo Jesús ngatjia ndo tsje e ndo nchra ko ndachro ndo:

—Ja anta nchri tjajna Jerusalén, tsjangaxin antana. Ja anta tsjangaxinnta chjan anta ko ja anta.

²⁹ Ixi tsji nchakon xronduche kichuunta: “Tsango chaxro nchri jua i kuachóna ichjan, nchri xro an ichjan juinchejongi e, ko juinchekaki a nchra ichjan.”

³⁰ *Tjume e tsaxi nã xronduche nã ijnã “Xrabatjaninta”; ko xronichje e nã itjaõ ko xronduchro nã “Nchekemáninta.”

³¹ Siá ntayua jaña stenchekao nã ntãã, ¿nge e sinchekao nã ntãã xema?

³² Ko kaxon bikao nã yuu xiche e, xi me e kaxon tsjankanito nã xa ntã cru tjenka ndo Jesús.

³³ Ko kuiji nã ijnã ndatin in Ntajaa Chujni, ko nti a juankanito nã ndo Jesús ntã cru ko kao kayui xiche e, naa xi bake e nã xa ndatsjonxin jian ti jii ndo Jesús, ko inaa xa bake e nã xa ndatsjonxin kjon.

³⁴ Ko ndo Jesús ndache ndo ndotée ndo:

—Ndotána, tjáña anta ti ndako a stenchena nã ixi je e nã noe a nã nge e stenge e nã.

Ko xi soldado sondaonxin xa ixro ixi tsono e xa ngisen tsjacha manta jiá ndo Jesús.

³⁵ Ko kueya ni tjajna nti a stetsje e nã, ko kaxon xi tetuan an ko kain xa tjanoa xa ndo Jesús ko ndachro xa:

—Ikaxin nã bingijna xi ji i, ko jai jua i je o xa tingijna xa aséen xa. Siá nduaxin je e xa ndo Cristo tsixrua an ndo Dio, chao xrobingijna aséen xa.

³⁶ Ko kaxon xi soldado tjanoa xa ndo Jesús; ko tjoké e xa ndo vino tsikonsán xrokui i ndo.

³⁷ Ko ndachro xa:

—Siá ja a ndo Rey tetuan an ni judío, ja ua xingajinxian ntãã me e.

³⁸ Ko nui ti ntãã tsikake e nã ndo Jesús tsikake e nã naa ntãã nchiín ko tsikjin nã tée griego, ko latín, ko hebreo ko ja in ndachro:

“Xi ji i Rey tetuen en ni judío.”

³⁹ Ko naa xiche e ti yuu xi jitjjan nti a, nichjangí e xa ndo Jesús ko ndachro xa:

—Siá nduaxin ja a ndo Mesías, xingajinxian ntãã me e ko nchexingajianna jan anna kaxon.

⁴⁰ Ko inaa xiche e jitjjan nango kuyakutee kichuu xa:

—Ja a, ¿á xrakuen a ndo Dio? Jajna stetjianna nti i ko chinga stengejinana.

⁴¹ Ixi jaña tikinixinna ixi ndako a juuntu una. Ko xi ji i xro an nge e ndako a juinche e xa ko nti i jitjjan xa.

⁴² Ko xi me e ndache xa ndo Jesús:

—Ja anta Jesús, xraxaonninta nchakon tsjangixinnta tsetuan annta.

⁴³ Ko juatingjexin ndo Jesús:

—Nduaxin ntatjua ixi jai tsake e ngajin ti chaxro jii ngajni.

Kuen en ndo Jesús

(Mt. 27:45-56; Mr. 15:33-41; Jn. 19:28-30)

⁴⁴ Ko konaxixe e ngata a nunte xrangixión ngusine nchakon, ko kuiji hora nínxin.

⁴⁵ Ko chjiixro konaxixe e, ko manta jijeexin ti ícha tjúá ndo a ndo Dio chrinjintonga manta.

⁴⁶ Ko ndo Jesús séen ndachro ndo:

—Ndotána, ngaya tjáanta takée aséenna.

Ko jaña jinichja ndo, ndakuen en ndo.

⁴⁷ Ko hora bikon xi tituen en xi soldado romano nge e kon en, je e xa kuajon xa juasie xa ngajin ndo Dio ko ndachro xa:

—Xi ji i tjúá xa ko nduaxin xro an nge e sinká xa.

⁴⁸ Ko kain ni ste nti a, bikon nã nge e kon en, ko sakuintekji nã ko stexronka nã ko tande e itja nã ntaquin nã.

⁴⁹ *Ko kain ni chúxin ndo Jesús, ko kaxon nchri rué e ndo tsikj xjn nchra tjajna Galilea,

ikjín ste na stenchexroan na kain nge e kon en.

Xrabaa ndo Jesús

(Mt. 27:57-61; Mr. 15:42-47; Jn. 19:38-42)

⁵⁰ Ko bake e naa xi tsango jian, ndatin in xa José ko tjaigné xa tjanya Arimatea tikinixin en Judea. Xi me e kaxon xi tetuan an tjaigné ni judío.

⁵¹ Je e xi me e jichón en xa kaxon ngisen xroxruan an ndo Dio tsetuan an ngata a nunte. Ko je e xa bake a xa juaxruxin ti nge e juinche e ikaxin ni tetuan an.

⁵² Méxin, je e xa kuitsje e xa xi Pilato ko juanchia xa juachaxin ixi satsikao xa cuerpoe ndo Jesús.

⁵³ Ko juinchexingajin xa cuerpoe ndo Jesús ko kuintsía xa ndo naa manta natjúá tsango tjintee, ko bikao na ndo ti tsinge na ngaxin in naa itjaq natjúá ti xraxro an ngisen xrabaa. Nti a bake e na cuerpoe ndo Jesús.

⁵⁴ Kain ji i kon en kóndo viernes ti taxi nchekonchjian na ixi tsjoké e na nchakon sábado.

⁵⁵ Ko sen nchri rué e ndo Jesús kuixín nunte Galilea, konchjiñe e nchra ko bikon nchra ti no tsikake e na cuerpoe ndo Jesús.

⁵⁶ Ko ikjan nchra ndo a nchra sinchekonchjian nchra inda chaxro xrase ko xroan tsjimá cuerpoe ndo.

Ko nchakon sábado joke e nchra, xranchi tsikitue en kain ni judío.

24

Xechón ndo Jesús

(Mt. 28:1-10; Mr. 16:1-8; Jn. 20:1-10)

¹ Ndúyo domingo, nchakon xrangixín semana, ikjan nchra ti tsixrabaa ndo Jesús, ko jitikao nchra inda chaxro xrase tsjinchekonchjian nchra ko sabikao kichuu nchra.

² Ko kuji nchra nti a ko bikon nchra ixi ixro tsikijeexin itjaq ti no bake e na cuerpoe ndo Jesús nango jii ixro.

³ Ko kuixin in nchra itjaq ko í kuitja i nchra cuerpoe ndo.

⁴ Tjume e tsango xronka nchra ixi noe a nchra nge e kon en. Ko tuinxin bikon nchra yuu xi ste tjenka nchra ko tóngixin manta stejá xa.

⁵ Ko tsango xronka nchra ko kuisée nchra nunte, ko xi me e ndachro xa:

—¿Sonda tjéenta naa sen jichón ngakjen en sen tsiken en?

⁶ *Je e ndo í ko a ndo nti i; xechón ndo. Sintaxiñaonta nge e ntatjunta ndo nchakon bakaji ndo nunte Galilea.

⁷ Chjen en ndo Dio, xjan jongí e xranchi chujni, ndachro ndo ixi xrokonda xrotsé na ndo ni tsango ña i ko tsóña na ndo ko tsenito na ndo ntá cru ko nchakon nínxin xroxechón ndo.

⁸ Ko je e nchra xraxaon nchra nge e tsindachro ndo Jesús

⁹ ko ikjan nchra ko beki nchra nge e kon en ngajin sen tenaá chrikao ndo ko ngajin ikaxin na kaxon.

¹⁰ Ko nchri bikao juajna ndatin in nchra María Magdalena, nchri Juana ko inaa nchri ndatin in María, janée ndo Jacobo, ko ikaxin nchri ste ngajin nchra.

¹¹ Ko sen chrikao ndo Jesús kuitikaon a sen nge e ichro nchra ixi xraxaon sen jée nge e stenichja nchra.

¹² Ko ndo Pedro kuachrjexin ndo nchia ko binga ndo kuitsje e ndo ti no tsixrabaa ndo Jesús. Ko tsje e ndo ngaxin in itjaq* ko bikon ndo ixi xro an nge e jii nti a, je o manta kuitsía cuerpoe ndo Jesús jii nango. Tjume e ikjan ndo nchia ko tsango xronka ndo ixi nge e kon en.

Nge e kon en cha o Emaús

(Mr. 16:12-13)

¹³ Xraje o nchakon me e, yuu sen chrikao ndo Jesús stetji sen cha o itji tjanya ndatin in Emaús, tjanya me e jii xranchi tenaá kilómetro kjínxin ti jii tjanya Jerusalén.

¹⁴ Ko stetjao sen kondee kain nge e juinchekao na ndo Jesús.

¹⁵ Ko stenichja sen, ndo Jesús konchjiñe e ndo tjenka sen ko jitikao ndo sen ngatja cha o.

¹⁶ Ko maski bikon sen ndo Jesús jua i kuichúxin sen ndo.

¹⁷ Ko ndo Jesús juanchangi ndo:

—Ja anta, ¿nge e stetjaunnta ti ya anta cha o? ¿Ko sonda tsango ni e asáanta?

¹⁸ Ko naa sen ndatin in Cleofas juatingéxin:

—¿Ja ua ja a jui a tjanya Jerusalén ko noa ia nge e kon en nchakon ji i?

¹⁹ Ko ndo Jesús ndachro ndo:

—¿Nge e kon en nti a?

Ko je e sen juatingíexin sen:

—¿Á noa ia nge e kon en ndo Jesús, ndo tjanya Nazaret, naa ndo profeta kuachronga chijnie ndo Dio? Kain nge e nichja ndo ko ti juinche e ndo juako ndo ijíe juachaxien ndo Dio, ko ni bikon kain ji i juinche e na juaxruxin.

²⁰ Ko xi taana xi tetuan an ko xi tetuan an tjananana kuajon xa ndo Jesús ngajin xi Pilato ixi tsake e ndo xa nganito nta cru.

²¹ Ko jan anna xraxa onna ixi je e ndo Jesús xrokuantsjengí e ndo ti tetuan an ni romano ngajin tjananana Israel. Ko jai ó chóna ní nchakon kuen en ndo.

²² Ko kaxin nchri barué e ndo Jesús juinchexronkana nchra ixi ndúyo kuitsje e nchra ti no tsixrabaa ndo Jesús,

²³ Ko kuitja i nchra cuerpoe ndo, ko ikjan nchra nchia ko bekinana nchra ixi yuu sen ángel konoxin sen ngajin nchra ko chronga sen ixi ndo Jesús jichón ndo.

²⁴ Ko kaxin sen kichianna ikjui sen kuitsje e sen ti no tsixrabaa ndo ko kuitja sen xranchi ndachro je e nchra, ko kaxon bikon a sen ndo.

²⁵ Ko ndo Jesús ndachro ndo:

—¡Sonda tienxin anta, ko tsango indao titikaonnta kain ti nge e ndachro sen profeta kuij sa ó!

²⁶ ¿Á je a ixi tsango tangi xrokron en ndo Cristo sa ó ko tjume e xrokuayé e ndo itsjé juasaya ngajni?

²⁷ Ko tjume e juangíxin ndo juinchekuen en ndo sen nge e jitaxin xroon chijnie ndo Dio ti ndachro nge e xrokron en je e ndo Cristo. Ko juangíxixin ndo ti no tsikjin ndo Moisés ko kain sen kuachronga chijnie ndo Dio ó sa ó.

²⁸ Ko kuiji sen tjanya, ko ndo Jesús juinche e ndo xranchi saxrokjui ndo ícha ikjin.

²⁹ Ko je e sen kuinóatée sen tsitu e ndo ngajin sen:

—Tituan anta ngajinna ixi ó kontie.

Ko ndo Jesús kuixin in ndo nchia ko kuitu e ndo ngajin sen.

³⁰ Ko kuintee sen ti mesa ko ndo Jesús itsé ndo nutja ko kuajon ndo juasie ndo ngajin ndo Dio, ko tjume e konchrinjin ndo níó ko kuajon ndo nio ngajin sen.

³¹ Ko hora me e, xitje e ikon sen ko kuichúxin sen ndo Jesús ko je e ndo sajuixin ndo ti ste sen.

³² Ko je e sen ndache kichuu sen:

—¿Á je a aséjina tsango chaxro kono e ti stejá ana cha o ko je e ndo jinichajina ndo nge e xrondachro chijnie ndo Dio?

³³ Ko í chuen a sen ícha; tuinxin kua sen cha o ko ikjan sen tjanya Jerusalén. Nti a kuixin in sen nchia ti ste sen tenaá apóstol chrikao ndo Jesús ko ikaxin sen ste nti a.

³⁴ Ko sen ste ngaxin in nchia chronga sen:

—Ndo Jesús nduaxin xechón ndo, ixi konoxin ndo ngajin ndo Simón Pedro.

³⁵ Tjume e sen yuu kuixin tjanya Emaús chronga sen nge e kon en ngatja cha o, ko xranchi kuichúxin sen ndo Jesús ti konchrinjin ndo nutja ko konchjeya ndo nio.

Ndo Jesús konoxin ndo ngajin sen chrikao ndo

(Mt. 28:16-20; Mr. 16:14-18; Jn. 20:19-23)

³⁶ Ko xra stetjao sen nge e kon en, je e ndo Jesús bake e ndo ngusine ti ste sen ko ndachro ndo:

—¿Á chao stenta?

³⁷ Ko je e sen ícha xronka sen ixi xraxaon sen ti stetsje e sen naa espíritue ni tsiken en.

³⁸ Ko je e ndo Jesús ndache ndo sen:

—¿Sonda tsango stexronkanta ko sonda xratitikaon anta ngaya asáanta?

³⁹ Tsje enta tjána ko tutéena ixi nduaxin jan an. Itseninta ko tsje enta; ixi naa espíritue ni tsiken en chóna i ntao ko intaa xranchi tikonnta chonda jan an.

⁴⁰ Jaña ndachro ndo, ko juako ndo itja ndo ko tuté ndo.

⁴¹ Ko je e sen xratitikaon a sen nge e stetsje e sen ixi tsango juaxruxin ste sen ko xrastexronka sen; méxin, je e ndo ndachro ndo:

—¿Á chondanta nge e sineni?

⁴² Ko je e sen chjée sen ndo tu o kuchee tsichjánta a xro i ko tu o katje chóna tsjeen kuchji i.

⁴³ Ko je e ndo itsé ndo nge e kuajon sen ko juine ndo ko je e sen stetsje e sen.

⁴⁴ Ko tjume e ndachro ndo:

—Nchakon bake e ngajinnta ntatjunta kain nge e xrojuinchená nã xranchi tsikjin ndo Moisés ko tsikjin sen profeta ko ti jitaxin xroon Salmo.

⁴⁵ Ko tjume e je e ndo kuajon ndo juachaxin ixi tsiexnin sen ti jitaxin xroon chijnie ndo Dio,

⁴⁶ko ndachro ndo:

—Ja in jitaxin ixi ndo Cristo xrokonda tsen en ndo ko nchakon nínxin xroxechón ndo.

⁴⁷ Ko juachaxien ndo ko nombrée ndo xrokonda xronichja nà tsin en kain ni tjanya xasintajni ixi jaña xrokjan nà tsitikaon nà ndo Dio, ko tsomé e kain ti ndako a nche e nà. Xroxrangíxixión tsin en ni tjanya Jerusalén.

⁴⁸ Ko ja anta ti bikonta kain ji i xrokonda xronichjanta ti nge e bikonta.

⁴⁹ *Ko jan an xroxruan annta ti nge e ndachro Ndotána. Ja anta tituan anta nti i tjanya Jerusalén tsayéjanta ijié juachaxin tsí xín ngajní ko me e Espíritue ndo Dio.

Ndo Jesús sakjui ndo ngajní

(Mr: 16:19-20)

⁵⁰ *Ko kuachrjexin sen tjanya me e ko ndo Jesús bikao ndo sen tjanya Betania. Nti a juatsi in itja ndo ko juinchenchaon ndo sen.

⁵¹ Ko xrajinchenchaon ndo sen, je e ndo kuachrjendáa ndo, ko kuaxi kuajin in ndo ngajní.

⁵² Ko je e sen kuajon sen juasaya ngajin ndo Jesús. Ko tjume e ikjan sen tjanya Jerusalén, ko tsango ijié juaxruxin chónnda aséen sen.

⁵³ Ko kain nchakon bake e sen ngaxin in ndo a ndo Dio ko tajon sen juasaya ngajin ndo.

Chijnie ndo Jesús chronga ndo Juan

Ngisen chronga xranchi jii ndo Dio kuij nti i nunte xasintajni

¹ Ti xrangixixin xrako a nunte xasintajni ó jii chijni ko chijni me e ndo Cristo, ko je e ndo bakekao ndo ndo Dio ko je e ndo ndo Dio ndo.

² Ti xrangixixin bakekao ndo ndo Dio,

³ ko ixi je e ndo Cristo, ndo Dio juinchéña ndo kain nge e jii. Ko ninaa nge e jii xrokuake a siá xrakuajon a ndo juachaxien ndo xrobake e.

⁴ Je e ndo kuajon ndo juachaxin jichón kain nge e ko je e ndo naa xro i tingasáña ngajin chujni.

⁵ Ko xro i me e tingasáña ti naxixe e ko ti naxixe e jua i nchekanga xro i.

⁶ *Bake e naa ngisen tsixrua an ndo Dio, ndo me e ndatin in ndo Juan

⁷ ixi xrochronga ndo kondee xro i me e ixi kain chujni tsitikaon na xro i ixi nge e xrondachro ndo.

⁸ Ko ndo Juan je a je e ndo xro i me e. Je e ndo je o xrochronga ndo kondee xro i.

⁹ Xro i nduaxin xro i tingasáña kain chujni ó jitiij xro i nunte xasintajni.

¹⁰ Chijni jian, ndo Cristo, ó jii ndo nunte xasintajni, ko maski ndo juinchéña ndo nunte, chujni ste nunte xasintajni kuichúxin a na ndo.

¹¹ Kuij ndo ngajin ni judío, ni tjajnée ndo, ko kuayé a na ndo.

¹² Ko ikaxin sen kuayé e sen ndo ko kuitikaon sen ndo, kuajon ndo juachaxin ngajin sen ixi xrokjan sen chjen en ndo Dio.

¹³ Sen me e je a xranchi tjongí e naa chjen en naa chujni jaña tjongí e sen. Na i. Ó chjen en ndo Dio je e sen.

¹⁴ Ko chijni, ndo Cristo, je e ndo ikjan ndo chujni ko bake e ndo ngajinna ko tjaunna ndo ko ti nduaxin ndachro ndo. Ko ó bikona juachaxien ndo, juachaxien chjen en Ndotáina Dio, xjan naakuaxon.

¹⁵ Ndo Juan nichja ndo ixi ndo Cristo ko ndachro ndo:

—Ji i ngisen ntatjunta nchakon ndachrjan, tjume e tsij inaa ngisen ícha tetuan an, ixi ó sa ó jii ndo ixi najan an.

¹⁶ Kainna ó kuayé ena juachaxin tjintee tajon ndo, ko nchennaonna ndo kain nchakon.

¹⁷ Ley kuetuan an ndo Dio juinchenojna ndo Moisés, ko ti tjue e ndo chujni ko ti nduaxin me e ti xin ixi ndo Jesucristo.

¹⁸ Xro an ngisen bikon ndo Dio. Je o chjen en ndo, xjan naakuaxon, xjan jiníi Ndotée ko je e xjan juinchenojna xjan xranchi jii Ndo Dio.

Ndo Juan nichja ndo kondee ndo Jesús

(Mt. 3:11-12; Mr. 1:7-8; Lc. 3:15-17)

¹⁹ Kaxin ni judío, ni tjajna Jerusalén, xruan an na xitaana ko xi tjako ley ngajin ndo Juan ixi tsjanchangí e na ndo:

—¿Ngisen ja a?

²⁰ Ko je e ndo ndako juatingéxin ndo:

—Je a ndo Cristo najan an.

²¹ Tjume e íjngo juanchangi e xa ndo:

—¿Ngisen ja a tjume e? ¿Á ndo kuachronga chijnie ndo Dio ó sa ó, ndo Elías?

Ko ndo Juan ndachro ndo:

—Je a je e ndo jan an.

Tjume e juanchangi e xa ndo:

—¿Á ja a ndo xrochronga chijnie ndo Dio, ndo xrokuij?

Ko juatingéxin ndo:

—Na i.

²² Méxin, ndache xa ndo:

—¿Ngisen ja a tjume e? Xrokonda tsiki anna chijni ngajin ngisen xruan anna. ¿Nge e chao xrondachrua ngisen ja a?

²³ Juatengéxin ndo Juan:

—Jan an naa ngisen nichja séen jii ntajie ndachro: “Tantje enta naa cha o nao itji ixi Ncháina tsij” —ti ndachro ndo Juan me e tsindachro ndo profeta Isaias.

²⁴ Ko chujni tsikjin tsijao ndo Juan, xi fariseo tsixrua an chujni

²⁵ ko juanchangi e na ndo:

—Siá je a ja a ndo Cristo, ko je a ndo profeta Elías, ko kaxon je a ndo profeta stechón en na, ¿sonda tikitée na tjume e?

²⁶ Ndo Juan ndache ndo na:

—Jan an tikitéexin na inda, ko ngakjen en ja anta jii naa ngisen chuxin anta.

²⁷ Tuenxin najan an jitií ndo ko icha tetuan an ndo ixí jan an. Ko tikinixin a tsoxindanga a tjuée katée ndo.

²⁸ Kain ji i kon en tjajna Betábara ndatsjonxin ti indajitinga ndatin in Jordán ti no jii ndo Juan jitikitée ndo chujni.

Ndo Jesús xranchi naa kutuchjon ne e ndo Dio

²⁹ Ndúyaxin ndo Juan bikon ndo ndo Jesús jitonchjiñe e ndo tjenka ndo ko ndachro ndo:

—Tsje enta nti i jitií ndo xranchi naa Kutuchjoen ndo Dio, ndo tantsje jíee ni nunte xasintajni.

³⁰ Nchakon ndachrjan jitií naa ngisen tuenxin najan an, ngisen ícha tetuan an ixí ó sa ó jii je e ndo, me e nichja ixí je e ndo.

³¹ Jan an kaxon kuichuxin a ndo. Ko jan an bakikitéexin na ixí inda ixí jaña ni tjajna Israel xrokuichuxin na ndo.

³² Kaxon ndachro ndo Juan:

—Jan an bikon Espíritue ndo Dio xingajinxin ngajní xranchi naa kuntúá ko bake e ngata a ndo.

³³ Ko xranóna i ngisen je e ndo. Ko ngisen xruan anna tsikitée chujni ixí inda, ndo me e ndachijina ndo: “Nchakon tsikuan Espíritue ndo Dio xroxingajinxin ngajní ko tsií ngata a naa ngisen, ndo me e tsikitée ndo na ixí Espíritue ndo Dio.”

³⁴ Jan an ó bikon ndo ko chrja nga ixí je e ndo Chjen en ndo Dio.

Ndo Jesús kuinche e ndo sen bajikao ndo

³⁵ Ndúyaxin ndo Juan jii ndo nti a íjngo ko kao yuu sen chrjkao ndo,

³⁶ ko hora bikon ndo Juan kuatsinga ndo Jesús, ndachro ndo:

—Tsje enta, je e ndo Kutuchjoen ndo Dio.

³⁷ Kayui sen rué e ndo Juan kuin en sen nge e ndachro ndo ko rué e sen ndo Jesús.

³⁸ Méxin, ndo Jesús ngatjia ndo tsje e ndo ko bikon ndo jirué e sen ndo ko ndachro ndo:

—¿Nge e tjéenta?

Je e sen ndachro sen:

—Maestro, ¿no jii ndúya?

³⁹ Ko juatingéexin ndo Jesús:

—Xrokuinta tsje enta.

Méxin, ikjui sen ko bikon sen ti no bakitu e ndo ko kuatsinga sen nguixin nchakon me e ngajin ndo ixí ó kóndo xranchi las cuatro.

⁴⁰ Naa sen yuu tsikin en nge e ndachro ndo Juan ko tsirue e ndo Jesús, ndo me e ndatin in Andrés, ndo kichuu ndo Simón Pedro.

⁴¹ Ndo Andrés tuinxin ikjui ndo bijée ndo ndo kichuu ndo, ndo Simón, ko ndachro ndo:

—Kuitjana ndo Mesías. Mesías xrondachro Cristo.

⁴² Tjume e ndo Andrés bikao ndo ndo Simón ti no jii ndo Jesús. Ko hora bikon ndo Jesús sen, ndachro ndo:

—Ja a Simón, chjen en ndo Jonás. Ko jai ndatsi ian Cefas. Ko Cefas xrondachro Pedro.

Ndo Jesús tiye e ndo ndo Felipe ko ndo Natanael

⁴³ Ndúyaxin ndo Jesús tjaun ndo xrokjui ndo nunte Galilea ko kuetan ndo ndo Felipe, ko ndache ndo ndo:

—Ruanana.

⁴⁴ Ko ndo Felipe, ndo tjajna Betsaida, nti a kaxon tajnée ndo Andrés ko ndo Pedro.

⁴⁵ Ko ndo Felipe ikjui ndo bijée ndo ndo Natanael ko ndachro ndo:

—Ó bikona ndo xrokuíj xranchi tsikjin ndo Moisés ti xroon ley ko kaxon ngisen tsikjin sen profeta. Ji i ndo Jesús, chjen en ndo José, ndo tjajna Nazaret.

⁴⁶ Ndachro ndo Natanael:

—¿Á ko chao xrokuachrje naa nge e jian tjajna Nazaret?

Juatengéexin ndo Felipe:

—Xrokuia tsje é.

⁴⁷ Ko hora bikon ndo Jesús jitonchjiñe e ndo Natanael, ndachro ndo:

—Nti i jitií naa ndo nduaxin israelita ko xro an juancheya jii ngajin ndo.

⁴⁸ Méxin, juanchangi ndo Natanael ngajin ndo Jesús:

—¿Xranchi chuxianna?

Ko ndachro ndo Jesús:

—Jan an bikuan ti xratiya ia ndo Felipe hora bake e chringi ntaꝯ tajon tuhigo.

⁴⁹ Méxin, ndachro ndo Natanael:

—Maestro, ja a Chjen en ndo Dio, ndo Rey tetuan an tjanya Israel.

⁵⁰ Juatingéixin ndo Jesús:

—¿Á kuitikaonna ixi je o ntatjua bikuan chringi ntaꝯ tajon tuhigo? Tjume e tsikuan ícha ijié nge e ixi ti nge e bikuan jai.

⁵¹ Kaxon ndachro ndo Jesús:

—Nduaxin ntatjunta ixi tsikonnta xroxitje e ngajni ko sen angéel ndo Dio stetajin in sen ko stexinganjin sen ngata a Chjen en ndo Dio, xjan jongí e xranchi chujni.

2

Tjanya Caná nunte Galilea kute e na

¹ Nii nchakon tjume e bake e naa kia kute e na tjanya Caná nunte Galilea. Janée ndo Jesús jii jan nti a.

² Ni bake e kia nichje e na ndo Jesús ko sen teyuu chrikao ndo xrokuji sen kia me e kaxon.

³ Tjume e tsikanga xranvino ko janée ndo Jesús ndache jan ndo:

—Í chóna i na xranvino.

⁴ Ko juatingéixin ndo Jesús:

—Nchri, ¿sonda ndachijiana me e? Xratiji a nchakon sinta a naa ixra ijié.*

⁵ Ko je e jan ndache jan ni stetonchjeya nge e:

—Nche enta kain nge e xrontatjunta ndo.

⁶ Ko nti a jii ikjaon ichi tsikoña ixro, jitjiá inda, me e tunde e ni judío nchakon tijma na, nchakon tantsje na jée na. Ko ngujngu ichi me e titja tikia xranchi ochenta o ciento litro inda.

⁷ Ndo Jesús ndache ndo sen jitonchjeya nge e:

—Nchechrénta inda ichi ji i.

Ko juinche chré na ichi inda.

⁸ Tjume e ndachro ndo Jesús:

—Tantsjenta nchiín inda ko tiku unta inda ngajin xi tetuan an kia.

Ko jaña juinche e na.

⁹ Ko xi tetuan an kia kui i xa nchiín inda ko ó tsikjan inda xranvino ko noe a xa no kujxin xran. Je o ni tochjeya nge e no e na ixi je e na tsikantsje na inda. Méxin, xi tetuan an kia kuiye e xa xi kute e.

¹⁰ Ko ndache xa xi kute e:

—Kain na sa ó tajon na xran ícha jian ko hora ni kuji kia ó kui i na yee xran, me e tajonni xran ngixeko. Ko ja a tsikatsian xran jian hasta jai.

¹¹ Nge e tsijinche e ndo Jesús tjanya Caná Galilea, ña sa ó nge e juinche e ndo ixi tsjako ndo juachaxien ndo, ko sen teyuu chrikao ndo kuitikaon sen ndo.

¹² *Ko kuatsinga ji i, ikjui ndo tjanya Capernaum, ko janée ndo ko xikichuu ndo ko sen teyuu chrikao ndo, ko nti a bake e sen kaxin nchakon.

Ndo Jesús nchetjúá ndo ni ngo ijié

(Mt. 21:12-13; Mr. 11:15-18; Lc. 19:45-46)

¹³ Ó tsji nchakon kia Pascua ne e ni judío, ndo Jesús sakjui ndo tjanya Jerusalén.

¹⁴ Ko nti a ngaxin in ni ngo jii kuitja ndo ni nchekji kuxinta, kutuchjon, kuntúa, ko ni ste nunte jitasingixin na tomie chujni.

¹⁵ Ko hora bikon ndo Jesús ji i, juinchéña ndo naa cuarta, ko bengixin ndo na nti a ko kao kutuchjoen na ko kuxinte e na. Ko kuintji ndo ngata a nche tomie ni bakasingixin ko ndá a banka ndo mesé na.

¹⁶ Ko je e ndo ndache ndo ni nchekji kuntúa:

—¡Tantsjexinnta kain nge e nti i! Nchéña inta ndo a Ndotána xranchi naa ndasin.

¹⁷ Méxin, sen teyuu chrikao ndo xraxaon sen nge e ti ndachro xroon chijnie ndo Dio: “Tsango chjána juaña nge e ndako a ton en ngaxin in ndointa.”

¹⁸ Méxin ni judío juanchangi e na ndo:

—¿Nge e tjakoxian ixi chao sinche e kain ji i?

¹⁹ *Ko juatingéixin ndo Jesús:

—Tonchjejinnta ni ngo ji i ko nínxin nchakon sintakonchjian ni ngo íjngo.

²⁰ Ko ni judío ndache na ndo:

—Yuukan ko ikjaon nano konchjianxin ni ngo ji i, ko, ¿á ja a nínxin nchakon sinchekonchjianxin ni ngo íjngo?

* 2:4 naa ixra ijié milagro 2:12 Mt. 4:13. 2:19 Mt. 26:61; 27:40; Mr. 14:58; 15:29.

²¹ Ko ti ni ngo nichja ndo Jesús me e cuerpoe ndo.

²² Méxin, nchakon xechón ndo Jesús, sen teyuu chrikao ndo xraxaon sen ti nge e tsichronga ndo, ko kuitikaon sen xroen ndo Dio ko chijni tsindache ndo sen.

Ndo Jesús chúxin ndo nge e xraxaon kain chujni

²³ Nchakon ndo Jesús bake e ndo tjanya Jerusalén kia Pascua, itsjé nā kuitikaon nā ndo nchakon bikon nā nge e jian juinche e ndo.

²⁴ Ko ndo Jesús kuachúntia i ndo nā ixi chúxin ndo nge e xraxaon kain nā,

²⁵ ko baxrokonde a ndo ixi naa chujni xrobeki e ndo nge e juinche e inaa chujni ixi je e ndo no e ndo nge e xraxaon nā ngaya aséen nā.

3

Ndo Jesús ko xi Nicodemo

¹ Bake e naa xi Fariseo ndatin in xa Nicodemo, xi me e tetuen en xa ngajin ni judío.

² Xi ji i kuji xa ngajin ndo Jesús naa tiie ko ndachro xa:

—Maestro, nónana ixi ndo Dio xruan an ndo ixi sinchekuannāna, ixi xro an ngisen xrojuinche e nge e jian nche e ja a siá ndo Dio xrobake a ndo ngajian.

³ Ko ndo Jesús ndachro ndo:

—Jan an ntatjua ixi ngisen tjongíe a íjngo jua i tsikon sen ti tetuan an ndo Dio.

⁴ Juanchangi xi Nicodemo:

—¿Xranchi tsjongí e naa xi íjngo siá ó ntaxi xa? ¿Xranchi chao íjngo tsixin in xa tse e janée xa ko tsjongí e xa íjngo?

⁵ Ko ndo Jesús ndachro ndo:

—Nduaxin ntatjua: ixi ngisen tsjongíexin a inda ko Espíritue ndo Dio jua i tsixin in sen ti tetuan an ndo Dio.

⁶ Chujni tjongíexin ndotée ko janée xra je o chujni sen, ko sen tjongíexin Espíritue ndo Dio, sen me e tayé e sen Espíritue ndo.

⁷ Xronka ia ixi nge e ntatjua ixi xrokonda tsjongí e kain chujni íjngo.

⁸ Chrinto itji chrinto no tjaun chrinto. Ko ja a tin en xroin chrinto ko noa ia no itji chrinto ko no ti xin chrinto. Ko jaña sen tjongíexin Espíritue ndo Dio.

⁹ Ko je e xi Nicodemo juanchangi xa:

—¿Xranchi tson en ji i?

¹⁰ Ko ndo Jesús ndachro ndo:

—Ja a nchekuen én chujni Israel, ¿á tienxin a ti ntatjua?

¹¹ Jan an nduaxin ntatjua ti nónana nichjana ko ti bikona tekina, ko ja anta titikaon anta ti nge e ndachrjanna.

¹² Teki anta nge e tson en ngata a nunte nti i ko titikaon anta ko, ¿xranchi tsitikaonnta siá xrontatjunta nge e tson en ngajni?

¹³ Xro an ngisen kuajin in ngajni, je o Chjen en Ndo Dio, xjan jongí e xranchi Chujni, je e xjan bake e xjan ngajni ko kuixin xjan nti a.

¹⁴ Xranchi juinche e ndo Moisés nchakon bake e sen ntajie, nti a kuasintjian ndo naa kunchee chika ixi xrotsje e sen ba ko jaña tsen a sen; méxin, jaña tson en tsasintjian nā Chjen en ndo Dio, xjan jongí e xranchi chujni,

¹⁵ ko jaña kain sen tsitikaon ndo Jesús tsen a aséen sen, tsechón sen kain nchakon.

¹⁶ 'Ndotáina Dio tsango tjue e ndo kain chujni jii ngata a nunte xasintajni,* méxin xruan an ndo chjen en ndo, xjan naakuaxon, ixi kain sen tsitikaon xjan tsitjáña i aséen sen ko je e sen tsechón sen kain nchakon.

¹⁷ Ko ndo Dio xruan i ndo chjen en ndo ngata a nunte xasintajni ixi tsjankata a xjan ijié ngajin nā. Na i, je e xjan tsantsje xjan ijié chóna nā ko jaña tsitjáña i nā.

¹⁸ Ngisen tsitikaon chjen en ndo Dio tsjankata i ndo sen ijié. Ko ni tsitikaon a, ó juankata a ndo ijié ngajin nā ixi kuitikaon a nā chjen en ndo Dio, xjan naakuaxon.

¹⁹ Méxin, ni titikaon a ó juexin juankata a ndo nā ijié, ixi kuji ngisen juinchengasáñe e chujni jii ngata a nunte xasintajni ko je e chujni juinche a juaxrxin ixi ícha rué e nā ti naxixe e ixi ndako a nche e nā.

²⁰ Kain ni ndako a nche e, ningakon en nā xro i tingasáña ko tonchjiñe a nā tjenka xro i ixi tjaun a nā tsonoxin ti ndako a stenze e nā.

²¹ Ko sen nche e jian tonchjiñe e sen tjenka xro i tingasáña ixi chao tsikon chujni kain nge e stenze e sen xranchi tjaun ndo Dio.

Ndo Juan chronga ndo íjngo kondee ndo Jesús

* 3:16 xasintajni mundo

²² Tjume e ndo Jesús ko sen teyuu chrikao ndo sakjui sen nunte Judea. Nti a kuatsinga ndo kaxin nchakon bikitée ndo chujni.

²³ Kaxon ndo Juan bake e ndo tjanya Enón tjenka tjanya Salim ko nti a bikitée ndo chujni ixi nti a jii yee inda. Ko chujni bakii na batikitée na.

²⁴ *Ji i kon en ti xratijé a na ndo Juan ndo achjiso.

²⁵ Méxin, kaxin chujni, sen chrikao ndo Juan ko ni judío kuaxi nichja na xranchi xrotjúáxin chujni.

²⁶ Ko sen chrikao ndo Juan kuintekji sen ngajin ndo ko chronga sen ngajin ndo:

—Maestro, ndo bake e ngajinnta tuenxin ndario Jordán, ndo kondée bekinananta, jai kao ndo tikitée ndo chujni ko itsjé na rué e na ndo.

²⁷ Ko ndachro ndo Juan:

—Xro an ngisen xrojuinche e naa ixra siá ndo Dio xrokuajon a ndo juachaxin.

²⁸ *Ja anta kuin ennta nchakon ndachrjan ixi jan an je a ndo Cristo. Je o naa ngisen kuitao en ndo cha o ixi xrochrjanga tsij ndo.

²⁹ Nchakon tute e chujni, xi tute e tsayé e xa janchri e xa. Ko tjume e sen chúxin xa take e sen juaxruxin ixi jitin en sen nge e jinichja xa. Ko kaxon jan an juaxruxin ritjén ixi kueya chujni jitonchjiñe e ngajin ndo Jesús.

³⁰ Je e ndo xrokonda ícha tsetuan an ndo ko jan an ína i.

Ngisen kuixin ngajni

³¹ Ndo kuixin ngajni tetuen en kain chujni. Ko chujni nunte xasintajni chronga nge e jii nunte xasintajni. Ko ndo kuixin ngajni tetuen en ndo kain nge e.

³² Je e ndo nichja ndo nge e tsikikon ndo ko nge e tsikin en ndo. Ko xro an chujni titikaon na nge e ndachro ndo.

³³ Ko siá xroxan ngisen titikaon nge e ndachro ndo, jaña tjako sen ixi nduaxin nge e nichja ndo Dio,

³⁴ ixi ndo xruan an ndo Dio nichja ndo chijnie ndo Dio, ixi je e ndo kuayé e ndo kain juachaxien Espíritue ndo Dio.

³⁵ *Ndotáina Dio tjue e ndo Chjen en ndo, ko jaña tsikajon ndo kain juachaxin ixi tsetuen en xjan kain nge e.

³⁶ Ngisen tsitikaon Chjen en ndo Dio xrochóna sen juachaxin tsechón sen kain nchakon. Ko ngisen tjaun a tsitikaon Chjen en ndo xrochóna i sen juachaxin me e, ixi ndo Dio tsajon ndo juachaxin tangi tson en sen.

4

Ndo Jesús juao ndo naa nchri samaritana

¹ Tjume e ni fariseo kono e na ixi ícha itsjé chujni rué e ndo Jesús ko ícha itsjé chujni bikitée ndo ixi ndo Juan.

² Ko je a ndo Jesús tikitée ndo na. Sen chrikao ndo, sen me e bikitée chujni.

³ Hora kono e ndo Jesús ixi jaña tsikin en ni fariseo, kuachrxexin ndo nunte Judea ko íjngo ikjan ndo nunte Galílea.

⁴ Ko hora kuachrxexin ndo nti a xrokonda tsatsinga ndo nunte Samaria.

⁵ Ko kuiji ndo naa tjanya Sicar nunte Samaria, tjenka nunte tsikajon ndo Jacob kuayé e chjen en ndo, ndo José.

⁶ Nti a jii naa pozo tjiá inda kuachóna ndo Jacob. Ko ndo Jesús kuiji ndo nti a ko tsango konchrje ndo ixi tsango ikjin tsikjixin ndo, méxin bake e ndo nunte tjenka pozo. Hora me e xranchi ngusine nchakon.

⁷ Ko tuinxin kuiji naa nchri tjanya Samaria, kuiji nchra ti pozo me e ixi tsantsje nchra inda. Ko ndo Jesús ndache ndo nchra:

—Chjanana nchiín inda tsi i.

⁸ Ko sen teyuu chrikao ndo satsikintekji sen tjanya tjenka nti a bike na sen nge e sinekao sen ndo.

⁹ Ko nchri samaritana juatingíexin nchra:

—¿Sonda ja a naa chujni judío tjanchianana inda ixi jan an naa nchri samaritanana (Jaña ichro nchra ixi ni judío tjento a na ni samaritano.)

¹⁰ Ko juatingíexin ndo Jesús:

—Siá xrokono a nge e tajon ndo Dio ko xrochuxian ngisen jitjanchia a inda, ja a xrojuan-chanana inda ko jan an xrotjá a inda jichón.

¹¹ Ko je e nchra juate e nchra:

—Ja a chondai a nge e tsantsjexian inda ko pozo tsango yaso e pozo, ¿no xrochjánaxianna inda jichón?

¹² Ndo Jacob, ndo kuachrjenixinna, ndo me e kuitunana ndo pozo ji i, ko je e ndo baki i ndo inda ko chjen en ndo ko kain kuée ndo kaxon. ¿Á ja a, á ícha tjintee ixi je e ndo?

¹³ Ko juatingíexin ndo Jesús:

—Kain ni ti i inda ji i, íjngo tsen en na inda.

¹⁴ Ko sen tsi i inda tajon jan an, nai a tsinteken en sen inda. Ixi inda tajon jan an tsoñá xranchi inda jitachrjexin ngaya aséen sen ko ji i tajon juachaxin tsechón sen kain nchakon.

¹⁵ Ko ndachro nchra:

—Chjánana inda me e, ixi tsen ana inda íjngo ko íxrokjan ina tsantsje inda nti i.

¹⁶ Ko ndachro ndo Jesús:

—Ítjia tiye é ndoxi a ko tjume e tsji ia nti i íjngo.

¹⁷ Ko je e nchra ndachro nchra:

—Chonda i xixi na.

Méxin, ndachro ndo Jesús:

—Nduaxin ndachrúa ixi chonda ia xixi a.

¹⁸ Ixi kuachonda na ó xixi a, ko xi chonda jai je a xixi a. Nduaxin ndachrúa ixi chonda ia xixi a.

¹⁹ Ko kuin en nchra ji i ko ndachro nchra:

—Nóna ixi ja a naa ngisen chronga chijnie ndo Dio.

²⁰ Sen kuachrjenixinna, kuaxraxaonxin sen ndo Dio ijna nti i. Ko ja anta, ni judíonta ndachronta ixi xrokonda xroxaxaonxinna ndo Dio ni ngo ijíe jii tjajna Jerusalén.

²¹ Ko ndo Jesús ndache ndo nchra:

—Titikáoanna ixi tsij nchakon xrokonda i xroxaxaonxinnta Ndotáina Dio ijna nti i ko xroxaxaonxin anta ndo tjajna Jerusalén.

²² Ja anta chujni samaritanonta noa inta ngisen xraxaonnta. Ko jan an naa chujni judío chuxinna ngisen xraxa onna. Méxin, ndo tantsje ijíe chóna chujni, ndo me e tsikachrjexin ndo ni judío.

²³ Ko jitiji nchakon ko jai nchakon me e, ixi sen nduaxin tjaun sen tsajon sen juasaya ngajin Ndotáina Dio, xrokonda ixi nchijíi aséen sen xroxaxaonxin sen Ndo. Ko Ndo Dio tsake e ndo juaxruxin ixi jaña xroxaxaon sen ndo.

²⁴ Ndo Dio espíritu ndo, ko sen xraxaon ndo xrokonda xroxaxaonxin sen ndo ixi aséen sen.

²⁵ Ko ndachro nchra:

—Jan an nóna ixi tsij ndo Mesías, ndo Cristo. Ko nchakon tsij ndo sinchekuannana ndo kain nge e.

²⁶ Ko juatingíexin ndo Jesús:

—Ndo me e najan an, ndo ritjáoa jai.

²⁷ Xrastetjao sen ja in, sen teyuu chrikao ndo kuiji sen, ko xronka sen ixi bikon sen jinichje e ndo naa nchri, ko xro an ngisen juanchangi e ndo nge e tjaun nchra, o sonda jinichje e ndo nchra.

²⁸ Tjume e je e nchra bake e nchra nchixran nunte ko sakjui nchra tjajna beki e nchra kain chujni:

²⁹ —Ichjina, tsikonnta naa ndo chronga kain nge e juinta a. ¿Á je a ndo Cristo ndo me e?

³⁰ Tjume e chujni kuachrjexin na tjajna kuitsje e na ndo Jesús.

³¹ Xratiji a na, sen teyuu chrikao ndo tinóatée sen ngajin ndo, ndachro sen:

—Maestro, inte nge e.

³² Ko ndachro ndo:

—Jan an chóna nge e iné ko ja anta chuxin anta me e.

³³ Ko sen teyuu chrikao ndo kuaxi sen juanchangi e kichuu sen:

—¿Á xrojan chujni biken en ndo nge e juine ndo?

³⁴ Ko ndachro ndo Jesús:

—Ti iné jan an me e ixra sinta a ti tsiketuan an ngisen xruan anna, ko xrokonda sintaxejin ixra.

³⁵ Ja anta ndachronta: “Xratitjáña noó nchanitjao tsandáanta noatrigo.” Ko jan an ntatjunta: Tsje enta no tsikinga ixi ó kuicha noa ko ó chao tsandáani.

³⁶ Sen tandáa, xenge e sen na. Ko nge e tandáa sen me e chujni, ko chujni me e tsechón kain nchakon. Ko sen tenga ko sen tandáa xre ó juaxruxin take e sen.

³⁷ Ko nduaxin nge e ndachro sen: “Naa sen tenga, ko inaa sen tsandáa.”

³⁸ Méxin, jan an xruan anna ixi tsandáanta naa nunte tsikenga inta. Inaa sen tsijinche e ixra ko ja anta tsjachanta tasiinnata nge e benga sen.

³⁹ Ko itsjé ni tjajna samaritano ni ikjui nchra kuindache nchra, kuitikaon na ndo Jesús ixi chronga nchra: “Ndo ji i chronga ndo kain nge e juinta a sa ó.”

⁴⁰ Ko hora kuin en na nge e juinche e ndo, kuji na ngajin ndo ko kuinóatée na ngajin ndo ixi tsitu e ndo nti a ngajin na. Ko nti a kuitu e ndo yuu nchakon.

⁴¹ Ko ícha kueya na kuitikaon na ndo ixi kuin en na nge e nichja ndo.

⁴² Ko ndache na nchra:

—Jai titika onna, ko ixi je a je o nge e ndachijiana. Xaxon ixi jai jan anna kuitikaonna ixi kuin anna nge e nichja ndo ko nóhana ixi je e ndo nduaxin ndo Cristo ndo, ndo sinchemé e jíee kain chujni.

Ndo Jesús ko chjen en xi nche e ixra gobierno

⁴³ Yuu nchakon tjume e, ndo Jesús kuachrjexin ndo nunte Samaria ko sakjui ndo no nunte Galilea.

⁴⁴ *Xranchi tsindachro ndo Jesús, ninaa ndo chronga chijnie ndo Dio, ni tjajnée ndo xrochónde e na ndo juasaya.

⁴⁵ *Nchakon kuiji ndo nunte Galilea, ni nti a kuayé e na ndo ko kuajon na juasaya ngajin ndo ixi kaxon tsikjin na kia Pascua tjajna Jerusalén, ko bikon na nge e juinche e ndo kia nti a.

⁴⁶ *Tjume e ikjan ndo Jesús tjajna Caná nunte Galilea, ti no tsijnchekjan ndo inda ixran vino. Nti a bake e naa xi tituan an xrée gobierno. Ko kuachóna xi naa chjan ni e tjajna Capernaum.

⁴⁷ Ko hora tsikin en xa tsikixin ndo Jesús nunte Judea ko kuiji ndo nunte Galilea, rué e xa ndo ko kuinóatée xa ngajin ndo ixi itsji ndo ndo a xa ko sinchexrjuen en ndo chjen en xa, ixi ó jite en xjan.

⁴⁸ Ko ndachro ndo Jesús:

—Ja anta, titikaon anta siá tsikon anta naa nge e jian sinta a.

⁴⁹ Ko kuinóatée xi nche e xrée gobierno ko ndachro xa:

—Taka ichjina ixi chjan na ó jite en xjan.

⁵⁰ Ko juate e ndo Jesús:

—Ikjan ndúya ixi chjan an chao jii xjan jai.

Ko xi me e kuitikaon xa nge e ti ndachro ndo Jesús, ko sakjui xa.

⁵¹ Ko ikjan xa ndo a xa, ni nche e xrée xa kuachrje na biketan na xa ngatja cha o, ko ndache na xa:

—Chajan an ó jian jii chán.

⁵² Ko juanchangi e xa na ngixe e hora kuaxi koxruen en chán. Ko chronga na:

—Jnajna xranchi hora naa kóndo kuachrje e chán súa.

⁵³ Ko jaña kono e ndotée chán ixi hora ña tsindachro ndo Jesús ixi chjen en xa ó jian jii chán. Ko je e xa ko kain ni ndo a xa kuitikaon na ndo Jesús.

⁵⁴ Ji i yuxin nge e jian juinche e ndo Jesús nchakon kuixin ndo nunte Judea, ikjan ndo nunte Galilea.

5

Ndo Jesús juinchexruen en ndo naa xi

¹ Tjume e ni judío bake e na naa kia ko ndo Jesús ikjan ndo tjajna Jerusalén íjngo.

² Nti a tjenka ntächja ndatin in Ntächje e Kutuchjon jii naa pila inda ngigua hebreo ndatin in Betesda. Ko ngande e pila me e jii na ó tjatu o nchínchín tsiki te na.

³ Nti a stetsinga kueya ni ni e, ni tikon a, ni jua i itji ko ni jua i nchetengi tutée. Stechón en na tsontengi inda

⁴ ixi je a nanaunka xingajin naa ndo ángel tjenka pila me e ko nchetengi ndo inda. Ko ni sa ó tiji nti a ko tjingi na inda toxruenxin na ixi ngixe i ichin bachóna na.

⁵ Nti a jii naa xi ni e, ó ní ite ko ijní nano ni e xa.

⁶ Ko hora bikon ndo Jesús jitsinga xa, kono e ndo ixi ó sée ni e xa, ko juanchangi e ndo xa:

—¿Á tjauan tsoxruan an?

⁷ Ko xi ni e juatingíexin xa:

—Chonda i ngisen tsingijnana tsjingi inda hora tontengi inda. Ko hora tja on tsjingi nda, inaa ngisen ícha taka tjingi nda.

⁸ Ko ndachro ndo Jesús:

—Tingatjen, tatsían kania a, ko tajia.

⁹ Ko tuinxin koxruen en xa, ko juatsi in xa kanie e xa ko chao ikjui xa. Ko me e kon en nchakon tjoké e ni judío.

¹⁰ Tjume e ni judío ndache na xi koxruen en:

—Jai nchakon tjoké eni ko xro an juachaxin jii tsama kania a.

¹¹ Ko ndachro xa:

—Xi juinchexruanna ndachijina xa tatsían kania a ko tajia.

¹² Ko juanchangi e na xa:

—¿Ngisen kuetuan an tsatsian kania a ko ndachro tsajia?

¹³ Ko xi tsikoxruen en noe a xa ngisen juinchexruen en xa ixi nti a jii kueya na, ko ndo Jesús íkonoxin a ndo chriken en na nti a.

¹⁴ Tjume e ndo Jesús kuetan ndo xa ngaxin in ni ngo ijié ko ndache ndo xa:

—Tsje é jai ó koxruan an ko ínche a ti ndako a, ba ícha tangi tson an.

¹⁵ Tjume e sakjui xa, ko ndache xa ni judío ixi ndo Jesús juinchexruen en ndo xa.

¹⁶ Méxin ni judío kuaxi na rué e na ndo Jesús ko tjaun na tsóña na ndo ixi kuanche e ndo kain ji i nchakon tjoké e na.

¹⁷ Ko ndo Jesús ndache ndo na:

—Ndotána kain nchakon nche e ndo ixra, ko jan an kaxon jaña nta a ixra.

¹⁸ Méxin, jaña ni judío ícha tjaun na tsóña na ndo Jesús ixi titikaon a ndo nchakon tjoké e na ko ixi kaxon ndachro ndo ixi je e ndo ko ndo Dio naxraje o sen, ko ndachro ndo ndotée ndo, ndo Dio.

Juachaxin chóna Chjen en ndo Dio

¹⁹ Tjume e ndo Jesús ndache ndo na:

—Naa nge e nduaxin ntatjunta ixi Chjen en ndo Dio jua i sinche e ndo naa nge e je o je e ndo. Je o nche e ndo nge e tikon ndo nche e Ndotée ndo. Kain nge e nche e ndotée ndo kao chjen en ndo nche e xjan jaña.

²⁰ Ko Ndotána tjue e ndo Chjen en ndo, ko tjako e ndo chjen en ndo kain nge e nche e ndo, ko xratsjako ndo nge e ícha ijié ko ja anta xroxronkanta ixi tsikonnta me e.

²¹ Xranchi Ndotána nchexechón ndo ni tsiken en ko tajon ndo juachaxin tsechón na íjngo. Jaña kaxon Chjen en ndo chao tsajon xjan juachaxin tsechón kain ni tjaun je e xjan.

²² Ko Ndotána xruan an ngisen tjankata a ndo ijié ixi kuajon ndo juachaxin ngajin chjen en ndo,

²³ ixi kain na tsajon na juasaya ngajin chjen en ndo xranchi juasaya tayé e Ndotána. Ngisen tajon a juasaya ngajin chjen en ndo kaxon tajon a sen juasaya ngajin Ndotée ndo, ndo xruan an ndo Cristo.

²⁴ 'Nduaxin nge e ntatjunta: Ngisen tin en nge e ntatjunta ko titikaon Ndo xruan anna, chóna sen juachaxin tsechón sen kain nchakon ko tangi a tson en sen, ixi ó kuatsinga ti tsen en sen ko jai tsechón sen kain nchakon.

²⁵ Nduaxin ntatjunta ixi ó tsji hora, ko jai hora me e, ni tsiken en tsin en na xronichja Chjen en ndo Dio. Ko sen tsitikaon ndo tsechón sen.

²⁶ Ixi Ndotána chao tsajon ndo juachaxin tsechón na ko kaxon tsikajon ndo juachaxin ngajin Chjen en ndo sinche e xjan jaña,

²⁷ ko kaxon tsikajon ndo juachaxin ngajin Chjen en ndo sinchéña xjan ijié ixi je e xjan Chjen en ndo Dio, xjan jongí e xranchi chujni.

²⁸ Xrakon anta ixi ti nge e ntatjunta. Ixi tsiji hora ti kain ni tsiken en, tsin en na xronichja xjan.

²⁹ Ko tsachrjexin na ti no stexrabaa na. Ko ni ndako juinche e, xroxechón na ixi tsechón na kain nchakon. Ko ni ndako a juinche e xroxechón na ko tangi tsikaon na ti tsoñe e na ijié.

Juachaxin chóna ndo Jesús

³⁰ Jan an jua i sinta a naa nge e jan on. Jan an ntáña ijié xranchi tituanna. Ko ijié ntáña, ndako ntáña ijié ko nta i nge e tja on jan an. Na i. Nta a nge e tjaun Ndotána, ndo xruan anna.

³¹ Ko siá jan on nichjaxin ixi najan an, ti ndachrjan tjinte a.

³² Ko jii inaa ngisen nichjaxinna ko nge e ndachro sen me e ixi najan an, tjintee.

³³ *Ja anta xruan annta ngisen ikjui juanchangi e ndo Juan, ko nge e juatingéxin ndo ixi najan an, nduaxin me e.

³⁴ Ko jan an chuntia i nge e xrondachro xrojan ngisen ixi jan an. Ko je o ndachrjan ji i ixi ja anta xrochondanta juachaxin tsechonnta kain nchakon.

³⁵ Ndo Juan bake e ndo xranchi naa xro i jiche ko tingasáña, ko ja anta juaxruxin bake enta ixi xro i me e, maski tsjé a nchakon.

³⁶ Ko jan an chónḁa naa nge e ícha t̄jintee tjakoxin ixi najan an, ixi nge e tsindachro ndo Juan. Ixr̄a nta a jan an, ixr̄a naxre o tituanna Ndotána sinta a, ña tjakoxin ixi nduaxin Ndotána tsixruan anna ndo.

³⁷ *Kaxon Ndotána, ndo xruan anna, tjakoxin ndo ixi najan an. Ko ja anta nai a kuin ennta nichja ndo ko nai a bikonta ndo.

³⁸ Ko chijnie ndo xra je a jii गया asáanta ixi ja anta xratsitikaon anta ngisen Ndotána, ndo tsixruan anna.

³⁹ Ja anta jian nchekuanxinnta xroon chijnie ndo Dio ixi chon énta tsaye enta juachaxin tsechonnta kain nchakon. Ko xroon me e nichja ixi najan an.

⁴⁰ Ko ja anta t̄jaun anta tonchjiñe enta t̄jenkana ixi tsaye enta juachaxin me e.

⁴¹ Jan an tayé a juasaya tajon chujni.

⁴² Ko jan an chuxinnta ko nóna ixi t̄jaun anta ndo Dio.

⁴³ Jan an jui i ixi Ndotána xruan anna ndo ko ja anta titikaon antana. Ko siá t̄ji naa ngisen je o nichja nge e chónḁa गया aséen na, ni me e titikaonnta.

⁴⁴ ¿Xranchi tsitikaonnta, siá tsaye enta juasaya tajon chujni, ko t̄jé anta ti nge e jian t̄j x̄in ngajin ndo Dio, ndo naáko Dio?

⁴⁵ Xraxaon anta ixi jan an tsjankata anta ijie ngajinxin Ndotána. Na i. Ndo tsjankata anta ijie me e ndo Moisés ixi chuntianta ngajin ndo.

⁴⁶ Ixi siá xrokuitikaonnta nge e tsindachro ndo Moisés, kaxon xrokuitikaonnta ixi ndo Moisés ikjin ndo ixi najan an.

⁴⁷ Ko siá tsitikaon anta nge e tsikjin ndo, ¿xranchi tsitikaonnta nge e ntatjunta?

6

Ndo Jesús kuajon ndo nge e juine na ó mil chujni

(Mt. 14:13-21; Mr. 6:30-44; Lc. 9:10-17)

¹ Tjume e sakjui ndo Jesús kuantu ndo ndachaon Galilea, inda me e ndatin in Tiberias kaxon.

² Ko kueya chujni rué e na ixi bikon na ixr̄a ijie juinche e ndo ti juinche xruen en ndo ni ni e.

³ Ko ndo Jesús kuajin in ndo naa ijna ko nti a bake e ndo nunte kao sen teyuu chrikao ndo.

⁴ Ko ó jitonchjiñe e nchakon tsij̄ kia pascua, kiéé ni judío.

⁵ Ko bikon ndo Jesús ixi kueya chujni kuajin in na jna, jirué e na ndo ko juanchangi e ndo ndo Felipe:

—¿No tse nana nge e sine kain chujni?

⁶ Jaña ndachro ndo ixi tsin en ndo nge e xichro ndo Felipe ixi ndo Jesús ó no e ndo nge e sinche e ndo.

⁷ Ko juate e ndo Felipe, ndachro ndo:

—Maski doscientos tomi xrochondana xrokuenaxinna nutja xraxrokuitja i xrojuine ngujngu chujni tu o nutja.

⁸ Ko ndo Andrés, naa sen chrikao ndo Jesús, ndosaué ndo Simón Pedro, ndachro ndo:

⁹ —Nti i jii naa chjan chónḁa xjan na ó nutja tsikoña noa cebada ko chónḁa xjan yuu kucehe. ¿Á tsitja ji i, ixi kueya chujni jii?

¹⁰ Ko ndachro ndo Jesús:

—Tetuen enta na tsake e na nunte.

Ti jii kayua nti a, bake e na nunte, xranchi na ó mil chujni xi.

¹¹ Ko ndo Jesús kua ndo nutja ko kuajon ndo juasie ndo ngajin ndo Dio, ko tjume e kuajon ndo nio ngajin sen teyuu chrikao ndo. Ko je e sen konchjeya sen nio, kuayé e kain ni ste nti a. Jaña kaxon konchjeya sen kucehe. Ko kain na juine na kain ti t̄jaun na.

¹² Juexin juine na, tjume e kuetuen en ndo Jesús sen teyuu chrikao ndo, ndachro ndo:

—Tja onta nge e tsixe e ixi xro an nge e tsitjáña.

¹³ Ko jaña juinche e sen ko juinchekaon sen teyuu ntaxra nutja tutu o ti na ó nutja tsikoña noa cebada tsijnchexe e na hora juexin juine na.

¹⁴ Ko ni juine nutja bikon na ti ixr̄a ijie juinche e ndo Jesús ko ndachro na:

—Ndo me e nduaxin ndo tsixrua an ndo Dio tsij̄ nunte xasintajni.

¹⁵ Ko ndo Jesús kono e ndo ixi t̄jaun na xraxrobikao na ndo xrojuinchéña na ndo rey ixi xrokuetaan an ndo. Ko je e ndo t̄jaun a ndo ji i ko je o ndo sakjui ndo ntajie f̄jngo, ko nti a bake e ndo.

Ndo Jesús itji ndo ngataon inda

(Mt. 14:22-27; Mr. 6:45-52)

¹⁶ Tjume e ó kóndo sen teyuu chrikao ndo Jesús xingajinxin sen ijná sakjui sen ngande e inda,

¹⁷ ko kuajin in sen naa ntábarco ko kuaxi sen kuation sen inda satsji sen tjanya Capernaum. Ó naxixe e ko xrakjan i ndo Jesús.

¹⁸ Tjume e kuaxi *kuji* chrinto soji ko kuaxi jamangitaon inda.

¹⁹ Ko chao sakjui sen xranchi na ó o ikjaon kilómetro ko tuinxin bikon sen ndo Jesús, jitonchjiñe e ndo tjenja ntábarco, xranchi yaa ndo cha o jitji ndo ngataon inda. Jaña bikon sen ko tsango xronka sen.

²⁰ Ko ndo Jesús ndachro ndo:

—Jan an jui i. Xronka inta.

²¹ Ko tsango juaxruxin kuantee sen ixi kuajin in ndo ntábarco. Ko tuinxin *kuji* sen ti no xrokuiji sen.

Chujni tjée nã ndo Jesús

²² Ko nchakon ndúyaxin, ni kuitu e ti ndachaon* kono e nã ixi naakuaxon ntábarco bake e nti a, ko no e nã ixi ndo Jesús tsikikao a sen ndo ixi bikon nã ixi je o sen teyuu chrikao ndo, satsikji sen.

²³ Ko tjume e *kuji* kaxin ntábarco *tj xjn* tjanya Tiberias tjenja ti no juinexin nã nutja, ti kuajonxin ndo Jesús juasie ndo ngajin ndo Dio.

²⁴ Ko nchakon bikon nã ixi ko a ndo Jesús ko kaxon ko a sen teyuu chrikao ndo, tjume e je e nã kuajin in nã ntábarco ko sakjui nã tjanya Capernaum ko bijée nã ndo Jesús.

Ncháina Jesús, je e ndo xranchi nutja tajon juachaxin tsechón chujni

²⁵ Tjume e *kuji* nã tuenxin inda ko bikon nã ndo Jesús ko juanchangi e nã ndo:

—Maestro, ¿ngisa jui ia nti i?

²⁶ Ko juate e ndo Jesús, ndachro ndo:

—Ó nóna ixi ja anta tjéenta nã ixi juinenta nutja ko kaonnta, ko je a ixi kuienxinnta ti ixrã ijíe juinta a.

²⁷ Ta inta juachjaon ixi nge e sintenta taka tsjexin. Nche enta ixrã ixi nge e ti sintenta tsjexin a ixi tsaye enta juachaxin tsechonnta kain nchakon. Me e tajon Chjen en ndo Dio, xjan jongí e xranchi chujni, ixi Ndotée ndo tjako ndo ixi Chjen en ndo chóna xjan juachaxin.

²⁸ Ko juanchangi e nã ndo:

—¿Xranchi sinta ana ixi tsitika onna xranchi tjaun ndo Dio?

²⁹ Ko juate e ndo Jesús, ndachro ndo:

—Ndo Dio tjaun ndo ixi tsitikaonnta ngisen tsixrua an ndo.

³⁰ Ko juanchangi e nã ndo:

—¿Nge e tjakoxian ixi tsikonna ko chao tsitika onna? ¿Nge e ixrã nche e?

³¹ Sen tsikachrjenixinna sa ó juine sen maná ikjan nutja nchakon bake e sen ntajie, méxin, jaña chijnie ndo Dio tsikjin nã ndachro: “Kuajon ndo nge e juine nã, me e nutja *kuixin* ngajní.”

³² Ko juate e ndo Jesús, ndachro ndo:

—Naa nge e nduaxin ntatjunta, je a ndo Moisés kuajon maná ikjan nutja xingajinxin ngajní. Ndotána tajon ndo nutja nduaxin, nutja xingajinxin ngajní.

³³ Nutja tajon ndo Dio, me e ndo xingajinxin ngajní ko je e ndo chjée ndo chujni nunte xasintajni juachaxin tsechón nã kain nchakon.

³⁴ Ko ndachro nã:

—Ncháina, kain nchakon chjánana nutja me e.

³⁵ Ko ndachro ndo Jesús:

—Jan an me e nutja tajon juachaxin tsechón chujni. Sen tonchjiñe e ngajin jan an ítsen a sen jinta, ko sen tsitikaonna, ítsen a sen inda.

³⁶ Ko xranchi ntatjunta sa ó, maski ó bikontana, xratitikaon anta.

³⁷ Ko kain chujni chjána Ndotána tsonchjiñe e nã ngajin. Ko kain ni tonchjiñe e ngajin, jan an tsengí a nã satsji nã.

³⁸ Jan an juixin ngajní ko je a nge e tja on sinta a. Jui i ixi sinta a ixrã tjaun ndo tsixruan anna.

³⁹ Ko Ndotána tsixruan anna, me e tjaun ndo ixi xro an chujni chjána ndo tsitjáña, ixi tjaun ndo jan an sintaxechón kain nã nchakon tsjexixin.

⁴⁰ Ngisen tsixruan anna tjaun ixi kain ni tsikon jan an, Chjen en ndo Dio, ko tsitikaonna nã, ni me e tsayé e nã juachaxin tsechón nã kain nchakon. Tjume e jan an sintaxechón nã nchakon tsjexixin.

* 6:22 *ndachaon* mar

⁴¹ Ko ni judío juangíxin na ndako a nichje e na ndo Jesús ixi tsindachro ndo je e ndo nutja xingajinxin ngajni.

⁴² Ko ndachro na:

—¿Á je a xi i xi Jesús, ndotée xa ndatin in José? Chuxinna ndotée ko janée xa. ¿Méxin, sonda ndachro xa ixi ngajni tsixingajinxin xa?

⁴³ Ko juate e ndo Jesús, ndachro ndo:

—Ínichjangi anta.

⁴⁴ Xro an chujni xrokochjiñe e ti ritjén jan an siá xrokuajon a juachaxin Ndotána. Ko sen tonchjiñe e ti ritjén, jan an sintaxechón sen nchakon tsjexixin.

⁴⁵ Sen kuachronga chijnie ndo Dio ó sa ó tsikjin sen xroon ndachro: “Ndo Dio sinchekuen en ndo kain chujni.” Méxin kain sen tsikin en ti nichja Ndotána ko juinchekuen en ndo sen jitonchjiñe e sen ti ritjén jan an.

⁴⁶ Xro an chujni tsikikon Ndotána. Je o ngisen kuixin ti jii ndo Dio tsikikon ndo.

⁴⁷ Nduaxin nge e ndachrjan ixi sen titikaonna ó chóna sen juachaxin tsechón sen kain nchakon.

⁴⁸ Jan an nutja tajon juachaxin tsechón chujni.

⁴⁹ Chujni kuachrjenixinnata sa ó juine na maná ikjan nutja, nchakon bake e na ntajie, ko maski juine na tjume e kuen en na ko kuitjáña na.

⁵⁰ Ko ti nichja jan an me e nutja xingajinxin ngajni, ko sen sine nutja me e tsen a sen.

⁵¹ Jan an nutja jichón xingajinxin ngajni. Ko sen sine nutja, tsechón sen kain nchakon. Nutja tsajon jan an ntau na me e, ko jan an tsajon nutja me e ixi chujni nunte xasintajni xrochóna sen juachaxin tsechón sen kain nchakon.

⁵² Ko ni judío koñaon na, tjao kichuu na, ndachro na:

—¿Xranchi xrokuajon xi i ntau e xa xrojuinena?

⁵³ Ko juate e ndo Jesús, ndachro ndo:

—Jan an ndachrjan ixi siá sine anta ntau e Chjen en ndo Dio, xjan jongí e xranchi chujni, ko siá tsi anta jnié xjan, xrochonda inta juachaxin tsechonnta kain nchakon.

⁵⁴ Ngisen sine ntau na ko tsi i jnina, sen me e xrochóna sen juachaxin tsechón sen kain nchakon ko jan an sintaxechón sen nchakon tsjexixin.

⁵⁵ Ixi ntau na nge e nduaxin sine chujni, ko jnina me e nduaxin tsi i chujni.

⁵⁶ Sen ine ntau na ko ti i jnina stenii sen jan an ko jan an rinii je e sen.

⁵⁷ Ndotána tsixruan anna ndo jan an, ndo me e jichón ndo, ko jan an richónxin ixi je e ndo. Ko sen sine ntau na, sen me e tsechónxin sen ixi jan an.

⁵⁸ Méxin, rinichja ixi nutja xingajinxin ngajni, nutja me e je a xranchi maná juine ni tsikachrjenixinnata sa ó ixi je e na, maski juine na maná, kuen en na. Ko siá sintenta nutja xingajinxin ngajni, ja anta tsaye enta juachaxin tsechonnta kain nchakon.

⁵⁹ Kain ji i juinchekuen en ndo ni tsixra o ni ngo Israel tjajna Capernaum.

Nge e chronga ndo Jesús tajon juachaxin tsechón chujni kain nchakon

⁶⁰ Ko nchakon kuin en na nge e juinchekuen en ndo Jesús na, tjume e itsjé sen chrikao ndo ndachro sen:

—Tsango tangi nge e chronga ndo. ¿Ngisen xrokuitikaon ji i?

⁶¹ Ko kono e ndo Jesús ixi jaña ndachro sen kuienxin a sen nge e tsindachro ndo ko juanchangi e ndo sen:

—¿Á kaxon ja anta tjaun anta tsin ennta ji i?

⁶² ¿Xranchi xrokon en siá tsikonnta ixi Chjen en ndo Dio, xjan jongí e xranchi chujni, satsji xjan íjngo ti no tsiki xin xjan?

⁶³ Espiritue ndo Dio tajon juachaxin tsechón chujni kain nchakon, ko ntau e chujni xro an tjintee. Ko nge e ntatjunta me e kondee Espiritue ndo Dio ko chóna juachaxin tsechónxin chujni.

⁶⁴ Ko kaxinnata xratitikaon anta.

Jaña ichro ndo ixi xrangixixin ó no e ndo ngisen tsitikaon a ndo ko no e ndo ngisen sinchekji ndo.

⁶⁵ Méxin, ndachro ndo:

—Jaña ntatjunta ixi xro an chujni tsonchjiñe e ti ritjén jan an siá Ndotána tsajon a ndo juachaxin.

⁶⁶ Ko juexin ji i, kueya sen bakajikao ndo Jesús tuinxin kuintu e sen ndo, rue a sen ndo.

⁶⁷ Tjume e juanchangi e ndo sen teyuu chrikao ndo, ndachro ndo:

—¿Á kaxon ja anta tjaunnta satsjinta?

⁶⁸ *Ko juate e ndo Simón Pedro:

—Ncháina, ¿ti no itsjina? Chijni nichja ja anta tajon juachaxin tsechónna kain nchakon†
 69 ko titika onna ko nónana ixi nduaxin ja anta ndo Cristo, Chjen en ndo Dio jichón.

70 Ko juate e ndo Jesús, ndachro ndo:

—Jan an kuincha a kainnta teyuunta, ko naánta nti i xrokjannta naa chujni ña i.

71 Ti ndachro ndo Jesús xrondachro ixi xi Judas Iscariote, ndotée xa ndatin in Simón. Xi Judas naa teyuu sen kuinche e ndo, ko xi me e sinchekji xa ndo Jesús.

7

Sen kichuu ndo Jesús kuitikaon a sen ndo

1 Tjume e ndo Jesús kuaji ndo nunte Galilea ixi jua i tsaji ndo nunte Judea ixi ni judío tjaun na naatsónaxón na ndo.

2 Ko ó kuji nchakon kia, kiée ni judío nchéña na kueya nchia nchínchín,

3 ko sen kichuu ndo Jesús ndache sen ndo:

—Titua ia nti i. Satjia nunte Judea ixi kaxon sen rua a nti a tsikon sen ixra ijié nche e.

4 Ixi siá naa chujni tjaun ixi chujni xrochuxin na sen, sen me e je a imao sinche e sen ixra. Méxin, siá nduaxin nche e ixra ijié, je a imao xrojuinche e me e. Tsikon kain chujni nunte xasintajni.

5 Jaña ndachro sen kichuu ndo Jesús ixi kaxon je e sen titikaon a sen ndo.

6 Ko juatinglexin ndo Jesús:

—Xratitjá i hora sinta a ixra ijié. Ko ja anta ngixe i hora chao sinche enta nge e.

7 Chujni nunte xasintajni jua i xroningakon annta na. Jan an tsango ningakonna na ixi jan an ntatjan na ixi je e na je a jian nge e nche e na.

8 Ja anta itjinta kia. Jan an tsji a ixi xratiji a orána.

9 Jaña ndachro ndo, ko kuitu e ndo nunte Galilea.

Ndo Jesús jii ndo kia

10 Ko juexin satsikji sen kichuu ndo Jesús, tjume e je e ndo kaxon ikjui ndo kia, ko konoxin a ndo ixi tjaun ndo xro an ngisen xrobikon ndo.

11 Ko ni judío tjée na ndo ti kia ko ndachro na:

—¿No jii xi me e?

12 Ko kueya ni ste nti a stetjao na kondee ndo Jesús. Kaxin na ndachro na: “Jian xi ña”; ko ikaxin na ndachro na: “Je a jian xa ixi ncheye e xa chujni.”

13 Ko xro an ngisen nichja kondee ndo ícha, ixi xrakon en na ni judío.

14 Tjume e ó ngusine kia kuixin in ndo Jesús ni ngo ijié ko juangíxin ndo juinчекuen en ndo na.

15 Ko ni judío xronka na, tsje e na ndo, ko ndachro na:

—¿Xranchi tsango no e xi ji i kain nge e ixi xro an ngisen juako e xa?

16 Ko juate e ndo Jesús, ndachro ndo:

—Nge e ntakuan an chujni je a nge e tja on, ti ntakuan an na me e kondee ngisen tsixruan anna jui i.

17 Siá xrojannta tjaunnta tsitikaonnta nge e tjaun ndo Dio, me e tsono anta á nduaxin ixi ndo Dio tjako o á je o nge e xraxa on.

18 Ko ngisen nichja nge e tjaun, je o nichja na ixi tjaun na ixi ikaxin na tsajon na juasaya ngajin je e na. Ko ngisen tjaun ixi ngisen tsixrua an na tsayé e juasaya, ni me e tjako nge e nduaxin ko ncheya i na.

19 ¿Á je a ndo Moisés tjáanta ndo ley chijnie ndo Dio? Ko ninaánta kuitikaonnta nge e tsikjin ndo. Méxin, ¿sonda tjaunnta tson intana?

20 Ko je e na juate e na:

—Ja a chonda naa espíritue Xixron anxrée. ¿Ngisen tjaun tsónaxion?

21 Ko ndachro ndo Jesús:

—Naáko nge e junta a nchakon tjoké e na ko xronkanta.

22 Ko ndo Moisés tsiketuan an ndo ixi chjan anta, xjan xi, tsaa xjan chji e, (ko je a ndo Moisés kuaxi ndo juinчекuen en ndo na ji i, sen tsikachrjenixinnta kuaxi sen juinche e sen). Jaña ja anta chje énta xjan chji e, maski nchakon tjoka anta.

23 *Ja anta tjaunnta tsitikaonnta nge e tsiketuan an ndo Moisés, méxin, chje énta ichjan chji e xjan nchakon tjoka anta, ko, ¿sonda toñaonta ixi jintaxruan an naa chujni nchakon me e?

24 Tjankata inta ijié ixi je o nge e tikonxinnta ikonnta. Sa ó xraxaonnta nge e jian tjaun ndo Dio.

Ndo Jesús nichja ndo kondee ti no kuixin ndo

²⁵ Tjume e kaxin ni tjanya Jerusalén kuaxi nã juintejaõ kichuu nã, ko juanchangi nã:

—¿Á je a xi ji i tjé nã tsóña nã xa?

²⁶ Ko jai jinichja xa ngajinxin ikon kain nã ko xro an ngisen ndachro nge e. ¿Á titikaõ ni tituan an ixi xi ji i nduaxin ndo Cristo xa?

²⁷ Ko jaina nojna no tsiki xin xa. Ko nchakon tsii ndo Cristo, xro an ngisen tsono e no tsj xin ndo.

²⁸ Ko ndo Jesús juinçekuen en ndo nã ti ni ngo ko kuin en ndo jaña juao nã, ko séen nichja ndo, ndachro ndo:

—Nduaxin chuxinntana, ko no anta no juixin. Ko je a jui i ixi jan an tja on. Jan an jui i ixi xruan anna ndo nduaxin nche e nge e, ko ja anta chuxin anta ndo.

²⁹ Jan an chuxin ndo ixi nti a juixin ti jii ndo, ko je e ndo xruan anna ndo.

³⁰ Tjume e tjaun nã xrotsé nã ndo, xroxraxon in nã ndo ndo achjiso, ko xro an ngisen itsé ndo ixi xrakuajõ a ndo Dio juachaxin sinche e nã me e.

³¹ Ko kueya nã kuitikaõ nã ndo ko ndachro nã:

—Hora tsii ndo Cristo, ¿á icha ijié nge e sinche e ndo, ixi xi ji i?

Xroxraxon in nã ndo Jesús ndo achjiso

³² Tjume e ni fariseo kuin en nã nge e ndachro nã ixi ndo Jesús, ko je e nã ko xitaana tetuan an kuetuen en nã kaxin ni policia nche e ixrã ni ngo xrotsé nã ndo Jesús xroxraxon in nã ndo ndo achjiso.

³³ Méxin, ndachro ndo Jesús:

—Tsake e ngajinnta kaxin nchakon ko tjume e xrokjanna ngajin ngisen tsixruan anna.

³⁴ Ja anta tsjéentana ko tsinchii antana ixi jua i itsjinta ti no tsake e jan an.

³⁵ Ko ni judío juangixin nã juanchangi e kichuu nã:

—¿No satsji xa ixi jua i tsitjana xa? ¿Á tsji xa ngajin ni judío stekjen en ngajin ni nichja ngigua griego ixi sinçekuen en xa nã nti a?

³⁶ ¿Nge e xrondachro ti ndachro xa ixi tsjéena xa ko tsitja ina xa ko jua i itsjina ti no tsake e xa?

Ndajitinga jichón

³⁷ Nchakon jitjexin kia, me e nchakon ijié, bingatjen ndo Jesús, ko séen nichja ndo:

—Siá xrojan ngisen kuen en inda tonchjiñe enta ngajin jan an ko tin innta inda.

³⁸ Xranchi ndachro xroon Chijnie ndo Dio, ngisen titikaonna, sen me e ngaya aséen sen tsinga naa ndajitinga jichón.

³⁹ Jaña ndachro ndo Jesús ixi sen titikaõ ndo tsayé e sen Espiritue ndo Dio. Ixi xrati a Espiritue ndo ko ndo Jesús xrasatji a ndo ngajni.

Je a xraje o xraxaõ chujni

⁴⁰ Ko kaxin nã, nchakon kuin en nã nge e ndachro ndo Jesús, ndachro nã:

—Á nduaxin xi ji i xi profeta xrokuji.

⁴¹ Ko ikaxin nã ndachro nã:

—Xi ji i ndo Cristo.

Ko ikaxin nã ndachro nã:

—¿Xranchi xrokuji xin nunte Galilea ndo Cristo?

⁴² Xroon tsikjin sen kuachronga chijnie ndo Dio sa ó ndachro ixi ndo Cristo tsachrxexin ndo ni kuachrxenixin ndo rey David ko tsj xin ndo tjanya Belén, tjanya bake e ndo David.

⁴³ Méxin, kain nã je a naxraje o xraxaõ nã ko chjeya nã kondeexin ndo Jesús.

⁴⁴ Kaxin nã tjaun nã saxrobikao nã ndo ixi xroxraxon in nã ndo ndo achjiso ko xro an ni juinche e nge e.

Ni tetuan an titikaõ a nã ndo Jesús

⁴⁵ Tjume e ni policia kondee ni ngo ikjan nã ti ste ni fariseo ko xitaana tituan an. Ko je e nã juanchangi e nã ni policia:

—¿Sonda biko inta xa?

⁴⁶ Ko juate e ni policia:

—Xro an ngisen kuanichja xranchi nichja xi me e.

⁴⁷ Ko ndache ni fariseo ni policia:

—¿Á kaxonnta kuintu enta juntaya anta xa?

⁴⁸ ¿Á xrojan nã tetuan an tjanajina o ni fariseo kuitikaõ xa?

⁴⁹ Ni titikaõ xa, ni me e chuxin a nã ley ko je e nã tsikaõ nã.

⁵⁰ *Xi Nicodemo, xi kuitsje e ndo Jesús naa tiie ó sa ó, xi me e naa ni fariseo, ko ndache xa nã:

⁵¹ —Ley tajon a juachaxin tsjankata ana naa chujni ijje ti xratien ani nge e nichja na ko noe ani nge e ijje juinche e na.

⁵² Ko juate e na:

—¿Á kaxon ja a juixian nunte Galilea? Nchekuanxian xroon chijnie ndo Dio ko tsono a ixi xro an ngisen kuachronga chijnie ndo Dio tsikj xjn nunte nti a.

⁵³ Ko ngujngu na chjeya na sakjui na ndo a na.

8

¹ Ko ndo Jesús sakjui ndo ijna Olivo.

Naa nchri ndako a juinche e

² Ndúyaxin kujj ndo Jesús ni ngo ko chujni tjajna kujj na ngajin ndo ko bake e ndo nunte ko kuaxi ndo juincheken en ndo na.

³ Tjume e ni tjako ley ko ni fariseo bika o na naa nchri tsikitjixin na nchra jijuakao nchra naa xi, ko xi me e je a xixi e nchra. Ko bake e na nchra ngusine ni ste nti a.

⁴ Ko ndache na ndo Jesús:

—Maestro, nchri ji i kuitjixin na nchra jijuakao nchra naa xi, ko xi me e je a xixi e nchra.

⁵ Ko xroon tsikjin ndo Moisés ndachro ixi kain nchri jaña sinche e tsóñaxin na nchra ixro, ko ja a, ¿nge e ndachrua?

⁶ Jaña juanchangi e na ndo ixi tjaun na ndako a xrojuatingíexin ndo ixi xrokuitja na nge e xrobankata a na ndo ijje. Ko je e ndo Jesús kuisée ndo ko kuaxi ndo ikjin ndo ngata a inche ixi dedo itja ndo.

⁷ Ko je e na ícha tjanchangi e na ndo. Me e xendua ndo ko ndache ndo na:

—Ni xro an ijje chóna, ni me e sa ó tsjanka na ixro ko tsóña na nchra.

⁸ Ko ijngo kuisée ndo ko kuaxi ikjin ndo ngata a inche.

⁹ Ko je e na kuin en na nge e ndachro ndo ko xraxaon na ixi je e na chóna na ijje kaxon. Méxin, kuaxi na sakjui na, naa ko naa na, xrangixixin ni ícha tachrí hasta ni ícha nchiín. Ko je e ndo Jesús ko nchri tsikika o na, yutu je o sen kuitu e sen.

¹⁰ Ko tjume e ndo Jesús xendua ndo ko juanchangi e ndo nchra:

—Ja a nchri, ¿no ste ni tangi a ko ni ndachro ixi chonda ijje ko xrokuen en? ¿Á ninaa na tjankata a na ijje?

¹¹ Ko je e nchra ndachro nchra:

—Na i, Ncháina, ninaa na ko a na.

Ko tjume e ndo Jesús ndachro ndo:

—Kaxon jan an tjankatái a ijje. Satjia ko ínche a ícha ti ndako a juinche e.

Ndo Jesús xro i tingasáñaxin nunte xasintajni

¹² *Tjume e ndo Jesús nichja ndo ijngo ngajin na ko ndachro ndo:

—Jan an xro i tingasáña nunte xasintajni. Sen xroruéna xrochóna sen xro i tajon juachaxin tsechón sen kain nchakon ko itsaji a sen ti naxixe e.

¹³ *Ko ni fariseo ndachro na:

—Ja ua nichjaxian ixi ja a, ko ti ndachrua tjinte a.

¹⁴ Ko juatingíexin ndo Jesús:

—Nge e nichjaxin jan on tjintee ixi nóna no juixin ko nóna no satsji. Ko ja anta noa inta no juixin ko no satsji.

¹⁵ Ja anta nchéñanta ijje xranchi chujni nunte xasintajni nchéña ijje. Ko jan an xro an ngisen tjankata a ijje.

¹⁶ Ko siá jan an sintaña ijje, ndako ntáña ijje ixi je a jan on ntáña ji i. Ndotána, ndo xruan anna jui i, kayuina ntáñana ijje.

¹⁷ Ko ley tsikjin ndo Moisés ndachro siá tsonoxin yuu ni xrochronga á nduaxin jaña tsikon en, jaña xrokonda tsitikaonni na.

¹⁸ Ko jan an nichjaxin ixi jan an ko me e ó naa ni chronga nge e, ko kaxon Ndotána, xruan anna jui i, je e ndo nichjaxin ndo ixi najan an. Me e ó yuu sen chronga.

¹⁹ Ko juanchangi e na ndo:

—¿No jii Ndotáa?

Ko juate e ndo Jesús:

—Ja anta chuxin antana ko kaxon chuxin anta Ndotána. Siá xrokuichuxinntana, kaxon xrokuichuxinnta Ndotána.

²⁰ Jaña ichro ndo Jesús nchakon juako ndo ngaxin in ni ngo ijié tjenka ti jii ntaq tjinga tomí tajon na. Ko xro an chujni itsé ndo ixi ndo Dio xratajon a ndo juachaxin xrotsé na ndo.

“Jua i itsjinta ti no satsji jan an”

²¹ Ndo Jesús íjngo ndache ndo nã:

—Jan an satsji. Ko ja anta tsjëéntana, ko nchakon tsen ennta xratsamanta ijie chondanta. Ko jua i itsjinta ti no satsji jan an.

²² Ko ni judío juao kichuu nã ko ndachro nã:

—¿Á tsóña xa aséen xa, méxin ndachro xa ixi jua i itsjina tinó satsji xa?

²³ Ko ndache ndo Jesús nã:

—Ja anta nunte nti inta. Ko jan an juixin ngajní. Ja anta nunte xasintajnta ko jan an je a nunte xasintajnta.

²⁴ Méxin, ndachrjan ixi nchakon tsen ennta xratsamanta ijie chondanta ixi siá tsitikaon anta ngisen ndachrjan, ngisen najan an, nchakon tsen ennta xraxrochondanta ijie.

²⁵ Ko tjume e juanchangi e nã ndo:

—¿Ngisen ja a?

Ko juate e ndo:

—Xrangíxixión kuaxi ndachrjan ngisen najan an.

²⁶ Itsjé nge e xrondachrjan ko kaxon sintaña ijie ngajinnta. Ko ngisen xruan anna jui i chronga ndo nge e nduaxin. Ko je o nge e kuin an ndachro ndo xruan anna, me e ntakuan an ni nunte xasintajni.

²⁷ Ko je e nã kuienxin a nã ti nichja ndo ixi Ndotée ndo jii ngajní.

²⁸ Ko ndachro ndo:

—Nchakon tsjankanitonta ntacru Chjen en ndo Dio, xjan jongíe xranchi chujni, tsono anta ixi jan an nduaxin ngisen ntatjunta ngisen najan an. Ko tsono anta ixi je a jan on tituan an ixrã nta a. Na i. Je o nge e juako na Ndotána me e tjako.

²⁹ Ixi ndo xruan anna jui i, ndo me e jii ndo ngajin jan an. Ndotána kuintuna ina ndo jan on ixi kain nchakon titika on nge e tjaun ndo.

³⁰ Nchakon jaña ndachro ndo Jesús kueya nã kuitikaon nã ndo.

Xranchi ste ni ikjan Chjen en ndo Dio

³¹ Tjume e ndo Jesús ndache ndo ni judío, ni kuitikaon ndo:

—Siá tsintue anta ti tjako jan an, ja anta nduaxin chujnta.

³² Ko xrochuxinnta ti nduaxin, ko me e xrotjáanta juachaxin ixi jian tsake enta ko xro an ngisen tsantsja anta juachaxin me e.

³³ *Ko juate e nã:

—Jan anna kuachrjenixinna ndo Abraham, méxin í jua i tsituannãna inaa ngisen. ¿Sonda ndachrua ja a jai, xro an ngisen tsingakonnãna?

³⁴ Ko ndachro ndo Jesús:

—Naa nge e nduaxin ntatjunta ixi ngisen nche e nge e ndako a, jua i tintu e nã ti ndako a, ko ijie chónã nã me e tantsje e nã juachaxin.

³⁵ Ixi naa ni nchexrã jua i titu e nã nchia kain nchakon. Ko naa chjen en ni ndo a, tikinxin en xjan titu e xjan nchia kain nchakon.

³⁶ Ko nchakon Chjen en ndo Dio xrotjáanta xjan juachaxin, xro an nge e tsingako annta ko nduaxin chao tsajinta.

³⁷ Ó nóna ixi ja anta tsikachrjenixinnta ndo Abraham. Ko tjaunnta tsóñantana ixi titikaon anta nge e ndachrjan.

³⁸ Jan an ndachrjan nge e ó juakona Ndotána. Ko ja anta titikaonnta nge e ntatjunta ndotáanta.

³⁹ Ko je e nã juate e nã:

—Ndotánãna ndo Abraham.

Ko ndachro ndo Jesús:

—Siá nduaxin xrokjuinta chjen en ndo Abraham xrojuinche enta nge e juinche e ndo.

⁴⁰ Ko jan an ntatjunta nge e nduaxin, nge e ndo Dio juako na ndo, ja anta tjaunnta tson intana. Ndo Abraham nai a juinche e ndo naa nge e jaña.

⁴¹ Ja anta nche enta xraje o nge e nche e ndotáanta.

Ko ndachro nã:

—Je a juinchéñamána nã. Na i. Chondana naakua Ndotánãna me e ndo Dio.

⁴² Ko ndache ndo Jesús nã:

—Siá nduaxin ndo Dio Ndotáanta me e xrotjauntana ixi jan an kaxon kuachrjexin ti jii ndo ko nti i ritjén. Je a jan on jui i. Na i. Ndo Dio xruan anna.

⁴³ ¿Sonda tienxin anta nge e ndachrjan? Titikaon anta ixi tjaun anta tsin ennta nge e tjako.

⁴⁴ Ja anta chjen en Xixron anxrée ko ja anta tsikachrjexinnta xa ko tjaunnta tsitikaonnta nge e tjaun xa. Xixron anxrée xrangixixión tóña xa chujni. Ko nai a nichja xa nge e nduaxin. Kain nchakon ncheya xa ixi jaña xraxaon xa. Je e xa tituan an xa kain juancheya.

⁴⁵ Ko jan an ndachrjan nge e nduaxin ko ja anta titikaon anta.

⁴⁶ ¿Á xrojantta no anta naa ijię junta a? Siá ndachrjan nge e nduaxin, ¿sonda titikaon antana?

⁴⁷ Ngisen titikaon ndo Dio tjaun sen tsin en sen chijnie ndo. Ko ja anta titikaon anta ndo, me e tjaun anta tsin ennta chijnie ndo.

Ndo Cristo sa ó bake e ndo ko tjume e ndo Abraham

⁴⁸ Ko ni judío ndache na ndo Jesús:

—Nduaxin ndako ndachrjana ixi ja a naa chujni samaritano ko chóna naa espíritue Xixron anxrée.

⁴⁹ Ko juate e ndo Jesús:

—Xro an espíritue Xixron anxrée chonda. Ixra nta a tajonxin juasaya ngajin Ndotána. Ko ja anta chonda inta juasaya ngajin jan an.

⁵⁰ Jan an tjaun a xrochjana chujni juasaya. Ko jii naa ngisen tjaun ixi chujni xrochjana juasaya, ko je e ndo nchéña ndo ijię ngajin kain chujni.

⁵¹ Naa nge e nduaxin ntatjunta; siá tsitikaonnta nge e tjako, nai a tsen ennta.

⁵² Ko juate e ni judío:

—Jai nóna ixi nduaxin chonda naa espíritue Xixron anxrée. Ndo Abraham ko kain sen kuachronga chijnie ndo Dio sa ó, kuen en sen. Ko ja a ndachrua ixi siá tsitikaonna nge e tjakoa, tsen ana.

⁵³ ¿Á ícha tetuan an ja a ixi ndotánana Abraham? Je e ndo kuen en ndo ko kaxon kuen en sen kuachronga chijnie ndo Dio ó sa ó. ¿Ngisen ja a ixi jaña ndachrua?

⁵⁴ Ko juate e ndo Jesús, ndachro ndo:

—Siá jan on tsajon juasaya ngajin jan an, tjinte a ji i. Ko Ndotána chjana ndo juasaya ko ja anta ndachronta ixi je e ndo, ndo Dio na anta.

⁵⁵ Ko ja anta chuxin anta ndo. Ko jan an chuxin ndo. Siá xrondachrjan chuxin a ndo me e xrojuincheya xranchi ja anta. Ko jan an chuxin ndo ko titika on nge e tituan an ndo.

⁵⁶ Ndo Abraham, ndo tsikachrjenixinnta tsango juaxruxin bake e ndo ixi xrobikon ndo nchakon xrojui i jan an. Ko bikon ndo nchakon me e ko juaxruxin bake e ndo.

⁵⁷ Ko ni judío ndache na ndo Jesús:

—Ja a xrachonda ia yukante nano, ¿ko sonda ndachrua ixi ó bikuan ndo Abraham?

⁵⁸ Ko juate e ndo Jesús:

—Naa nge e nduaxin ntatjunta ixi xrako a ndo Abraham, ó ritjén jan an.

⁵⁹ Ko tjume e kua na ixro xrobanke e na ndo Jesús, ko je e ndo kuemá ndo, ko kuachrjexin ndo ni ngo nti a. Tjume e kuatsinga ndo ngusine ti ste na ko sakjui ndo.

9

Ndo Jesús juinchexruen en ndo naa xi tikon a xa

¹ Jitatsinga ndo Jesús naa cha o ko bikon ndo naa xi nchakon tsijongiéxon xa tikon a xa.

² Ko sen chrikao ndo juanchangi e sen ndo:

—Maestro, ¿sonda tsijongiéxon xa tikon a xa? ¿Á kondeexin jíee ndotée o janée xa o á jíeó xa?

³ Ko juate e ndo Jesús, ndachro ndo:

—Ji i je a jíee xa ko je a jíee ndotée ko janée xa. Jaña tsikon en xa ixi ndo Dio tsjako juachaxien ndo.

⁴ Xratáanchakon xrokonda sinta a ixra tjaun ngisen tsixruan anna. Ko ó tsji tiie ko xro an ngisen chao sinche e ixra.

⁵ *Xraritjén jan an nti i nunte xasintajni, jan an me e xro i tingasáñaxin nunte.

⁶ Ko juexin ndachro ndo ji i, tjume e kuintjí ndo ndatée ndo nunte ko juinchéña ndo nchín nchita o ko bingamá ndo nchita o me e ikon xi tikon a.

⁷ Ko kuetuen en ndo xa:

—Itjia tuye tjía inda ndatin in Siloé ko tontia inda ikuan. (Ko Siloé xrondachro ngigüe e na, tsixrua an.)

Ko sakjui xi tikon a, konti xa inda ikon xa, ko hora ikjan xa ó chao tikon xa.

⁸ Ko ni ndo a tjenka ndo a xa ko ni bakikon ixi tikon a xa, ndachro na:

—¿Á je a xi ji i batjanchiaka a?

⁹ Ko ikaxin na ndachro na:

—Jaán, je e xa.

Ko ikaxin n̄a ndachro n̄a:

—Na i, je a xa. Je o tikonni xa xranchi xi me e.

Ko je e xa juatingíexin xa:

—Jaán, jan anna.

¹⁰ Méxin, juanchangi e n̄a xa:

—¿Xranchi jai chao tikuan?

¹¹ Ko juatingíexin xa:

—Naa ndo ndatin in Jesús juinchéña ndo nchita o bingamá ndo ikon ko tjume e kuetu-anna ndo itsji ti jii pila jitjiá inda nchekin in n̄a Siloé ko tsonti inda ikon. Ko ikjui konti inda, ko tuinxin bikon.

¹² Ko juanchangi e n̄a xa:

—¿No jii xi me e?

Ko juate e xa:

—Nóna i.

Ni fariseo tjanchangí e n̄a xi batikon a

¹³ Ko je e n̄a sabikao n̄a xi batikon a ngajin ni fariseo.

¹⁴ Ko nchakon tjoké e n̄a tsijinchekonchjian ndo Jesús nchita o ko juinchestruen en ndo xi batikon a.

¹⁵ Méxin, ni fariseo juanchangi e n̄a xa íjngo xranchi koxruen en xa ko chao tikon xa jai.

Ko je e xa ndachro xa:

—Juinchéña ndo chita o bingamá ndo ikon, ko konti inda ikon, ko jai chao tikon.

¹⁶ Ko kaxin ni fariseo ndachro n̄a:

—Xi juinche e ji i, je a chujnie ndo Dio xa ixi chónnda i xa juasaya nchakon tjoké eni.

Ko ikaxin n̄a ndachro n̄a:

—¿Xranchi nche e xa ixr̄a ijíé síá chónnda xa ijíe?

Ko jaña je a xraje o xraxaon n̄a.

¹⁷ Tjume e juanchangi e n̄a xi batikon a íjngo:

—¿Ja a nge e ndachrua ixi xi juintaxruan an?

Ko je e xa ndachro xa:

—Jan an ndachrjan ixi je e ndo naa ngisen nichja chijnie ndo Dio.

¹⁸ Ko ni judío kuitikaon a n̄a ixi nduaxin batikon a xa ko jai chao tikon xa. Méxin, kuiye e n̄a ndotée ko janée xi tsikoxruen en,

¹⁹ ko juanchangi e n̄a sen:

—¿Á ji i chjan anta, ja anta ndachronta ixi ti jongíexón xa tikon a xa? ¿Ko xranchi jai chao tikon xa?

²⁰ Ko juatingíexin ndotée ko janée xa:

—Nónana ixi xi ji i chjan n̄ana ko nónana ixi nchakon jongí e xa tikon a xa.

²¹ Ko nóna i n̄a xranchi tikon xa jai ko nóna i n̄a ngisen juinchestruen en xa. Tjanchangi enta xa, ó jíé xa ko je e xa xrochronga xa xranchi koxruen en xa.

²² Jaña juatingíexin ndotée ko janée xa ixi xrakon en n̄a ni judío, ixi je e n̄a tsindachro n̄a ixi tsantsjexin n̄a ni ngo chujni titikaon ndo Jesús ndo Cristo.

²³ Méxin, ndachro ndotée ko janée xa: “Tjanchangí enta xa ixi ó ijíé xa.”

²⁴ Ko ni judío íjngo kuiye e n̄a xi batikon a ko ndache n̄a xa:

—Ndako chronga ngajinxin* ikon ndo Dio ixi ó nónana ixi xi me e ndako a nche e xa.

²⁵ Ko xi batikon a juatingíexin xa:

—Nóna i á chónnda ndo ijíe o na i. Naakua nge e nóna ixi sa ó batikon a ko jai ó tikon.

²⁶ Ko juanchangi e n̄a xa íjngo:

—¿Xranchi juinche e xa ixi juinchestruan an xa?

²⁷ Ko juatingíexin xa:

—Juexin ntatjunta ko titikaon anta. ¿Sonda tjaunnta íjngo xrondachrjan? ¿Á kaxonnta tjaunnta xrurué enta ndo?

²⁸ Ko koyaku e n̄a xa ko ndachro n̄a:

—Ja a rue é xi me e. Ko jan anna titika onna nge e kuetuan an ndo Moisés.

²⁹ Jan anna nónana ixi ndo Dio nichje e ndo ndo Moisés. A xi me e, nóna ina no tsikí x̄in xa.

³⁰ Ko juate e xa ko ndachro xa:

—Tsango jée ji i. Ndo me e juinchestruanna ndo ko chao tikon ko ja anta noa inta no tsikí x̄in ndo.

* 9:24 ngajinxin delante de

³¹ Nónana ixi ndo Dio tien a ndo nge e tjanchia chujni chóna ijię. Je o tin en ndo nge e tjanchia sen titikaon ndo, ko sen titikaon nge e tjaun ndo.

³² Ko nai a kuin anna ixi naa ngisen nchexruen en naa chujni xratsijongíexión tikon a.

³³ Ko ndo me e, siá xrokuxin a ndo ti jii ndo Dio, xro an nge e jian xrojuinche e ndo.

³⁴ Ko juate e ni fariseo ko ndachro na:

—Ja a kueya ijię chonda nchakon jongí a. Ko jai, zá tjaun ixi ja a tsjako nana?
Ko bengixin na xa ni ngo.

Tjaun a na tsienxin na ixi aséen na

³⁵ Ndo Jesús kono e ndo ixi jaña juincheckao ni judío xi batikon a ti bantsjexinna xa ni ngo. Ko kuetan ndo Jesús xi me e ko juanchangi e ndo xa:

—¿Á chuntia Chjen en ndo Dio, xjan jongí e xranchi chujni?

³⁶ Ko ndachro xa:

—Ncháina, ndachijiana ngisen me e ixi xrochuntia ndo.

³⁷ Ko juate e ndo Jesús:

—Ó bikuan ndo. Me e ndo ritjáoa.

³⁸ Ko xi me e bake exin ntatuchi in xa tutée ndo Jesús, ko ndachro xa:

—Jai chuntia, Ncháina.

³⁹ Ko ndachro ndo Jesús:

—Jan an jui i nunte xasintajni ixi sinta a ijię ngajin chujni, ixi ni tikon a, tsikon na, ko ni tikon, tsikon a na.

⁴⁰ Ko kaxin ni fariseo ste nti a kuin en na jaña ndachro ndo Jesús ko juanchangi e na ndo:

—¿Á kaxon jan anna tikon ana?

⁴¹ Ko juatingéxin ndo Jesús:

—Ja anta siá nduaxin xrobikon anta, xrochonda inta ijię. Ko na ndachrona tikonnta, me e chondanta ijię.

10

Ndo Jesús teki ndo kondee noó tijexin kutuchjon

¹ Tjume e ndachro ndo Jesús:

—Nduaxin ntatjunta: ni tsixin a ntachja tijexin kutuchjon, ko tixixin na nango; ni me e nche e na xranchi naa xiche e ko naa ni ndako a nche e.

² Ko ngisen tixixin ntachja, sen me e nduaxin sen tsje e kutuchjon.

³ Ko sen tendáa ntachja tantje e sen ntachja ixi tixin in sen nduaxin tsje e ba, ko kutuchjon chúxin ba tée sen. Ko tiye e sen ngujungu kutuchjon ixi xranchi tin in ba ko tantsjexin sen ba ndo a ba.

⁴ Ko juexin tachrje kain ba, titaon en sen ba cha o ko rué e ba ixi chúxin ba tée sen.

⁵ Ko rue a ba inaa ngisen chúxin a ba; cháña satinga ba ixi chúxin a ba tée je e na.

⁶ Jaña juako ndo Jesús chijni ji i, ko je e na kuienxin a na nge e ndachro ndo.

Ndo Jesús ndo jian tsje e kutuchjon

⁷ Tjume e ndachro ndo Jesús íjngo:

—Nduaxin ndachrjan ixi jan an ntachja me e tixixin kutuchjon.

⁸ Kain ni kujj ti xrati a jan an, ni me e xiche e ko ni tje. Ko kutuchjon kuitikaon a ba na.

⁹ Jan an ntachja me e: siá tixinxinnta jan an, tsitjáña inta ko xrokjannta xranchi kutuchjonna tsachrjexin ba ti jije e ba ko tixin in ba ko titja ba nge e ine ba.

¹⁰ Ko xiche e je o tji xa ixi tjaun xa tsee xa, ko tsóna xa, ko nchetjáñajin xa kain nge e. Ko jan an jui i ixi tsarichonnta kain nchakon ko xro an nge e tsitjáña anta.

¹¹ Jan an naa ngisen jian tsje e kutuchjon, ko sen jian me e tsenxin sen ixi kutuchjoen.

¹² Ko ngisen je o nche e ixra je o tjaun na tsjacha na; tikon na jiti naa kundanaxra tintu e na kutuchjon ko satsji na ixi je e na je a ngisen nduaxin tsje e kutuchjon ko je a kutuchjoen na. Ko kundanaxra xrotsé ba kutuchjon ko ikaxin kutuchjon satsinga ba, xrochjeke e ba.

¹³ Ko ni me e satsinga na ixi je o tjaun na tsjenje e na na na ko ta i na juachjaon ixi kutuchjon tsje e na.

¹⁴⁻¹⁵ *Ko jan an naa sen jian tsje e kutuchjon. Ko xranchi Ndotána chúxin na ndo, kaxon jan an chuxin ndo. Jaña chuxin jan an kutuchjonna ko je e ba chúxinna ba. Ko jan an tsenxin ixi kutuchjonna.

¹⁶ Kaxon jan an chonda ikaxin kutuchjon xra je a nti i ste ba ko xrokonda tsikian ba. Ko siá je e ba tsin en ba ti nichja jan an, tsoña naakua no tsintee ba ko naakua ngisen xrotsje e ba.

¹⁷ Ndotána tjaunna ndo ixi maski tsen én, xroxechónna íjngo.

¹⁸ Xro an ngisen tsantsjena ti ríchon, jan on tajon aséenna tsen en ixi jaña tja on. Chonda juachaxin tsajon aséenna ko chonda juachaxin xroxechónna íjngo. Ji i kuetuanna Ndotána.

¹⁹ Hora kuin en ni judío ti ndachro ndo Jesús, kuaxi na chjeye e na íjngo.

²⁰ Kueya na ndachro na:

—¿Sonda tin enna inge e ndachro xa? Je e xa chónda xa espíritue Xixron anxrée ko xraxaon a xa jian.

²¹ Ko ikaxin na ndachro na:

—Ninaa chujni chónda espíritu ña i nichja jaña. ¿Á chao naa espíritue Xixron anxrée xrokuajon juachaxin ixi naa ngisen tikon a, chao tsikon?

Ni judío kuitikaon a na ndo Jesús

²² Ko ó nchakuen ikin, tajna Jerusalén stenche e na kia xraxaonxin na nchakon juexin tsikoña ni ngo.

²³ Ko ndo Jesús jitji ndo ti ndasin ndatin in Salomón, naa ndasin ni ngo.

²⁴ Ko ni judío kondentájin na ndo Jesús ko juanchangi e na ndo:

—Stechon anna tsonónana ngisen ja a. Jai chronga nduaxin á ja a ndo Cristo.

²⁵ Ko juatingíexin ndo Jesús:

—Ó ntatjunta ko titikaon anta. Kain ixra nta a, juachaxien Ndotána nta axin ixra; ko ji i tjakoxin ngisen jan an.

²⁶ Ko titikaon anta ixi je a kutuchjonna ja anta xranchi ntatjunta sa ó.

²⁷ Kutuchjonna chúxin ba taana ko kaxon jan an chuxin ba ko je e ba rua na ba.

²⁸ Jan an tjá a ba juachaxin tsechón ba kain nchakon ko nai a tsitjáña ba ko xro an ngisen tsantsjexin ba ngaya tjána.

²⁹ Ndotána chjana ndo ba, ndo ícha tetuan an ngajin kainna, ko xro an ngisen tsantsjexin ba itja ndo.

³⁰ Jan an ko Ndotána naakua ngisenna.

³¹ Ko ni judío íjngo itsé na íxro xrojuange e na ndo.

³² Ko ndachro ndo Jesús:

—Kueya nge e jian bikonta juinta a ixi juachaxien Ndotána. ¿Sonda tjaunnta tsóñaxinntana ixro ixi juinta a kain me e?

³³ Ko juate e ni judío:

—Je a ixi kain nge e jian juinche e tsaaxianna ixro. Na i. Ixi nge e ndako a ndachrue, ja a xraje o xranchi inaa chujni, ko ja a ndachrue xixian ndo Dio.

³⁴ Ko ndachro ndo Jesús:

—Ndachro xroon chijnie ndo Dio tsikjin sen sa ó: “Kaxon xranchi ndo Dio ja anta.”

³⁵ Ko nojna ixi nge e ndachro xroon chijnie ndo Dio, jua i tsitikaon ana. Ndachro ndo Dio ixi xranchi ndo Dio ngujngu chujni kuayé e chijnie ndo.

³⁶ Ko ndo Dio kuinche ena ko xruan anna ndo nunte xasintajni, ¿sonda ndachronta ixi jan an nichjangí a ndo Dio ixi ndachrjan jan an Chjen en ndo?

³⁷ Siá jan an xrojuinta i ixra nche e Ndotána, titikaon antana.

³⁸ Ko siá nduaxin nta a ixra nche e Ndotána, maski titikaon antana jan an, titikaonnta ixra nta a ixi ña tsitikaonxinnta ixi Ndotána ko jan an naakuana ko je e ndo jii ndo ngajin ko jan an ritjén ngajin ndo.

³⁹ Ko íjngo xrotsé na ndo Jesús xrobije e na ndo ko je e ndo sakjui ndo.

⁴⁰ *Ko ndo Jesús ikjan ndo íjngo tuenxin ndario Jordán ti no bake e ndo Juan batikitéxin ndo chujni sa ó.

⁴¹ Ko kueya na rué e na ndo ko ndachro na:

—Nduaxin ndo Juan maski juinche a ndo itsjé ixra ijié, nduaxin chronga ndo ixi xi ji i.

⁴² Ko kueya na jii nti a kuitikaon na ndo Jesús.

11

Kuen en ndo Lázaro

¹ *Bake e naa xi ni e ndatin in Lázaro, tajnéé xa Betania, tajnéé nchri María ko nchri Marta, nchri kichuu xa.

² *Nchri María, nchri kichuu xi Lázaro xi ni e, nchri me e nchri bikitée nda chaxro xraxe tutée ndo Jesús ko juinchemaxin nchra tutée ndo ixi xrajaa nchra.

³ Ko kayui nchra, kichuu nchra, xruan an nchra naa ngisen ndache ndo Jesús:

—Ncháina, xi tjentúa ni e xa.

⁴ Ko kuin en ndo Jesús ko ndachro ndo:

—Ichin chónða xa je a tsenxin xa ichin me e. Na i. Ji i tsjako juachaxin ijíe chónða Chjen en ndo Dio.

⁵ Ko maski ndo Jesús tsango tjue e ndo nchri Marta, ko kao nchri kichuu nchra ko xi Lázaro,

⁶ hora ndache na ndo ni e xi Lázaro, xrakuitu e ndo yuu nchakon ti no jii ndo.

⁷ Ko tjume e ndache ndo sen chrikao ndo:

—Ichjina íjngo nunte Judea.

⁸ Ko juatingíexin sen chrikao ndo:

—Maestro, xrachónða i itsjé nchakon, ni judío tjaun na xrokóñaxinna na ixro. ¿Á íjngo tjaunnta itsjinta nti a?

⁹ Ko ndachro ndo Jesús:

—¿Á je a nchakon chónða teyuu hora? Siá tanchakon ichrjini tontengixin ani ixro ixi jii xro i tingasáñaxin nunte xasintajni.

¹⁰ Ko siá ichrjini tiie tontengixinni ixi ko a xro i.

¹¹ Tjume e ndachro ndo Jesús:

—Xi Lázaro, xi tjentona, jijua xa ko itsji sintaxingama a xa.

¹² Ko ndachro sen chrikao ndo:

—Ncháina, siá jijua xa, chao xroxruen en xa.

¹³ Ko ti ndachro ndo Jesús xrondachro ixi tsiken en xi Lázaro. Ko sen teyuu chrikao ndo xraxaon sen ixi je o ndachro ndo jijua xa.

¹⁴ Tjume e ndako chronga ndo Jesús:

—Xi Lázaro tsiken en xa.

¹⁵ Ko juaxruxin ritjén ixi ko ana nti a ixi ja anta tsikonnta ko tsitikaonnta. Ko jai ichjina tsitse ena xa.

¹⁶ Tjume e ndo Tomás, ndo nchekin in sen xjan kuatsi, ndache ndo sen kaxin:

—Kao jaína ichjina ko tsen en na xranchi ndo Jesús.

Ndo Jesús sinchexechón ndo chujni

¹⁷ Nchakon kuiji ndo Jesús nti a, kono e ndo ixi xi Lázaro ó chónða noó nchakon tsixrabaa xa.

¹⁸ Tjajna Betania ko tjajna Jerusalén tjenka ste yui tjajna, xranchi yuu kilómetro kutu o kjínxin ste tjajna.

¹⁹ Ko itsjé ni judío ikjui na kuitsje e na nchri Marta ko nchri María, kuinichje e na nchra ixi jítóni e aséen nchra ixi kuen en xi kichuu nchra.

²⁰ Hora kuin en nchri Marta ixi ó jitií ndo Jesús, kuachrje nchra biketan nchra ndo. Ko nchri María kuitu e nchra nchia.

²¹ Ko nchri Marta ndache nchra ndo Jesús:

—Ncháina, siá ja a xrobake e nti i, xrokuen a xi saona.

²² Ko nóna ixi ndo Dio xrotjáa ndo kain nge e tsjanche e ndo.

²³ Ko ndache ndo Jesús nchra:

—Xisaua xroxechón xa íjngo.

²⁴ Nchri Marta ndachro nchra:

—Jan an nóna xroxechón xa íjngo nchakon xroxechón kain ni tsiken en, nchakon tsjexixin kain nge e.

²⁵ Ko ndachro ndo Jesús:

—Jan an ntaxechón chujni ko tajon juachaxin tsechón chujni. Ngisen titikaonna, maski tsen en sen, xroxechón sen íjngo.

²⁶ Ko kain sen xra jichón ko titikaon sen, nai a tsen en sen. ¿Á titikáoan ji i?

²⁷ Je e nchra ndachro nchra:

—Jaán, Ncháina, jan an titika on ixi ja a ndo Cristo, Chjen en ndo Dio, ndo xrokuii nunte xasintajni.

Tsjanga ndo Jesús ti tsixrabaa ndo Lázaro

²⁸ Ó juexin ndachro nchri Marta jaña, ko sakjui nchra kuiye e nchri kichuu nchra, nchri María, ko imao ndache kichuu nchra:

—Ndo Maestro jii ndo nti i ko tiya a ndo.

²⁹ Ko kuin en nchri María, tuinxin bingatjen nchra sakuitsje e nchra ndo Jesús.

³⁰ Ko ndo Jesús xratsikixin a ndo tjajna, xra jii ndo ti no kuetanxin ndo nchri Marta.

³¹ Ko ni judío, ni jinichje e nchri María stenchecháxin na nchra, bikon na ixi taka kuachrjexin nchra nchia, ko rué e na nchra ixi xraxaon na ixi satsji nchra ti no tsixrabaa xisaoe nchra, ko nti a xrotsjangaxin nchra xa.

³² Tjume e nchri María kuiji nchra ti jii ndo Jesús, bake exin ntatuchi in nchra tutée ndo, ko ndachro nchra:

—Ncháina, siá xrobake e nti i xrokuen a xisaona.

³³ Ko bikon ndo Jesús jitsjanga nchri María ko ni judío kuijikao nchra, me e tsango juincheni e ndo.

³⁴ Ko juanchangi ndo:

—¿No juabaanta xa?

Ko ndachro na:

—Ncháina, xrokuia tsje é.

³⁵ Ko tsjanga ndo Jesús.

³⁶ Ko ndachro ni judío:

—Tsje enta tsango tjue e ndo xi tsiken en.

³⁷ Ko ikaxin na ndachro na:

—Je e xa juinche e xa ixi chao bikon xi batikon a. ¿Á jua i xrokuajon xa juachaxin ixi xrokuen a xi Lázaro?

Xechón xi Lázaro

³⁸ Ko tsango koni e aséen ndo Jesús ko konchjiñe e ndo ti no tsixrabaa xi Lázaro. No tsixrabaa xa naa itjaq* me e ko nduja tsikijeexin na naa ixro.

³⁹ Ko kuetuan an ndo Jesús:

—Tintjiannta ixro.

Ko nchri Marta, nchrikichuu xi tsiken en, ndachro nchra:

—Ncháina, já ó bakaxra ndo ixi chónnda xa noó nchakon kuen en xa.

⁴⁰ Ko ndachro ndo Jesús:

—Á ntatju ia ixi siá tsitikaon tsikuan naa ixra ijíe sinche e ndo Dio ixi juachaxien ndo.

⁴¹ Tjume e kuintjian na ixro. Ko ndo Jesús tsje e ndo ngajni, ko ndachro ndo:

—Ndotána, tajon juasiana ngajinnta ixi ó kuin ennta nge e ndachrjan.

⁴² Jan an nóna ixi kain nchakon tin ennta nge e ntatjunta ko jai jaña ntatjunta ixi tsin en ni ste nti i ko tsitikaon na ixi ja anta xruan anntana jui i.

⁴³ Ko juexin ndachro ndo ji i, séen kuyako ndo:

—¡Lázaro, tachrjexian ña!

⁴⁴ Ko xi tsiken en tuinxin kuachrje xa, ko itja xa ko tutée xa jixritexin ixi manta ko ikon xa jisiamá inaa manta. Ko ndachro ndo Jesús:

—Tonxindange enta xa ko tintu enta satsji xa.

Xraxaon na xranchi tsóña na ndo Jesús

(Mt. 26:1-5; Mr. 14:1-2; Lc. 22:1-2)

⁴⁵ Ko kueya ni judío, ni kuijikao nchri María bikon na nge e juinche e ndo Jesús ko kuitikaon na ndo.

⁴⁶ Ko ikaxin na kuitsje e na ni fariseo, ko beki na nge e tsijinche e ndo Jesús.

⁴⁷ Tjume e xi fariseo ko xitaana tetuan an xra o na ngajin chujni ícha tetuan an, ko ndachro xa:

—¿Nge e sintu una ixi xi ji i jinche e xa itsjé nge e ijíe?

⁴⁸ Siá tsintu ena xa, tjume e kain na tsitikaon na xa, ko tsii ni tetuan an Roma ko tsonchjejin na ningoina ko sinchetjáña na tjanajna.

⁴⁹ Ko naa xi tin in Caifás, xitaana ícha tetuan an nano me e, ndache xa na:

—Ja anta xro an nge e no anta

⁵⁰ ko xraxaon anta ixi ícha jian naakua chujni tsen en ixi tjanajna ko je a kain ni tjanajna tsitjáña na.

⁵¹ Ko xi Caifás je a je e xi tsixraxaon xa ja in, Espíritue ndo Dio juincheno e xa ixi ndo Jesús tsenxin ndo tjanée ni judío ixi je e xa tetuen en xa xitaana nano me e.

⁵² Ko je a je o tjana me e xrokuexin ndo. Na i. Kaxon xrokuexin ndo ixi xroxra o kain chjen en ndo Dio, xjan tsichjeke e nchiji nunte xasintajni.

⁵³ Ko hora me e ni tetuen en ni judío juangixin na xraxaon na xranchi naatsóñaxón na ndo Jesús.

⁵⁴ Méxin, nchakon me e ndo Jesús í bakonoxin a ndo ngakjen en ni judío, ko kuachrjexin ndo nunte Judea, sakjui ndo tjenka iña, ti jii naa tjana ndatin in Efraín. Nti a kuituekao ndo sen teyuu chrikao ndo.

⁵⁵ Xratitjáña xrokui kia Pascua, kiée ni judío ko kueya na kuachrjexin na tjanée na sakjui na tjana Jerusalén ixi nti a sintakji na ixi tsontjúá na ti xrati a kia Pascua.

⁵⁶ Nti a stetjée na ndo Jesús ko kuiji na ngaxin in ni ngo ijíe ko ndache kichuu na:

* 11:38 itjaq cueva

—¿Ja anta nge e chronta? ¿Á tsij xa kia o na i?

⁵⁷ Ko xi fariseo ko xi tetuen en xitaana kuetuan an xa ixi siá xrojan ngisen no e no jii ndo Jesús xrochronga na ko jaña xrotsé xa ndo ko xroxraxon in xa ndo ndo achjiso.

12

Naa nchri bingamá nchra ndaxi e chaxro xrase tutée ndo Jesús

(Mt. 26:6-13; Mr. 14:3-9)

¹ Xratitjáña ikjaon nchakon xrokuji kia pascua, ndo Jesús ikjui ndo tjanya Betania ti jii xi Lázaro. Xi me e ndo Jesús juinchexechón ndo xa.

² Ko nti a juine sen naa kónkjín ko kuajon sen juasaya ngajin ndo Jesús. Nchri Marta juinchekonchjian nchra ti juine sen ko xi Lázaro ko ikaxin sen ste sen stenekao sen ndo Jesús.

³ *Tjume e nchri María bika o nchra xranchi tu o litro nda chaxro xrase tsikoña xrojan nardo tsango tjintee tsike na nchra ko bingamá nchra tutée ndo Jesús, ko ixi xrajée nchra juinchexemaxin nchra tutée ndo, ko nguixin ngaxin in nchia bakaxrase xrojan me e.

⁴ Ko xi Judas Iscariote, ndotée xa ndatin in Simón, je e xa naa sen teyuu chrikao ndo Jesús, ko xi me e sinchekji ndo ícha tjume e, ndachro xa:

⁵ —¿Sonda konchji a xrojan xrase? Xrokúchjixin ní ciento tomi denario ixi xrobingijnax-inni ni nóa.

⁶ Ko xi Judas je a ndachro xa jaña ixi tikonóe e xa ni nóa. Na i. Ndachro xa ji i ixi ché e xa, ko je e xa tsje e xa nge e tjinga tomi ko kain nchakon tje xa tomi tsixra o nti a.

⁷ Méxin, ndachro ndo Jesús:

—Tintu enta nchra. Tsikatsi in nchra xrojan xrase ji i ixi nchakon xroxrabaana.

⁸ Ni nóa kain nchakon tsariku unta na ko jan an kain a nchakon xrochondantana.

Ni judío tjao na xranchi tsóña na ndo Lázaro

⁹ Tjume e kueya ni judío kono e na ixi ndo Jesús jii ndo tjanya Betania, ko sakjui na nti a. Je a je o xrokuitsje e na ndo. Kaxon tjaun na xrokuitsje e na xi Lázaro, xi juinchexechón ndo Jesús.

¹⁰ Tjume e xitaana tetuan an juao kichuu xa ko xraxaon xa naatóñaxón xa xi Lázaro kaxon

¹¹ ixi kondeexin je e xa kueya ni judío stetingaxiton na ngajin xitaana ko jititikaon na ndo Jesús.

Ndo Jesús tixin in ndo tjanya Jerusalén

(Mt. 21:1-11; Mr. 11:1-11; Lc. 19:28-40)

¹² Kueya na satsikji na tjanya Jerusalén kia Pascua. Ko ndúyaxin kono e na ixi tsiji ndo Jesús tjanya nti a.

¹³ Ko konchrijin na chaan ntakajne ko kuachrje na ngatja cha o kuayé e na ndo Jesús, ko séen ndachro na:

—Juasaya ngajin ndo Dio. Tsango jian ndo kujxin ixi juachaxien Ndotáina jii ngajni. Tsango jian ndo Rey tetuen en tjanya Israel.

¹⁴ Ko kuitja ndo Jesús naa kuntajno ko kueta a ndo ba, xranchi jitaxin chijnie ndo Dio:

¹⁵ Xraxon a ja a tjanya Jerusalén,

tsje e jitji ndo Rey na a,

jita a ndo naa kuntajno.

¹⁶ Ko nchakon kon en ji i, sen teyuu chrikao ndo Jesús kuienxin a sen sonda kon en. Tjume e nchakon juexin sakjui ndo Jesús ngajni, xraxaon sen ixi jaña jitaxin xroon tsikjin ni kuachronga chijnie ndo Dio sa ó, xranchi tson en ndo, ko nduaxin jaña kon en.

¹⁷ Jaña kain ni bake e ngajin ndo Jesús nchakon kuiye e ndo xi Lázaro kuachrxjxin xa ti no tsixrabaa xa ko xechón xa, ni me e beki na nge e bikon na.

¹⁸ Méxin, kueya na bijirue e na ndo Jesús ngatja cha o, ixi ó kono e na ixra ijié tsijinche e ndo.

¹⁹ Méxin, xi fariseo juao kichuu xa:

—Ó bikonta, jua i ngakon en na, tsje enta kain na rué e na xa.

Kaxin ni ngigua griego tjée na ndo Jesús

²⁰ Kaxin ni nichja ngigua griego bake e na ngakjen en ni kuji kia tjanya Jerusalén xroxraxaonxin na ndo Dio.

²¹ Me e konchjine e na ngajin ndo Felipe, ndo tjanya Betsaida, nunte Galilea, ko kuinóatée na ngajin ndo ko ndachro na:

—Tja onna tsikonna ndo Jesús.

²² Ko ndo Felipe kuiji ndo kuindache ndo ndo Andrés. Ko tjume e yui sen kuindache sen ndo Jesús.

²³ Ko ndachro ndo Jesús:

—Ó kuiji hora, ixi Chjen en ndo Dio, Xjan jongí e xranchi chujni, satsji ndo tsayé e ndo juachaxien Ndotée ndo.

²⁴ Ko nduaxin nge e ntatjunta ixi siá tsitsinga naa noatrigo ngata a inche, ko tsen a noa, je o naa noa tsitu e. Ko siá tsen en noa, tjume e tsoña kueya noa ixi jaña tsandáani no.

²⁵ *Ko ni tjue e aséen ixi xro an nge e sintakon en na, ni me e sinchetjáña na ti tsechón na kain nchakon. Ko ngisen ningakon en aséen maski xrokuen en sen nti i nunte xasintajni ixi xrochronga sen chijnie ndo Dio, sen me e xrochónnda sen juachaxin tsechón sen kain nchakon.

²⁶ Siá xrojan ngisen tjaun sinche e xřana, xroruana sen. Ko ti no tsake e jan an, nti a kaxon tsake e sen nche e xřana. Siá xrojan ngisen sinche e xřana, Ndotána tsjenge e ndo sen na.

Ndo Jesús chronga ndo tsen en ndo

²⁷ Ko jai tsango toni e aséenna. ¿Nge e xrondachřjan? ¿Á xrondachřjan: “Ndotána tájon anta juachaxin nge e tsónna jai”? Ko ixřa me e juixin nti i ixi jaña tsónna.

²⁸ Cháña xrondachřjan: “Ndotána, tsjakonta juachaxin ijié chonda ngajin chujni nunte nti i.”

Hora me e kuin en na nichja naa tée ngajni ko ndachro:

—Ó juexin juako juachaxinna ko íjngo sinta a me e.

²⁹ Ko ni ste nti a stetin en na, méxin, ndachro na jitjatee ngajni, ko ikaxin na ndachro na: —Naa ndo ángel nichje e ndo.

³⁰ Ko ndachro ndo Jesús:

—Tée kuin ennta, kujxin ngajni ixi tsitikaonntana.

³¹ Ko jai ndo Dio sinchéña ndo ijié ngajin chujni nunte xasintajni, ko jai Xixron anxrée tetuan an xa nunte xasintajni tsachřjexin xa nti i.

³² Ko nchakon tsake e nganito ntacru, kueya na tsikon na ko tsitikaonna na.

³³ Jaña ndachro ndo ixi jichrónga ndo xranchi tsenxin ndo.

³⁴ Ko juate e ni ste nti a:

—Kuin anna ndachro xroon tsikjin sen sa ó ixi ndo Cristo kain nchakon tsechón ndo ko, ¿sonda ndachrua ja a ixi Chjen en ndo Dio, xjan jongí e xranchi chujni, xrokonda tsake e na xjan nganito ntacru? ¿Ngisen Chjen en ndo Dio ikjan xranchi Chujni?

³⁵ Ko ndachro ndo Jesús:

—Xratsake e xro i ngajinnta, ko je o kaxion nchakon. Tajinta ixi xrachondanta xro i ji i ixi sintaxronka inta ti naxixe e. Ixi ngisen taji ti naxixe e tikon a na no taji na.

³⁶ Titikaonnta xro i tingasáña ixi ngajinnta jii xro i ixi xrokjannta chujni jian chónnda xro i. Ko juexin ndachro ndo Jesús ji i, tjume e sakjui ndo kuemá ndo.

Ni judío titikaon a na ndo Jesús

³⁷ Maski ndo Jesús tsijnche e ndo kueya ixřa ijié ngato ikon na, kuitikaon a na ndo

³⁸ ixi xrokonda jaña tson en xranchi nge e tsikjin ndo Isaías sa ó:

Ncháina, ¿ngisen titikaon nge e nichjana?

¿Ngisen juincheno e ndo Dio juachaxien ndo?

³⁹ Méxin, kuitikaon a na ndo Jesús ixi kaxon tsikjin ndo Isaías:

⁴⁰ Ndo Dio kuajon ndo juachaxin ixi tsikon a na

ko juinchecha ndo aséen na,

ixi tsikonxin a na ikon na,

ko tsienxin a na ixi aséen na,

ko xrokjan i na ngajin ixi sintaxruan an na.

⁴¹ Jaña tsichro ndo Isaías sa ó ixi tsikikon ndo juachaxin ijié chónnda ndo Jesús ko nichja ndo ixi je e ndo.

⁴² Ko kueya ni judío tetuan an kuitikaon na ndo Jesús, ko bachronga i na ixi ó kuitikaon na ndo ixi xrakon en na xi fariseo, ixi je e xa xrokuantsjexin xa na ningue ni judío.

⁴³ Ixi je e na ícha banche e na juaxrxin bakayé e na juasaya tajon chujni ixi juasaya tajon ndo Dio.

Nge e ndachro ndo Jesús tsóñexin chujni ijié

⁴⁴ Ko ndo Jesús seen ndachro ndo:

—Ngisen titikaonna, je a je o jan an titikaonna sen, kaxon titikaon sen Ndotána, ndo xruan anna jui i.

⁴⁵ Ko ngisen tikonna kaxon tikon sen ndo tsixruan anna.

⁴⁶ Jan an xro i kuji nunte xasintajni ixi sen titikaonna tsake a sen ti naxixe e.

⁴⁷ Ko xrojan ngisen tin en nge e ndachrjan ko tsitikaon ana na, je a jan an tsjankata a na ijje. Ixi jan an jui a tsjankata a jjee chujni nunte nti i. Na i. Jui i tsingijna na ixi tsitjáña i na.

⁴⁸ Ko chujni titikaon ana ko titikaon a chijnina ó jii ngisen tsjankata a na ijje. Chijni nichja me e chijni sinchéña ijje ngajin na nchakon tsjexixin nunte xasintajni.

⁴⁹ Ixi jan an nichjaxin a jan on. Na i. Ndotána, ndo tsixruan anna, kuetuanna nge e xronichja ko nge e sintakuan an chujni.

⁵⁰ Ko nóna ixi ti kuetuan an Ndotána me e tajon juachaxin tsechón chujni kain nchakon. Méxin, kain nge e ndachrjan, Ndotána kuetuanna xronichja.

13

Ndo Jesús néma ndo tutée sen chrikao ndo

¹ Titjáña naa nchakon tsii kia pascua ko ndo Jesús ó no e ndo kuiji hora satsjixin ndo nunte xasintajni, ko satsji ndo ti Ndotée ndo. Kain nchakon tjue e ndo sen chujnie ndo ste nunte xasintajni, ko jai ícha tjakoxin ndo ixi tjue e ndo sen.

² Ko ó kuji hora sine sen tsokjin, ko Xixron anxrée ó tsixraxon in xa aséen xi Judas Iscariote, ndotée xa ndatin in Simón, sinchekji xa ndo Jesús.

³ Ndo Jesús no e ndo ixi tsikixin in ndo ti jii ndo Dio ko ti no xrokjan ndo. Ko no e ndo ixi Ndotée ndo kuajon ndo juachaxin tsetuen en ndo kain nge e.

⁴ Tjume e bingatjen ndo ti no stene sen ko kuantsje ndo manta jitsáa ndo, ko kua ndo naa manta xemaxinni, ko bingatóxin ndo manta.

⁵ Ko bikia ndo inda ngaya naa tjatu o, ko kuaxi ndo juné ma ndo tutée ngujngu sen chrikao ndo, ko juinchexemaxin ndo ixi manta jingatoxin ndo.

⁶ Ko hora kuiji ndo ti jii ndo Pedro, ndo Pedro ndachro ndo:

—Nchána, zá ja anta sinémanta tutéena?

⁷ Ko juatingixin ndo Jesús:

—Jai tienxin a nge e rinta a. Tjume e tsienxian sonda rinta a ji i.

⁸ Ko ndachro ndo Pedro:

—Nai a sinémanta tutéena.

Ko ndachro ndo Jesús:

—Siá sinéma i tutáa, ninge o tsikinixin a ngajin.

⁹ Ko juate e ndo Simón Pedro:

—Na i, Nchána. Je a je o tutéena né manta. Kaxon né manta tjáana ko jáana.

¹⁰ Ko ndo Jesús ndachro ndo:

—Ngisen tsikengi xrokonda i tsengi sen lingo. Je o tutée sen tsijma ixi nchijí sen tjúá sen. Ko ja anta tjúánta, maski je a kainnta.

¹¹ Ndachro ndo Jesús je a kainnta tjúánta, ixi no e ndo ngisen xrojuinchekji ndo.

¹² *Juexin juné ma ndo tutée kain sen, tjume e itsé ndo mantée ndo, manta jitsáa ndo, ko ikjan ndo bake e ndo nunte ti no stene sen ko ndachro ndo:

—Zá tienxinnta nge e junta a?

¹³ Ja anta tiya nantana ngisen tjako anta ko Ncháanta, ko ndako ndachronta ixi jan an ngisen me e.

¹⁴ Siá jan an ngisen tjako anta ko Ncháanta jan an, ko juné ma tutáanta, kaxon jaña ja anta xrojuinéme e kichuunta tutáanta.

¹⁵ Ixi jan an juako xranchi junta a, kaxon ja anta sinche enta jaña.

¹⁶ *Naa nge e nduaxin ntatjunta ixi ni nche e ixra, je a ícha tjintee na ixi ni xrée, ko ninaa ngisen tikao naa juajna, tjinte a na ícha ixi ni tsixrua an juajna.

¹⁷ Siá tienxinnta ko siá sinche enta ji i, juaxruxin tsake enta.

¹⁸ *Je a ixi kainnta ndachrjan ji i. Jan an nóna ngisen kuincha a. Ko xrokonda tson en xranchi tsikjin sen sa ó: “Ngisen neki an, ni me e tsingaxiton na ngajin.”

¹⁹ Jan an ntatjunta ixi nchakon tson en ji i, ja anta tsitikaonnta ixi jan an ngisen ntatjunta ngisen najan an.

²⁰ *Naa nge e nduaxin ntatjunta, ixi ngisen tayé e naa sen xruan an jan an, kaxon jan an tayé ena sen, ko ngisen tayé ena jan an, tayé e sen ngisen tsixruan anna jui i.

Ndo Jesús chronga ndo ixi xi Judas sinchekji xa ndo

(Mt. 26:20-25; Mr. 14:17-21; Lc. 22:21-23)

²¹ Ko juexin ndachro ndo Jesús ji i, tsango koni e aséen ndo ko ndako ichro ndo:

—Nduaxin ntatjunta ixi naa ja anta sinchekjintana.

²² Ko sen teyuu chrikao ndo kuaxi tsje e kichuu sen ixi noe a sen ngisen sinche e ti ndachro ndo.

²³ Ko naa ndo chrikao ndo Jesús, ndo me e ndo Jesús tsango tjue e ndo, jii ndo nunte tjenka ndo Jesús ti no stene sen.

²⁴ Ko ndo Simón Pedro jinchetengi ndo ndo me e ixi tjanchangí e ndo ndo ngisen sinche e ti ndachro ndo Jesús.

²⁵ Tjume e je e ndo konchjiñe e ndo ti jii ndo Jesús, ko juanchangi ndo:

—Ncháina, ¿ngisen sinche e me e?

²⁶ Juate e ndo Jesús:

—Ngisen xrotjá a tu o nutja tsikontjao, me e je e xa.

Méxin, juinchetjao ndo tu o nutja ko kuajon ndo ngajin xi Judas Iscariote, chjen en ndo Simón.

²⁷ Ko kuayé e xi Judas nutja, ko tuinxin Xixron anxrée kuixin in xa aséen xi Judas. Ko ndo Jesús ndache ndo xa:

—Nge e sinche e, jaiko xakon an nche e me e.

²⁸ Ko ninaa sen stene nti a kuienxin sen sonda jaña ndachro ndo.

²⁹ Kaxin sen xraxaon sen ixi xi Judas tsje e xa ti jitjinga tomi, méxin ndo Jesús kuetuen en ndo xa ixi tsike na xa nge e ixi ó tsji kia, o xrokuajon xa nge e ngajin ni nóa.

³⁰ Juexin kuayé e xi Judas nutja, tuinxin kuachrje xa ko ó tiie me e.

Naa nge e natjúá kuetuan an ndo Jesús

³¹ Ko ó juexin satsikji xi Judas, ndachro ndo Jesús:

—Jai tsonoxin juachaxien Chjen en ndo Dio, xjan jongí e xranchi chujni, ko tsjakoxin ndo juachaxin ijié chóna ndo Dio.

³² Siá Chjen en ndo Dio, xjan jongí e xranchi chujni, tsjakoxin ndo juachaxin ne e ndo Dio, ko me e jaña ndo Dio tsjakoxin ndo juachaxin chóna Chjen en ndo, ko tuinxin tson en me e.

³³ *Chjan na, xranaanchion tsake e ngajinnta nti i. Tjéentana ko xranchi ntatjan ni judío, jaña ntatjunta kaxon: Ti no itsji jan an, jua i itsjinta.

³⁴ *Naa nge e natjúá tetuan annta ixi xrotjue enta kichuunta xranchi jan an tjua anta.

³⁵ Ji i tsjakoxin ngajin kain ni xasintajni ixi ja anta chujninanta siá xrotjue enta kichuunta.

Ndo Jesús ndachro ndo nge e sinche e ndo Pedro

(Mt. 26:31-35; Mr. 14:27-31; Lc. 22:31-34)

³⁶ Tjume e juanchangi e ndo Simón Pedro ndo Jesús:

—Ncháina, ¿no itsjinta?

Ko juate e ndo Jesús:

—Ti no satsji, jua i itsjia jai. Ko tjume e xroruanana nti a.

³⁷ Ko ndachro ndo Pedro:

—¿Sonda jua i xrorua a jai? Jan an chao tsenixinna ixi ja anta.

³⁸ Ko ndo Jesús juate e ndo:

—¿Á nduaxin tsenixin ixi jan an? Nduaxin ntatjua xraxrotsje a kuntaxichiká, ní xrondachrua chuxin ana.

14

Ndo Jesús cha o satsjixinna ti Dio jii ngajni

¹ Ta inta juachjaon. Titikaonnta ndo Dio, titikaonntana jan an kaxon.

² Ndo a Ndotána kueya nchia jii. Ko siá je a xrobake e nchia, jan an xrontatjunta. Méxin, satsji, sintakonchjian no tsake enta.

³ Ko siá satsji ko sintakonchjian no tsake enta, tsji i íjngo, ko tsjirua anta ixi ti no tsake e jan an kaxon ja anta tsake enta nti a.

⁴ Ja anta no anta no itsji ko no anta cha o.

⁵ Ko juate e ndo Tomás:

—Ncháina, nóna ina ti no itsjia. ¿Xranchi xrokonóna cha o me e?

⁶ Ko ndachro ndo Jesús:

—Jan an cha o ko jan an chijni nduaxin ko jan an tsajon juachaxin stechón chujni. Xro an ngisen itji ti jii Ndotána siá tsjixin a sen ixi jan an.

⁷ Siá chuxinntana, kaxon xrochuxinnta Ndotána ko ó chuxinnta ndo jai ko ó bikonta ndo.

⁸ Ko ndachro ndo Felipe:

—Ncháina, tjako nana Ndotáa. Me ó tja onna.

⁹ Ko ndo Jesús ndachro ndo:

—Felipe, ó itsjé nchakon ritjén ngajinnta, ¿ko xrachuxin ana? Ngisen bikona ó bikon Ndotána kaxon. ¿Sonda ndachrua ja a ixi tsjako a Ndotána?

¹⁰ ¿Á titikaon anta ixi jan an riní Ndotata, ko Ndotata jii ndo ngajin? Ti nge e nichja jan an je a ti tja on nichja. Na i. Ko Ndotána ndo jii ngajin, je e ndo nche e ndo ixra.

¹¹ Titikaonnta ixi jan an ritjén ngajin Ndotána, ko Ndotána jii ndo ngajin. Maski titikaon anta ji i, tsitikaonxinnta ixi ti ixra ijíe juinta a ko nge e bikonta.

¹² Naa nge e nduaxin ntatjunta siá nduaxin tsitikaonntana, ti juinta a kaxon ja anta chao sinche enta kain me e ko kaxon ixra ícha ijíe nge e sinche enta ixi jan an satsji ti jii Ndotána.

¹³ Kain nge e tsjanche enta Ndotána ixi nombréena, jan an sinta a ixi jaña tsjako juachaxien Ndotána.

¹⁴ Siá xrojan nge e tsjanchaxinnta nombréena, jan an tsajon.

Ndo Jesús xroxruan an ndo Espiritue ndo Dio

¹⁵ Siá nduaxin tjuananta, titikaonnta nge e kuetuan annta.

¹⁶ Ko jan an tsinóatána ngajin Ndotána ixi xroxruan an ndo Espiritue ndo ixi tsingijnanta ko tsajon ndo juachaxin tsake e juaxruxin asáanta ko Espiritue ndo tsake e ngajinnta kain nchakon,

¹⁷ Espiritu nduaxin. Ti ni nunte xasintajni jua i tsayé e na Espiritu ko chúxin a na Espiritu. Ko ja anta chuxinnta Espiritu ixi ngajinnta jii ndo ko je e ndo tsitu e ndo ngajinnta kain nchakon.

¹⁸ Jan an tsintua inta nóanta ko ja onta; xrokjanna íngo ixi tsake e ngajinnta.

¹⁹ Ko itsjé a nchakon chujni nunte xasintajni tsikon anana. Ko ja anta tsikonntana ixi ja anta tsarichonnta ixi jan an richon.

²⁰ Ko nchakon me e tsono anta ixi jan an ko Ndotána naakuana ko ja anta ko jan an naakuana kaxon.

²¹ Ngisen no e ko titikaon nge e kuetuan an, sen me e tjua na. Ko sen tjua na, Ndotána kaxon xrotjue e ndo sen, kaxon jan an tjua a * sen ko tsichuxinna sen.

²² Ko xi Judas, je a xi Iscariote, ndache xa ndo:

—Ncháina, ¿sonda jan anna xrochuxiana ko ikaxin ni nunte xasintajni, na i?

²³ Ko juate e ndo Jesús ndachro ndo:

—Ngisen tjua na, sen me e titikaon nge e tituan an. Ko Ndotána xrotjue e ndo sen, ko Ndotána ko jan an tsji ina tsinteena ngajin sen.

²⁴ Ko ngisen tjaun ana, ni me e titikaon a na nge e ndachrjan. Ko nge e chijni tin ennta, je a chijnina. Na i. Ji i chijnie Ndotána, ndo xruan anna jui i.

²⁵ Rintatjunta kain ji i ixi xraritjén ngajinnta.

²⁶ Ko Espiritue Ndotána, xroxruan an ndo juachaxin ixi nombréena, ixi tsingijnanta, ko xronichja anta ndako ko tsjako anta kain nge e ko sintaxraxaonnta kain nge e ntatjunta.

²⁷ Juaxruxin tinta anta ko juaxruxin tajon ngajinnta. Je a xranchi juaxruxin tajon ni nunte xasintajni. Na i. Xrakon anta ko ta inta juachjaon.

²⁸ Ó kuin ennta nge e ndachrjan, satsji ko xrokjanna íngo ko tsake e ngajinnta. Siá nduaxin tjaunnanta, juaxruxin xrobake enta ixi no anta satsji ti jii Ndotána ixi ícha tetuan an je e ndo ixi najan an.

²⁹ Sa ó ntatjunta ji i ixi nchakon tsikonnta tson en, tsitikaonnta.

³⁰ Ko sé a xronichjana jai ixi jitji Xixron anxrée, xi tetuen en chujni nunte xasintajni. Ko je e xa xro an nge e tetuen en xa ngajin.

³¹ Ko xrokonda jaña tson en ixi chujni nunte xasintajni tsono e na ixi jan an tjua a Ndotána ko titika on nge e tetuanna ndo. Ko jai tingatjennta sachjinxina nti i.

15

Ntaq tajon tu uva ko chaan ntaq

¹ Jan an me e xranchi naa viña jichón ko Ndotána xranchi ngisen tayakon en ntaq.

² Tsonchrijin ndo chaan ntaq tajon a itu ko tsame e ndo ntaq ko tayakon en ndo ntaq ixi ícha itsjé itu tsajon ntaq.

³ Ko ja anta ó tjúa asáanta ixi chijni tjá anta.

⁴ Take enta ngajin xranchi jan an ritjén ngajinnta. Xranchi chaan ntaq jua i je o chaan ntaq tsajon itu siá jitse a kichuu ntaq, jaña ja anta kaxon jua i sinche enta nge e siá ste anta ngajin.

* **14:21 tjua a** yo te amo

⁵ Jan an ntaq̄ ijié tajon tu uva, ko ja anta chaan ntaq̄. Ngisen jitséxin najan an ko jan an ngajin sen tsajon sen kueya itu ixi ja anta jua i sinche enta naa nge e siá ritjén a ngajinnta.

⁶ Ko ngisen jitseni a jan an, ni me e jii nā xranchi chaan ntaq̄ tjankana ndá a ixi xroxema ntaq̄ ko tsjaaka nā ntaq̄.

⁷ Ko siá ja anta steniintana, ko xrotjáña inta nge e juntakuan annta, tjanchianta nge e tjaunnta ko tsaye enta.

⁸ Ndotána tayé e juasaya siá ja anta tájonnta itsjé itu. Ko jaña tsjakoxinnta ixi titikaonntana.

⁹ Jan an tsango tjua anta xranchi Ndotána tjua na. Tintue anta ti tjua anta jan an.

¹⁰ Siá tsitikaonnta ti kuetuan annta, tsono anta ixi tjua anta xranchi kaxon jan an titika on nge e kuetuanna Ndotána ko nóna ixi je e ndo tjua na ndo.

¹¹ Jaña nichja anta ixi tsake enta juaxruxin ngajin ko juaxruxin tsake e asáanta.

¹² *Ti tetuan annta me e ji i: tjue enta kichuunta xranchi jan an tjua anta.

¹³ Ngisen ícha tjue e naa ngisen, ba tsen en sen ixi ngisen tjue e sen.

¹⁴ Ja anta chujni tjento siá tsitikaonnta ti tetuan annta.

¹⁵ Ítiya inta ni nche e ixrā, ixi chujni nche e ixrā noe a sen nge e nche e xi tetuen en sen. Ko ja anta chujni tjentona ixi kain nge e juinchekuanna Ndotána, juntano anta.

¹⁶ Kuinche antana ja anta. Jan an kuincha anta ko kuinóatána ngajinnta ixi itsjinta ko tájonnta itsjé itu ko tsitjáña i tu. Ko jaña Ndotána xrotjá anta ndo kain nge e tsjanchiixinnta nombréena.

¹⁷ Jaña tetuan annta ixi xrotjue enta kichuunta.

Ningakon en nā ndo Jesús ko sen titikaon ndo

¹⁸ *Siá ni nunte xasintajni toña o anta, no anta ixi jan an ningakonna nā sa ó.

¹⁹ Siá ja anta xrokjuinta chujni nunte xasintajni, ni nunte xasintajni xrotjua anta nā ixi xrakichuunta nā. Ko jan an kuincha anta ngakjen en ni nunte xasintajni. Ko méxin, ni nunte xasintajni ningakon annta nā ixi i je anta chujni nunte xasintajinnta.

²⁰ *Xraxaonnta nge e ntatjunta ixi ni naa xi nche e ixrā tetuan an ícha ixi xi xrée. Siá ningakonna nā ko rua na nā, jaña xrorua anta nā kaxon. Ko siá kuitikaon nā nge e juntakuan an nā, me e kaxon tsitikaonnta nā nge e tsjako enta nā.

²¹ Kain ji i sinta anta nā kondeexin jan an ixi titikaonntana ko ixi chúxin a nā ngisen xruan anna jui i.

²² *Siá xrojui a nti i ko xronichja i ngajin nā, je e nā xrochónda i nā ninaa ijie. Ko jai jua i xrondachro nā ixi noe a nā ko chónda i nā ijie.

²³ Ni ningakonna, ni me e ningakon en nā Ndotána kaxon.

²⁴ Je e nā xrochónda i nā ijie siá xrojuinta i nge e ti ninaa ngisen juinche e sa ó. Ko jai ó bikon nā kain nge e junta a, ko maski bikon nā, ningakonna nā ko kaxon ningakon en nā Ndotána.

²⁵ Ko jaña ton en ixi xrokonda tson en nge e ndachro ley ne e nā: “Ningakonna nā maski xro an ijie chonda.”

²⁶ Ko nchakon tsji ngisen tsingijna, me e Espíritue ndo Dio nduaxin, xroxruan an jan an ixi juachaxien Ndotána ko je e ndo xronichjaxinna ndo.

²⁷ Ko ja anta kaxon xronichjaxinntana ixi ngajin ritjennta xraxrangíxixión juako anta.

16

¹ *Kain ji i ntatjunta ixi tsintue anta nge e juntakuan annta.

² Ni judío tsajon a nā juachaxin tsixin innta ni ngo ko tsiji nchakon ixi ni naatsóñaxónnta xroxraxaon nā ixi ti nche e nā me e naa xrée ndo Dio.

³ Jaña sinche e nā ixi chúxin a nā Ndotána ko chúxin a nā najan an.

⁴ Ko ntatjunta kain ji i ixi nchakon jaña tson en, xroxraxaonnta ixi ó ntatjunta sa ó jaña tson en.

Ixrā nche e Espíritue ndo Dio

*Ti xrangíxixión ntatju inta ji i ixi bake e ngajinnta.

⁵ Ko jai satsji ti jii ngisen xruan anna jui i. Ko ninaánta tjanchangínta no satsji

⁶ ixi tsango jitoní e asáanta ixi ntatjunta kain ji i.

⁷ Nduaxin, cháña satsji ixi ja anta jian tsake enta. Ko siá satsji a tsi a ngisen tsingijnanta. Ko siá satsji, jan an xroxruan an ndo tsji ndo.

⁸ Ko nchakon tsji ndo sinchexraxaon ndo chujni nunte xasintajni ixi chónda nā ijie, ko jii naa cha o ndako xrorué e nā ko ndo Dio sinchéñe e ndo nā ijie.

⁹ Je e nā chónda nā ijie ixi titikaon a nā

¹⁰ ko tsono e nā ixi jii naa cha o jian ko ixi jan an satsji ti jii Ndotána ko ítsikon antana,

¹¹ ko tsono e nā ixi ndo Dio sinchéña ndo ijiē ixi ó juexin juinchéña ndo ijiē ngajin Xixron anxrée, xi tituen en nunte xasintajni.

¹² Xrarichonda itsjé nge e xrontatjunta, ko jai jua i tsienxinnta.

¹³ Nchakon tsjī Espírituē ndo Dio nduaxin, je e ndo sintakuan annta ndo kain nge e nduaxin ixi je a nge e tjaun ndo xrontatjunta ndo. Na i. Xrontatjunta ndo kain nge e tsin en ndo ko sintano anta ndo nge e tson en.

¹⁴ Je e ndo tsajon ndo juasaya ngajin jan an ixi tsayé e ndo kain chijnina ko nge e tikinixinna ko sintano anta ndo kain ji i.

¹⁵ Kain nge e chónða Ndotána na na kaxon. Méxin, ndachrjan̄ ixi Espírituē ndo Dio tsayé e ndo nge e tikinixinna ko tjume e sintano anta ndo kain ji i.

Ti toni e aséenni xrokjan juaxruxin

¹⁶ Xra íse a í tsikon antana. Ko kaxon íse a tsikonntana íjngo ixi satsji ti jii Ndotána.

¹⁷ Ko kaxin sen chrikao ndo ndache kichuu sen:

—¿Nge e xrondachro ji i ixi íse a tsikonna ndo ko kaxon sé a tsikonna ndo íjngo ixi satsji ndo ti jii Ndotéē ndo?

¹⁸ ¿Inge e tjaun ndo xrondachro ndo ixi: “íse a”? Tianxin ana nge e ndachro ndo.

¹⁹ Ko kono e ndo Jesús nge e tjaun sen tsjanchangí e sen ndo ko ndache ndo sen:

—Jan an ntatjunta ixi íse a ítsikon antana ko kaxon sé a tsikonntana íjngo. ¿Á ji i ritjanchiangí e kichuunta?

²⁰ Nduaxin ntatjunta ixi tsango xrotsjanganta ko tsoni e asáanta, ko ni nunte xasintajni tsake e nā juaxruxin. Ko maski tsango tsoni e asáanta ko tjume e xrokjan tsake enta juaxruxin.

²¹ Hora naa nchri sinchejongí e nchra chjen en nchra, tsango tsoni e aséen nchra ixi ó kuiji hora tsjongí e xjan. Ko tjexin tjongí e xjan, tjume e ísintexi añao nchra juachjaon kuatsinga nchra ixi juaxruxin take e nchra ixi juinchejongí e nchra naa chjan ngata a nunte xasintajni.

²² Jaña ja anta kaxon toni e asáanta jai. Ko tjume e tsikonntana íjngo ko tsango tsake e juaxruxin asáanta ko ninnaa chujni tsantsja anta juaxruxin me e.

²³ Nchakon me e xro an nge e tsjanchangínanta. Nduaxin nge e ntatjunta. Ixi Ndotána xrotjáanta ndo kain nge e tsjanchaxinnta nombréena.

²⁴ Ja anta xraxo an nge e tjanchiaxinnta nombréena jai. Ko jai tjanchianta ko tsaye enta, ko tsango tsake enta juaxruxin.

Ncháina Jesucristo juacha ndo kuetuan an ndo nunte xasintajni

²⁵ Ntatjunta ji i je o xranchi tekini naa nge e. Ko tsjī nchakon ítsekia inta jaña ixi ndako xrontatjunta ixi Ndotána.

²⁶ Nchakon me e tsjanchaxinnta nge e nombréena. Ko ndachrjan̄ i xxi jan an xronichjaxinnta ngajin Ndotána

²⁷ ixi je e Ndotána tjua anta ndo. Tjua anta ndo ixi ja anta tjuananta jan an ko ixi titikaonnta ixi jan an juixin ti jii je e ndo.

²⁸ Kuachrjexin ti jii Ndotána ixi jui i nunte xasintajni. Ko jai tintu a nunte xasintajni ixi satsji ti jii Ndotána íjngo.

²⁹ Tjume e ndachro sen chrikao ndo:

—Jai ndako ritjakua ko ítjakoxin a ixi xrojan chijni,

³⁰ jai tienxinna ixi no a kain nge e ko xrokonda i xxi xrojan ngisen tsjanchangí ana. Méxin, titika onna ixi ja a juixian ti jii ndo Dio.

³¹ Ndo Jesús juate e ndo:

—¿Jai ché kuitikaonnta?

³² Ko tsjī nchakon ko jai hora me e ixi ja anta xrochjeyanta ko satsjinta ko tsintunantana jan on. Ko je a jan on ritjén ixi Ndotána jii ndo ngajin.

³³ Ji i ntatjunta ixi kainnta juaxruxin tsake e asáanta ixi titikaonntana. Ko nti i nunte xasintajni tsatsinganta juachjaon, ko xronka inta ixi jan an ó juacha tetuan an nunte nti i.

17

Ndo Jesús tjanchia ndo ixi sen chrikao ndo

¹ Ó juexin ndachro ndo Jesús kain ji i, tjume e tsje e ndo ngajni ko ndachro ndo:

—Ndotána, ó kuiji nchakon. Chje énta Chjan anta juachaxin ixi kaxon Chjan anta xrotjáanta xjan juasaya.

² Ko ja anta chje énta Chjan anta juachaxin ixi tsetuen en xjan kain chujni ko tsajon xjan juachaxin tsechón sen kain nchakon, kain sen tsichje enta xjan.

³ Ko juachaxin chónnda sen tsechón sen kain nchakon me e ti xrochuxinnta sen ja anta, ndo naakua ndo Dio nduaxin jichón, ko kaxon xrochuxin sen ndo Jesucristo, ndo tsixruan annta ja anta nunte xasintajni.

⁴ Jan an tjá anta juasaya nti i nunte xasintajni ko juexin juinta a ixrã kuetuannanta.

⁵ Ko jai Ndotána, chjánanta juachaxin ijíe xranchi kuachonda jan an nchakon bake e ngajinnta ti xrako a nunte xasintajni.

⁶ Ó juinteno a sen chjánanta, sen nunte xasintajni, sen tsikinche e ja anta. Je e sen chujnianta sen ko ja anta chjánanta sen ko jan an ó juintakuan an sen chijnianta ko kuitikaon sen.

⁷ Ko jai ó no e sen ixi kain juachaxin chónnda jan an t̃i x̃in ngajinnta.

⁸ Jui i ixi juako a sen chijnianta chjánanta, ko je e sen kuitikaon sen, ko kuienxin sen ixi nduaxin jan an juixin ngajinnta, ko kuitikaon sen ixi ja anta tsixruan annanta.

⁹ Jan an tjanča anta ixi tsingijnanta sen me e. Je a tjanča anta ixi tsingijnanta kain chujni nunte xasintajni. Na i. Je o tjanča anta ixi sen chjánanta ko ixi je e sen chujnianta sen.

¹⁰ Ko kain nge e chonda ja anta, na na, ko kain nge e na na, na anta kaxon. Ko méxin, je e sen tsajon sen juasaya ngajin.

¹¹ Jai ítsituna i nti i nunte xasintajni. Ko je e sen xraxitu e sen nti i. Ko jan an satsji ixi tsake e ngajinnta. Ndotána jian, tayakon ennta ixi juachaxiannta sen chjánanta ixi je e sen naakua tsake e sen xranchi jan an ko ja anta naakua stena.

¹² *Nchakon bake e ngajin sen nti i nunte xasintajni, kuayakon an sen ixi juachaxiannta. Ko ninaa sen kuitjáña i sen. Je o naakua naa ngisen kuitjáña, ixi xi me e ó tsikitjáña xa ixi jaña tson en xranchi jitaxin xroon tsikjin sen sa ó.

¹³ Ko jai satsji ti no ritjennta. Ko ixi xrarítjén nti i nunte xasintajni ndachrjan ji i ixi tsake e sen juaxruxin xranchi juaxruxin chónnda jan an.

¹⁴ Jan an juintakuan an sen chijnianta, ko jai ni nunte xasintajni ningakon en nã sen ixi je e sen je a chujni nunte xasintajni xranchi jan an kaxon je a chujni nunte xasintajni.

¹⁵ Tjánhá ianta ixi tsantsjexinnta sen nunte xasintajni. Na i. Tjanča anta ixi tsingijnanta sen ixi Xixron anxrée sincheye a xa sen.

¹⁶ Xranchi jan an je a chujnie nunte xasintajni, kaxon je e sen je a chujni nunte xasintajni sen.

¹⁷ Nchetjúáxinnta sen ixi nge e nduaxin ixi chijnianta chijni nduaxin.

¹⁸ Xranchi xruan annanta jui i nunte xasintajni, jaña jan an xruan an sen itsji sen ngakjen en chujni nunte xasintajni.

¹⁹ Ixi je e sen totjúáxinna jan an, ko kaxon je e sen tsontjúáxin aséen sen ixi chijni nduaxin.

²⁰ Ko je a je o tinóatána ixi je e sen. Na i. Kaxon tinóatána ixi tsingijnanta sen tsitikaon ícha tjume e, nchakon tsin en sen nge e xronichja je e sen.

²¹ Tjanča anta ixi kain sen naakua xroxaxaon sen xranchi ja anta Ndotána ko jan an naakua stena, ixi kain chujni nunte xasintajni tsitikaon nã ixi ja anta xruan annanta jui i.

²² Ó tjá a sen naxra je o juachaxin ijíe xranchi juachaxin chjánanta ixi naakua xroxaxaon sen xranchi jan an ko ja anta naakua stena.

²³ Jan an ko je e sen naakuana xranchi ja anta ko jan an naakuana kaxon. Ko jaña chujni nunte xasintajni tsono e nã ixi ja anta xruan annanta jui i ko kaxon tjue enta nã xranchi tjaunnanta jan an.

²⁴ Ndotána, ja anta chjánanta sen, ko tja on ixi tsake e sen ti no tsake e jan an ixi tsikon sen juachaxin ijíe chjánanta; ixi fiaonanta ti xrako a nunte xasintajni.

²⁵ Ndotána, tsango jian ja anta. Chujni nunte xasintajni chúxin a nã ngisen ja anta, ko jan an ó chuxinnta, ko kain sen chjánanta, kaxon ó no e sen ixi ja anta xruan annanta jui i.

²⁶ Ó juintano a sen ngisen ja anta ko xrasintano a sen ícha, ixi xranchi ja anta tjaunnanta jaña xrotjue e kichuu sen ko jan an tsake e ngajin sen.

18

Itse na ndo Jesús ko bije e na ndo

(Mt. 26:47-56; Mr. 14:43-50; Lc. 22:47-53)

¹ Juexin ndachro ndo Jesús kain ji i, tjume e kuachrjenka o ndo sen chrikao ndo ko sakjui sen natu inda Cedrón. Nti a jii naa ijngi ko nti a ikjui ndo Jesús ko sen chrikao ndo.

² Kaxon xi Judas, xi juinčekji ndo Jesús, chúxin xa ijngi me e ixi nti a itsjé nchakon baxraka sen chrikao ndo Jesús ko kao je e ndo.

³ Méxin, xi Judas bika o xa kueya xi soldado ko kaxin xi policia nche e xrã ni ngo tsixrua an xitaana tetuan an ko xi fariseo. Kuijikao nã chika ko xro i tingasáfaxin.

⁴ Ko ndo Jesús ó no e ndo kain nge e xrokron en ndo, ko konchjiñe e ndo ngajin na ko juanchangi e ndo na:

—¿Ngisen tjéenta?

⁵ Ko juate e na:

—Tjéena xi Jesús, xi tjanya Nazaret.

Ko juate e ndo Jesús:

—Jan anna.

Ko xi Judas, xi tsijinçekji ndo, nti a jikao xa na.

⁶ Ko hora ndachro ndo Jesús: “Jan anna”, je e na xronka na ko ngaxiton na kuitsinga na nunte.

⁷ Ko íjngo ikjan ndo Jesús juanchangi e ndo na:

—¿Ngisen tjéenta?

Ko je e na ndachro na:

—Tjéena xi Jesús, xi tjanya Nazaret.

⁸ Ko ndachro ndo Jesús:

—Ntatjunta jan an ngisen tjéenta. Ko siá jan an ngisen tjéenta, tintu enta satsji sen chrjiki an.

⁹ Jaña ndachro ndo Jesús ixi xrokonda tson en ti nge e tsindachro ndo: “Sen chjána Ndotána, xro an ngisen tsitjáña.”

¹⁰ Ko ndo Simón Pedro kuantsje ndo naa chika espada konchrijinxin ndo ndatsjon naa xi, ndatsjon xa ti jian, xi me e ndatin in xa Malco, xinchexrée xitaana tetuan an.

¹¹ *Ko ndo Jesús ndache ndo ndo Pedro:

—Xraxi ian chika espada ña. Siá Ndotána kuetuan an ixi tangi tsatsinga, xrokonda tsatsinga jan an kain ji i.

Ndo Jesús ikjui ndo ngajin xi tetuen en xitaana

(Mt. 26:57-58; Mr. 14:53-54; Lc. 22:54)

¹² Tjume e xi soldado ko xi tetuen en xa ko xi policía judío nche e xra ni ngo itsé xa ndo Jesús ko kuintee xa ndo.

¹³ Ko sabikao xa ndo ndo a xi Anás, a xi Anás xichée xi Caifás, ngisen nano me e tituen en xitaana.

¹⁴ *Ko xi Caifás, xraje o je e xa tsindache ni judío ixi ícha jian naakua naa chujni xrokruenxin ixi tjanée na.

Ndo Pedro ndachro ndo chúxin a ndo ndo Jesús

(Mt. 26:69-70; Mr. 14:66-68; Lc. 22:55-57)

¹⁵ Ndo Simón Pedro ko inaa ndo bakajikao ndo Jesús sterué e sen ndo. A ndo inaa ó chúxin ndo xitaana tituan an. Méxin, kaxon kuixin in ndo no kuixin in ndo Jesús, ngaxin in ndasin ndo a xitaana tituan an.

¹⁶ Ko ndo Pedro kuitu e ndo nduja ti ntachja. Ko ndo chúxin xitaana tituan an kuachrje ndo ko nichje e ndo nchri tendáa ntachja ko kuajon nchra juachaxin kuixin in ndo Pedro.

¹⁷ Tjume e nchri tendáa ntachja juanchangi e nchra ndo Pedro:

—¿Á kaxon ja a chriku a xi ña?

Ko juate e ndo Pedro ndachro ndo:

—Na i, jan an na i.

¹⁸ Ko nti a tsango ikin ko xi nche e ixra ko xi policía juaaka xa naa xro i nti a ko siin xa stexraxru e xa. Kaxon ndo Pedro jixraxru e ndo nti a.

Xitaana tetuan an tjanchangí e xa ndo Jesús

(Mt. 26:59-66; Mr. 14:55-64; Lc. 22:66-71)

¹⁹ Ko xitaana tetuan an juangíxin xa juanchangi e xa ndo Jesús ngisen sen chrikao ndo ko nge e tjako ndo.

²⁰ Ko juate e ndo Jesús:

—Jan an nichja ngajinxin ikon kain ni nunte xasintajni, ko bajako ngaxin in nchia ko ngaxin in ni ngo ti no baxra o kain ni judío. Ko xro an nge e ndachrjan imao.

²¹ ¿Sonda tjanchanginana? Tjanchangí e ni kuin en xranchi tjako. Je e na no e na nge e ndachrjan.

²² Juexin ndachro ndo Jesús ji i, tjume e naa xi policía nche e xra ni ngo, jindaxin xa nti a, kuande e xa naa iton ikon ndo Jesús ko ndachro xa:

—¿Á jaña tjate é ngajin xi tituen en xitaana?

²³ Ko juate e ndo Jesús:

—Siá ndako a ndachrjan naa nge e, ndachijiana nge e ndako a ndachrjan, ko siá ndako nge e ndachrjan, ¿sonda kon iana?

²⁴ Tjume e xi Anás xruan an xa ndo Jesús jixrite e ndo ngajin xi Caifás, xitaana tetuan an.

Ndo Pedro ñjngo ndachro ndo chúxin a ndo ndo Jesús

(Mt. 26:71-75; Mr. 14:69-72; Lc. 22:58-62)

²⁵ Ko ndo Pedro xراسiin ndo nti a jixraxru e ndo, ndache nā ndo:

—¿Á kaxon ja a chriku a xi ñā?

Ko ndo Pedro ndachro ndo chúxin a ndo ndo Jesús, méxin, ja in juate e ndo:

—Na i, jan an na i.

²⁶ Tjume e naa xi nche e xrée xitaana tetuan an, xi me e xrakichuu xa xi tsikonchrijin ndo Pedro ndatsjon, juanchangi xa:

—¿Á je a ja a bikon riku a xa ti jii ijngi chóna lahuerta?

²⁷ Ko ndo Pedro ndachro ndo ñjngo je a ndo. Ko tuinxin itsje naa kuntaxichíká.

Ndo Jesús ngajin xi Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Kuachrxjin nā ndo a xi Caifás, sabikao nā ndo Jesús ti nchia ijie tetuanxin xi gobernador. Ko ó kuaxi jitingasáña ko ni judío kuixin a nā nchia me e ixi jaña xrokuama i nā ijie, nē jua i sine nā kia Pascua.

²⁹ Tjume e xi Pilato kuachrxjin xa nchia tetuan an nā, juanchangi e xa nā:

—¿Nge e ijie chóna xi ji i?

³⁰ Ko je e nā juate e nā:

—Siá je a ndako a juinche e xa, xrobikian ina xi nti i.

³¹ Ko ndache xi Pilato nā:

—Satiku unta xa, nchéñe enta xa ijie xranchi jitaxin ley na anta.

Ko juate e ni judío:

—Jan anna judíona chonda ina juachaxin naatsónaxónna naa ngisen.

³² *Jaña kon en xranchi tsindachro ndo Jesús xranchi tsen en ndo.

³³ Tjume e xi Pilato ñjngo kuixin in xa nchia tetuanxin xa ko kuiye e xa ndo Jesús ko juanchangi e xa ndo:

—¿Á ja a xi Rey tetuen en ni judío?

³⁴ Ko ndachro ndo Jesús:

—Ti nge e tjanchangināna, ¿á ja ua xraxaoan jaña?, o, ¿á ixi inaa nā jaña ndachro nā?

³⁵ Ko juate e xi Pilato:

—¿Á jan an judíona? Ni tajnáa ko xitaana tetuan an bikaan nā ngajin. ¿Nge e juinche e?

³⁶ Ko juate e ndo Jesús:

—Juachaxin chóna jan an je a kuixin nunte xasintajni. Siá xrokuji xin nunte xasintajni, sen chrjiki an xrojuinche e sen nge e ixi xrotsé ana ni judío ko juachaxin chóna jan an, je a juachaxin nunte xasintajni.

³⁷ Ko ndachro xi Pilato:

—Ja a, ¿á nduaxin naa xi rey?

Ko juate e ndo Jesús:

—Jaán, jan an rey xranchi ja a ndachrua. Jan an jui i nunte xasintajni ixi xronichja ti nduaxin. Kain sen titikaon nge e nduaxin, sen me e tin en nge e tjako.

³⁸ Ko ndachro xi Pilato:

—¿Nge e nduaxin ndako, ndachrua?

Xi Pilato kuajon xa juachaxin tsen en ndo Jesús

(Mt. 27:15-31; Mr. 15:6-20; Lc. 23:13-25)

Ko juexin juanchangi xi Pilato ji i, tjume e kuachrje xa ko ikjui xa ti ste ni judío, ko ndache xa nā:

—Kuitja i ninaa ijie ngajin xi ji i.

³⁹ Ko ja anta ó xrakuan anta ixi kia pascua tajanda naa chujni jije e. ¿Á tjaunnta tsajanda xi Rey tetuen en ni judío?

⁴⁰ Ko kain nā kuyako nā ndachro nā:

—Xi ñā na i. Tajanda xi Barrabás.

Ko xi Barrabás naa xiche e me e.

19

¹ Tjume e xi Pilato kuetuan an xa ixi tsjaya nā ngajin ndo Jesús.

² Ko ni soldado juinchéña n̄a ixi nt̄acha a naa corona ko bake e n̄a ngata a jaa ndo Jesús. Ko juinchekeya n̄a ndo naa manta tiie j̄átse.

³ Ko konchjiñe e n̄a ti jii ndo, ko ndachro n̄a:

—Tsechón ndo rey tetuen en ni judío.

Ko juanoa n̄a ndo. Ko itja n̄a kuandexin n̄a ikon ndo.

⁴ Ko xi Pilato íjngo kuachrxjin xa nchia tetuanxin xa, ko ndache xa ni tsixra o nti a:

—Tsje enta, tsantsje xa ixi tsienxinnta ixi kuitja i ninaa nge e ndako a juinche e xa.

⁵ Ko kuachrxjin ndo Jesús nti a jitikao ndo ngata a jaa ndo corona tsikoña nt̄acha a ko jitsáa ndo manta tiie j̄átse. Ko ndachro xi Pilato:

—Tsje enta, nti i jii xa.

⁶ Ko nchakon bikon ni taana tetuan an ko ni policía ne e ni ngo juangíxin n̄a kuyako n̄a:

—¡Tjankanitia xa nt̄acru! ¡Tjankanitia xa nt̄acru!

Ko ndachro xi Pilato:

—Ja anta tiku unta xa ko tankanitonta xa nt̄acru ixi jan an kuitja i ninaa nge e ndako a ngajin xa.

⁷ Ko juate e ni judío:

—Jan anna chondana naa ley xrokonda tsen en xa ixi ndachro xa ixi Chjen en ndo Dio je e xa.

⁸ Ko nchakon kuin en xi Pilato ji i ícha xronka xa.

⁹ Tjume e íjngo kuixin in xa nchia tetuanxin xa ko juanchangi e xa ndo Jesús:

—¿No juixian?

Ko ndo Jesús xro an nge e juate e ndo.

¹⁰ Ko ndachro xi Pilato:

—¿Sonda t̄jat̄e a? ¿Á noa ia ixi jan an chonda juachaxin tsetuan an n̄a tankanitia n̄a nt̄acru o kaxon chonda juachaxin tsajanda satsjia ko xro an nge e tson an?

¹¹ Ko juate e ndo Jesús:

—Xro an juachaxin chónda ja a siá je a Ndotána Dio xrotjáa ndo juachaxin. Ko chujni bikaana nti i ícha ijie chónda n̄a ixi ja a.

¹² Ko kuin en xi Pilato ji i, tjume e juangíxin xa juée xa xranchi xrobajanda xa ndo Jesús. Ko ni judío kuyako n̄a ndachro n̄a:

—Siá tsintu é satsji xa, ja a je a t̄jentua xi tetuen en t̄jajnaína. Ngisen nchéña aséen xranchi naa rey, ni me e ningakon en xa xi titujinna.

¹³ Kuin en xi Pilato ji i, tjume e sabikao xa ndo Jesús nduja ko bake e xa nunte ti no nchéñaxin n̄a ijie ko kaxon nchekin in n̄a ti kueya ixro ko ngigua aremeo xrondachro Gabatá.

¹⁴ Nchakon me e naa nchakon sa ó kia Pascua, ko ó xrochjée ngusine nchakon ko xi Pilato ndache xa ni judío:

—Nti i jii xi rey tetuan anna.

¹⁵ Ko je e n̄a kuyako n̄a ndachro n̄a:

—Tsachrje xa, tsachrje xa. Tankanitia xa nt̄acru.

Ko xi Pilato ndachro xa:

—¿Á t̄jaunnta tsjankanito xa nt̄acru xi rey tituan anna?

Ko je e n̄a juate e n̄a:

—Xro an xi rey chondana, je o xi César tituan an.

¹⁶ Méxin, xi Pilato kuajon xa ndo Jesús ngajin ni judío ko sabikao n̄a ndo tsjankanito n̄a ndo nt̄acru.

Juankanito n̄a ndo Jesús nt̄acru

(Mt. 27:32-44; Mr. 15:21-32; Lc. 23:26-43)

¹⁷ Jaña ndo Jesús kuachrxjin ndo nti a yama ndo nt̄acru ti no tsjankanito n̄a ndo, noxon cha o itji ti no tin in nt̄ajaa chujni ko ngigua arameo xrondachro Gólgota.

¹⁸ Nti a juankanito n̄a ndo nt̄acru, ko kaxon íjngo yuu xi, naa xi bake e xa ndatsjonxin jian ko inaa xa ndatsjonxin kjon ko ngusine bake e n̄a ndo Jesús.

¹⁹ Ko kuetaan an xi Pilato xrokjín n̄a ngata a naa nt̄aá ko tsake e n̄a ti noi nt̄acru ko xrondachro nt̄aá:

“Ndo Jesús, ndo t̄jajna Nazaret, me e ndo Rey tetuen en ni judío.”

²⁰ Ko itsjé ni judío juinchequanxin n̄a letra tsikoña ixi t̄jenka t̄jajna Jerusalén kuenito n̄a ndo Jesús nganito nt̄acru ko ní t̄ée t̄jajna tsikjin n̄a, naa t̄ée hebreo, naa t̄ée griego, naa t̄ée latín.

²¹ Ko ni taana tetuan an ni judío ndache n̄a xi Pilato:

—Kjin a ja a je e xa “xi Rey tetuen en ni judío”; cháña ikjian “Je e xa ndachro xa ixi je e xa xi Rey tetuen en ni judío.”

²² Ko juate e xi Pilato:

—Ti kuetuan an xrokjin na ó juexin kóña, ko jaña tsitu e.

²³ Tjume e ni soldado, hora juexin bake e na ndo Jesús nganito ntacru, kua na mantée ndo Jesús, konchjeya na manta ko noó juinchéña na manta nanaá mantée na. Ko kaxon kua na manta jine jáá ndo. Manta me e tsixraun a manta, naakua manta tsikoña me e.

²⁴ Ko ni soldado juao kichuu na ndachro na:

—Xrochjeya ina manta ji i. Ícha jian xrosondaoxinna ixro xixi jaña tsonojna ngisen tsjacha manta.

Jaña kon en xranchi ndachro xroon chijnie ndo Dio tsikjin sen sa ó: “Sondaonxin na ixro ko jaña chjeje e na mantána.” Jaña juinche e ni soldado.

²⁵ Ko tjenka ntacru ti no jinito ndo Jesús bake e janée ndo ko jan kichuu jan, jan María, janchri e ndo Cleofas ko jan María Magdalena.

²⁶ Ko nchakon bikon ndo Jesús janée ndo ko tjenka jan jii ndo chrikao ndo, ndo ícha tjue e ndo, ndache ndo janée ndo:

—Tsje é nti i jii chjan an.

²⁷ Ko tjume e nichje e ndo Jesús ndo bajikao ndo, ndo jii tjenka jan, ko ndachro ndo:

—Nti i jii janáa.

Ko ndo me e kuayé e ndo jan, sabikao ndo jan ndo a ndo ko je e jan ikjan jan xranchi janée ndo.

Kuen en ndo Jesús

(Mt. 27:45-56; Mr. 15:33-41; Lc. 23:44-49)

²⁸ Ó no e ndo Jesús xixi kain ixra ó juexin juinche e ndo ko xrokonda tson en nge e jitaxin xroon ko ndachro ndo:

—Kuen enna inda.

²⁹ Ko nti a jii naa chikute jitjáá xran tsjá ko je e na juinchetjao na naa tu o manta kuintsiá na naa ntaá ko bake e na tjenka ro a ndo.

³⁰ Ko ndo Jesús kui i ndo xran tsjá ko ndachro ndo:

—Ó juexin juinta a kain nge e kuituanna.

Tjume e kuisée jaa ndo ko kuajon ndo espíritue ndo ko ndakuen en ndo.

³¹ Nchakon me e naa nchakon sa ó kia Pascua, méxin, ni judío tjaun a na xrokuitu e cuerpoe ni tsiken en nganito ntacru nchakon tjoké e na, xixi nchakon me e naa nchakon ijié. Méxin, juanche e na xi Pilato tsondaki na tutée ni kuen en nganito ntacru ko satsikaoxin na nti a cuerpoe ni me e.

³² Ko ni soldado ikjui na ko kondaki na tutée naa xi ko kao tutée xi yuxin juankanito na ntacru tjenka ndo Jesús.

³³ Ko hora kuiji na tjenka ndo Jesús ko bikon na ó tsiken en ndo, kondaki a na tutée ndo.

³⁴ Ko naa xi soldado kuantje e xa ndatsjonxin ntakuin ndo Jesús xixi naa chika ko tuinxin chrinka ijni ko inda.

³⁵ Méxin, jan an rikjin xroon xixi bake é nti a, bikon xixi jaña kon en ko ndachrjan ti nduaxin xixi ja anta kaxon tsitikaonnta.

³⁶ Jaña kon en ji i xixi tson en nge e ndachro xroon chijnie ndo Dio tsikjin sen: “Tsondaki a na ninaa nte e ndo.”

³⁷ *Kaxon íjngo nichja xroon chijnie ndo Dio tsikjin na sa ó ndachro: “Xrotsje e na ndo juinchekatsingato e na chika ndatsjonxin ntakuin ndo.”

Xrabaa ndo Jesús

(Mt. 27:57-61; Mr. 15:42-47; Lc. 23:50-56)

³⁸ Tjume e ó juexin kon en kain ji i, ko ndo José, naa ndo tjajna Arimatea, juanchia ndo ngajin xi Pilato juachaxin xixi tsakinjinxin ndo ntacru cuerpoe ndo Jesús ko satsikao ndo ndo xroxrabaa ndo. Je e ndo José imao rué e ndo ndo Jesús xixi xrakon en ndo ni judío. Tjume e xi Pilato kuajon xa juachaxin ko sabikao ndo José cuerpoe ndo Jesús.

³⁹ *Kaxon ndo Nicodemo, ndo me e bikitsje e ndo Jesús naa tiie, a nchakon xroxrabaa ndo Jesús bika o ndo níite kilo xroan xrase tsintekjan xroan mirra ko xroan áloe.

⁴⁰ Jaña ndo José ko ndo Nicodemo kuayé e sen cuerpoe ndo Jesús, juinchekitsa sen ndo naa manta jine tsikaa xroan xrase xixi jaña bakitikaon ni judío nchakon tsixrabaa chujni tsiken en.

⁴¹ Ti no juankanito na ndo Jesús ntacru tjenka nti a jii naa huerto ko nti a jii naa itjaq natjúá xraxro an chujni tsixrabaa nti a.

⁴² Nti a juabaa sen ndo Jesús xixi kjín a jii itjaq* ko íse a hora xroxrangixin nchakon tjoké e ni judío.

20

*Xechón ndo Jesús**(Mt. 28:1-10; Mr. 16:1-8; Lc. 24:1-12)*

¹ Tjume e nchakon xrangixin semana xra naxixe e jan María Magdalena ikjui jan ti no tsixrabaa ndo Jesús, ko bikon jan ixi ixro tsijijeexin na itjaq* ti no tsixrabaa ndo tsijinchetengi na ixro.

² Méxin sabinga jan ikjui jan ti no jii ndo Simón Pedro ko ti jii inaa ndo tsikinche e ndo Jesús, ndo me e tsango tjue e ndo ndo Jesús, ko ndachro jan:

—Ó tsikantsje na cuerpoe Ncháina satsikikao na ndo ko nóna ina ti no tsikake e na ndo.

³ Ndo Pedro ko ndo me e kuin en sen jaña, méxin, sakjui sen ti tsixrabaa ndo Jesús.

⁴ Yui sen binga sen. Ko ndo naa ícha nteeto binga ndo ixi ndo Pedro, ko je e ndo sa ó kuiji ndo tinó tsixrabaa ndo Jesús.

⁵ Kuisée ndo tsje e ndo ngaxin in ti no tsixrabaa ndo Jesús ko bikon ndo manta tsikitsía na ndo ko kuixin a ndo nti a.

⁶ Ko tjume e kuiji ndo Simón Pedro ko kuixin in ndo ti no tsixrabaa ndo Jesús ko kaxon bikon ndo manta tsikitsía ndo,

⁷ ko bikon ndo ixi manta tsikitsía jaa ndo Jesús nango tsixratu u manta, ji a manta tjenka ti no ste manta kaxin.

⁸ Ko ndo bajikao ndo Jesús, ndo kuiji sa ó ti no tsixrabaa ndo, kaxon kuixin in ndo ko bikon ndo nge e tsikon en ko kuitikaon ndo.

⁹ Ko xrakuienxin a sen nge e ndachro xroon chijnie ndo Dio, ti xrokonda xroxechón ndo Jesús.

¹⁰ Tjume e sen tsikji tsikitsjexin ti no tsixrabaa ndo Jesús ikjan sen ndo a sen.

*Ndo Jesús konoxin ndo ngajin jan María Magdalena**(Mr. 16:9-11)*

¹¹ Ko jan María kuitu e jan ngandangi nduja ti no juabaa na ndo Jesús jiitsjanga jan. Ko jaña jiitsjanga jan, kuisée jan tsje e jan ngaxin in ti no tsixrabaa ndo,

¹² ko bikon jan yuu sen ángel jiá sen manta tjúa ste sen nunte tinó tsikake e na cuerpoe ndo Jesús ko naa ndo ángel jii ndo ti no bake e jaa ndo Jesús ko inaa ndo jii ndo ti bake e tutée ndo.

¹³ Tjume e sen ángel juanchangi sen:

—Nchri, ¿sonda tsjanga?

Ko juate e jan:

—Satsikikao na cuerpoe Nchánana, ko nóna ina no tsikake e na ndo.

¹⁴ Juexin ndachro jan ji i ko konkjan jan tsje e jan ko bikon jan ixi nti a jii ndo Jesús, ko juatsuan i jan ndo.

¹⁵ Ko ndo Jesús juanchangi e ndo jan:

—Nchri, ¿sonda tsjanga? ¿Ngisen tjée?

Ko je e jan xraxaon jan ixi ndo nichje e jan naa sen tayakon en huerto nti a, ko ndachro jan:

—Siá ja a sabiko a ndo, ndachijiana no bakée ndo ixi jan an satsiki an ndo.

¹⁶ Ko ndo Jesús nichje e ndo jan ndachro ndo:

—¡María!

Ko tsje e jan ndo, ko nichjaxin jan ngigua arameo, ndachro jan:

—¡Rabonil!

(Ji i xrondachro Maestro.)

¹⁷ Ko ndachro ndo Jesús:

—Tajandana ixi xrasatji a ti jii Ndotána. Itjia titsje é sen kichuuna ko ndache sen ixi sajiin ti jii Ndotána, ndo kaxon Ndotánta, ndo Dio na na ko kaxon ndo Dio na anta.

¹⁸ Tjume e jan María Magdalena sakjuichronga jan ngajin sen kuajikao ndo Jesús, ko ndachro jan ixi tsikikon jan Ncháina ko kaxon chronga jan ixi jaña tsindachro ndo.

*Ndo Jesús konoxin ndo ngajin sen kuakuajikao ndo**(Mt. 28:16-20; Mr. 16:14-18; Lc. 24:36-49)*

¹⁹ Tjume e kóndo nchakon xrangixin semana, sen kuajikao ndo Jesús tsixra o sen ngaxin in nchia ko jian tsikije e sen nchia ixi xrakon en sen ni judío. Ko ndo Jesús kuixin in ndo ko ngusine je e sen bake e ndo, ko nichje e ndo sen, ndachro ndo:

—¿Á jian stenta?

²⁰ Ko juexin ndachro ndo ji i, juako ndo itja ndo ko chjiyée ndo. Ko je e sen bake e sen juaxruxin ixi bikon sen Ncháina.

* 20:1 Itjaq cueva

²¹ Tjume e ndachro ndo Jesús:

—Juaxruxin stenta. Xranchi Ndotána xruan anna ndo jui i nti i, jaña jan an xruan anna.

²² Ko kuanotée ndo ngata a sen ko ndachro ndo:

—Taye énta Espíritue ndo Dio.

²³ *Siá xrotjáña anta ijje juinche e xrojan ngisen, jaña kaxon tsomé e jíee na. Ko siá xrotjáña inta ijje juinche e xrojan ngisen, tsomé a ijje chóna na.

Ndo Tomás bikon ndo ixi tsixechón Ncháina

²⁴ Tjume e ndo Tomás, naa sen teyuu sen chrikao ndo Jesús, kaxon nchekin in sen ndo xjan Kuatsi, ndo me e ko a ndo nchakon konoxin ndo Jesús.

²⁵ Méxin sen ikaxin chrikao ndo Jesús ndache sen ndo:

—Ó bikona Ncháina.

Ko ndachro ndo Tomás:

—Siá tsikon a jan an tinó tsikitu u na clavo itja ndo ko xroxruxin a dedo tjáana nti a ko ti chjiyee ndo, tsitikaon a.

²⁶ Tjume e kuatsinga ijní nchakon ko xra o kain sen íjngo ngaxin in nchia ko kaxon ndo Tomás jikao sen ndo nti a. Tsikije e sen jian nchia ko tuinxin bikon sen ndo Jesús ngusine ti ste sen ko nichja ndo ngajin sen ko ndachro ndo:

—¿Á juaxruxin stenta?

²⁷ Ko ndache ndo ndo Tomás:

—Xruxin ia dedo tjáa ti no tsixrandu u na chika clavo tjáana ko xruxin ia tjáa chiyéna. Ko jaña je a xrokuitikaon a ixi nduaxin jan an.

²⁸ Ko juate e ndo Tomás:

—ja a Ncháina ko ndo Dio na na!

²⁹ Ko ndache ndo Jesús ndo Tomás:

—Tomás bikonjana, kuitikaon. Ko ikaxin sen juaxruxin ste sen, maski bikon ana sen ko jaña titikaon sen.

Ji i chronga sonda tsikjin ndo Juan xroon ji i

³⁰ Ndo Jesús juinche e ndo itsjé ixra ijíe bikon sen chrikao ndo ko jitaxin a kain nge e me e xroon ji i.

³¹ Ko nge e jitaxin xroon ji i, tsikixintaxin ixi tsitikaonnta ixi ndo Jesús me e ndo Cristo, Chjen en ndo Dio, ixi siá tsitikaonnta ndo, xrochondanta juachaxin tsarichonnta kain nchakon.

21

Ndo Jesús konoxin ndo ngajin sen yaato bakajikao ndo

¹ Tjume e íjngo ndo Jesús konoxin ndo ngajin sen chrikao ndo ngande e ndachaon ndatin in Tiberias.

² Naakua ste sen, ndo Simón Pedro ko ndo Tomás, xi nchekin in sen xjan Kuatsi, ko ndo Natanael, xi tsiki xin tjajna Caná nunte Galilea, ko yuu chjen en ndo Zebedeo ko íjngo yuu sen bakajikao ndo Jesús.

³ *Tjume e ndachro ndo Simón Pedro:

—Satsji xrotsé kuchee.

Ko juate e sen:

—Kaxon jan anna itsjina.

Ko sakjui sen kuajin in sen naa ntábarco. Ko xro an kuchee itsé sen nchiji tiie.

⁴ Ko ó jitingasáña ko tuinxin bikon sen ndo Jesús ngande e ndachaon, ko juatsuan i sen ndo.

⁵ Ko juanchangi e ndo sen:

—Ja anta, ¿á xraxro an kuchee itsenta?

Ko juate e sen, ndachro sen:

—Xraxro an nge e.

⁶ *Ko ndo Jesús ndache ndo sen:

—Tja nganginta nocha a nango jian ntábarco ko xrotsénta ba.

Tjume e jaña juinche e sen, banka sen nocha a ko jua i kuantsjexin sen inda nocha a ixi kueya kuchee itsé sen.

⁷ Ko ndo ícha tjue e ndo Jesús ndache ndo ndo Pedro:

—¡Ncháina ji i!

Ko kuin en ndo Simón Pedro ixi Ncháina, ko kuéyá ndo mantée ndo, manta jindatexin, ixi tsikantsje ndo manta ko juingi ndo inda.

⁸ Tjume e sen kaxin bajikao ndo Jesús kuiji sen ngande e ndachaon bijikao sen ntábarco jitingakjín nocha a chónda kucheę ixi tsikjin sen xranchi naa ciento metro kjinxin ti no jii ngande e inda.

⁹ Tjume e kuiji sen ngande e inda ko xingajinxin sen ntábarco ko bikon sen xruitja tsiche xro i ko ngata a xruitja jii naa kucheę ko nango jii nutja.

¹⁰ Tjume e ndo Jesús juanchia ndo:

—Tikuunta kaxin kucheę sintenta.

¹¹ Ko ndo Simón Pedro kuajin in ndo ntábarco bingakjin ndo nocha a jitjinga itsjé kucheę, naa ciento cincuenta ko níi ba. Ko maski kueya ba tsitsé sen tsichrindaon a nocha a.

¹² Tjume e ndachro ndo Jesús:

—Xrokuuinta, sintenta.

Tjume e ninaa sen juanchangi e sen ndo ngisen je e ndo ixi ó juatsuan sen ndo.

¹³ Ko konchjiñe e ndo Jesús ko kua ndo nutja chjée ndo sen ko jaña kuajon ndo kucheę.

¹⁴ Ji i nínxin konoxin ndo Jesús ti tsixechón ndo.

Ndo Jesús nichja ndo ngajin ndo Simón Pedro

¹⁵ Juexin juine sen juanchangi e ndo Jesús ndo Simón Pedro:

—Ja a Simón, chjen en ndo Jonás, ¿á ícha tjauanna ixi sen ji i?

Ko juate e ndo Pedro:

—Jaán, Nchána, ó no anta ixi tjua anta.

Ko ndachro ndo Jesús:

—Siá nduaxin me e, tayakon én kutuchjonna.

¹⁶ Tjume e yuxin juanchangi ndo Jesús:

—Ja a Simón, chjen en ndo Jonás, ¿á tjauanna?

Ko juate e ndo Pedro:

—Nchána, ja anta no anta kain nge e, jan an ó no anta jan an tja onnta.

Ko ndachro ndo Jesús:

—Siá nduaxin me e, tayakon én kutuchjonna.

¹⁷ Tjume e nínxin juanchangi ndo Jesús:

—Ja a Simón, chjen en ndo Jonás, ¿á tjauanna?

Ko koni e aséen ndo Pedro ixi nínxin juanchangi ndo Jesús á tjaun ndo Pedro ndo Jesús ko ndachro ndo:

—Nchána, ja anta ó no anta kain nge e. Ja anta ó no anta jan an tjaunnta.

Ko ndachro ndo Jesús:

—Siá nduaxin me e, tayakon én kutuchjonna.

¹⁸ Ko naa nge e nduaxin ntatjua ixi nchakon xrachájan ja a, ja ua bakaria mantáa ko bakjia tinó tjauan. Ko nchakon tsotáchría tsinxé tjáa ko inaa ngisen sintekitsaa mantáa ko tsikaan na ti no tjaun a itsjia.

¹⁹ Ti ndachro ndo Jesús xrondachro xranchi tsenxin ndo Pedro ko ji i tachrxixin xranchi tsajon ndo juasaya ngajin ndo Dio. Ko juexin ndachro ndo ji i, íjngo ndache ndo ndo Pedro:

—Rua nana.

Nge e tson en xi ícha tjue e ndo Jesús

²⁰ *Tjume e ndo Pedro tsje e ndo tuenxin ndo ko bikon ndo ixi rué e ndo ícha tjue e ndo Jesús, ndo me e bake e tjenka ti bake e ndo Jesús nchakon juine sen ko tsjanchangí e ndo ndo Jesús ixi ngisen sinchekji ndo.

²¹ Ko ndo Pedro bikon ndo ixi jirué e ndo me e ko juanchangi e ndo ndo Jesús:

—Nchána, ndo ji i, ¿nge e tson en ndo?

²² Ko juate e ndo Jesús:

—Siá tja on xratsechón ndo ti nchakon xrokjan jan an, ja a nge e konda a. Ja a ruenana.

²³ Me e juangíxin juao sen ixi tsen a ndo me e. Ko je a ndachro ndo Jesús ixi xrokuen a ndo. Na i. Je o ndachro ndo ixi siá tjaun ndo xratsechón ndo nchakon xrokjan je e ndo, nge e kondee je e ndo Pedro.

²⁴ Ndo me e ngisen chronga ixi nduaxin kon en kain ji i, ko ikjin ndo xroon ji i. Ko ó nojna ixi nge e tsikjin ndo, me e nduaxin.

²⁵ Xrajji kueya nge e juako ndo Jesús kjin a jan an. Siá xrokjin naanaa me e, xrokuitja i nunte xasintajni xrobanga kain xroon ti xrokjin. Jaña tson en.

Ixra juinche e sen kuinche e ndo Jesús

Ndachro ndo Jesús tsji Espíritue ndo Dio

¹*Tjua anta Teófilo, xroon sa ó ikjin, nti a ikjin kain nge e juinchekuajina ndo Jesús ko ixra juinche e ndo ó sa ó

² kuijija nchakon sakjui ndo ngajni. Ko ti xrasatji a ndo kuinche e ndo sen sinche e ixra ko Espíritue ndo Dio bingijna ndo kuetuen en ndo sen ixi tsono e sen nge e ixra sinche e sen.

³ Nchakon juexin kuen en ndo Jesús, tjume e konoxin ndo ixi jichón ndo, ko yuu kán nchakon nanaó konoxin ndo ngajin sen. Itsjé nge e juako ndo ixi tsono e sen nduaxin jichón ndo ko juinchekuen en ndo sen ti tituan an ndo Dio.

⁴*Ti xra jii ndo ngajin sen chrikao ndo, je e ndo ndache ndo sen satsjixin a sen tjajna Jerusalén. Ja in ndachro ndo:

—Nti i chon émnta tsaye enta nge e tsajon Ndotána, ti nge e ntatjunta ndo sa ó.

⁵*Nduaxin ndo Juan bikitée ndo chujni ixi inda. Ko tsjé a nchakon ja anta tsaye enta Espíritue ndo Dio.

Sakjui ndo Jesús ngajni

⁶ Tjume e sen chrikao ndo Jesús, juanchangi e sen ndo:

—Ja anta Nchána, ¿á tsajonnta juachaxin jai ixi ni tjajnajina tsetuan an tjajna íjngo?

⁷ Ko juatingiexin ndo Jesús:

—Na i. Ja anta chonda inta juachaxin tsono anta ngisa tson en ji i. Je o Ndotána no e ndo ngixe e nchakon.

⁸*Ko nchakon tsji Espíritue ndo Dio tsaye enta, me e xrochondanta juachaxin tsachrjenta ko xrochronganta nge e ixra juinta a, nguixin tjajna Jerusalén, ko nunte Judea, ko nunte Samaria, ko nchijji nunte xasintajni.

⁹*Ko juexin nichja ndo Jesús ji i, xrastetsje e sen ndo, tuinxin je e ndo kuaxi bajin in ndo nui, sakjui ndo ko kuintsia ndo naa tjuj ko í bikon a sen ndo íjngo.

¹⁰ Ko xrastetsje e sen ti sakjui ndo Jesús ngajni, tuinxin bikon sen yuu xi tjenka ti no ste sen, steyá xa manta tjúa.

¹¹ Ko xi me e ndachro xa:

—Ja anta chujni nunte Galilea, ¿sonda stetsje enta ngajni? Xranchi bikonta sakjui ndo Jesús, jaña xrokjan ndo íjngo.

Ndo tsitu e ixra banche e xi Judas

¹² Tjume e kjanxin sen ijna ndatin in Olivo ko kuiji sen tjajna Jerusalén. Cha o me e kjin a xranchi naa kilómetro, xranchi jii juachaxin taji ni judío nchakon tjoké e na.

¹³*Ko kuiji sen tjajna nti a ko kuajin in sen ti jii piso noi nchia tsikjen sen ti bake e sen seno, ndo Pedro, ndo Jacobo, ndo Juan, ndo Andrés, ndo Felipe, ndo Tomás, ndo Bartolomé, ko ndo Mateo. Kaxon ndo Jacobo, ndotée ndo ndatin in Alfeo, ko ndo Simón, ndo me e ndo kuarue e ni Cananista, ko kaxon ndo Judas, ndosaué ndo Jacobo.

¹⁴ Kain sen xra o sen nti a xronichje e sen ndo Dio, ko kaxon jan María, janée ndo, ko sen kichuu ndo ko kaxin nchri.

¹⁵ Ko nchakon me e, ndo Pedro bingatjen ndo ko bake exin tutée ndo ngusine ti ste sen titikaon Nháina Jesús, je e sen xranchi naa ciento ko kán sen tsixra o nti a. Tjume e ndachro ndo:

¹⁶ —Kichuuna, xrokonda tson en xranchi nichja xroon chijnie ndo Dio ti tsinichja ndo David ó sa ó tsichronga Espíritue ndo Dio nge e sinche e xi Judas, xi bika o ni itisé ndo Jesús.

¹⁷ Je e xa kaxon kuajiku una xa ko xraje o ixra kuayé e xa.

¹⁸*Tjume e je e xa sakjui xa bike na xa naa nunte ixi tomi juacha xa ixi ti ndako a juinche e xa. Ko nti a juinxin jaa xa, me e chringa xa ko kuachrje tse e xa.

¹⁹ Jaña kono e kain ni tjajna Jerusalén, ko nunte me e kuin in ngigüe e na Acéldama, me e xrondachro naa nunte ijni.

²⁰ Ja in jitaxin naa Salmo chijnie ndo Dio:

Je o ndo a xa tsitu e,

ko xro an ngisen tsake e nti a.

Ko kaxon ndachro:

Inaa chujni tsayé e ixra kuanche e xa.

21 *Nti i ste ni kuajiku una kain nchakon ti bake e Ncháina Jesús,

22 x ranchakon bikona ndo Juan bikitée ndo ndo Jesús ko ti kuijija nchakon bikona sakjui ndo Jesús ngajní. Méxin, jai xrokonda tsjéena inaa sen tsajiku una, ixi sen me e kaxon xronichja sen ixi nduaxin xechón Ncháina Jesús.

23 Ko tjume e kuinche e sen yuu sen, ndo José, ndatin in ndo kaxon Barsabás ko kaxon Justo, ko inaa ndo ndatin in Matías.

24 Tjume e nichje e sen ndo Dio ko ndachro sen:

—Ncháina, ja anta chuxinnta aséen kain chujni. Tjako nananta ngisen kuinche enta

25 tsayé e ixrā xranchi apóstol, ixrā kuintu e xi Judas, ixi ndako a juinche e xa ko sakjui xa ti no tikinixin en xa.

26 Tjume e sondaonxin sen ixro ixi jaña tsono e sen ngixe e xi tsayé e ixrā, ko juacha ndo Matías, ko hora me e kuayé e ndo ixrā ko bajikao ndo sen tenaá kuinche e Ncháina Jesús.

2

Kuñi Espíritue ndo Dio

1 Tjume e kuñi kia Pentecostés ko kain sen titikaon ndo Jesús xra o sen, naakua no ste kain sen.

2 Ko tuinxin kuin en sen naa nge e séen ndachro kuñxin ngajní xranchi naa chrinto soji. Kuixin in chrinto nguixin ngaxin in nchia ti ste sen.

3 Ko bikon sen naa nge e xranchi nejen xro i. Ko xro i chjeya ko baketa a xro i ngujngu jaa sen.

4 Ko kain sen kuayé e sen Espíritue ndo Dio, ko tjume e kain sen kuaxi sen nichja sen inaa ngigua ixi Espíritue ndo Dio kuajon xronichja sen.

5 Ko nchakon me e tjajna Jerusalén bake e ni judío, ni titikaon ndo Dio, tsikj xñ nā nchijíi nunte xasintajni.

6 Ko kueya nā tsikin en nā ti chrinto méxin konchjiñe e nā. Ko noe a nā nge e xroxraxaon na ixi ngujngu nā kuin en nā nichja sen titikaon ndo Jesús ngujngu ngigüe e nā.

7 Méxin, xronka nā, ko xrakon nā ko tjao kichuu nā:

—¿Á je a kain ni nichja ji i, ni nunte Galilea?

8 ¿Xranchi chao tienxinna nichja nā ngujngu ngigua ina?

9 Nti i jii ni tsikj xñ tjajna Partia, Media, Elam, Mesopotamia, Judea, Capadocia, Ponto, Asia,

10 Frigia, Panfilia, Egipto ko kaxin ni nunte Africa ícha tjenka tjajna Cirene. Ko kaxon ni romano ste nā nti i. Kaxin nā judío nā xrajongíexon nā, ko ikaxin nā je o titikaon nā ndo Dio xranchi ni judío.

11 Kaxon jii ni tsikj xñ Creta, ko Arabia. Ko kainna kuin anna ngujngu ngigua ina nichja nā ixrā ijié juinche e ndo Dio.

12 Ko xronka nā, noe a nā nge e xroxraxaon nā me e juanchangi e kichuu nā:

—¿Nge e xrondachro kain ji i?

13 Ko ikaxin nā juano nā ko ndachro nā:

—Tsikuan kain ni ji i.

Ndo Pedro ndo nichja ngajin ni ste nti a

14 Tjume e je e ndo Pedro bingatjen ndo ko kao sen tenaá apóstol ko séen nichja ndo ko ndachro ndo:

—Ja anta ni judío ko ni ste tjajna Jerusalén. Kainnta stenta nti i tin ennta nge e xronichja.

15 Sen ste nti i je a tsikuan sen xranchi ndachronta, ixi jai xranduyo, nandá las nueve.

16 Ti stetikonnta me e tsichronga ndo profeta Joel:

17 Ndachro ndo Dio: Nchakon tsjexin

me e xroxruan an Espírituna tsayé e kain chujni.

Ichjan, xjan xi ko xjan nchri, xrochronga xjan chijnina.

Ko sen chajan tsikon sen ixrā ijié tsjako jan an

ko sen ó tachríi, tsoxienxin nge e xrontatjan sen.

18 Nchakon tson en kain ji i, jan an xroxruan an Espírituna tsayé e kain sen nche e xrāna, nchri ko xi,

ko je e sen xrochronga sen chijnina.

19 Ko jan an tsjáko ixrā ijié tsikonni ngajní,

ko kaxon ngata a nunte xasintajni tsjáko kaxin ixrā ijié:

ijni, xro i ko i nchi xranchi itjuj tsikon nā.

20 Chjiixro tsonaxixe e chjiixro.

Ko nchanitjao tsikonni xranchi ijni.

Jaña tson en ko tjume e tsij Ncháina.

Ji in naa nchakon tsango ijíe ko tsango chaxro.

²¹ Ko kain sen tsiye e Ncháina, sen me e tsitjáña i sen, tsechón sen kain nchakon.

²² Ja anta ni israelita, tin ennta nge e xrondachrjan. Ndo Jesús, ndo tjajna Nazaret, ndo Dio tsixrua an ndo ndo ngajinnta ko je e ndo juinche e ndo itsjé ixra ijíe bikonta, me e juakoxin ndo ixi ndo Dio tsikajon ndo juachaxin ngajin ndo. Me e jian no anta.

²³ *Maski jaña bikonta, ja anta ndakua i juinchekuunta ndo xranchi tsixraxaon ndo Dio ó sa ó. Ko ja anta kuajonnta ndo ngajin ni ña i, ko kuenitonta ndo ntacru.

²⁴ *Ko ndo Dio juinchexechón ndo ndo Jesús ko ndo Dio kuantseje ndo kain juachaxin chónnda xichononte; * í jua i tsetuan an xa ngajin ndo.

²⁵ Ko sa ó ndo rey David tsichronga ndo ixi ndo Jesús ko ndachro ndo:

Jan an xraxa on Ncháina

ko je e ndo tjenkana jii ndo.

Je e ndo jii ndo ndatsjonxin jian,

méxin, xro an nge e tsónna.

²⁶ Méxin, tsango juaxruxin bake e aséenna

ko ro a chaxro itsje,

ixi nóna jan an maski tsen enna, xro an nge e tsónna.

²⁷ Ixi nóna tsintue anta aséenna ti no ste ni tsiken en,

ko tsajon anta juachaxin ixi xrorenga ntau na ngaya tuye ixi jan an jian nta a xráanta.

²⁸ Ja anta juako nanta cha o tsechónxixini,

ko jan an juaxruxin tsake e ti ritjén ja anta.

²⁹ *Kichianna, chjánanta juachaxin xrondachrjan ixi ndo David, ndo kuachrenixinna, tsiken en ndo ko tsixrabaa ndo. Ko ti no tsixrabaa ndo xra jii nti i nchakon stena jai.

³⁰ Ko ndo David, naa ngisen tsichronga chijnie ndo Dio, ó no e ndo ixi nduaxin ndo Dio chronga ixi naa ngisen tsachrenixin ndo xrokjan ndo rey, ndo Cristo tsetuan an xranchi je e ndo baketuan an ndo.

³¹ Jaña ndo David ó bikon ndo sa ó, ko chronga ndo ixi xroxechón ndo Cristo ko ndachro ndo ixi aséen ndo Cristo tsitue a ti jii ni tsiken en ko xrorenga i ntau e ndo.

³² Méxin, ndo Dio juinchexechón ndo ndo Jesús, ko bikona kainna ko chrongana ixi nduaxin ji i.

³³ Jai ndo Dio bikao ndo ndo Jesús ko jii ndo Jesús ndatsjonxin jian ti jii je e ndo. Ko kuayé e ndo Jesús Espiritue ndo Dio, ti tsindachro ndo Dio xroxruan an ndo, me e jai xruan an ndo kuaye ena. Ko kain ji in ti bikonta ko ti kuin ennta.

³⁴ Nojna ixi ndo David jui a ndo ngajni xranchi ndo Jesús, ixi je e ndo David ndachro ndo: Ncháina† Dio ndache Ncháina Jesús:

“Take é ndatsjonxin jian ti ritjén jan an,

³⁵ tsake eja kain ni ningakon an ngangi tutáa ixi ja a tsituen en na.”

³⁶ *Méxin, kainnta ni israelita xrokono anta nduaxin ixi je e ndo Jesús, ndo juankanitonta ntacru, ndo me e ndo Dio juinchéña ndo Ncháina, ndo Cristo.

³⁷ Ko kuin en na ji i, tjume e tsango koni e aséen na. Ko juanchangi e na ndo Pedro ko sen kaxin kuinche e ndo Jesús ko ndachro na:

—Kichianna, jai, ¿inge e sinta ana?

³⁸ Tjume e juate e ndo Pedro ko ndachro ndo:

—Tintu enta ti ndako a nche enta ko titikaonnta ndo Dio. Ko tjume e tikitéxinnta nombrée ndo Jesucristo ko ndo Dio sinchemé e ndo jianta ko tsajon ndo Espiritue ndo tsaye enta.

³⁹ Ndo Dio tajon ndo Espiritue ndo tsayé e ja anta ko chjan anta ko kaxon kain ni ste ikjin. Je e ndo tsajon ndo Espiritue ndo ngajin kain sen tsinche e je e ndo.

⁴⁰ Jaña ndachro ndo Pedro ko ikaxin nge e ndachro ndo. Ko nichje e ndo na íjngo, ko ndachro ndo:

—Tintu enta ti ndako a ixi tsikaon anta xranchi tsikaon kain ni ndako a nche e jai.

⁴¹ Tjume e kain ni kuitikaon nge e ndachro ndo, bikitée na ko ni konchjiñe e nchakon me e níi mil na.

⁴² Kain sen kuitikaon sen nge e juinchekuen en sen sen apóstol tsikinche e ndo Jesús, ko juento kichuu sen, ko juinekao kichuu sen ko kaxon konchrinjin sen nutja ixi jaña xroxraxaon sen ti kuen en ndo Cristo, ko kain sen nichje e sen ndo Dio.

Xranchi kuintee sen titikaon Ncháina

2:23 Mt. 27:35; Mr. 15:24; Lc. 23:33; Jn. 19:18.

2:24 Mt. 28:5, 6; Mr. 16:6; Lc. 24:5.

* 2:24 **xichononte** muerte

† 2:34 **Ncháina** Señor *Ncháina Jesús o Ncháina Dio*

⁴³ Ko tjume e kain chujni xronka na ixi sen apóstol kuinche e ndo Jesús juinche e sen itsjé ixra ijié.

⁴⁴ *Ko tjume e kain sen titikaon ndo Jesús naakua naa nge e xraxaon sen ko kain sen tonchjeye e kichuu sen ti sine sen.

⁴⁵ Ko nchakon kuanchekji sen xrojan nge e kuachóna sen, tomi me e chjeye e ngujngu sen chóna i.

⁴⁶ Ko ngujngu nchakon xra o sen ni ngo ko ngujngu ndo a sen, chaxro nekao kichuu sen. Ko konchrinjin sen nutja ixi xraxaon sen ti kuen en ndo Jesús ko nchejié a aséen sen.

⁴⁷ Kuajon sen juasaya ngajin ndo Dio. Ko itsjé chujni tjue e na sen. Ko ngujngu nchakon Ncháina bakinche e ikaxin sen ixi itsjé sen tsitikaon sen ko xrochóna sen juachaxin tsechón sen kain nchakon.

3

Koxruen en naa xi jua i itji

¹ Naa nchakon ndo Pedro ko ndo Juan sakjui sen ti jii ni ngo. Kuiji sen ó kóndo xranchi hora ní, hora me e nichje e sen ndo Dio.

² Nti a jii naa xi jua i itji xratsijongiexión xa. Kain nchakon tikao na xa ni ngo ixi tsake e xa ngandangi nduja ni ngo ndatin in Ntáchja Chaxro. Nti a tjanchiaka a xa ngajin ni tixin in ni ngo.

³ Nchakon bikon xi ni e ixi ndo Pedro ko ndo Juan xrokuixin in sen ni ngo juanchiaka a xa ngajin sen.

⁴ Tjume e ndo Pedro ko ndo Juan tsje e sen xi me e ko ndachro ndo Pedro:

—Tikonntana.

⁵ Ko xi me e jian tsje e xa ixi xrojan nge e tsajon sen ngajin xa.

⁶ Ko ndo Pedro ndachro ndo:

—Chonda i chika plata ko oro, ko ti chonda xrotjá a. Juachaxien ndo Jesucristo, ndo tjajna Nazaret, tingatjen ko itja.

⁷ Ko ndo Pedro itsé ndo itja xa ti jian ko tjume e juinchengatjen ndo xa. Ko tuinxin konsoji tutée xa.

⁸ Ko chrinka xa bake exin tutée xa ko kuaxi xa kuaji xa. Tjume e je e sen ko je e xa kuixin in sen ngaxin in ni ngo ko je e xa jitji xa ko jichrinka xa ko tajon xa juasaya ngajin ndo Dio.

⁹ Tjume e kain ni jii tjajna nti a bikon na ixi chao itji xa ko tajon xa juasaya ngajin ndo Dio.

¹⁰ Ko xronka na ixi jaña koxruen en xa ixi kuichúxin na xa ixi xi me e bakake e xa tjanchiaka a xa tomi ngandangi nduja ni ngo ndatin in Ntáchja Chaxro.

Nichja ndo Pedro ngajin ni jii ngaxin in ndasin ndatin in Salomón

¹¹ Xi jua i bakji tintue a xa ndo Pedro ko ndo Juan. Tjume e kain ni ste nti a xronka na ikjui na sakuitsje e na ntasien ni ngo, ndasin Salomón ixi nti a ste sen ko je e xa kaxon.

¹² Ko hora bikon ndo Pedro kuiji na, je e ndo ndache ndo na:

—Ja anta ni israelita, ¿sonda xronkanta ko sonda nchexruanninta? ¿Á xraxaonnta ixi jan onna chondana ijié juachaxin o tsango titika onna ndo Dio, méxin koxruen en xi ji i?

¹³ Na i. Ndo Dio, Nchée ndo Abraham, ndo Isaac, ko ndo Jacob, tsango kuajon ndo ijié juachaxin ngajin Chjen en ndo ndatin in Jesús. Ko ja anta kuajonnta xjan ngajin xi Pilato ko je e xa tjaun xa xrokuajanda xa ndo Jesús ko ja anta chro anta.

¹⁴ *Ko ja anta xrojuanchianta xrokuajanda xa ndo tjúa aséen. Ko chro anta. Ko cháña juanchianta kuajanda xa naa xi naatónaxón chujni.

¹⁵ Ko ja anta naakónaxónnta ngisen tajon juachaxin tsechón chujni, me e ndo Jesús, ko ndo Dio juinchexechón ndo ndo. Jaña bikona jan anna ko me e ndachrjanna.

¹⁶ Ko juachaxien ndo Jesús chuntiana, me e koxruen en xi jua i bakaji, xi tikonnta ko chuxinnta. Ko je e xa nduaxin chuntia xa ko kuitikaon xa, méxin koxruen en xa. Me e stetsje enta jai.

¹⁷ Ko jai kichianna, nónana ixi nchakon ja anta ko ni tetuan an koninta ndo Jesús, noa inta nge e juinche enta.

¹⁸ Ko jaña juexin kon en ixi tsindachro ndo Dio tsinichjaxin ndo sen tsichronga chijnie ndo ixi ndo Cristo xrokonda tsen en ndo.

¹⁹ Méxin, tintu enta ti ndako a nche enta ko titikaonnta ndo Dio ko je e ndo sinchemé e ndo kain ijié chondanta ko Ncháina Jesús sinchesoji ndo asáanta.

²⁰ Ko tjume e je e ndo Dio xroxruan an ndo ndo Jesucristo, ndo tikinixin en sinchemé e jíanta.

²¹ Ko jai ndo Jesucristo xrokonda tsitu e ndo ngajní tsijija nchakon sinchekonchjian ndo Dio kain nge e xranchi tsichronga ndo jitaxin chijnie ndo ó sa ó.

²² Ó seno ndo Moisés tsindachro ndo: “Ncháina ndo Dio xroxruan an ndo naa ngisen tsachrjenixina ko ndo me e xrochronga chijnie ndo Dio xranchi jan an. Ko ja anta titikaonnta kain nge e xrondachro ndo.

²³ Ko ngisen tsitikaon a ti xronichja ndo, sen me e ítsikinixien a sen tjajna Israel.”

²⁴ Xrangixin ndo Samuel ko kain sen tsichronga chijnie ndo Dio: chronga sen kain ti jiton en jai.

²⁵ Ja anta tikinixin annta tsiton anta ti tsindachro ndo Dio tsinichjaxin ndo sen tsichronga chijnie ndo, ko kaxon tsaye enta naa chijni tjintee ti tsindachro ndo Dio ngajin sen tachri anta. Ixi tsindache ndo Abraham ja in: “Kain ni nunte xasintajni tsonchaonxin na naa ngisen tsachrjenixinnta.”

²⁶ Nchakon ndo Dio juinchexechón ndo Chjen en ndo sa ó xruan annta ndo chjen en ndo ngajinnta ja anta ni israelita ixi sintanchaonnta ndo ngujngunta ko tsintu enta ti ndako a nche enta.

4

Ndo Pedro ko ndo Juan ste sen ngajin ni tetuan an

¹ Ndo Pedro ko ndo Juan xranichje e sen ni ste nti a ko tuinxin kuji xitaana ko xi tetuan an ni ngo ko xi saduceo.

² Tsango koñaon na ixi ndo Pedro ko ndo Juan stenchekuen en sen ni tsixra o nti a xranchi xroxechón chujni tsiken en xranchi jaña xechón ndo Jesús.

³ Tjume e je e na ítsé na sen ko sabikao na sen, xrxin in na sen ndo achjiso. Nti a kuitu e sen tiie me e ixi nchakon me e ó kóndo.

⁴ Ko kueya na kuin en na chijni juako sen, ko kuitikaon na. Ko kain xi kuitikaon, na ó mil xi.

⁵ Ko ndúyaxin xra o kain ni tetuan an ni judío ko ni tjako ley ne e ndo Moisés nti a tjajna Jerusalén.

⁶ Kaxon nti a jii xi Anás, me e xitaana ícha tetuan an, ko xi Caifás, ko kaxon xi Juan, ko xi Alejandro, ko kain ni kichuu xitaana tetuan an.

⁷ Tjume e kuetuan an xa kuixrakua ndo Pedro ko ndo Juan. Ko bake e xa sen ngusine ko tjume e juanchangi e xa sen:

—¿Ngisen kuajon juachaxin o ngisen nombrée nche exinnta kain ji i?

⁸ Ko ndo Pedro tsango chóna ndo juachaxien Espiritue ndo Dio, juate e ndo ndachro ndo: —Ja anta ni tetuan an tjajna ko ja anta xi tachri tjajna Israel,

⁹ ja anta tjanchangínta xranchi koxruen en naa xi ni e ixi tjaunnta tsono anta xranchi kon en ji in.

¹⁰ Méxin, tin ennta jian nge e xrondachrjan ixi kainnta ni tjajna Israel tsono anta ixi xi jii nti i koxruen en xa ixi juachaxien ndo Jesucristo, ndo tjajna Nazaret, ndo kuenitonnta ntácrú, ko tjume e ndo Dio juinchexechón ndo ndo.

¹¹ Ja anta juinche enta xranchi ni nchekonchjian nchia kuitikaon a na ixro ko tjume e ikjan xro ícha jian ko tjintee tonsojixin nchiji nchia me e ndo Jesús me e ti ixro kuíntuenta ti juinchekonchjiannta tjatu o ko jai ikjan ndo ixro tjintee.

¹² Ixi je o ndo Jesús chóna juachaxin sinchemé e ndo ijie ko je o je e ndo tsixrua an ndo Dio ngata a xasintajni ixi ko a inaa ngisen tsitikaon na ixi tsoomé e jie na.

¹³ Ko xi tetuan an bikon xa ixi ndo Pedro ko ndo Juan nichja sen ixi nchiji aséen sen ko kono e xa ixi sen me e xranchi ngixe i inaa sen ko je a ni ícha no e xroon. Tjume e xronka xi ixi kuichúxin xa ixi sen me e tsikajikao ndo Jesús.

¹⁴ Ko xi tsikoxrue en nti a stekao sen xa. Méxin, jua i tsjankata a xa ijie ngajin sen.

¹⁵ Ko kuetuan an xa ixi ndo Pedro ko ndo Juan tsachrje sen nduja ko tjume e je o xa kuitu e xa ngaxin in nchia juintejaio kichuu xa.

¹⁶ Ko tjume e ndachro xa:

—¿Nge e sinchekuuna xi ña? Ixi kain ni tjajna Jerusalén bikon na ixi ndo Dio bingijna ndo xi ji i, me e koxruen en xi ni e ko jua i xrondachrona ixi nduaxin a.

¹⁷ Ko itjaun ana xronichja xi ji i ngajin kain na. Méxin, xrondachena xa íxronichjaxin a xa nombrée ndo Jesús.

¹⁸ Me e kuiye e xa sen íjngo ko kuetuen en xa sen ixi xronichja i sen ko ítsjako a sen ixi nombrée ndo Jesús.

¹⁹ Ko tjume e ndo Pedro ko ndo Juan juate e sen ko ndachro sen:

—Xraxaon ja anta, ¿á xrobake e ndo Dio juaxruxin siá xrokuitika onna nge e ndachro ja anta o xrokuitika onna nge e tituan an je e ndo?

²⁰ Ko jan anna jua i tsintu ana xronichjana nge e bikona ko nge e kuin anna.

²¹ Ko tjume e je e na kuyakutee na sen ko kuintu e na sen sakjui sen ixi kuitja i na xranchi chao xrobikaon sen ixi kain ni tajna nti a tajon na juasaya ngajin ndo Dio ixi ti nge e jian juinche e sen.

²² Ko xi koxruen en ixi juachaxien ndo Dio, xi me e chónða xa icha ixi yuu kán nano.

Sen titikaon ndo Jesús tjanche e sen ndo ixi xroxrakon a sen

²³ Tjume e ndo Pedro ko ndo Juan ó tsikajánda na sen, me e ikjui sen ti tsixra o kain sen chúxin sen. Ko chronga sen kain ti kuetuan an xitaana tetuan an ko sen tachríi tetuan an.

²⁴ Ko juexin kuin en sen, me e kain sen nichje e sen ndo Dio ko ndachro sen:

—Ncháina, ja anta juincheckonchjiannta ngajni ko nunte xasintajni ko ndachaon ko kain nge e jii.

²⁵ Ja anta ixi Espíritue ndo Dio nichjxinnta ngajin ndo David, ndo juinche e ixra ngajinta me e ja in ndachro ndo:

¿Sonda toña o tjakaxin kain ni tajna chuxin anta?

Xro an tjintee kain ti xraxaon na.

²⁶ Sen rey jii nunte xasintajni ko kain ni tajna

naakua xraka na ningakon en na Ncháina Dio ko ndo Cristo.

²⁷ *Nduaxin xi Herodes, ko xi Poncio Pilato, ko ni tsikjixin ikjin, ko ni israelita tsixra o tajna nti i ixi ningakon en na Chjan an ndo Jesús, ndo chónða i ijie, me e ndo kuinche enta tsoña ndo Mesías.

²⁸ Jaña juinche e na nge e ó sa ó tsindachronta ixi jaña xrokonda xrokon en.

²⁹ Ncháina, tsje enta ti juinhexronka na sen ko tingijnanta sen nche e xráanta ixi xrochronga sen chijnianta ko xroxrakon a sen.

³⁰ Ko ixi juachaxiannta sinchexrjuen en sen ni ni e ko sinche e sen ijié ixra ixi nombrée chjan anta, ndo tsango tjúa, ndo Jesús.

³¹ Ko juexin nichje e sen ndo Dio, bengi nunte ti ste sen. Ko kain sen kuayé e sen juachaxien Espíritue ndo Dio ko kuaxi sen chronga sen chijnie ndo Dio ko xrakon a sen.

Sen titikaon tonchjeye e kichuu sen ti chónða sen

³² *Kain sen kuitikaon ndo Jesús naakua nge e xraxaon sen ko kain sen tonchjeye e kichuu sen ti chónða sen ko xro an ngisen ndachro ixi je e sen tituan an sen xrojan nge e.

³³ Sen kuinche e ndo Jesús ixi juachaxien ndo Dio kuachronga sen ixi xechón Ncháina Jesús ko ndo Dio icha juinchenchaon ndo sen.

³⁴ Ko xro an sen nóa bake e ngakjen en sen ixi kain sen kuachónða jngi e ko ndo a kuanchekji sen ko me e tika o sen tomi

³⁵ ko bakajon sen ngajin sen kuinche e ndo Jesús ko je e sen bakonchjeya sen ngajin nguingu sen xrokonde e.

³⁶ Xranchi juinche e naa xi levita ndatin in José. Je e xa tsiki xin xa nunte Chipre ko sen kuinche e ndo Jesús juincheckin in sen xa Bernabé, me e xrondachro ngisen tajon juaxruxin.

³⁷ Je e ndo Bernabé juincheckji ndo naa ijngi kuachónða ndo ko bika o ndo tomi ngajin sen kuinche e ndo Jesús.

5

Ti ndako a juinche e xi Ananías ko nchri Safira

¹ Ko naa xi ndatin in Ananías, ko janchri e xa, Safira, juincheckji sen naa ijngi kuachónða xa.

² Ko xi ji i kuitu e xa tu ya tomi ko tu ya tomi bikaan xa ngajin sen kuinche e ndo Jesús xranchi xrokjui kain tomi. Ko janchri e xa no e jan kaxon.

³ Méxin, ndo Pedro ndachro ndo:

—Ananías, ¿sonda chje é juachaxin Xixron anxrée kuixin in xa ntakuan ixi xrojuincheye é Espíritue ndo Dio ko xrokuitua a tu ya tomi tsincheckjixian nunte?

⁴ ¿Á je a jngi a? Ko siá ó juincheckjia ijngi, ¿á je a tomia? ¿Sonda xraxaon juinche e ja in? Ja a juincheye é ndo Dio, je a juincheye é chujni.

⁵ Ko kuin en xi Ananías ji i, tuinxin kuitsinga xa ko ndakuen en xa. Ko kain sen kuin en ji i, tsango xronka sen.

⁶ Tjume e kaxin chajan kuintsía chán manta cuerpoe xi Ananías ko sabikao chán xa, xroxrabaa xa.

⁷ Níi hora tjume e kuixin in janchri e xi Ananías ti ste sen. Ko noe a nchra nge e kon en nti a.

⁸ Ko ndo Pedro juanchangi e ndo nchra:

—Ndachijiana, ¿á juinchekjixinta ijngi ixi ti tomi ndachronta?

Ko juatingíexin nchra:

—Jaán, jaña kochjixin ijngi.

⁹ Ko ndo Pedro ndachro ndo:

—¿Sonda juintejaonta xrojuincheye énta Espíritue ndo Dio? Nduja ste chajan bikao ndoxi a kuixrabaa ndo ko jai ja a satiko a chán tsixrabaa kaxon.

¹⁰ Ko tuinxin kue é nchri Safira nunte tjenka tutée ndo Pedro ko ndakuen en nchra. Tjume e kuixin in chajan nchia ko bikon chán nchra ndatsiken en nchra ko kuantsje chán nchra, ko bijabaa chán nchra ndatsjonxin nango ti no jixrabaa ndoxi e nchra.

¹¹ Kain sen ni ngo ko ikaxin sen kuin en sen nge e kon en, me e tsango xronka sen.

Itsje ixra ijie juinche e sen ixi juachaxien ndo Dio

¹² Tjume e sen kuinche e ndo Jesús kuinche e sen kueya ixra ijie ngajin ni ste nti a ixi juachaxien ndo Dio ko kain sen xra o sen ngaxin in ndasin ndatin in Salomón.

¹³ Ninaa na tjaun a na xrokonchijne e na tjenka sen titikaon Ncháina Jesús. Ko chujni tjanya chaxro kuanichja na ixi je e sen.

¹⁴ Ko kueya xi ko nchri kaxon kuitikaon na Ncháina Jesús.

¹⁵ Ko itsje na bakantsje na ni ni e ko bake e na ni ni e ngatja cha o, ngata a camé na ko kanie e na ixi tsatsinga ndo Pedro ko maski je o tsauen ndo tsatsinga ti ste na, tsoxrue en na.

¹⁶ Itsje ni ikaxin tjanya nti a bakij na tjanya Jerusalén bika o na ni ni e ko ni chóna espíritue xiña i ko kain na koxrue en na.

Ni toñaao barué e na sen kuitikaon ndo Jesús

¹⁷ Ko tjume e xitaana tetuan an ko xi saduceo tsango kochjuye e xa ngajin sen kuinche e ndo Jesús,

¹⁸ ko itsé xa sen xraxin in xa sen ndo achjiso.

¹⁹ Tjume e naa ndo ángel ne e Ncháina Jesús kujij tiie kuantje e ndo ntachja ndo achjiso ko kuantsje ndo sen. Ko ja in ndache ndo sen:

²⁰ —Itjinta ni ngo ko nchekuen ennta kain ni ste nti a chijni tsechónxin chujni.

²¹ Ko juexin kuin en sen ji i, ndúyaxin sakjui sen kuixin in sen ni ngo ko juinchekuen en sen ni ste nti a.

Ko xitaana tetuan an ko ni chrikao xa kueya xa ixi xroxra o ni tetuan an Israel. Ko kuetuan an na ixi tsixrakua sen ste ndo achjiso, sen kuinche e Ncháina Jesús.

²² Tjume e kujij i soldado ndo achjiso ko kuitja i xa sen ko ikjan xa

²³ ko ndachro xa:

—Juasona nti a ko bikona jije e jian ndo achjiso ko nti a ste xi jindaa ntachja. Ko kuantjan ana ndo achjiso ko kuitja ina sen jije e nti a.

²⁴ Ko kain xi tetuan an xitaana ko xi tetuen en xi policía ne e ni ngo ko ikaxin xitaana tetuan an kuin en xa ji i ko me e xraxaon xa ixi nge e ícha xrokon en.

²⁵ Ko tuinxin kujij naa ngisen ndachro:

—Ni xraxin innta ndo achjiso ó ste na ngaxin in ni ngo, nti a stenchekuen en na chujni.

²⁶ Ko tjume e xi tetuen en xi policía bikao xa xi policié xa ko jian bika o xa sen ixi xronka xa ba ni tjanya tsaxi na xa ixro.

²⁷ Ko hora bika o xa sen, bake e xa sen ngajinxin* xi tetuan an, ko xitaana tetuan an ndachro xa:

²⁸ *—Jan ana kuajon ana juachaxin ixi tsjakonta nombrée xi Jesús ko ja anta kuitikaon anta ko nchijij tjanya Jerusalén juako enta na ko tjaunnta tjankata antana ijie ixi jan ana kon ina xi me e.

²⁹ Tjume e ndo Pedro ko kaxin sen kuinche e ndo Jesús ndachro sen:

—Jan ana xrokonda tsitika onna ndo Dio sa ó ko tjume e tsitika onna chujni.

³⁰ Ndo Dio, tsikitikaon sen kuachrjenixinna, ndo Dio me e juinchexchón ndo Jesús, ndo kuenitonta ntacru.

³¹ Ko jai bake e ndo Dio ndo Jesús ngajni ndatsjonxin jian ti jii je e ndo ko kuajon ndo juachaxin ixi je e ndo tsituan an ndo ko tsantsje e ndo na ijie ixi ni tjanya Israel xrokjan na xrokuitikaon na ndo Dio, ko me e xrokuitjaña ijie chóna na.

³² Ko kaxon jan ana nichjana kain nge e bikona ixi juachaxien Espíritue ndo Dio, Espíritue me e tajon ndo Dio tsayé e kain sen nduaxin tsitikaon ndo.

* 5:27 ngajinxin delante de 5:28 Mt. 27:25.

³³ Ko xi tetuan an kuin en xa kain ji i ko tjume e ícha koña xa ko tjaun xa xrokóña xa sen.

³⁴ Ko tjume e naa xi fariseo, xi me e kaxon tituan an xa, ndatin in xa Gamaliel. Je e xa naa xi maestro juincheken en xa ley kain ni tjajna nti a ko ni tjajna chónde e na xa juasaya. Bingatjen xa ko ndache xa sen kuinche e Ncháina ixi tsachrje sen nduja naa nchion.

³⁵ Tjume e nichje e xa kain xi tetuan an ko ndachro xa:

—Ja anta ni israelita, xraxaonnta nge e sinchekuunta sen ji i.

³⁶ Xraxaonnta ixi ó sa ó bake e naa xi ndatin in Teudas ko bandachro xa ixi tsango tituan an xa. Ko noó ciento na barué e na xa. Tjume e íkaxin chujni kóña na xa ko kain ni barué e xa chjeke e na ko kuitjáña na ko tjume e ndajuexin ixra juinche e xa.

³⁷ Tjume e nchakon kueki na chujni tjajna, kuji inaa xi ndatin in Judas, naa xi tjajna Galilea, ko itsjé na rué e na xa. Ko tjume e kaxon kóña na xa ko kain ni barué e xa juexin na.

³⁸ Méxin, tintu enta sen ji i ko tingakuen anta sen. Siá jinche e sen ixra ne e chujni, ixra ji i tsjexin xra.

³⁹ Ko siá nduaxin nchekuen en sen chujni juachaxien ndo Dio, ja anta jua i tsingakon ennta sen. Méxin, tintu enta sen, siá na i, ja anta ritetoku unta ndo Dio.

⁴⁰ Tjume e kain xi tituan an kuitikaon xa ko kuiye e xa sen tsikinche e ndo Jesús ko kóña na sen ko kuetuan an xa ngajin sen ixi íxronichja i sen ixi nombrée ndo Jesús ko tjume e kuajanda xa sen, satsji sen.

⁴¹ Tjume e sen kuinche e ndo Jesús kuachrjexin sen ti ste xi tituan an, ko maski jaña kon en sen, bake e sen juaxruxin ixi ndo Dio kuajon ndo juachaxin tangi kon en sen kondee nombrée ndo Jesús.

⁴² Ko kuintue a sen ti tjako sen chijnie ndo Jesucristo kain nchakon ngaxin in ni ngo ko ngujngu ndo a chujni.

6

Juée sen yaato ni tsingijna ixra

¹ Nchakon me e ícha konkueya sen titikaon Ncháina Jesús. Tjume e sen nichja ngigua griego bajakaxin sen ngajin sen nichja ngigua hebreo. Ndachro sen ixi nchri ka an tajnéé sen griego tayé a nchra itsjé nge e tonchjeya sen sine nchra ngujngu nchakon.

² Tjume e sen teyuu kuinche e ndo Jesús kuiye e sen kain sen titikaon ndo ko ndachro sen:

—Jajna jua i tsintu ena ti nchekuen enna chujni chijnie ndo Dio ko itsjina tsonchjeyana nge e sine nchri ka an.

³ Méxin, ja anta kichianna tinche enta yaato xi ste ngakjen ennta, sen jian chuxinnta ko sen no e ko sen ícha chónda Espíritue ndo Dio, sen me e xrochje énta ixra ji i.

⁴ Ko jan anna xronichja ana ndo Dio ko tsjakona chijnie ndo.

⁵ Kain sen kuin en me e ko naakua naa nge e xraxaon sen. Ko kuinche e sen ndo Esteban, ndo tsango chuntia Ncháina ko ícha chónda ndo Espíritue ndo Dio, ko kaxon ndo Felipe, ndo Próculo, ndo Nicanor, ndo Timón, ndo Parmenas ko ndo Nicolás. Je e ndo me e ndo tjajna Antioquia ko ó sa ó tsikitikaon ndo xranchi ni judío.

⁶ Ko juexin kuinche e sen sen sinche e xra me e, bika o kichuu sen ti ste sen tsikinche e Ncháina Jesús. Ko je e sen nichje e sen ndo Dio ko bake e itja sen ngata a ngujngu sen kuayé e xra me e.

⁷ Chijnie ndo Dio tsango binga nunte nti a ko kueya na kuitikaon na Ncháina tjajna Jerusalén. Kaxon itsjé xitaana judío kuitikaon xa Ncháina.

Itsé na ndo Esteban

⁸ Ndo Esteban, ndo kuachónda juachaxin ne e ndo Dio, kuanche e ndo itsjé ixra ijié ngajin na.

⁹ Tjume e kaxin ni tsiki xin ni ngo judío, ni sa ó bake e esclavo, ni me e tsiki xin na tjajna Cirene, ko Alejandría, ko Cilicia, ko nunte Asia, ni me e juakaxin na ngajin ndo Esteban.

¹⁰ Ko jua i juacha na ixi Espíritue ndo Dio kuanichjexin ndo Esteban.

¹¹ Tjume e je e na juenge e na na ikaxin na ixi xrondachro na kuin en na nichjangí e ndo Esteban ndo Moisés ko ndo Dio.

¹² Me e tsango koña kain ni tjajna ko xi tetuan an ni ngo ko xi tjako ley. Tjume e itsé na ndo Esteban sabikao na ndo ngajin ni tetuan an.

¹³ Kaxon juée na ni ncheya ixi ndachro na ndako a juako ndo Esteban ko ndachro na:

—Xi ji i tsango nichjangí e xa ningoina ko ley kuetuan an ndo Moisés.

¹⁴ Kuin anna chronga xa ixi xi Jesús, xi tjajna Nazaret, sinchetjáña xa ningoina nti i ko tsindoxin xa nge e titikaonna ti tsinichja ndo Moisés.

¹⁵ Tjume e xi tetuan an ko kain ni ste nti a stetsje e nã ndo Esteban ko bikon nã ixi ikon ndo Esteban ikjan xranchi ikon naa ndo ángel.

7

Ti juatingéxin ndo Esteban

¹ Tjume e xitaana tetuan an juanchangi e xa ndo Esteban ko ndachro xa:

—¿Á nduaxin kain ti ndachro nã ixi ja a?

² Tjume e je e ndo juate e ndo ko ndachro ndo:

—Kichianna xrottajna Israel ko sen tachrii tin ennta nge e xrondachrjan. Ndo Dio titika onna chónnda juachaxin, ndo me e juako ndo juachaxien ndo ngajin ndo Abraham, ndo kuachrjenixinna nchakon bake e ndo tjanya Mesopotamia, xrasatji a ndo nunte Harán.

³ Ndo Dio ndache ndo ndo Abraham: “Tintu é tjanáa ko kain sen ndúia ko satjia naa nunte tsjako a.”

⁴ Tjume e ndo Abraham kuachrjexin ndo nunte Caldea ko sakjui ndo ko bake e ndo nunte Harán. Ko ó juexin kuen en ndotée ndo, tjume e ndo Dio bikao ndo ndo Abraham ti no stenta jai.

⁵ Ko ndo Abraham kuayé a ndo nitu o nunte ti no tsake e tutée ndo. Tjume e chronga ndo Dio ixi nchakon tsen en ndo Abraham, nduaxin sen tsachrjenixin ndo tsayé e sen nunte ji i. Maski xrachónnda i ndo ichjan, jaña ndachro ndo Dio.

⁶ Kaxon tsindachro ndo Dio ixi sen tsachrjenixin ndo Abraham, sen me e tseta a sen jée nunte, ko sinche exin sen xréé na, nti a chjinga sinchekao nã sen ko xroxenge a sen nã ko nti a tsintee sen noó ciento nano.

⁷ Kaxon ndachro ndo Dio: “Tjume e jan an sintañã ijié ngajin ni juincheni e chjan an ti no juinchine e nã xjan xra. Ko tjume e sintakjan chjan an ko xrochjiana xjan juasaya nti i.”

⁸ Tjume e ndo Dio tsijao ndo ndo Abraham ixi kain xjan xi tsachrjenixin ndo tsaa xjan chji e xjan ne e sen israelita. Ko jaña nchakon jongí e chjen en ndo Abraham, xjan sa ó, xjan Isaac, ndo Abraham chjée ndo xjan chji e xjan nchakon kuitja xjan ijní nchakon. Kaxon jaña juinche e ndo Isaac nchakon kuichónnda chjen en ndo, xjan Jacob, ko tjume e ndo Jacob jaña juinche e ndo ngajin ti teyuu chjen en ndo. Sen me e kóña ndotée ti teyuu tjanya Israel.

⁹ Ko chjen en ndo Jacob, sen kuachrjenixinna ó sa ó, sen me e kochjio sen ngajin xjan kichuu sen xjan José, ko juinчекji sen xjan ngajin kaxin xi, ko sabikao nã xjan tjanya Egipto, ko ndo Dio bingjna ndo xjan

¹⁰ ko kuantsje ndo ti tangi bake e ndo. Ko ndo Dio kuajon juachaxin ixi tsango kono e ndo kain nge e. Me e bikon xi Faraón, rey tjanya Egipto, ixra jian juinche e ndo José, ko kuajon xa juachaxin ixi tsetuan an ndo José tjanya Egipto ko ndo a xa.

¹¹ Tjume e kuji jinta ngata a tjanya Egipto ko nunte Canaán ko tangi kuintee nã ko sen tsikachrjenixinna chónnda i sen nge e sine sen.

¹² Ko tsikin en ndo Jacob ixi tjanya Egipto jitochji noa trigo ko kuetuen en ndo chjen en ndo ixi tsintekji xjan nti a tse na xjan noa, ko je e xjan me e sen tsikachrjenixinna. Ji i sa ó ikjui xjan nti a.

¹³ Tjume e yuxin ikjan sen nti a ko ndo José juincheno e ndo sen ixi je e ndo ndo kichuu sen. Ko juako e ndo José xi Faraón kain ndo saoe ndo.

¹⁴ Tjume e kuetuan an ndo José ixi tsjirué e sen ndotée ndo, ndo Jacob, ko kain sen kichuu ndo, xranchi ní ikán ko tena ó sen.

¹⁵ Jaña kon en ko ndo Jacob, sakjui ndo bake e ndo tjanya Egipto ko tjume e nti a kuenxin ndo. Ko kaxon sen tsikachrjenixinna nti a kuenxin sen.

¹⁶ Ko tjume e kuantsjengí sen nte e ndo Jacob ko sabikao sen nte e ndo nunte Siquem, ko nti a juabaa sen ntaq ti naa nunte tsike na ndo Abraham, tsijinчекji chjen en xi Hamor tjanya Siquem.

¹⁷ Tjume e kuji nchakon tson en nge e tsindachro ndo Dio tsijao ndo ndo Abraham, ko sen Israel tsango konkueya sen tjanya Egipto.

¹⁸ Tjume e tuinxin inaa xi rey baketuan an tjanya Egipto kuachúxin a xa ndo José.

¹⁹ Ko xi rey me e juincheye e xa sen tjanajna ko chinga juinчекao xa sen. Kuetuan an xa ixi chjen en sen xjan xi nandá tsjongí e, tsintu e sen xjan ixi tsinteken en xjan.

²⁰ Ko tjume e nchakon tsijongí e ndo Moisés tsango bake e juaxruxin ndo Dio ixi xjan me e. Ko ndotée xjan ko janée xjan kuachónnda sen xjan ndo a sen ní nchanitjao.

²¹ Tjume e jua i tsemá sen xjan ícha, me e bijánka sen xjan. Ko nchrichje en xi rey tjanya Egipto kuitja nchra xjan ko sabikao nchra xjan ko juinчекangi nchra xjan xranchi chjen en nchra.

²² Ko tjume e ndo Moisés kuangi ndo kain nge e no e ni Egipto ko tsango chónnda ndo juachaxin ti nge e ndachro ndo ko nge e kuanche e ndo.

²³ Ko nchakon kuichónnda ndo Moisés yuu ikán nano xraxaon ndo tsitsje e ndo ni israelita, ni kichuu ndo.

²⁴ Nti a bikon ndo ixi naa xi tjanya Egipto jitoña xa naa ni kichuu ndo. Me e bingijna ndo ni kichuu ndo ko naakóñaxón ndo xi Egipto.

²⁵ Xraxaon ndo ixi ni kichuu ndo, ni israelita, xrokono e na ixi ndo Dio tsixrua an ndo je e ndo tsingijna ndo na. Ko je e na juatsuan i na ndo.

²⁶ Tjume e inaa nchakon ndo Moisés bikon ndo ixi yuu ni israelita steteto na. Ko tjaun ndo xrojuike e ndo ixi íxrokueto a na. Ko ndachro ndo: “Ja anta kichuunta, ¿sonda stetetonta?”

²⁷ Tjume e xi chónnda ijie koña xa ko kuncheka xa ndo Moisés. Ko ndachro xa: “¿Ngisen kuajon juachaxin ixi ja a tsituannana ko sinchéña ijie ngajin na?”

²⁸ ¿Á tjaun tson iana xranchi naakóñaxuan xi Egipto najna?”

²⁹ Ko kuin en ndo Moisés ji i ko sabinga ndo tjanya Madián ko nti a bake e ndo xranchi naa ni tsiki xin jee nunte. Ko tjume e nti a kute e ndo ko kuachónnda ndo yuu xjan xi.

³⁰ Tjume e kuatsinga yuu kán nano ko tjenka jna ndatin in Sinaí bikon ndo naa ndo ángel tjenka naa ntaq yaa xro i.

³¹ Ko ndo Moisés xronka ndo ixi jaña bikon ndo ko konchjiñe e ndo ixi xrotsje e ndo ti xro i ko kuin en ndo tee Ncháina Dio ndachro:

³² “Jan an ndo Dio titikaon sen tsikachrjenixin ndo Abraham, ko ndo Isaac, ko ndo Jacob.” Ko ndo Moisés kuaxi xranga ndo ko xronka ndo ko tjaun a ndo xrotsje e ndo.

³³ Ko ndachro Ncháina: “Tantsje kateá ixi nunte ritingatjanga, nunte tjúa.

³⁴ Jan an bikon ixi ni tjanána tsango tangi ste na tjanya Egipto ko ó kuin an ixi teya na. Ko jai jui i ixi tsingijna na. Méxin, xroxruan an ja a itsjia tjanya Egipto.”

³⁵ “Ko ni israelita juanoa na ndo Moisés ko tsindachro na: “¿Ngisen tjaa juachaxin ixi ja a tsituannana ko sinchéñanana ijie?” Ko ndo Dio xruan an ndo ndo Moisés ixi tsetuan an ndo ko tsingijna ndo ni israelita ko ixi juachaxien ndo ángel bikon ndo ngaka a ntaq yaa xro i.

³⁶ Ndo Moisés kuantsjexin ndo ni tsikachrjenixinna tjanya Egipto. Tsango itsje ixra ijie juinche e ndo ko itsje e juakoxin ndo tjanya Egipto, ko ndachaon tin in Ndachaon Játse, ko no ntajie kuaji na yuu kán nano.

³⁷ Je e ndo Moisés ndache ndo ni israelita: “Ndo Dio xroxruan an naa ngisen xronichja chijnie ndo xranchi xruan anna ndo jan an ko ndo me e tsachrjenixin ndo ni kichuunta. Titikaonnta ndo.”

³⁸ Ndo Moisés bake e ndo ngajin ni israelita nchakon bake e na ntajie. Ko juao ndo ndo ángel ne e ndo Dio ijna Sinaí ko ni kuachrjenixinna kuayé e na chijni tajon juachaxin tsechón chujni, ko chijni me e kuaye ena jai.

³⁹ Tjume e ni kuachrjenixinna kuitikaon a na ko juanoa na ndo Moisés ko tjaun na lngo xrokjan na tjanya Egipto.

⁴⁰ Ko ndache na ndo Aarón: “Tja onna xrochondana naa dio tsitaonana nti a ixi inona ina nge e kon en ndo Moisés, ndo bingijna kuachrjenixinna tjanya Egipto.”

⁴¹ Ko juinchéña na naa kuxintachjan ko naakóñaxón na iko kuajon na kuayé e kuxintachjan me e, ko tsango bake e na juaxruxin ixi bikon na nge e tsikóñaxin itja chujni.

⁴² Tjume e ndo Dio kuintu e ndo na ixi tsitikaon na nchanotsé jii ngajni.* Ji i tsikjin naa ngisen kuachronga chijnie ndo Dio ko ndachro ja in:

Ja anta ni Israel, ¿á naakóñaxónnta iko xrokuaya a jan an ti yuu kán nano bake enta ntajie?

⁴³ Na i, ja anta biku unta iko me e ti jii ningue xi dio Moloc

ko kaxon biku unta nchanotsé ne e xi dio Renfán.

Ja anta juinchekonchjiannta kain ji i ixi xrochje énta juasaya xranchi xrokjui ndo dio na anta.

Méxin, jan an tsantsjexinnta tjanána

ko xroxruan anna tjanya Babilonia ko ícha nta a.

⁴⁴ Xrabake e ni kuachrjenixinna ntajie, nti a chónnda na naa ni ngo tsikonchjianxin manta ti no jii ley tsiketuan an ndo Dio. Ji i juinchéña na xranchi tsiketuen en ndo Dio ndo Moisés sinchéña ndo xranchi tsikikon ndo.

⁴⁵ Tjume e ni tsikachrjenixinna kuayé e na ni ngo manta kuitu e na. Tjume e ni chrikao ndo Josué bikao na ni ngo me e nchakon juacha na kuayé e na nunte e ikaxin tjanya, ni me e kuantsjexin ndo Dio. Jaña kon en kuijija nchakon kuaxi kuetuan an ndo David.

⁴⁶ Tsango juinchenchaon ndo Dio ndo rey David ko ndo David tjaun ndo sinchekonchjian ndo naa ningue ndo Dio, ndo tsikitikaon ndo Jacob.

⁴⁷ Ko je e ndo juinchekonchjian i ndo ni ngo. Ndo Salomón, chjen en ndo David, juinchekonchjian ni ngo me e.

* 7:42 ngajni cielo

⁴⁸ Ko ndo Dio jii ngajni ji a ndo ngaxin in naa ni ngo tsikonchjianxin itja chujni. Ndachro naa xi nichja chijnie ndo Dio:

⁴⁹ Jan an ndo Dio ngajni nti a tetuanxin ko nunte xasintajni nti a jita a tutéena.

¿Ngixe e nchia sinchekonchjiananta?,
o, ¿ti no tsake e tsjokéena?

⁵⁰ ¿Á je a tjáana juintañaxin kain nge e?

⁵¹ 'Ko ja anta icha asáanta ko titikaon anta. Ja anta tin ennta ko nche enta xranchi ni chúxin a ndo Dio. Kain nchakon tetoku unta Espíritue ndo Dio. Ja anta nche enta xranchi ni tsikachrjenixinnta ó sa ó.

⁵² Ni tsikachrjenixinnta chinga juinchekao na sen chronga chijnie ndo Dio. Ko naakónaxón na sen kuachronga ixi tsji ngisen xrochóna i ijie. Ko ó kuji ndo me e ko ja anta juinchekjinta ndo ko tjume e naakónaxón na ndo.

⁵³ Ja anta kuaye enta ley kuetuan an ndo Dio, nge e chronga ndo ángel, ko ja anta kuitikaon anta.

Ndakuen en ndo Esteban

⁵⁴ Ko hora kuin en na nge e ndachro ndo Esteban, tsango koñaao na, ncheketo neno na ixi koñaao e na ndo.

⁵⁵ Ko ndo Esteban ícha jichóna ndo juachaxin Espíritue ndo Dio ko tsje e ndo ngajni ko bikon ndo juachaxien ndo Dio ko kaxon bikon ndo ndo Jesús siin ndo ndatsjonxin jian ti jii ndo Dio.

⁵⁶ Ko ndachro ndo Esteban:

—Bikon xitje e ngajni ko nti a jii Chjen en ndo Dio, xjan jongí e xranchi chujni, ndatsjonxin jian ti jii ndo Dio.

⁵⁷ Ko je e na bije e ndatsjon na ko séen koyaku e na ndo,

⁵⁸ ko sabikao na ndo ngande e tjajna ko ixro kónaxin na ndo, ko ni tjangi e ndo Esteban kuantsje na ti jitsáa na ko bake e na tuté naa chajan ndatin in Saulo ixi xrotsje e chán manta.

⁵⁹ Ko je e na yaxin na ixro ndo Esteban ko je e ndo tinóatée ndo ngajin Ncháina Jesús ko ja in ndachro ndo:

—Ncháina Jesús taye énta aséenna.

⁶⁰ Ko bake exin ntatuchi in ndo ko séen nichja ndo:

—Ncháina Jesús, ja anta tjankata inta ijie ngajin ni stetóñana.

Jaña ichro ndo ko ndakuen en ndo.

8

Ndo Saulo tjaun ndo tsóña ndo sen titikaon ndo Jesús

¹ Ndo Saulo naxraje o xraxaon ndo xranchi ni kóna ndo Esteban.

Ko nchakon me e juangíxin na tóna na sen titikaon ndo Jesús tjajna Jerusalén ko kain sen titikaon ndo Cristo kuaxi chjeke e sen sakjui sen nchijí nunte Judea ko nunte Samaria. Ko je o sen apóstol tsikinche e ndo Jesús kuitu e sen Jerusalén.

² Kaxin sen tsango titikaon ndo Dio juabaa sen ndo Esteban ko tsjangaxin sen ndo.

³ *Ko xi Saulo ningakon en xa sen titikaon ndo Cristo. Ko kuaxi xa kuixin in xa ngujngu ndo a sen ko itsé xa sen xi ko sen nchri ko bingakjin xa sen ko xrxin in xa sen ndo achjiso.

Juako sen chijnie ndo Cristo nunte Samaria

⁴ Ko sen sajuixin tjajna Jerusalén stetjako sen chijnie ndo Cristo nchijí ti no kuintekji sen.

⁵ Naa ndo ndatin in Felipe sakjui ndo naa tjajna nunte Samaria ko kuaxi ndo chronga ndo chijnie ndo Cristo.

⁶ Ko tsango tsjé na xra o nti a ko kuin en na nge e ndachro ndo Felipe ixi ó bikon na ixra ijie juako ndo.

⁷ Ko itsjé ni chóna espíritue Xixron anxrée koxruen en na ko espíritu me e kuyako kuachrjexin je e chujni me e. Kueya ni jua i tingatjen kuaxi na itji na ko ni ntarengo chao itji na kaxon.

⁸ Ko kain ni tjajna ijie tsango juaxruxin bake e na.

⁹ Tjajna me e bake e naa xi ndatin in Simón, xi me e tuso xa ko bancheye e xa ni nunte Samaria ko je e xa ndachro xa tsango tetuan an xa.

¹⁰ Kain na jian stetin en na, xjan chínchín ko ni tachrí ko ndachro na:

—Xi ji i tsango chóna xa juachaxien ndo Dio.

¹¹ Kain na bakitikaon na xa ixi ti ixra ijie banche e xa me e juincheye e xa na itsjé nano.

¹² Ko nchakon kuitikaon na chijni juako ndo Felipe kondee juachaxien ndo Dio ko ndo Jesucristo, tjume e ni xi ko ni nchri bikitée na.

¹³ Ko kaxon xi Simón, kuitikaon xa ko bikitée xa ko juangíxin xa rué e xa ndo Felipe ko tsango kuitekaon xa ixi bikon xa ixra ijié juako ndo Felipe.

¹⁴ Tjume e sen apóstol, sen tsikitu e tjajna Jerusalén, kuin en sen ixi itsjé ni nunte Samaria ó kuitikaon na chijnie ndo Dio. Ko tjume e kuetuen en sen ndo Pedro ko ndo Juan satsji sen nti a.

¹⁵ Ko nchakon kuiji sen juanche e sen ndo Dio ixi ni titikaon ndo Cristo nti a xrokuayé e na Espíritue ndo Dio

¹⁶ ixi xratayé a na Espíritue ndo. Je o tsikikitexin na nombrée Ncháina Jesús.

¹⁷ Tjume e ndo Pedro ko ndo Juan bake e itja sen ngata a jaa na ko kuayé e na Espíritue ndo Dio.

¹⁸ Ko xi Simón bikon xa ixi sen apóstol bake e itja sen ngata a jaa ni tsikitikaon ko kuayé e na Espíritue ndo Dio, ko tjume e xi Simón tjau na tsajon xa tomi ngajin sen apóstol

¹⁹ ko ndachro xa:

—Chjánanta juachaxin ixi kaxon jan an tsakée tjána ngata a jaa chujni ko tsayé e na Espíritue ndo Dio.

²⁰ Ko ndachro ndo Pedro:

—Ja a ko tomia xroche ti xro i tanga i ixi xraxaoan tse na juachaxien ndo Dio.

²¹ Ja a jua i sinche e ixra ji i ixi ndo Dio no e ndo ixi ja a tjúa i asáan.

²² Ko tintu é ti ndako a nche e ko tinóatáa ngajin ndo Dio ixi sinchemé e ndo ijié chonda.

²³ Ó bikona ixi tsango chjuye e asáan ko kueya ijié chonda.

²⁴ Ko tjume e xi Simón juate e xa ndachro xa:

—Tjanche enta Ncháina Jesús ixi ti ndachronta tsoen a ji in ngajin jan an.

²⁵ Tjume e juexin chronga sen apóstol chijnie ndo Jesús, sakjui sen itsjé tjajna tikinixin en nunte Samaria ko juinchekuen en sen na chijni tajon juachaxin tsechón aséen chujni. Ko tjume e ikjan sen tjajna Jerusalén.

Ndo Felipe ko xi tsiki xin tjajna Etiopía

²⁶ Tjume e naa ndo ángel ne e Ncháina Dio ndache ndo Felipe:

—Tingatjen satjia no níjin, ti jii cha o xingajinxin chujni tjajna Jerusalén ti tjixin ni tjajna Gaza.

Cha o ji i tatsinga no ntajie.

²⁷ Ko ndo Felipe bingatjen ndo ko sakjui ndo no cha o me e. Nti a kuetan ndo naa xi tjajna Etiopía. Je e xa naa xi eunuco ko xi me e tja o xa tomie jan Candace, naa jan reina tetuen en tjajna Etiopía. Je e xa tsikji xa tjajna Jerusalén, nti a kuajon xa juasaya ngajin ndo Dio.

²⁸ Tjume e je e xa kjanxin xa tjajna Jerusalén ko satsji xa tsajné xa ko je e xa jiyá xa naa carreta me e jinchekuanxin xa naa xroon tsikjin ndo profeta Isaías, ndo kuachronga chijnie ndo Dio ó sa ó.

²⁹ Ko Espíritue ndo Dio kuetuen en ndo Felipe:

—Itjia tonchjiñe e tjenka carreta me e.

³⁰ Ko konchjiñe e ndo Felipe ti jii carreta, ko kuin en ndo ixi xi me e jinchekuanxin xa xroon tsikjin ndo Isaías. Ko juanchangi e ndo xa:

—¿Á tienxian nge e rinchekuanxian?

³¹ Tjume e juate e xa ko ndachro xa:

—¿Xranchi tsianxin siá xro an ngisen tingijnana tsianxin nge e jichro xroon ji i?

Ko juanche e xa ndo Felipe tsajin in ndo carreta tsake e ndo tjenka xa.

³² Ko xroon chijnie ndo Dio jinchekuanxin xa, ja in ndachro:

Sabikao na ndo xranchi naa kutuchjon tsóña na.

Xranchi naa kutuchjon tenko ba nchakon kjin en na ba,

jaña je e ndo kaxon xro an nge e ndachro ndo

ko xro an nge e nichja ndo.

³³ Juanoa na ndo ko juincheñe a na ndo ijié.

Ko sen kuachrjenixin ndo, ¿ngisen tseki ji i?,

ixi je e ndo kuen en ndo ngata a nunte nti i.

³⁴ Tjume e xi eunuco juanchangi e xa ndo Felipe ko ndachro xa:

—Ixudio ndachijiana ngisen kon en kain ji in. ¿Á ndo tsikjin xroon ji in o á inaa ngisen?

³⁵ Tjume e ndo Felipe kuaxi ndo chronga ndo ti no jinchekuanxin xa ko juako e ndo xa chijnie ndo Jesús.

³⁶ Ko stetatsinga sen ti no jii inda, me e ndachro xi eunuco:

—Nti i jii inda. ¿Á jua i tsikitéexinna nti i?

³⁷ Ko ndachro ndo Felipe:

—Siá nduaxin titikáon ngaya asáan, chao tsikitée.

Ko je e xa juate e xa:

—Titika on ixi ndo Jesucristo, Chjen en ndo Dio.

³⁸ Ko kuetuan an xi me e tsíxin carreta ko kayui sen xingajin sen ti jii inda ko ndo Felipe bikitée ndo xa.

³⁹ Tjume e juexin kuachrxexin sen inda, Espíritue ndo Dio sabikao ndo Felipe íjngo. Ko xi bikitée, i bikon a xa ndo Felipe. Ko tsango juaxruxin kua xa chaoé xa.

⁴⁰ Ko ndo Felipe konoxin ndo tjajna Azoto ko bakatsinga ndo ngujngu tjajna ko kuachronga ndo chijnie Ncháina Jesús, jaña juinche e ndo ko kuiji ndo tjajna Cesarea.

9

Ndo Saulo kuitekaon ndo ndo Jesús

(Hch. 22:6-16; 26:12-18)

¹ Xi Saulo tsango ningakon en xa sen titikaon Ncháina Jesús ko tjaun xa naatsóñaxón xa sen. Méxin, sakjui xa bijée xa xitaana tetuan an

² ko juanchia xa naa xroon chóna juachaxin satsji xa ni ngo tjajna Damasco tsjée xa sen titikaon chijnie ndo Jesús ixi tsikao xa sen nchri ko sen xi tjajna Jerusalén xroxruxin in xa sen ndo achjiso.

³ Ko yaa xa cha o ko ó xrokuiji xa tjajna Damasco, tuinxin kuuí naa xro i kuixin ngajní bingasáña ngandajin xa.

⁴ Ko xi Saulo kuitsinga xa nunte, ko kuin en xa nichja naa ngisen ko ndachro:

—Saulo, Saulo, ¿sonda ningakonnana ko tengiana?

⁵ Ko tjume e xi Saulo juanchangi xa:

—¿Ngisen ja anta?

Ko tée sen nichja, ndachro:

—Jan an ndo Jesús, ndo tsango ningakon én.

⁶ Je e xa xranga xa ko xronka xa, ko ja in ndachro xa:

—Ja anta, ¿nge e tjaunnta sinta a?

Ko Ncháina Jesús ndachro ndo:

—Tingatjén, tixin ia tjajna Damasco, ko nti a tsetuan an nge e sinche e.

⁷ Ko tjume e ni bijikao xi Saulo tsango xronka na ixi kuin en na tée naa ngisen nichja ko xro an ngisen bikon na.

⁸ Ko bingatjen xi Saulo ko kuantje e ikon xa ko xro an nge e bikon xa. Ko ni tikao xa ngatsé e na xa ko sabikao na xa tjajna Damasco.

⁹ Ko nti a bake e xa ní nchakon, bikon a xa ko juine a xa ko xro an nge e kui i xa.

¹⁰ Ko tjajna Damasco bake e naa ndo titikaon Ncháina Jesús ndatin in Ananías, ko juachaxin espíritue ndo Dio tsikikonxin ndo ndo Jesús ja in kuituan an ndo Jesús ngajin ndo:

—Ananías.

Ko ndo Ananías juate e ndo:

—Nti i ritjén, Ncháina.

¹¹ Ko ndachro Ndo Jesús:

—Tingatjén satjia cha o ndatin in Nao. Ko tjée ndo a naa ndo ndatin in Judas ko nti a tsinchía naa xi ndatin in Saulo tsikj xin tjajna Tarso ko je e xa jinichja na xa,

¹² ixi je e xa bikon xa naa xi ndatin in Ananías tixin in xa nchia ko tsake e itja xa ngata a jaa je e xi me e ko chao tsikon xa íjngo.

¹³ Ko ndo Ananías juate e ndo:

—Ncháina, ó kuin an nge e ndachro kueya chujni, ixi xi me e ndako a nche e xa ngajin sen titikaon ngajinnta, sen ste tjajna Jerusalén.

¹⁴ Ko jai kuuí xa nti i ixi tsikayé e xa juachaxien xitaana tetuan an ixi tsikao xa kain sen titikaonnta.

¹⁵ Ko Ncháina Jesús ndachro ndo:

—Itjia ixi jan an kuincha a xi me e ixi tsjako xa chijnina. Sinchekuen en xa ni ste jée tjajna ko xi rey ko kaxon ni israelita,

¹⁶ ko jan an tsjako a xa ixi tsango tangi tson en xa ixi tsitikaonna xa.

¹⁷ Tjume e ndo Ananías sakjui ndo nchia ti jii xi Saulo ko bake e itja ndo ngata a jaa xa ko ndachro ndo:

—Ja a kichian Saulo, Ncháina Jesús, ndo bikuan ngatja cha o, kuetuanna ndo jui i ixi tsikuan íjngo ko tsaye é Espíritue ndo.

¹⁸ Ko tuinxin kuintjixin ikon xi Saulo naa nge e xranchi kjo e kucheé, ko chao bikon xa íjngo. Ko bingatjen xa ko bikitée xa.

¹⁹ Ko tjume e juine xa ko chao konsoji xa íjngo. Ko kuitu e xa kaxin nchakon ngajin sen titikaon Ncháina Jesús tjajna Damasco.

Ndo Saulo juinchekuen en ndo na tjajna Damasco

²⁰ Ko tjume e juangíxin ndo Saulo juako ndo ngaxin in ni ngo Israel ixi ndo Jesús, Chjen en ndo Dio.

²¹ Kain ni jitin en tsango xronka na ko ndachro na:

—¿Á je a xi ji i barué e ko bakoña kain ni titikaon ndo Jesús tjajna Jerusalén? ¿Á me e kuj xin xa nti i ixi tsikao xa ni titikaon ndo Jesús ngajin xitaana tetuan an?

²² Ko ícha xrakon a xa juako xa ixi nduaxin ndo Jesús ndo Cristo. Ko ni judío bake e tjajna Damasco jua i nichjangi e na ndo.

Xi Saulo satinge e xa ni judío

²³ *Ko ó kuatsinga itsjé nchakon ko ni judío stexraxaon na xranchi naatsóñaxón na xi Saulo.

²⁴ Ko ó kono e ndo ti stexraxaon na. Ko tiie ko nchakon stechón en na ngandangí nduja tjajna ixi tjaun na naatsóñaxón na ndo.

²⁵ Ko naa tiie sen titikaon Ncháina Jesús bake e sen ndo Saulo ngaya naa ntaxra ijié ko tjume e juinchexingajin sen ntaxra jiá ndo tuenxin tjatu o jii ngandajin nduja tjajna. Me e chao sabinga ndo.

Ndo Saulo sakjui ndo tjajna Jerusalén

²⁶ Ko nchakon kuiji ndo Saulo tjajna Jerusalén tjaun ndo xrokui ndo ngajin sen titikaon Ncháina Jesús. Ko kain sen xronka sen ixi kuitikaon a sen á nduaxin kaxon je e ndo ó titikaon ndo Ncháina Jesús.

²⁷ Ko tjume e ndo Bernabé sabikao ndo ndo Saulo ti ste sen apóstol ko chronga ndo ixi ndo Saulo tsikikon ndo Ncháina ngatja cha o ko Ncháina tsinichje e ndo ndo. Ko tjajna Damasco juako ndo Saulo nombrée Ncháina Jesús ko xronka i ndo.

²⁸ Tjume e ndo Saulo kuitu e ndo tjajna Jerusalén ko chrikao ndo sen apóstol. Ko xrakon a ndo tjako ndo chijnie Ncháina Jesús.

²⁹ Ko je e ndo tjaun ndo tsjao ndo ni judío nichja griego ko je e na tjaun na naatsóñaxón na ndo.

³⁰ Tjume e sen titikaon ndo Cristo tsikin en sen nge e xrokon en ndo ko sabikao sen ndo tjajna Cesarea ko kuetuen en sen ndo satsji ndo tjajna Tarso.

³¹ Ko tjume e sen titikaon Ncháina nchiji nunte Judea, nunte Galilea ko nunte Samaria juaxrxin bake e sen ko ícha kuitikaon sen ndo Jesús. Kuachóna sen juasaya ngajin Ncháina ko Espíritue ndo Dio bingjna sen ko ícha konkueya sen.

Xi Eneas koxruen en xa

³² Tjume e ndo Pedro kuitsje e ndo kain sen titikaon Ncháina Jesús. Kaxon sakjui ndo kuitsje e ndo sen titikaon Ncháina ste tjajna Lida.

³³ Nti a kuitja ndo naa xi ndatin in Eneas. Ijní nano jitsingata a xa kania ixi tsiken en yui tutée xa.

³⁴ Ko ndachro ndo Pedro:

—Eneas, ndo Jesucristo sintaxruan an ndo jai. Tingatjen tatsían kania a.

Ko tjume e xi Eneas tuinxin bingatjen xa.

³⁵ Ko kain ni jii tjajna Lida ko tjajna Sarón bikon na ixi koxruen en xa ko kaxon je e na kuitikaon na Ncháina Jesús.

Xechón nchri Dorcas

³⁶ Ko nchakon me e bake e naa nchri tjajna Jope titikaon nchra Ncháina ko ndatin in nchra Tabita ko ngigua griego xrondachro Dorcas. Ko je e nchra jian juinche e nchra ko bingjna nchra ni nóa.

³⁷ Tjume e naa nchakon tsango koni e nchra ko ndakuen en nchra. Ko juinéma sen cuerpoe nchra ko bake e sen nchra ti piso yuxin noi.

³⁸ A tjajna Jope jii tjajna tjenka tjajna Lida, nti a bake e ndo Pedro. Ko sen titikaon Ncháina no e sen ixi nti a jii ndo. Ko tjume e xruan an sen yuu sen xrondache sen ndo ixi tuinxin tsji ndo ko tsonchrjen a ndo.

³⁹ Ko tjume e sabikao sen ndo Pedro. Ko kuiji sen nti a ko tuinxin bikao sen ndo ti jii cuerpoe nchri tsiken en. Nti a ste kain nchri ka an tsango tsjanga nchra ko juako nchra kain manta tsjaon nchri Dorcas nchakon xrabakechón nchra.

⁴⁰ Tjume e kuetuan an ndo Pedro ixi kain na tsachrje na nduja. Ko bake exin ntatuchi in ndo ko nichje e ndo ndo Dio. Ko jitsje e ndo nchri tsiken en ko ndachro ndo:

—Tabita, tayá.

Ko je e nchra kuantje e ikon nchra ko bikon nchra ndo Pedro ko bake e nchra nunte.

⁴¹ Ko tjume e itsé ndo itja nchra ko juinchengatjen ndo nchra. Ko kuiye e ndo kain sen titikaon Ncháina ko kaxon kain nchri ka an ixi tsikon sen ó tsixechón nchra.

⁴² Tjume e kain ni jii tjajna Jope kono e nã nge e juinche e ndo Pedro ko itsjé nã kuitikaon nã Ncháina Jesús.

⁴³ Tjume e ndo Pedro kuitu e ndo itsjé nchakon tjajna me e ko bake e ndo ndo a ndo Simón, naa ndo kuanchexema tjue é iko.

10

Ndo Pedro ko ndo Cornelio

¹ Tjajna Cesarea bake e naa ndo ndatin in Cornelio. Ndo me e ndo capitán tetuen en xi soldado kuixin Italia.

² Tsango jian ndo ko kain sen ndo a ndo xraxaon nã ndo Dio ko tajon ndo kueya tomi ixi tjaun ndo tsingijna ndo sen judío ko kain nchakon nichje e ndo ndo Dio.

³ Tjume e naa nchakon hora nínxin ó kóndo tuinxin bikon ndo naa ndo ángel nche e ixrã ngajin ndo Dio, ndo me e kuixin in ndo ti jii ndo Cornelio ko ndachro ndo:

—Cornelio.

⁴ Ko ndo Cornelio jitsje e ndo ndo ángel ko xronka ndo ko juanchangi ndo:

—¿Nge e tjaunnta?

Ko ndachro ndo ángel:

—Ndo Dio bake e juaxruxin ixi ti nichje é ndo ko jian nche e tingijna ni nóa.

⁵ Méxin, tetuen én naa ngisen satsji tjajna Jope ixi tsikao nã ndo Simón kaxon ndatin in Pedro.

⁶ Ko ndo me e jii ndo ndo a naa xi kaxon ndatin in xa Simón. Xi me e kuanchexema tjue é ko. Ndo a xa jii tjenja ndachaon.*

⁷ Hora sakjui ndo ángel, ndo nichje e ndo Cornelio, je e ndo Cornelio kuiye e ndo yuu xi nchexrã ko kaxon naa xi soldado xraxaon xa ndo Dio ko jian tjento ndo xa.

⁸ Beki e ndo xa kain ti bikon ndo ko tjume e kuetuen en ndo xa satsji xa tjajna Jope.

⁹ Ngusine nchakon íjngo steyá xa cha o tjenja tjajna Jope, ko ndo Pedro kuajin in ndo ngata a nchia ixi nti a xronichjexin ndo ndo Dio.

¹⁰ Ko tjume e tsango kuen en ndo jinta ko tjaun ndo sine ndo. Nandá stenchekonchjian nã nge e sine ndo, tuinxin bikon ndo naa nge e.

¹¹ Bikon ndo ixi xitje e ngajni ko nti a xingajinxin naa manta ijié. Jixrite e kanoó ikon manta.

¹² Ko ngaxin in manta jitjinga iko chónnda noó tutée kao kunchee ko kain iko tjanga.

¹³ Ko tjume e kuin en ndo nichja naa ngisen ndachro:

—Pedro, taya, ton iá iko me e, ko inte ba.

¹⁴ Ko ndo Pedro juate e ndo:

—Nchána. Jan an nai a ine nge e tjúá i.

¹⁵ Ko ndo ángel nichja íjngo ko ndachro ndo:

—Ti ó juinchetjúá ndo Dio, ndachro a ixi tjúá i.

¹⁶ Nii kon en jaña ko tjume e tuinxin sakjui manta ngajni.

¹⁷ Tjume e ndo Pedro xraxaon ndo nge e xrondachro ti bikon ndo, tuinxin xi xruan an ndo Cornelio kuiji xa ngandangi nduja nchia me e ko tsjanchangi xa ti no jii ndo a ndo Simón.

¹⁸ Tjume e séen juanchangi xa:

—¿Á nti i jii ndo Simón kaxon ndatin in Pedro?

¹⁹ Xra jixraxaon ndo Pedro nge e bikon ndo, ko Espíritue ndo Dio ndachro:

—Tsje é ó kuiji ní sen tjanchangi ixi ja a.

²⁰ Taya, xingajian ko satiko a xa ko ta ia juachjaon, ixi jan an xruan an sen ñã ngajian.

²¹ Tjume e xingajin ndo Pedro ti ste xa ko ndachro ndo:

—Jan an Pedrona. ¿Inge e tjéexinntana?

²² Ko juate e xa:

—Kuetuan an ndo capitán Cornelio jui ina nti i. Je e ndo naa ni tsango jian ko xraxaon ndo ndo Dio. Kain ni judío chónde e nã ndo juasaya ko tjue e nã ndo. Naa ndo ángel tsixrua an ndo Dio nichje e ndo ko chronga ndo ángel ixi xrojuirua ananta ixi itsjinta ndo a ndo ko tsin en ndo nge e xrondachronta.

²³ Ko ndo Pedro ndachro ixi chao tsitu e xa nti a tiie me e. Ko ndúyaxin sabikao xa ndo Pedro kaxon kaxin ni titikaon Ncháina ste tjajna Jope.

* 10:6 *ndachaon* mar

²⁴ Tjume e inaa nchakon kuiji sen tjajna Cesarea. Nti a jichón en ndo Cornelio ko kaxon kain ni ndo a ndo ko ni chúxin ndo tsikiye e ndo.

²⁵ Ko nchakon kuiji ndo Pedro ndo a ndo Cornelio, tjume e ndo Cornelio kuachrjexin ndo nchia ko nichje e kichuu ndo. Ko bake exin ntatuchi in ndo Cornelio ngajin ndo Pedro ixi tjaun ndo xrokuajon ndo juasaya ngajin ndo Pedro.

²⁶ Tjume e ndo Pedro juinchengatjen ndo ndo Cornelio ko ndachro ndo:

—Tingatjen. Takexin a ntatuchi ian. Jan an naa chujni xranchi ja a.

²⁷ Ko jitjao kichuu sen kuixin in sen ndo a ndo Cornelio ko bikon ndo Pedro ixi kueya na ste na nti a.

²⁸ Ko ndachro ndo Pedro:

—Ja anta no anta ixi jan anna xro judíona jua i tsjentona chujni je a judío ko chonda ina juachaxin tsixin inna ndo a ni me e. Ko je e ndo Dio juako na ndo ixi jua i xrondachrjan tjúa i ngixe i chujni.

²⁹ Méxin, nchakon kuiya nanta, tuinxin jui i. Tja on tsonóna sonda kuiya nantana.

³⁰ Tjume e juate e ndo Cornelio ko ndachro ndo:

—Ó kuatsinga noó nchakon, xranchi hora i nti i ritjén nía rintakatseña o jinta ko rinichja a ndo Dio. Ko tuinxin bikon naa ngisen jiyá manta tjúa jitóngxin.

³¹ Ndachro sen me e: “Cornelio, ó kuin en ndo Dio nge e nichje é ndo ko ó no e ndo ixi tsango tingijna ni nóa.

³² Méxin, tetuen én naa ngisen satsji tjajna Jope ixi tsika o sen ndo Simón kaxon ndatin in Pedro. Jii ndo ndo a naa xi kaxon ndatin in xa Simón chjée xroqñ tjue é iko ko tjenka ndachaon jii ndo a xa”, ichro ndo ángel me e.

³³ Méxin, jaña tuinxin kuituan an ngisen kuiya a. Jian juinche e ixi jui ia nía. Ko jai ó no e ndo Dio ixi kain jan anna tja onna tsin anna nge e kuetuan an Ncháina Dio xrochronga ngajinna.

Ndo Pedro juinchekuen en ndo ndo Cornelio chijnie ndo Dio

³⁴ Tjume e ndachro ndo Pedro:

—Jai ó tianxin ixi ndo Dio xraje o tjue e ndo Dio kain chujni,

³⁵ ixi je e ndo tayé e ndo kain sen ngixe i tjajna titikaon ko tajon sen juasaya ngajin ndo.

³⁶ Ndo Dio nichje e ndo sen tjajna Israel ko kuin en sen chijnie tajon juaxruxin chronga Ncháina Jesucristo. Je e ndo Nchéé kain chujni.

³⁷ Ja anta ó no anta jian kain nge e tsikon en nchijí ti ste ni judío xrangixinxín nunte Galilea nchakon ndachro ndo Juan xrokonda tsikitée kain chujni.

³⁸ Ja anta ó no anta ixi ndo Dio kuajon ndo juachaxien Espíritue ndo kuayé e ndo Jesús, ndo tsiki xín tjajna Nazaret ko ó no anta kaxon ixi ndo Jesús jian juinche e ndo ko juinchexruen en ndo kain ni tangi ste kondeexin Xixron anxrée. Jaña jian juinche e ndo Jesús ixi ndo Dio jii ngajin ndo.

³⁹ Tjume e jan anna nduaxin bikona kain nge e juinche e ndo Jesús nunte Judea ko tjajna Jerusalén. Tjume e juankanito na ndo ntacru ko naakónaxón na ndo.

⁴⁰ Tjume e ndo Dio juinchexechón ndo ndo Jesús nchakon nínxin ko kuajon ndo juachaxin bikona ndo ijngo.

⁴¹ Je a kain chujni bikon na ndo. Je o sen kuinche e ndo Dio ixi tsikon sen nduaxin xechón ndo. Jan anna juinekianna ndo ko kuikiana ndo nchakon xechón ndo.

⁴² Kuituan an ndo ixi jan anna sintakuan anna ko xrochra ngana ixi je e ndo sinchéña ndo ijje ngajin kain chujni, ni stehón ko ni tsiken en.

⁴³ Kain sen chronga chijnie ndo Dio chronga sen ixi ngujngu chujni titikaon ndo Jesús, sen me e sinchemé e ndo jíee sen.

Ni je a tjajna judío kuayé e na Espíritue ndo Dio

⁴⁴ Xrajnichja ndo Pedro, tjume e kain ni jitin en nge e juako ndo kuayé e na Espíritue ndo Dio.

⁴⁵ Tjume e sen judío tsikika o ndo Pedro xronka sen ixi ndo Dio kuajon Espíritue ndo, kuayé e sen je a judío.

⁴⁶ Méxin, kuin en sen judío jinichja ndo Cornelio ko sen jikao ndo jée ngigua ko stetajon sen juasaya[†] ngajin ndo Dio.

⁴⁷ Tjume e ndachro ndo Pedro:

—Sen ji i ó kuayé e sen Espíritue ndo Dio xranchi kuayé e jajna. Jai ó chao tsikitée sen.

⁴⁸ Tjume e kuetuan an ndo Pedro tsikitée kain sen ixi juachaxien ndo Jesucristo. Ko sen bikitée juanchia sen tsitu e ndo Pedro nti a kaxin nchakon.

[†] 10:46 *juasaya* respeto, honor

11

Nichja ndo Pedro ngajin sen Jerusalén

¹ Tjume e sen kuinche e Ncháina Jesús ko kain sen titikaon Ncháina ste nunte Judea, sen me e kuin en sen ixi ni je a judío ó titikaon na chijnie ndo Dio.

² Ko nchakon ikjan ndo Pedro tjajna Jerusalén kaxin sen ste nti a tjaun sen ixi kain sen xrochónnda sen chji e ni judío, ko tjakaxin sen ndo Pedro.

³ Juanchangi e sen ndo ko ndachro sen:

—¿Sonda ikjuinta kuitsje enta ni je a judío, ko juinekuunta na?

⁴ Ko ndo Pedro kuaxi chronga ndo kain nge e tsikon en ko ndachro ndo:

⁵ —Jan an bake e tjajna Jope rinichja a ndo Dio ko tuinxin bikon naa manta ijié xingajinxin ngajni. Jixrite e kanoó ikon manta ko kuji manta ti ritjén jan an.

⁶ Tjume e tsja a jian ko bikon ngaya manta jitjinga iko chónnda noó tutée, ko jie e, kao kunchee ko kain ko tjanga.

⁷ Kaxon kuin an téee naa ngisen ndachijina: “Pedro, taya ton iá iko me e ko inte.”

⁸ Ko juata a: “Na i, Ncháina. Nai a ine jan an ninaa nge e tjúa i.”

⁹ ‘Ko ínggo nichja téee kuixin ngajni ko ndachro: “Ti nge e juinchetjúá ndo Dio ndachro a ja a ixi tjúa i.”

¹⁰ Jaña kon en nínxin. Ko tjume e kain ji in ikjan ngajni.

¹¹ Ko tuinxin ní xi kuji nchia ritjén. Tsikí xin xa tjajna Cesarea ko tjéena xa.

¹² Ko Espíritue ndo Dio kuetuanna chao tsiki an xa ko kaxon biki an ikjaon sen kichuuna. Kainna kuixi inna ndo a naa ndo ndatin in Cornelio.

¹³ Tjume e ndo Cornelio chronga ndo ixi bikon ndo naa ndo ángel siin, ja in nichja: “Tetuen én ngisen satsji tjajna Jope tsika o sen naa ndo ndatin in Simón ko kaxon ndatin in Pedro.

¹⁴ Je e ndo xrochronga ndo xranchi ja anta ko kain sen ndointa xrochondanta juachaxin tsarichonnta kain nchakon.”

¹⁵ Tjume e jan an kuaxi nichja a sen ko tuinxin kuayé e sen Espíritue ndo Dio xranchi kuayé e jaína seno.

¹⁶ *Tjume e xraxa on ti kuanichja Ncháina Jesús, ti kuandachro ndo: “Nduaxin ndo Juan je o inda bikitéexin ndo chujni, ko jai ja anta tsaye enta Espíritue ndo Dio.”

¹⁷ Xranchi jan anna nchakon kuaxi kuitikaonna Ncháina Jesucristo, tjume e kuajon ndo Dio Espíritue ndo kuaye ena, jaña jai kuajon ndo Dio Espíritue ndo kuayé e sen ji in. ¿Ngisen jan an ixi xrokuitikaon a nge e juinche e ndo Dio?

¹⁸ Tjume e sen kichuuna, sen ste tjajna Jerusalén, kuin en sen nge e tsikon en ko tenko sen ko kuajon sen juasaya ngajin ndo Dio ko ndachro sen:

—Kuajon ndo Dio juachaxin kaxon ngajin ni je a judío ixi tsayé e na juachaxin tsitikaon na ndo Dio ko xrochónnda na juachaxin tsechón na kain nchakon.

Ni ngo tjajna Antioquía

¹⁹ *Nchakon naakóñaxón na ndo Esteban, kuaxi na rué e na ko ningakon en na sen titikaon Ncháina Jesucristo. Xrokonda sakjui sen nunte Fenicia ko Chipre, ko tjajna Antioquía. Nti a juinchekuen en sen je o ni judío chijni jian.

²⁰ Tjume e ikaxin sen titikaon Ncháina tsikí xin sen tjajna Chipre ko kaxin sen tjajna Cirene sakjui sen tjajna Antioquía ko nchakon kuji sen nti a juinchekuen en sen ni je a judío chijni jian ne e Ncháina Jesucristo.

²¹ Juachaxien Ncháina Jesús chonda sen; méxin, kueya ni nti a kuayé e na chijni jian ko kuitikaon na Ncháina Jesucristo.

²² Ko tjume e sen titikaon Ncháina Jesús tjajna Jerusalén kuin en sen nge e tsikon en tjajna Antioquía ko xruan an sen ndo Bernabé nti a.

²³ Ko nchakon kuji ndo Bernabé bikon ndo xranchi ndo Dio tsango bingijna ndo ni nti a kaxon. Ko tsango bake e juaxrxin aséen ndo. Tjume e nichje e ndo na ixi nchijí aséen na tsitikaon na Ncháina ko soji tsake e na.

²⁴ Ixi ndo Bernabé me e naa ngisen tsango jian aséen ko chónnda ndo juachaxien Espíritue ndo Dio ko jian chuntia* ndo ndo Jesús; méxin, kueya na kuitikaon na Ncháina Jesús.

²⁵ Tjume e ndo Bernabé sakjui ndo tjajna Tarso bijée ndo ndo Saulo.

²⁶ Nchakon kuitja ndo ndo Saulo, sakjui sen tjajna Antioquía. Ko bake e sen ngajin sen titikaon Ncháina nchijí naa nano ko juinchekuen en sen itsjé chujni. Méxin nti a xrangixixín kuyee e na sen titikaon ndo Cristo: “sen Cristiano.”

²⁷ Tjume e kaxin sen chronga sen chijnie ndo Dio sajuixin sen tjajna Jerusalén ko kuji sen tjajna Antioquía.

28* Naa ndo ndatin in Agabo kuixin ndo ti tsixra o sen titikaon ndo Jesús ko ixi juachaxien Espíritue ndo Dio chronga ndo ixi tsijjinta nchijji nunte nti a. Ko ti chronga ndo nduaxin kon en nchakon baketuan an naa xi ndatin in Claudio.

29 Ko tjume e sen titikaon Ncháina tjajna Antioquia xraxaon sen ixi je e sen tsingijna sen sen titikaon ndo Cristo jii nunte Judea. Ko ngujngu sen kuajon sen nge e kuachóna sen.

30 Jaña xraxaon sen ko kuajon sen tomi sabikao ndo Bernabé ko ndo Saulo xrokuayé e sen tituan an ni ngo nunte Judea.

12

Kuen en ndo Jacobo, ko xraxin in na ndo Pedro ndo ndo achjiso

1 Nchakon me e xi rey Herodes kuaxi xa bengi xa sen titikaon ndo Jesús ixi tjaun xa xrotsé xa sen.

2 Ko kuetuan an xa tsenxin ndo Jacobo ixi chika espada, ndo Jacobo me e ndo kichuu ndo Juan.

3 Ko bikon xi Herodes ixi juinche e ni judío juaxruxin ixi kuen en ndo Jacobo, me e itsé xa ndo Pedro. Ji i kon en nchakon kia Pascua ti ine na nutja chóna i nge e nchetja in nio.

4 Itsé xi Herodes ndo Pedro ko xraxin in xa ndo ndo achjiso. Ko nti a jii noó grupo xi soldado ko jii noó xi soldado ngujngu grupo. Jixraxaon xi Herodes íxi tsatsingaja kia pascua, tsantsje xa ndo Pedro ixi tsikon nchijji tjajna israelita xranchi tsen en ndo.

5 Xrajíi ndo Pedro ngaxin in ndo achjiso ko jindaa xi soldado ndo, ko kain sen titikaon Ncháina jinichje e sen ndo Dio ixi tsingijna ndo ndo Pedro.

Ndo Dio bingijna ndo ndo Pedro

6 Tiie me e xraxaon xi Herodes ixi ndúyaxin tsantsje xa ndo Pedro tsjako xa ndo ngajin ni tjajna. Ko ndo Pedro jijjua ndo ngusine yuu xi soldado ko jichroaxin ndo yuu chika cadena. Ko ikaxin xa jindaa xa ntachja ndo achjiso.

7 Ko tuinxin konoxin naa ndo ángel ne e Ncháina, ko ngaxin in ndo achjiso tsango kongíxin ko bake e ndo ángel itja ndo chjiyé ndo Pedro me e xingame e ndo. Ko ndachro ndo ángel: —Taka xingama a.

Ko tjume e chika cadena jitséxin itja ndo Pedro kue e chika nunte.

8 Ko kuetuan an ndo ángel:

—Taritsía ko takée katea.

Ko kuitikaon ndo Pedro me e ndachro ndo ángel íjngo:

—Taritsía noxráa ko ruana na sachjina.

9 Ko tjume e ndo Pedro rué e ndo ndo ángel ko noe a ndo á nduaxin jaña jiton en o je o naa nge e jitikon ndo.

10 Ko juexin kuatsinga sen ti ste xi sa ó stendáa ko kuatsinga sen ti ste xi yuxin stendáa. Tjume e kuiji sen ti jii ntachja chika ijié tjenka cha o. Ko ntachja chika je o ntachja xitje e ntachja ko kuachrje sen ko kuatsinga sen naa cha o ko tuinxin ndo Pedro í bikon a ndo ndo ángel je o ndo kuitu e ndo.

11 Ko tjume e ndo Pedro kono e ndo ixi nduaxin kon en ji i ko ndachro ndo:

—Ó nóna jai ixi nduaxin Ncháina tsixrua an naa ndo ángel ixi tsingijnana ndo ixi tsóña ina xi Herodes ko xruan an nge e tsónna xranchi tjaun ni judío.

12 Ko jixraxaon ndo nge e kon en ndo, me e sakjui ndo ndo a jan María, janée ndo Juan, kaxon nchekin in sen Marcos. Nti a tsixra o itsjé sen titikaon ndo Jesús ko stenichje e sen ndo Dio.

13 Ko binga ndo ntachja cha o ko nichja ndo. Ko naa nchrichajan ndatin in Rode kuachrje nchrichan kuitsje e nchrichan ngisen kuiji.

14 Ko hora juatsuan nchrichan nichja ndo Pedro, tjume e taka i kuantje e nchrichan ntachja ixi tsango ché e nchrichan. Ko binga nchrichan sakjuichronga nchrichan ixi ngandangí nduja nchia jii ndo Pedro.

15 Ko ndachro sen:

—Tsijinchetjáña jáa.

Ko je e nchrichan ndachro:

—Nduaxin je e ndo Pedro —ichro nchrichan.

Ko je e sen ndachro sen:

—Je a je e ndo. Je o espíritue ndo.

16 Ko ndo Pedro ícha jitinga ndo ntachja ko hora kuantje e sen ntachja bikon sen ndo ko xronka sen.

17 Ko tjume e juakoxin ndo Pedro itja ndo ixi xrotenko sen ixi chronga ndo xranchi Ncháina kuantsjexin ndo ndo ndo achjiso. Ko ndachro ndo:

—Teki énta ndo Jacobo ko kain sen kichuuna nge e kónna —ichro ndo ko tjume e sakjui ndo jée tjanya.

¹⁸ Ko ndúyaxin tsango xrakon xi soldado ixí noe a xa ti no satsikji ndo Pedro.

¹⁹ Ko xi Herodes kuetuen en xa xi soldado satsijée xa ndo Pedro, ko kuitja i xa ndo, ko xi Herodes juankata a xa xi soldado ijje ko kuetuan an xa ixí tsen en xi soldado. Ko tjume e xi Herodes kuachrxjin xa nunte Judea ko sakjui xa tjanya Cesarea ko nti a bake e xa.

Kuen en xi Herodes

²⁰ Xi Herodes ningakon en xa ni tjanya Tiro ko tjanya Sidón. Ko je e na juao kichuu na ixí satsjtsje e na xa. Nti a jii naa xi ndatin in Blasto ko kuayakon en xa ndo a xi Herodes, ko tjume e juanche e na xa xronichjaxin xa na ngajin xi tetuan an. Ko juanchia na ixí tsetokau a xi Herodes je e na ixí tjanée xa ti xín nge e ine na.

²¹ Tjume e xi Herodes ndache xa na ixí xroxra o na naa nchakon. Ko je e xa kuéyá xa manta chaxro tsje e ko tjintee ko kueta a xa ntaxitaon ne e chujni tetuan an. Ko tjume e kuaxi xa nichje e xa kain ni tsixra o nti a.

²² Ko tjume e kuaxi na kuyako na, ko ndachro na:

—je a chujni jinichja! Naa dio jinichja.

²³ Tjume e tuinxin naa ndo ángel ne e ndo Dio juincheni e xi Herodes ixí kuajon a xa juasaya ngajin ndo Dio. Ko kutsindo juine ngaya tse e xa ko ndakuen en xa.

²⁴ Ko itsjé na kuin en na chijnie ndo Dio nguixin nti a ko konkueya ni kuitikaon Ncháina Jesús.

²⁵ Ko ndo Bernabé ko ndo Saulo ó juinchejexin ixra kuachóna sen tjanya Jerusalén, tjume e ikjan sen tjanya Antioquia ko sabikao sen ndo Juan, ndo kaxon nchekin in sen Marcos.

13

Xruan an sen ndo Pablo ko ndo Bernabé

¹ Ni ngo Antioquia ste sen nichja chijnie ndo Dio. Sen me e ndo Bernabé ko ndo Simón, kaxon nchekin in na ndo Negro, ndo Lucio, ndo tjanya Cirene, ndo Manaén, naa ndo tsikajikao xi Herodes, xi tetuan an nunte Galilea, ko ndo Saulo.

² Naa nchakon tsixra o sen tsajon sen juasaya ngajin ndo Dio, nchakon me e tsijnchekatse ñao sen jinta. Tjume e Espíritue ndo Dio ndache ndo sen:

—Tantsjendáanantana ndo Bernabé ko ndo Saulo ixí jan an ó kuincha a sen xrotjá a sen naa ixra sinche e sen.

³ Ko juexin nichje e sen ndo Dio ko juinchekatse ñao sen jinta, bake e itja sen ngata a jaa sen me e ko ndachro sen ixí chao satsji sen.

Ndo Pablo ko ndo Bernabé ste sen nunte Chipre

⁴ Ko tjume e Espíritue ndo Dio xruan an ndo Bernabé ko ndo Saulo sakjui sen tjanya Seleucia. Ko nti a kuajin in sen naa ntábarco ko sakjui sen nunte Chipre.

⁵ Ko kuiji sen naa tjanya ndatin in Salamina ngande e nda, nti a xingajinxin sen ntábarco ko nti ajuangín sen juako sen chijnie ndo Dio ningue ni judío. Kaxon bikao sen ndo Juan ixí tsingijna ndo sen.

⁶ Ko tjume e sakjui sen nchijji nunte Chipre kuijija sen tjanya Pafos. Nti a kuetan sen naa xi tuso, xi me e naa xi judío ndatin in Barjesús. Je e xa ncheya xa ixí ndachro xa kaxon nichja xa chijnie ndo Dio.

⁷ Ko xi me e bakekao xa xi tetuan an ndatin in Sergio Paulo. Ko je e xi tetuan an tsango jian xraxaon xa, me e kuiye e xa ndo Bernabé ko ndo Saulo ixí je e xa tjaun xa tsin en xa chijnie ndo Dio.

⁸ Tjume e xi tuso, kaxon ndatin in xa Elimas, ningakon en xa sen tjako chijnie ndo Dio ixí tjaun a xa ixí xi tetuan an xrochuntia xa ndo Dio.

⁹ Tjume e ndo Saulo, kaxon nchekin in na Pablo, tsango chóna ndo Espíritue ndo Dio. Ko jian tsje e ndo xi tuso

¹⁰ ko ndachro ndo:

—Ja a naa chujni ncheya, chjen en Xixron anxrée ja a, ningakon en kain nge e jian. ¿Sonda nchetjáñajan chujni ixí tjaun a tsitikaon na Ncháana Jesús?

¹¹ Jai tangi tson an. Tsontakutsian ko kaxin nchakon tsikon a chjiixrué nchakon.

Ko tuinxin xi Elimas í bikon a xa ko juée xa naa ngisen tsingatse e xa ko satsikao na xa ixí itikon a xa.

¹² Tjume e jaña bikon xi tetuan an nge e kon en ko kuaxi kuitikaon xa Ncháina ixí bake e xa juaxruxin ti juako sen ngajin xa.

Ndo Pablo ko ndo Bernabé ste sen nunte Pisidia

¹³ Tjume e ndo Pablo ko sen chrikao ndo sajuixin sen tjajna Pafos. Kuixin in sen naa ntábarco sakjui sen ko kuiji sen tjajna Perge nunte Panflia. Ko ndo Juan Marcos kuintu e ndo sen ko ikjan ndo tjajna Jerusalén.

¹⁴ Tjume e sajuixin ndo Pablo ko ndo Bernabé tjajna Perge ko kuiji sen tjajna Antioquía tjenja tjajna Pisidia. Ko nchakon tjoké e sen kuixin in sen ningue ni judío ko nti a bake e sen.

¹⁵ Ko juexin juinchekuanxin sen xroon jitaxin ley ko nge e tsikjin sen kuachronga chijnie ndo Dio ó sa ó, tjume e ni tetuan an ni ngo kuiye e na sen tjako ko ndachro na:

—Kichianna síá chondanta nge e xrochronganta ixi ícha tsake ena juaxruxin, ndachronta, jai tsin anna.

¹⁶ Ko tjume e ndo Pablo bingatjen ndo ko itja ndo juanchiixin ixi xrotenko sen. Ko ndachro ndo:

—Tin ennta ja anta sen israelita ko kaxon tin ennta ja anta ti tsikixinnta jée tjajna ko ja anta sen titikaonnta ndo Dio.

¹⁷ Ndo Dio titikaon sen tjajna Israel kuinche e ndo sen tachrí ina. Ko tjume e ndo Dio kuajon ndo juachaxin ixi konkueya sen ti xrabake e sen tjajna Egipto. Xranchi ngisen tsikí xin inaa tjajna jaña bake e sen nti a ko juachaxien ndo Dio bingijna sen kuachrxjixin sen nunte Egipto.

¹⁸ Ndo Dio bingijna ndo sen yuu kán nano bake e sen ntajie nchese.

¹⁹ Ko tjume e juinchetjáña ndo yaato tjajna ti bake e nunte Canaán, ixi sen tsikachrxjixinna xrokuayé e sen nunte me e.

²⁰ Ko káin nano bake e sen nti a xranchi cuatrociento cincuenta nano. Ko tjume e ndo Dio baketuen en ndo sen ixi kaxin xi bancheña ijie ti kuijija ndo Samuel, naa ndo kuachronga chijnie ndo Dio.

²¹ Tjume e juanchia sen israelita naa ndo rey tsetuen en sen. Ko ndo Dio kuinche e ndo ndo Saúl, kuetuan an ndo yuu kán nano. Ko ndotée ndo Saúl, ndo Cis, ko kuachrxjixin ndo ndo Benjamín.

²² Tjume e ndo Dio kuantsje e ndo ndo Saúl ti ixra rey kuachóna ndo ko ndo David kuayé e ti xra rey me e. Ko ndachro ndo Dio: “Ó kuitja ndo David, chjen en ndo Isaí. Je e ndo naa ngisen chjána jé juaxruxin ko titikaon ndo káin nge e tja on.”

²³ Ndo Jesús me e naa chujni kuachrxjixin ndo David ko ndo Dio xruan an ndo ixi je e ndo sinchemé e ndo jíee sen israelita xranchi tsindachro ndo.

²⁴ *Xrati a ndo Jesús, ndo Juan bajako ndo chijni jian ngajin ni israelita ko ndachro ndo ixi xrokjan na tsitikaon na ndo Dio, tjume e tsikitée na.

²⁵ *Ko ó xrokuiji nchakon xrokuen en ndo Juan, me e ndachro ndo: “Jan an je a ngisen xraxaon ja anta ixi tjume e tsij inaa ngisen ko jan an chonda i juachaxin tsoxindanga tjuée katée ndo ixi je e ndo ícha tetuan an ndo ixi najan an.”

²⁶ Ja anta kichianna tsikachrxjixinnta ndo Abraham tin ennta, ko káinnta ni tsikí xin ikjín titikaonnta ndo Dio, tin ennta chijnie ndo ixi sinchemé e ndo ti ndako a juinche enta.

²⁷ Méxin, ni ste tjajna Jerusalén ko ni tetuan an nti a konoe a na ngisen ndo Jesús ko kuienxin a na nge e tsikjin sen kuachronga chijnie ndo Dio ó sa ó ti juinchekuanxin na xroon ngaxin in ni ngo nguungu nchakon tjoké e na. Jaña je e na, nchakon tangi juinchekao na ndo Jesús, tsijinche e na xranchi nichja xroon.

²⁸ *Ko maski kuitja i na xrojan nge e ndako a juinche e ndo Jesús juanche e na xi Pilato ixi tsetuan an xa tsen en ndo.

²⁹ *Ko nchakon juexin kon en káin ji i, tjume e sen kuitikaon ndo Jesús juinchenganjinxin sen cuerpoe ndo ntá cru ko juabaa sen ndo.

³⁰ Ko ndo Dio juinchexechón ndo ndo Jesús lingo.

³¹ *Ko itsjé nchakon bikon sen ndo Jesús, sen chrikao ndo nchakon kuixin sen nunte Galilea sakjui sen tjajna Jerusalén. Ko jai sen me e nichja sen xranchi juako ndo Jesús ko nchekuen en sen itsjé chujni.

³² Jai jan anna tjakona chijni jian, nge e tsikajon ndo Dio kuayé e sen tsikachrxjixinna ó sa ó.

³³ Jaña kon en, jan anna kuayá ana xranchi tsindachro ndo Dio tsayé e sen tsachrxjixin sen bake e sa ó. Tjume e ndo Dio juinchexechón ndo ndo Jesús xranchi nichja xroon Salmo yuxin ko ndachro: “Ja anta chjan na, jan an tjá anta juachaxin tsarichonnta.”

³⁴ Ko tsindachro ndo Dio ixi sinchexechón ndo ndo Jesús ixi cuerpoe ndo xrorenga i. Jaña chronga xroon chijnie ndo Dio, ndachro: “Jan an tsajon nge e jian ngajin ndo David.”

³⁵ Ko inaa Salmo ndachro ja in: “Ja anta tsintue anta xrorenga cuerpoe ndo tsango tjúa.”

³⁶ Ko ndo David kuitikaon ndo xranchi tsiketuan an ndo Dio nchakon bake e ndo ko tjume e kuen en ndo ko tsixrabaa ndo, jaña kuaxrabaa ni tsikachrjenixinna ko renga cuerpoe ndo.

³⁷ Ko cuerpoe ndo juinhexechón ndo Dio renga i.

³⁸ Méxin, kichianna, xrokonda tsono anta xranchi tsoomé e jíanta ixi ndo Jesús me e kuenxin ndo ixi ja anta.

³⁹ Tjume e kain sen titikaon ndo Jesús ó juinchetjúá ndo aséen sen ixi ley kuetuan an ndo Moisés chóna i juachaxin tsantsjen jíe sen.

⁴⁰ Tsje enta jian ixi tsuan inta xranchi tsikjin sen kuachronga chijnie ndo Dio ó sa ó:

⁴¹ Tsje e ja anta ti tjanonta ko titikaon anta.
Jai xronkanta ko satinganta ixi nge e tson en

ixi jan an ndo Dio tsjako naa ixra ijíe* jai
ko ja anta tsitikaon anta maski inaa ngisen xrontatjunta.

⁴² Tjume e ndo Pablo ko sen chrikao ndo kuachrjexin sen ni ngo, ko ni je a judío juanche e na ndo ixi xrokjan sen nchakon íjngo tjoké e na ixi ícha xrojuinchekuen en ndo na.

⁴³ Nchakon juexin sajuixin sen ni ngo, tjume e kueya ni judío ko ni je a judío, ni bakitikaon xranchi ni judío ko baxraxaon na ndo Dio, tsango bake e na juaxruxin ixi nge e juako ndo Pablo ko ndo Bernabé ko rué e na sen. Ko je e sen kuetuan an sen ixi ícha jian tsitikaon na ndo Dio ixi je e ndo tsango tjue e ndo na.

⁴⁴ Tjume e inaa semana nchakon tjoké e na, xra o kain ni jii tjanya nti a ixi tjaun na tsin en na chijnie ndo Dio.

⁴⁵ Ko bikon ni judío ixi kueya na tsixra o na, ko tsango kochjio na, tjume e kaxin na nichjangí e na ndo Pablo.

⁴⁶ Tjume e ndo Pablo ko ndo Bernabé soji nichja sen ko ndachro sen:

—Xrokonda sa ó ja anta ni judíonta xrokuin ennta chijnie ndo Dio. Ko ja anta tjaun anta tsin ennta nge e jian tsajon juachaxin tsechón chujni kain nchakon. Ko jai tsintu ananta ja anta ni judíonta ko satsjina sintakuan anna ni je a judío.

⁴⁷ Jaña tsiketuan an Ncháina:

Jan an bakéenta ja anta xranchi xro i tsingasáñaxin kain tjanya
ixi tsiku unta chijní tajon juachaxin tsechón chujni nguixin nunte.

⁴⁸ Tjume e kuin en ni je a judío ji in ko bake e na juaxruxin ko ndachro na ixi jian chijnie Ncháina Jesús.

Tjume e kuaxi kuitikaon kain ni tikinixin en xrochóna juachaxin tsechón kain nchakon.

⁴⁹ Ko jaña xrangíxin juinchekuen en sen na chijnie Ncháina nchijíi tjanya nti a.

⁵⁰ Ko tjume e ni judío niche e na kaxin nchri nche e jian ko ngajin xi tetuan an tjanya nti a ixi ndachro na ndako a nche e ndo Pablo ko Bernabé ixi tsango toñao e na sen ko bengixin na sen nti a.

⁵¹ *Ko je e sen kongsjenga sen katée sen, jaña juakoxin sen ixi je e na ndako a xraxaon na ixi je e sen. Tjume e sakjui sen tjanya Iconio.

⁵² Ko sen titikaon Ncháina Jesús tsango bake e sen juaxruxin ko ícha chóna sen juachaxien Espíritue ndo Dio.

14

Ndo Pablo ko ndo Bernabé ste sen tjanya Iconio

¹ Tjume e kujii ndo Pablo ko ndo Bernabé tjanya Iconio ko kuixin in sen ningue sen judío ko nti a juinchekuen en sen chujni. Ko itsjé sen judío ko sen je a judío kuitikaon sen.

² Tjume e kaxin ni judío, ni kuitikaon a, kuaxi na kuajon na chijní ngajin ikaxin ni je a judío ixi xronichjangí e na ndo Pablo ko ndo Bernabé.

³ Ko je e sen itsjé nchakon kuitu e sen nti a ko ícha chuntia sen Ncháina Jesús ko xronka i sen nichja sen chijnie ndo. Ko juachaxien ndo Jesús ícha bakingijina sen ixi nge e kuanichja sen xranchi ndo Dio tjue e ndo chujni, ko kuajon ndo juachaxin sinchexrjuen en sen chujni ko tsjako sen ijíe ixra.

⁴ Ko chujni tjanya nti a je a xraje o xraxaon na. Kaxin na kuitikaon na ni judío ko ikaxin na kuitikaon na sen kuinche e Ncháina Jesús.

⁵ Ko tjume e ni judío ko ni je a judío xraxaon na naakua naa nge e, kao xi tetuan an, ixi tjaun na sinchexronka na sen kuinche e ndo Jesús ko xrokuaxin na sen ixro.

⁶ Ko ndo Pablo ko ndo Bernabé kono e sen nge e xraxaon na, me e sakjui sen tjanya Listra ko tjanya Derbe nunte Licaonia ko nguixin no nti a

⁷ ko juako sen chijní jian ne e Ncháina Jesús.

* 13:41 naa ixra ijíe milagro 13:51 Mt. 10:14; Mr. 6:11; Lc. 9:5; 10:11.

Ni tjanya Listra tjanke e na ndo Pablo ixro

⁸ Ko tjanya Listra jii naa xi xratsijonglexión xa jua i itji xa.

⁹ Xi me e jii xa nunte ko jitin en xa nge e juako ndo Pablo. Tjume e ndo Pablo jian jitsje e ndo xa ko kono e ndo ixi je e xa chuntia xa Ncháina ko chao xrokoxruen en xa.

¹⁰ Ko je e ndo Pablo séen ndache ndo xa:

—Tingatjen, ndako take é tutáa.

Ko tuinxin bingatjen xa ko chrinka xa, bake exin xa tutée xa ko chao kuaxi kuaji xa.

¹¹ Tjume e kain ni tjanya nti a bikon na nge e juinche e ndo Pablo, ko kuaxi na kuyako na ixi ngigue e ni Licaonia ko ndachro na:

—Ndo Dio tsikjan chujni tsiki xin ngajni, steku una nti i.

¹² Ko je e na juinchekin in na ndo Bernabé dio Júpiter ko ndo Pablo dio Mercurio ixi ícha juako ndo chijni.

¹³ Ko xitaana ne e dio Júpiter chóna ni ngo ngande e tjanya ko bika o xa kuxinta ko itsjo, ko je e xa ko kain ni rué e xa tjaun na xrokuajon na juasaya ngajin ndo Pablo ko ndo Bernabé ko tjaun na xrokóñe e na sen kuxinta.

¹⁴ Ko ndo Pablo ko ndo Bernabé kono e sen nge e tjaun na sinche e na, me e kuinchje sen mantée sen ko juike e sen ngakjen en chujni ste nti a ko kuyako sen ndachro sen:

¹⁵ —¿Sonda nche enta ji i? Jan ana chujnina xranchi ja anta. Jan ana jui ina ixi sintakuan annta chijnie ndo Dio ko tintu enta kain nge e xro an tjintee ko ikjannta tsitikaonnta ndo Dio, ndo jichón. Je e ndo juinchéña ndo ngajni ko nunte xasintajni* ko ndachaon ko kain nge e jii ngataon nche.

¹⁶ Sa ó ndo Dio kuintu e ndo chujni ixi sinche e na xranchi tjaun na.

¹⁷ Ko ndo Dio juako ndo ixi je e ndo tetuan an ndo ixi juinchéña ndo kain nge e jii. Je e ndo tetuan an ndo ixi tsij ichrin, me e tenga na ko jian toñe e na, ko kain nchakon je e ndo tajon ndo nge e sine na, ko je e ndo tajon ndo juachaxin juaxruxin ste na.

¹⁸ Maski jaña ichro ndo Pablo ko ndo Bernabé, je e na titikaon a na ixi tjaun na tsajon na juasaya ngajin sen ko xrokóñe e na sen kuxinta.

¹⁹ Tjume e kuij kaxin ni judío kuixin tjanya Antioquia ko tjanya Iconio. Nichje e na ni ste nti a ixi tsintu e na ti nge e tjako ndo Pablo ko ndo Bernabé, méxin kuaxi na ixro ndo Pablo. Ko xraxaon na kuen en ndo, me e bingakjin na ndo ngande e tjanya.

²⁰ Ko tjume e sen titikaon Ncháina Jesús xra o sen ngandajin ndo Pablo ko je e ndo bingatjen ndo ko ikjan ndo tjanya nti a íjngo. Ko ndúyaxin sabikao ndo Pablo ndo Bernabé tjanya Derbe.

²¹ Ko ó juexin chronga sen chijni jian ko juacha sen kueya na kuitikaon na Ncháina Jesús, tjume e ikjan sen tjanya Listra ko tjanya Iconio ko tjanya Antioquia.

²² Kain tjanya kuatsinga sen nichje e sen sen kuitikaon Ndo Jesús ko kuetuan an sen ixi soji xrochuntia sen Ncháina ko ndachro sen ixi siá tsixin inni ti tetuan an ndo Dio, xrokonda tangi tson enni.

²³ Ko ngujngu ni ngo kuinche e sen ngisen tsetuen en sen ti sen titikaon ndo Jesús ko nichje e sen ndo Dio ko juinchekatse ñao sen jinta ko tjume e ndache sen Ncháina ixi tsayakon en ndo sen kuitikaon je e ndo.

Ndo Pablo ko ndo Bernabé ikjan sen Antioquia

²⁴ Tjume e kuatsinga sen nunte Pisidia ko kuiji sen nunte Panfilia.

²⁵ Ko tjanya Perge juako sen chijnie Ncháina ko tjume e sakjui sen tjanya Atalia.

²⁶ Nti a kuixin in sen ntábarco ko sakjui sen tjanya Antioquia, tjanya me e tsinichje e sen ndo Dio ko tsijanchia sen ixi ndo Dio xrobingijna ndo sen ti ixra juinche e sen.

²⁷ Ko nchakon kuiji sen tjanya Antioquia xra o kain sen titikaon ndo Jesús ko kuaxi chronga ndo Pablo xranchi bingijna ndo Dio ngajin sen ko xranchi kuajon ndo Dio juachaxin sinchekuen en sen ni je a judío ixi kaxon xrochuntia na Ncháina Jesús.

²⁸ Ko ndo Pablo ko ndo Bernabé kuitu e sen ngajin sen titikaon Ncháina Jesús itsjé nchakon.

15

Xra o sen kuitekaon ndo Jesús tjanya Jerusalén

¹ Kaxin sen tsiki xin nunte Judea kuiji sen tjanya Antioquia. Kuaxi sen juinchekuen en sen sen kichuuna nti a ixi jua i tsomé e jiee sen siá chóna i sen chji e sen ti tsiketuan an ndo Moisés.

² Tjume e ndo Pablo ko ndo Bernabé ko je e sen judío kuaxi juakaxin kichuu sen. Méxin, juao sen ixi ndo Pablo ko ndo Bernabé ko ikaxin sen xrokuji sen tjanya Jerusalén. Nti a tsjao

* 14:15 xasintajni mundo

sen apóstol ko sen tetuan an ni ngo ixi á xrokonda xrochónnda nã chji e ti tsiketuan an ndo Moisés.

³ Jaña sen titikaon Ncháina tjanya Antioquía xruan an sen kichuu sen, ko tjume e kuatsinga sen nunte Fenicia ko nunte Samaria ko nti a chronga sen xranchi itsjé sen je a judío kuayé e sen chijnie ndo Dio. Ko kain sen kichuuna kuin en me e, tsango juaxruxin bake e sen.

⁴ Tjume e kuiji ndo Pablo ko ndo Bernabé tjanya Jerusalén ko sen titikaon Ncháina ko sen apóstol ko sen tetuan an ne e ni ngo kuajon sen juachaxin tsintee sen nti a. Ko chronga sen xranchi ndo Dio tsango bingijna ndo sen.

⁵ Tjume e ikaxin ni fariseo tsikitikaon Ncháina Jesús bingatjen nã ko ndachro nã:
—Ni je a judío titikaon nã Ncháina xrokonda tsaa nã chji e ni judío, ko xrokonda tsitikaon nã nchijí ley tsiketuan an ndo Moisés.

⁶ Ko tjume e kain sen apóstol ko sen tetuan an ni ngo xra o sen ko xraxaon sen xranchi tson en ixi jaña ichro ikaxin sen judío.

⁷ *Sée juakaxin kichuu sen ko tjume e bingatjen ndo Pedro ndachro ndo:
—Ja anta kichuuna, ó no anta ixi seno ndo Dio kuinchena ndo jan an ixi tsjako ngajin kain ni je a judío ixi tsin en nã chijni jian ne e ndo Cristo ko kaxon je e nã tsitikaon nã.

⁸ *Ndo Dio chúxin ndo aséen chujni, juako ndo ixi kuayé e ndo ni je a judío, me e kuajon ndo Espíritue ndo kuayé e nã xranchi jaina.

⁹ Ndo Dio tikon ndo kain chujni naxraje o xranchi jaina. Ko juinchetjúá ndo aséen sen ixi ó chuntia sen Ncháina Jesús.

¹⁰ Méxin, ¿sonda titikaon anta nge e juinche e ndo Dio ko tetuen ennta nã tsitikaon nã kain ley tangi? Ko jaina ko sen tsikachrjenixinna jua i kuitikaon sen kain ji i.

¹¹ Ó nojina ixi juasie Ncháina Jesús koméexin jieina ko kaxon jaña komé e jiee sen je a judío, sen kuitikaon.

¹² Ko kain sen tsixra o tenko sen ko tjume e kuin en sen xranchi ndachro ndo Bernabé ko ndo Pablo ixi ndo Dio bingijna ndo sen juinche e sen itsjé ixra ijié, jaña bikon kaxon ni je a judío.

¹³ Juexin nichja ndo Pablo ko ndo Bernabé, tjume e kuaxi nichja ndo Jacobo ko ndachro ndo:

—Kichuuna, jian tin ennta nge e xrondachrjan.

¹⁴ Ndo Simón Pedro chronga ndo xranchi juako ndo Dio ixi tjue e ndo ni je a judío ko xranchi kuinche e ndo ikaxin nã ixi tsitikaon nã ndo.

¹⁵ Jaña nduaxin chronga xroon tsikjin sen kuachronga chijnie ndo Dio ó sa ó:

¹⁶ Jan an xrokjanna ixi sintakonchjian iñgo ni ngo tsichjejin ne e ndo David ko jan an tsingijna ixi tsetuan an naa sen ndo a ndo David.

¹⁷ Ixi kain nã tsjéena nã ko kaxon kain ni jée tjanya kuiya a nã ixi tsitikaon nã jan an.

¹⁸ Jan an ndo Dio, ndo ndachro sa ó tson en ji i.

¹⁹ Méxin, ndachrjan jan an ixi ni je a judío xrokonda i tsitikaon nã nchijí ley ixi je e nã ó kuintu e nã nge e kuitikaon nã sa ó.

²⁰ Méxin, xroxruen enna nã naa xroon ixi sincheno ena sine a nã ntau ti tikinixin en ídolo ko xrochónnda i nã inaa nchri je a nchrinchri e nã ko sine a nã ntau e iko tsikintji a jnié ko sine a nã jnié ba.

²¹ Méxin, ngujngu tjanya jii ngisen chronga ley tsiketuan an ndo Moisés ngaxin in ni ngo ngujngu nchakon tjoké e nã.

²² Tjume e kain sen kuinche e Ncháina Jesús ko sen tetuan an ni ngo ko kaxin sen titikaon Ncháina juao sen ixi kaxin sen satsji sen tjanya Antioquía. Ko sen itsji me e ndo Judas, ndo nchekin in sen Barsabás, ko ndo Silas, kayui sen jian titikaon sen, satsikao sen ndo Pablo ko ndo Bernabé.

²³ Ko ja in ndachro xroon tsikao sen:

“Jan anna, ni kuinche e Ncháina Jesús ko ni tetuan an ni ngo nti i nichja ananta ja anta kichuuna ni je a judío, ti stenta tjanya Antioquía ko nunte Siria ko nunte Cilicia, taye énta juajna.

²⁴ Ó nóna ixi ikaxin sen kichuuna tsikj xjn tajanana maski kuachónnda i sen juachaxin, kuiji sen juintaxronkanta sen ixi xrokonda tsaanta chji e ni judío ti tsiketuan an ndo Moisés.

²⁵ Tjume e juaona ixi kaxin sen ste nti i tsitsja anta sen, je e sen ko ndo Bernabé ko ndo Pablo, sen tsango tjua ana.

²⁶ Je e sen tsango tangi juinchekaon na sen ixi ti titikaon sen Ncháina Jesucristo.

²⁷ Méxin, xroxruan annanta ndo Judas ko ndo Silas ixi kaxon xronichja anta sen ko xrochronga sen kain ji i.

²⁸ Ixi Espíritue Dio jian bingijnana ko ja in juaona ixi tsitikaon anta nge e tsango tangi. Ko nti i jitaxin nge e xrokonda tsitikaonnta:

²⁹ Nte anta iko tikinixin en ngajin idolo ko kaxon sinte anta jnié ba ko nte anta ntau e iko tsikintji a jnié ko kaxon xrochonda inta inaa nchri je a nchri anta. Titikaonnta kain ji in ko jaña chao tsintenta.”

³⁰ Ko tjume e je e sen sakjui sen tjajna Antioquía. Ko nchakon kuiji sen nti a xra o sen titikaon ndo Jesús ko je e sen kuajon sen xroon me e.

³¹ Ko nchakon juinchekuanxin sen kichuuna xroon me e, tsango juaxruxin bake e sen ixi nge e chronga xroon.

³² Tjume e ndo Judas ko ndo Silas kaxon chronga sen chijnie ndo Dio, ko nichja sen jian ko juaxruxin bake e sen kichuuna.

³³ Ko nti a kuintee sen kaxin nchakon, ko nchakon ó satsji sen, kain sen titikaon Ncháina Jesús jian nichje e kichuu sen ko ikjan sen ti no tsiki xin sen tjajna Jerusalén ti ste sen kichuu sen.

³⁴ Ko ndo Silas xraxaon ndo ixi nti ao xrokuitu e ndo.

³⁵ Ko kaxon ndo Pablo ko ndo Bernabé kuitu e sen tjajna Antioquía. Je e sen ko ikaxin sen juako sen ko chronga sen chijnie Ncháina Jesús.

Ndo Pablo sakjui ndo yuxin viaje

³⁶ Tjume e ndo Pablo nichje e ndo ndo Bernabé ko ndachro ndo:

—Ichjina titsje ena sen kichuuna ti kain tjajna juakona chijnie ndo Dio ó sa ó ixi tsonojna xranchi ste sen nti a.

³⁷ Ko ndo Bernabé kaxon tjaun ndo xrobikao sen ndo Juan, ndo kaxon nchekin in sen Marcos.

³⁸ *Ko ndo Pablo juinche a ndo juaxruxin ixi xrobikao sen ndo Juan Marcos ixi je e ndo juinche a ndo ixra, ixra juinche e sen nunte Panfilia.

³⁹ Méxin, je a naxraje o xraxaon sen, méxin chjeya sen. Ndo Bernabé sabikao ndo ndo Juan Marcos ko kuixin in sen inaa ntábarco sakjui sen nunte Chipre.

⁴⁰ Ko ndo Pablo kuinche e ndo ndo Silas satsikao ndo, ko sen kichuu sen nti a juanche e sen ndo Dio ixi jian tsingijna ndo sen ko jaña sakjui sen.

⁴¹ Tjume e kuatsinga sen nunte Siria ko nunte Cilicia ko jian nichje e sen sen titikaon Ncháina ni ngo nti a.

16

Ndo Timoteo sabikao ndo ndo Pablo ko ndo Silas

¹ Tjume e kuiji ndo Pablo tjajna Derbe ko tjajna Listra. Nti a bake e inaa ndo titikaon ndo Jesús ndatin in ndo Timoteo. Jané ndo naa nchri tjajna judío titikaon nchra Ncháina Jesús ko ndotée ndo naa xi tjajna griego.

² Sen kichuuna jii tjajna Listra ko tjajna Iconio nichja sen jian ixi ndo Timoteo.

³ Méxin, ndo Pablo tjaun ndo xrobikao ndo ndo Timoteo. Sa ó kuetuan an ndo ixi ndo Timoteo xrokua ndo chji e ni tjajna judío ixi xroningakuen a na ndo kain ni judío ti tjajna xrokjui sen ixi no e na ndotée ndo Timoteo naa xi griego.

⁴ Tjume e kuatsinga sen kain tjajna ko chronga sen nge e tsiketuan an sen apóstol ko sen tetuan an ni ngo tjajna Jerusalén.

⁵ Sen chuntia Ncháina ícha konsoji sen ko ngujngu nchakon ícha konkueya sen.

Juachaxien espíritue ndo Dio bikon ndo Pablo naa ngisen nunte Macedonia

⁶ Tjume e Espíritue ndo Dio kuajon a juachaxin tsjako sen chijnie ndo Dio nunte Asia, me e kuatsinga sen nunte Frigia ko nunte Galacia.

⁷ Ko nchakon kuiji sen nunte Misia xraxaon sen xrokjui sen nunte Bitinia. Ko Espíritue ndo Jesús kuajon a juachaxin satsji sen nti a.

⁸ Méxin, xrakuatsingako sen nunte Misia ko kuiji sen tjajna Troas ngande e ndachaon.

⁹ Ko naa tiie ixi juachaxien espíritue ndo Dio bikon ndo Pablo naa xi nunte Macedonia, siin xa jitinóatée xa ko ndachro xa: “Tatsinga nunte Macedonia ko tingijnana.”

¹⁰ Jaña tsikilon ndo Pablo, méxin tuinxin konchjianna ixi satsjina nunte Macedonia ixi jian nóana ixi ndo Dio kuetuan an ndo nti a tsjakona chijni jian xranchi tsomé e jíee na. [Jan an ndo Lucas ikjin xroon ji i sabiki an sen kaxon.]

Ndo Pablo ko ndo Silas bake e sen tjajna Filipos

¹¹ Tjume e nti a tjajna Troas kuixi inna inaa ntabarco ko xrajuikona naa nunte nchíin ngataon inda ndatin in Samotracia. Ko ndúyaxin juasona tjajna Neápolis.

¹² Nti a sajuixinna ko juasona tjajna Filipos. Tjajna me e tetuan an ni romano, ko tjajna me e naa tjajna ícha tjintee ixi ikaxin tjajna nunte Macedonia. Nti a kuinteena kaxin nchakon.

¹³ Ko nchakon tjoké e ni israelita kuachrjexinna tjajna Filipos ko sakjuina ngande e ndarío ko nti a nanaunka xra o na nichje e na ndo Dio. Me e nti a kuinteena nunte ko kuaxina juntakuan anna kaxin nchri ste nti a.

¹⁴ Ko nti a jii naa nchri ndatin in Lidia tsiki xin tjajna Tiatira. Je e nchra nchekji nchra manta chaxro játse tiie. Ko je e nchra xraxaon nchra ndo Dio ko jitin en nchra nge e tjako ndo Pablo ko Ncháina bingijna nchra ixi tsiénxin nchra jian chijnie ndo Dio.

¹⁵ Je e nchra ko kain ni ndo a nchra bikitée na. Tjume e kuinóatée nchra ngajin ndo Pablo ko ndachro nchra:

—Siá titikaonnta ixi nduaxin titika onna Ncháina, tituan anta nía nti i.

Ko kuitunãna nti a.

¹⁶ Tjume e inaa nchakon sakjuina ti no nichje e sen ndo Dio ko kuetanna naa nchrichajan chónnda nchrichan espíritue Xixron anxrée tonuexin nchrichan kaxin nge e ko jii naa ngisen tetuen en nchrichan ko kueya tomi tjacha ni me e ixi ti chronga nchrichan.

¹⁷ Ko nchrichajan me e kuaxi nchrichan rué e nchrichan ndo Pablo ko jan anna ko tjume e séen nichja nchrichan:

—Sen ji i nche e sen xrée ndo Dio jii ngajni ko tjako sen cha o tsechónxin chujni.

¹⁸ Jaña juinche e nchrichan itsjé nchakon. Tjume e tsango koña ndo Pablo ko ngatjia ndo nichje e ndo espíritue Xixron anxrée chónnda nchrichan, ko ndachro ndo:

—Juachaxien nombrée ndo Jesucristo tetuan an ixi tsachrjexian nchrichan ji i.

Tjume e tuinxin kuachrjexin nchrichan espíritue Xixron anxrée.

¹⁹ Ko tjume e ni tetuan an nchrichan bikon na nge e kon en nchrichan ko kono e na ixi ítsjacha i na ícha tomi ixi ixra kuanche e nchrichan. Méxin koña na ko itsé na ndo Pablo ko ndo Silas ko bingakjina sen ti ste ni tetuan an ntaasien tjajna.

²⁰ Ko tjume e bikona na nti a ti jii xi nchéña ijie ko ndachro na:

—Ni ji i ni judío tsango nchexronka na ni tjajnaina

²¹ ko tjako na nge e jua i tsitikaonna ko jua i sintu una ixi jan anna ni romanona.

²² Ko kain ni nti a koña e na sen. Tjume e xi nchéña ijie kuetuan an xa tsantsje e na sen manta steyá sen ko tsóna na sen ixi ntasé.

²³ Ko tsango kóna na sen, tjume e xraxin in na sen ndo achjiso ko kuetuan an na ngajin xi jindaa ndo achjiso ixi xrotsje e xa satsinga i sen.

²⁴ Ko kuitekaon xa ko xraxin in xa sen ti ícha yaso e ndo achjiso ixi tsachrje a sen. Ko kuintexin xa tutée sen ixi naa ntãã chónnda tuye ixi satsji a sen.

²⁵ Tjume e ngusine tiie ndo Pablo ko ndo Silas nichje e sen ndo Dio ko itsje sen ngajin ndo Dio. Ko ikaxin ni jii ndo achjiso kuin en na ixi jaña jitsje sen.

²⁶ Tuinxin kontengí nunte me e kontsjenga nchijí tjatúe ndo achjiso ko kain ntãchja xitje e ko kuitsinga chika cadena ti stetséxin kain ni ste nti a.

²⁷ Tjume e xi jindaa ndo achjiso kuaya xa ko bikon xa ixi tsixitje e ntãchja, méxin kuantsje xa naa chika espada, ko xroxrantu u xa chika me e ntakuin xa ixi ndaxrokuen en xa ixi xraxaon xa sabinga kain ni jii ngaxin in ndo achjiso.

²⁸ Ko ndo Pablo séen kuyako ndo ndachro ndo:

—Na i, xruan an nge e nchekua asáan ixi kainna stena nti i.

²⁹ Tjume e xi jindaa ndo achjiso juanchia xa naa xro i ko nteeto kuixin in xa ko jixranga xa ixi xronka xa ko bake exin ntatuchi in xa tutée ndo Pablo ko ndo Silas.

³⁰ Ko tuinxin kuantsjexin xa sen nti a ko juanchangi e xa sen:

—¿Nge e sinta a ixi tsechón aséenna kain nchakon?

³¹ Ko je e sen ndachro sen:

—Titikáaon Nchããna Jesucristo ko jaña tsoomé e jíá ko jíee ni ndúya.

³² Tjume e juincheuken en sen xa ko kao kain ni ste ndo a xa chijnie Ncháina Jesucristo.

³³ Ko maski naxixe e, hora me e sabikao xa sen ko juné ma xa kain ti no juincheni e na sen. Ko tuinxin je e xa ko kain ni ste ndo a xa bikitée na.

³⁴ Ko tjume e je e xa sabikao xa sen ndo a xa lingo; nti a kuajon xa nge e juine sen. Je e xa ko kain ni ndo a xa bake e na juaxruxin ixi kuitikaon na ndo Dio.

³⁵ Tjume e ndúyaxin xi nchéña ijie kuetuen en xa xi policía tsitsje e xa xi jindaa ndo achjiso ixi tsantsje xa ndo Pablo ko ndo Silas.

³⁶ Tjume e xi jindaa ndo achjiso ndache xa ndo Pablo nge e ndachro xipolícia:

—Xi nchéña ijie kuetuan an xa ixi tsachrjenta. Juaxruxin satsjinta.

³⁷ Tjume e ndo Pablo ndache ndo xi policía:

—Jan ana ni romanona, juaya nã ngajinna ko bikon kueya chujni ko ndachro a xa nge e ijje junta ana. Ko jaña xraxin inna xa ndo achjiso ko jai, ¿á imao tsajandana xa? Na i. Tsij je e xa ko je e xa tsantsjena xa.

³⁸ Tjume e xipolicía sakjui xa ko ndache xa xi nchéña ijje nge e ndachro sen ste ngaxin in ndo achjiso. Ko tsango xronka xi nchéña ijje ixi kuin en xa ixi je e sen romano sen.

³⁹ Tjume e ikjui xi nchéña ijje ko kuinóatée xa ngajin ndo Pablo ko ndo Silas ixi tsoñao a sen ixi nge e kon en sen, ko tjume e kuachrxexin sen nti a ko juanchia xa ixi satsjixin sen tjajna nti a.

⁴⁰ Tjume e ndo Pablo ko ndo Silas, hora kuachrxexin sen ndo achjiso, kuiji sen ndo a jan Lidia. Ko nti a bikon sen sen kichuu sen ko juinchechaxin kichuu sen ko sajuixin sen nti a.

17

Kuintee ni tjajna Tesalónica

¹ Tjume e ndo Pablo ko ndo Silas kuatsinga sen tjajna Anfípolis ko tjajna Apolonia ko sakjui sen tjajna Tesalónica. Nti a jii naa ni ngo judío.

² Ko tjume e ndo Pablo sakjui ndo ni ngo ixi jaña xrakuen en ndo ko ní semana ngujngu nchakon tjoké e ni judío juako ndo xranchi ndachro xroon chijnie ndo Dio.

³ Juako ndo ixi ndo Cristo xrokonda xrokuen en ndo ko tjume e xroxechón ndo íjngo. Jaña ndachro ndo:

—Ndo Jesús, ndo ntatjunta, me e ndo Cristo.

⁴ Tjume e kaxin ni judío kuitikaon nã ko rué e nã ndo Pablo ko ndo Silas. Ko kaxon kuitikaon itsjé ni griego, ni ó chóxin ndo Dio, ko kaxon kaxin nchri ícha chúxin nã tjajna nti a, kuitikaon nchra.

⁵ Ko ikaxin ni judío kuitikaon a nã nge e nichja ndo Pablo ko tsango kochjio nã me e jué e nã kaxin xi ña i, xi nai a nche e xra ko juinchekateya nã ni tjajna. Tjume e kuixin in nã ndo a naa xi ndatin in Jasón ixi chrijtjée nã ndo Pablo ko ndo Silas ko tjaun nã tsikaan nã sen ti jii ni tetuan an.

⁶ Ko kuitja i nã sen me e itsé nã xi Jasón ko ikaxin sen titikaon Ncháina ko bingakjin nã sen sabikao nã sen ti jii xi tetuan an tjajna nti a. Ko kuintee nã ko kuyako nã ko ndachro nã:

—Ni ji i juincheye e nã chujni nchijí nunte ko jai ó kuij nã tjajnajna nti i.

⁷ Xi Jasón kuajon xa juachaxin ixi kuitu e nã ndo a xa. Kain ni ji in titikaon a nã ley tetuan an xi romano ko ndachro nã ixi jii inaa ngisen ícha tetuan an ndatin in Jesús.

⁸ Hora kuin en nã ji in kain ni tsixra o ko xi tetuan an tsango koñao nã.

⁹ Ko xi Jasón ko sen titikaon Ncháina juenga sen nã méxin xi tetuan an kuintu e xa sakjui sen.

Ndo Pablo ko ndo Silas sakjui sen tjajna Berea

¹⁰ Ko tuinxin tiie me e sen kichuuna xruan an sen ndo Pablo ko ndo Silas satsji sen tjajna Berea. Ko nchakon kuiji sen nti a kuixin in sen ningue ni judío.

¹¹ Ko ni judío nti a ícha jian nche e nã ixi ni tjajna Tesalónica. Ko ícha juinche e nã juaxruxin kuin en nã chijnie ndo Dio ko ngujngu nchakon nchekuanxin nã xroon chijnie ndo Dio ixi tsono e nã á nduaxin ti juako e nã sen.

¹² Méxin, itsjé ni nti a kuitikaon nã, ko ikaxin nchri griega ícha chúxin nã kuitikaon nchra ko kaxon ni xi.

¹³ Ko ni judío tjajna Tesalónica kono e nã ixi ndo Pablo juako ndo chijnie ndo Dio tjajna Berea ko sakjui nã nti a ko juinchekateya nã ni nti a.

¹⁴ Méxin sen kichuuna titikaon Ncháina xruan an sen ndo Pablo satsji ndo no ngande e ndachaon. Ko ndo Silas ko ndo Timoteo xrakuitu e sen tjajna Berea.

¹⁵ Tjume e kaxin sen nti a sabikao sen ndo Pablo tjajna Atenas. Ko ikjan sen tjajné e sen ixi kuetuan an ndo Pablo xrochronga sen ngajin ndo Silas ko ndo Timoteo ixi jaiko satsji sen ti jii ndo ixi nti a tsetan sen ndo Pablo.

Ndo Pablo jii ndo tjajna Atenas

¹⁶ Xrajichon en ndo Pablo ixi tsiji ndo Silas ko ndo Timoteo tjajna Atenas, tsango koni e aséen ndo ixi bikon ndo nti a jii kueya ídolo ko chujni tajon juasaya ngajin ídolo me e.

¹⁷ Ko ni ngo judío nti a juako ndo ngajin kaxin ni judío ko ikaxin nã chúxin nã ndo Dio, ko kain nchakon bake e ndo ti ntaasin, juako e ndo ni jii nti a.

¹⁸ Ko kaxin chujni tikinixin en chujni ndatin in epicúreos ko ikaxin ni tikinixin chujni ndatin in estoicos kuaxi nã juao nã ndo Pablo. Kaxin nã ndachro nã:

—¿Nge e xrondachro ti nichja xi ji i?

Ko kaxin nã ndachro nã:

—Jinichja xa ixi inaa dío.

Jaña ichro nā ixi juako ndo Pablo chijni jian kondee ndo Jesús ko ndachro ndo ixi ndo Jesús maski kuen en ndo, xechón ndo Íjngo.

¹⁹ Tjume e sabikao nā ndo Pablo naa ijn̄a ndatin in Areópago. Nti a nichje e nā ndo ko ndachro nā:

—Tja onna xrondachijiana nge e natjúá tjakoa ja a.

²⁰ Itsjé nge e jée tjakoa, ko tja onna tsonónana nge e xrondachro me e.

²¹ Ko kain ni tjajna Atenas ko ni tsikí x̄in jée tjajna ste nti a, je o baki en nā ko bakeki nā nge e natjúá kuin en nā.

²² Tjume e ndo Pablo bake exin tutée ndo ti ste nā nti a ti Ijn̄a Areópago ko ndachro ndo:

—Ja anta ni tjajna Atenas tin ennta. Jan an tikon̄ ixi ja anta titikaonnta itsjé dio tsikoña tjatu o.

²³ Ko hora kuatsinga nti a jan an bikon ti no tájonxinnta juasaya ngajin ídoloanta ko bikon naa altar ja in tsikijnnta: “Nti i xraxaonxinna naa Dio chuxin ani.” Méxin, ti Dio xraxaonnta maski xrachuxin anta, me e ndo Dio tjako jan an.

²⁴*Ndo Dio me e juinchéña ndo nunte xasintajni ko kain nge e jii ngata a nunte. Je e ndo me e Nchéé ngajni ko nunte nti i. Ndo Dio ji a ndo ngaxin in naa ni ngo tsikonchjianxin itja chujni.

²⁵ Ko xrokonde a ndo ixi xrojan chujni xrobingijna ndo ixi je e ndo tajon ndo juachaxin tsechón kain chujni ko tajon ndo chrinto ko kain nge e jii ngata a nunte.

²⁶ Naakua ngisen kuantsjenixin ndo kain tjajna ixi tsake e nā nguixin ngata a nunte. Ko kaxon ndachro ndo Dio tinó ko ngisa tsake e nā.

²⁷ Jajna xrokonda tsjéena ndo Dio ixi indao tsienxinna xranchi tsitjana ndo. Ko nduaxin je e ndo kjin a jii ndo.

²⁸ Ixi je e ndo stechónxinna ko tontengina ko tayakuina ndo. Ko tsindachro naa xi tjajnánta sa ó: “Jajna kuachrjenixinna ndo Dio.”

²⁹ Nduaxin jajna kuachrjenixinna ndo Dio, méxin jua i xroxaxaonna ixi ndo Dio, je e ndo naa chika oro o naa chika plata o naa ixro xranchi xraxaon ni nchéña ídolo.

³⁰ Sa ó ndo Dio tjáñe e ndo ti kuanche e chujni ixi no e ndo xrakuachuxin a nā ndo. Ko jai tituan an Dio ngajin kain chujni jii ngata a nunte xrokonda tsitikaon nā ndo.

³¹ Ndo Dio kuinche e ndo naa nchakon sinchéña ndo ijie ngajin chujni jii ngata a nunte ko kuinche e ndo naa ndo juakoxin kain juachaxin, ndo me e maski kuen en ndo, xechón ndo Íjngo.

³² Ko nchakon kuin en nā ixi xroxechón chujni tsiken en, kaxin nā juanoa nā ndo Pablo. Ko ikaxin nā ndachro nā:

—Íjngo nchakon tsin anna nge e ndachrua.

³³ Tjume e ndo Pablo sakjui ndo.

³⁴ Ko ikaxin nā rué e nā ndo ko kuitikaon nā Ncháina. Ko naa xi kuitikaon ndatin in Dionisio, me e naa xi kuanchéña ijie ngajin chujni ngata a ijn̄a Areópago, ko naa nchri kuitikaon nchra ndatin in nchra Dámaris ko ikaxin nā kaxon kuaxi nā kuitikaon nā Ncháina.

18

Sakjui ndo Pablo tjajna Corinto

¹ Tjume e ndo Pablo sajuixin ndo tjajna Atenas ko ikjui ndo tjajna Corinto.

² Nti a kuetan ndo naa xi judío ndatin in Aquila. Je e xa xi tjajna nunte Ponto ko sé a nchakon je e xa ko janchri e xa tsikix̄in sen tjajna Italia ixi xi tetuan an nti a, xi Claudio, kuetuan an xa ixi kain ni judío tsachrx̄ejin nā tjajna Roma. Tjume e ndo Pablo ikjui ndo kuitsje e ndo sen me e.

³ Ko xraje o ixr̄a kuanche e sen, ti kuanchéña sen nchia manta. Méxin, nti ao kuitu e ndo Pablo ixi xrojuinche e sen xr̄a.

⁴ Ko kain nchakon tjoké e ni judío, ndo Pablo bakji ndo ni ngo nichje e ndo ni judío ko ni je a judío ixi tjaun ndo kain nā tsitikaon nā Ncháina.

⁵ Ko nchakon ndo Silas ko ndo Timoteo kuix̄in sen nunte Macedonia, tjume e ndo Pablo í kuanche a ndo xr̄a, je o bajako ndo chijnie ndo Dio ixi tsono e ni judío ixi ndo Jesús me e ndo Cristo.

⁶ Ko je e ni judío kuaxi nā ningakon en nā ndo Pablo ko tsango nichjangí e nā ndo. Ko je e ndo kontsjenga ndo manta jitsáa ndo ixi jaña juakoxin ndo je a juaxruxin jii ndo. Ko ndachro ndo:

—Ja onta tamanta ijie tsitjáñaxinnta. Jan an íxro an ijie tama ixi ó juntano anta chijni jian, ko ja anta kuitikaon anta. Méxin, jai satsji sintakuan an ni je a judío.

⁷ Tjume e kuachrjexin ndo ni ngo judío ko sakjui ndo ndo a naa sen ndatin in Justo, ndo me e xraxoon ndo ndo Dio. Ko tjenka ndo a ndo jii ni ngo.

⁸ Ko ndo Crispo, ndo tetuan an ni ngo judío, ko kain sen ndo a ndo, kuitikaon sen Ncháina Jesús. Ko kaxon kueya ni tjajna Corinto kuin en na chijnie ndo Dio ko kuaxi na kuitikaon na Ncháina* Jesús ko bikitée na.

⁹ Tjume e naa tiie bikon ndo Pablo Ncháina Jesús ko ja in ndachro ndo Jesús:

—Tjakua chijnina ko xronka ia. Nai a tintu e nichja chijnina

¹⁰ ixi jan an tjenka ritjén ko xro an ngisen ndako a sinta a ixi jan an chonda itsjé sen titikaonna tjajna nti i.

¹¹ Méxin, ndo Pablo kuitu e ndo naa nano ko tu o nti a tjajna Corinto, ko juincheckuen en ndo na chijnie ndo Dio.

¹² Nchakon baketuan an xi Galión nunte Acaya, itsjé ni judío ningakon en na ndo Pablo ko bikao na ndo ti ste xi tetuan an.

¹³ Ko ndache na xi tetuan an:

—Xi ji i ichrji xa nchekateya xa chujni ixi tjaun xa jée xronichjexin na ndo Dio, je a xranchi ndachro ley.

¹⁴ Ko ndo Pablo ó tjaun ndo xronichja ndo, ko tuinxin xi Galión ndache xa ni judío:

—Siá nduaxin naa ijie tsango ijie juinche e xi ji i, jan an xrokonda tsin an nge e xron-dachronta.

¹⁵ Ko ji i je o chijni ko nombre ko ley na anta tetoxinnta. Méxin, ja onta nchekonchjianta ji i ixi jan an tjaun a tsjitexin nge e tetoxinnta.

¹⁶ Tjume e kuetuan an xa ixi satsjixin na nti a.

¹⁷ Ko ni griego koña na ko itsé na xi Sóstenes, xi tetuan an ni ngo judío, ko nti a juaya na ngajin xa ko stetsje e kain xi tetuan an, ko xi Galión xro an nge e ndachro xa.

Ikjan Ndo Pablo tjajna Antioquia

¹⁸ Ndo Pablo xrakuitu e ndo itsjé nchakon tjajna Corinto ko tjume e chjée ndo sen juajna sen kichuuna ko kuixin in ndo naa ntábarco ixi sakjui ndo nunte Siria ko kao jan Priscila ko ndo Aquila. Tjume e kuiji sen tjajna Cencrea ko nti a ikjín jaa ndo Pablo ixi juakoxin ndo juinche e ndo ti nge e tsindachro ndo.

¹⁹ Nchakon kuiji sen tjajna Éfeso kuintu e ndo Pablo jan Priscila ko ndo Aquila ko sakjui ndo naa ni ngo ko juao ndo ni judío tsixra o nti a.

²⁰ Ko je e na kuinóatée na ixi xrokuitu e ndo nti a, ko je e ndo chro a ndo.

²¹ Méxin, nichje e ndo na ko ndachro ndo:

—Xrokonda tsake é tjajna Jerusalén nchakon tsij kia. Ko xrokjanna íjngo xrotsja anta siá tsituexin ndo Dio.

Tjume e kuintu e ndo na ko kuixin in ndo ntábarco sakujxin ndo tjajna Éfeso.

²² Nchakon kuiji ndo tjajna Cesarea sakjui ndo tjajna Jerusalén ko bikitsje e ndo sen titikaon Ncháina nti a. Ko tuinxin bingajin ndo tjajna Antioquia.

²³ Kuatsinga kaxin nchakon, kuachrjexin ndo nti a ko bakji ndo kaxin tjajna nunte Galacia ko Frigia ko nichje e ndo kain sen titikaon Ncháina Jesús ixi juaxrxin tsintee sen.

Ndo Apolos juako ndo ngajin ni tjajna Éfeso

²⁴ Nchakon me e naa ndo judío ndatin in Apolos kuiji ndo tjajna Éfeso, ndo me e tikinxin ndo tjajna Alejandría. Je e ndo jian tjako ndo ko jian chúxin ndo xroon chijnie ndo Dio.

²⁵ Je e ndo no e ndo cha o ne e Ncháina ko juaxrxin banichja ndo kondee ndo Jesús maski je o no e ndo xranchi batikitée ndo Juan chujni.

²⁶ Ko ndo Apolos juako ndo ti ni ngo ko xrakon a ndo. Ko nchakon kuin en jan Priscila ko ndo Aquila ti juako ndo, tjume e kuachrjendaka o sen ndo ko juincheckuen en sen ndo ti nge e xranoe a ndo cha o ne e ndo Dio.

²⁷ Tjume e nchakon tjaun ndo Apolos satsji ndo nunte Acaya, sen kichuuna bingijna sen ndo ko ikjin sen naa xroon ngajin sen titikaon Ncháina ste nti a ixi xrokuayé e sen ndo jian. Ko nchakon kuiji ndo nunte Acaya bingijna ndo ngajin sen ixi juasie ndo Dio ó tsikitikaon sen.

²⁸ Ko stetin en kain chujni, juakoxin ndo ixi ndako a titikaon ni judío ko juacha ndo juako ndo ixi xroon chijnie ndo Dio chronga ixi nduaxin ndo Jesús ndo Cristo.

19

Ndo Pablo bake e ndo tjajna Éfeso

* **18:8 Ncháina** Señor Ncháina Jesús o Ncháina Dio

¹ Xrabake e ndo Apolos tjajna Corinto, ndo Pablo bakaji ndo tjajna ste nganito n̄a ko tjume e kuuji ndo tjajna Éfeso ko nti a kuetan ndo kueya ni titikaon chijnie ndo Dio.

² Ko tjume e juanchangi e ndo sen me e:

—¿Á kuaye enta Espíritue ndo Dio nchakon kuitikaonnta Ncháina?

Ko je e sen juate e sen:

—Na i, jan anna xratian ina á jii Espíritue ndo Dio.

³ Tjume e juanchangi ndo Pablo:

—¿Ngisen juachaxien bikitéxinta?

Ko je e sen juate e sen:

—Xranchi kuachronga ndo Juan, jaña bikitéena.

⁴*Ndachro ndo Pablo:

—Ndo Juan kuanchekitee ndo chujni ixi xrokjan n̄a xrokuitikaon n̄a ndo Dio ko juako ndo ixi xrokuitikaon n̄a ngisen tsji tuenxin ndo, ko ndo xrokuji ndo me e ndo Jesús, ndo Cristo.

⁵ Kuin en sen ji i, me e bikitée sen; ixi juachaxien Ncháina Jesús.

⁶ Tjume e ndo Pablo b̄ake e itja ndo ngata a jaa sen ko kuji Espíritue ndo Dio ngajin sen ko kuaxi sen nichja sen jée ngigua ti chúxin a sen ko nichja sen nge e kuajon ndo Dio.

⁷ Ko sen xi me e xranchi teyuu sen.

⁸ Ko ní nchanitjao, ndo Pablo bake e ndo ni ngo judío nti a ko bajako ndo ko baxronka i ndo. Ko nichje e ndo sen ko jian banchekuen en ndo n̄a xranchi jii juachaxin tetuan an ndo Dio.

⁹ Ko kaxin n̄a tsango icha aséen n̄a ko tjaun a n̄a tsitikaon n̄a Ncháina Jesús ko chaxro a kuanichja n̄a ixi chijnie Ncháina ngajin kain chujni. Tjume e ndo Pablo kuachrendáa ndo ko sabikao ndo sen titikaon chijnie Ncháina ko kain nchakon bajako ndo ti jii naa escuela ndatin in Tiranno.

¹⁰ Jaña bajako ndo yuu nano, ko kain ni bake e nti a nunte Asia kuin en n̄a chijnie Ncháina Jesús, ni judío ko kaxon ni je a judío.

¹¹ Ko ndo Dio icha juinche e ndo ijié ix̄a ixi ti kuanichja ndo Pablo.

¹² Ko itsjé n̄a bakikao n̄a pañuelo ko manta ngajin ndo Pablo ixi tsake e itja ndo ko jaña bakikao n̄a ngajin ni e ko kain ichin chónda n̄a kuachrje ichin ko espíritue Xixron anxrée kuachrje kaxon.

¹³ Ko kaxin ni judío bakaji n̄a ko tjaun n̄a tsantsje n̄a espíritue Xixron anxrée ko je e n̄a je o ncheye e n̄a chujni ixi tjaun n̄a xronichja n̄a ixi juachaxien ndo Jesús. Ko bandache n̄a espíritue Xixron anxrée:

—Juachaxien ndo Jesús, ndo tjako ndo Pablo, tetuan anna ja a espíritue Xixron anxrée tachrxian nti i.

¹⁴ Jaña banche e yaato chjen en naa xi judío ndatin in Esceba, xitaana tetuan an.

¹⁵ Tjume e naa nchakon nichje e n̄a espíritue Xixron anxrée. Ko espíritue me e ndachro:

—Chuxinna ndo Jesús ko nómana ngisen ndo Pablo. Ko ja a, ¿ngisen ja a?

¹⁶ Ko jaña xi chónda espíritue Xixron anxrée chringanito xa n̄a ko tsango soji xa juacha xa juincheni e xa kain n̄a. Ko turuchu n̄a kuachrjexin n̄a nchia ko tsikoni e n̄a.

¹⁷ Ko kain ni judío ko ni je a judío ste n̄a tjajna Éfeso kuin en n̄a nge e tsikon en ko tsango xronka n̄a ko ndachro n̄a ixi tsango ijié juachaxien Ncháina Jesús.

¹⁸ Kaxon itsjé ni kuitikaon Ncháina bakiji n̄a ko kuachronga n̄a kain ti ix̄a ndako a banche e n̄a.

¹⁹ Ixi itsjé n̄a banche e x̄ra tuso, ni me e bakika o n̄a xroon banchekuanxixin n̄a x̄ra tuso ko juaaka n̄a xroon stetsje e kain chujni ste nti a. Ko ti tjintee kain xroon me e xranchi yuu ikánte mil tomi chika plata.

²⁰ Ko chijnie Ncháina Jesús icha jitingangi ko tjaxoxin ixi nduaxin chónda chijnii ijié juachaxin.

²¹ Ko ndo Pablo xraxaon ndo tsitsje e ndo sen tjajna Jerusalén ko tsatsinga ndo nunte Macedonia ko Acaya. Ko tsjexinjá tsake e ndo tjajna Jerusalén, satsji ndo tjajna Roma.

²² Ko xruan an ndo yuu sen tingijna ndo satsji sen nunte Macedonia, sen me e ndo Timoteo ko ndo Erasto, ko je e ndo Pablo xrakuitu e ndo nunte Asia kaxin nchakon.

Koñao ni tjajna Éfeso

²³ Ko nchakon me e itsjé ni tjajna Éfeso koñao n̄a ixi juaxruxin a ste n̄a ixi chijnie Ncháina Jesús.

²⁴ Ixi nti a jii naa xi ndatin in Demetrio ko je e xa banchekonchjian xa ixi chika plata kaxin ni ngo nchínchín kondee naa nchri diosa ndatin in Diana, ko kueya tomi bajacha xa ko kaxon ni ché e xrée xa.

²⁵ Tjume e jua o xa ikaxin ni kuanche e xrá me e ko ndache xa na:

—Ja anta no anta ixi ti ixra nche ena tjachana jian ko jaña juaxruxin stena.

²⁶ Ko xranchi tikonnta ko tin ennta ixi xi Pablo tjako xa ixi ídolo nchéñana je a dio. Ko jaña ndache xa itsjé chujni ko je a je o nti i tjajna Éfeso, kaxon nguixin nunte Asia.

²⁷ Tsango chaxro a ji i xrajna tsitjáña xrá ko kaxon ningue nchri diosa Diana ba tsitjáña, ko ítsitikaon a na nchra ko tsitjáña juachaxien nchra nguixin nunte Asia ko nchijí xasintajni.

²⁸ Ko hora kuin en na ji in, tsango koñaon na ko séen kuyako na:

—Tsechón nchri Diana, santoe ni tjajna Éfeso.

²⁹ Tjume e tsango koñaon kain ni tjajna Éfeso ko ningakon en na ndo Gayo ko ndo Aristarco, sen me e yuu sen tsikí xín nunte Macedonia. Ko itsé na sen ko bingakjin na sen bikao na sen ngaxin in ti tónaxin junta.

³⁰ Tjume e ndo Pablo tjaun ndo tixin in ndo nti a ixi xronichje e ndo na, ko sen titikaon Ncháina kuintue a sen ndo itsji ndo.

³¹ Kaxon ikaxin ni tetuan an nunte Asia, ni chúxin ndo Pablo, xruen en na chujni ixi xrondache sen ndo Pablo ixi tsixín a ndo nti a.

³² Ko tjume e ni tsixra o nti a ndachro na naa nge e, ko ikaxin na jée chro na ko koñaon na ko itsjé na noe a na sonda xra o na nti a.

³³ Ko ikaxin ni judío ndache na naa xi ndatin in Alejandro nge e jiton en ko baxe e na xa ngusine ko je e xa juakoxin itja xa ixi xrotenko na ixi xronichjaxin xa ni judío ngajin ni ste nti a.

³⁴ Ko hora juatsuan na xi Alejandro ixi kaxon xa ni judío xa, kain na kuyako na xranchi yuu hora ko ja in ndachro na:

—Tsechón nchri Diana, santoe ni tjajna Éfeso.

³⁵ Tjume e xi secretarioe ni tjajna nti a kuetuan an xa xrotenko na ko ndachro xa:

—Chujni tjajna Éfeso tin ennta. Nchijí nunte xasintajni no e na ixi ni tjajna Éfeso tayakon en na ningue nchri diosa Diana, tsikoña ixro kuixín ngajni.

³⁶ Xro an ngisen ndachro ixi nduaxin a ji in. Méxin, tenkonta, ko xraxaonnta nge e nche enta

³⁷ ixi ni bikuunta nti i nichjangié a na ningoina ko nichjangié a na santoina Diana.

³⁸ Ko siá xi Demetrio ko ni nchexrée xa tjankata a na ijie xrojan ngisen jii nti i, méxin jii ni nchéña ijie, je e na xrokuin en na nge e xrondachro xi Demetrio ko jaña sinchéña na ijie.

³⁹ Ko siá jii inaa nge e nta inta juaxruxin, xrokonda xronichjanta nchakon xroxra o kain na ko nchakon me e tsoña ijie.

⁴⁰ Xrokonda i tsjakaxin kichuuna ko sinchetetona chujni ixi ba tsjangiina xi tetuan an ixi ndako a stentu una.

⁴¹ Ko tjume e kuetuan an xi secretario ixi satsji na ko jaña juexin sakjui ni tsixra o nti a.

20

Sakjui ndo Pablo nunte Macedonia ko nunte Grecia

¹ Nchakon juexin kain ji in, tjume e ndo Pablo kuiye e ndo kain sen titikaon Ncháina Jesús nti a ko ndachro ndo kaxin chijni ixi ícha xrochuntia sen Ncháina ko tjume e sakjui ndo no nunte Macedonia.

² Ko nchijí ti no kuatsinga ndo, chaxro nichje e ndo sen titikaon Ncháina ixi juaxruxin tsintee sen. Ko tjume e kuiji ndo nunte Grecia.

³ Nti a kuitu e ndo ní nchanitjao ko tjume e xrokua ndo naa ntábarco saxrokjui ndo nunte Siria. Ko kono e ndo ixi kaxin ni judío ningakon en na ndo ko xraxaon ndo cháña xrokjanxin ndo tutée ndo ko tsatsinga ndo nunte Macedonia.

⁴ Ko sen bikao ndo Pablo, me e ndo Sópater, ndo tjajna Berea, ndo Aristarco, ndo Segundo, ndo tjajna Tesalónica, ndo Gayo, ndo tjajna Derbe, ndo Timoteo, ko kaxon ndo Tíquico, ko ndo Trófimo, sen nunte Asia.

⁵ Sen kichuuna kuitaon sen nti a ko chonna sen tjajna Troas.

⁶ Ko juexinja kuatsinga kia ine sen nutja chóna i ti tjaj in nio, tjume e kuixi inna naa ntábarco ko kuachrjexinna tjajna Filipos ko kuatsinga na ó nchakon, tjume e juasona tjajna Troas ko nti a kuetanna sen kuitaonxin ko nti a kuitunana yaato nchakon.

Ndo Pablo sakjui ndo tjajna Troas

⁷ Ko nchakon xrangixixín semana xra ona ixi xrochrijin nutja xraxaonxinna Ncháina Jesucristo. Ko ndo Pablo nichje e ndo kain sen titikaon Ncháina Jesús ixi tjaun ndo saxrokjui ndo ndúyaxin, méxin xrajitjako ndo chjéja ngusine tiie.

⁸ Ko piso noi nchia nti a xrauxinna ko nti a steche kueya xro i.

⁹ Ko nti a jii naa chajan ndatin in chán Eutico, chán me e bake e chán nunte ngata a ventana. Ko ndo Pablo tsango sée nichja ndo, méxin, tsango chjéé chán kotachrin. Ko ndatsikejua chán ko kue e chán nunte ti nínxin piso ko hora kuatsi in sen chán, ndatsiken en chán.

¹⁰ Méxin, ndo Pablo xingajin ndo ko kuitsingata a ndo chán ko joa ndo chán. Ko ndache ndo sen kichuuna:

—Xronka inta, jichón chán.

¹¹ Tjume e ndo Pablo ikjan ndo bajin in ndo ixi tsonchrijin ndo nutja sine sen, xroxaxaonxin sen Ncháina Jesucristo. Ko nichja ndo bingasáñajan ko tjume e sakjui ndo.

¹² Ko chán tsike e nunte sabikao sen chán jichón chán, ko kain sen juaxruxin kuitu e sen.

Sajuixin ndo Pablo tjanya Troas ko kuiji ndo tjanya Mileto

¹³ Jan anna kuitaonxinna nti a ko kuaana naa ntábarco ko juasona tjanya Asón ixi nti a tsetanna ndo Pablo ixi ndachro ndo tsjixin ndo tutée ndo.

¹⁴ Nchakon kuetanna ndo tjanya Asón, kuixin in ndo ntábarco stetji jan anna ko sakjuina tjanya Mitilene.

¹⁵ Ko kuachrxjexin na nti a, ndúyaxin kuatsingana nunte Quío ko nchakon yuxin juasona tjanya Samos ti no tachrje ikaxin ntábarco ko tjume e sakjuina tjanya Trogilio ko nti a jokénaana. Ko kuatsinga naa nchakon juasona tjanya Mileto.

¹⁶ Jaña junta ana ixi ndo Pablo tjaun a ndo sée xrobake e ndo nunte Asia ko tjaun a ndo xrokjui ndo tjanya Éfeso ixi tjaun ndo taka tsiji ndo tjanya Jerusalén ixi nti a tsake e ndo nchakon kia Pentecostés.

Nichje e ndo Pablo sen tetuan an ni ngo tjanya Éfeso

¹⁷ Hora bake e ndo Pablo tjanya Mileto kuituan an ndo ixi tsji sen tetuen en ni ngo tjanya Éfeso.

¹⁸ Ko nchakon kuiji sen ndachro ndo:

—Ja anta ó no anta xranchi kuenta a nchakon xrangixixín juaso nunte Asia.

¹⁹ Ó no anta ixi kain nchakon bake é ngajinnta ko junta a ixra ngajin Ncháina Jesucristo ko juntajé a aséenna ko tsjanga ixi kueya juachjaon kua ixi ni judío tjaun na xrojuinchenina na.

²⁰ Ko jan an kuíntua i juáko kain nge e jian xrokonda xrokono anta. Ko juako anta ti xra o kain itsjé chujni ko kaxon ndointa.

²¹ Juintakuan an kain ni judío ko kain ni je a judío ixi xrokonda tsintu e na ti ndako a nche e na ko xrochuntia na ndo Dio ko Ncháina Jesucristo.

²² Ko jai satsji tjanya Jerusalén ixi Espíritue ndo Dio kotuanna ko nóna i nge e tsónna nti a.

²³ Je o nóna ixi kain tjanya tsatsinga, Espíritue ndo Dio ndachijina ixi ni tjanya Jerusalén xroxraxin inna na ndo achjiso ko tangi sinchenana.

²⁴ *Ko ta i juachjaon ixi maski tangi tsónna. Je o juaxruxin tsake é ixi sintajexin ti kotuanna Ncháina Jesús ixi tsjako chijnie ndo, xranchi ndo Dio tjue e ndo chujni.

²⁵ Ko jai nóna ixi ninaánta, ni juako anta juachaxien ndo Dio, ítsikon aninta íjngo.

²⁶ Méxin, jai ntatjunta ixi xro an íjje chónnda siá xrojannta ítsitikaon anta.

²⁷ Ixi ó juako anta kain nge e tjaun ndo Dio, ko ítitjáña i tsjako xrojan nge e.

²⁸ Tsje enta xranchi jian take énta ko tsje enta sen kichuunta, sen ni ngo, ixi Espíritue Dio tjáanta ndo ixra tayakon ennta sen ste ningue Ncháina, sen kuenaxin ndo ixi jnié ndo.

²⁹ Ko ó nóna nchakon satsji jan an, tsji kaxin ni sincheke to sen ni ngo xranchi kundanaxra tinchje ba kutuchjon.

³⁰ Ko kaxin na ste na ngakjen ennta sincheya na ko jaña sen ni ngo xrorué e sen na ko ítsitikaon a sen Ncháina.

³¹ Méxin, tsje enta, ko xraxaonnta ixi xranchi ní nano jan an juintakuan annta tiie ko nchakon ko tsjanga ko kuíntua i juintakuan annta ti jian.

³² Ko jai ja anta kichianna, ngayá itja ndo Dio takéenta ko kaxon tsingijnaxinnta ndo chijnie ndo ixi je e ndo tjua anta ndo. Ko je e ndo tsango chónnda ndo juachaxin tsingijnanta ndo ixi tsaye enta kain nge e ti tjaun ndo ti xrochjéé ndo kain sen chujnie ndo ti tjúa aséen sen.

³³ Jan an tjaun a tomie na ni mantée na.

³⁴Ja anta no anta jian ixi jan an tjáana juinta axin ixra ko kuenaxin nge e xrokondana ko kaxon nge e xrokonde e sen riki an.

³⁵Jaña juako ngajinnta ixi sinche enta ixra ko tsingijnanta ni xro an nge e chóna nge e. Ko xraxaonnta ti tsindachro Ncháina Jesús: “Ícha juaxruxin take e sen tajon, ixi sen tayé e.”

³⁶Ko juexin ndachro ndo Pablo ji i, bake exin ntatuchi in ndo ko nichje e ndo ndo Dio ko kaxon kain sen.

³⁷Tjume e kain sen tsjanga sen, joa sen ndo ko kuitoxin sen ndo.

³⁸Ko tsango koni e aséen sen ixi chronga ndo ísikon a sen ndo íjngo. Tjume e bikao sen ndo ti no jii ntábarco ko sakjui ndo.

21

Sakjui ndo Pablo tjajna Jerusalén

¹Nchakon kuintu ana sen kichuuna, tjume e kuixi inna ntábarco ko sakjuina nunte Cos. Ko ndúyaxin sakjuina tjajna Rodas, ko nti a sakjuixinna tjajna Pátara.

²Tjajna Pátara kuitjána naa ntábarco satsjixinna no nunte Fenicia ko kuixi inna ntábarco me e ko sakjuina.

³Nchakon kuatsingana nti a bikona nunte Chipre ko kuatsingana ndatsjonxin ikjon ko xrabikonna nunte Siria. Tjume e ntábarco sakjui ntaq tjajna Tiro ixi xrokonda xroxingajin nge e tjinga ntaq ti tjajna me e, ko nti a kuixi inna tjajna.

⁴Ko kuitjána sen titikaon Ncháina ko nti a kuitunana ngajin sen yaato nchakon. Ko Espiritue ndo Dio juincheno e sen ixi xrondache sen ndo Pablo satsji a ndo tjajna Jerusalén.

⁵Ko juexin kuatsinga ti yaato nchakon me e, kuachrjexinna nti a kaina ko kain sen titikaon Ncháina Jesús ko janchri e sen ko chjen en sen bikaanxina sen ngande e tjajna ko ngande e ndachaon bake exinna ntatuchi inna nichja ana ndo Dio.

⁶Ko tjá ana sen juajna ko bajína ntábarco ko je e sen ikjan sen ndo a sen.

⁷Ko juasona tjajna Tiro ko tjajna Tolemaida. Nti a tjá ana juajna sen titikaon Ncháina ko nti a kuitunana ngajin sen naa nchakon.

⁸*Ko ndúyaxin ndo Pablo ko jan ana sajuixinna nti a, sakjuina tjajna Cesarea. Nti a ikjuina ndo a ndo Felipe, naa ndo tjako chijnie Ncháina Jesús. Je e ndo naa sen yatq sen tingjna kuinche e Ncháina Jesús ko kuitunana ndo a ndo.

⁹Ndo Felipe kuachóna ndo noó nchrichajen en ndo, nchri xratutee a, nchri me e tayé e nchrichan chijnie ndo Dio ti tjaun ndo tsono e chujnie ndo.

¹⁰*Nti a kuinteena itsjé nchakon ko tjume e kuiji naa ndo tayé e chijnie ndo Dio ko ndo me e ndatin in ndo Agabo, ndo nunte Judea.

¹¹Kuiji ndo kuitsjenana ndo ko itsé ndo tjuq tingatóxin ndo Pablo ko tjuq me e kuintexin ndo tutée ndo ko itja ndo ko ndachro ndo:

—Espiritue ndo Dio ndachro ixi ni judío ja in sinchekao na nché tjuq ji i ko tsikao na ndo ngajin ni je a tjajna judío.

¹²Juexin kuin ana ti ndachro ndo Agabo, tjume e jan ana ko ni tjajna Cesarea kuinóatánana ngajin ndo Pablo ixi tsji a ndo tjajna Jerusalén.

¹³Ko juatingéxin ndo Pablo:

—¿Sonda ncheni enta aséenna ixi ritsjanganta? Jan an je a je o xrochon an tsinteenana, kaxon jan an tsenxinna kondeexin Ncháina Jesús nti a tjajna Jerusalén.

¹⁴Ko jan ana juacha ina xrokuitikaonna ndo, méxin kuintu ana ndo satsji ndo ko ntatjanna ndo:

—Tson en ti tjaun Ncháina Jesús.

¹⁵Ko kuatsinga kaxin nchakon xakonnana ko sakjuina tjajna Jerusalén.

¹⁶Ko biki ana kaxin sen titikaon Ncháina, sen tjajna Cesarea. Sabiki ana sen ndo a naa ndo tjajna Chipre ndatin in ndo Mnasón. Je e ndo ó sa ó titikaon ndo Ncháina Jesús ko kuajon ndo ndo a ndo kuitunana.

Ndo Pablo kuitsje e ndo ndo Jacobo

¹⁷Nchakon juasona tjajna Jerusalén sen kichuuna jian nichja nana sen.

¹⁸Ko ndúyaxin biki ana ndo Pablo bikitsja ana ndo Jacobo, ndo kichuu Ncháina Jesús, ko kaxon nti a ste kain sen kichuuna tetuan an ni ngo.

¹⁹Ndo Pablo chjé ndo sen juajna ko beki e ndo sen kain nge e juinche e ndo Dio nchakon juako e ndo ni je a judío.

²⁰Juexin kuin en sen ji in, kuajon sen juasaya ngajin ndo Dio, ko ndache sen ndo Pablo:

—Kichianna, ja anta ó bikonta ixi jii itsjé mil ni judío ó titikaon na ndo Jesús ko kain na ndachro na ixi xrokonda kaxon tsitikaonna ley kuajon ndo Moisés.

²¹ Ko jai tsikin en na ixi ja anta juinchekeue ennta ni judío ste tjanya ícha ikjín ixi tsitikaon a na ti ley juako ndo Moisés ko kaxon ndachenta na ixi xrochjé a na chji e ni judío chjen en na ko xrokonda i tsitikaon na ti titikaon ni judío.

²² ¿Nge e sinta ana ixi tsin en na ixi ó jui inta?

²³ Méxin, cháña ja in nche enta. Nti i jii noó sen tjaun sinche e sen ti ó ndache sen ndo Dio.

²⁴ Tiku unta sen ko tjenganta na kain nge e xrokonda sinche e sen ti tontjúá aséen sen ko ti ikjín jaa sen, tjenganta na ti tsoxienxin ko jaña tsono e kain sen kichuuna ixi nduaxin a kain ti nichja na ti ja anta nche enta ko jai tsikon sen ixi ja anta titikaonnta ley.

²⁵ *Ko ni je a judío, ni ó tsikitikaon Ncháina Jesús ó kjin anna na naa xroon ixi tsa i na juachjaon ixi kain ji in. Je o sine a na ntao tsikinixin en ídolo ko sine a na ijni ko ntau e iko tsikintji a jnié ba, ko xrochóna i na inaa nchri o xi je a ndoxi e o janchri e na.

Itsé na ndo Pablo ti ni ngo

²⁶ Tjume e ndo Pablo sabikao ndo sen noó ko ndúyaxin juexin kontjúá sen kao je e ndo. Ko tjume e kuixin in ndo ni ngo ixi xrochronga ndo ixi juexin kontjúá sen ko xrobikao nguungu sen nge e tikinixin en ndo Dio tsayé e xitaana.

²⁷ Ó xroxetja yaato nchakon, tjume e kaxin ni judío tsiki xin nunte Asia bikon na ndo Pablo ngaxin in ni ngo. Ko tjume e juinchekataya na kain chujni tjanya ko itsé na ndo Pablo.

²⁸ Ko stekoyako na ko ndachro na:

—Kainnta, ni tjanya Israel, tingijnananta. Xi ji in ichrji xa nguixin nunte ko tjako xa nge e je a jian kondé tjanaina, ko titikaon a xa ley kuetuan an ndo Moisés, ko titikaon a xa ningoina. Ko jai tsixraxin in xa kaxin ni griego ko nchekitja xa ngaxin in ni ngo tjúa.

²⁹ *Jaña ndachro na ixi seno tsikikon na chrikao ndo Pablo ndo Tróximo tjanya Éfeso ko xraxaon na ixi ndo Pablo tsikikao ndo xa ni ngo.

³⁰ Ko nchijí tjanya koñaon na ko kain na ikjui na itsé na ndo Pablo ko bingakjin na ndo ngandang nduja ni ngo ko bije e na ntachja ni ngo.

³¹ Ko tjaun na naaxrokónaxón na ndo ko naa xi comandante tetuan an xi soldado romano kuin en xa ixi nchijí tjanya Jerusalén stekoñaon na.

³² Tjume e xi comandante bikao xa xi soldado ko ni tetuen en xa ko binga na ikjui na ti ste kain na. Ko hora bikon na ixi ó kuiji xi comandante ko xi soldado kuintu e na ndo Pablo, ko í juaya i na ngajin ndo.

³³ Ko xi comandante konchjiñe e xa ko itsé xa ndo Pablo ko kuetuan an xa ixi tsinteexin na ndo yuu chika cadena. Ko tjume e juanchangi e xa na ngisen je e ndo ko nge e tsijinche e ndo.

³⁴ Ko chujni tsixra o nti a, kaxin na kuyako na naa nge e ko ikaxin na ijngo nge e. Ko xi comandante tienxin a xa sonda jaña stenze e na ixi tsango tuyako na. Tjume e kuetuan an xa ixi satsikao xa ndo Pablo ti no jii cuartel.

³⁵ Ko bijikao xa ndo ti tjasoxinni nchia, xrokonda kuama xa ndo Pablo ixi tjaun na xrojuaya na ngajin ndo.

³⁶ Ko kain ni sterué e ja in stetoyako na:

—Naatóñaxónnta xa.

Ndo Pablo chronga ndo ngajin na ixi chóna i ndo ijie

³⁷ Ko hora xroxraxin in na ndo Pablo ti jii cuartel, juanchangi e ndo Pablo xi comandante ko ndachro ndo:

—¿Á chao xronichja ngajinnta?

Ko je e xa juatingixin xa ko ndachro xa:

—Ja a, ¿á no a nichja ngigua griego?

³⁸ Méxin, ¿á je a ja a xi tjanya Egipto, xi juinchekataya chujni ko sabikao noó mil ni ña i ntajie?

³⁹ Tjume e juate e ndo Pablo ko ndachro ndo:

—Na i, jan an naa xi judío jongínaxin tjanya Tarso, nunte Cilicia. Jan an juixin naa tjanya tsango tjintee. Ko tjancha a ixi tintunana xronichja a chujni ji i.

⁴⁰ Tjume e xi comandante kuajon xa juachaxin ko ndo Pablo bake exin tutée ndo ti jii ti tajixinni nchia ko itja ndo juakoxin ndo ixi xrotenko na. Tjume e kuita na ko kuaxi ndo nichjexin ndo na ngigua hebreo ko ndachro ndo:

22

¹—Ja anta kichuuna ko sen tachrí, tin ennta nge e xrondachrjan ixi jan an chonda i ijie.

² Ko kuin en na ixi nichja ndo ngigua Hebreo ko ícha tenko na. Ko ndachro ndo Pablo:

3 *—Jan an naa xi judío jongínaxin tjanya Tarso nunte Cilicia. Ko nti i bangíxin tjanya Jerusalén ko jintakuanxin ngajin ndo Gamaliel ko titika on kain ti tjako ley tsikitikaon sen xranchrjen. Ixi jan an ícha junta a jian xrée ndo Dio ixi nchijí aséenna xranchi ja anta nche enta jai.

4 *Jan an sa ó bakengi ko bakoña uan sen titikaon Ncháina Jesús ko naabakóñaxón sen ko baxraxin in xi ko nchri ndo achjiso.

5 Ko xitaana tetuan an ko kain ni tachrí tayakon en ni ngo judío no e na kain ji i ixi je e na chjána na xroon tsayé e sen kichuuna judío ste tjanya Damasco. Tjume e sakjui nti a ixi bijée sen titikaon Ncháina ixi xrobikian sen nti i tjanya Jerusalén ixi tangi xrobikaon sen.

Xranchi kuaxi kuitikaon ndo Pablo Ncháina
(Hch. 9:1-19; 26:12-18)

6 'Nchakon juaso tjenja tjanya Damasco xranchi ngusine nchakon tuinxin ngandajinna tsango bingasáña naa xro i kuixin ngajni.

7 Ko kuaritsinga nunte ko tuinxin kuin an naa tée sen nichja ko ndachro: “Saulo, Saulo, ¿sonda rua nana ko sonda ningakonnana?”

8 Ko jan an juanchangi: “¿Ngisen ja anta?” Ko juate e ndo: “Jan an ndo Jesús tjanya Nazaret, ndo ja a tengia ko ningakon én.”

9 Ko sen biki an bikon sen xro i ko xronka sen ko je e sen tsikien a sen tée sen nichja.

10 Ko jan an juanchangi: “¿Nge e tjauannta sinta a?” Ko juate e ndo ko ndachro ndo: “Taya satjia ko tixin ia tjanya Damasco ko nti a xrontatjua kain nge e sinche e.”

11 Ko kondeexin xro i me e í bikon a, méxin, sen biki an bingatséna sen ko sabiki an sen tjanya Damasco.

12 'Nti a bake e naa ndo ndatin in ndo Ananías, ndo me e jian kuitikaon ndo ley tsikajon ndo Moisés. Ko kain ni judío jii tjanya Damasco tsango chónde e na ndo juasaya.

13 Ko ndo Ananías kuji ndo kuitsjena ndo ko hora kuji ndo ndachijina ndo: “Kichian Saulo, taye é juachaxin ixi íjngo tsikuan.” Ko nduaxin tuinxin bikon.

14 Ko ndachijina ndo: “Ndo Dio kuitikaon sen xrachrejina kuincha a ndo ja a ixi tsono a nge e tjauan ndo ko ixi tsikuan ndo tsango jian ko tsin en ti xronichja ndo.

15 Ko ja a xrochronga nge e nduaxin bikuan ko nge e kuin en ngajin kain ni jii ngata a nunte.

16 Ko jai í chuen a ícha. Taya ko tikitéxian nombrée Ncháina Jesucristo ixi me e tsijmaxin jia.”

Ndo Dio tajon ndo ixra ngajin ndo Pablo

17 'Ko nchakon ikjanna tjanya Jerusalén tjume e ikjui ni ngo kuinichja a ndo Dio ko bikon Ncháina,

18 ko ja in ndachijina ndo: “Jaiko tachrxexian tjanya Jerusalén ixi chujni nti i tsitikaon a na chijnina tsjakoa ja a.”

19 Tjume e jan an ndachrjan: “Ncháina, je e na no e na ixi seno jan an bakji kain ni ngo ko kuatse sen titikáoa ja a ko baxraxin in sen ndo achjiso ko bajaya ngajin sen.

20 *Nchakon naakóñaxón na ndo Esteban, ndo nche e xraá, banichja chijnia, jan an kaxon nti a bake é ko ndachrjan ixi chao ndatsen en ndo ko jan an tsja a mantée ni kóña ndo.”

21 Ko Ncháina ndachijina ndo íjngo: “Satjia ixi xroxruan an ikjin sinchekuen én ni je a judío.”

Ndo Pablo jichón en ndo nge e xichro xi comandante

22 Ni tsixra o je o kuin en na kain ji i ko tjume e kuaxi na kuyako na:

—Tsen en xi ji i, jan ana tjauan ana tsechón xa.

23 Ko ícha stetoyako na ko stetjánka na mantée na ko kaxon stetjánka na inche.

24 Ko xi comandante kuetuan an xa ixi xroxraxin in na ndo Pablo ngajin in cuartel. Ko kuetuan an xa ixi tsande e na ndo ixi jaña tsono e xa sonda ningakon en na ndo.

25 Ko juexin kuintee na ndo ixi tsjaya na ngajin ndo, tjume e ndo Pablo ndache ndo xi capitán jii nti a:

—¿Á jii juachaxin tsjayanta ngajin naa xi romano, xratóñe a xa ijje?

26 Ti kuin en xi capitán ji i, ikjui xa kuichronga xa ngajin xi comandante ko ndachro xa:

—Tsje é nge e sinche e ixi xi ji i naa xi romano xa.

27 Tjume e xi comandante konchjiñe e xa ngajin ndo Pablo ko juanchangi xa:

—¿Á nduaxin ja a naa xi romano?

Ko Ndo Pablo juate e ndo:

—Jaán, nduaxin.

28 Xi comandante ndachro xa:

—Jan an juenga ña itsjé tomi ixi kóñana naa xi romano.

Tjume e ndachro ndo Pablo:

—Jan an jongínaxin nti a.

²⁹ Ko tjume e ni xrojuaya ngajin ndo Pablo bingaxinton ña ko kaxon xi comandante ixi kuin en ña ixi ndo Pablo naa xi romano. Ko xronka ña ixi tsixraxin in ña ndo ndo achjiso.

Ndo Pablo nichje e ndo ni tetuan an ni judío

³⁰ Ko ndúyaxin xi comandante tjaun xa tsono e xa nge e ijje juankata a ni judío ngajin ndo Pablo. Tjume e koxindanga xa chika cadena jichroaxin ndo ko kuetuan an xa ixi xroxra o kain xitaana tetuan an ko kain xi tetuan an ni judío, ko tjume e kuantsje xa ndo Pablo ko bake e xa ndo ti ste kain ña.

23

¹ Tjume e ndo Pablo jian tsje e ndo ni tituan an ni judío ko ndachro ndo:

—Kichuuna, ndo Dio jitsje e ndo ixi jian juinta a jan an kain nchakon.

² Ko xi Ananías, xitaana tituan an, kuituan an xa ngajin ni ste tjenka ndo Pablo ixi tsande e ña itja ña ro a ndo.

³ *Ko juate e ndo Pablo:

—Ndo Dio tsjaya ndo ngajinnta kaxon ixi ndako a nche enta. Ja anta ritjénnta ixi sinchéñanta jje xranchi tituan an ley. Méxin, ¿sonda titikaon anta ley ko kuituan annta bikaonna?

⁴ Tjume e ni ste nti a ndachro ña:

—¿Á jaña nichjangí e xitaana tetuan an ne e ndo Dio?

⁵ Ko ndachro ndo Pablo:

—Kichuuna, jan an nóna i á xi ji i ndotaana ícha tetuan an, ixi ndachro xroon chijnie ndo Dio: “Xronichjangíe a chujni tituen en tjajnána.”

⁶ *Ko ndo Pablo kono e ndo ixi kaxin ni jii nti a ni partidoe xi saduceo, ko ikaxin ña ni partidoe xi fariseo. Ko séen ndachro ndo:

—Kichuuna, jan an naa ni fariseo ko sen nía kaxon fariseo sen. ¿Sonda ja anta nchekamaninta ijje ixi jan an titika on xroxechón ni tsiken en?

⁷ Ko juexin ndachro ndo ji i, tjume e ni fariseo ko ni saduceo kuaxi juakaxin kichuu ña ko je a naxraje o xraxaon ña, méxin chjeja ña.

⁸ *Ixi ni saduceo ndachro ña xroxechón a ni tsiken en ko kaxon ndachro ña xro an sen ángel jii ko xro an espíritu. Ko ni fariseo titikaon ña kain me e.

⁹ Tjume e kain ña kuintee ña, ko kaxin xi fariseo tjako ley bingatjen xa ko ndachro xa:

—Xi ji in, jan anna xro an nge e ti ndako a kuitjána juinche e xi ji in. Á nchéxin naa espíritu o naa ángel nichje e xa.

¹⁰ Ko tsango koñao chujni ste nti a. Méxin xi comandante xronka xa ixi batsoña ña ndo Pablo, ko kuetuan an xa ixi satsikao xa ndo ti jii cuartel.

¹¹ Ko tiie me e konoxin Ncháina ngajin ndo Pablo, ko ja in ndachro ndo:

—Xronka ia Pablo ixi xranchi juakua chijnina nti i tjajna Jerusalén, jaña kaxon tsjakoja tjajna Roma.

Juaon ña ixi naatsóñaxón ña ndo Pablo

¹² Ndúyaxin kaxin ni judío xraxaon ña xranchi naatsóñaxón ña ndo Pablo. Ko ndachro ña ixi nombrée ndo Dio nduaxin tson en ji i ko xro an nge e sine ña ko xro an nge e tsi i ña tsjexinja tson en ti xraxaon ña.

¹³ Ko xranchi yuu ikán* ña xraxaon ña ixi jaña sinche e ña.

¹⁴ Tjume e ikjuí ña ti ste xitaana tituan an ko ni tetuan an ni judío ko ndachro ña:

—Jan anna juaona ixi nombrée ndo Dio tson en ji in, sine ana ko tsi ana tsjexinja naatsóñaxónna xi Pablo.

¹⁵ Méxin, ja anta ko kaxin ni tituen en ni judío tjanche enta xi comandante ixi tsika o xa xi Pablo ndúya ngajinnta, xrondachronta ixi tjaunnta ícha tsono anta kondee je e xa ko jan anna xrochon anna ngatja cha o ko naatsóñaxónna xa ko ítsi a xa nti i.

¹⁶ Ko naa chán kueen ndo Pablo tsikin en chán nge e tjaun ña sinchekao ña ndo Pablo, méxin ikjuí xjan ti cuartel kuichronga chán nge e kuin en chán stetjao ña.

¹⁷ Tjume e ndo Pablo kuiye e ndo naa xi capitán ko ndachro ndo:

—Tiku a chán ji i ngajin xi comandante ixi chóna chán naa nge e xrochronga chán ngajin xa.

¹⁸ Ko xi capitán sabikao xa chán ti jii xi comandante ko ndachro xi capitán:

—Xi Pablo jii ndo achjiso ndachijina xa ixi tsikian chán ji in nti i ixi tjaun chán xrontatjua chán naa nge e.

¹⁹ Tjume e xi comandante itsé xa itja chán ko kuachrjendaka o xa chán ko juanchangi xa: —¿Nge e tjaun xrondachijiana?

²⁰ Tjume e ndachro chán:

—Ni judío tjaun na tsjancha a na ixi ndúya ndúyo siku a ndo Pablo ti ste ni judío tituan an. Ko xrondachro na ixi tjaun na tsjanchangí e na ndo Pablo ikaxin nge e.

²¹ Titikaon a ja a ti ndachro na ixi xranchi yuu ikán xi imao xrochon en xa ngatja cha o ko nduaxin nombrée ndo Dio sine a xa ko tsi a xa nge e tsjexinja naatsónaxón xa ndo Pablo. Ko jai stehón en xa nge e xichrua ja a.

²² Ko xi comandante kuetuen en xa chán xrondache a chán ninaa ngisen nge e chronga chán ngajin xa.

Xro an na ndo Pablo ngajin xi gobernador Félix

²³ Tjume e xi comandante kuiye e xa yuu xi capitán ko kuetuan an xa ixi tsjejo xi capitán yuu ciento chujni tsjixin tutée ko yuu ikán ko ní ite xi tseta a kunxin ko yuu ciento xi tsikao chika lanza, ko satsji xa tjanya Cesarea xranchi hora na tie.

²⁴ Ko kuetuan an xa sinchekama na kunxin tseta a ndo Pablo ko ndachro xa ixi xro an nge e tson en ndo ko jian tsiji ndo ti jii xi gobernador Félix.

²⁵ Ko xi comandante ikjin xa naa xroon, ndachro:

²⁶ “Jan an xi Claudio Lisias xruan an juajna ngajinta Félix gobernador.

²⁷ Ni judío nti i itsé na xi ji i ko tjaun na naaxrokónaxón na xa. Ko hora konóna jan an ixi je e xa naa xi romano, biki an xi soldado ko bingjina xa.

²⁸ Ko tja on tsonóna nge e ijie chóna xa, méxin, biki an xa ngajin ni tetuan an ni judío.

²⁹ Ko konóna ixi tjankata a na xa ijie ixi ley chóna na. Ko xro an ijie chóna xa tsikinixin en ixi naaxrokónaxón na xa o xroxraxon in na xa ndo achjiso.

³⁰ Tjume e kuin an ixi ni judío xraxaon na naaxrokónaxón na xa, méxin xruan an xa ngajian ko kuetuan an kain ni me e itsji na ngajian ko xrontatjua na nge e ijie chóna xa.”

³¹ Ko ni soldado juinche e na xranchi kotuen en na ko sabikao na ndo Pablo tie me e tjanya Antípatris.

³² Ko ndúyaxin xi soldado kuj xín tutée ikjan xa ti cuartel. Ko xi steta a kunxin sabikao xa ndo Pablo.

³³ Ko nchakon kuiji na tjanya Cesarea kuajon na xroon tsikjin xi gobernador ko kaxon kuajon na ndo Pablo ngajin xa.

³⁴ Ko juexin juinchekuanxin xi gobernador xroon, tjume e juanchangi xa no tjanée ndo Pablo ko kono e xa ixi tjanée ndo tjanya Cilicia,

³⁵ ko ndachro xa:

—Tjume e tsin an nge e xrondachrua tsija ni tjankata a ijie.

Ko kuetuen en xa ikaxin xi soldado tsikao xa ndo Pablo naa nchia tsijnchéña xi Herodes.

24

Ndo Pablo nichja ndo ngajin xi Félix

¹ Kuatsinga na ó nchakon, tjume e xi Ananías, xitaana tsango tituan an, kuiji xa tjanya Cesarea. Kaxon bikao xa kaxin ni tetuan an ni ngo ko naa xi nchéña ijie ndatin in Tértulo. Xi me e nichje e xa xi gobernador ko tjankata a xa ijie ngajin ndo Pablo.

² Nchakon bikao na ndo Pablo, xi Tértulo kuaxi xa bankata a xa ijie ngajin ndo Pablo ko ndache xa xi Félix:

—Gobernador ixi juasianta tsango juaxruxin stena ko juasiaa ja anta ixi tsango jian no anta tituan annta tjanana.

³ Tsango jian ja anta Félix. Ko juasianta ixi kain nge e chjánananta.

⁴ Tjaun ana sintachrjan ananta, méxin, tinóatánana ixi nchion tin ennta nge e xron-dachrjanna.

⁵ Xi ji in jii xa xranchi naa ichin tinga nguixin no ko ncheye e xa ni judío ko ncheketo xa na. Je e xa tituen en xa ni titikaon chijnie naa xi tsikj xín tjanya Nazaret.

⁶ Je e xa kaxon xrojuinchekítja xa ní ngo ko jan anna itséna xa ko xrojuintañana ijie ngajin xa xranchi tituan an ley chondana.

⁷ Ko tjume e xi comandante Lisias juike e xa ko kuantsjenana xa xi Pablo.

⁸ Tjume e kuetuan an xi comandante ixi ni tjankata a ijie ngajin xi Pablo tsij na ngajinta. Ja anta chao tjanchangí enta xi Pablo, me e tsono anta jian nge e ijie chóna xa.

⁹ Ko ndachro kain ni judío jii nti a:

—Kain ji i nduaxin.

¹⁰ Tjume e xi gobernador juakoxin itja xa ixi xronichja ndo Pablo. Ko ndachro ndo Pablo:

—Juaxruxin xrontatjunta ixi xro an ijje chonda ixi nóna ja anta nduaxin jian nchéñanta ijje kondee tjajna nti i ko itsjé nano tituan annta nti i.

¹¹ Ja anta kaxon xrokono anta ixi nandá chónnda teyuu nchakon juaso tjajna Jerusalén ixi nti a tsajonxin juasaya ngajin ndo Dio.

¹² Ko ni tjankata ana na ijje jai, kuitja ina na ritetoki an xrojan chujni, ko nichjangía i chujni ste ni ngo ijje ko kaxon ni ste ni ngo nchín ko chujni tjajna xro an nge e ntatjanna.

¹³ Ko ni ji i jua i xrondachro na ixi jaña juinta a.

¹⁴ Ti nduaxin ndachrjan ixi nta a ixra ngajin ndo Dio, ndo baktikaon sen tachri nana xranchi tetuan an cha o jian. Ko je e na ndachro na ixi ndako a nge e titika on. Ko kaxon titika on kain nge e jitaxin ley ko titika on nge e tsikjin sen kuanichja chijnie ndo Dio ó sa ó.

¹⁵ Kaxon titika on ndo Dio xranchi titikaon je e na ixi ndo Dio sinchexechón ndo kain ni jian ko kaxon kain ni ña i.

¹⁶ Méxin, taa juachjaon ixi kain nchakon tjúa tsake e aséenna ngajin ndo Dio ko ngajin chujni.

¹⁷ *Kuatsinga kaxin nano kuaji jée tjajna, ko jai ikjanna tjajnána ixi tsajon tomi ngajin ni nóa jii tjajnána ko kaxon tsajon juasaya ngajin ndo Dio.

¹⁸ Ko bake é ngaxin in ni ngo, ko tjume e kaxin ni judío tsikj xin nunte Asia kuitjana na nti a ko hora me e juexin juntatjúá aséenna ko tsjé a chujni riki an ko xro an ngisen kuetoiki an.

¹⁹ Ko siá me e xrojuinta a, ni me e xrokuij na nti i xrokjuankata ana na ijje.

²⁰ Ko ni ste nti i xrochronga na nge e ijje richonda siá nduaxin xrojan ti ndako a juinta a.

²¹ *Anchéxin xrondachro na ixi nchakon bake e ngajin na séen kuyako ko ndachrjan jan an: “Jai stenchéñantana ijje ixi titika on xroxechón ni tsiken en.”

²² Ko juexin kuin en xi Félix nge e ichro na, ko je e xa jian no e xa nge e xrondachro chijni tjako ndo Pablo, méxin juinchéna i xa ijje ngajin ndo Pablo ko ndachro xa:

—Tsija xi comandante Lisias me e tsjéxin tsonóna nge e ijje tsama xi ji i.

²³ Ko kuetaan en xa xi capitán ixi tsendáa xa ndo Pablo ko chao tsaji ndo ko tsayé e ndo sen chúxin ndo, tsiji sen tsitsje e sen ndo.

²⁴ Ko kuatsinga kaxin nchakon, bijikao xi Félix janchri e xa nchri Drusila, nchri me e naa nchri judía. Ko kuetaan an xa tsjirué e na ndo Pablo ixi xrochronga ndo xranchi chao xrochuntia na ndo Jesucristo.

²⁵ Ko ndo Pablo juako ndo xranchi sinche e na jian ko xranchi tsetuen en na aséen na ko sinche a na ti ndako a ko xranchi tsij nchakon ndo Dio sinchéna ndo ijje ngajin kain chujni. Ko xi Félix kuin en xa, me e xronka xa, ko ndachro xa:

—Jai satjia ko tjume e tsiya a naa nchakon ti xro an ixra xrochondana.

²⁶ Ko xi Félix tjaun xa ixi ndo Pablo xrokuajon ndo tomi ngajin xa; me e xrokuajanda xa ndo, méxin, nanaó bakiye e xa ndo.

²⁷ Ko jaña kon en ko kuatsinga yuu nano, ko xi Félix juinche e xa nge e tjaun ni judío, méxin kuintu e xa ndo Pablo ngaxin in ndo achjiso ko tjume e kuintu e xa ti ixra kuanche e xa ko naa xi ndatin in Porcio Festo kuayé e xa ixra me e.

25

Ndo Pablo jii ndo ngajin xi Festo

¹ Xi Festo kuiji xa tjajna Cesarea ixi tsjangixin xa sinche e xa ixra gobernador ko nchakon nínxin sakjui xa tjajna Jerusalén.

² Ko xitaana tetuan an ko kaxin ni judío tsango tetuan an juankata a na ijje ngajin ndo Pablo.

³ Ko kaxon kuinóatée na xrokuetaan an xa xrokjui ndo Pablo tjajna Jerusalén ixi ó tsjao na ixi xroxruan an na kaxin xi xrochon en xa ngatja cha o ko naatsóñaxón xa ndo Pablo.

⁴ Ko xi Festo juate e xa ixi ndo Pablo jii ndo ngaxin in ndo achjiso tjajna Cesarea ko kaxon je e xa tuinxin xrokjan xa tjajna Cesarea.

⁵ Ko ndachro xa:

—Kaxin ja anta xro icha tetuan annta itsjina tjajna Cesarea. Ko siá nduaxin chónnda xi Pablo ijje, nti a sintaña ijje.

⁶ Ko xi Festo bake e xa tjajna Jerusalén xranchi ijni ó ite nchakon ko tjume e ikjan xa tjajna Cesarea. Ko ndúyaxin bake e xa nunte ti nchia tetuanxin xa ko kuetaan an xa tsika o na ndo Pablo.

⁷ Ko hora kuixin in ndo Pablo, ni judío kuixin tjajna Jerusalén konchjiñe e na ngandajin ndo ko bankata a na ndo ijje. Ko ti ndachro na nduaxin a ixi je o nchekamaxón na ndo ijje.

⁸ Ko nichja ndo Pablo ko ndachro ndo:

—Xro an ijie junta a ngajin ni ngo Jerusalén ko xro an nge e ndachrjan kontree xi emperador ne e Roma ko jian kuiteka on ley ne e sen judío.

⁹Ko xi Festo tjaun xa jian xrokuitu e xa ngajin ni judío, méxin, juanchangi e xa ndo Pablo ko ndachro xa:

—¿Á tjaun tsjia tjanya Jerusalén ixi nti a sintañaxian ijie?

¹⁰Ko ndo Pablo juate e ndo:

—Na i, jan an ó ritjén ti tóñaxin ijie kondee xi gobierno romano ko chao nti ó tsóñaxin ijie ko ó no anta xro an ijie junta a ngajin ni judío.

¹¹Siá nduaxin xrojan nge e ti ndako a junta a tikinixin en tsen enna, jan an xrakon a ixi tsen enna. Ko siá nduaxin a ijie tjankata antana chujni ji i, xro an ngisen chóna juachaxin tsajonna ngajin ni tjankata ana ijie. Jan an tjánchá ixi xi tsango tetuan an jii tjanya Roma sinchéñana xa ijie.

¹²Tjume e xi Festo juexin juao xa ni tingijna nchéña xa ijie, ja in ndache xa ndo Pablo:

—Ja a juanchia ixi xi tsango tituan an sintaña a xa ijie. Itjia ngajin xi me e.

Ndo Pablo jii ndo ngajin xi rey Agripa

¹³Ko kuatsinga kaxin nchakon, tjume e xi rey Agripa ko janchri e xa nchri Berenice kuiji na tjanya Cesarea ixi tsajon na juajna xi Festo.

¹⁴Ko nti a bake e na itsjé nchakon, me e xi Festo beki e xa xi rey ixi ndo Pablo ko ndachro xa:

—Nti i jii naa xi tsikintu e xi Félix ngaxin in ndo achjiso.

¹⁵Ko nchakon bake é tjanya Jerusalén xitaana tetuan an ko ni tetuen en ni judío kuiji na ngajin ko juankata a na ijie ngajin xi me e ko juanchia na tsen en xa.

¹⁶Ko jan an juata a: “Jajna ni romano jua i xrondachrjanna ixi tsen en naa chujni; xrokonda sa ó chujni me e tsikon ko tsin en ni tjankata a ijie ko chao xrondachro na á nduaxin chóna jie ni me e.

¹⁷Ko nchakon kuiji ni judío nti i, jan an í chuan i ícha, tuinxin ndúyaxin ikjui nchia tóñaxin ijie ko kuituan an tsika o na xi Pablo.

¹⁸Tjume e konchjiñe e ni judío ko xro an ijie juankata a na xa xranchi jan an xraxa on xrondachro na.

¹⁹Je o bakoñao e na xa ixi xranchi bakajon xa juasaya ngajin ndo Dio ko ningakon en na xa ixi kondeexin naa xi ndatin in Jesús ó tsiken en xa ko xi Pablo ndachro xa ixi tsixechón xa.”

²⁰Jan an nóna i xranchi xrojuantaña ijie, méxin juanchangi a xa á tjaun xa itsji xa tjanya Jerusalén ixi nti a sinchéña na ijie ngajin xa.

²¹Ko je e xa juanchia xa ixi xi tsango tetuan an Roma xrojuinchéñe e xa ijie. Me e jan an kuetaan an ixi nti ó tsitu e xa ngaxin in ndo achjiso tsjija nchakon xroxruan an xa tjanya Roma.

²²Tjume e xi Agripa ndache xa xi Festo:

—Kaxon jan an tja on tsin an inge e xrondachro xi me e.

Ko ndachro xi Festo:

—Ndúya tsin en nge e xrondachro xa.

²³Ko ndúyaxin xi Agripa ko nchrinchri e xa nchri Berenice kuixin in na nchia tóñaxin ijie ko bikao na xi soldado tetuan an ko kaxon kaxin ni tetuan an tjanya nti a. Tjume e kuetaan an xi Festo ixi tsixrakua ndo Pablo.

²⁴Tjume e ndachro xi Festo:

—Ja anta rey Agripa ko kainnta xrastenta nti i. Nti i jii xi ji i. Tsango itsjé ni judío bankata a na xa ijie tjanya Jerusalén ko kaxon tjanya Cesarea ko séen stetoyako na tjanchia na tsen en xa.

²⁵Ko xro an ijie kuitjá tikinixin en tsen en xa. Ko je e xa juanchia xa ixi xi César sinchéñe e xa xi ijie. Méxin, xraxa on xroxruan an xa tjanya Roma.

²⁶Ko jan an nóna i nge e ijie chóna xa ixi xrokjin xroon tsayé e xi César, méxin, kuetaan an bika o na xa nti i ngajin ja anta rey Agripa ko kainnta ti stenta nti i, tjanchangi enta xa xranchi kuaxi kon en ji i ixi tja on tsonóna nge e xrokjin

²⁷ixi jua i xroxruan an naa xi jije e ndo achjiso satsji tjanya Roma ko nóna i nge e ti ndako a juinche e xa.

26

Ndo Pablo jii ndo ngajin xi rey Agripa

¹Tjume e xi rey Agripa ndache xa ndo Pablo:

—Chao xronichja ixi tsóña a ijie.

Tjume e ndo Pablo juatsin in tja ndo ko kuaxi nichja ndo, ko ndachro ndo:

² —Juaxruxin ritjén ixi xronichja ngajinnta, rey Agripa, ko xrondachrjan kain ijie tjankata ana ni judío.

³ Ko ja anta jian no anta ley ko nge e nche e ni judío, ko ja anta no anta nge e tjakaxin kichianna. Méxin, tjancha anta tsin ennta jian nge e xrondachrjan.

Ndo Pablo teki ndo xranchi kuanche e ndo sa ó

⁴ Kain ni judío ó no e na xranchi bake e seno tjajnána ko tjajna Jerusalén ti xranchiona.

⁵ *Kaxon no e na jian ko chao xrochronga na ixi xranchiona, jan an fariseona. Ko ni fariseo ícha titikaon na ley.

⁶ Ko jai jitoñana ijie ixi jan an titika on nge e tsindachro ndo Dio tsajon ndo ngajin sen tachrína.

⁷ Sen teyuu tjajna tsikachrjexin ndo Israel stechón en sen ixi tsikon sen ixi tsayé e sen nge e tsindachro ndo Dio. Je e sen tajon sen juasaya ngajin ndo Dio tiie ko nchakon. Jai tin ennta, rey Agripa, jan an kaxon richon an ji in, ko kondeexin me e tjankata a na ijie ni judío.

⁸ ¿Á titikaonnta ja anta ixi ndo Dio sinchexechón ndo chujni tsiken en?

Ndo Pablo kuaningakon en ndo ni titikaon Ncháina Jesucristo

⁹ *Jan an sa ó kuaxraxa on xranchi xrokon in ni titikaon ndo Jesús, ndo tjajna Nazaret,

¹⁰ ko jaña juintekian chujni tjajna Jerusalén ixi juachaxien xitaana tetuan an, kuaxraxin in itsjé ni baktikaon ndo Jesús ngaxin in ndo achjiso. Ko nchakon naabakóñaxón na sen kaxon jan an jaña xraxa on.

¹¹ Ko nanaó bajintani a sen titikaon Ncháina* ixi í xrokuitikaon a sen ndo. Kain ji i kuantaa ngujngu ni ngo ixi tsango baningakon an sen, méxin barua a sen tjajna sabinga sen.

Beki ndo Pablo xranchi kuaxi ndo kuitikaon ndo Ncháina Jesucristo

(Hch. 9:1-19; 22:6-16)

¹² Jaña rixraxa on sakjui tjajna Damasco ixi juachaxien xitaana tituan an.

¹³ Ko ja anta rey, tsono anta ixi ngusine nchakon me e ngatja cha o bikon naa xro i bingasáña nguixin ngandajinna, ko tsango jitóngixin xroi ícha ixi chjiixrué chjiixro.

¹⁴ Ko kainna kuari ina nunte ko jan an kujn an nichja naa ngisen ngigua hebreo ko ja in ndachijina sen: “Saulo, Saulo, ¿sonda tsango ningakonnana ko ritengiana? Ja ua rincheni e asáan xranchi naa kuxinta tjanka tutée ikon chika tikao ntagarocha.”

¹⁵ Ko jan an juanchangi: “¿Ngisen ja anta?” Ko sen me e juate e sen: “Jan an ndo Jesús, ngisen ja a ningakon én ko tengia.

¹⁶ Jai tingatjen, take exian tutáa ixi jan an kuajon juachaxin kuin en nge e ndachrjan ixi jan an kuincha a sinche e ixra ngajin ko tsekia nge e kuin en ko tjume e tsikuan nge e sinta a jan an.

¹⁷ Jan an tsingijna ixi xro an nge e sinta a ni tjajnána ko ni jée nunte. Ko jai tetuan an satsjia tsjako e na nge e xrontatjua.

¹⁸ Méxin, tetuan an satsjia ti ste ni titikaon a ixi tsakintje e ikon na ko ítsaji a na cha o naxixe e ixi chao me e xrokjan cha o tingasáña ko íxrochóna i Xixron anxrée juachaxin tsetuen en xa aséen na. Ko jai xrochuntiana na jan an ko jan an tsayá a na ko sintama a ijie chóna na ko tsayé e na juachaxin tsake e na ti no tsake e kain sen titikaonna”, ichro Ncháina Jesucristo.

Ndo Pablo titikaon ndo nge e kuin en ndo

¹⁹ Méxin, rey Agripa, jan an kuitika on nge e kuin an ti kujxin ngajni.

²⁰ *Sa ó juintakuan an ni tjajna Damasco ko tjume e ni tjajna Jerusalén, ko nchijí nunte Judea ko kaxon juintakuan an ni je a judío. Juako a na ixi tsintu e na ti ndako a nche e na ko xrokjan na tsitikaon na ndo Dio, ko sinche e na ti jian.

²¹ Kondeexin ji in, ni judío tséxinna na ngaxin in ni ngo ko tjaun na naatsóñaxónna na.

²² Ko juasie ndo Dio bingijnana ndo me e jian ritjén jai, ko xrantakuan an ni nóa ko ni tetuan an ko xro an inaa nge e nichja, je o tjako chijni bajako sen profeta ko ndo Moisés.

²³ *Ndo Cristo, xrokonda xrokuen en ndo ko xroxechón ndo nchakon nínxin ixi jaña tsjakoxin ndo xranchi tsingasáñaxin ni ste nti i ko ni ste ikaxin tjajna ixi tsitjáña i aséen na.

Nge e juatingéxin xi Agripa ngajin ndo Pablo

²⁴ Ndo Pablo jaña beki ndo ti kon en ndo ko tjume e xi Festo séen kuyako xa:

—Pablo, ja a tsijinchetjáña jáa ixi tsango nchekuanxian xroon.

²⁵ Ko juatingéxin ndo Pablo:

—Na i, juintatjáña i jáana. Festo, nge e ndachrjan me e jian ko nduaxin.

²⁶ Nti i jii xi rey Agripa. Je e xa chúxin xa jian kain nge e kon en. Méxin, chao rinichja ixi je e xa ó no e xa kain ji i ko kain ji i ti kon en, je a imao kon en.

²⁷ Ja anta, rey Agripa, zá titikaonnta ti bajako ni kuachronga chijnie ndo Dio ó sa ó? Nóna ixi ja anta titikaonnta nge e bajako sen.

²⁸ Juate e xi Agripa ko ndachro xa:

—Bananchichjaon ko jan an kaxon xrokuitika on xi Jesús.

²⁹ Tjume e ndachro ndo Pablo:

—Á bananchichjaon nge e xrondachrjan o itsjé nge e, ndo Dio tjaun ndo je a ja anta xrokuitikaonnta ndo. Kaxon tjaun ndo ixi kain ni stetin en nti i xrokjan na xranchi jan an titika on ndo ko je e na tsechruxin a na chika cadena xranchi jan an.

³⁰ Ko juexin nichja ndo Pablo, tjume e bingatjen xi rey, ko xi gobernador, ko kaxon nchri Berenice, ko kain ni ste nti a.

³¹ Ko kain na kuachrje na ko juintejaio kichuu na ko ndachro na:

—Xro an ijie chóna xi ji i, tikinixin a tsen en xa ko xrobake a xa ndo achjiso.

³² Tjume e xi Agripa ndache xa xi Festo:

—Chao xrokuajandani xa saxrokjui xa siá xrojuanchia i xa ixi xi tsango tituan an sinchéña xa ijie ngajin xa.

27

Ndo Pablo xruan an na ndo tjajna Roma

¹ Tjume e kuetuan an na ixi satsjina nunte Italia. Ko je e na ndache na naa xi capitán ndatin in Julio ixi tsikao xa ndo Pablo ko ikaxin ni jii ngaxin in ndo achjiso. Je e xa naa xi policia nche e xra ngajin xi Augusto César.

² Tjume e kuixi inna naa ntábarco tsikj xin no puerto Adramitio, ko ntábarco me e ó satsji ntáa ti jii puerto nunte Asia. Kaxon steki anna xi Aristarco tikinixin en xa tjajna Tesalónica kondee nunte Macedonia.

³ Ko ndúyaxin juasona puerto tjajna Sidón. Ko xi Julio jian juao xa ndo Pablo ko tjume e kuajon xa juachaxin ixi tsitsje e ndo ngisen chúxin ndo nti a ixi tsingjina sen ndo.

⁴ Ko tjume e sajuixinna tjajna Sidón ko juasona naa isla ndatin in Chipre no ndatsjonxin kjon, kondeexin chrinto soji.

⁵ Tjume e kuatsingataonna ndachaon ko juasona tjenka tjajna Cilicia ko Panfilia ko tjume e juasona tjajna Mira nunte Licia.

⁶ Ko nti a xi capitán kuitja xa naa ntábarco tsikj xin tjajna Alejandría ko ntáa me e satsji ntáa nunte Italia ko ndachro xa tsixin inna ntáa ixi satsiki anna ntáa tjajna me e.

⁷ Itsjé nchakon yao kuintekjina ko tsango tangi juasona tjenka tjajna Gnido ixi chrinto tintuna ina itsjina taka, méxin kuatsingana ngandajin isla Creta ko juasona tjenka tjajna Salmón.

⁸ Ko jaña tsango tangi kuatsingana nguixin nunte me e ko juasona naa tjajna ndatin in Puerto Jian tjenka tjajna Lasea.

⁹ Ko juintatjáñana itsjé nchakon, ko jai ícha tangi bajinxinni ntábarco ngata a ndachaon ixi ó tsij nchakon tonkin. Méxin, ndo Pablo ndache ndo na:

¹⁰ —Kainnta tin ennta nge e xrondachrjan. Tikon ixi tsatsingana itsjé juachjaon siá satsjina ixi sinchetjáñana ntábarco ko kain nge e jitinga ntáa ko kaxon jajna.

¹¹ Ko xi capitán tetuan an ícha kuin en xa ti ndachro xi teka ntábarco ko nchée ntáa ko kuitikaon a xa ti ndachro ndo Pablo.

¹² Ixi puerto me e je a jian tsitu eni nchakon tonkin, méxin kain na xraxaon na ixi ícha jian tsachrxixinna nti a ixi tjaun na tsijina tjajna Fenice, naa puerto nunte Creta ti ndatsjonxin chuya ko níjin, ko nti a xrokuitunana tsatsingaja nchakon tonkin.

Chrinto soji ngata a ndachaon

¹³ Tjume e kuaxi binga chrinto kuixin no níjin ko soji a chrinto, méxin xraxaon na chao satsjina.

Tjume e kuachrxixinna nti a ko juasona ngande e isla Creta.

¹⁴ Ko tuinxin kuji naa chrinto soji ndatin in noroéste kuande e ntábarco.

¹⁵ Ko kuaxi chrinto me e kuncheka ntábarco ko jua i sakjuina ixi ti tjaun xi teka ntáa ixi konchekana chrinto. Méxin, kuintu e xa ntábarco bikao chrinto.

¹⁶ Tjume e juasona naa isla nchín ndatin in Clauda ixi nti a je a soji jitinga chrinto. Ko tsango tangi juentakajinna ntábarco nchínchín jitenixin tuenxin ntábarco ijie.

¹⁷ Ko juexin juasitianna ntábarco nchínchín ngande e ntábarco ijie ko kuintexinna ino ntábarco ijie ixi xro an nge e tson en ntáa. Ko stexronkana ixi xroké e nchese ntábarco ti

xrojuasona nunte Sirte. Ko juinchexingajin xa manta tikao ntábarco ko kuintu e xa je o chrinto satsikao ntáa.

¹⁸ Ko ndúyaxin xra tsanga jitinka chrinto, kuaxi xa kuintjí xa kain nge e jitikao ntábarco chringi ndachaon.

¹⁹ Ko nchakon nínxin tjánana juankaxinna nge e xrokonde a ntábarco ngangí ndachaon.

²⁰ Itsjé nchakon kondeexin itjuj bikon ana chjiixro ko nchanotsé ixi tsango jitinga chrinto ko xraxa onna xrokunteken enna.

²¹ Ko kuatsinga itsjé nchakon juine ana ko ndo Pablo bingatjen ndo ko ndachro ndo:

—Xrokuitikaonnta nge e ntatjunta ko xrokuachrxjexin ana nunte Creta, ko jaña xrokuen a kain ji i.

²² Ko jai ta inta juachjaon ixi xro an ngisen tsen en maski ntábarco tsitjáña ntáa.

²³ Ixi nakonkjin bikon naa ndo ángel tsixrua an ndo Dio, ndo titika on ko nta a xrée.

²⁴ Ko ndo ángel ndachijina ndo: “Xrakon a Pablo. Xrokonda tsjasua ti jii xi César tetuan an ko kondaxian ja a, ndo Dio tsingijina ndo kain ni stetjé ngaya ntábarco, tsen a na.”

²⁵ Méxin, xrakon inta ixi jan an chuntia ndo Dio ko nóna ixi tson en xranchi ndachro ndo ángel.

²⁶ Xrokonda tsitujna naa nunte jii ngusine ndachaon.

²⁷ Juexin kuatsinga yuu semana, tjume e naa tiie juasona ndachaon ndatin in Adriático ko nti i, ndá a tiki anna chrinto. Ko ngusine tiie xi teka ntábarco bikon xa ixi ó stetjasona ti jii inche xema.

²⁸ Ko juaticho a xa ti yaso e inda ko xranchi ní ite* ko ikjaon metro yasoexin inda. Tjume e kjín a juasona ko íjngo juaticho a xa ko ikán ko yatō metro yasoexin inda.

²⁹ Ko tsango xronka xa ixi xroké e ntábarco ixro, méxin banka xa noó chika gancho tuenxin ntábarco ko jaña chon anna bingasañajan.

³⁰ Ko xi nche e ixra ntábarco xraxaon xa xrobinga xa ko kuaxi xa juinchexingajin xa ntábarco nchínchín ngataon inda ko juinchexin xa xranchi xrobanka xa chika gancho chóna ikon ntábarco.

³¹ Tjume e ndo Pablo ndache ndo xi capitán ko kain xi soldado:

—Siá xi ste nti i me e tsintue a xa ngaxin in ntábarco, jua i tsjasona ti jii inche xema.

³² Méxin, xi soldado konchrinjin xa ino jichroaxin ntábarco nchínchín ko kuintu e xa kuitsinga ntáa ngangí inda.

³³ Ko jitingasaña ndo Pablo nichje e ndo kain ni ste nti a ko ndachro ndo sine na ko kaxon ndachro ndo:

—Ó chóna yuu semana tarichrin anta ko nte anta.

³⁴ Tinóatána ngajinnta intenta ko jaña chao tsinteenta ixi jaña xro an chujni ste nti i sinchetjáña na ninaa xrajaa na.

³⁵ Juexin ndachro ndo Pablo ji i, tjume e itsé ndo naa nutja ko kuajon ndo juasie ndo ngajin ndo Dio ko stetsje e ni ste nti a, ko konchrinjin ndo nutja ko kuaxi juine ndo.

³⁶ Tjume e juaxrxuxin bake e kain na ko kuaxi na juine na kaxon.

³⁷ Kain na xraste na ngaxin in ntábarco xranchi yuu ciento, ní ikán ko tekjaon na.

³⁸ Ko juexin juinena tjume e juankana noa trigo ngangí inda ixi ítsoyé a ntábarco.

Ntábarco konunte ntáa ngangí inda

³⁹ Ko ó bingasaña, xi tikao ntábarco juatsuan i xa tinó juasona ko bikon xa nche xema. Ko xraxaon xa ixi chao satsikao xa ntábarco nti a.

⁴⁰ Ko konchrinjin xa ino jixritexin chika gancho ko kuintu a xa chika sakjui chringi nda. Tjume e juinchendá xa ntáa tímón tekáxin xa ntábarco ko juinchengajin in xa manta jii ikon ntábarco ko chrinto kuncheka ntáa ti jii inche xema.

⁴¹ Ko juasona ti tixin yuu ikon inda ko ntábarco ké e ntáa nchese. Ko í jua i kontengí ntáa, ko tuenxin ntábarco kuaxi kuixrato kondeexin chrinto soji.

⁴² Ko kain xi soldado tjaun xa naaxrokóñaxón xa ni steje e ixi tjaun a xa saxrokuinga na.

⁴³ Ko xi tetuen en tjaun a xa tsen en ndo Pablo, méxin kuajon a xa juachaxin jaña xrokon en. Ko kuetuan an xa ixi ngisen chao itsji ngataon inda tsitaon na ti jii inche xema

⁴⁴ ko ngisen noe a itji ngataon inda, sen me e tsjixin sen tu o ntábarco. Ko jaña kaina juasona ti jii inche xema ko ninaána xro an nge e kónnana.

28

Ndo Pablo jii ndo isla Malta

¹ Nchakon juachana juasona inche xema, konónana ixi isla me e ndatin in Malta.

* 27:28 ite diez

² Ko ni tājna nti a tsango jian nā ko bingijnana nā kainna ko juaaka nā naa xro i ijié ixi xroxaxronāna ixi tsango ikin ko jítania ichrin. Tjume e ndachro nā ixi tsonchijiña ana kainna tjenka xro i.

³ Tjume e ndo Pablo jua o ndo kaxin ni o tsixema ko bake e ndo ni o ngata a xro i. Ko tuinxin kuachrje naa kunchee ti jii xro i ixi jichján ba ko kuitsía ba itja ndo Pablo.

⁴ Tjume e ni tājna nti a bikon nā kunchee jitjia ngi ba itja ndo Pablo ko ndache kichuu nā:

—Nduaxin xi ji i naa xi tóña chujni ko, maski kuen a xa ti ndachaon, ndo Dio ítjaun a ndo stechón xa.

⁵ Ko ndo Pablo kontsjenga itja ndo ngata a xro i ixi tsitsinga kunchee me e ko je e ndo xro an nge e kon en ndo.

⁶ Ko kain nā stechón en nā ixi tsatjuya itja ndo o tuinxin xrokuen en ndo ko sée chón en nā ko bikon nā xro an nge e kon en ndo. Ko tjume e kuindoxin nge e xraxaon nā ko kuaxi nā ndachro nā ixi je e ndo Pablo naa xi dio.

⁷ Ko tjenka nti a jii nunte e naa xi tetuan an isla ndatin in Publio. Xi me e kuajon xa juachaxin kuitunāna ndo a xa ko kuajon xa juinena ní nchakon.

⁸ Ko ndotée xi Publio ni e ndo, méxin jitsinga ndo ixi chóna ndo súa ko pojo. Ko ndo Pablo kuitsje e ndo ndo ni e ko juexin nichje e ndo ndo Dio, tjume e bake e itja ndo ngata a jaa ndo ni e ko ndo ni e koxruen en ndo.

⁹ Jaña kaxon konchjiñe e ikaxin ni ni e jii nti a ko kain nā koxruen en nā.

¹⁰ Tjume e tsango chónde e nā ndo Pablo juasaya.* Ko nchakon kuaana inaa ntābarco sakjuixinna nti a, kuajon nā itsjé nge e xrokondanāna.

Ndo Pablo kuiji ndo tājna Roma

¹¹ Ko kuatsinga ní nchanitjao bake ena isla ko tjume e kuaana naa ntābarco tsikitu e nchakon juinche e ikin nti a. Ntābarco me e tsikí xín tājna Alejandría ko nganito ntābarco me e tsikatsjéya nā ikon xi dio Cástor ko Pólux.

¹² Kuachrxexinna nti a juasona puerto tājna Siracusa ko nti a kuitunāna ní nchakon.

¹³ Ko xratexi inna ntābarco, kuatsingana ngande e inche ko juasona tājna Regio. Ko ndúyaxin kuaxi kuij chrinto níjin, ko nchakon yuxin juasona tājna Puteoli.

¹⁴ Nti a kuetanna kaxin sen kichuuna, ko juanchanana sen tsitunāna nti a ko kuitunāna naa semana ko tjume e sakjuina tājna Roma.

¹⁵ Tjume e sen kichuuna tājna Roma ó no e sen ixi tsjasona, me e bijiruanaxinna sen ngatja cha o tājna Foro Apio ko ikaxin sen kuetanna sen tājna Níi Tabernas. Nchakon ndo Pablo bikon ndo sen kuajon ndo juasaya ngajin ndo Dio ko tsango bake e ndo juaxruxin.

¹⁶ Ko nchakon juasona tājna Roma, tjume e xi capitán kuajon xa ni tsije e bika o xa ko kuayé e xi tetuan an. Ko ndo Pablo inaa nchia nchiún kuinto e xa ndo ko naa xi soldado tsendáa xa ndo.

Ndo Pablo tjako ndo chijni ngajin ni tājna Roma

¹⁷ Tjume e kuatsinga ní nchakon, ndo Pablo kuiye e ndo kain ni judío tetuan an jii tājna Roma. Ko nchakon xra o kain nā, tjume e ndachro ndo:

—Kichianna, xro an ti ndako a juinta a ngajin ni judío ko ningakuan i nge e kuanche e sen tachrí ina xranchrjen ko maski bijéna nā tājna Jerusalén ti tetuan an ni romano.

¹⁸ Ko ni me e kuitja i nā ijié ngajin, méxin tjaun nā xrokuajandana nā ixi kuitja i nā ijié xrokuenxina jan an.

¹⁹ *Ko ni judío tsango koñao nā ko tjankata ana nā ijié. Méxin, juanchia ixi xi César xrojuinchéña xa ijié ngajin. Ko jan an xro an ijié tsjankata a sen tājnána.

²⁰ Méxin, kuiya anta ixi tja on xrobikonnta ko xronichja anta ixi jan an titika on ngisen stechón en kain ni israelita, méxin jai jixritexinna chika cadena.

²¹ Tjume e ndachro nā:

—Jan anna kuaya ina ninaa xroon kuixin Judea kondeexin ja a ko kui a ninaa ni kichuuna ndachijina nā nge e ndako a tsijinche e ja a.

²² Tja onna tsin anna xranchi xraxaon ja a ixi ó nónaa itsjé tājna tjaun a nā nge e natjúá tjakoa ja a.

²³ Tjume e bake e nā naa nchakon tsin en nā nge e tjako ndo Pablo ko nchakon me e xra o kueya nā ti nchia bake e ndo ko ndúyo xrangixixión nichja ndo hasta ti kóndo. Me e nichja ndo xranchi jii juachaxin tetuan an ndo Dio. Nichje e ndo nā ixi tsitikaon nā ndo Jesús, ko juakoxin ndo ixi ley kuajon ndo Moisés ko ti tsikjin sen kuachronga chijnie ndo Dio ó sa ó.

²⁴ Kaxin nā kuitikaon nā nge e ndachro ndo Pablo ko ikaxin nā kuitikaon a nā.

²⁵ Ko je a naáko naa nge e xraxaon nā ko sakuntekji nā, ko ndo Pablo ndachro ndo:

* **28:10 juasaya** respeto, honor **28:19** Hch. 25:11.

—Chao tsinichja Espíritue ndo Dio ngajin sen kuachrjenixinna ó sa ó ti ndachro ndo profeta Isaías:

²⁶ Itjia nichje é ni tjajna israelita
maski je e na tin en na, tienxin a na,
ko maski stetsje e na, tikon a na.

²⁷ Ixi aséen ni tjajna me e tsikoncha
ko ndatsjon na steje e

ko steje e ikon na

ko jua i tsikonxin na ikon na

ko tsien a na ndatsjon na

ko tsitikaon a na ixi aséen na

ko xrokjan i na ngajin ixi sintaxruan an na.

²⁸ Méxin, tsono anta ixi jai ni je a judío tsayé e na nge e tajon ndo Dio ixi tsechón na ko je e na nduaxin tsin en na.

²⁹ Jaña ndachro ndo Pablo, ko tjume e ni judío sakjui na ko stetjakaxin kichuu na.

³⁰ Ko ndo Pablo kuitu e ndo yuu nano nchia tsikjen ndo ko kuayé e ndo kain ni itji tikitsje e ndo.

³¹ Ko juinçekuen en ndo na ixi ti tetuan an ndo Dio ko juako ndo nge e juinche e Ncháina Jesucristo ko xro an ngisen bakoñaao.

Xroon tsikjin ndo Pablo xruen en ndo sen ste tjajna Roma

Ndo Pablo ikjin ndo xroon kuayé e sen tjajna Roma

¹ Jan an, Pablo, nta a xrée ndo Jesucristo ikjin xroon ji i. Ndo Dio kuinchena ndo jan an ixi sinta a xrée ndo, ixi tsjako chijni jian, chijni tsingijna chujni tsechón na kain nchakon.

² Jaña tsindachro ndo Dio tson en ixi jaña jitaxin xroon tsinichjixin sen kuachronga chijnie ndo ó sa ó.

³ Chijni ji in tikinixin en Ncháina Jesucristo Chjen en ndo Dio. Je e ndo ikjan ndo chujni ko kuachrjenixin ndo sen kuachrjenixin ndo rey David.

⁴ Ko juachaxin ijié chóna Espíritue ndo Dio juinchexechón ndo Jesucristo ti kuen en ndo me e juako ixi nduaxin ndo Jesucristo, Chjen en ndo Dio.

⁵ Ixi ndo Jesucristo me e kuaye ena juachaxin ixi sintu una xrée ndo, xronichjana chijnie ndo ngajin kain chujni chúxin a ndo, chujni ste nchiji nunte xasintajni, ixi tsitikaon na ndo ko xrochuntia na ndo.

⁶ Ko ja anta ni ste tjajna Roma, ndo Dio kuincha anta ndo ixi tsitikaonnta ndo Jesucristo.

⁷ Méxin, ikjin xroon ji i xruan annta kainnta xro stenta tjajna Roma. Ndo Dio tjua anta ndo ko je e ndo kuincha anta ndo ixi xrokjannta chjen en ndo. Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Ndo Pablo tjaun ndo itsji ndo tsitsje e ndo sen tjajna Roma

⁸ Sa ó tajon juasaya* ngajin ndo Dio ixi juachaxien ndo Jesucristo ixi kain ja anta ko ixi nguixin no nichja na jian ixi ja anta tsango chuntianta ndo Dio.

⁹ Jan an nta a xrée ndo Dio, ixi nchiji aséenna, ko nichja chijnie Chjen en ndo, ko Ndo Dio jian no e ndo ixi kain nchakon tjancha a ndo ixi ja anta.

¹⁰ Ko kaxon kain nchakon tjancha a ndo tsajon ndo juachaxin ixi chao tsjasotsja anta.

¹¹ Tja on tsikonnta ko jaña tsingijnanta ixi jian xroxraxaonnta ko chao tsosojnta ko jaña ícha tsitikaonnta ndo Dio.

¹² Jaña tsingijna kichuuna ko juaxruxin tsojuna ixi naxraje o chuntiana Ncháina Jesucristo.

¹³ *Kichuuna, tja on tsono anta ixi ó chóna itsjé nchakon tja on xrojuasótsja anta ko xrajua i tjaso. Tja on tsjaso xronichja chijni jian ngajin chujni ixi tsitikaon na ndo Jesús xranchi kuanichja ikaxin tjajna ti xrachuxin a na ndo.

¹⁴ Xrokonda sintakuan an ngajin kain na, á ni griego o á ni je a griego, á ni no e o á ni noe a.

¹⁵ Méxin, tsango tja on tsjaso tjajna Roma ixi sintakuan annta chijni jian, chijni xrotjáanta juachaxin tsarichonnta kain nchakon.

Juachaxin chóna chijni jian

¹⁶ *Jan an tosuana i nichja chijnie ndo Dio ixi chijni ji i chóna juachaxien ndo, ixi kain ni tsin en ko tsitikaon, ni me e tsechón na kain nchakon, sa ó ni judío ko kaxon ni je a judío.

¹⁷ Ixi chijnie ndo Dio tjakojna xranchi tso mé e jéina ixi jaina chuntiana ndo Jesucristo. Xranchi ndachro xroon chijnie ndo Dio: "Ngisen chuntia chijnie ndo Dio tsechón sen kain nchakon."

Kainna chondana ije

¹⁸ Ndo Dio jii ngajni tsango toñao ndo ngajin ni ña i ko ni ndako a nche e, ko kondeexin ti ndako a nche e na me e tingakon en ixi ikaxin chujni tsono e chijni nduaxin.

¹⁹ Je e na ó no e na jian ixi chao xrochúxini ndo Dio ixi je e ndo juako ndo ngajin na juachaxien ndo ixi juinchéña ndo kain nge e ngata a nunte xasintajni.

²⁰ Maski tikon ana ndo Dio, nojna ixi je e ndo juinchéña ndo kain nge e ko tikonna kain juachaxien ndo, méxin chao tsichuxinna ndo. Ko ni ndako a nche e jua i xrondachro na noe a na nge e nche e na ixi je e na tikonna kain ji i kaxon.

²¹ *Maski no e na jii ndo Dio, chónde a na ndo juasaya xranchi tikinixin en tsayé e ndo; je o xraxaon na sinche e na nge e ndako a ko tsikoncha aséen na ko ndako a xraxaon na.

²² Je e na xraxaon na ixi no e na kain nge e ko nduaxin a; xro an nge e no e na.

²³ Xrokuajon na juasaya ngajin ndo Dio, ndo ícha tituan an, ndo jichón kain nchakon, ko nche a na jaña. Je o tajon na juasaya ngajin nge e jichón a xranchi naa ngisen tsiken en o xranchi kuxe tjanga, ko iko chóna noó tutée ko kaxon kunchee.

* **1:8 juasaya** respeto, honor **1:13** Hch. 19:21. **1:16** Mr. 8:38. **1:21** Ef. 4:17, 18.

²⁴ Méxin, ndo Dio kuintu e ndo na sinche e na nge e ndako a tjaun na, ti je o chónda kichuu na xranchi xi ko xi, ko nchri ko nchri, me e nche e nge e tosuexinini.

²⁵ Kuitikaon a na ndo Dio, ndo nduaxin jichón, ko kuitikaon na juancheya; kuajonna juasaya ngajin nge e tsijinchéña ndo Dio ko kuajon a na juasaya ngajin je e ndo, ndo juinéña kain nge e. Je e ndo tikinixin en ndo juasaya kain nchakon. Jaña tson en.

²⁶ Méxin, ndo Dio kuintu e ndo na sinche e na nge e ndako a ti tosuexinini, xranchi nchri ko nchri je o nchra chónda kichuu nchra, ko ji in tjaun a ndo Dio xrokon en.

²⁷ Kaxon jaña xi chónda i nchri ixi je o xi ko xi chónda kichuu xa, me e naa nge e tosuexinini ko kondeexin me e tangi ichin xrotsé xa.

²⁸ Ko je e na xraxaon a na ndo Dio, méxin je e ndo kuintu e ndo na xraxaon na kain nge e ti ndako a ko sinche e na ti ndako a xraxaon na.

²⁹ Kueya ti ndako a nche e ni me e. Je o nge e ndako a nche e na; tjaun na xrochónda na inaa nchri, nchri je a janchri e na, ko tsango ña i na, ko tjaun na je o xrochónda na itsjé nge e, ko méxin chónda na ijie, ko tsango chiyue e na, ko tjaun na naatsónaxón na chujni, ko je e na ncheketo kichuu na, ko ncheya na ko nichja na nge e nduaxin a ixi inaa chujni.

³⁰ Nichjangí e kichuu na ko ningakon en na ndo Dio, ko je o na tjaun na tsituan an na, ko nchejié aséen na, ko xraxaon na ixi tsango tjintee na, je o xraxaon na xranchi sinche e na ti ndako a ko titikaon a na ndoté na ko janée na.

³¹ Tjaun a na tsienxin na ko nche a na ti ndachro na xrojuinche e na, ko tjue a kichuu na, ko tjaun a na xrotjáñe e na nge e juinchekao kichuu na, ko tikonóe a kichuu na.

³² Ni me e no e na nge e tsiketuan an ndo Dio ko no e na ixi ngisen jaña sinche e tikinixin tson en, ko maski jaña no e na, xranche e na kain me e ko xratake e na juaxruxin ti tikon na inaa ngisen naxraje o jaña nche e.

2

Ndo Dio jian nchéña ndo ijie ngajin chujni

¹ *Nchakon tsjankata anta ijie ngajin inaa chujni, ja onta tsamanta ijie ixi kaxon ja anta nche enta ti ndako a.

² Ó nojna ixi nchakon ndo Dio nchéña ndo ijie ngajin ngisen sínká naa nge e, ixi ti nduaxin nchéña ndo ijie.

³ Ko ja anta, ti tsjankata anta ijie ngajin ikaxin chujni, ¿á xraxaonnta chao rinche enta siá naxraje o ndako a nche enta?, ko, ¿á ndo Dio xro an ijie sinchéña ndo ngajinnta? Ja anta jua i satsinge enta ndo.

⁴ ¿Á xraxaonnta ixi xro an tjintee ti ndo Dio tsango jian ndo ko taka i toña ndo ngajinnta? ¿Á noa inta ixi ti jian nche e ndo ngajin chujni, ji i nche e ndo ixi tsitikaonnta ndo ko tsintu enta ti ndako a?

⁵ Ko siá rinche enta ti ndako a ko nchenie a asáanta ja onta ritamanta ixi ícha tangi tsintekon annta. Tsijí nchakon ndo Dio sinchéña ndo ijie ngajin kain chujni ko je e ndo tsango tsoña ndo ko tangi tson annta,

⁶ ixi je e ndo tsjenga ndo na ngajin ngujngu chujni ti ixra tsijinche e na.

⁷ Ko tsajon ndo juachaxin tsechón na kain nchakon, ni juée kain juachaxien ndo Dio ko juée na tsechón na ti jii je e ndo, ko ni ndako ko jian juinche e ixra.

⁸ Ko tsoña ndo Dio ngajin ni nchejié aséen ko ni tjaun a tsitikaon ti ndako tjako ndo. Ni ji i tangi tsintekon en na ixi ícha juaxruxin nche e na ti ña i.

⁹ Tangi tson en kain ni juinche e nge e ña i, ko ni me e xrochónda na itsjé juachjaon, sa ó ni judío ko kaxon ni je a judío.

¹⁰ Ko ndo Dio tsajon ndo juachaxin ko juaxruxin ko xrochónde e ndo juasaya ngajin kain ni kuitikaon ndo, ko sa ó ni judío ko kaxon ni je a judío.

¹¹ Ixi ndo Dio je a je o tjue e ndo kaxion chujni ixi kain na naxraje o tjintee na.

¹² Kain chujni chónda ijie, ko maski noe a na nge e tsikjin ndo Moisés, xraje o tsama na ijie. Ko chujni kuayé e ley tsikjin ndo Moisés, ko nche e na ti ndako a, ley me e tsóñexin na ijie.

¹³ Je a je o ixi tsin en na ley, me e xrokotjúáxin jíee na. Na i. Xrokonda tsitikaon na nge e tituan an ndo Dio.

¹⁴ Kaxin ni je a judío, siá jian nche e na, maski chúxin a na ley tsiketuan an ndo Dio, je o na ndako tituen en na aséen na, ko no e na nge e jian ko nge e ndakua i jii.

¹⁵ Ixi nge e jian nche e na, tikonni ixi ngaya aséen na jitaxin ti tituan an ley ko aséen na xraxaonxin na á chao ste na o na i.

¹⁶ Naa nchakon ndo Dio sinchéña ndo ijie ngajin kain ti imao juinche e chujni. Ji i tson en ixi juachaxien Ncháina Jesucristo xranchi jitaxin chijni jian tjako jan an.

Ni judío ko ley tsikjin ndo Moisés

¹⁷ Kaxinnta ndachronta ixi judío ja anta ko xraxaonnta ixi jian titikaonnta ley kuayé e ndo Moisés ko nchejié asáanta ixi chujnie ndo Dio ja anta.

¹⁸ No anta nge e tjaun ndo Dio ko ixi ley noaxinnta sinche enta ti jian.

¹⁹ Ja anta nchejié asáanta ixi ndachronta ixi chao sinchekuen ennta ni ndako a nche e ko chao tsingate enta na ixi tsitjáña i na ti ichrji na ti maxixe e.

²⁰ Ndachronta ixi no anta sinchekuen ennta ni noe a ko tsingijnanta ni tienxin a ixi ja anta chondanta ley chronga xranchi xroxaxaon chujni ti nduaxin.

²¹ Ko ja anta, ¿xranchi sinchekuen ennta ikaxin chujni, siá ja anta tangi anta? ¿Xranchi tsjako enta chujni tsee a na siá ja anta itsenta ti tikinixian inta?

²² Ndachronta ixi jua i xrochónda na inaa nchri o xi je a janchri e o ndoxi e na, ko ja anta, ¿sonda jaña nche enta? Ndachronta ixi titikaon anta ídolo, ko, ¿sonda te enta nge e tjintee jii ngaxin in ningue ídolo?

²³ Ja anta nchejié asáanta ixi chuxinnta ley, ko titikaon anta nge e tituan an ley, ko jaña chonde anta juasaya ndo Dio.

²⁴ Ndako ndachro xroon jitaxin chijnie ndo Dio: “Kondeexin ja anta ni je a judío nichjangí e na ndo Dio.”

²⁵ Siá nduaxin xrokuitikaonnta ley kuayé e ndo Moisés, je a xruenxon tsikaannta chji e ndo Dio. Ko titikaon anta ley, me e xrokjui xranchi tsikaa inta chji e ndo.

²⁶ Ko chujni tsika i chji e ndo Dio ko titikaon na xranchi tituan an ley, ni me e xranchi ó tsikaa na chji e ndo, maski nduaxin a chónda na chji e ndo.

²⁷ Ko chujni kua i chji e ndo ko titikaon ley, ni me e tsjankata anta na ijie ixi ja anta chuxinnta ley ko kuitikaon anta, maski chondanta xroon jitaxin ley ko maski tsikaannta chji e ndo.

²⁸ Ko je a nduaxin judío ja anta je o ixi ó chondanta chji e ndo cuerpoanta xranchi nche e kain ni judío.

²⁹ Ni nduaxin judío xrokonda xrochónda na chji e ndo ngaya aséen na, ji i naa nge e nche e Espíritue ndo Dio, ko je a je o tsitikaon na nge e jitaxin xroon. Ko ni nche e jaña, nduaxin judío na, ko ndo Dio jii ndo juaxruxin ixi jaña nche e na maski ikaxin na na i.

3

¹ ¿Á tjintee ti ndachro na judío na? Q, ¿á tjintee ti tsikaa na chji e ndo Dio?

² Jaán, tjintee me e ixi ndo Dio kuajon ndo chijnie ndo sa ó kuayé e ni judío ixi xrokuitikaon na.

³ Méxin, siá xrojan je e na xrokuitikaon a na, ¿á kondeexin me e, kaxon ndo Dio ísinche a ndo kain nge e tsindachro ndo sinche e ndo ngajin chujni?

⁴ Na i. Ndo Dio sinche e ndo kain nge e tsindachro ndo sinche e ndo, maski kain na xrojuincheya na. Ja in ndachro xroon chijnie ndo Dio:

Kain chujni xrondachro na ixi ja anta ndo Dio

ko nduaxin ndachronta kain nge e.

Méxin, nchakon tsjankata anta na ijie, ja anta tsjachanta.

⁵ Siá ti ndako a nche ena, tjakona ixi ndo Dio jian ndo, ¿méxin nge e xrondachrona? ¿Á chao xrondachrona ndako a nche e ndo Dio ixi tajon ndo juachaxin tangi tsojna? (Jan an rinichja xranchi nichja ngixe i naa chujni.)

⁶ Na i, siá ndo Dio je a tsango jian xrokjui ndo, ¿xranchi jian xrojuinchéña ndo ijie ngajin kain chujni nunte xasintajni?

⁷ Ko siá kondeexin ti juintaya me e konoxin ti nduaxin juako ndo Dio, ko jaña itsje na ícha xrochónde e na ndo juasaya, ¿sonda tsama ijie jan an kondeexin ti me e?

⁸ Méxin, ¿á cháña sinche eni ti ndako a ixi jaña tsj xjn nge e jian? Jan an me e tjako, ichro kaxin chujni, ko méxin, nchekamana na ijie, ko ni jaña tjangina, tangi tsintekon en na kondeexin jaña ichro na.

Kainna chondana ijie

⁹ ¿Nge e xrondachro kain ji in? Ixi jan anna judíona, ¿á ícha tjinteena ixi ikaxin chujni? Na i. Ó ndachrjan á judíona o je a judíona, kainkona chondana ijie.

¹⁰ Ndachro xroon chijnie ndo Dio:

Xro an chujni nche e nge e jian,

kain chujni chónda na ijie.

¹¹ Xro an ngisen tienxin,

ko xro an ngisen tjée ndo Dio.

¹² Kainko na tsingachrue na,

ko kain na nche e na ti ndako a me e tsitjáñaxin na.

Xro an ngisen tjaun sinche e ti jian, ninaa chujni.

¹³ Tusin na jii xranchi naa tuye jixrange e ti tsixrabaa chujni, je o no e na ncheya na.

Ro a na chónda nge e xranchi ndachikjeen kunchee.

¹⁴ Jeoxón nge e ndako a nichja na,

ko ndako naa nge e itsjá tonó eni ti nge e nichja na.

¹⁵ Tuinxin chjée na juañaao

ko tjaun na naatsónaxón na chujni.

¹⁶ Ti ndako a nche e na,

me e nchetjáña ikaxin chujni ko tika o ícha juachjaon,

¹⁷ ko chúxin a na cha o tajon juaxruxin

¹⁸ ko xraxaon a na xroxrakon en na ndo Dio.

¹⁹ Nojna ixi kain nge e nichja xroon jitaxin ti tetuan an ndo Dio, me e kuetuen en kain ni kuayé e ley ixi jaña kain chujni ste nunte xasintajni xrotenko na ko ndo Dio sinchéña ndo ije ngajin kainxin chujni.

²⁰ *Ixi xro an ngisen tsomé e jíee ixi je o xrokuitikaon na nge e tituan an ley. Ley je o nchenojna ixi chondana ije.

Tsitjáña ina siá chuntiana ndo Cristo

²¹ Ko je a ley tsingijnana ixi chao tsomé e jíeina. Jai konoxin ixi ndo Dio tsingijnana ndo xranchi chao tsomé e jíeina, ko ji i jitaxin xroon ti tsiketuan an ndo Dio ko nge e kuanichja sen kuachronga chijnie ndo Dio ó sa ó.

²² *Tsomé e jíeina ixi chuntiana ndo Jesucristo, ixi je e ndo naxraje o tikon ndo tjintee kainni.

²³ Ixi kain chujni chónda na ije, ko jua i tsikon na juachaxin chónda ndo Dio méxin chonda i na juachaxin tsake e na ti jii ndo Dio.

²⁴ Juasie ndo Dio ixi tsango jian ndo ko sinchemé e ndo jíeina ixi ndo Cristo Jesús kuen en ndo kondeexin jíeina.

²⁵ Ndo Dio xruan an ndo ndo Cristo, ko kuenxin ndo kondeexin jaina, ko xrokonda xrochuntiana ndo; jaña tsomé e jíeina. Jaña juinche e ndo Dio koñaao a ndo maski kueya ti ndako a juntu una sa ó.

²⁶ Jaña juakoxin ndo Dio ixi jian ndo, ko jai xrajichon en ndo sinchemé e ndo jíee kain chujni chuntia ndo Jesús.

²⁷ Méxin, ¿á tjintee ti nchejé aséenni? Na i. Í jua i sinchejé aséen chujni ngajin ndo Dio, ko je a ixi kuitikaonna nge e tetuan an ley, méxin koméexin jíeina. Na i. Koméexin jieina ixi chuntiana Ncháina Jesucristo,

²⁸ ko jaina nojna ixi tsooméxin jíeina siá chuntiana ngajin ndo, ko je a ixi kuitikaonna nge e kuetuan an ley.

²⁹ Ndo Dio, ¿á je o Dio ne e ni judío? Na i, je e ndo Dio ne e kain chujni, kaxon ni je a judío.

³⁰ *Ixi naakua ndo Dio jii, ko je e ndo sinchemé e ndo jíeina ixi chuntiana ndo ko xrotsje a ndo á chondana chji e ndo o na i.

³¹ Ko siá chuntiana Ncháina Jesucristo, ¿á íxrokuitikaon ana ley kuetuan an ndo Dio? Na i, ícha ndako tsitikaonna ley kuetuan an ndo.

4

Nge e juako ndo Abraham

¹ Xraxaonna, ¿á kuitee nge e juinche e ndo Abraham, ndo kuachrjenixinna ó sa ó?

² Siá ti ndako juinche e ndo Abraham me e xrokoméexin ixi ti ndako a juinche e ndo, juaxruxin xrobake e ndo ixi me e, ko chao xrojuinchejé aséen ndo, ko kain me e tjinte a ngajin ndo Dio.

³ *Ko ndachro xroon jitaxin chijnie ndo Dio: “Ndo Abraham tsango chuntia ndo ngajin ndo Dio, méxin komé e jíee ndo.”

⁴ Ko nojna ixi naa ngisen nche e ixra xenge e sen na, je a jañaao tayé e sen tomi. Ixi ixra juinche e sen, méxin tjachaxin sen.

⁵ Ko je a naxraje o xraxaon ndo Dio. Ndo Dio nchemé e ndo jíee chujni maski xro an ixra juinche e na, je o xrokonda xrochuntia na ndo Dio.

⁶ Xranchi ndachro ndo David: Juaxruxin tsintee ni komé e jíee, maski xro an nge e jian juinche e na, je o kuitikaon na ndo Dio.

⁷ Ko ja in jitaxin xroon chijnie ndo Dio: Juaxruxin tsintee na ixi ndo Dio juinchemé e ndo jíee na,

maski ndako a juinche e na,
ko tjañe e ndo Dio ijie juinche e na.

⁸ Juaxruxin tsintee na ixi Ncháina juinchemé e ndo ijie kuachóna na.

⁹ A juaxruxin ji i, zá je o ni chóna chji e ndo tikinixin en juaxruxin?, o, zá kaxon ni chóna i chji e ndo? Ko ó ndachrjan ixi ndo Dio juinchemé e ndo jíee ndo Abraham ixi ndo Abraham chuntia ndo ndo Dio.

¹⁰ Méxin, ¿ngisa juinchemé e ndo Dio jíee ndo Abraham? Zá ti ó tsikaa ndo Abraham chji e ndo Dio?, o, zá ti xratsika i ndo chji e ndo Dio? Sa ó juinchemé e ndo Dio jíee ndo Abraham, ko tjume e ndo Abraham kua ndo chji e ndo Dio.

¹¹ Ko ndo Abraham tjume e kua ndo chji e ndo Dio ixi jaña xrojuako ndo ixi ndo Dio ó juinchemé e ndo jíee ndo Abraham ixi chuntia ndo ndo Dio. Tjume e jaña ikjan ndo Abraham ndotée kain sen chuntia* ndo Dio, maski tsika i sen chji e ndo.

¹² Ko kaxon ndo Abraham, ndotée kain chujni tsikaa chji e ndo Dio, siá chuntia sen ndo Dio xranchi chuntia je e ndo Abraham, nchakon xratsika i ndo chji e ndo Dio.

Nge e tsajon ndo Dio ngajin sen chuntia ndo

¹³ *Ndo Dio tsindache ndo ndo Abraham ixi je e ndo ko ni tsachrjenixin ndo tsayé e na nunte xasintajni. Ko tsayé e ndo Abraham ji i je a ixi kuitikaon ndo ley. Na i. Ixi chuntia ndo ndo Dio ko ndo Dio juinchemé e ndo jíee ndo.

¹⁴ *Méxin, siá ndo Dio xrokuajon ndo nge e ndachro ndo je o ngajin ni titikaon ley, méxin xro an tjintee ti xrochúntiani ndo Dio ko méxin tjinte a ti nge e ndachro ndo xrokuajon ndo.

¹⁵ Siá tsitikaon ani nge e jitaxin ley, tangi tson enni. Ko siá xro an ley xrokuake e, kaxon xrokuama i ijie.

¹⁶ *Méxin, ti tsindachro ndo Dio tsajon ndo ngajin ndo Abraham ko ngajin kain ni tsachrjenixin ndo, tjintee me e ko je o chuntia ndo Abraham ngajin ndo Dio ko xro an nge e ícha juanchia ndo Dio. Ko chao tsayé eni nge e tsajon ndo Dio ko kaxon ngajin kain sen chuntia ndo, xranchi kuayé e ndo Abraham ixi chuntia ndo ngajin ndo Dio, ko je a je o ni titikaon ley tsayé e na. Méxin jaña, ikjan ndo Abraham ndotée kain chujni.

¹⁷ Xranchi jitaxin chijnie ndo Dio: “Jan an kuajon juachaxin ixi ja anta xrokjannta ndotée itsjé ni ste nunte xasintajni.” Méxin ndo Dio sinche e ndo nge e tsindachro ndo ixi ndo Abraham jian kuitikaon ndo. Ndo Dio je o je e ndo nchexechón ndo ni tsiken en, ko tituan an ndo ixi tsake e nge e ko a.

¹⁸ Maski xro an ichjan kuachóna ndo Abraham, je e ndo kuitikaon ndo ndo Dio, méxin ikjan ndo ndotée kueya chujni xranchi tsindachro ndo Dio ngajin ndo Abraham: “Kueya chujni tsachrjenixin ja anta.”

¹⁹ Maski ndo Abraham ó kuachóna ndo xranchi naa ciento nano, ko no e ndo ixi ó taka xrokuen en ndo, ko janchri e ndo, jan Sara, ó nachrii jan ko jua i xrochóna jan ichjan, je e ndo chuntia ndo ndo Dio,

²⁰ ko jian no e ndo ixi ndo Dio xrokuajon ndo nge e ndachro ndo. Ko tsango chúntia ndo ndo Dio ko bakajon ndo juasaya ngajin ndo Dio.

²¹ Ko no e ndo Abraham ixi chóna ndo Dio ijié juachaxin sinche e ndo kain nge e ti tsindachro ndo.

²² Méxin, ndo Dio jian bikon ndo nge e juinche e ndo Abraham ti chuntia ndo, ko jaña ndo Dio juinchemé e ndo ijie kuachóna ndo Abraham.

²³ Ko ti jitaxin xroon ixi ndo Dio juinchemé e ndo jíee ndo Abraham, je a je o jíee ndo;

²⁴ kaxon sinchemé e ndo jéina ixi tsitikaonna ndo, ndo juinhexechón Ncháina Jesu-cristo,

²⁵ ko kuajon ndo ndo Jesucristo kuenxin ndo ixi jaína. Ko xechón ndo íjngo ixi jaña xrokomé e jéina ko jai íxro an nge e sinkana.

5

Jian tsinteena ixi ndo Dio juinchemé e ndo jéina

¹ Komé e kain jéina ixi chuntiana ndo Cristo ko chao stena ngajin ndo Dio ixi Ncháina* Jesucristo kuenxin ndo ixi jaína.

² Ixi juasie Ncháina Cristo Jesús, chao tonchjiñe ena ngajin ndo Dio ixi chuntiana ndo ko je e ndo tjaunna ndo ko méxin jaña ícha chuntiana. Ko juaxruxin stena ixi stechon enna tsayé ena juachaxin ijié chóna ndo.

³ Ko je a je o me e. Kaxon juaxruxin tsinteena maski tangi stena ngata a nunte nti i ixi nojna kain juachjaon me e, ícha nchesoji aséjina.

* **4:11 chuntia** tener fe **4:13** Gá. 3:29. **4:14** Gá. 3:18. **4:16** Gá. 3:7. * **5:1 Ncháina** Señor Ncháina Jesús o Ncháina Dio

⁴ Ko ti soji tsintee aséeina, me e jaña jian tsatsingana kain nge e tangi ixi stechon enna naa nge e jian tsii.

⁵ Ko ti jian stechon enna nduaxin tsii ixi ndo Dio tsango tjaunna ndo ko tsichajina ndo Espiritue ndo.

⁶ Ko jaina chondana ijie, ko jua i jajona sinchemé ena ijie me e. Ndo Cristo kuen en ndo ixi kain chujni chóna jie, kuen en ndo nchakon ndachro ndo Dio kondeexin ijie chóna kain chujni.

⁷ Xro an ngisen teenxin ixi inaa ngisen maski sen me e jian sen. Maski chao xrokuenxinni ixi inaa ngisen nduaxin juinche e ti jian.

⁸ Ko ndo Dio juakoina ndo ixi tsango tjauna ndo; maski chondana ijie, xruan an ndo ndo Cristo kuenxin ndo ixi jaina.

⁹ Méxin, ndo Dio juinchemé e ndo jieina ixi ndo Cristo kuenxin ndo ixi jaina. Jai ó noina ixi je e ndo chajina ndo juachaxin tsechónna kain nchakon† ko je a tangi tsatsingana nchakon tsjexin kain nge e.

¹⁰ Ixi, maski bakoña ena ndo Dio, je e ndo kuajon ndo juachaxin tsonchjiñe ena ngajin ndo ixi Chjen en ndo kuenxin xjan ixi jaina, ko jai noina ixi tsingijina ndo tsechónna kain nchakon ixi jichón chjen en ndo ko juaxruxin tsonjoku una xjan.

¹¹ Ko je a je o ji i. Kaxon ndo Dio chajina ndo juaxruxin ixi chao tonchjiñe ena ngajin ndo ixi juasie Nchána Jesucristo.

Xi Adán ko ndo Cristo

¹² Sa ó naakua naa sen juinche e ti ndako a, méxin, chujni nchiji nunte xasintajni kuama na ijie. Jaña kuii kaxon ti ten en aséenni, méxin kaina chondana ijie ko kaina tikinixin enna tsen en na.

¹³ Sa ó ti xrabake a ley tsiketuan an ndo Dio, kain chujni nunte xasintajni kuanche e na ti ndako a, ko ixi xro an ley jii, méxin, jua i sinchekamani ijie naa ngisen ndako a juinche e.

¹⁴ Xra ti bake e ndo Adán ko kuiji nchakon bake e ndo Moisés, kuinteken en aséen chujni kondeexin ijie juinche e na. Maski jiee na je a ti kuitikaon a na xranchi juinche e ndo Adán, ixi je e ndo kuitikaon a ndo nge e kuetuan an ndo Dio. Ko ndo Adán juako ndo xranchi xrokuii inaa ndo ícha tjume e.

¹⁵ Ko ijie juinche e ndo Adán jua i xrondachrona naxraje o ixi ti nge e jian nchekituina ndo Dio. Ko ixi naakua ngisen kuitikaon a, kondeexin me e, kueya na kuinteken en na. Jai juasie ndo Dio, xruan an ndo naakua naa ngisen, ndo Jesucristo, ko ixi je e ndo komé e jieina. Ji i naa nge e ícha jian juinhekitoina ndo ixi kueya na tsayé e na juachaxin tsechón na kain nchakon.

¹⁶ Ijie juinche e naakua naa ngisen je a naxraje o ixi ti juachaxin juinhekitoina ndo Dio, ti tsechónna kain nchakon. Kondeexin ijie ti kuitikaon a ndo Adán, méxin kuamana ijie ko tikinixianna tsen enna. Ko jai juasie ndo Dio juinhekitoina ndo juachaxin tsechónna kain nchakon, ko je e ndo nchemé e ndo kain ijie chondana maski tikinixian ina me e.

¹⁷ Méxin, siá kondeexin ijie juinche e ndo Adán, tsen en kain chujni, jai chao xrondachrona ixi naakua naa ngisen, me e ndo Jesucristo, je e ndo kontjúáxin ijie kuachondana, méxin chondana juachaxin tsojuna jian ngajin ndo ixi ndo Dio tjauna ndo, ko xrokonda i jaina sintu una naa nge e ixi tsjachana juachaxin me e.

¹⁸ Méxin, ixi ijie juinche e ndo Adán, kain chujni kuama na ijie ko kuinteken en na. Ko jai ndo Cristo juinchemé e ndo ijie chóna kain chujni, ko kuajon ndo juachaxin tsechón na ixi jian ndo ko kuenxin ndo ixi jaina.

¹⁹ Ixi naakua naa ngisen kuitikaon a, ndo Adán juinche e me e, méxin kueya chujni kuama na ijie. Jaña jai, kaxon naakua naa ngisen jian kuitikaon, me e ndo Cristo, ko ixi je e ndo tsméxin jieina.

²⁰ Bake e ley kuetuan an ndo Dio ko chujni ícha juinche e na ti ndako a ko kuama na ijie. Ko maski jaña ícha ijie kuama chujni, ndo Dio ícha bikonóe e ndo na.

²¹ Kondeexin ijie me e bake e juachaxin tsen en chujni. Ko jaña kaxon ndo Dio ícha chóna ndo juachaxin sinchemé e ndo jiee chujni ko tsajon ndo juachaxin tsechónna kain nchakon ixi Nchána Jesucristo kuenxin ndo ixi jaina.

6

Juasie ndo Cristo stechónna kain nchakon

¹ Ko jai, ¿á xraxraaonna sintu una ti ndako a ixi jaña ndo Dio ícha tsikonoina ndo?

² Na i. Jai jaina i chonda ina nge e xrotsje ena ngajin kain ti ndako a ko kain ijie tamani ixi ó kuintu ena kain me e.

† 5:9 tsechónna kain nchakon vida eterna

³ ¿Á noa inta ixi nchakon bikitéena ó kuitikaonna ko rué ena ndo Cristo, ji i xrokjui kaxon xranchi xrokue enna xranchi je e ndo?

⁴ *Nchakon bikitéena, nchakon me e kuen enna ko xrabaana xranchi je e ndo ixi xroxechónna ko xrochondana juachaxin tsechónna kain nchakon ko jian tsajina, xranchi ndo Cristo xechón ndo ixi juachaxin ijíe chónnda Ndotée ndo, ndo Dio.

⁵ Siá kuen enna xranchi kuen en ndo Cristo, kaxon xroxechónna xranchi xechón je e ndo.

⁶ Ó nojna ixi sa ó bakamana ijíe, ko nchakon ndo Cristo kuen en ndo nganito ntá cru jaña kuitjáña kain ijíe kuachondana, jaña kaxon kuen enna ko ijíe ítítuan i ngajinna.

⁷ Ixi nchakon ten en naa ngisen íxro an juachaxin jii tsama sen ijíe.

⁸ Ko jaña, siá kuen enna ixi kuen en ndo Cristo, nojna ixi xroxechónna kaxon, ko tsonjoku una ndo kain nchakon.

⁹ Nojna ixi ndo Cristo xechón ndo ko ínai a tsen en ndo ixi xichononte* í chónnda i xa juachaxin ngajin je e ndo.

¹⁰ Nchakon kuen en ndo Cristo, kain ijíe í chonda i juachaxin ngajin chujni. Ko jai jichón ndo Cristo ko jii ndo ngajin ndo Dio.

¹¹ Jaña kaxon ja anta xraxaonnta ixi kain ijíe íxro an juachaxin chónnda ngajinnta ixi ó titikaonnta ndo Cristo Jesús ko je e ndo tjáanta ndo juachaxin tsarichonnta kain nchakon, ko ti jai stechonnta, me e sinche enta nge e tjaun ndo Dio.

¹² Méxin, tintue anta tsítuan annta ti ndako a íjngo ko sinchekateya i cuerpoanta sinche enta ti ndako a.

¹³ Tintue anta cuerpoanta sinche e ti ndako a, cháña tájonnta asáanta ngajin ndo Dio xranchi tikinixin sinche e naa ngisen tsiken en ko tsixechón íjngo. Tájonnta cuerpoanta ngajin ndo Dio ixi sinche enta naa íxra jian xranchi tjaun je e ndo.

¹⁴ Ixi jai ijíe íxrochónnda i juachaxin tsetuan annta jai ixi í je a ley tituan annta. Na i, ti tjua anta ndo Dio me e tituan annta.

Ntu una xrée ndo Dio

¹⁵ Ko jai, ¿nge e sintu una? ¿Á xrasintu una ti ndako a, me e tsamana ijíe ixi ítítuan ina ley ko ti tjuajina ndo Dio me e titujinna? Sintu ina jaña.

¹⁶ Ja anta jian no anta ixi, siá titikaonni kain nge e tituan an naa ngisen, je eni ikjanni ni nchexrée sen me e. Jaña ton en kaxon, siá titikaonnta ko nche enta nge e ndako a, ja anta ikjannta ni nche e xrée ti ndako a ko ji i tsenxinni. Ko nchakon tsitikaonnta ndo Dio, je e ndo xrotjáanta ndo juachaxin tsake enta ngajin ndo.

¹⁷ Jai juasie ndo Dio, bikonóa anta ndo. Sa ó kuachondanta ijíe ko ijíe me e baketuan anta, ko jai ixi nhijíi asáanta kuitikaonnta nge e jian kuin ennta.

¹⁸ Ko jai kuintu enta ti bakamaxinta ijíe ko kuajonnta asáanta ngajin ndo Dio ixi jian nche enta xrée Ncháina Jesucristo.

¹⁹ Jan an rinichja xranchi nichja ngixe i naa chujni ixi ja anta xratienxin anta jian nge e ji i. Sa ó kuitikaonnta nge e ña i ko bakajonta cuerpoanta ixi kuanche enta nge e ndako a. Ko jai xrokonda tsajonnta cuerpoanta ngajin ndo Dio ixi sinche enta íxra jian xranchi tjaun je e ndo.

²⁰ Nchakon ti ña i batítuan annta kondeexin me e bakamaxinta ijíe, jua i kuanche anta nge e tjaun ndo Dio.

²¹ ¿Ko nge e juachanta ixi jaña kuanche enta? Jai kain ti ndako a juinche enta, kain me e, tosuaxinnta ko kain me e teenxin chujni.

²² Ko jai ó komé e jíanta ko ítétuan inta ti ndako a. Jai xrée ndo Dio nche enta. Ko ji i jian tsingijnanta ixi ti tsitikaonnta ndo Dio me e noaxinnta tsarichonnta kain nchakon.

²³ Siá sinche enta ti ndako a, tsamanta ijíe, ko ti tsjachanta me e tsen ennta. A ndo Dio je e ndo tajon ndo juachaxin tsechónna kain nchakon siá titika onna Ncháina Cristo Jesús.

7

Jai tikinixin enna ndo Cristo

¹ Kichuuna, ja anta chuxinnta ley ko no anta ixi ley chónnda juachaxin tsetuen enni je o ti xrajichónni.

² Ji i jii xranchi naa nchri tsikute e, ley tituan an ixi je e nchra tsitikaon nchra xixi e nchra, ko je e xa chónnda xa juachaxin tsetuen en xa nchra ixi xrajichón xa. Ko siá tsíj nchakon tsen en xixi e nchra, ley me e ítítuan i ngajin nchra.

³ Ko siá je e nchra satsikao nchra inaa xi ko xrajichón xixi e nchra, je e nchra tsama nchra ijíe. Ko siá xixi e nchra tsen en xa, je e nchra íxro an ijíe tsama nchra, ko chao xrokjan tsute e nchra ko íxro an ijíe tsitsingata a nchra.

⁴ Jaña ja anta kaxon, kichuuna, ndo Cristo kuenxin ndo ixi jaina, méxin, ley ítetuan i ngajinna. Jai jaina tikinixin enna ndo Cristo ixi ndo Dio juinchexechón ndo ndo Cristo, méxin chao sintu una xrée ndo.

⁵ Ixi nchakon jua i bakintu ena ti ndako a, ley je o banche e ixi jaina ícha tjaunna sinche ena ti ndako a, ko me e kujxin ti tsen enna.

⁶ Ko jai ley í chóna i juachaxin tsetuajinna ixi xranchi ó kuen enna. Íxro an nge e tingakojna ixi sintu una xrée ndo Dio xranchi naa ngisen natjúá, ixi Espíritue ndo Dio chjaina ndo ko ítsetuan ina naa ley ntaxi jitaxin xroon.

Xranche ena ti ndako a

⁷ ¿Nge e xrondachrona ixi ji i? ¿Á xrondachrona ixi ley me e ndako a? Na i. Jan an xrokónona i nge e xrondachro ti tamani ijje siá xrobake a ley xrochronga. Xrokónona i nge e xrondachro ti chjuye eni siá ley xrondachro a: “Tuchjuya inta nge e chóna inaa ngisen.”

⁸ Tjume e nchakon konóna nge e jitaxin ley, ti ndako a ícha kuetuan an ko ícha tja on sinta a kain nge e ndakua i. Ko siá xrokuake a ley, kaxon ko a ti ña i nchekateyani sinche eni ti ndako a.

⁹ Ko nchakon kuichuxin a ley, jan an xro an juachjaon kuachonda, ko nchakon kuichuxin ley, konóna ixi jan an tsango yama ijje,

¹⁰ Ko kuichuxin a ndo Dio, ko ley kuajon a juachaxin tsechón chujni, je o kuajon juachaxin tsen eni.

¹¹ Ixi ti konona ley, me e ti ndako a juincheyana, méxin kuama ijje ko tikinixin tsen enna.

¹² Chao xrondachrjan ixi ndo Dio tsikajon ndo ley, ko nge e tituan an ndo Dio, jian me e.

¹³ Ko jua i xrondachrona ixi kondeexin ley tsen enni. Na i. Tsen enni kondeexin ijje chónDani ko ti ndako a nche eni, ixi ley naa nge e ndako tituan an, ko jaña chao tonojna nge e ndakua i jii, ko kaxon no eni ixi tsango ña ini siá sinche eni ti ndakua i.

¹⁴ Jajna nojna ixi ley me e kuajon ndo Dio. Ko jan an jua i tintu a nge e tjaun cuerpona; jan an ícha tja on sinta a ti ndakua i.

¹⁵ *Jan an tianxin a, ixi ti tjaun a sinta a me e nta a, ko ti tja on sinta a, me e nta i.

¹⁶ Ko maski nta a nge e tjaun a sinta a, nóna ixi ley kuajon ndo Dio, jian ley.

¹⁷ Méxin, je a jan an nta a nge e ndako a. Na i, ti nche e me e, me e juachaxien ti ndako a jii ngaya aséenna.

¹⁸ Jan an tonóna ixi cuerpona tajon a juachaxin sinta a ti jian, ixi maski tja on sinta a nge e jian, jua i nta a me e.

¹⁹ Ko tja on sinta a nge e jian ko jua i nta a me e, ko nta a nge e ndako a ti tjaun a sinta a.

²⁰ Ko siá nta a nge e tjaun a, ko je a jan an tja on sinta a ji i, kain ji i nche e ti ndakua i jii ngaya aséenna.

²¹ Ko nóna ixi nchakon tja on sinta a nge e jian, je o nta a nge e ndako a.

²² Ko nóna ixi aséenna tsango take e juaxruxin ixi ley kuetuan an ndo Dio.

²³ Ko tonóna ixi ti tetuan an cuerpona, me e ti ndako a, ko ji i tetoka o ley jian jii ngaya aséenna; ko ti ndako a tjacha tetuan an.

²⁴ Lastuna nóana. ¿Ngisen tsingijnana ixi kondeexin ti nche e cuerpona tsenixinna?

²⁵ Juasie ndo Dio ixi je e ndo tsingijnana ndo ixi kujj Ncháina Jesucristo ko ixi Ncháina tsechónna kain nchakon. Jan an nóna ixi xrokonda tsitika on ley kuetuan an ndo Dio, maski cuerpona tjaun sinche e ti ndako a.

8

Stechónxinna ixi Espíritue ndo Dio

¹ Jai sen titikaon ndo Cristo Jesús, íxro an ijje sinká sen. Je o tjaun sen tsitikaon sen Espíritue ndo Dio ko nche a sen ti tjaun cuerpoe sen.

² Ixi ti tetuan an Espíritue ndo Dio tajon juachaxin tsechónna kain nchakon ixi titika onna ndo Cristo Jesús. Ko ti ndako a ko juachaxien xichononte ítituan i ngajinna

³ Ixi ndo Dio juinche e ndo nge e jua i juinche e ley kuayé e ndo Moisés ixi jua i tintu eni ti ndako a. Ndo Dio xruan an ndo Chjen en ndo ko ikjan xjan xranchi ngixe i chujni chóna ijje. Kujj ndo kuenxin ndo ixi jjee kain chujni nunte xasintajni, ko kuantsjengí e ndo ijje xrokuitjáñaxinna.

⁴ Jaña kon en ixi jaina jian xrokuitikaonna kain ti tetuan an ley ko xrokuitikaon ana ti ndachro cuerpojna. Ícha jian xrokuitikaonna Espíritue ndo Dio.

⁵ Ni titikaon nge e ndako a tjaun cuerpoe na, ni me e je o xraxaon na nge e jii nunte xasintajni. Ko ni tjaun tsitikaon Espíritue ndo Dio jitjee na nge e tikinixin en Espíritue ndo Dio.

⁶ Siá xroxraxaonna je o nge e tjaun cuerpoína, tsen enna. Siá xroxraxaonna nge e tikinixin en Espíritue ndo Dio, xrochondana juaxruxin ko juachaxin tsechónna kain nchakon.

⁷ Tjume e ni tsango take e juaxruxin ixi ti ndako a nche e na, ni me e ningakon en na ndo Dio, ixi tjaun a na ko jua i titikaon na ti tituan an ndo.

⁸ Ko ni take e juaxruxin ixi nche e na ti ndako a, ni me e jua i sinche e na naa nge e tsake exin juaxruxin ndo Dio.

⁹ Ko ja anta ítitikaon anta ti tjaun cuerpoanta. Ja anta titikaonnta Espíritue ndo Dio, siá nduaxin chondanta Espíritue ndo, ko ngisen chónda i Espíritue ndo Cristo, tikinixien a na ndo.

¹⁰ Siá ndo Cristo jii ngajinnta, maski cuerpoanta ndatsen en kondeexin ti ndako a juinche enta, asáanta tsechón ixi ó chondanta juachaxien ndo Dio ixi je e ndo bikonóa anta ndo, ko juinchetjúá ndo asáanta.

¹¹ *Ko siá chondanta Espíritue ndo Dio, ndo juinchechón ndo Cristo, kaxon sinchexechón ndo cuerpoanta tsiken en, ixi Espíritue ndo Dio jii ngajinnta.

¹² Méxin kichuuna, xrokonda tsitikaonna ti tetuan an ndo Dio, ko ístikaon ana nge e tjaun cuerpoína.

¹³ Ko siá sinche enta nge e tjaun cuerpoanta, ndatsen ennta ko ínai a xrotsechónnta. Ko siá tsitikaonnta Espíritue ndo Dio, tsintu enta kain nge e tjaun cuerpoanta, jaña tsarichonnta kain nchakon.

¹⁴ Kain sen titikaon Espíritue ndo Dio ó ikjan sen chjen en ndo Dio.

¹⁵ *Ixi Espíritue ndo Dio kuaye enta, je a xranchi ti nge e ña i baketuan anta ó sa ó ko bantaxronkanta. Na i. Espíritue ndo Dio chondana me e juinchejkanna chjen en ndo. Ko Espíritue ndo tajon juachaxin xrondachrona: “Ndotána, ja anta.”

¹⁶ Espíritue ndo Dio tonuexin aséejna ixi ikjanna chjen en ndo Dio.

¹⁷ Ko siá ikjanna chjen en ndo Dio, tikinixianna tsayé ena nge e tsajon ndo ti tsindachro ndo ó sa ó, jaña tikinixinna nge e tsajon ndo Dio tsayé e ndo Cristo ko jaína. Siá tsikaonna ko tangi tsatsingana xranchi ndo Cristo kon en ndo, jaña kaxon tsayé ena juachaxin xranchi juachaxin tayé e je e ndo.

Tsii ijíe juachaxin

¹⁸ Ko jai, maski tsatsingana nge e tangi, xro an nge e nche e me e, ixi nge e tsayé ena tjume e ícha jian ko ícha tjintee.

¹⁹ Kain nge e jii ngata a inche jichón en ixi ndo Dio tsjakoxin ndo ixi jaína chjen en ndo.

²⁰ Ixi nunte xasintajni ko kain nge e jii ndá tsingachrue, ko je a ixi jaña tjaun. Na i. Jaña tsiketuan an ndo Dio. Ko kain nge e jii ngata a nunte kaxon jichón en

²¹ ixi tsayé e kain nge e ti chaxro ko tsake e juaxruxin xranchi ste ni tsikjan chjen en ndo Dio.

²² Ó nojna ixi kain nge e juinchéña ndo Dio xra tangi tsikon, xranchi tangi tikon naa nchri, nchri nchejongí e chjen en.

²³ *Ko je a je o nge e jii ngata a nunte xasintajni tangi jii. Kaxon jaína tangi tikonna, jaína ti chondana Espíritue ndo Dio, ixi Espíritue ndo tjakoxin naa nge e ícha tuinxin tsayé ena ko ícha tjume e tsajon ndo Dio. Tangi stetikonna ko stechon enna nchakon ndo Dio tsingijnana ndo ko xrojkanna chjen en ndo Dio ko tsayé ena juachaxin ixi tsen ana.

²⁴ Ó kuaye ena juachaxin tsechónna kain nchakon ixi titika onna ko stechon enna nge e xratikon ana. Siá xrobikonna nge e stechon enna íxrokonda i xrochon enna ícha. Nge e ó tikonni íxrokonda i xrochon enni ti tikonni.

²⁵ Siá stechon enna nge e xratikon ana, xrokonda xrochon enna maski tangi stena.

²⁶ Ko jaña kaxon Espíritue ndo Dio tsingijnana nchakon jua i xrochuntiana ndo Dio. Ixi nóna ina xranchi xronichje ena ndo Dio, ko Espíritue ndo nichjaxin ixi jaína, ko jaína jua i tienxinna xranchi tjanchía Espíritue ndo ixi jaína.

²⁷ Ndo Dio no e ndo nge e tono e aséejna, ko no e ndo nge e tjanchía Espíritue ndo, ixi Espíritue ndo tinóatée xranchi tjaun ndo Dio, ko nichjaxin Espíritue ndo ixi jaína, ni titikaon ndo.

²⁸ Ó nojna ixi ndo Dio jian ndo. Maski tangi tatsingana, je e ndo tsingijnana ndo ixi kain nge e jian tsachrje ngajin kain ni tjue e ndo, ni tsikinche e je e ndo ixi jaña tjaun ndo.

²⁹ Sen ó sa ó tsikinche e ndo, tjaun ndo xroktan sen xranchi chjen en ndo, ko xrobikon sen Chjen en ndo, xjan naakuaxon, ixi xjan me e ícha sa ó xjan.

³⁰ Sen tsikinche e ndo Dio sa ó, kaxon kuiye e ndo sen, ko sen kuiye e ndo, juinchemé e ndo jíee sen, ko sen komé e jíee, chjée ndo sen ijíe juachaxin.

³¹ ¿Nge e xichrona? Siá ndo Dio jii ndo ngajinna, ¿ngisen xrojan nge e sinchejna?

³² Siá ndo Dio kuajon ndo chjen en ndo, xjan naakuaxon, kuenxin xjan ixi kainna, jaña kaxon xrochjajna ndo kain nge e.

³³ ¿Ngisen xrojuankata a ijie ngajin sen tsikinche e ndo Dio siá ndo Dio ó juinchemé e ndo jíee sen?

³⁴ ¿Ngisen xrojuankata a ijie ngajin sen? Siá ndo Cristo kuenxin ndo ixi je e sen ko xechón ndo íjngo, ko ndatsjonxin jian jii ndo ngajin ndo Dio, ko jitinóatée ndo ngajin ndo Dio ixi kain jajna.

³⁵ ¿Ngisen xrokuantsjeina ti tjuajna ndo Cristo?, maski chinga xrokojina, xroningakojina na, maski tsatsena jinta ko xrochonda ina manta tsetsáana, o maski ijie juachjaon xrochondana, o xrokue enna.

³⁶ Xranchi ndachro xroon chijnie ndo Dio:
Ixi titikaonnanta chondana juachjaon kainxin nchakon
ko xrokue enna kondeexin me e,
xranchi kutuchjon tóna na ba,
jaña tsojna kaxon.

³⁷ Ko maski kain nge e tangi tsatsingana, nojna ixi ndo Jesucristo tjuajna na ndo ko tsingijnana ndo tsatsingana kain juachjaon.

³⁸ Méxin jian nojna ixi ninaa nge e tsantsjeina ti tjuajna ndo Dio. Maski ti tsen enna, o maski ti tsechónna, ni sen ángel, o espíritu ña i, o maski nge e jiton en jai, o nge e tson en ícha tjume e,

³⁹ o nge e jiton en ngajni, o nge e jiton en ti jii ícha yaso e nunte xasintajni, o inaa nge e juincheña ndo Dio. Ninaa nge e me e tsantsjeina ti tjuajna ndo Dio ixi chjajna ndo chjen en ndo, Ncháina Jesucristo, kuenxin ndo ixi jajna.

9

Ndo Dio kuinche e ndo ni tjajna Israel

¹ Jan an titika on ndo Cristo ko méxin, ndachrjan ti nduaxin. Espíritue ndo Dio nchexraxaonna ixi kain me e nduaxin, ko jaña xraxa on ko ntaya i.

² Tsango toni e aséenna ko juaxruxin a ritjén

³ ixi kondeexin ni kichuuna, ni judío, tja on ixi tsitikaon na ndo Cristo, maski jan an xrokuama ijie, siá ji i xrobingjna na ixi ndo Dio xrojuinchemé e ndo jíee na.

⁴ Je e na tsikachrjenixin na tjajna Israel ko ndo Dio kuinche e ndo na xranchi chjen en ndo, ko jii ndo ngajin na, ko kuajon ndo juachaxien ndo ngajin na ko kuayé e na ti nge e tsindachro ndo tsajon ndo ko kaxon kuajon ndo ngajin na ley kuayé e ndo Moisés, ko juako ndo xranchi xrokuajon na juasaya ngajin ndo, ko chronga ndo nge e tsayé e na.

⁵ Ni Israel tsikachrjenixin na ni tsikachrjenixin jajna kaxon, ko kaxon ndo Cristo tsikachrjenixin ndo ni israelita nchakon ikjan ndo chujni. Je e ndo, ndo Dio ne e kain nge e jii, ko tikinixin tsajonna juasaya ngajin ndo kain nchakon. Jaña tson en.

⁶ Ko rindachrjan i ixi ndo Dio kuajon a ndo nge e tsindachro ndo ngajin ni tjajna Israel. Ixi je a kain ni tsikachrjenixin ni israelita nduaxin tikinixin en na tjajna Israel.

⁷ Ko kain a ni kuachrjenixin ndo Abraham nduaxin ikjan na chjen en ndo. Ndo Dio tsindache ndo Abraham: “Ni xrokjan ni kichuua tsachrjenixin na ndo Isaac.”

⁸ Ji i tiendxinni ixi xro an chujni ikjan chjen en ndo Dio ixi tsikachrjenixin na naa chujni tjintee. Na i. Je o ni titikaon nge e tsindache ndo Dio ndo Abraham, ni me e nduaxin tsikachrjenixin na ndo.

⁹ Ja in tsindache ndo Dio ndo Abraham: “Tsiñ nchakon janchri a, jan Sara, sinchejongí e jan naa ichjan.”

¹⁰ Ko je a je o me e. Kaxon kayui ichjan juinchejongí e jan Rebeca naakua ndotée xjan, ndo ndatin in Isaac, ndo tsikachrjexinna jajna.

¹¹ Ko xrajongí e kayui ichjan ko xraxro an nge e jian o ndakua i tsijinche e xjan, jaña kon en ixi juako ndo Dio chóna ndo juachaxien tinche e ndo ngisen tjaun ndo.

¹² Ixi ndache ndo jan Rebeca: “Xjan sa ó xrokjan xjan, xjan nchexrée xjan yuxin.”

¹³ Kaxon jaña ichro xroon chijnie ndo Dio: “Ícha tjua a* ndo Jacob, ixi ndo Esaú.”

¹⁴ ¿Ko nge e xichrona? ¿Á xronachro na ixi ndo Dio ndakua i nche e ndo? Na i.

¹⁵ Ixi ndo Dio tsindache ndo ndo Moisés: “Xrotjua a ngisen tja on xrotjua a, ko tsikonóa a ngisen tja on tsikonóa a.”

¹⁶ Je a ixi chujni tjaun o je a ixi nge e tsijinche e chujni, ndo Dio tinche e ndo ngisen tsikonóe e ndo.

* 9:13 *tjua a* yo te amo

¹⁷ Ndachro xroon chijnie ndo Dio xranchi nichje e ndo xi rey tjanya Egipto: “Kuájon juachaxin ixi ja a ikjan rey jaña tsjako juachaxin chóna ja an ixi jaña nchiji nunte xasintajni xrokono e ngisen ja an ko xrokuitikaon na nombréena.”

¹⁸ Jaña siá tjaun ndo Dio tsikonóe e ndo xrojan chujni, ni me e tsikonóe e ndo na, ko ngisen tjaun ndo sinchecha ndo aséen sen, jaña nche e ndo kaxon.

¹⁹ Ko xrojan ngisen xrondachro: “¿Sonda tsjankata a ndo Dio ijię ngajin chujni siá xro an ngisen tsjacha xronichjangí e ti tetuan an ndo?”

²⁰ Jan an xrojuata a: ¿Ngisen ja anta ixi xronichjangí enta ndo Dio? Xranchi naa ichi tsikónaxin inche xronichja xrondache ngisen juinchéña ichi: “¿Sonda jaña juinchéñana?”

²¹ Sen nchéña ichi chóna sen juachaxin sinchéña sen nge e tjaun sen. Ko chao sinchéña sen naa ichi tsonda kain nchakon o je o naa chi tsonde e sen nchakon jii kia ko chao je o nchitja o tsonde e sen.

²² Jaña kaxon ndo Dio tjaun ndo xrokjuakoxin ndo ti koña ndo ko ti ijię tetuan an ndo méxin bikonóe e ndo chujni tikinixin en xrokuen en.

²³ Jaña juako ndo ijię juachaxin chóna ndo ixi je e ndo bikonóaina ndo, jaña ó tsixraxaon ndo ó sa ó ixi xrochjjaana ndo.

²⁴ Ko ndo Dio kuinche e ndo chujni judío ko chujni je a judío.

²⁵ Jaña ndachro xroon tsikjin ndo Oseas:

Ni tikinixin a tjajnána, ni me e xrontatjan ni tjajnána.

Ni tjua i jan an, ni me e xrotjua a.

²⁶ Ko tjanya tsindache ndo:

“Je a ni tjajnána”,

xrondache ndo na įngo:

“Ni tjajnána ja anta ixi ja anta chjen en ndo Dio, ndo jichón.”

²⁷ Kaxon ndo Isaías ndachro ndo ixi ni israelita: “Maski ni tsachrjenixin ni Israel, kueya na xranchi kueya nchese jii ti ndachaon,† je o kaxin na tsjacha na tsayé e na juachaxin tsechón na kain nchakon

²⁸ ixi tuinxin tson en nge e tsindachro Ncháina ndo Dio, sinchéña ndo ijię ngajin chujni ste nunte xasintajni.”

²⁹ Kaxon ndo Isaías tsindachro ndo ó sa ó:

Ncháina, ndo Dio, chóna ndo kain juachaxin ixi kuintue a ndo xrokuitjáña kain ni kuachrjenixin ndo Israel

xranchi kuitjáña kain ni tjanya Sodoma ko kain ni tjanya Gomorra.

Sen judío ko chijni jian

³⁰ ¿Nge e icha xrontatjunta sen je a judío? Jue a sen ndo Dio ixi xrojuinchemé e ndo jíee sen, maski je e ndo juinchemé e ndo jíee sen ixi je o chuntia sen ngajin ndo Cristo.

³¹ A ni israelita kuitikaon na ley ixi xrokoméxin jíee na, ko jua i komé e.

³² ¿Ko sonda jua i komé e jíee na? Ixi xraxaon na ixi nge e xrojuinche e na, me e ndo Dio xrojuinchemé e ndo jíee na ko xrokuayé e na juachaxin, ko je a ixi xrochuntia na ndo. Méxin ndo Cristo ikjui ndo xranchi naa ixro kontengixin na kondeexin jíee na.

³³ Jaña chronga xroon chijnie ndo Dio:

Bake é naa ixro tjanya Jerusalén, ixro tsontengixin na ko tse e na nunte.

Ko ni titikaon ndo, je e na xroxraxaon a na ixi je e ndo tsintu e ndo na.

10

¹ Kichuuna, ixi nchiji aséenna, tjanča a ndo Dio ixi tsjeña o ixi ni israelita tsayé e na juachaxin tsechón na kain nchakon.

² Jan an nóna ixi ni israelita tsango tjaun na sinche e na xrojan ixra ngajin ndo Dio, ko jua i jian xraxaon na ixi je e na noe a na xranchi sinche e na ti tjaun ndo Dio.

³ Ko je e na titikaon a na xranchi ndo Dio chao sinchemé e ndo jíee na. Méxin, tjaun na sinche e na inaa nge e ixi jaña ndo Dio tsayé e ndo na ko titikakon a na xranchi kuetuan an ndo Dio sinche e na ixi sinchemé e ndo jíee na.

⁴ Ko jai ixi ti kuen en ndo Cristo, ña juexin juachaxien ley tso méxin ijię, ko jai ixi tsitikaonna ndo Cristo me e sinchemé e ijię chondana.

⁵ Ko ti xrokoméxin jíee chujni ixi ley, ndo Moisés ja in tsikjin ndo: “Ngisen tsitikaon kain ley, ni me e tsjacha na tso mé e jíee na ko tsechón na kain nchakon.”

⁶ Ko ti sinchemé e ndo Dio jíee na ixi chuntia na ngajin ndo ja in ndachro xroon: “Ndachro anta ngaya asáanta: ¿Ngisen saxrokjui ngajni? (Ji i xrondachro tjaun na xroxin-gajin ndo Cristo įngo.)

† 9:27 ndachaon mar

⁷ Ko ndachro anta kaxon: ¿Ngisen xroxingajin ti ícha yaso e ti jii chujni tsiken en?” (Ji i xrondachro ixi tsjanche enta ndo Cristo xroxechón ndo íjngo.)

⁸ Ko xroon chijnie ndo Dio ndachro: “Chijnie ndo Dio jii tjenkanta, ngaya ro anta ko ngaya asáanta.” Chijni me e ndachro ixi xrochuntianta ndo Dio ko me e tjako annanta.

⁹ Siá ixi ro anta xrondachroxinna ko tsitikaonnta ixi ndo Jesucristo Ncháina, ko siá ixi nchijí asáanta tsitikaonnta ixi ndo Dio juinchexechón ndo Cristo, ja anta tsarichonnta kain nchakon.

¹⁰ Ixi siá nchijí aséejna tsitikaonna ixi ndo Dio sinchemé e ndo jíejina, ko siá ro ana xrondachroxinna ixi chuxinna ndo Jesucristo, je e ndo tsajon ndo juachaxin tsechónna kain nchakon.

¹¹ Ndachro xroon chijnie ndo Dio: “Ngisen xrochuntia ndo Dio, sen me e nai a tsosue e sen.”

¹² Ko ndo Dio tikon ndo naxraje o kain chujni, á ni judío o á ni je a judío. Ncháina, Nché e kain chujni ko tingijna ndo kain ni tjanche e ndo.

¹³ Kaxon ndachro xroon chijnie ndo Dio: “Kain ni tiye e Ncháina tsayé e na juachaxin tsechón na kain nchakon.”

¹⁴ ¿Ko xranchi xronichje e na ndo Dio siá xrachuxin a na ndo? ¿Ko xranchi tsichuxin na ndo siá xratien a na ngisen je e ndo? ¿Ko xranchi xrokuin en na siá xro an ngisen tsjako e na ngisen je e ndo?

¹⁵ ¿Ko xranchi tsjako na chijnie ndo siá xro an ngisen xruan an na itsji na? Xranchi ndachro xroon jitaxin chijnie ndo Dio: “Juaxruxin tsake eni nchakon tikonna naa chujni chronga chijnie ndo Dio.”

¹⁶ Ko kain a chujni kuitikaon na chijnie ndo Dio. Jaña ndachro ndo Isaías: “Ncháina, ¿ngisen kuitikaon chijni nichjana?”

¹⁷ Jaña xrokonda tsin en na chijnie ndo Dio, me e tsaxi xrochuntia na ndo, ko chijni ti tin en na me e chijnie ndo Cristo.

¹⁸ Ko jan an xraxa on: ¿Á nai a kuin en na chijnie ndo Dio? Jaán, ó kuin en na chijni. Ixi ndachro xroon chijnie ndo Dio:

Chijnie ndo Dio kuin en na nguixin nunte, ko ti nichja ndo nchijí nunte xasintajni.

¹⁹ Ko íjngo jan an xraxa on:

¿Á ni israelita xratienxin a na?

Jaán, ó kuienxin na,

ixi ó sa ó ndachro ndo Dio ti tsikjin ndo Moisés:

Jan an sinta a ixi ja anta tsochjuya anta ngajin kaxin tjanya tsikincha i

ko xroningakon ennta naa tjanya tjaun a tienxin.

²⁰ Ko ndachro ndo Isaías naa nge e ó sa ó ti tsindachro ndo Dio:

Jan an kuajon juachaxin xrokuitjana chujni jitje a na

ko jan an konoxinna ngajin ni juanchangi a ngisen jan an.

²¹ Ko chronga ndo Isaías nge e ndachro ndo Dio ixi ni israelita: “Nchijí nchakon tja on tsingijna naa tjanya tienxian a ko titikaon a.”

11

Ndo Dio tintue a ndo ni tjanya Israel

¹ *Jai tjanchangi: ¿Ndo Dio á ó kuintu e ndo ni tjanya Israel? Na i, ixi jan an kaxon israelitana, ko kuachrjenixinna ndo Abraham ko tikinixinna ni ndo a ndo Benjamín.

² Ixi ó sa ó tsikinche e ndo Dio ni israelita xranchi ni tajné e ndo. Ko jai tintue a ndo na. ¿Á noa inta xranchi nichja xroon chijnie ndo Dio, ti tsindachro ndo profeta Elías, ti tjankata a ndo ijje ngajin ni Israel? Ko ja in tsindachro ndo:

³ “Nchána, je e na naakóñaxón na ni kuachronga chijnianta ko konchjenjin na altar na anta ko je o jan an kuituna ti nichja chijnianta ko kaxon tjaun na naatsóñaxónna na.”

⁴ Ko ndo Dio juate e ndo ko ndachro ndo: “Xra ste yaato mil chujni titikaon na najan an ko xratakexin a na ntatuchi in na ngajin ídolo Baal.”

⁵ Kaxon jaña jiton en jai, kaxin na xratitikaon na ndo Dio, ni tsikinche e ndo.

⁶ Jian ndo Dio, ko juasie ndo ixi bikonó e ndo na, ko je a ixi xrojan ixra juinche e na ixi méxin bikonó e ndo na. Ko siá jaña xrokjui, je a nduaxin ixi je e ndo bikonó e ndo na.

⁷ Maski itsjé ni israelita jitjee na ndo Dio, ko je o kaxin na kuitja na ndo, ni je e ndo tsikinche e ndo. Ko kaxin na ícha koncha aséen na ko kuitikaon a na.

⁸ Xranchi ndachro xroon chijnie ndo Dio: “Ndo Dio kuajon a ndo juachaxin xrokuienxin na, ko kaxon jaña xrajiton en nchakon jai. Kuajon a ndo juachaxin ixi xrobikon na ko xrokuienxin na.”

⁹ Kaxon tsikjin ndo David:

Kia nchéña na, me e nchexin na ti ndako a,
ko me e xrochóna na ijie juachjaon.

¹⁰ Ko xranchi itjui tseta a ikon na me e tsikon a na
ko kondeexin ijie chóna na
me e tangi tson en na kain nchakon.

Ni je a judío kaxon tsayé e na juachaxin tsechón na kain nchakon

¹¹ Ko maski ni judío jua i juinche e na nge e tjaun ndo Dio, je a xrondachro ixi ndo Dio ó tjáñe e ndo ixi je e na. Ko ti kuitikaon a ni judío, méxin ni je a judío juacha na kuayé e na juachaxin tsechón na kain nchakon. Ko ji i sinche e ixi ni judío tsochjuye e na ixi je e na juacha i na juachaxin me e.

¹² Ixi kuitikaon a ni judío, ndo Dio kuajon ndo juachaxin ngajin ni je a judío tsitikaon na ndo. Ko nchakon xrokjan ni judío tsitikaon na ndo Cristo, ícha jian ixi ícha itsjé na xrokjan na tsitikaon na ko tsechón na kain nchakon.

¹³ Ti xrondachrjan xrokonda tsin ennta, ni je a judío. Ndo Dio xruan anna ndo sintakuan annta ni je a judío, ko ji i tsango tjintee.

¹⁴ Tja on ixi ni tjañána tsochjuye e na ixi ja anta titikaonnta ndo Dio, ko ixi jaña kaxon kaxin na xrokjan na tsayé e na juachaxin tsechón na kain nchakon.

¹⁵ Ixi kuintu e ndo Dio ni judío, ni je a judío kuitja na juachaxien ndo Dio. Ko siá xrokjan ni judío tsitikaon na, jaña ni ste xranchi ni tsiken en jai xroxechón na.

¹⁶ Siá xroxrajon naa nutja ó sa ó tsikoña tsayé e ndo Dio, kaxon nchijí chu u tikinixin en ndo, ko kaxon siá tikinixin en ndo nue e naa ntaa, kaxon kain chaan ntaa tikinixin en ndo.

¹⁷ Ko kaxin ni judío xranchi chaan ntaa olivo, ntaa jian konchrinjin ndo Dio, me e je e ndo juinchetsé ndo ikaxin chaan ntaa je o jitangi no jna, ntaa me e xrokjui xranchi ja anta ni je a judío, ko ixi jaña kon en, méxin ja anta kónanta ni tjañée ndo Dio, ko jaña kuaye enta juachaxin tsarichonnta kain nchakon.

¹⁸ Méxin, xraxaon anta ixi ja anta ícha tjinteenta ixi ni judío, ni kuitikaon a ndo Dio. Xraxaonnta ixi ja anta kuaye enta juachaxin me e kondeexin ni judío, ko je a kondeexin ja anta.

¹⁹ Nchéxin xraxaonnta ixi ndo Dio kuintu e ndo ni judío ixi ja anta xrokjannta ni tjañée ndo.

²⁰ Chao me e. Ko ndo Dio kuintu e ndo na ixi je e na kuitikaon a na ndo. Ko ja anta kuaye enta juachaxin ixi chuntianta ndo. Méxin, nchejié a asáanta. Cháña titikaonnta ndo.

²¹ Siá ndo Dio bikonóe a ndo ni judío, jaña kaxon tsikonóa inta ndo siá ndako a sinche enta.

²² Tsje enta ixi ndo Dio tsango jian ndo, ko kaxon chjée ndo juaña, me e tsajon ndo juachaxin tangi tsintekon en chujni titikaon a. Ko jian ndo ngajinnta, ko jaña sinche e ndo, siá jian tsitikaonnta ko tsajonnta juasaya ngajin ndo. Ko siá na i, je e ndo nduaxin tsintu anta ndo.

²³ Ko ni judío, nchakon tsintu e na nge e ndako a kuanche e na ko tsitikaon na ndo Dio, je e na xrokjan na ijngo ni tjañée ndo, ixi je e ndo chóna ndo kain juachaxin jaña sinche e ndo.

²⁴ Méxin, siá ja anta je a sa ó tsikincha anta ndo Dio ixi xrokjuinta ni tjañée ndo, ko kuaya anta ndo maski tikinixin a xrokjuinta ni tjañée ndo, xranchi xrokjan i ni tjañée ndo, ni nduaxin judío, ni sa ó tsikinche e ndo, ni ikjui tjañée ndo?

Ni Judío tsayé e na juachaxin tsechón na kain nchakon

²⁵ Kichuuna, xrají itsjé nge e tsono anta ti je o ndo Dio no e ndo, ko jai sintano anta ixi jaña sinchejié a asáanta, ixi ni judío je a kain nchakon tsitikaon a na ndo Jesucristo, ixi tsji nchakon itsjé ni je a judío tsitikaon na ndo, ko tjume e kaxon ni judío xrokjan na tsitikaon na ndo.

²⁶ Nchakon jaña tson en, tjume e kain ni judío tsayé e na juachaxin tsechón na kain nchakon ixi xroon chijnie ndo Dio ndachro:

Tsi xin tjaña Jerusalén naa ngisen tsingijnanta

ko tsantsje ndo ijie chóna sen tsikachrjenixin ndo Jacob.

²⁷ Ji i juachaxin tsayé e sen,

nchakon sintama a ti ndako a juinche e sen.

²⁸ Jai ni judío titikaon a na chijni natjúá, méxin, ndo Dio ningakon en ndo na, ko chao tsajon ndo juachaxin ixi ja anta, ni je a judío, tsitikaonnta ndo. Ko jaán, ndo Dio xratjue e ndo ni judío ixi je e ndo tsikinche e ndo sen tachrí e na.

²⁹ Kain nge e tajon ndo Dio, ko í chijja i ndo íjngo ko kaxon í tintue a ndo ni ó tsikinche e ndo.

³⁰ Sa ó ja anta bakitikaon anta ndo Dio, ko jai ni judío tjaun a na tsitikaon na ndo, méxin ndo Dio jai tikonóa a ndo ja anta.

³¹ Ko jaña kaxon, ndo Dio tsikonóe e ndo ni judío xranchi bikonóa anta ndo ja anta.

³² Ndo Dio kuintu e ndo ixi kain na xrokuitikaon a na ndo, ixi jaña tsikonóe e ndo na kaxon.

³³ Juachaxien ndo Dio tsango ijié ko tsango no e ndo kain nge e. Xro an chujni tienxin xranchi xraxaon ndo Dio, ko xro an chujni chao xrochronga nge e tjaun ndo sinche e ndo.

³⁴ Ndachro xroon chijnie ndo Dio: “¿Ngisen no e xranchi xraxaon Ncháina, ko ngisen chao xrojuinchekuen en ndo nge e sinche e ndo?”

³⁵ ¿Ngisen xrokuajon nge e xrokuayé e ndo Dio ko jaña xrojuinchekonkjan ndo inaa nge e?”

³⁶ *Kain nge e ti xin ti jii ndo Dio, ko kain nge e juinchekonchjian je e ndo, kain me e sinche e ixra ngajin ndo. Ko je e ndo tikinixin en ndo juasaya kain nchakon. Jaña tson en.

12

Xranchi xrokonda tsintee chjen en ndo Dio

¹ Méxin, kichuuna, ndo Dio tikonóa anta ndo, méxin, jan an tinóatána ixi nchijí asáanta tjéenta ndo Dio jai, ko tájonnta asáanta ko nchijí ja anta sinche enta xra ixi ó tjúá asáanta ko jaña tikinixin tsajonnta juasaya ngajin ndo.

² Ko ínche anta xranchi nche e chujni chúxin a ndo Dio, ni ste nunte xasintajni.* Cháña tájonnta juachaxin ixi ndo Dio tsindoxin ndo asáanta ko ti xraxaonnta. Ko jaña tsono anta nge e tjaun ndo Dio sinche enta, me e ti jian ko ti chaxro.

³ Juasie ndo Dio, kuajon ndo ixra nta a ngajin ndo. Méxin, ntatjunta xroxraxaon anta ixi ja anta ícha tjinteenta. Na i. Xraxaonnta jian ixi juachaxin tjáanta ndo Dio ixi chuntianta ndo.

⁴ *Jaña cuerpojna, kueya parte chónnda. Ko ngujngu me e je a naxraje o ixra nche e.

⁵ Jaña kaxon jajna, maski kueyana, ikjanna naakua cuerpoe ndo Cristo. Jaña naakua xroxraxaonna ixi ó ikjanna kaina naakua cuerpoe ndo.

⁶ *Ko ndo Dio kuajon ndo kueya ixra sintu una, ko kuajon ndo ngajin ngujngu jajna xranchi tjaun je e ndo. Ko xrokonda jian sinche ena ti ixra kuajon ndo. Méxin, siá tajon ndo juachaxin ixi xronichjana chijnie ndo, xrokonda sinche ena ixra me e xranchi nduaxin chuntiana ndo.

⁷ Siá chjajna ndo Dio ixra ti tsingijnana chujni, xrokonda jian sinche ena xra me e. Ko ngisen tsikayé e juachaxin tsjako, xrokonda ixra me e sinche e sen.

⁸ Ngisen tsikayé e juachaxin sinchexraxaon inaa ngisen naa nge e jian, xrokonda ixi nchijí aséen sen sinche e sen ixra me e. Ko ngisen tsikayé e xra ixi tsajon xrojan nge e, xrokonda juaxruxin tsajon sen. Ko ngisen tsikayé e ixra tsetuan an, jian xrokonda tsetuan an sen, ko ngisen tsikayé e xra xrobingijna ngajin ni chónnda i, xrokonda juaxruxin tsingijna sen.

Xranchi tsintee sen titikaon ndo Cristo

⁹ Ko nchijí asáanta xrotjue e kichuunta. Tintu enta kain nge e ña i ko xraxaonnta kain nge e jian.

¹⁰ Tjue e kichuunta ixi titikaonnta Ncháina Jesús ko chónde e kichuunta juasaya.

¹¹ Jian nche enta ixra ko tosa inta, ko nche enta ixra ngajin Ncháina ixi nchijí asáanta.

¹² Take énta juaxruxin ixi ti xrastechon ennta ti jian tsji, ko chá anta maski tangi tson annta, ko tintue anta nichje enta ndo Dio.

¹³ Tingijnanta sen titikaon Ncháina siá xro an nge e chónnda sen. Taye énta sen tji ndointa ko tájonnta juachaxin tsitu e sen ndointa.

¹⁴ *Tjanche enta ndo Dio sinchenchaon† ndo ni ndakua i nta anta ko tjanche anta ndo Dio ixi xrojan nge e ndako a tson en na.

¹⁵ Chá anta ngajin sen ste juaxruxin, ko siá xrojan ngisen yaa juachjaon ko stetsjanga sen, tsjangaku unta sen.

^{11:36} 1Co. 8:6. * ^{12:2} xasintajni mundo ^{12:4} 1Co. 12:12. ^{12:6} 1Co. 12:4-11. ^{12:14} Mt. 5:44; Lc. 6:28.

† ^{12:14} sinchenchaon bendecir

¹⁶ Juaxruxin tinteeku unta sen kichuunta ko nchejié a asáanta ko chaxro tjentonta sen xro an nge e chónnda, ko xraxaon anta ixi ícha no anta.

¹⁷ Ko siá ndako a sinta anta xrojan chujni, tjenge anta. Cháña nche enta ti jian ixi jaña tsikon kain na.

¹⁸ Tjéenta ixi nchiji asáanta jian tsinteku unta kain na.

¹⁹ Kichuuna, ja onta nchéña inta ijje ngajin inaa chujni, cháña tintu enta ixi ndo Dio je e ndo sinchéña ndo ijje ngajin na, xranchi ndachro xroon chijnie ndo: “Jan an tikinixinna sintaña ijje ko jan an xrotjá a na ti tikinixin en na.”

²⁰ Kaxon ndachro xroon: “Siá ni ningakon annta kuen en na jinta, chje énta na sine na, ko siá kuen en na inda, chje énta na tsi i na. Jaña tsosue e na ixi ja anta jian juinche enta ngajin na.”

²¹ Tintue anta ixi tsjacha ti ña i ngajinnta; cháña nche enta ti jian ixi jaña ti jian tsjacha.

13

Tsitikaonni ni tituan an

¹ Kain na xrokonda tsitikaon na ni tituan an, ixi juachaxin chónnda na, ndo Dio tsikajon juachaxin, ixi xro an ni tituan an xrobake e siá je a ndo Dio xrokuajon juachaxin.

² Chujni titikaon a ni tituan an kaxon titikaon a na nge e tsiketuan an ndo Dio. Ko ni jaña nche e, tangi tson en na.

³ Ko ni tituan an ste a na ixi sinchexronka na chujni nche e jian. Na i, ni nche e ndako a. Siá tjaunnta ixi ni tituan an sintaxronka inta na, ndako ko jian nche enta, ko jaña je e na kaxon ndako xronichja anta na.

⁴ Ixi ndo Dio kuetuan an ndo ixra stenche e na ixi jaña ja anta jian tsinteenta. Ko siá sinche enta ti ndako a, xrokonda xroxronkanta ixi je a xruenxon ste ni tituan an. Je e na chónnda na juachaxin sintajenganta na i na ixi je e na nche e na xrée ndo Dio, sinchejengana na ni ndako a nche e.

⁵ Méxin, xrokonda tsitikaonnta ni tituan an, je a je o ixi sintajenganta na na ixi ti ndakua i juinche enta. Na i. Ixi jaña tikinixin tsitikaonnta na.

⁶*Kaxon ja anta tjenganta na ngajin ni tituan an ixi je e na stenche e na ixra tsikajon ndo Dio, ko nche e na nge e tikinixin.

⁷ Kaxon chje énta na nge e tikinixin tsayé e na. Sen xroxenge e na ixi jaña tikinixin, xroxenge e na, ko ngisen sinká ixi juinchejki sen xrojan nge e, tsjenga sen na, ko siá tikinixin tsajonnta juasaya, tájonnta juasaya.

⁸ Kaxon xro an ngisen tasinke enta. Je o ti xrokonda tsasinke e kichuunta, me e ti xrotjue enta kichuunta, ixi ngisen tjaun ko tjue e ni kichuu, ó kuitikaon sen nge e kuituan an ley.

⁹ Ixi ndachro xroon jitaxin chijnie ndo Dio: “Xrochonda inta inaa nchri je a janchri anta, ko tóna inta kichuunta, ko temá inta, ko nichja inta nge e nduaxin a ixi inaa ngisen, ko tochjuya inta nge e chónnda inaa chujni.” Kain ji i ko ikaxin nge e kuituan an ndo Dio xrondachro naakua naa chijnie tsiketuan an ndo: “Xrotjue e kichuuna xranchi tjue ena aséejna.”

¹⁰ Chujni tjue e kichuu, xro an nge e ti ndako a jinchekao inaa chujni. Cháña, tjue e kichuunta ixi jaña tsitikaonnta jian kain nge e jitaxin ley.

¹¹ Kain ji i xrokonda sinche ena jai ixi ó kuji nchakon xroxingamajna ixi íse a ó tsji nchakon tsayé ena juachaxin tsechónna kain nchakon, ixi tsonchrjen a ó tsji kain ji i je a xranchi nchakon ti juangixin kuitikaonna.

¹² Jai ó juexin tiie ko íse a tsingasáña, ko jai xrokonda tsintu ena ti kuanche ena ti kuajina ti naxixe e, ko xrochondana juachaxien Espíritue ndo Dio, me e tsingijnana tsajina ti tingasáña.

¹³ Xrotsje ena jian xranchi tsajina ti tingasáña taanchakon. Tsaji ana kiée chujni ti no te to na ko ti kuan na, ko xroxraxaon ana xrochondana inaa sen je a janchri ina o ndoxi ina, ko tsinteketo ana ngajin inaa chujni ko xrochuya ina.

¹⁴ Cháña taye énta juachaxien Ncháina Jesucristo, ko írxaxaon anta sinche enta nge e ti ndakua i.

14

Nichja inta kontree inaa sen kichuunta

¹*Jian nichje enta sen xratiexin a nge e tetuan an ndo Dio, ko siá je a naxraje o tienxinna chijnie ndo, tjakaxin a kichuunta.

² Ste kaxin sen ndachro sen chao sine sen kain nge e ixi soji titikaon sen, ko ste kaxin sen soji a sen ixi ti nge e titikaon sen, méxin ne a sen ntao.

³ Ko ngisen ine kain nge e tsjanoa i sen sen ne a ntao, ko ngisen ne a ntao, tsjanoa i sen sen ne kain nge e, ixi ndo Dio nataonxin kuayé e ndo sen.

⁴ Ixi, ¿ngisen ja anta ixi xronichjanta kontree naa sen kichuunta, sen nche e ixra ngajin inaa ngisen? Siá sen nhexra me e, á chao o chao a juinche e sen ixra, nchéé sen me e xrondachro á chao o chao a jii ti juinche e sen. Ko jian ixra sinche e sen ixi Ncháina chónnda ndo ijie juachaxin tsingijna ndo sen ixi jian sinche e sen.

⁵ Ko ste kaxin sen xraxaon sen tsango tjintee naa nchakon ko inaa nchakon na i. Ko ikaxin sen ndachro sen ixi kain nchakon xraje o nchakon. Méxin, ngujngu ja anta ti jian xroxaxaonnta me e nche enta.

⁶ Ngisen xraxaon ixi naa nchakon ícha tjintee, je e sen jaña xraxaon sen ixi chónde e sen juasaya Ncháina, ko kaxon sen titikaon a jaña, kaxon chónde e sen Ncháina juasaya, maski je a xraje o xraxaon a sen. Kaxon sen ine kain nge e, ine sen ixi jaña chónde e sen juasaya Ncháina ko tajon sen juasaya ngajin ndo Dio. Kaxon jaña nche e sen ne a ntao, ko kaxon tajon sen juasaya ngajin ndo Dio.

⁷ Ixi ninnaa jajna jua i xrokuechón ana ni xrokue enna; kain ji in ton en ixi juachaxien Ncháina.

⁸ Siá stechónna o ndatsen enna, jajna tsajonna juasaya ngajin ndo Dio. Méxin, maski tsen enna o maski tsechónna, jajna tikinixin enna ndo Cristo.

⁹ Méxin, ndo Cristo kuen en ndo ko xechón ndo íjngo ixi tsetuan an ndo ngajin ni tsiken en ko ngajin ni stechón.

¹⁰ *Ko ja anta, ¿sonda nichjanta kontree inaa sen?, o, ¿sonda chonde anta juasaya ngajin kain chujni? Kainna xrokonda tsonchjiñe ena ngajin ndo Cristo ixi sinchéñaina ndo ijie.

¹¹ Ndachro xroon jitaxin chijnie ndo Dio:

Jan an ixi richon, ndachrjan ixi kain chujni tsakexin na ntatuchi in na ngajin ko kain chujni xrondachro na ixi jan an ndo Dio ne e na.

¹² Jaña kainna tsatsingana ngajin ndo Dio ixi sinchéñaina ndo ijie xranchi kuinteena ngata a nunte nti i.

Chungie a kichuunta

¹³ Méxin, cháña xrochungi ana kichuuna ko xro an nge e ti ndako a xronichjana ixi inaa ngisen, ixi kondeexin jajna naa sen titikaon Ncháina ba tsama sen ijie o ítsitikaon a sen ndo Dio.

¹⁴ Jan an titika on Ncháina Jesús, me e nónaxin ko a nge e tjúa i. Ko siá xrojan ngisen xraxaon ixi naa nge e ine sen tjúa i, cháña sine a sen.

¹⁵ Siá naa sen kichuunta xraxaon sen ixi tjúa i nge e intenta ko me e ncheni e aséen sen, me e xrondachro íjtue anta sen; méxin, ja anta cháña ínte anta nge e ndachro inaa sen ixi tjúa i ixi jaña sen kuenxin ndo Cristo tsitjáña i sen.

¹⁶ Ko tintue anta ixi ndako a xronichja na ti nge e jian titikaonnta ixi juachaxin tjáanta ndo Jesucristo.

¹⁷ Ixi juachaxien ndo Dio je a ti sinena o nge e tsu una. Na i. Juachaxien ndo Dio tituan an ixi jian tsojuna ko juaxruxin tsinteena ixi Espíritue ndo Dio tajon kain ji i.

¹⁸ Sen jian nche e ixra ngajin ndo Cristo, sen me e stenche e sen nge e tjaun ndo Dio, ko ikaxin chujni xronichja jian ixi je e sen.

¹⁹ Méxin, nche ena kain nge e tika o juaxruxin, ixi me e tsingijna sen kichuuna ko jaña ícha tsitikaon sen Ncháina Jesús.

²⁰ Méxin, tintue anta tsitjáña ixra juinche e ndo Dio kondeexin ti sineni, ixi kain nge e ineni, ó juinchetjúá ndo Dio. Siá xrojan nge e sineni me e xroxaxaon inaa sen ixi ndako a jii ko kondeexin me e tsitjáña nge e ó kuitikaon sen, cháña sine ani.

²¹ Méxin, ícha tjintee sinte anta ntao ko tsi anta ixran siá inaa ngisen xroxaxaon ndako a me e, ko xro an nge e sinche enta ixi jaña tsama sen kichuunta ijie.

²² Nge e jian titikaonnta, ja onta ko ndo Dio no anta. Ko juaxruxin tsake e ngisen xraxaon ixi xro an ijie yama sen kondeexin nge e nche e sen.

²³ Ko ngisen ine xrojan nge e ko jixraxaon sen ixi ndakua i jii, sen me e tsama sen ijie, ixi xraxaon sen ndakua i jii nge e juinche e sen. Ixi ti nduaxin a chúntiani nge e nche ení, me e yamaxinni ijie.

15

Tingijnanta ixi ícha soji tsitikaon sen kichuunta

¹ Jajna siá ícha soji titikaonna Ncháina Jesucristo, xrokonda tsingijnana sen xrasoji a titikaon ndo, ko sinche ana je o ti nchejna juaxruxin.

² Kainna xrokonda sinche ena ti jian ngajin sen kichuuna, ko jaña tsingijnana sen ixí ícha xrochuntia sen Ncháina Jesucristo.

³ Ixi ndo Cristo juinche a ndo je o ti juinche e ndo juaxruxin. Na i. Je e ndo kuitikaon ndo nge e ndachro xroon chijnie ndo Dio: “Tangi juinchenina ti nichjangí e nã ndo Dio.”

⁴ Kain nge e jitaxin xroon chijnie ndo Dio tsiketaxin ixí jajna xrokonojna nge e jian, ko xrochon enna nge e tsayé ena, maski tangi tsojna, ixí chijnie ndo Dio chajina juachaxin ixí xrochondana juaxruxin.

⁵ Ko ndo Dio, me e ndo tingijnana ko chajina ndo juaxruxin, tsingijnanta ndo ixí jian tsariku unta sen kichuunta, ko tsinteenta xranchi juako ndo Cristo Jesús.

⁶ Ko kainna naxraje o xronichje ena ndo Dio ko tsajonna juasaya* ngajin ndo, Ndotée Ncháina Jesucristo.

Chijni jian tsayé e ni je a judío

⁷ Méxin, titikaonnta ko tjue é kichuunta xranchi ndo Cristo kuaya anta ndo, ko jaña tsajonnta juasaya ngajin ndo Dio.

⁸ Jan an chao xrondachrjan ixí ndo Cristo kuij ndo ixí tsingijna ndo ni judío ixí tson en nge e jian tsindache ndo Dio sen tachrí ana ó sa ó, ixí jaña tsjako ndo Cristo ixí ndo Dio jian ndo ko nche e ndo nge e tsindachro ndo.

⁹ Kaxon kuij ndo ixí ni je a judío tsajon nã juasaya ngajin ndo Dio ixí bikonóe e ndo nã, xranchi chronga xroon chijnie ndo Dio:

Jan an ko chujni ste jée tjajna tsajonna juasaya ngajin ndo Dio ko xrotsjena himno ngajin ndo.

¹⁰ Kaxon ndachro chijnie ndo Dio:

Ja anta ti je a judíonta, take énta juaxruxin ngajin kain chujnie ndo Dio.

¹¹ Kaxon íjngo tsindachro xroon chijnie ndo Dio:

Tájonnta juasaya ngajin Ncháina Dio kainnta, maski je a judíonta, ko kain chujni xrotsje ngajin ndo Dio.

¹² Kaxon ndo Isaías tsikjin ndo:

Tsachrenixin ndo Isafí naa ngisen

tsetuen en kain ni je a judío,

ko je e nã tsitikaon nã ndo Dio,

ko me e tsechón nã kain nchakon.

¹³ Ndo Dio, ndo tsajon juachaxin stechon ennta, xrotjáanta ndo juaxruxin ko xrocha anta ixí titikaonnta ndo, ixí juachaxien Espíritue ndo xrochon énta nge e tsayé ena.

¹⁴ Kichuuna, nduaxin nóna ixí ja anta jiannta ko jian tienxinnta ko no anta me e sinchekuen ennta sen kichuunta.

¹⁵ Ko jaña lkjin xroon ji i ixí jian tsono anta nge e sinche ena ko xrotjáña inta. Jaña nta a ixí ixrã ji i kuituanna ndo Dio sinta a,

¹⁶ ko kuinchena ndo sinta a xrée ndo Jesucristo, xronichja chijnie ndo Dio ngajin ni je a judío. Ixrã me e ti tjako chijni jian ixí tsayé e nã juachaxin tsechón nã kain nchakon, ko je e nã xrokjan nã xranchi naa nge e jian tsayé e ndo Dio ixí Espíritue ndo.

¹⁷ Jan an naa ngisen titikaon ndo Cristo Jesús, méxin, juaxruxin ritjén ixí nta a xrée ndo.

¹⁸ Ko jua i xrondachrjan inaa nge e. Je o ndachrjan kondee juachaxin kuajon ndo Cristo kuayá a ixí xronichja ngajin ni je a judío chijnie ndo ixí tsitikaon nã ndo Dio. Ko ó kuitikaon nã ixí chijni juáko ko je a ixí je o ti nichja, kaxon ixí nge e jian juunta a.

¹⁹ Ixi juachaxien Espíritue ndo Dio juunta a itsjé ixrã ijíe ko juintakuan an nã chijnie ndo Cristo ixí jaña tsechónna kain nchakon. Ko juangixin juáko tjajna Jerusalén ko kain tjajna tjenka nti a ko nguixin no Iliria.

²⁰ Ko tja on tsjako chijni tajon juachaxin ngajin tjajna ti xratien a nã chijnie ndo Cristo, ixí jan an tjaun a sinta a ixrã ti no inaa sen ó juinche e sen ixrã.

²¹ Tja on sinta a xranchi ndachro xroon chijnie ndo Dio:

Xrokuin en ni xranai a tsikin en chijnie ndo.

Ko xrokuienxin chujni, ni xratienxin a chijnie ndo.

Ndo Pablo xraxaon ndo itsji ndo tjajna Roma

²² *Ó itsjé nchakon tja on xrojuasótsja anta ko xrajua i tjaso.

²³ Ko jai ó juexin ixrã rinta a nguixin nti i. Ko ó tsjé nano tja on xrojuasótsja anta,

* 15:6 juasaya respeto, honor 15:22 Ro. 1:13.

²⁴ méxin, xraxa on tsjaso nchakon tsatsinga itsji tjajna España. Jua i tsituna itsjé nchakon ngajinnta ko nóna ixi juaxruxin tsake e ixi tsikonnta, ko tja on tsingijnaninta nchakon satsjixin nti a.

²⁵ *Ko jai satsji tjajna Jerusalén, tsiki an tomi tsingijnaxin sen kichuuna nti a.

²⁶ Ixi sen ni ngo nunte Macedonia ko sen ni ngo nunte Acaya jua o sen tomi ixi xroxruan an sen ngajin sen kichuuna, sen nóa, ste tjajna Jerusalén.

²⁷ *Je e sen, sen je a judío, juaxruxin juinche e sen ji i, ixi sen judío titikaon ndo Cristo bingijna ti je e sen, sen tjajna Macedonia, ixi xrokono e sen chijnie ndo Dio ó seno. Ko jai kaxon je e sen bingijna sen ko kuajon sen nge e chóna sen ixi xrokuayé e sen judío titikaon Ncháina.

²⁸ Ko nchakon tsajon tomi ngajin sen kichuuna, tjume e jan an satsji tjajna España ko no ña tsatsinga tsjasotsja anta.

²⁹ Nóna ixi nchakon tsjaso nti a tjajna Roma xrontatjunta kain nge e jian juinche e ndo Cristo ngajin.

³⁰ Kichuuna, tinóatáana ixi Ncháina Jesucristo ko Espíritue ndo, ti tajon juachaxin tjue e kichuuna, tjanche enta ndo Dio ixi tsingijnana ndo.

³¹ Kaxon tjanche enta ndo ixi tsingijna ndo ixi xro an nge e sinchena ni titikaon a ndo Dio, ni jii tjajna Judea, ko tomi tika an sen kichuuna ste tjajna Jerusalén, jian tsayé e sen tomi.

³² Tjume e, siá ndo Dio tjaun ndo, juaxruxin tsjaso ti stenta ko juaxruxin tsjokéena nti a.

³³ Ndo Dio, ndo chjaina juaxruxin, tsake e ndo ngajin kainnta. Jaña tson en.

16

Ndo Pablo xruan an ndo juajna ngajin sen chúxin ndo

¹ Ixudio tingijnanta jan kichuuna Febe. Je e jan jian nche e jan xrée ndo Dio ti ni ngo jii tjajna Cencrea.

² Taje énta jan ixi juachaxien Ncháina, xranchi tikinixin sinche e sen kichuuna titikaon Ncháina. Tingijnanta jan ixi xrojan nge e xrokonde e jan, ixi je e jan tsango bingijna jan kueya chujni ko kaxon jan an bingijnana jan.

³ *Tájonnta juajna ngajin jan Priscila ko ndo Aquila. Je e sen ko jan an junta ana xrée ndo Cristo.

⁴ Je e sen xrokuen en sen ixi bingijnana sen, méxin, tajon juasiana ngajin sen, ko je a je o jan an, kaxon kain sen kichuuna, sen ni ngo je a judío.

⁵ Tájonnta juajna kaxon ngajin kain sen kichuuna xra o ndo a jan Priscila ko ndo Aquila. Nichje enta ndo Epéneto, ndo tsango jian tjento, ndo me e sa ó juangixin kuitikaon ndo ndo Cristo nunte Acaya.

⁶ Chje énta juajna jan María ixi kaxon je e jan tsango juinche e jan ixra nti a ti stenta.

⁷ Kaxon tájonnta juajna ngajin sen tsikixin tjajnána, ndo Andrónico ko kaxon ndo Junias, sen kuariki an ndo achjiso. Kain sen kichuuna tsango tjento, sen me e ó sa ó kuitikaon sen ndo Cristo ko tjume e jan an.

⁸ Kaxon tájonnta juajna ngajin ndo Amplias ixi je e ndo naa ndo chuxin ko tsango tjua a, ko titikaon ndo ndo Cristo.

⁹ Tájonnta juajna ngajin ndo Urbano ixi kayuina junta ana xrée ndo Jesucristo, ko tájonnta juajna ngajin ndo tsango tja on, ndo Estaquis.

¹⁰ Tájonnta juajna ngajin ndo Apeles. Je e ndo tsango tangi kon en ndo ixi kuitikaon ndo ndo Cristo. Kaxon tájonnta juajna ngajin sen ndo a ndo Aristóbulo.

¹¹ Kaxon tájonnta juajna ngajin ndo kichuuna Herodión, ko kaxon ngajin kain sen ndo a ndo Narciso ixi kaxon titikaon sen Ncháina.

¹² Tájonnta juajna ngajin jan Trifena ko jan Trifosa. Je e sen juinche e sen xrée Ncháina, ko nichje enta kaxon jan kichuuna Pérsida, jan tjua a. Je e jan juinche e jan xrée Ncháina Jesucristo.

¹³ *Kaxon ngajin ndo Rufo tájonnta juajna. Je e ndo naa ngisen tsikinche e Ncháina, ko nichje enta janée ndo ixi kaxon bingijnana jan ko jan an tja on jan xranchi janána.

¹⁴ Kaxon nichje enta ndo Asíncrito ko ndo Flegonte ko ndo Hermes ko ndo Patrobas ko ndo Hermas, ko ikaxin sen kichuuna, sen stekao sen nti a.

¹⁵ Kaxon tájonnta juajna ngajin ndo Filólogo ko Julia ko Nereo ko jan kichuu ndo ko ndo Olimpaso ko kain sen kichuuna titikaon Ncháina stekao sen.

¹⁶ Ko chje é kichuunta juajna ko tjue é kichuunta. Kain sen ni ngo tikinixin en ndo Cristo xruan annta sen juajna.

¹⁷ Kichuuna, tinóatáana ngajinnta jian tsje enta ngisen jítansetsjendaa sen kichuuna titikaon Ncháina. Sen me e titikaon a sen jian chijnie ndo Dio kuayé e ja anta. Méxin, cháña tjento anta sen.

¹⁸ Sen jaña nche e, je a xrée Ncháina Jesucristo nche e sen. Je o nche e sen nge e tjaun sen ko ti xraxaon sen, ko chaxro nichje e sen chujni xranoe a ko jaña ncheya sen ngajin sen.

¹⁹ Kain chujni no e na xixi ja anta jian titikaonnta Ncháina. Méxin, jan an ritjén juaxruxin ko tja on sinche enta ti jian, ko sinche anta ti ndako a.

²⁰ Ndo Dio, ndo tsango tajon ndo juaxruxin, ó tuinxin tsantsje e ndo Xixron anxrée ti tituan an xa. Ko Ncháina Jesucristo sintanchaonnta ndo.

²¹ *Ndo Timoteo xruan annta ndo juajna. Je e ndo ko jan an xraje o xra stenta ana. Kaxon ndo Lucio ko ndo Jasón ko ndo Sosípater, sen tjajnána, xruan annta sen juajna.

²² Jan an Tercio, rikjin xroon ji i xixi ndo Pablo ndachijina ndo nge e xrokjin, kaxon xruan annta juajna xixi juachaxien Ncháina.

²³ *Ndo Gayo xruan annta ndo juajna. Je e ndo kuajon ndo juachaxin titunana ndo a ndo, ko kaxon ndo a ndo stexra o sen ni ngo. Ko ndo Erasto xruan annta ndo juajna. Je e ndo tja o ndo tomie tjajna, ko ndo kichuuna ndo Cuarto kaxon xruan annta ndo juajna.

²⁴ Ncháina Jesucristo sintanchaonnta ndo kain ja anta. Jaña tson en.

²⁵ Jai tajonna juasaya ngajin ndo Dio xixi je e ndo ícha sinchesoji ndo asáanta xranchi nichja chijnie ndo Dio, chijni me e jan an ó jintakuan annta, ko me e chijnie ndo Jesucristo. Ko ji i nduaxin, ndo Dio juinchenojna ndo nge e xrakonoe a chujni ti xra xrangíxixión nunte xasintajni.

²⁶ Ko jai kainna nojna me e, xixi jítaxin xroon tsikjin sen profeta xranchi kuetuan an ndo Dio, ndo jichón kain nchakon. Kain ji in chujni nchijí nunte xasintajni xrochuxin na ko tsitikaon na ko sinche e na ti ndachro je e ndo.

²⁷ Jii naakua ndo Dio, ndo no e kain nge e, ko je o je e ndo tikinixin en ndo kain juasaya xixi juachaxien Ncháina Jesucristo. Jaña tson en.

Xroon sa ó tsikjin ndo Pablo xruen en ndo sen ste tjajna Corinto

Ndo Pablo ikjin ndo xroon ngajin sen tjajna Corinto

¹Jan an, Pablo, ndo Dio kuinche ena ndo ixí sinta a ixra ngajin Ncháina Jesucristo. Jan an ko ndo kichuuna Sóstenes

²*Ikjinna xroon ji i xruan anna ngajinnta xro stenta ni ngo tjajna Corinto ixí titikaonnta Ncháina Jesucristo ko ja anta tikinixin ennta ndo Dio. Ndo Dio kuincha anta ndo ixí tjúa tsake enta, xranchi sen ste itsjé tjajna ó titikaon Ncháina Jesucristo, Nchéé sen ko Ncháina kaxon.

³Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Ndo Pablo nichja ndo ngajin ndo Dio

⁴Kain nchakon tajon juasaya ngajin ndo Dio ixí je e ndo juntanchaonnta ndo ixí ja anta titikaonnta Ncháina* Jesús.

⁵Ixi titikaonnta Ndo Dio, me e tjáanta ndo juachaxin ko kain nge e jian, méxin jian no anta xranchi xronichjanta ko jian tienxinnta kain nge e.

⁶Jaña kuitikaonnta chijni kuin ennta ne e ndo Cristo ko jai jian tjakoxinnta ji i.

⁷Méxin, ja anta ó chondanta kain juachaxin tajon Espiritue ndo Dio, íxro an nge e titjáña anta ti xra stehon ennta xrokjan Ncháina Jesucristo.

⁸Ko Ncháina Jesucristo tayakon annta ndo ko tsintue anta tsitikaonnta ndo tsija nchakon tsjexin kain nge e. Ko jaña xro an ngisen tsjankata anta ijié nchakon xrokjan ndo Jesucristo.

⁹Ndo Dio nduaxin sinche e ndo nge e tsindachro ndo ixí je e ndo kuincha anta ndo ixí tsitikaonnta Chjen en ndo, Jesucristo, Ncháina.

Je a xraje o xraxaon sen ni ngo tjajna Corinto

¹⁰Kichuuna, tinóatáana ngajinnta ixí juachaxien Ncháina Jesucristo naxraje o xroxaxaonnta ko tanchrjenda i kichuunta; cháña naxraje o xroxaxaonnta ko xraje o nche enta.

¹¹Kichuuna, jaña ndachrjan ixí kuin an nge e ndachro sen ndo a ndo Cloé ixí je a naxraje o xraxaonnta.

¹²*Ti rindachrjan ixí kaxinnta ndachronta “jan an rua a ndo Pablo”, ko ikaxinnta ndachronta rue énta ndo Apolos ko ikaxinnta ndachronta rue énta ndo Pedro, ko ikaxinnta ndachronta ixí rue énta ndo Cristo.

¹³¿Á tsichrjijin ndo Cristo? ¿Á je a naakua ndo Cristo titika onna? ¿Á jan an Pablo kuenxinna ixí ja anta? ¿Á bikitéexinta ixí juachaxinna?

¹⁴*Juasie ndo Dio ixí tsjé a sen bikitéé jan an. Je o ndo Crispo ko ndo Gayo bikitéé.

¹⁵Ixi jaña ninaáanta xronachro anta ixí juachaxinna bikitéexinta.

¹⁶*Kaxon bikitéé ndo Estéfanos ko sen ndo a ndo. Ko sintaxin aña on á bikitéé ikaxin sen o na i.

¹⁷Ixi ixra chjána ndo Cristo je a tsikitée chujni. Ixra chjána Ncháina Jesucristo me e ti xronichja chijni jian tajon juachaxin tsehónni kain nchakon. Tjaun a xronichja ixí chijni tsango chaxro ixí tjaun a tsantsja a ti juachaxin ijié konoxin nchakon kuen en Ncháina Jesucristo nganito ntáru.

Ndo Cristo chónnda ndo juachaxien ndo Dio

¹⁸Ti ndachro chijni ixí ndo Cristo kuenxin ndo nganito ntáru, kaxin na xraxaon na tjinte a ji i ko ni jaña xraxaon tsitjáña na, ko jaina ti titika onna me e nduaxin tsehónna kain nchakon, chijni me e chónnda kain juachaxin.

¹⁹Jaña ndachro xroon chijnie ndo Dio tsikjin sen ó sa ó:

Jan an ndo Dio sintatjáña nge e xraxaon ni ícha no e, ko sintajexin ti ndachro ni tienxin.

²⁰¿Nge e tsonda ti ndachro na tsango no e na ko nge e tsonda ti nchekuen en na ikaxin chujni ko nge e tsonda ti ndachro na no e na kondee nunte xasintajni? Ndo Dio tikon ndo kain ji i tjinte a ko xro an xréé.

²¹ Ndo Dio tsango no e ndo, méxin kuinthe a ndo ixí ti no e chujni xrokuichuxixin na ndo. Cháña ndo Dio juako ndo ixí chijnie ndo tsichuxixin na ndo, ko chijni me e tsechónxinni, maski je e na xraxaon na ixí tjinte a chijni.

²² Ni judío tjaun na xrobikon na naa ixra tsango jié, ko ni griego tjaun na tsono e na ícha.

²³ Ko jaina kainna tjakona chijnie ndo Cristo, je e ndo kuenxin ndo nganito ntacru. Ko ni judío xraxaon na ixí ti titikaon jaina, me e naa chijni tsosuexinni. Ko ni je a judío ndachro na ixí nintana ixí jaña titika onna.

²⁴ Ko sen kuinche e ndo Dio, maski sen judío o sen griego, kain sen ndachro sen ixí ndo Cristo chóna ndo ijie juachaxin ko ndo Cristo chronga ndo kain ti jian no e ndo Dio.

²⁵ Ti xraxaon chujni ixí ndo Dio noe a ndo ko nduaxin je e ndo ícha no e ndo ixí ngxie i chujni ndachro ixí ícha no e na. Ko ti xraxaon chujni ixí ndo Dio jié a juachaxin chóna ndo, ko ti jié a juachaxin ichro na me e ícha ijie ixí kain juachaxin chóna chujni.

²⁶ Kichuuna, xraxaonnta xranchi kuincha anta ndo maski tsje anta no anta ícha xranchi tikon ni ste nunte xasintajni. Ko tsje a ja anta ko sen ndointa tjinteanta ngajin tjajna.

²⁷ Ndo Dio kuinche e ndo kaxin sen noe a ichro chujni ste nunte xasintajni ixí jaña je e ndo tjaun ndo tsosue e ni ndachro ícha no e. Ko kaxon kuinche e ndo kaxin sen tjinte a ichro chujni ste nunte xasintajni ixí jaña je e ndo tjaun ndo tsosue e ni ndachro chóna na ijie juachaxin.

²⁸ Ndo Dio kuinche e ndo kaxin sen tituan i ko ikaxin sen xro an tjintee ixí je e ndo tjaun ndo sinchetjáña ndo juachaxin chóna ni xraxaon tsango no e.

²⁹ Méxin, xro an ngisen sinchejie aséen ngajin ndo Dio.

³⁰ Ixi juachaxien ndo Dio ja anta kuitikaonnta ndo Cristo Jesús, ko ti kuitikaonna ndo, me e nduaxin tjintee, ko ixi juachaxien ndo komé e ijie kuachondana, ko juachaxien ndo sinchetjúáxin ndo aséejna ko jnie ndo kuenaxinna ndo.

³¹ Méxin, ndachro xroon chijnie ndo Dio: “Ngisen tjaun sinchejie aséen, sinchejie aséen sen ixí je e sen no e sen ixí Ncháina chóna ndo ijie juachaxin.”

2

Ndo Pablo chronga ndo ixí ndo Jesucristo kuen en ndo nganito ntacru

¹ Kichuuna, nchakon juaso nti a tjajnánta ko juentakuan annta nge e tjaun ndo Dio tsono anta, ko nichjabin a ixí naa chijní tienxin anta ko tjako a xranchi naa chujni tsango no e.

² Je a me e juanta a ti bake e nti a. Je o juako anta ixí ndo Cristo ti kuen en ndo nganito ntacru.

³ *Ko ti juaso nti a juentakuan annta, je a xraxra on ixí tsango nóna. Na i, jan an jixrangana xranchi naa ngisen noe a.

⁴ Ti nichja, nichja i xranchi naa ngisen tsango no e. Je o kuintu a ixí Espíritue ndo Dio bingijnana nichja ixí sintakuan anta kain juachaxin chóna ndo Dio,

⁵ ko kuichuntianta ndo Dio ixí juachaxien ndo, ko je a ixí ti tsango no e chujni.

Espíritue ndo Dio tjakojna kain nge e

⁶ Ko nchakon juako ngajin ni ó jian titikaon Ncháina, jan an nichja xranchi nichja naa sen tsango chúxin ko no e chijnie ndo ko ji i je a xranchi nge e no e ni jii nunte xasintajni, o xranchi nichja ni tetuan an nunte xasintajni, ixí ti no e na ó tuinxin tsitjáña.

⁷ Jan anna juakona jian nge e kuanoe a chujni, nge e tsixraxaon ndo Dio ó sa ó ti xranko a nunte xasintajni, ko me e tjaun ndo tsono e chujni jai ixí me e tsjacha na tsechón na kain nchakon.

⁸ Ko xro an ni tituan an nunte xasintajni kuienxin na chijni ji i ti tsixraxaon ndo Dio ixí siá je e na xrokuienxin na, xrobake a na nganito ntacru Ncháina Jesucristo, ndo chóna kain juachaxin.

⁹ Ndachro xroon chijnie ndo Dio tsikjin sen ó sa ó:

Juinchéña ndo nge e xraxro an ngisen tikon

ko xraxro an ngisen tin en,

ko xraxro an ngisen xraxaon

ko ji i tsayé e sen nduaxin tjue e ndo Dio.

¹⁰ Ndo Dio juinchenojna ndo kain ji i ixí chondana Espíritue ndo ixí Espíritue ndo tsje e kain nge e ko no e kain nge e xraxaon ndo Dio.

¹¹ Xro an ngisen no e nge e xraxaon inaa chujni. Je o ngujngu chujni no e nge e xraxaon. Jaña kaxon xro an ngisen no e nge e xraxaon ndo Dio, je o Espíritue ndo me e no e.

¹² Ko jaina kuayé ana espíritue chujni nunte xasintajni. Na i. Ndo Dio chjaina ndo espíritue ndo ko ixi espíritue ndo me e nónaxinna kain nge e jian juinche e ndo ixi je e ndo tsango tjuajina ndo.

¹³ Nchakon nichja nge e juinche e ndo Dio ixi jaina, je a nichjana ixi xranchi ó xrokono e chujni nunte xasintajni. Juachaxien Espíritue ndo Dio nichjaxinna. Ko jaña nichjaxinna sen chónda Espíritue ndo.

¹⁴ Ni chónda i Espíritue ndo Dio jua i tsayé e na nge e tajon Espíritue ndo ixi xraxaon na chijni ji in, tsango ninta chijni. Jua i tsienxin na ji in ixi chónda i na Espíritue ndo.

¹⁵ Ko ngisen chónda Espíritue ndo Dio chao tienxin sen kain nge e ko no e sen á chao jii o na i. Ko ni chónda i Espíritue ndo jua i xrondachro na á chao tjako sen chónda Espíritue ndo o na i ixi je e na tienxin a na.

¹⁶ Xranchi ndachro xroon chijnie ndo Dio: “¿Ngisen xrokono e xranchi xraxaon Ncháina Dio? ¿Ngisen chao xrojuincheken en ndo?” Ko jaina chondana juachaxien Espíritue ndo, méxin, xraxaonna xranchi xraxaon ndo Cristo.

3

Sen nche e xrée ndo Dio

¹ Kichuuna, jua i nichja anta xranchi sen ó chónda Espíritue ndo Dio ixi ja anta xranche enta xranchi chujni nunte xasintajni. Méxin, xrokonda nichja anta xranchi sen nandá taxi chuntia ndo Cristo.

² *Jan an juako anta nge e tangi a ixi ndako xjan nchínchín stenta, xjan nandá ti i itsjin ko jua i ine xjan nio ko xrajua i tienxinnta jai

³ ixi xranche enta xranchi nche e chujni nunte xasintajni. Xratochjuya anta nge e nche e ikaxin sen ko tetoku u kichuunta. ¿Á je a me e xrondachro ixi ja anta xranche enta xranchi nche e ni nunte xasintajni?

⁴ *Kaxinnta ndachronta ixi rua naninta jan an Pablo, ko ikaxinnta ndachronta ixi rue énta ndo Apolos. Jaña xraxaonnta xranchi chujni nunte xasintajni.

⁵ ¿Ngisen ndo Pablo ko ngisen ndo Apolos? Jan ana je o nta ana xrée ndo Dio ixi juako ananta ko kuitikaonnta Ncháina. Ngujunguna je o juanta ana nge e kuetuannana ndo Dio.

⁶ *Jan an kuenga tsee chijnie ndo Jesucristo, ko ndo Apolos xranchi ngisen tikitée inda tsee, me e juako ndo xranchi xrochuntianta ndo Dio ko je o je e ndo Dio tajon ndo juachaxin tsangi ika, me e xrondachro ícha tsitikaonnta ndo.

⁷ Méxin, ngisen tenga ko ngisen tikitée inda, je o juinche e sen xra; je o ndo Dio tajon ndo juachaxin tsangi ka.

⁸ Sen tenga ko sen tikitée inda xraje o tjintee sen, ko ndo Dio tsjenge e ndo sen na ixi xra juinche e sen.

⁹ Méxin, jan an ko ndo Apolos je o nta ana xrée ndo Dio, ko ja anta stenta xranchi naa ijngi tsikinga chijnie ndo Dio, o xranchi naa nchia jinchekochjian ndo.

¹⁰ Ndo Dio jian ndo, méxin, chjána ndo juachaxin ixi jan an tsake e xranchi naa xi tetuan an xranchi sinchekonchjian sen nchia, me e xrondachro ti bakée ixro sa ó tsaxi tsite xin tjatu o. Tjume e ikaxin sen kuite sen ícha ixro, ko ngujungu sen xrokonda ndako sinchekonchjian sen nchia,

¹¹ ixi xro an ngisen tsake e inaa ixro xrangíxixín nchia ixi ó jii xro sa ó tsikaxi tsiki texin nchia, ko ixro me e ndo Jesucristo.

¹² Ko tjume e ngata a ixro me e chao tsi te sen ixi chika oro ko chika plata, ixro chaxro tjintee, ntaa, ka tsixema, o ntaxro,

¹³ ko nchakon tsjexin kain nge e, ndo Dio tsjako ndo ixra juinche e ngujungu sen. Ko xro i tsjakoxin ndo ngixe i ixra juinche e ngujungu chujni.

¹⁴ Ko siá ti juinche e sen jian, tsjacha sen naa nge e jian,

¹⁵ ko siá ti xra juinche e sen je a jian, tsitjáña kain xra me e, ko je e sen tsitjáña i sen, ixi xrokjui xranchi je e sen xrokuinge e sen xro i.

¹⁶ *Kain ja anta, ¿á noa inta ixi ja anta ningue ndo Dio ko Espíritue ndo jii ngaya asáanta?

¹⁷ Ko siá xrojan ngisen tjaun sincheni e ningue ndo, je e ndo Dio sinchetjáña ndo ni me e, ixi ningue ndo Dio tjúa ni ngo ko ja anta me e ni ngo.

¹⁸ Ja anta ncheye anta asáanta. Siá xrojannta ndachronta ngaya asáanta ixi ícha no anta xranchi chujni ste nunte xasintajni, xrokonda xrokjannta xranchi naa ni noe a ixi tjume e xrokjannta xranchi naa ni nduaxin ícha no e.

¹⁹ Ixi ti nge e no e chujni jii nunte xasintajni me e xro an tjintee tikon ndo Dio. Ko ndachro xroon chijnie ndo Dio tsikjin sen ó sa ó: “Ti chujni ícha no e, ko je o ti no e na me e tsitjáñaxin na.”

²⁰ Ko kaxon ndachro xroon chijnie ndo Dio: “Ncháina no e ndo kain nge e xraxaon ni ndachro ícha no e ko ti xraxaon na xro an tjintee.”

²¹ Méxin, nchejié a asáanta ixi ndachronta jii naa chujni ícha no e, ixi kain nge e jii me e tikinixin anta,

²² jan an ndo Pablo, ndo Apolos, ndo Pedro, nunte xasintajni, nge e jichón, ti tsen en ni, nge e jii jai, ko nge e tson en ícha tjume e, kain tikinixin anta.

²³ Ko ja anta tikinixin ennta ndo Cristo ko ndo Cristo tikinixin en ndo ndo Dio.

4

Ixrá juínche e ni kuinche e Ncháina Jesucristo

¹ Ja anta xrobikonnanta je o xranchi ngisen nche e xrée ndo Cristo ko kuituannana ndo tsjakona nge e xro an ngisen kuano e kondee je e ndo.

² Ko ngisen kuayé e naa ixrā xrokonda tsjako sen ixi nduaxin chao xrochúntiani ngajin sen.

³ Ko jan an ta i juachjaon ixi nge e xrondachronta ixi jan an, o chujni nchéña ijie ixi ixrā nta a ngajin ndo Dio, ko jan an jua i tsjankata a ijie aséenna.

⁴ Ko jan an xraxaon a á richonda ijie, ko ntamá i ijie richonda. Na i. Je o Ncháina chónnda ndo juachaxin xrondachro ndo á chonda ijie o na i.

⁵ Méxin, tjankata inta ijie ngajin xrojan ngisen. Chuenjanta nchakon tsij Ncháina ixi je e ndo tsjako ndo kain nge e jimá ti naxice e, ko sinchenoxin ndo kain nge e jii ngaya aséen chujni. Ko nchakon me e ndo Dio jian xronichja ndo ixi ngujngu ixrā juínche e chujni.

⁶ Kichuuna, jai nichja anta ixi jian tsake enta, ko ndachrjan ji i ixi jan an ko ndo Apolos tjinte a jan anna ixi sinche enta ko xroxraxonnta ícha, je o ti nge e tsikjin sen ó sa ó: “Sinche ani ko xrondachro ani ícha je o ti jitaxin xroon chijnie ndo Dio.” Ko me e xro an ngisen nchejié aséen ixi rué e sen naa ngisen xraxaon sen ícha no e, ko me e xrochónde a kichuu sen juasaya.

⁷ ¿Ngisen ntatjunta ixi ja anta ícha tjinteenta ixi inaa ngisen?, ko, ¿nge e chondanta ti je a ndo Dio tsitjáanta ndo? Siá ndo Dio kuajin ndo kain nge e chondanta, méxin, ¿sonda nchejié asáanta ixi xranchi ja anta tsijinchiinta ti chondanta ko ti no anta?

⁸ Ja anta chondanta kain nge e tjaunnta ko chondanta kain nge e xranchi naa xi rey, ko jai nche enta xranchi itonda ina ngajinnta. Siá nduaxin ja anta tituan annta xranchi naa xi rey, me e jan anna kaxon chao tsituan anna xranchi ja anta.

⁹ Xraxa on ixi jan anna, ngisen kuinche e ndo Dio, tjinte ana. Stena xranchi ni jichón en tsen en, ko kain chujni nunte xasintajni ko kain sen ángel stetikon ti tangi stetónana.

¹⁰ Ko jan anna tikon na jan anna tsango nintana ixi titika onna ndo Cristo. Ko ja anta tikonnanta je e na xranchi ni ícha no e. Jan anna stena xranchi chujni soji a, ko ja anta xranchi chujni tsango soji. Ja anta chonde enta na juasaya, ko ngajin jan anna, na i.

¹¹ Jai jan anna tatséna jinta, ko ten enna inda, ko chonda ina nge e tsaritsa ana, ko chujni chjinga nchenana, ko chonda ina nchia tsinteena.

¹² *Tsango tonchrjena ixi tjánana ntaxinna ixrā. Ko tenganana na teka ko jan anna tjancha ana ndo Dio ixi je e na. Tengina na ko jan anna tjua ana na.

¹³ Ko tjanginana na ko jan anna jian nichja ana na. Nchenana na xranchi xrokjuina xinenoe xasintajni,* ko xrajaña jiton en nchakon jai.

¹⁴ Ikjin ji i je a ixi tsosuxinnta. Na i. Tja on syntaxraxa onnta ixi jian sinche enta ixi xranchi chjan na tikonnta ixi tsango tjua anta.

¹⁵ Maski xrochondanta te mil ngisen sintakuan annta chijnie ndo Cristo, chonda inta itsjé ndotánta. Ko jan an ikjui xranchi ndotánta nchakon ja anta kuaye enta ndo Cristo Jesús ixi jintakuan annta chijnie ndo Dio ko me e kuaye enta juachaxin tsarichonnta kain nchakon.

¹⁶ *Méxin, tinóatáana ngajinnta jian tjakonta xranchi jan an.

¹⁷ Méxin, kuituan an ndo Timoteo tsiji ndo ngajinnta. Xranchi chjan na tikon ndo, ko tjua a[†] ndo, ixi jian nche e ndo ixrā ne e Ncháina. Tsiji ndo syntaxraxaonnta ndo xranchi jan an nta a ti kuituan an ndo Cristo ko kain ji i tjako ngujngu ni ngo nguixin tinó ichrji.

¹⁸ Ko kaxin ja anta xraxaonnta ixi je a nduaxin tsjasotsja anta, méxin nchejié asáanta.

¹⁹ Ko siá tjaun Ncháina, tuinxin tsjaso ngajinnta. Me e tsin an ko tsikon ixi sen nchejié aséen, á nduaxin nche e sen nge e nichja sen.

²⁰ Ko juachaxien ndo Dio, je a je o nge e xronichjani. Xrokonda tsjakoni ixi nduaxin chóndani juachaxien ndo.

²¹ ¿Xranchi tjaunnta tsjasotsja anta? ¿Á tsjasokian naa ntasé tsikaonxinnta?, o, ¿á tjaunnta jian ko juaxruxin tsjaso?

5

Tsoñe e ijie ngisen ndako a juinche e

¹ Itsjé chujni no e na ixi naa ja anta chondanta xranchi nchrinchri anta janajo annta. Ji i naa nge e tsango ndakua i jii. Ni chúxin a ndo Dio nche a na jaña xranchi ja anta.

² Ko maski jaña tsikon en, kain ja anta tsango nchejié asáanta ko tosua inta ixi xi jaña nche enta, ja anta ó xrobengixinnta xa ni ngo.

³ Maski ritjén a ti ste ja anta, aséenna nti a jii ngajinnta, ko ndachrjan ixi xi jaña tsijinche e ó yama xa ijie.

⁴ Méxin, nchakon stetajonnta juasaya ngajin Ncháina Jesús, xraxaonnta ixi jan an ritjén ngajinnta,

⁵ ko xi jaña tsijinche e tintu enta xa ixi Xixron anxré sincheni e ntau e xa, ko jaña nchakon xrokjan Ncháina Jesucristo tsitjáña i aséen xa.

⁶ *Take anta juaxruxin ko nchejié a asáanta ixi ti ndako a kon en nti a. ¿Á noa inta ixi siá tsake eni naanchichjaon ti nchetja in chu u, kain chu u tja in chu u?

⁷ Méxin, tintu enta ti ndako a nche enta ixi ti ndako a kon en me e xranchi nge e ti nchetja in chu u ko me e nchexenga kain chu u. Nche anta ti ndako a, me e ja anta tsake enta xranchi naa nutja tsikóñaxin chu u natjúá, xranchi nutja ineni kia pascua ixi ndo Cristo, kuenxin ndo ixi jajna, kuen en ndo xranchi naa kutuchjon tóñani kia pascua.

⁸ Siá jian sinche ena, jajna stena xranchi nutja jian ineni kia pascua ixi nduaxin xraxaonni ndo Cristo. Xrokonda jian sinche ena xranchi nutja jian chóna i ti nchetja in chu u, méxin, ixi nchijí aséjina tsitikaonna ndo Dio ko tsintu ena kain ti ndako a.

⁹ Xroon xruan annta ó sa ó ntatjunta ixi xrojuento anta ni ndako a nche e, ni chóna inaa nchri je a janchri e.

¹⁰ Ko ndachrjan i ixi xrojuento anta kain chujni ste nunte xasintajni, ni ndako a nche e, ni chóna nchri je a janchri e, ni tjaun xrochóna itsjé nge e, ni tee, ko ni titikaon ídolo. Na i. Siá xrojuento anta kain ni jaña nche e, xrokonda xrokuachrxexinnta nunte xasintajni.

¹¹ Ti ndachrjan jan an, me e ti tjento anta ngisen ndachro ixi titikaon ndo Cristo ko nche e sen ti ndako a xranchi ti chóna sen nchri je a janchri e, ti tjaun sen xrochóna sen itsjé nge e, ko sen titikaon juancheya, sen kuan, ko sen tee. Sen jaña nche e ntekui anta sen.

¹² Tikinixinna i jan an sintaña ijie ngajin ni itji a ni ngo. Ko ja anta xrokonda sinchéñanta ijie ngajin ni kichuuna steku unta ni ngo nti a.

¹³ Ndo Dio sinchéña ndo ijie ngajin chujni xratitikaon a ndo ko ja anta xrokonda tenginta xi ndako a juinche e.

6

Jajona nchéñana ijie ti nge e juinche e sen kichuuna

¹ Nchakon xrojan ja anta kuétoqu unta naa sen kichuunta, tjanche anta inaa ngisen titikaon a Ncháina sinchéña ijie. Cháña tjanche enta naa sen ni ngo, sen titikaon ndo Dio, sinchéña sen ijie ngajin kayuinta.

² ¿Á noa inta ixi sen titikaon Ncháina Jesús sinchéña sen ijie ngajin kain ni nunte xasintajni? Méxin, siá sinchéñanta ijie ngajin kain chujni, ¿sonda jua i sinchéñanta ijie ti tangi a kon en ngajinnta jai?

³ ¿Á noa inta ixi kaxon ngajin sen ángel jajna sinchéñana ijie? Méxin, ¿á jua i xrojuinchéñana ijie ngajin sen kichuuna?

⁴ Méxin, siá xrojan nge e chao tsonchjanku unta sen kichuunta, ¿sonda tjaunnta inaa ngisen titikaon a Ncháina sinchéña ijie ngajinnta?

⁵ Ntatjunta ji i ixi tja on tsosua anta. ¿Á xro an ngisen jii ni ngo nti a xroxaxaon jian ko chao sinchéña ijie ngajinnta?

⁶ Ko ja anta je a je o tetóku u kichuunta, kaxon tjéenta inaa chujni sinchéña ijie ngajinnta, ko ni me e titikaon a na Ncháina Jesucristo.

⁷ Ti tetóku unta kichuunta me e ó yamanta ijie. Cháña tokuaxin anta ti ndakua i sinta anta sen ko tsee sen ngajinnta kaxon.

⁸ Ko kaxon ja anta ndako a nche enta siá te enta ko ndako a nchekuunta sen kichuunta.

⁹ ¿Á noa inta ixi ni ndako a nche e, tsayé a nā juachaxin tsechón nā ti jii ndo Dio? Tájon anta juachaxin ixi sintaya anta nā. Ni tejuaka o ngixe i nchri, ni tajon juasaya ngajin ídolo, ko xi chónnda inaa nchri, nchri je a janchri e xa, ko xi tejuakao inaa xi,

¹⁰ xiche e, ni tjaun xrochónnda itsjé nge e, ni kuan, ni nichja kontree inaa ngisen, ko ni ncheya, kain chujni jaña nche e, tsayé a nā juachaxin tsake e nā ti jii ndo Dio.

¹¹ Kaxinnta jaña kuake enta ó sa ó. Ko ndo Dio ó juinchemé e ndo ijje kuachondanta ko juinchetjúá Ndo asáanta ko jai tikinixin en Ndo ja anta. Kain ji i kon en ixi juachaxien Ncháina Jesucristo ko juachaxien Espíritue ndo Dio.

Tsajonna juasaya ngajin Ndo Dio

¹² *Chao sinta a kain nge e.” Ko tikinixin a sinta a kain nge e. Ko ndachrjan ixi xro an nge e xrotjá a juachaxin tsituanna.

¹³ Ti ineni ji in tikinixin en tse eni, ko tse eni tikinixin en ti sineni. Ko ndo Dio juinçekonchjian ndo kayui ji i ko kaxon chao tsitjáña kayui. Ko cuerpoína je a konchjian ixi sinche e ti ndako a xranchi ti tsejuakao ngixeko chujni. Cuerpoína konchjian ixi tsajon juasaya ngajin Ncháina ko cuerpoína tikinixin en Ndo.

¹⁴ Ndo Dio juinçhexechón Ncháina Jesucristo, jaña kaxon sinçhexechón ndo jajna ixi juachaxien ndo.

¹⁵ ¿Á noa inta ixi nguñgu cuerpoína tikinixin en ndo Cristo? ¿Á chao naa chujni tikinixin en ndo Cristo tsejuakao naa nchri ncheye e kueya xi? Me e, ché na i.

¹⁶ ¿Á noa inta ixi nchakon naa xi chónnda xa naa nchri chónnda kueya xi, je e nchra ko je e xa ikjan nā naakua cuerpo? Ixi ndachro xroon chijnie ndo Dio: “Kayui nā xrokjan nā naakua chujni.”

¹⁷ Ko jaña kaxon ngisen titikaon Ncháina, je e sen ko Ncháina ikjan sen xranchi xrokjui naakua chujni.

¹⁸ Méxin, ja anta xrochonda inta nchri je a janchri anta ixi ngixe i ti ndako a xrojuinche enta, je a tsango tangi tson en cuerpoanta. Ko ni chónnda inaa nchri je a janchri e, je o nā ncheni e nā cuerpoe nā.

¹⁹ *¿Á noa inta ixi cuerpoína ningue Espíritue ndo Dio, me e chjajna ndo? Cuerpoína tikinixin en ndo Dio ko i je a jajna tikinixinna cuerpoína.

²⁰ Ndo Dio kuenaxinna ndo ixi naa nge e tsango tjintee. Méxin, tájonnta juasaya ngajin ndo Dio ixi cuerpoanta ko nchijí asáanta ixi kayui ji i tikinixin en ndo Dio.

7

Chijni kondee sen tsikute e

¹ Ti xroon xruannanta ixi juanchanginanta, ndachrjan cháña tsute a chujni.

² Ko itsjé nā tjaun a nā tsute e nā ixi jaña chao tsajikao nā itsjé xi o itsjé nchri, méxin, cháña nguñgu xi xrochónnda xa naa janchri e xa ko nguñgu nchri xrochónnda nchra naa ndoxi e nchra.

³ Xi tsikute e xrokonda tsejuakao xa je o janchri e xa ko jaña kaxon nchri xrokonda tsejuakao nchra je o ndoxi e nchra.

⁴ Nchri tsikute e i je a je e nchra tituen en nchra cuerpoe nchra, ó ndoxi e nchra tituen en nchra. Jaña kaxon xi i je a je e xa tituen en xa cuerpoe xa, ó janchri e xa tituen en xa.

⁵ Méxin, nchri o xi tsikute e sinchenaxien a tsejuakao kichuu sen. Ko siá je e sen xroxaxaon sen tsakaon a kichuu sen kaxin nchakon ixi tsjao sen Ncháina, ko tsjexin ji i, chao xrochónnda kichuu sen íjngo, ixi jaña Xixron anxrée tsakaon a xa sen ixi sinche e sen ti ndako a.

⁶ Ko jaña jian sinche enta maski ji i je a ti kuetuan an ndo Dio.

⁷ Ko jan an ndachrjan ixi kainnta xrojuinche enta xranchi jan an. Ko Ndo Dio kuajon ndo juachaxin ngajin nguñgu chujni, je a xraje o sinche e sen.

⁸ Ko kain chajan xra tutee a ko sen nchri, sen ka an, ntatjan sen ixi cháña xrokutee a sen, xranchi jan an kutena i.

⁹ Ko siá tjaun sen xrochónnda sen janchri e sen, cháña tsute e sen, ko xroxaxaon a sen inaa nge e ixi bā sinche e sen ti ndako a.

¹⁰ *Ko ja anta ti ó tsikuta anta, tituan annta ji i: “Tintue a kichuunta”, ko je a jan an tituan an ji i, Ncháina tituan an.

¹¹ Ko siá naa nchri tsintu e nchra xixi e nchra, cháña je o nchra tsake e nchra, o ícha jian íjngo xronichje e kichuu sen ko tsintu e sen juaña ko íjngo tsekaon kichuu sen. Ko xi tsintue a xa janchri e xa.

¹² Ko sen kaxin: siá naa xi titikaon Ncháina chónða xa janchri e xa ko je e nchra titikaon a nchra Ncháina ko je e nchra tjaun nchra tsekao nchra xa, je e xa tsengi a xa nchra. Ko ji i jan an ndachrjan, je a Ncháina.

¹³ Ko siá naa jan titikaon Ncháina chónða jan xixi e jan ko titikaon a xa Ncháina, ko je e xa tjaun xa tsekao xa jan, je e jan tsintue a jan xa.

¹⁴ Siá xixi e jan titikaon a xa Ncháina Jesús, ndo Dio chao tsikonóe e ndo xa, ixi janchri e xa titikaon jan ndo Dio, ko naa nchri titikaon a Ncháina kaxon ndo Dio tsikonóe e ndo nchra, ixi ndoxi e nchra titikaon ndo ndo Dio. Ko siá xrokjui a me e, chjen en sen xrokuama xjan ijie, ko jai ó tjúá aséen chjen en sen.

¹⁵ Ko siá naa ni titikaon a Ncháina, xrokjui xi ó nchri, ko tjaun na tsintue e na sen titikaon Ncháina, chao xrochjeya sen, ixi ndo Dio tjaun ndo juaxruxin tsintee ni tsikute e.

¹⁶ Ja anta nchri, chao tsingijnanta ndoxi anta ixi je e ndo tsitikaon ndo Ncháina. Ko ja anta xi, chao tsingijnanta janchri anta ixi tsitikaon nchra Ncháina.

¹⁷ Méxin, ngujngu sen tsikute e ko sen tsikute a tsintee sen xranchi tsikajon Ncháina juachaxin, xranchi kuintee sen nchakon ndo Dio kuiye e ndo sen. Ji i tetuan an ngajin kain ni ngo jaña sinche e sen.

¹⁸ Siá ndo Dio kuiye e naa xi ó chónða chji e sen judío, chao jaña tsitu e xa. Ko siá ndo Dio kuiye e ndo naa xi xra chónða i xa chji e sen judío, xrokonda i tsaa xa chji e sen judío.

¹⁹ Méxin, tjinte a á chónða chujni chji e sen judío o na i. Ti tsitikaon sen nge e kuetuan an Dio me e ti ícha tjintee.

²⁰ Ngujngu chujni xrokonda tsintee sen xranchi kuintee sen nchakon kuaxi kuitikaon sen ndo Dio, ko á chónða o chónða i sen chji e sen judío.

²¹ Méxin nchakon ndo Dio kuincha anta ndo, siá ja anta ritjennta xranchi naa chujni tsike na na ko xro an juachaxin chondanta, ta inta juachjaon. Ko siá chao tsachrjexinnta nti a, tuinxin nche enta jaña.

²² Ixi ngisen tsikochji ko xro an juachaxin kuachónða, nchakon Ncháina kuinche e ndo sen, jai xro an nge e sínká ko chónða juachaxin. Ko ngisen chónða juachaxin nchakon kuitikaon sen ndo Dio, ó ikjan sen chujni nche e xrée ndo Cristo.

²³ Ndo Dio tsango tjintee kuenaxinna ndo jaina. Méxin, tájon anta juachaxin ixi inaa sen tsituan annta.

²⁴ Méxin, ngujngu ja anta, xranchi bake enta nchakon kuincha anta ndo Dio ixi tsitikaonta ndo, jaña tinteenta ko tintue anta ixi inaa na tsetuan annta na.

Chijni kondee sen xratutee a ko nchrikan an

²⁵ Ko sen nchri xratutee a, jan an xrondachrjan i ixi Ncháina kuituanna ndo xrojan nge e. Je o ntatjunta nge e xraxa on jan an, ko chao tsitikaonnta ti ndachrjan ixi Ncháina je e ndo tingijnana ndo.

²⁶ Chujni xratutee a cháña tsute a sen; xraxa on ji i ixi nchakon stena jai, tsango tangi nchakon.

²⁷ Ko siá chondanta nchrinchri anta tintue anta nchra. Ko siá chonda inta nchrinchri anta, cháña jaña tituan anta.

²⁸ Ko sen tsute e chao nche e sen, ko siá naa nchrichajan tsute e kaxon xro an ijie tsama nchrinchri ixi sen tsute e tsatsinga sen itsjé juachjaon, méxin, ndachrjan cháña xrokutee a sen ixi tjaun a tsatsinga sen juachjaon.

²⁹ Jaña ndachrjan ixi itsjé a nchakon titjáña xrokjan Ncháina Jesucristo. Méxin, sen tsikute e, ícha xrokonda tsitikaon sen Ncháina.

³⁰ Ko sen tsjanga xrojuinche e sen xranchi xrotsjanga i sen. Ko sen ste juaxruxin, xrojuinche e sen xranchi juaxruxin a ste sen. Ko sen te na xrojan nge e, xrojuinche e sen xranchi tsikinixien a sen nge e tsike na sen.

³¹ Ko sen chónða itsjé nge e jii nunte xasintajni, sinche e sen xranchi xro an nge e xrochónða sen, ixi kain nge e jii ngata a nunte nti i tsjexin.

³² Tjaun a jan an tsaanta juachjaon. Sen tsikute a ícha tjaun sen sinche e sen xrée Ncháina ko tjaun sen juaxruxin tsake e ndo.

³³ Ixi xi tsikute e ícha tjaun xa ti jii ngata a nunte xasintajni ixi tjaun xa sinche e xa ti nche e nchrichri e xa juaxroxin.

³⁴ Kaxon jée xraxaon nchri tsikute e ko nchri tsikute a ixi nchri tsikute a ko nchrikan an ícha tjaun sen sinche e sen xrée Ncháina ixi tjaun sen tjúá tsake e aséen sen ko cuerpoe sen. A nchri tsikute e ícha tjaun nchra nge e jii nunte xasintajni ixi tjaun nchra sinche e nchra ti nche e ndoxi e nchra juaxroxin.

³⁵ Ntatjunta ji i ixi tja on ixi jian tsake enta, je a ixi xrokuituan annta jan an. Tja on ixi ja in tsake enta ko je o ngajin Ncháina sinche enta ixra.

³⁶ Ko siá xrojan ja anta xraxaonnta ixi cháña xrokute e naa nchrichajan annta ixi ó itsjé nano chónda nchrichan, chao tsute e nchrichan, xro an ijje tsama nchrichan.

³⁷ Ko xrojan ja anta tjaunnta ixi nchijíi asáanta xrokutee a nchrichaja annta ko kaxon je e nchrichan jaña xraxaon nchrichan, chao jaña nche enta.

³⁸ Méxin, siá tájonnta juachaxin ixi nchrichajan annta tsute e nchrichan, chao ji i. Ko kaxon siá tjaun a nchrichan tsute e nchrichan, ícha jian me e.

³⁹ Ley tituan an ixi nchri tsikute e xrokonda tsekao nchra ndoxi e nchra ti xra jichón xa. Ko siá tsen en ndoxi e nchra, chao tsute e nchra inaa xi tjaun nchra, naa xi titikaon Ncháina xrokute e nchra.

⁴⁰ Ko ti xraxa on jan an, cháña ícha juaxruxin tsake e nchra siá tsute a nchra íjngo. Jaña xraxa on jan an ixi chonda juachaxien Espiritue ndo Dio.

8

Ti tajon na ngajin ídolo

¹ Xrontatjunta kondee ikó tsen en ko tajon na ngajin ídolo. Kainna nojna kondee ji in. Ko xrokonda tsienxinna ixi ti ícha no eni me e nchejie aséejna. Ko ti xrotjue e kichuuna, me e ícha nche e juaxruxin Ncháina Jesús.

² Kaxin na ndachro na ixi ícha no e na, ko je a nduaxin ixi xratitjáña tsangi na.

³ Ko ngisen tjue e ndo Dio, ndo Dio kaxon ó chúxin ndo sen.

⁴ Ko ti xrojuineni ntao tsikajon na ngajin ídolo, ó nojna jian ixi ídolo xro an juachaxin chónda nti i nunte xasintajni ixi naakua ndo Dio jii.

⁵ Ste kaxin na ndachro na ixi jii kueya dio ngajni ko nunte xasintajni. Ko maski jii itsjé nge e nchekin in na "dio",

⁶ jaina je o chondana naakua ndo Dio, me e Ndotáina, ko je e ndo juinchekonchjian ndo kain nge e ko jaina stechónna ixi tikinixin enna ndo. Ko kaxon jii naakua Ncháina, me e ndo Jesucristo, ko kain nge e jichón ixi je e ndo, ko kaxon jaina stechónna ixi juachaxien ndo.

⁷ Ko kain a sen no e sen ji i. Kaxin sen titikaon ndo Cristo, je e sen bakajon sen juasaya* ngajin ídolo ko xraxaon sen ixi ídolo me e chónda juachaxin, ko jaña siá ine sen ntao tsikajon na ngajin ídolo, me e xraxaon sen ixi kuama sen ijje.

⁸ Ko jaina nojna ixi je a ti nge e sintena o ti nge e sinte ana tingijna xrochuntiana ndo Dio.

⁹ Maski chao sineni kain nge e o sine ani, xrokonda xrotsje eni ixi ti sintu una sinchenie a ikaxin sen kichuuna, sen xratitikaon a jian.

¹⁰ Méxin, siá xrojan ngisen xratitikaon a Ncháina jian, tsikon sen ixi ja anta, xro no anta jian, sinenta no ti chónda na ídolo, kaxon je e sen xroxraon sen ixi chao sine sen nge e kuayé e naa ídolo xro an juachaxin chónda.

¹¹ Ko jaña kondaxin ja anta tsitjáña naa sen kichuunta xrasoji a titikaon sen ndo Cristo, ko je e ndo kaxon kuenxin ndo ixi je e sen.

¹² Méxin, siá sincheni enta aséen sen kichuunta, sen xrasoji a titikaon Ncháina, ja anta ritamanta ijje ko titikaon anta nge e kuituan an ndo Cristo.

¹³ Méxin, siá kondeexin ti sineni naa sen kichuuna tsoni e aséen sen, cháña sine ani ntao ixi kondeexin jaina, naa sen kichuuna sinche e sen ti ndako a.

9

Ti tikinixin en sen apóstol

¹ Jan an xro an inaa ngisen tetuanna ixi jan an naa apóstol, ngisen Ncháina Jesús tsikinche e ixi jan an bikon ndo. Ko ixra juinta a, me e ja anta kuitikaonnta Ncháina Jesús.

² Ko kaxin na ndachro na ixi jan an je a apóstolna. Ko ja anta jian no anta ixi ja anta kuitikaonnta Ncháina ixi ixra juinta a jan an, me e tjakoxin ixi nduaxin Ncháina Jesús kuinche ena ndo jan an.

³ Méxin, nchakon xrojan ngisen ndachijina ji i, jan an chao ndachrjan:

⁴ Jan anna tikinixin tsayá ana nge e tsajon sen sinena ko tsi ina.

⁵ Kaxon jan anna chao xrochondana naa janchri nana titikaon Ncháina xrokuajiki anna xranchi ikaxin sen apóstol tsikinche e Ncháina Jesús, xranchi ndo Pedro ko sen kichuu ndo Jesús.

⁶ ¿Á xraxaonnta ixi je o ndo Bernabé ko jan an, xrokonda sinta ana ixra ixi jaña sinena?

⁷ Naa xi soldado je a sincheja xa inaa ixra me e sine xa. ¿Ngisen tjenga ntaa tu uva ko ne a sen itu tóna? ¿Ko ngisen chónda kutuchjon ko ti a sen itsjin tajon ba?

⁸ Ndachro anta ixi jan on jan an jaña xraxra on. Na i, kaxon jaña jitaxin xroon tsikjin ndo Moisés.

* 8:7 juasaya respeto, honor

⁹*Ja in ndachro xroon tsikjin ndo: “Take anta nchisen ro a kuxinta nchakon tondaki ba katrigo ti tandáanta no.” ¿Á je o ixi kuxinta taaxin ndo Dio juachjaon?

¹⁰Na i. Kaxon ixi jaína taa ndo juachjaon. Jaña jitaxin xroon ixi jaína. Méxin, ni chjée nchechji nunte e ixi tsinga ko ni tondaki katrigo, stehón en nã tsjatsi in nã nge e bengã nã.

¹¹*Ko siã jan anna bengana chijnie ndo Dio ngaya asáanta, tikinixinnana tsayá ana nge e tsajonnta ixi jian tsintee jan anna.

¹²Ko siã ikaxin sen apóstol tjanchia sen nge e, jan anna ícha tikinixinnana tsjanchiana ti xrokondanãna.

Ko maski tikinixinnana, tjancha ina nge e xrokondanãna, tjancha ina maski tangi stena ixi tjaun ana me e tingakon en ti tsin ennta chijnie ndo Cristo.

¹³Ja anta no anta ixi ni tjako ni ngo judío, ni itji ni ngo tajon na nge e xrokonde e ni tjako. Ko ni nche e xra ti jii altar tikinixin en nã tayé e nã nge e tsikajon nã ngajin ndo Dio.

¹⁴*Méxin, jaña kaxon Ncháina kuetuan an ndo ixi sen nche e xrée ndo, sen chronga chijnie ndo, ixi ixra me e tsachrjenixin ti sine sen.

¹⁵Ko maski jan an chao tsjanchia nge e tikinixinna, nta i me e, ko kjin a xroon ji i ixi ja anta xrochjãnantã xrojan nge e xrokondana. Na i. Maski tsenxinna jinta, tjaun a tsjancha anta xrojan nge e ixi tjaun a tsachrjena juaxruxin chonda.

¹⁶Je a ixi tja on sintajé aséenna ixi tjako chijnie ndo Dio, chijni tajon juachxin tsechónni kain nchakon. Na i. Jan an nta a ixra ixi ndo Dio jaña kotuanna ndo. Lastuna siã xrochrjanga i chijnie ndo.

¹⁷Méxin, jan an chuan i xroxengana nã ixi tjako chijnie ndo Dio, ixi jan an xranchang-ina i á tja on sinta a ixra o na i. Ndo Dio, je e ndo kotuanna ndo ko jan an kuiteka on.

¹⁸¿Méxin, nge e tsjacha jan an ixi nichja chijni ji i? Ko nóna jan an ixi ti tsjácha me e richonda juaxruxin ixi tjako chijnie ndo Dio, ko xro an tomi tsjácha; maski tikinixinna tsjácha ixi ixra rinta a.

¹⁹Méxin, maski xro an ngisen ícha tetuan an aséenna, nta a ixra ixi je o tja on tsingijna chujni ixi jaña itsjé nã tsitikaon nã ndo Cristo.

²⁰Nchakon ritjén ngajin ni judío, jan an nta a xranchi nche e ni judío ixi jaña xrokuitikaon nã ndo Cristo. Ko titika on ti kuetuan an ndo Moisés, maski íxrokonda i xrokuitika on ley me e.

²¹Ko nchakon ritjén ngajin ni titikaon a ley, jan an nta a xranchi je e nã ixi jaña tsingijna nã tsitikaon nã ndo Cristo ko je a ixi titikaon a ley. Na i jan an titika on nge e kuetuan an ndo Cristo.

²²Nchakon ritjén ngajin sen nandá taxi titikaon ndo Cristo, jan an nta a xranchi je e sen ixi jaña ícha sen tsitikaon. Jan an nta a xranchi ngujngu chujni ixi jaña ikaxin nã tsitikaon nã ndo Cristo.

²³Kain ji i nta a ixi tsienxin nã chijnie ndo Dio ko ixi tja on tsayá a kain nge e jian tsajon ndo.

²⁴Ja anta no anta ixi nchakon tinga itsjé chujni ixi tjaun nã tsjacha nã naa nge e, je a kain nã tsjacha nã tsayé e nã me e. Jaña kaxon ti titika onna ndo Cristo, jian sintu una ixi jaña tsayé ena nge e tsituina ndo.

²⁵Ni tinga, tintu e nã kain ti tingijna i nã tsjacha nã ko tayakon en nã aséenã nã ixi tjaun nã xrojuacha nã maski naa nge e taka tsjexin. Ko jaína ntu una xrée Ncháina Jesús ixi tsayé ena naa nge e nai a tsjexin.

²⁶Ko jan an, nta a ixra ixi tsjácha nge e tsajon ndo Jesús ko nta a ixra ixi nóna nge e nta a. Ko je a xruenxon nta a ji i.

²⁷Jan an tintua i ixi cuerpona tsituan an ngajin jan an, ko tetuan an aséenna ixi jian tsitika on ixi tjaun a sinta a ti ndako a ko ixi jan an ó juako chijnie ndo Dio ngajin ikaxin nã ko nchakon ndo Dio tsajon ndo ti ndachro ndo ngajin chujni, tjaun a ixi jan an tsayá i.

10

Nge e tetuan an ndo Dio kondee ídolo

¹Kichuuna, jan an tja on tsono anta ixi sen kuachrjenixinna, kain sen kuintee sen ngangí naa itjuj bake e ndo Dio, ko kain sen kuatsingatu e sen Ndachaon ndatin in Játse.

²Jaña kain sen kuarue e ndo Moisés bikitée sen ixi kuintee sen ngangí itjuj ko kuatsingatu e sen ndachaon* ko jaña kuitikaon sen kain ti kuetuan an ndo Moisés.

³Ko kain sen xraje o juine sen nge e kuixin ngajni

⁴ko kain sen naxraje o kui i sen nge e kuajon ndo Dio ixi kui i sen inda kuachrjexin naa ixro juinchenchaon ndo Dio, ixro me e ndo Cristo.

⁵ Ko itsjé sen juinche a sen ti tjaun ndo Dio; méxin, koñao ndo ko ntajie nchese nti a kuenxin sen.

⁶ Kain ji i kon en ixi juako ngajin jaina ixi jaina tsikakuenxin ana sinche ena ti ndako a xranchi juinche e je e sen.

⁷ Méxin, titikaon anta ídolo xranchi juinche e kaxin sen, jaña jitaxin xroon chijnie ndo Dio tsikjin sen kuachronga ó sa ó: “Kain chujni bake e sen nunte juine sen ko kui i sen, tjume e bingatjen sen ko ité sen ko juinche e sen ti ndako a.”

⁸ Kaxon xrochonda ina nchri je a janchrí ana xranchi juinche e kaxin sen ko kondeexin me e naakua nchakon kuen en ventitres ml sen.

⁹ Kaxon sintu ana ixi tsikonna á nduaxin tsoñao ndo Dio xranchi juinche e je e sen ko kondeexin me e kuen en sen ixi kunchee juine e ba sen.

¹⁰ Ko xronichjangie ana ndo Dio xranchi je e sen kuanichjangí e sen ndo, méxin kuij naa ángel ne e xichononte[†] ko naakónaxón xa sen.

¹¹ Kain ji i kon en sen tachrí ina ixi jaña kaxon jaina xrokonojina ko ji i jitaxin xroon ixi tsjakojna jaina ti stena jai ti ó tsjixin tsitjáña nunte xasintajni.

¹² Ko ngisen xraxaon ixi jian jinche e sen, xrotsje e sen jian, ixi kain nchakon jaña sinche e sen.

¹³ Ja anta ti xrojan nge e tsango tangi kon annta, xraxaonnta ixi kain chujni jaña ton en na kaxon. Ko ja anta chuntianta ndo Dio ixi je e ndo tsintua inta ndo ixi ja anta tsatsinganta naa juachjaon tsango tangi ti tsokuaxian inta. Méxin, nchakon tsij xrojan nge e tangi ngajinnta, ndo Dio tsingijnanta ndo ko jaña tsjachanta.

¹⁴ Méxin, kichuuna, titikaon anta ídolo.

¹⁵ Ja in nichja anta ixi nóna tienxinnta nge e rindachrjan. Ko ja onta take énta xrox-raxaonnta á nduaxin ti ndachrjan.

¹⁶ *Nchakon intena cena juako Ncháina Jesús ko tajonna juasaya ngajin ndo, kainna tu una ti jitjá copa ko naakua xraxaonna ixi jnié ndo Cristo kuintjé ixi jaina. Ko tonchri-jinna nutja intena ko jaña xraxaonna ixi je e ndo kuajon ndo cuerpoe ndo ixi jaina.

¹⁷ Maski kueyana, kainna naakua nutja intena ixi kainna ikjanna naakua cuerpoe ndo Cristo.

¹⁸ Tsje enta xranchi nche e ni tajna Israel, ine na iko tsikajon na ngajin ndo Dio me e xrondachro ixi je e na kaxon nekao kichuuna nge e tsikajon na ngajin ndo.

¹⁹ Ndachrjan i ixi ti ídolo chóna juachaxin, ko kaxon ndachrjan i ixi ntao tajon na ngajin ídolo me e tjintee. Na i.

²⁰ Ndachrjan ixi ni titikaon a ndo Dio tajon na xrojan nge e ngajin ídolo ko nduaxin espíritu Xixron anxrée tayé e ji i, je a ndo Dio. Ko jan an tjaun a ixi jaña xrojuinche enta kaxon ixi tjaun a kaxon ja anta tsjitexinnta ngajin espíritu Xixron anxrée.

²¹ Jua i tsu una nge e ti xraxaonxinna jnié Ncháina Jesús ko kaxon tsu una nge e xraxaonxinna espíritu Xixron anxrée. Ko jua i sintena nutja xroxraxaonxinna cuerpoe Ncháina Jesús ko kaxon sintena nge e xroxraxaonxinna espíritu Xixron anxrée.

²² ¿Á tjaunnta ixi ndo Dio tsoñao ndo? ¿Á jaina ícha chondana juachaxin ixi je e ndo?

Tsjena nge e ícha tsingijna sen kichuuna

²³ *Chao sintu una kain nge e ko je a kain nge e jian. Chao sintu una xrojan nge e tjaunna ko je a kain ti tjaunna tsingijnana ixi ícha tsichuxinna ndo Dio.

²⁴ Tjé anta je o nge e ja onta tjaunnta ixi tsake enta juaxruxin. Na i. Kaxon tjéenta nge e tsingijna ikaxin sen.

²⁵ Chao sintenta kain ntao tochji ngataon ndasin ko xro an nge e tjanchangínta, jaña xroxraxaon anta á ndako o ndakua i rinche enta,

²⁶ ixi kain nge e jii nunte xasintajni, Ncháina Jesús juinchéña ndo.

²⁷ Ko siá xrojan ni titikaon a Ncháina xrokuiya anta na ixi xrojuinteku unta na, ko ja anta tjaunnta xrokonchijne enta, chao sintenta nge e tjáanta na ko tsjanchangei anta nge e kondée ti sintenta

²⁸ Ko siá xrojan ngisen xrondachro ixi ntao sintenta ó tsikajon na ngajin naa ídolo, cháña nte anta ntao me e, ixi kondeexin ti nche enta, ndako a xroxraxaon na.

²⁹ Ndachrjan ji i ixi tja on ixi ndako xroxraxaon ni titikaon a ndo Dio, je a ixi xrojan ja anta ndakua i xroxraxaonnta.

Jan an nchena i juaxruxin sintu i naa nge e je o ixi ikaxin sen ndako a xroxraxaon sen.

³⁰ Siá jan an tajon juasaya ngajin ndo Dio ixi nge e siné, ¿sonda ndakua i xronichja na ixi xrojan nge e juiné?

[†] 10:10 *xichononte* muerte 10:16 Mt. 26:26-28; Mr. 14:22-24; Lc. 22:19, 20. 10:23 1Co. 6:12.

³¹ Nchakon intenta ko tin innta ko nchakon nche enta ixra, kain ji i nche enta ixi jaña tsayé e ndo Dio juasaya.

³² Nche anta nge e sincheni e aséen ikaxin sen, maski sen judío o maski sen je a judío o sen ningue ndo Dio.

³³ Jan an tja on ixi kain ti nta a xrobake exin juaxruxin kain chujni, je a tja on ixi je o jan an xrobake é juaxruxin. Na i. Jan an tja on ixi jian tsake e ikaxin chujni ixi tja on tsatikaon na ndo Dio.

11

1 *Nche enta xranchi nta a jan an ixi jan an nta a xranchi juinche e ndo Cristo.

Xranchi xrojuinche eni nchakon xra oni ni ngo

2 Kichuuna, juasianta ixi kain nchakon xraxaonninta ko titikaonnta nge e juin-takuan annta.

³ Ko tja on tsono anta ixi ndo Cristo tetuen en ndo kain xi, ko kain xi tetuen en xa janchri e xa, ko kaxon jaña ndo Dio tetuen en ndo ndo Cristo.

⁴ Ko naa xi ti nichje e ndo Dio o tjako xa chijnie ndo ko jichjinga xa xronchritjé e xa, ña xrondachro chónnda i xa juasaya ngajin Ncháina Jesús.

⁵ Ko siá naa nchri jixratja i jaa nchra ti nichje e nchra ndo Dio ko ti jitjako nchra chijnie ndo, ña xrondachro ixi chónnda i nchra juasaya ngajin ndoxi e nchra me e xrokjui xranchi xrochónnda i nchra xrajaa nchra.

⁶ Ko siá naa nchri tjaun a nchra xroxratja jaa nchra, cháña xrokjín jaa nchra. Ko siá tsosue e nchra xrokjín jaa nchra, cháña xroxratja jaa nchra.

⁷ Ko xi xrokonda i xroxratja jaa xa ixi je e xa tsixexin xa xranchi ndo Dio ko ngajinxin xa tsikonni juachaxien ndo Dio. Ko naa nchri, ngajin nchra tikonxin juachaxin chónnda ndoxi e nchra.

⁸ Ixi nchakon xraxrangíxixión nunte xasintajni, xi kuachrjenixin a xa naa nchri. Na i. Nchri kuachrjenixin nchra naa xi.

⁹ Ko kóna i xi kondeexin nchri. Na i. Nchri kóna nchra ixi xi xrokonde e xa ngisen tsekao xa.

¹⁰ Méxin, xrokonda xroxratja jaa nchri ixi jaña xrondachro je e nchra titikaon nchra ndoxi e nchra ko jaña sen ángel tsikon sen ixi titikaon nchra.

¹¹ Ko ti titikaonni ndo Cristo xrokonda ixi xi tsingjina xa nchri ko nchri tsingjina nchra xi ixi naxraje o tjintee sen ngajin ndo Dio.

¹² Ti xrangíxixión nchri kuachrjenixin nchra naa xi, jaña jai kaxon xi tjongíexin xa ixi naa nchri. Ko kainna tikinixin enna ndo Dio.

¹³ Ja anta nge e xraxaonnta, ¿á chao naa nchri xroxratja i jaa nchra xronichje e nchra ndo Dio?

¹⁴ Tikonni ixi tosue eni ixi naa xi tsintu e xa tsangi xrajaa xa.

¹⁵ Ko nchri chaxro tikonni nchra chrian xrajaa nchra ixi ndo Dio kuajon ndo xrajaa nchra ixi jaña xroxratja jaa nchra.

¹⁶ Ko siá jii xrojan ngisen titikaon a ji i, tsono anta ixi jan anna ko kain sen ningue ndo Dio jaña titika onna.

Ndako a nche e sen ti ine sen cena juako Ncháina

¹⁷ Ko jii naa nge e xrontatjunta ixi ndakua i nche enta. Nchakon xejunta ni ngo naa nge e jian xrojuinche enta ko nche anta me e.

¹⁸ Sa ó xrontatjunta ixi jan an kuin an nchakon xejunta tetoku u kichuunta. Ko jan an tianxin ixi nchéxin jaña jiton en.

¹⁹ Xrokonda tson en jaña ixi jaña xrokonoaxinnta ngisen nduaxin titikaon Ncháina ko ngisen na i.

²⁰ Méxin, siá tjakaxin kichuunta nchakon xejunta sintenta cena juako Ncháina, nduaxin a nche enta ti juako Ncháina.

²¹ Ixi nchakon sintenta, kaxinnta chuen anta ko intentá, méxin kaxinnta xra chundanta jinta ko kaxinnta kuannta.

²² ¿Á chonda inta nchianduinta? Nti a xrojuintexinnta ko xrokui inta nge e tjaunnta. Siá jaña nche enta ngaxin in ni ngo, me e xrondachro chonda inta juasaya ngajin ningue ndo Dio ko me e tosuexin sen nóa, sen chónnda i nge e sine. ¿Nge e tjaunnta xrondachrjan? Chuen anta ixi xrondachrjan jian stenche enta. Na i. Je a jian nche enta.

Sintena ixi xraxaxaunxinna Ncháina

²³ Ti juakona Ncháina, me e ntakuan annta: Ixi tiie itsé na ndo, je e ndo kua ndo nutja

²⁴ ko kuajon ndo juasaya ngajin ndo Dio ko tjume e konchrijin ndo nutja ko ndachro ndo: “Ji i cuerpona tsajon ko tsen en xixi ja anta. Nchakon sintenta nio xraxaonntana.”

²⁵ Ko juexin juine sen, itsé ndo copa jítjía ndée tu uva ko ndachro ndo: “Copa jítjía ndée tu uva ji i; me e xrondachro tsóña naa ley natjúá xixi tsintji njina. Nchakon tsi inta ndée tu uva ji i, jan an xroxaxaonntana.”

²⁶ Méxin, nchakon sintenta nutja ko tsi inta ndée tu uva, me e xroxaxaonnta xixi kuen en Ncháina Jesús. Jaña nche enta tsijja nchakon xrokjan Ncháina.

Xranchi sineni cena juako Ncháina

²⁷ Méxin, siá xrojan ngisen sine nutja ko tsi i sen ndée tu uva xroxaxaonxin sen Ncháina ko siá ndako a sinche e sen me e, tsama sen ijie xixi chónde a sen juasaya ngajin cuerpo ko jníe Ncháina Jesús.

²⁸ Méxin, ngujnguna xrokonda xroxaxaonna sa ó á ndako o ndakua i juintu una ko tjume e sintena nutja ko tsu una ndée tu uva.

²⁹ Ko ngisen sine ko tsi i ko nduaxin a xraxaon sen cuerpo e Ncháina Jesús, ndo Dio sinchekama ndo sen ijie.

³⁰ Ko méxin itsjénta ni anta ko itsjénta soji anta ko ikaxin sen ó kuen en sen.

³¹ Méxin, xrokonda xrotsje ena jian xranchi jii ngaya aséeina nchakon xroxaxaonna xixi je e ndo ko jaña Ncháina sinchekama ina ndo ijie.

³² Ko siá ndo Dio tsjankata ana ndo ijie jai, ko kaxon tangi tsoina xixi jaña tjaun ndo tsjakoína ndo jian sintu una xixi jaña i tsjankata ina ndo ijie xranchi chujni nunte xasintajni.

³³ Méxin, kichuuna, nchakon xra onta xixi sintenta cena juako Ncháina, chón en ngujngu kichuunta.

³⁴ Ko siá jii naa sen kuen en jinta, cháña sa ó sine sen xrojan nge e ndo a sen xixi ndo Dio i tsjankata i ndo sen ijie nchakon xra onta.

Ko xra jii ikaxin nge e xrontatjunta nchakon tsjasotsja anta.

12

Espíritue ndo Dio tajon ixra ngajin ngujngu chujnie

¹ Kichuuna, tja on tsono anta nge e ixra tajon Espíritue ndo Dio tayé e ngujngu chujnie ndo.

² Ja anta ó no anta jian xixi nchakon xratitikaon anta Ncháina Jesús, ja anta kuarue enta kaxin ídolo jua i nichja.

³ Méxin, xrontatjunta xixi ngisen nichjaxin Espíritue ndo Dio, jua i xronichjangí e sen ndo Jesús, ko xro an ngisen chao xrondachro xixi ndo Jesús Nchée sen, siá nichjaxin a sen xixi Espíritue ndo Dio.

⁴ *Jii kueya ixra tajon Espíritue ndo Dio ko xraje o Espíritue ndo jitajon kain ixra me e.

⁵ Ko jii itsjé ixra sinche eni, ko kain ixra me e xrée Ncháina.

⁶ Ko jii kueya ixra nche e ngujngu sen ko xraje o ndo Dio, ndo tajon juachaxin sinche eni ixra me e.

⁷ Ndo Dio tajon juachaxin ngajin ngujngu chujnie ndo xixi sinche e sen ixra ko xixi juachaxien Espíritue ndo me e tsingijna sen ikaxin sen kichuu sen.

⁸ Espíritue ndo tajon juachaxin ngajin kaxin sen tsono e sen chijni tsango jian, ko ngajin ikaxin sen tajon ndo juachaxin tsango jian xronichja sen chijnie ndo.

⁹ Ko Espíritue ndo tajon ngajin ikaxin sen xixi ícha xrochuntia sen ndo Dio ko kaxon ngajin ikaxin sen juachaxin xixi sinchexrjuen en sen chujni ni e.

¹⁰ Ko ikaxin sen tayé e sen juachaxin sinche e sen kaxin ixra tsango ijie, ko ikaxin sen tayé e sen juachaxin xrochronga sen nge e jindachro ndo Dio, ikaxin sen tayé e juachaxin xrondachro sen nge e jinichjaxin chujni, á Espiritu jian o espíritu ña i, ko ikaxin sen tayé e sen juachaxin xronichja sen itsjé ngigua, ko ikaxin sen tayé e sen juachaxin xrochronga sen nge e xrondachro ngigua me e.

¹¹ Ko xraje o Espíritue ndo Dio tajon kain ji in ko je e ndo tajon ndo juachaxin ti xra sinche e ngujngu chujnie ndo xranchi je e ndo tjaun ndo.

Kainna tikinixin enna ndo Cristo

¹² *Sen ningue Ndo Cristo ste sen xranchi naa cuerpo e chujni, jaña ste sen xixi chónde kueya parte. Ko maski kueya parte, naakua cuerpo jii. Jaña ningue ndo Cristo naakua cuerpo kaxon.

¹³ Kainna maski á sen judíona o á je a sen judíona, o maski sen nchenche e na ixra* kain nchakon ko xenge a sen na, o á sen tituan an, kainna naakuaxon Espíritue ndo Dio

bikitéexina, ko kainna ikjanna naakua cuerpoe ndo Cristo, ko xranchi naakua chujni, jaña kuaye ena Espíritue ndo Dio.

¹⁴ Ixi cuerpo je a naakua parte chónða. Na i. Itsjé parte chónða.

¹⁵ Siá tutéina xrondachro: “Jan an je a itjani, méxin jan an tikinixian i cuerpo”, me e á je a xraje o cuerpo kayui, itjani ko tutéeni.

¹⁶ Kaxon siá xrondachro naa ndatsjonni: “Jan an je a ikonni, méxin jan an tikinixian i cuerpo”, ko je a nduaxin me e kaxon.

¹⁷ Siá nchijí cuerpo xrokjui ikonni, ¿xranchi xrokuin enni? Ko siá nchijí cuerpoeni xrokjui ndatsjonni, ¿xranchi xrobakaxre eni?

¹⁸ Méxin, ndo Dio kuituan an ndo no tsake e ngujngu parte ne e cuerpo xranchi tja on je e ndo.

¹⁹ Ko siá naa parte xrokjui nchijí cuerpo, í xrokuake a cuerpo.

²⁰ Ko nduaxin kueya parte chónða naa cuerpo ko kain parte me e naakua cuerpo.

²¹ Ikonni jua i xrondache itjani: “Xrokondana ia ja a”, ko kaxon jaani jua i xrondache tutéeni: “Xrokondana ia ja a.”

²² Ti parte xraxaonni ixi tanto a tjintee, me e ti ícha xrokonda

²³ ko ikaxin parte ne e cuerpo xraxaonni tjinte a ko me e ti ícha jian tetsáa ko ti parte ícha chaxro a, me e ti ícha tatjani.

²⁴ Ko nge e ti ícha chaxro chondana xrokonda i xroxratjaxin manta. Je e ndo Dio juinchekonchjian ndo nchijí cuerpojna ko je e ndo kuajon ndo ti tjintee ngajin parte ícha tjinte a.

²⁵ Jaña kain parte cuerpoeni naakua jitséxin kichuu ko jaña tingijna kichuu.

²⁶ Nchakon toni e naa parte cuerpoeni, kain ikaxin parte kaxon tíin; ko nchakon tayakon enni naa parte, nchijí cuerpo take e juaxruxin.

²⁷ Ko ja anta ikjannta cuerpoe ndo Cristo ko ngujngunta tikinixian ennta cuerpoe ndo.

²⁸ *Ko ndo Dio kuinche e ndo sen sinche e xrée ndo ti ni ngo, sa ó kuinche e ndo sen apóstol; tjume e kuinche e ndo sen xrochronga nge e nichja ndo. Nínxin kuajon ndo juachaxin ngajin sen tsjako chijnie ndo, ko kaxon kuajon ndo juachaxin ngajin kaxin sen sinche e sen kaxin ixrā ijié, ko kaxon kuajon ndo juachaxin ngajin ikaxin sen sinchexrjuen en chujni ni e, ko kuajon ndo ngajin ikaxin sen juachaxin tsingijna sen ikaxin chujni, kaxon kuajon ndo juachaxin ngajin ikaxin sen tsetuan an sen ixrā ni ngo, ko kaxon kuajon ndo juachaxin ngajin ikaxin sen xronichjaxin sen inaa ngigua.

²⁹ Kain a sen kuayé e sen ixrā apóstol, ko kain a sen kuayé e sen juachaxin xronichja nge e ndachro ndo Dio, ko kain a sen chónða sen juachaxin tsjako sen chijnie ndo, kain a sen chónða sen juachaxin sinche e sen kaxin ixrā ijié,

³⁰ ko kain a sen chónða sen juachaxin sinchexrjuen en sen chujni ni e, ko kain a sen chónða sen juachaxin xronichjaxin sen jée ngigua, kain a sen chónða sen juachaxin xrochronga sen nge e xrondachro ngigua me e.

³¹ Tjéenta naa ixrā ícha jian xrotjáanta ndo Dio. Ko jai jan an tsjako anta naa cha o ícha jian xroruéenta.

13

Xrotjue e kichuuna

¹ Siá xronichja ikaxin ngigua ko xronichja xranchi nichja sen ángel, ko tjaun a sen kichian, kain me e xro an tjintee ko xrokjanna xranchi naa nítjuā je o tonkjan, o naa chika séen tonkjan.

² *Ko siá xronichja chijnie ndo Dio, ko siá xrokuiānxin kain nge e xra noe e ikaxin chujni, ko siá xrokonojna kain nge e, ko ícha xrochuntia ndo Dio ko chao xrontatjan naa ijna: tachrjengíxian nti i ko satjia nango, maski jaña sinta a ko tjaun a sen kichian, kain ti nta a xro an tjintee.

³ Ko siá tsingijna ni nóa ko xrotjá a nā kain nge e chonda, ko maski xrokuajon cuerpona xroche, ko tjua i sen kichian, xro an tjintee nge e nta a jan an.

⁴ Ko sen tjue e sen kichuu toñao a sen taka, ko jian aséen sen, ko je a tochgio sen, nchejé a aséen sen, ko ndachro a sen ixi tsango no e sen,

⁵ je a ndakua i nche e sen ko je a ña i sen, je a taka chjée sen juañao, ko tjenge a sen ti nchekao nā sen,

⁶ ko chéē a sen ti nge e nche e ni ndako a. Je e sen ste sen juaxruxin nchakon inaa chujni nichja ti nduaxin.

⁷ Siá tjue e kichuuna maski xrojan nge e ndako a sinchejna nā, toñao ana, ko nduaxin titika onna ndo Dio, me e xrochon enna ixi tsingijnana ndo.

⁸ Ti tjuje e kichuuna nai a tsjexin. Ko tsji nchakon ti nichja sen chronga chijnie ndo Dio tsjexin, ko nichja sen ikaxin ngigua tsjexin, ko tsjexin kain ti kuano e chujni.

⁹ Ti nojna jai ko ti nichjana ixi ndo Dio me e naa nge e xrachuxin ana jian.

¹⁰ Ko nchakon tsji ti tsango jian, tjume e tsjexin ti nchín nojna jai.

¹¹ Nchakon xrancháina, kuanichja xranchi xjanchíin, kuaxraxa on xranchi xjanchíin ko bakianxín xranchi tienxin naa xjanchíin. Ko nchakon ba ngi kuintu a kain ti kuenta a xranchi xjanchíin.

¹² Jai tikon ana jian, tikonna xranchi tikonna ixi naa xrosenda chóna kitja, ko tjume e tsji nchakon chao tsikonna ndo Cristo ixi ikonna. Ko jai xratitjáña tsichuxinna ndo; ko tsji nchakon nduaxin xrochuxinna ndo Dio jian xranchi ndo Dio chuxinna ndo jaina.

¹³ Ko jai jii ní nge e tjintee, me e ti xrochuntiana ndo Dio, ko ti nojna jian ixi je e ndo xrochajina ndo ti stechon enna, ko ti xrotjue e kichuuna. Ko ti ícha tjintee me e ti xrotjue e kichuuna.

14

Ti nichja na ikaxin ngigua ko chronga na chijnie ndo Dio

¹ Ícha tjéenta xrotjue e kichuunta ko ícha jian tjanchianta ixi Espíritue ndo Dio xrotjáanta juachaxin ixi xronichjanta nge e tjaun ndo.

² Ixi ngisen nichja ikaxin ngigua, ngajin ndo Dio nichja sen ko je a ngajin chujni, ixi xro an ngisen tienxin nge e jinichja sen ixi espíritue ndo Dio nichjaxin sen ti xranoe a sen.

³ Ko ngisen nichja nge e jichrónga ndo Dio, me e xrokonde e chujni ixi ícha jian sinche e sen ko jaña tsake e sen juaxruxin.

⁴ Ko ngisen nichja ikaxin ngigua je o tsingijna aséen sen ixi ícha tsono e sen juachaxien ndo Dio. Ko ngisen nichja nge e tjaun ndo Dio tsono eni, sen me e tsingijna ikaxin sen ni ngo ixi ícha tsono e sen.

⁵ Jan an tja on ixi kainnta xronichjanta ikaxin ngigua tajon espíritue ndo Dio. Ko ícha jian ikaxinnta xrochronganta nge e tjaun ndo Dio tsono eni ixi ícha tjintee xrochronga sen nge e tjaun ndo Dio ixi ti xronichjani ikaxin ngigua. O síá je e sen kaxon xrondachro sen nge e ti nichja sen ixi jaña tsienxin kain sen titikaon ndo Dio.

⁶ Kichuuna, síá jai xrojuasótsja anta ko xronichjaxin ikaxin ngigua, xruenxon xronichja me e. Ícha jian xrobingijnanta síá jan an xronichjaxin naa ngigua tienxinnta, jaña tsono anta nge e ndachro ndo Dio o tsienxinnta naa nge e xranoe anta, o xrontatjunta naa nge e tjaun ndo Dio xrokono anta, o xrojuako anta naa nge e jian.

⁷ Ixi kaxon xranchi tonkjan naa ntaxro ko tonkjan naa arpa, síá xraje o tonkjan ngujngu, jua i tsichuxinni nge e soon jitonkjan.

⁸ Ko síá ndako a xrondachro tjao, ¿xranchi xronojna xrondachro satsjina guerra o na i?

⁹ Jaña ja anta kaxon, síá nichjanta naa ngigua tienxin a chujni, ¿xranchi tsono e sen nge e nichjanta? Ko síá xro an ngisen tienxin, ja anta xranchi chrinto rinichejenta.

¹⁰ Jii kueya ngigua nunte xasintajni, ko ngujngu ngigua jii chujni tienxin ngigua.

¹¹ Ko síá xrojan ngisen xronichja na ko xrokuiánxin a nge e nichja sen, sen me e jan an xroxraxa on ixi je e sen tsikixín sen inaa tajna ko kaxon je e sen xroxraxaon sen ixi jan an jée tajna tsijixin.

¹² Méxin, ja anta ti tsango tjaunnta tsaye enta naa ixra tajon Espíritue ndo Dio, tjanchianta kaxin ixra tsingijna kain sen titikaon ixi jaña ícha jian tsitikaon sen.

¹³ Méxin, ngisen nichja ikaxin ngigua, xrojuanche e sen ndo Dio ixi tsajon ndo juachaxin tsienxin sen ko xrochronga sen ti nichja sen.

¹⁴ Síá jan an xronichja a ndo Dio naa ngigua tajon espíritue ndo, aséenna jinichje e ndo, ko tianxin a nge e rindachrjan.

¹⁵ ¿Nge e xrojuanta a tjume e? Xronichjaxin ndo Dio ixi aséenna ko kaxon xrokuiánxin nge e rintatjan ndo, ko xrotsje ngajin ndo ixi aséenna ko kaxon xrokuiánxin nge e ritsje.

¹⁶ Ixi síá xrokuajonnta juasaya ngajin ndo Dio ixi asáanta ko sen stetin en tsienxin a sen nge e rindachenta ndo Dio, jua i tsajon sen juasaya ixi tienxin a sen nge e richronta.

¹⁷ Maski tsango chaxro rinichejenta ndo Dio ko tájonnta juasaya ngajin ndo, síá tsienxin a sen stetin en, ja anta tingijna inta sen ixi ícha tsono e sen nge e tikiñixin en ndo Dio.

¹⁸ Jan an tajon juasaya ngajin ndo Dio ixi jan an chonda juachaxin xronichja ikaxin ngigua tajon ndo Dio, ngigua tienxin a ja anta.

¹⁹ Ko nchakon tsixra o sen ni ngo, je o tja on xronichja na ó chijni ti tsienxin sen ixi jaña ikaxin sen jian tsitja sen ixi síá xronichja ite* mil chijni ti inaa ngigua tsienxin a sen.

²⁰ Kichuuna, xraxaon anta xranchi ichjan. Ja anta nche enta xranchi ichjan ixi ichjan noe a xjan nge e xrondachro ti ndako a. Ja anta xraxaonnta xranchi naa sen cha.

* 14:19 ite diez

²¹ Xroon jitaxin ti kuetuan an ndo Dio ja in ndachro: “Jan an xronichjaxin ngajin ni tjanya Israel ixi ikaxin ngigua ko kaxon xronichjaxin chujni tsikixin inaa tjanya, ko je e na tsitikaon ana na.”

²² Ti xronichjaxin ikaxin ngigua tienxin a na, ni titikaon a Ncháina me e tsikon na ixra jíe ne e ndo Dio, ko ji i tingijna i sen titikaon ndo. Ko chijni chronga naa nge e juincheno e ndo Dio, me e tsingijna ngajin sen titikaon Ncháina Jesús, ko je a ni titikaon a ndo.

²³ Tjume e nchakon xroxejunta ti jii ni ngo kainnta titikaonnta Ncháina, ko siá kainnta xronichjanta ikaxin ngigua, ko tixin in naa na ko tsienxin a na nge e stetin en na, o xratitikaon a na Ncháina Jesús, xrondachro na ixi tsinchetjáña jáanta.

²⁴ Ko siá xrochronganta naa nge e juntano anta ndo Dio, ko tixin in naa ni titikaon a Ncháina, o tixin in naa ni xratienxin a, ko tsin en na nge e rinichjanta, xroxraon na ixi je e na ndako a juinche e na.

²⁵ Ko jaña tsonoxin nge e imao xraxaon na ngaya aséen na ko tjume e tsake exin ntatuchi in na ko tsajon na juasaya ngajin ndo Dio ko xrondachro na ixi nduaxin ndo Dio jii ngajinnta.

Ndako sintu una kain nchakon xroxejuna ti ni ngo

²⁶ Méxin, kichuuna, ¿nge e xrokon en? Nchakon xroxra unta ti jii ni ngo, itsjenta salmo, ko kaxinnta xrojuincheken ennta sen kichuunta, kaxinnta xrochronganta nge e juntano anta ndo Dio, kaxinnta xronichjaxinnta ikaxin ngigua tienxin a sen, ko kaxinnta xrochronganta nge e xrondachro ngigua me e. Kain ji i tson en ixi sen ni ngo icha tsitikaon sen ndo Dio.

²⁷ Ko siá xronichjaxinnta ikaxin ngigua, je o yuu o ní sen xronichja ko sa ó naa sen ko tjume e inaa sen, ko xrokonda ixi xrojan ngisen tienxin xrochronga sen nge e xrondachro ti jinichja inaa sen.

²⁸ Ko siá xro an ngisen jii ni ngo no e ko xrochronga nge e xrondachro nge e jinichja inaa sen, cháña xronichjaxin a sen ikaxin ngigua nchakon xroxra unta, ko je o xronichjaxin sen ngaya aséen sen ngajin ndo Dio.

²⁹ Tájonnta juachaxin ixi xronichja yuu o ní sen xrochronga nge e juincheno e ndo Dio sen. Tjume e sen jitin en xroxraon sen á nduaxin chijnie ndo Dio ti stendachro sen jinichja.

³⁰ Ko siá xrojuincheno e ndo Dio xronichja naa sen jii nti a, sen sa ó jinichja xrotenko sen ixi xronichja sen nandá kuayé e chijnie ndo Dio.

³¹ Chao ngujngu sen xrochronga sen nge e juincheno e ndo Dio sen ixi jaña kainnta tsono anta nge e jian ko juaxruxin tsake e asáanta.

³² Ko ngisen kuayé e juachaxin xronichja nge e chronga ndo Dio tsono e sen kichuu sen, kaxon xrokonda je o xronichja sen ti tikinixión.

³³ Ixi ndo Dio, ndo tajon juaxruxin tsake e aséenni, tjaun ndo kaxon jian tson en ngaxin in ningue ndo.

Xranchi ó kuan annta nche enta nchakon xra onta ngaxin in ni ngo,

³⁴ sen nchri xrokonda xronichja i sen hora ritin ennta chijnie ndo Dio ixi ko a juachaxin jaña tson en; xrokonda tsitikaon sen xranchi tetuan an ley.

³⁵ Siá tjaun sen nchri tsono e sen xrojan nge e, ti tsijija sen ndo a sen, nti a chao tsjanchangí e sen ndoxi e sen ti tienxin a sen. Ixi je a jian xronichja sen ti stetin ennta chijnie ndo Dio ngaxin in ni ngo.

³⁶ Xrokono anta ixi chijnie ndo Dio xrangixixin a chijni ngajinnta ko kaxon je a ja onta kuaye enta chijni ji i.

³⁷ Méxin, siá jii xrojan ngisen xraxaon ixi je e sen chronga sen chijnie ndo Dio o xraxaon sen ixi Espiritue ndo Dio tingijna sen, xrokono e sen ixi ti rikjin me e naa nge e tsiketuan an Ncháina Jesús.

³⁸ Ko ngisen titikaon a, ja anta titikaon anta sen.

³⁹ Méxin, kichuuna, tsango tjéenta ixi xrokuaye enta juachaxin xronichjanta nge e tjaun ndo Dio tsono eni ko kaxon xrondachro anta ixi jua i xronichja sen ikaxin ngigua tsikayé e sen,

⁴⁰ ko kain ti nge e sinche enta, ndako ko jian tson en.

15

Tsixechón ndo Cristo

¹ Kichuuna, jai tja on syntaxraonnta chijni jian juntakuan annta. Chijni me e kuaye enta ko jian riritikaonnta.

² Ko siá tsintue anta chijni me e, tsarichonnta kain nchakon. Ko siá na i, xruenxon kuitikaonnta.

³ Sa ó, juntakuan annta nge e jan an kuayá a kaxon: ndo Cristo kuenxin ndo ixi ti ndako a juntu una, xranchi ndachro xroon chijnie ndo,

⁴ *ko juabaa sen ndo ko je e ndo xechón ndo nchakon nínxin xranchi ndachro xroon chijnie ndo Dio.

⁵ *Ko sa ó konoxin ndo ngajin ndo Pedro, ko tjume e ngajin sen teyuu kuajikao ndo.

⁶ Tjume e konoxin ndo ngajin quinientos sen kichuuna tsixra o sen ko bikon sen ndo. Ko jai itsjé sen me e xra ste sen, ko ikaxin sen ó tsiken en sen.

⁷ Tjume e konoxin ndo ngajin ndo Jacobo, ko tjume e ngajin kain sen apóstol.

⁸ *Tjume e konoxin ndo ngajin, bikon Ncháina Jesús maski jan an ícha tjume e kuichúxin ndo, xranchi naa xjan tsikitsingajin.

⁹ *Ko jan an nóna ixi je a ícha tjinteena xranchi ikaxin sen tsikinche e Ncháina ko tikinixinna i xrondachijina sen apóstol, ixi jan an kuaningakon an ko tja on naaxrokóñaxón sen titikaon Ncháina.

¹⁰ Maski ndako a junta a, juasie ndo Dio ixi juachaxien ndo kuindoxin ti xraxa on, ko je a xruenxon bikonóa na ndo, ixi ícha junta a ixra ne e ndo ixi kain sen apóstol. Ko je a jan an junta a ixra me e. Na i. Ndo Dio bingijnana ndo ko chjána ndo juachaxin junta a xrée ndo.

¹¹ Ko ni jan an ko ikaxin sen tjinte ana, ti ícha tjintee me e ti chijni nichjana ko ti kuitikaonnta.

Xroxechón ni tsiken en

¹² Ko siá ndachrona ixi ndo Cristo xechón ndo, ¿sonda ndachro kaxinnta ixi xechón a chujni tsiken en?

¹³ Siá xroxechón a sen tsiken en, ña xrondachro kaxon tsixechón a ndo Cristo.

¹⁴ Ko siá tsixechón a ndo Cristo, tjinte a nge e nichjana ko nge e tjakona ko tjinte a kaxon nge e chuntianta.

¹⁵ Ko siá nduaxin a xechón chujni, jaína stencheye ena chujni, ixi chrongana ixi ndo Dio juinchexechón ndo, ndo Cristo. Siá nduaxin sen tsiken en xroxechón a sen íjngo, je a nduaxin xechón ndo Cristo.

¹⁶ Ko siá xechón a sen tsiken en, kaxon ndo Cristo xechón a ndo.

¹⁷ Ko siá ndo Cristo tsixechón a ndo, tjinte a ti chuntianta ndo ko komé a jíanta.

¹⁸ Siá nduaxin a xechón ndo Cristo, kaxon sen kuitikaon ndo, sen kuen en, kuitjáña sen ko jai nai a xroxechón sen.

¹⁹ Ko siá chuntiana ndo Cristo ko xraxaonna ixi je o tsingijnana ndo jai ti stena ngata a nunte xasintajni, tsango lastuna ixi jaína xroxechón ana.

²⁰ Ko nduaxin xechón ndo Cristo. Je e ndo sa ó xechón ndo ko ji i nchenoína ixi nduaxin xroxechón sen tsiken en.

²¹ Ixi naakua xi juangixin juinche e ti ndako a, méxin kain chujni kuama ijie ko kuaxi kuinteken en chujni, kaxon jaña naakua xi xechón, méxin jaña kaxon chao xroxechón kain sen tsiken en.

²² Ixi ti ndako a juinche e ndo Adán, méxin kain chujni kuaxi kuinteken en na. Ko jai, ixi tsitikaonna ndo Cristo, jaña kaxon kainna tsechónna kain nchakon.*

²³ Ja in xrokonda tson en, sa ó xechón ndo Cristo, ko tjume e nchakon xrokjan ndo xroxechón kain sen chuntia ndo.

²⁴ Ko tsij nchakon naatsjexinxón kain nge e ko ndo Cristo sinchejexin ndo kain ni tetuan an ko kain espíritu ña i, ko tsajon ndo kain ti tetuen en ndo tsayé e Ndotée ndo, ndo Dio.

²⁵ Ixi xrokonda tsetuan an ndo Cristo ti tsijija nchakon sinchejexin ndo juachaxin chóna kain ni ningakon en ndo.

²⁶ Ko ti tsjexixin tsitjáña, me e xichononte ko ti ten en chujni.

²⁷ Ndo Dio kuajon ndo kain juachaxin ngajin ndo Cristo ixi tsetuen en ndo kain nge e. Ko ti jaña ndachro xroon chijnie ndo Dio ixi ndo Cristo tsetuen en ndo kain nge e, je a xrondachro ixi tsetuen en ndo ndo Dio kaxon. Na i. Ixi ndo Dio chjée ndo Chjen en ndo, xjan Jesús, kain juachaxin tsetuen en xjan kain nge e.

²⁸ Ko tjume e nchakon tsjexin tsetuen en ndo Cristo kain nge e, ndo Cristo, Chjen en ndo Dio, kaxon tsitikaon ndo Ndotée ndo, ndo tsikajon juachaxin ngajin ndo Cristo. Ko jaña ndo Dio tikinixin en ndo tsetuen en ndo kain nge e.

²⁹ Jii ikaxin na tikitéxin na chujni ixi ni tsiken en, ¿sonda jaña nche e na siá titikaon a na ixi ni tsiken en xroxechón na íjngo?

³⁰ Ko, ¿sonda nguungu nchakon tituexinna ixi naatsóñaxóna na?

³¹ Méxin, kichuuna, jan an nóna nixi ngixe i nchakon naatsóñaxónna nã. Ko nduaxin juaxruxin ritjén ixi ja anta kaxon titikaonnta Ncháina Jesucristo.

³² Ko nchakon bake é tjajna Éfeso kugetoki an chujni ste nti a ixi je e nã nche e nã xranchi iko jie e, ¿ko nge e xrojuacha jan an ti tsen enna siá nduaxin a xroxechón ni tsiken en? Siá nduaxin a ji i, cháña nche ena xranchi ndachro kaxin nã: “Sinena ko tsu una ixi ndúya ndatsen enna.”

³³ Tituexin anta ixi sintaya anta nã: “Siá xrojuentonta ni ndako a nche e, ja anta sinchetjáñanta kain nge e jian no anta.”

³⁴ Ikjannta nche enta ti jian ko ínche anta ti ndako a. Kaxinnta xrandako a titikaonnta ndo Dio ko ndachrjan ji i ixi jaña tsosua anta.

Xranchi xroxechón ni tsiken en

³⁵ Nchéxin xrojan ja anta tsjanchangínta: “¿Xranchi xroxechón ni tsiken en ko xranchi tson en cuerpoe nã?”

³⁶ Naa nge e ninta ti xranchangi ji i. Tsee tengani chjaka xrokonda tsen en tsee ixi jaña tsechón ika.

³⁷ Ti tengani je a ika tengani. Na i. Ti tengani naa tsee, á tsee noatrigo o ngixe i inaa tsee.

³⁸ Ko ndo Dio tajon ndo nguju nge e tachrje ko tsóña xranchi tjaun ndo, ko nguju tsee xrochónnda nguju kée.

³⁹ Ko je a kain cuerpo xraje o. Na i. Jii cuerpoe chujni, jii cuerpoe iko, jii cuerpoe kuxe, ko jii cuerpoe kuchee.

⁴⁰ Kaxon jaña jii cuerpoe sen ángel ste ngajni ko jii cuerpoe ni ste ngata a nunte xasintajni. Ko jii cuerpoe sen ángel chaxro tsje e ko kaxon jii cuerpoe chujni chaxro tsje e.

⁴¹ Ti tingasáña chjiuxro chaxro, ko chaxro tingasáña nchanitjao ko kaxon nchanotsé tingasáñaxin, ko maski jii itsjé nchanotsé, jéxin tingasáñaxin nguju nchanotsé.

⁴² Jaña kaxon tson en nchakon xroxechón ni tsiken en. Ixi nchakon ten en nã ko xrabaa nã, renga cuerpoe nã ko nchakon xroxechón nã íjngo, í xrorenga i nã ixi tsechón nã kain nchakon.

⁴³ Ni tsixrabaa renga cuerpoe nã, ko nchakon xroxechón nã íjngo, tsayé e nã naa cuerpo chaxro ko í tsorenga i.

⁴⁴ Xroxrabaa naa cuerpo renga ko tjume e xroxechón naa cuerpo renga i ixi chónnda juachaxien Espíritue ndo Dio. Ko xranchi jii cuerpo renga, jaña kaxon jii cuerpo renga i, chónnda juachaxien Espíritue ndo Dio.

⁴⁵ Ko xranchi jitaxin xroon chijnie ndo Dio: “Xi juinchekonchjian ndo Dio ti xrangíxixión me e ndo Adán, ndo kuayé e juachaxin tsechón ndo.” Ko tjume e kuji inaa ndo xranchi ndo Adán, ko ndo me e chónnda espíritu tajon juachaxin tsechón chujni kain nchakon.

⁴⁶ Ko je a sa ó kóña cuerpo chónnda juachaxien Espíritue ndo Dio. Na i. Sa ó kóña cuerpo renga, ko tjume e kóña cuerpo chónnda juachaxien Espíritue ndo Dio.

⁴⁷ Ndo kóña sa ó, kóñaxin ndo ixi inche jii nunte xasintajni. A ndo yuxin ngajni kujxin ndo me e Ncháina.

⁴⁸ Kain ni jii nunte xasintajni chónnda nã naa cuerpo xranchi ngisen tsikóñaxin inche ti xrangíxixión. Ko kain sen jii ngajni chónnda sen cuerpo xranchi cuerpo chónnda ngisen kujxin ngajni.

⁴⁹ Jai jaina stena xranchi ngisen kóñaxin inche, ko tjume e jaina xrokjanna xranchi ngisen kujxin ngajni.

⁵⁰ Méxin, kichuuna, ndachrjan ixi ti cuerpo chónnda ntao ko ijni jua i tsake e ti tetuan an ndo Dio. Naa nge e renga jua i tsayé e naa nge e nai a tsjexin.

⁵¹ *Xrontatjunta naa nge e noa ínta: Kain ana tsen enna ko nduaxin xrontatjunta kainna tsindoxin cuerpoina.

⁵² Tjume e xranchi xitje e ko tije e jmakonna, ti tsjexixin tsin enna xrondachro tjao, ko kainxin sen tsiken en kuichuntia Ncháina xroxechón sen íjngo ko ínai a tsen en sen, ko kainna, ti stechónna, tsindoxin cuerpoina.

⁵³ Ixi xrokonda ti cuerpo renga tsindoxin naa cuerpo nai a xrorenga, ko cuerpo ten en tsayé e juachaxin nai a tsen en.

⁵⁴ Ko nchakon cuerpo renga tsindoxin naa cuerpo nai a xrorenga ko cuerpo ten en tsayé e juachaxin nai a tsen en, tjume e tson en xranchi jitaxin xroon chijnie ndo Dio: “Nchakon me e tsjexin juachaxin kuachónnda ti ten enni.

⁵⁵ Ja a ti ton ía chujni, ¿no jii juachaxian? ¿No kuitu e ti ncheníexian chujni?”

⁵⁶ Kondeexin ti ndako a nche eni, me e ten enni. Ko ley kuayé e sen sa ó, me e juankata ani ijje.

⁵⁷ Ko juasie ndo Dio ixi xruan an ndo Ncháina Jesucristo ixi juinchemé e ndo ijie kuachóndani.

⁵⁸ Méxin, kichuuna, tsango tjua anta. Tintue anta titikaonnta Ncháina Jesucristo. Kain nchakon ícha xrojuinche enta xrée Ncháina ixi ó jian no anta ixi ixrã me e je a xruenxon nche eni ixrã.

16

Xejo tomi xroxruen en sen ni ngo tjajna Jerusalén

¹ *Ko tomi jua onta ixi tsingijnanta sen kichuuna titikaon Ncháina, nche enta xranchi kuetaan an sen ni ngo nunte Galacia.

² Ngungu domingo tantsjendaáanta nchíin tomi juachanta nchakon ikjuinta ixrã ixi jaña íxrokonda i xroxra o tomi me e nchakon tsjasotsja anta.

³ Ko nchakon tsjaso jan an, tsetuan an sen kuinche e ja anta ixi satsji sen tjajna Jerusalén, ko xrokjin jan an naa xroon xrochronga ixi tsija onta tomi tsayé e sen kichuuna nti a.

⁴ Ko siá xrokonda kaxon jan an itsji.

Nge e xraxaon ndo Pablo

⁵ *Nchakon tsjaso ngajinnta xrokonda tsatsinga tjajna Macedonia, ko tjume e tsjaso tjajna Corinto tsjasotsja anta.

⁶ Nchéxin tsituna kaxin nchakon ngajinnta, kain nchakon tonkin. Ko jaña chao tsingijnaninta nchakon satsji lingo tjajna.

⁷ Jai tjaun a tsjasotsja anta kaxion nchakon. Na i. Jan an tja on tsituna nti a ngajinnta itsjé nchakon siá Ncháina tsajon ndo juachaxin.

⁸ *Ko tsituna kaxin nchakon tjajna Éfeso tsijija kia Pentecostés,

⁹ ixi nti i chonda juachaxin sinta a ixrée Ncháina ko xrokonda jian tson en ixrã me e maski ste kueya ni ningakonna.

¹⁰ *Ko siá tsiji ndo Timoteo tjajna nti a, jian nichje enta ndo ko juaxruxin tariku unta ndo ixi je e ndo jian nche e ndo xrée Ncháina xranchi jan an.

¹¹ Kainnta jian titikaonnta ndo ko tingijnanta ndo ixi jian tsji ndo tsitsjena ndo jan an ko kaxon ikaxin sen kichuuna.

¹² Ndo kichuuna Apolos tsango kuinóatáana ngajin ndo ixi xrokuijtsja anta ndo ko ikaxin sen kichuuna, ko jua i tsiji ndo jai. Tsiji ndo nchakon íxro an ixrã xrochónda ndo.

Juexin nichja ndo Pablo

¹³ Jian xraxaonnta ko nchesoji asáanta. Tintue anta ti chuntianta Ncháina Jesús, xronka inta ko tsanga tinteenta.

¹⁴ Kain xrã nche enta ngajin Ncháina, nche enta ixi tjue enta sen kichuunta.

¹⁵ *Ó no anta ixi sen ndo a ndo Estéfnas, je e sen me e ó sa ó kuitikaon sen chijnie ndo Dio nunte Acaya, ko jai je e sen tingijna sen sen kichuuna, sen titikaon Ncháina.

¹⁶ Tja on ixi tsitikaonnta sen me e ko kain sen nche e ixrã ngajin Ncháina xranchi je e sen.

¹⁷ Tsango chá na ixi ndo Estéfnas ko ndo Fortunato ko ndo Acaico, kuij sen bingijnana sen ixi ja anta jua i bake enta nti i.

¹⁸ Ko bake é juaxruxin ixi jian nichja na sen ko kaxon ja anta bake enta juaxruxin ko sen nche e xranchi nche e je e sen xrokonda tsajonni juasiени ngajin sen.

¹⁹ *Sen xra o ni ngo nunte Asia xruan annta sen juajna. Kaxon ndo Aquila ko jan Priscila ko sen xra o ndo a sen xruan annta sen juajna ixi juachaxien Ncháina.

²⁰ Kain sen kichuuna xruan annta sen juajna. Ko ndako nichje é kichuunta ko tjáanta chjéexin kichuunta juajna.

²¹ Jan an Pablo xruan annta juajna ko ixi tjáana ikjin xroon xruan annta.

²² Ngisen tjaun a Ncháina Jesucristo tangi tson en sen. Ko jaina, ndachrona: "iNcháina tuinxin tsji inta!"

²³ Juachaxien Ncháina Jesucristo sintanchaonnta.

²⁴ Tjua anta kainnta ixi kainna titika onna ndo Cristo Jesús. Jaña tson en.

Xroon yuxin tsikjin ndo Pablo xruen en ndo sen ste tjajna Corinto

Ndo Pablo kjin ndo xroon ngajin sen tjajna Corinto

¹ *Jan an, Pablo, apóstol nche e xrée ndo Dio, kuinchena ndo ixi sinta a ixra ngajin Ncháina Jesucristo, jan an ko ndo ndo kichuuna Timoteo ikjinna xroon ji i, xruan anna ngajinnta ti stenta ningue ndo Dio tjajna Corinto ko kaxon kain sen kichuuna titikaon Ncháina Jesucristo ste nchijíi nunte Acaya.

² Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Ndo Dio tingijnana ndo nchakon tangi tatsingana

³ Juasie ndo Dio, Ndotée Ncháina Jesucristo, tikonóajina ndo ko kain nchakon tingijnana ndo ixi juaxruxin tsinteena.

⁴ Je e ndo tingijnana ndo nchakon tatsingana juachjaon, ixi jaña kaxon tsingijnana ikaxin sen kichuuna, nchakon xrojan juachjaon xrochóna sen.

⁵ Jan anna tsango ijíe juachjaon chondana xranchi juachjaon kuichóna ndo Cristo, ko jaña kaxon ixi je e ndo jaña chondana juaxruxin.

⁶ Jan anna tangi stena ixi ja anta xrobake enta juaxruxin. Ndo Dio tingijnana ndo ixi jan anna tsjachana tsingijnananta kaxon, ko jaña ja anta chao tsatsinganta nge e tangi tson annta xranchi ti tangi tatsinga jan anna.

⁷ Ko nónona ixi nduaxin titikaonnta Ncháina Jesucristo, méxin síá jai tangi chondanta juachjaon xranchi jan anna, nónona kaxon ndo Dio tsingijnanta ndo xranchi bingijnana ndo jan anna.

⁸ *Kichuuna, tja onna tsono anta kain nge e tangi kuatsingana ti kuinteena nunte Asia. Tsango ijíe juachjaon kuachondana, méxin xraxa onna ndaxrokuen enna.

⁹ Jan anna konónana xranchi ndaxrokuen enna nti a. Ti tangi kónana me e juakonana ixi xrochuntia ina ngajin jan onna, xrokonda xrochuntiana ngajin ndo Dio, ndo nchexechón ni tsiken en.

¹⁰ Je e ndo bingijnana ndo kuatsingana kain juachjaon ko ngajin je e ndo chuntiana ko nónona kaxon ixi xratsingijnana ndo.

¹¹ Ja anta tingijnananta ti nichje enta ndo Dio ixi je e ndo tsingijnana ndo. Ko síá itsjé sen xronichje e sen ndo Dio, jaña kaxon itsjé sen tsajon sen juasaya ngajin ndo ixi je e ndo kuingijnana ndo.

Sonda jui a ndo Pablo tjajna Corinto

¹² Juaxruxin stena ixi nónona ndako junta ana ko xro an ngisen juintaya ana, kaxon ndako junta ana ngajinnta. Ko je a ixi juachaxinnana junta ana jaña. Na i. Juachaxien ndo Dio me e ti bingijnana junta ana jian.

¹³ Jan anna stekjinna xroon tsaye enta ko ti ikjinna tangi a tsienxinnta ko tja onna ixi tsienxinnta jian

¹⁴ Ixi jai ja anta ó tienxinnta naanchichjaon, ko nchakon xrokjan Ncháina Jesús tsake enta juaxruxin ixi jan anna jian juentakuan annanta, ko kaxon jan anna juaxruxin stena ixi ja anta jian kuitikaonnta.

¹⁵ Jan an xraxa on ixi sa ó xrojuasótsja anta ixi juaxruxin xrokuinteenta ixi ó yuxin xrobikon kichuuna.

¹⁶ *Méxin xraxa on xrojuasótsja anta nchakon saxrokjui nunte Macedonia ko kaxon nchakon xrokjanxinna nti a. Ko jaña ja anta xrobingijnantana saxrokjui nunte Judea.

¹⁷ ¿Á xraxaonnta ixi je a jian xraxa on nchakon ndachrjan sa ó ixi xrojuasó nti a? ¿Á xraxaonnta ixi jan an nta a xranchi ngixe i naa chujni ixi sa ó ndachrjan xrojuasó ko tjume e ina i?

¹⁸ Ndo Dio no e ixi je a jaña xraxa on xrojuanta a. Nchakon ndachrjan jaán, jaña tson en, ko nchakon ndachrjan na i, jaña tson en kaxon.

¹⁹ *Ixi ndo Silvano ko ndo Timoteo ko jan an juako ananta chijnie ndo Cristo Jesús, chjen en ndo Dio, nchakon bake ena nti a; ko je e ndo Cristo ncheya i ndo; ixi ti ndachro ndo me e nche e ndo.

²⁰ Ixi kain nge e tsichronga ndo Dio sinche e ndo, ndo Cristo kuitikaon ndo ko jaán nche e ndo kain. Méxin, nchakon nichjana ngajin ndo Dio ndachrona "Jaña tson en", ixi juachaxien ndo Cristo Jesús.

²¹ Ndo Dio tingijnana ndo jan anna ko ja anta ixi tsitikaonna ndo, ko je e ndo kuiya ina ndo ixi tjúá tsintee aséejina,

²² ko me e juako ndo ixi jaina tikinixin enna ndo, méxin, baxe e ndo chji e ndo ngajin jaina, me e Espíritue ndo chóna aséejina ixi jaña tsonojina nduaxin tsayé ena ti ndachro ndo tsajon ndo.

²³ Siá xrata i cha o ixi tjasotsja anta tjajna Corinto xranchi xraxa on, ndo Dio no e ndo ixi je a ixi tjaun a tsjaso. Na i, xrasatji a ixi tjaun a sintani a asáanta ixi tuinxin tjaso.

²⁴ Je a ixi xrokuetuan annta xranchi xrochuntianta Ncháina. Na i, ixi ó nóna ixi jian chuntianta ndo. Je o tja onna ixi tsingijnana ícha tsake enta juaxruxin.

2

¹ Tjaun a tsoni e asáanta, méxin, ndajuaso a ngajinnta.

² Ixi siá tsoni e asáanta, çtjume e ngisen xrochjána juaxruxin? ÇXronkanta ti kondanaxin jan an koni e asáanta?

³ Méxin, ikjin xroon xruan annta ko juaso a ngajinnta ixi tjaun a xrojuincheni enta aséenna. Jan an tja on ixi nchakon xrojuasó ja anta ko jan anna xrobake ena juaxruxin.

⁴ Ko nchakon ikjinna xroon xruan ananta, tsango jitoni e aséenna ko tsjanga kaxon. Ko je a ikjin xroon ixi kaxon xrokoni e asáanta. Na i, jaña junta a ixi tja on xrokono anta ixi tsango tjua anta.

Ndo Pablo íxraxaon a ndo nge e juinche e naa xi

⁵ Tjaun a ícha xronichja ixi xi juincheni e aséenna, ixi je e xa je a jan on juinchenina xa. Na i. Kaxon juincheni e xa aséen kain ja anta.

⁶ Kueyanta nichje enta xa ko koyakutéenta xa, ó chao, íxro an nge e ndachenta xa.

⁷ Jai ó nchemé enta ngaya asáanta ti ndako a juinche e xa ko tingijnanta xa, ixi ba kondeexin juachjaon me e tsitjáña aséen xa.

⁸ Tinóatána ngajinnta, tjako enta xa ixi nduaxin tjue enta xa.

⁹ Xroon sa ó kjin annta ixi tja on tsonóna á nduaxin kuitikaonnta nge e kuetuan annta.

¹⁰ Ko siá ja anta tjáña anta ti ndako a juinche e xa, kaxon jan an ó tjáña nge e juinche e xa. Méxin, siá xrojan ti ndako a juinche e xa, jan an ó tjáña me e, ixi ja anta jian tsinteenta. Ko ndo Cristo no e ndo ixi ndatjáña nge e juinche e xa.

¹¹ Ko jaña Xixron anxrée xro an nge e sinche e xa ngajin jaina ixi jaina ó nojna xranchi nche e xa.

Ndo Pablo bake e ndo tjajna Troas

¹² *Nchakon ikjui tjajna Troas ixi xrojuako chijnie Ncháina Cristo, konóna ixi je e ndo kuajon ndo juachaxin xrojuako chijnie ndo nti a.

¹³ Ko maski jii juachaxin, jii juachjaon ixi kuitja i ndo kichuuna Tito. Méxin, tuinxin ntatjan sen ste nti a satji nunte Macedonia ko tjume e sakjui.

Ndo Pablo tajon ndo juasaya ngajin ndo Dio

¹⁴ Juasie ndo Dio ixi je e ndo tingijnana ndo ko chondana juachaxien ndo Cristo Jesús. Ko kain ti no tjakona chijnie ndo, ixi ti tjakona xranchi naa nge e chaxro xraxe.

¹⁵ Ixi kain jaina chaxro xraxena xranchi naa tsjoxraxé tajon ndo Cristo tayé e ndo Dio ixi jaina tjakona chijni jian ngajin sen chóna juachaxin tsechón kain nchakon ko ngajin ni xratayé a juachaxin kaxon.

¹⁶ Ngajin ni chóna i juachaxin tsechón, ti chaxro xraxe me e xranchi xrokuenxin na. Ko sen chóna juachaxin tsechón, ti chaxro xraxe me e xranchi tajon juachaxin tsechón sen. ÇNgisen chao tsjacha sinche e íxra kuetuajina ndo Dio?

¹⁷ Ko jan anna tjancha ina tomi ixi tjakona chijnie ndo Dio xranchi nche e ikaxin na. Na i. Jan anna ixi nchijí aséenana tjakona chijnie ndo ixi je e ndo kuinchanana ndo sinta ana íxra ngajin ndo Cristo.

3

Natjúá cha o tsonchjiñe eni ngajin ndo Dio

¹ Ti ndachrjanna ixi jan anna jian tjakona, çá xraxaonnta ixi jan anna tsango ntajíe aséenana?, o, çá xraxaonnta xrokondanana naa xroon xronichja ixi jian jan anna?, o, çá xrokonda tjancha ananta naa xroon xrondachro ixi jian nta ana íxra, xranchi tjanchia ikaxin na?

² Na i, ja anta xrokjuinta xranchi xroon me e, jitjaxin ngajin aséenana ko me e tsichuxin chujni ko tsonoexin chujni ti jian nta ana.

³ Me e tsikonxinni ixi ja anta xrokjuinta xranchi naa xroon chrjiki anna tsikjin Ncháina Jesucristo tsonoexin chujni ixi ixra jian nta ana. Ko je a ixi ndana ó tsikjinxin ndo xroon me e. Na i. Je e ndo kuajon ndo Espíritue ndo ti jichón kuaye enta. Ko je a ngata a naa xro tsikjin ndo. Na i. Je e ndo tsikjin ndo ngaya aséen chujni.

⁴ Ko kain ji i nojna ixi nduaxin titika onna ndo Dio ko ndo Cristo tingijnana ndo.

⁵ Ko jua i xrondachrona ixi je o jaina chao sintu una naa ixra. Na i. Ndo Dio, me e ndo tingijnana ko chjaina ndo juachaxin, méxin, chao nche ena xra kuituan an ndo.

⁶ Je e ndo chjaina ndo juachaxin ixi sinche ena ixra ngajin ndo ko xra me e naa chijni natjúá juincheña ndo. Ko chijni ji i je a naa ley jitaxin. Na i. Ji i naa juachaxin kuajon Espíritue ndo Dio. Ixi ley me e teenxin chujni, ko Espíritue ndo tajon juachaxin stechón chujni kain nchakon.

⁷ Kondeexin ley bakeexin chujni ko ley me e jitaxin ngata a naa ixro ko tsango ijíe chjiixro bika o ley me e, méxin sen israelita jua i tsje e sen ngaya ikon ndo Moisés ixi tsango tóngíxin. Ko ti tóngíxin me e jitjexin.

⁸ Siá jaña bikon sen chjiixro me e, jai ícha tóngíxin chijni natjúá kuaye ena ixi juachaxien Espíritue ndo Dio.

⁹ Ko ley tsango tóngíxin me e banchekama ijíe tsenxin chujni; jai ícha jian ko ícha chaxro chijni ne e ndo Dio tsontjúáxin aséejna ko tsumé e ijíe chondana.

¹⁰ Méxin, ti ijíe juachaxin kuachóna ley íxro an tjintee xranchi ijíe juachaxin chóna chijni natjúá jai.

¹¹ Siá ley sa ó kuachóna ijíe juachaxin ko juachaxin me e yao juexin, jai ícha chóna ijíe juachaxin chijni natjúá tsake e kain nchakon.

¹² Ko jaina stechon enna nge e tsjexin a, méxin, xroxrakon ana xronichjana kain ji i.

¹³ Ko nta ina xranchi juinche e ndo Moisés, bijeexin ndo naa manta ngaya ikon ndo ixi tsikon a sen israelita ixi jitjexin ti jitóngíxin.

¹⁴ Ko sen israelita kuienxin a sen chijni me e ko hasta ti jai ti xranchekuanxin sen nge e kuetuen en sen ó sa ó, xranchi xrochonda sen manta jijeexin ngaya ikon sen ko tienxin a sen ti nchekuanxin sen. Ko je e sen tsienxin sen chijnie ndo Dio je o siá tsitikaon sen ndo Cristo, me e tsitjáña manta tsijijeexin ngaya ikon sen.

¹⁵ Ko ti nchakon jai ti nchekuanxin sen xroon tsikjin ndo Moisés tienxin a sen ixi xrajijexin manta ngaya ikon sen.

¹⁶ Ko nchakon naa ngisen taxi titikaon sen Ncháina Jesús, manta me e ísingakuen a manta.

¹⁷ Ncháina* Jesús me e Espíritue ne e ndo Dio. Ko ti no jii Espíritue ndo Dio, xro an nge e tije e.

¹⁸ Ko kain jaina íxro an manta jijeexin ikonna; jaina stena xranchi naa xrosenda tóngíxin ixi tjakona juachaxien Ncháina, ko je e ndo tindoxin ndo ti xraxaonna. Kain ji i ton en ixi ixra nche e Espíritue ndo Dio ngaya aséejna, ko jaña ícha ko ícha stena xranchi jii je e ndo.

4

Sen chronga chijnie ndo Cristo

¹ Ixi ndo Dio tsango bikonóa nana ndo ko chjánana ndo juachaxin sinta ana xrée ndo; méxin, tonchrje ana ko ícha nta ana xrée ndo.

² Xro an nge e imao nta ana, méxin tosuana ina, ko ntaya ina chujni ko tindoxin ana chijnie ndo Dio. Ndo Dio jian no e ndo ixi jan anna nichjana nge e nduaxin, méxin chao xrochuntia sen ngajinna.

³ Ko ni tienxin a chijnie Ncháina ti tjakona, ni me e tsitjáña na méxin tienxin a na.

⁴ Ko ni me e tienxin a na ixi xiña i tetuan an nunte xasintajni tsijije e xa ikon na ixi tsienxin a na ko tsikon a na xranchi tingasáña chijnie ndo Cristo ixi Ndo Cristo naxraje o xranchi ndo Dio xexi ndo.

⁵ Nchakon tjakona, je a tjakona ti xraxa on jan anna. Jan anna tjakona ixi tsitikaonnta ndo Jesucristo xranchi Ncháanta, ko jan anna nta ana ixra ixi tsingijnananta ixi tjua ana ndo Jesucristo.

⁶ Ko ndo Dio kuetuan an ndo ixi xro i tsingasáñaxin ti naxixe e, kaxon je e ndo juinchen-gasáña ndo ngaya aséejna ixi jaña xrochuxinna juachaxin ijíe chóna ndo Dio, juachaxin tingasáñaxin ngaya ikon Cristo.

Ixi chuntiana Ncháina Jesucristo me e jian tsojuna

⁷ Ko cuerponana jii xranchi naa ichi tsikónaxin ncheta o tjinga nge e tsango tjintee, ixi jaña tsjakoxinna ijíe juachaxin chjaina ndo Dio ko je a juachaxinnana.

* 3:17 Ncháina Señor Ncháina Jesús o Ncháina Dio

⁸ Maski xrojan nge e tangi tsatsingana, tonchrje ana. Maski xrochondana juachjaon, jan anna chuntiana ngajin ndo Dio.

⁹ Maski tengina na, ndo Dio tintuna ina ndo. Maski itsje nge e nchenana na ixi tjaunna tsjankana na, jua i sinchetjána na.

¹⁰ Ngixe i ti no itjina, tjakona ti tangi tatsingana xranchi tangi juinchekao na Ncháina Jesús ti kuen en ndo, ko ti titika onna ndo jai tjakoxinna ixi je e ndo jichón ndo gaya aséeina.

¹¹ Ixi jaina ti stechónna, kain nchakon chondana juaxrakon ixi tsen enna ixi titika onna ndo Jesús, ko kaxon jaña tsjakoxinna ti ijie juachaxin chónnda ndo.

¹² Méxin, jan anna steten enna ko ja anta xrochondanta juachaxin tsarichonnta.

¹³ Ixi jan anna xraje o chuntiana xranchi ndachro xroon chijnie ndo Dio tsikjin sen ó sa ó: “Kuitika on méxin, nichja”, ko kaxon jan anna kuitikaonna, méxin, nichjana.

¹⁴ Méxin, noina ixi ndo Dio, ndo juinchexechón Ncháina Jesús, kaxon sinchexechónna ndo jaina, ko tjume e ja anta ko jan anna satsiku una ndo ti tituan an ndo.

¹⁵ Kain ji i kon en ixi jaña jian tsintee ja anta. Ixi siá ícha kueya sen tsayé e sen juachaxien ndo Dio, jaña kaxon ícha itsje sen tsajon sen juasaya* ngajin ndo ixi je e ndo chónnda ndo kain juachaxin.

¹⁶ Méxin, tonchrje a aséenana maski jitjexin cuerponana, ndo Dio ícha sinchesoji ndo aséenana ngujngu nchakon.

¹⁷ Ko maski tangi tatsingana ngata a nunte nti i, ji i tsonchrjen a, tuinxin tsatsinga juachjaon ko kondeexin me e, ndo Dio xrochjaina ndo ijie juachaxin ti nai a tsjexin.

¹⁸ Méxin, ta ina juachjaon ixi nge e tangi tatsingana nunte xasintajni, ixi kain me e tuinxin tsatsinga. Ko xraxaonna nge e xratikon ana ixi ti tikonna tuinxin tsjexin ko ti nge e jian xratikon ana nai a tsjexin.

5

Nchia xrochondana ngajni

¹ Noina ixi cuerpoina jii xranchi naa nchia, ko cuerpoina me e tsjexin naa nchakon. Ko ndo Dio juinchekonchjian ndo naa nchia natjúá jii ngajni tsayé ena, ko nchia me e nai a tsjexin nchia ixi je a itja chujni tsikonchjianxin nchia.

² Ti xrastena nti i, tsango taabana ixi tjaunna xrochondana cuerpo natjúá jii ngajni.

³ Ko nduaxin xrochondana naa cuerpo natjúá ko jian sinchekitsáana ndo, je a turuchuna tsinteena nti a.

⁴ Ti xrochondana cuerpoina ji i, tsango taabana ko toni e aséeina ko je a ixi tjaunna tsintu ena cuerpo ntaxi. Na i, jaina tjaunna xrochondana naa cuerpo tsen a ixi tsechónna kain nchakon.

⁵ Ko je e Ndo Dio juinchéñana ndo ixi tjaun ndo tsayé ena inaa cuerpo natjúá, méxin kuajon ndo Espiritue ndo kuaye ena ixi jaña tsonojna ixi nduaxin tsayé ena nge e tsajon ndo.

⁶ Méxin jian chuntiana ko juaxruxin tsinteena ti xrochondana cuerpoina nunte nti i, maski xrasatsji ana ngajin Ncháina.

⁷ Ko maski jua i tikonna ndo, jaina chuntiana ngajin ndo.

⁸ Ko jaña chuntiana ndo, ícha jian xrokuintu ena cuerpoina ixi saxrokjuina ti jii Ncháina Jesucristo.

⁹ Méxin xrokonda ícha sinche ena ti tjaun Ncháina, siá xrastena nti i o na i,

¹⁰ *ixi kaina xrokonda tsonchjiñe ena ti sinchéñaxin ndo Cristo ijie ixi jaña ngujnguna tsayé ena nge e tikinixinna ixi á jian juinche ena o na i ti xrastena ngata a nunte nti i.

Chijni tajon juaxruxin tsinteena ngajin ndo Dio

¹¹ Ko jaina ó noina ixi xrokonda xrochonde ena ndo Dio juasaya, méxin ndachena chujni chijnie ndo ixi jaña je e na tsitikaon na ndo kaxon. Ko ndo Dio ó chuxinna ndo ko kaxon ja anta tja onna jian tsichuxinninta.

¹² Tjaun ana ixi xroxraon ja anta ixi tsango jian jan anna. Na i. Je o ndachrijanna ji i ixi jaña tsake enta juaxruxin ixi jan anna jian nta ana ko jaña xrochondanta nge e tsjate enta ngajin ni ndachro tsango jian nche e na ko je a nduaxin.

¹³ Ixi siá ndachro na tsijinchetjána janana, jan anna je o tja onna tsajonna juasaya ngajin ndo Dio. Ko siá je a nduaxin tsijinchetjána janana, méxin tja onna tsingijnananta ícha tsitikaonnta.

¹⁴ Ti tsango tjua ana ndo Cristo, me e tituen en aséenana ko nónana jian ixi je o je e ndo kuen en ndo ixi ti ndako a juinche e kain chujni, méxin jaina xranchi xrokue enna kaxon.

* 4:15 juasaya respeto, honor 5:10 Ro. 14:10.

¹⁵ Ko ndo Cristo kuenxin ndo ixi jaína, ixi jaína ti xrostechónna ísinche ana ti tjaunna. Xrokonda sinche ena nge e tjaun ndo ixi je e ndo kuen en ndo ko xechón ndo ixi jaína xrochondana juachaxin tsechónna kain nchakon.

¹⁶ Jai jaína íxroxaxaon ana á tjintee o na i inaa chujni xranchi kuaxraxaonna sa ó. Ko sa ó kuachuxinna ndo Cristo xranchi ngixe i naa chujni, ko jai í je a jaña chuxinna ndo.

¹⁷ Ixi ngisen titikaon ndo Cristo ikjan sen xranchi naa chujni natjúá ixi kain nge e juintu una sa ó ó komé e ko jai kain nge e ikjan natjúá.

¹⁸ Kain ji i ndo Dio juinche e ndo ixi kuajon ndo chjen en ndo xjan Cristo kuenxin xjan ixi jaína, ko jaña chao tsonchjiñe ena ti jii ndo ko kaxon chjaína ndo ixrā ixi xronichje ena chujni chijnie ndo ko jaña tsonchjiñe e ícha chujni ngajin ndo.

¹⁹ Ixi ndo Dio xruan an ndo ndo Cristo kuenxin ndo ixi jaína, ko jaña komé e ti ndako a juinche e kain chujni ko kotuaina ndo ixi jaína tsjakona chijnie ndo ngajin chujni nunte xasintajni ko jaña chao tsonchjiñe e na ngajin ndo.

²⁰ Jaína chondana juachaxien ndo Cristo ixi xronichjana chijnie ndo ko je e ndo tjancha anta ndo ixi tsitikaonnta chijni tjako annanta. Ko ixi juachaxien ndo Cristo tjancha ananta tonchjiñe enta ngajin ndo Dio.

²¹ Ndo Cristo xro an nge e ndako a juinche e ndo, ko ndo Dio bikon ndo xranchi ndo Cristo chónnda ndo ijie, ixi jaña xrokomé e kain ijie kuachónnda chujni ko jaña íxro an nge e sínká na.

6

¹ Jan anna xro nta a xrée ndo Dio, tjancha ananta ixi tjáña inta ti jian tjáanta ndo ko ti tsango tjua anta ndo.

² Tsindachro ndo Dio jitaxin chijnie ndo:
Nchakon kuincha anta ja anta, kuñ an ti juanchianta.
Ko nchakon kuajon juachaxin tsechón chujni,
nchakon me e kuingijnanta.

Ko nchakon me e jai,
jai nchakon ndo Dio sinchemé e ndo ti ndako a nche e chujni
ko tsajon ndo juachaxin tsechón na kain nchakon.

³ Tjaun ana ixi xrojān ngisen xrondachro ndakua i nta ana xra, méxin, ndakoa nta ana kain nge e.

⁴ Kain ixrā nta ana tjakoxinna ixi xrée ndo Dio nta ana, maski tangi tatsingana ko jan anna tokuaxinnana, maski itsjé juachjaon tatsingana ko chonda ina nge e xrokondanana,

⁵ *ko kónana na ko xraxin inna na ndo achjiso ko tsango itsjé ixrā juinta ana, ko ste kaxin nchakon juine ana ko kuarichrin ana.

⁶ Ko maski kain ñā juinchenana na, xro an ngisen xrondachro ixi ndakua i juinta ana ixi nóana nge e nduaxin, taka i chjánana juaña, ko jian nichja ana na ixi Espíritue ndo Dio jii ngajinna, ko nduaxin tjua ana chujni,

⁷ ko ixi juachaxien ndo Dio nichjana chijni nduaxin ne e ndo, ko nchakon tangi tatsingana, jian nichjana ixi jaña tjakoxinna nta ana ti jian.

⁸ Kaxin nchakon jian nichja nana na ko ikaxin nchakon na i. Kaxin nchakon nichja na kontranana ko ikaxin nchakon na i. Ko maski nichjana nge e nduaxin, je e na ndachro na ixi ntayana.

⁹ Ko maski kaxin nchakon chuxin ana na ko ikaxin nchakon jian chuxinna na. Ko kaxin nchakon tangi tatsingana ixi tjaun na tsóñana na ko xrustechónna. Tjaya na ngajinna ko xratjacha i na naatsóñaxónna na.

¹⁰ Maski jítōni e aséenana, jan anna juaxruxin stena. Xranchi ni nóa stena, ko tjá ana chujni naa chijni tsango tjintee, ko xranchi xro an nge e xrochondana, ko jan anna chondana kain nge e.

¹¹ Kichuuna ti stenta tajna Corinto, jian nichja ananta ko ntatjunanta ti nduaxin nge e jii ngaya aséenana.

¹² Jan anna tsango tjua ananta. Ko ja anta je a nduaxin tjaunnanta.

¹³ Tinóatána ngajinnta, xranchi naa ndotata tinóatée ndo ngajin chjen en ndo, tjeñauinta xranchi jan an tjua anta.

Jaina ningue ndo Dio, ndo jichón

¹⁴ Titexin anta ngajin naa ni titikaon a Ncháina Jesucristo ixi je a naxraje o xraxaonna. Me e jii xranchi kuxinta je a nataonxin nche e ba ixrā nchakon ti te ba. Ko jaña kaxon je a naxraje o naa nge e jian ko naa nge e ña i. Ko je a xraje o ti tingasaña ko ti naxixe e.

¹⁵ Jua i tsjento ndo Cristo ngajin Xixron anxrée ko jua i tsekao kichuu naa ni titikaon ndo Cristo ko naa ni titikaon a ndo.

¹⁶ *Jaina ningue ndo Dio, ndo jichón, ko siá ndo Dio jii ngajinna, jua i tsitikaonna ngajin naa idolo, jaina tikinixinna ningue ndo Dio ko je e ndo tsindachro ndo:

Jan an tsake é ko tsajiki an sen,

ko jan an ndo Dio ne e sen

ko je e sen tsikinixin en sen tjajnána.

¹⁷ Méxin, kaxon jaña tsindachro Ncháina:

Tachrxjinnta ti ste ni titikaon a na najan an

ko xro an nge e tjúá i itsenta,

me e tsake enta ngajin.

¹⁸ Ko jan an Ndotánta,

ko ja anta chjan na, xjan xi ko xjan nchri,

jaña ndachro Ncháina Dio, ndo chóna kain juachaxin.

7

¹ Kichuuna tsango tjua anta, ko nojna xixi tsayé ena naa nge e tsajon ndo Dio, méxin, xrokonda tjúá xrochondana cuerpojna ko aséejna, ko tsintu ena kain nge e sinchekitjana, ko jaña xrochonde ena ndo Dio juasaya ko tsitikaonna ndo.

Sen kichuuna ste Corinto ó kuindoxin sen

² Taya nananta ngaya asáanta xixi xro an ngisen juintani ana, ko xro an ngisen juintaya ana.

³ Ndachrxjan i ji i xixi sintakamanta ijie. Na i. Ó sa ó ntatjunanta xixi tsango tjua ananta, jai ti xrastechónna hasta tsijija nchakon tsen enna.

⁴ Tsango chuntia ngajinnta ko tsango stena juaxrxin xixi nge e nche enta, ko tsango chá nana maski tangi stena ngata a nunte xasintajni.

⁵ *Xra nchakon juasona nunte Macedonia tjokéna ina xixi nti i, nda a jii chujni ningakonana ko tsango xronkana.

⁶ Ko ndo Dio, ndo tajon juaxrxin tsake e aséenna, kuajon ndo juaxrxin bake e aséenana xixi kuji ndo Tito.

⁷ Ko je a je o xixi kuji ndo Tito bake ena juaxrxin. Na i. Kaxon xixi konónana xixi juaxrxin bake e ndo ngajinnta ko ndo Tito ndachijina ndo xixi tsango tjaunnta tsikonnanta ko chronga ndo xixi tsango stehiinta xixi nge e juinche enta ko tsango taanta juachjaon xixi jan an. Hora kuji an ji i, tsango bake é juaxrxin.

⁸ Ko xroon kjin annta sa ó me e juincheni e asáanta ko jai ya i juachjaon. Ko sa ó jan an kua juachjaon xixi nge e kjin annta xixi konóna xixi nge e ndachrxjan juincheni e asáanta kaxin nchakon.

⁹ Ko jai ritjén juaxrxin, je a xixi ja anta koni e asáanta. Na i, juaxrxin ritjén xixi ti koni e asáanta me e kuindoxin nge e xraxaonnta ko ti kokuaxin annta ti koni e asáanta me e juinchexrxin en ndo Dio. Méxin, ti kjin annta xroon, xro an ti ndako a juanta anta.

¹⁰ Xixi ti toni e aséenni xranchi tjaun ndo Dio me e tindoxin aséenni ko jaña tomé e ijie chónani, ko ti ncheni e aséen chujni kondeexin nge e jii ngata a nunte xasintajni me e tjacha tóña chujni.

¹¹ Ja anta kukuaxi annta juachjaon tjáanta ndo Dio, me e juinche e ndo juaxrxin ko jai jian stenta ko jian xraxaonnta xixi jan an xro an ijie chóna, me e ja anta kuingsinaninta xixi tsango tjaanta juafiao ko xronkana xixi xrojan nge e xrokon en. Méxin tjaunnta xrobikonnta ko xrojuinchejenganta na ngisen ndako a juinche e ko jaña ja anta juakoxinnta xixi xro an ijie chondanta kondee nge e kon en.

¹² Nchakon kjin annta xroon, je a xixi rixraxa on ngisen ndako a juinche e, ko je a xixi rixraxa on ngisen koni e aséen. Na i. Jaña juanta a xixi ja anta xrojuakoxinnta ngajin ndo Dio xixi tsango kuaanta juachjaon xixi jan anna.

¹³ Ko jaña juinche enta, méxin, juaxrxin stena.

Ko icha bake ena juaxrxin xixi tsango jian bake e ndo Tito ngajinnta xixi ja anta bingjianta ndo.

¹⁴ Jan an ntatjan ndo Tito xixi juaxrxin stena xixi ja anta juinche enta ti jian, méxin tosuana ina kain nge e ntatjanna ndo Tito. Ko kaxon kain ntatjanna ndo Tito nduaxin me e ko kaxon kain nge e ntatjunanta nduaxin ko jaña stena juaxrxin.

¹⁵ Ndo Tito tsango juaxrxin jii ndo xixi ja anta tsango kuitikaonnta ndo ko kuaye enta ndo jian, méxin icha tjua anta ndo.

¹⁶ Tsango juaxrxin ritjén xixi nóna chao xrochuntia ngajinnta.

8

Jian tsingijna kichuuna

¹*Kichuuna, tja onna tsono anta xranchi sen titikaon Ncháina nunte Macedonia juako sen xranchi ndo Dio bingijna ndo sen.

²Maski itsjé juachjaon kuatsinga sen, ko maski nóa sen, juaxruxin bake e sen ko bingijna sen xranchi nduaxin xrochóna sen itsjé tomi.

³Jan an nóa ixi nduaxin kuajon sen ti chóna sen ko hasta ti chóna i sen kuajon sen ixi jaña kuachrxjin aséen sen.

⁴Ko kuinóatée sen ngajinna ixi tsajonna juachaxin tsingijna sen sen titikaon ndo Dio.

⁵Ko ícha tsango bingijna sen; je a xranchi jan anna xraxa onna; sa ó kuitikaon sen ixi nchijí aséen sen ngajin Ncháina Jesucristo, ko tjume e kuitikaon sen ngajinna xranchi tjaun ndo Dio.

⁶Méxin, kuinóatánana ngajin ndo Tito ixi tsja o ndo tomi ngajinnta xranchi juangíxin ndo juinche e ndo ó sa ó.

⁷Jian nóa ixi tsango jian nche enta kain nge e: jian chuntianta Ncháina Jesucristo, jian nchekuen ennta sen chijnie ndo Dio, ícha no anta chijnie ndo, ko tsango chá anta ko tjaunninta. Ko jai ícha jian tingijnanta sen kichuuna.

⁸Je a ritituan annta sinche enta ji i. Na i. Je o tja on tsono anta xranchi tingijna sen kichuuna ngajin ikaxin sen kichuuna, sen ícha nóa, ixi jaña ja anta kaxon ícha tsanginta tsingijnanta ko xrotjue enta sen.

⁹Ja anta no anta ixi Ncháina Jesucristo, je e ndo kuachóna ndo kain ti tjintee, ko ixi tsango tjua anta ndo, méxin, kuij ndo nunte xasintajni ko ikjan ndo xranchi naa ni nóa ixi jaña ja anta xrochondanta kain ti tjintee.

¹⁰Ja in xrontatjunta nge e xraxa on ixi ji in. Nano kuatsinga ja anta sa ó kuaxi kuajonnta, ko tsango juaxruxin bake enta ixi kuajonnta.

¹¹Jai xratajonta xranchi juangíxixin kuajonnta ó sa ó; juaxruxin tájonnta ti chondanta.

¹²Siá tjaunnta tsingijnanta sen kichuuna ixi jaña bake enta ngaya asáanta, ndo Dio take e ndo juaxruxin siá tájonnta nge e chondanta ixi ndo Dio tjanča i ndo nge e chóna i chujni.

¹³Tjaun ana ixi tsingijnanta inaa sen ixi ícha xrochonda sen ko ja anta xrochonda inta. Jan anna tja onna ixi nataonxin xrochondanta.

¹⁴Jai ja anta chondanta, méxin chao tsingijnanta sen chóna i. Nchéxin tsij nchakon je e sen xrochóna sen ko tsingijnanta sen kaxon, ko jaña nataonxin tsingijna kichuunta.

¹⁵Xranchi ndachro xroon chijnie ndo Dio: “Sen jua o kueya nge e, xro an nge e ti jua o sen xe e, ko sen xro an itsjé jua o, xro an nge e titjáfe e sen.”

Ndo Tito ko sen chrikao ndo

¹⁶Ko juasie ndo Dio ixi je e ndo bake e ndo ngaya aséen ndo Tito yaa ndo juachjaon ixi tsingijnanta ndo xranchi jan an kaxon yaa juachjaon ixi ja anta.

¹⁷Ko je e ndo bake e ndo juaxruxin ixi sinche e ndo ti kuetuan anna ndo, ko jai je e ndo tjaun ndo tsiji ndo, tsitsja anta ndo.

¹⁸Kaxon ndo Tito tsijikao ndo naa ndo kichuuna, ko kain sen titikaon Ncháina chúxin sen ndo ixi jian juinche e ndo ixra ti tjako chijnie ndo Dio.

¹⁹Ko kain ni ngo kuinche e sen ndo ixi kaxon tsiki anna ndo nchakon tsjasokianna tomi juakana. Kainna xronta ana ixra ji in, titika onna ko chonda ana ndo Dio juasaya ko tja onna tsono anta ixi nduaxin sinta ana ji i.

²⁰Ko tjaun ana ixi xrojan ngisen xronichja ixi ndakua i junta ana ixi tomi xraka.

²¹Ko je o tja onna sinta ana nge e jian, ixi jaña Ncháina tsake e ndo juaxruxin ko kaxon jaña tsikon chujni ixi jian nta ana ixra.

²²Kaxon xruan anna inaa ndo kichuuna tsijikao sen. Je e ndo jian juinche e ndo itsjé ixra. Ko jai ícha tjaun ndo tsingijna ndo ixi tsango chuntia * ndo ngajinnta.

²³Xraxaonnta ixi ndo Tito, ndo tjento, tingijnana ndo ixra nta ana ngajinnta. Ko sen yuu tsijikao ndo, sen ni ngo kuinche e sen ixi tjaun sen tsiji sen ngajinnta ko jaña tsajon sen juasaya ngajin ndo Cristo.

²⁴Méxin, nche enta nge e jian ngajin sen xruan annta ixi jaña tsikon sen ni ngo kuinche e sen ixi nduaxin tjue é kichuunta ko tsono e sen ixi nduaxin nge e nichjana ixi ja anta.

9

Tomi xra o tsingijna sen kichuuna

¹Ti xra o tomi ixi tsingijnanta sen kichuuna titikaon Ncháina, íxrokonda i xrokjin anta ícha,

² Ixi sa ó konóna ixi ja anta tjaunnta xrobingijnanta sen, méxin chá na ko ntatjan sen kichuuna ste nunte Macedonia ixi ja anta, sen nunte Acaya, xra nano kuatsinga tjaunnta xrobingijnanta sen nóa. Ko sen kichuuna nunte Macedonia tsango tjaun sen tsingijna sen kaxon ixi ja anta sa ó juako enta sen.

³ Méxin, xruan an kaxin sen kichuuna tsiji sen ixi tja on tsikon sen ixi nduaxin ja anta ó stechon ennta ixi tsajonnta nge e tsingijnaxinnta chujni ixi jaña beki a sen.

⁴ Nchéxin xrojan sen kichuuna nunte Macedonia tjaun sen tsjasokianna sen ko ja anta xra tjao anta tomi. Ko me e tsosua ñana ixi sa ó ndachrjanna ixi ja anta tsango tjaunnta tsingijnanta ko jan anna chuntiana ixi jaña sinche enta.

⁵ Méxin, xraxa on ícha jian sa ó xroxruan an sen kichuuna ngajinnta ixi tsingijnanta sen ti xroxra o tomi tsindachronta. Ko jaña tsikonni ixi ja anta tsango tjaunnta tsingijnanta sen nóa ixi tjue enta sen ko je a ixi jan anna tetuan anna sinche enta me e.

⁶ Xraxaonnta ixi ngisen tajon a itsjé, kaxon xro an itsjé tayé e sen, ko sen tajon kueya, kaxon kueya tayé e sen.

⁷ Méxin, ngujngu ja anta tájonnta nge e xraxaon asáanta, ko sinchenié a asáanta nge e tájonnta ko je a ixi xrokonda tsajonnta, ixi ndo Dio tjue e ndo sen juaxruxin tajon xrojan nge e.

⁸ Ixi jaña Ndo Dio ícha sinchenchaonnta ndo ko tsajon ndo kain nge e xrokonda anta ixi jaña kaxon chao tsingijnanta ikaxin chujni.

⁹ Xranchi ndachro xroon chijnie ndo Dio:

Sen tonchjeya nge e chónnda sen ngajin ni nóa,

kain nchakon xroxraxaon chujni ti jian juinche e sen me e.

¹⁰ Ixi ndo Dio tajon ndo tsee tengani ko tajon ndo nge e sineni, ko je e ndo xrotjáanta ndo kain nge e xrokonda anta ko je e ndo ícha tsajon ndo, me e xrochondanta itsjé nge e ko jaña tsingijnanta ni nóa.

¹¹ Ndo Dio xrotjáanta ndo kain nge e tjintee xrochondanta, jaña ja anta kaxon chao itsjé nge e tsajonnta. Ko jan anna tsiki anna tomi me e ko jaña ícha itsjé sen kichuuna tsajon sen juasaya ngajin ndo Dio ixi tomi tsajonnta.

¹² Ixi tomi tsingijnaxinnta sen kichuuna, je a je o ixi sen kichuuna xrochónnda sen nge e xrokonde e sen. Na i, kaxon ixi jaña ícha tsajon sen juasaya ngajin ndo Dio.

¹³ Ko kaxon je e sen ícha tsajon sen juasaya ngajin ndo Dio ixi nge e kuajonnta ixi jaña tjakonta nduaxin titikaonnta chijnie ndo Cristo. Jaña kaxon ícha ijíe juasaya xrochónde e sen ndo Dio ixi ja anta bingijnanta sen ko ikaxin chujni.

¹⁴ Ko je e sen xronichje e sen ndo Dio ixi ja anta ixi je e sen tjua anta sen ko ixi tikon sen ixi ndo Dio jian tingijna ndo ngajinnta.

¹⁵ Juasie ndo Dio ixi juinchekitojna ndo naa nge e tsango tjintee, me e ti tomé e jíeeni, ko tsikixian ina tsekina kain ti chjaña ndo.

10

Juachaxin kuajon ndo Dio ngajin ndo Pablo

¹ Jan an Pablo tinóatáana ngajinnta ixi ndo Cristo, ndo tsango jian ko tsango tjuajna ndo, ste kaxin ña ndachro ña ixi nchakon ritjén ngajinnta je a ntajíe aséenna, ko nchakon ritjén ikjín, tsango tojiena.

² Méxin, nchakon tsjasotsja anta tjancha anta nche anta ixi tsojéna ngajin kaxin ni ndachro ixi jan anna tja onna tsjachana xrojan nge e, xranchi nche e ni nunte xasintajni.

³ Nduaxin jan anna stena nti i nunte xasintajni, ko maski jaña, ntai ana ti nge e ndako a xranchi nche e ni titikaon a ndo Dio.

⁴ Ko tjaya ina ixi chika, chika tjayaxin chujni nunte nti i. Na i. Jan anna nta ana xrojan nge e ixi juachaxien ndo Dio, ko juachaxin me e chao tjankaxinna kain xra nche e Xixron anxrée.

⁵ Ko jaña kaxon tjankana ixra nche e ni tjaun a ixi ikaxin chujni tsichuxin ña ndo Dio. Ko ixra nta ana ixi kain ni chónnda ijíe tsindoxin ña ti ndakua i xraxaon ña ko tsitikaon ña ndo Cristo.

⁶ Ko jan anna tsuyakutéena chujni tsitikaon a ndo Cristo ixi jaña tsitikaon ña ndo, ko jaña kainnta jian tsitikaonnta kaxon.

⁷ Ja anta je o titikaonnta nge e tikonnta. Ko ngisen xraxaon ixi nduaxin tikinixin ndo Cristo, tsono e sen ixi kaxon jan anna tikinixinnana ndo xranchi sen me e.

⁸ Siá tsango nichja ixi richonda juachaxin tsituan an, tosuana i. Ncháina Jesucristo chjána juachaxin me e ixi jaña ícha xrochuntianta ndo, ko je a ixi me e tsitjáñaxinnta.

⁹ Ko ti kjin annta xroon xruan annta, tjaun a xroxraxaonnta ixi me e xroxronkanta,

¹⁰ Ixi ste kaxin sen ndachro sen ixi ti ikjin xroon tsango toña o ngajinnta, ko nchakon ritjén ngajinnta xronkana ko kain ti nichja tjinte a.

¹¹ Ko ngisen jaña nichja, tsono e sen ixi ti nchakon ikjin xroon xruan annta ko ritjén a ngajinnta, jaña kaxon tsjasotsja anta naxraje o xronichja anta xranchi ikjin xroon xruan annta.

¹² Nai a xroxaxa onna ixi tsango jian nichjana xranchi ste ikaxin na jaña nche e na. Kaxin chujni xraxaon na ixi je e na tsango tjintee na ko ikaxin na noe a na, ni me e tsango ninta xraxaon na.

¹³ Kaxon jua i sintajié aséenana ixi nge e nta ana. Ndo Dio me e ndo xrondachro nge e sinta ana ko ngajin ja anta sinta ana ixra me e.

¹⁴ Jua i ntaxruantana ixi ícha tituan anna, ko chao xrondachrjan ixi jan an sa ó juaso ngajinnta ko juako anta chijnie Ncháina.

¹⁵ Ko jua i sintaxruanta ixi jan an junta a ixra juinche e inaa ngisen. Jan anna tja onna ixi ícha xrochuntianta Ncháina, jaña jan anna ícha sinta ana ixra ngajinnta ko je o ti tsituannana.

¹⁶ Kaxon tja onna tsjakona chijni jian ne e Ncháina Jesucristo íkaxin tjajna ti xraxro an ngisen itji tjako ixi jaña xro an ngisen xrondachro ixi jan anna ntexruantana naa xra tsijinche e inaa ngisen.

¹⁷ Ko siá xrojan ngisen tjaun sinchejié aséen, chao sinchejié aséen sen je o ixi titikaon sen Ncháina Jesucristo.

¹⁸ Ixi ndo Dio nichja ndo jian ixi naa ngisen ndako juinche e ko chao a ixi xrojan ngisen je o sen sinchejié aséen sen ixi ndachro sen jian nche e sen.

11

Ndo Pablo ko sen nduaxin a apóstol

¹ Tja on tsin ennta nge e xrondachrjan maski xronichja xranchi naa sen ninta.

² Ndo Dio nchenóna ixi tsaxinta juachjaon ixi tja on tsintue anta ndo Cristo. Jan an ó ntatjan ndo Cristo ixi tsaya anta ndo xranchi naa nchrichajan tsixranchia ixi tsute e ko tjúa aséen ko cuerpoe nchrichan ixi tsii nchakon tsute e nchrichan ngajin naakua naa ndoxi e nchrichjan.

³ Ko xronkana ixi xranchi kunchee tsango ña i juincheye e ba jan Eva; ko ba jaña sinchekachruenta ba ti xraxaonnta ko ti jian titikaonnta ndo Cristo.

⁴ Ixi siá tsii xrojan ngisen tjako inaa ndo Cristo, ko inaa espíritu ko inaa chijni ti je a juako jan anna, ja anta tintu enta ni me e nche e na ti tjaun na ko me e ja anta nta anta juaxruxin.

⁵ Ko jan an je a ícha nuntena ixi ni ndachro apóstol na, ni nandá kuij, ni ndachro ícha tjintee, ni rué e ja anta.

⁶ Ko maski je a ícha jian nichja jan an, nduaxin ícha nóna chijnie ndo Dio ko ó itsjé vez juako anta ixi ícha nóna.

⁷ ¿Á ndako a junta a jan an nchakon juako chijnie ndo Dio ngajinnta ko juanchia i ninaa tomi ngajinnta?, ko juntajié a aséenna ixi jaña ja anta ícha xrokuiteenta.

⁸ Ko jan an kuayá a tomi chjána sen kichuuna, sen jii ikaxin ni ngo, ko tomi me e kondana ixi jintakuan an ja anta.

⁹ *Ko nchakon bake e ngajinnta, xrokondana tomi, ko xro an nge e juanchia anta. Ko kain nge e kondana, sen kichuuna nunte Macedonia chjána sen ixi tjaun a kuajondaxin ixra ngajinnta ko jaña jai tsajonndaxin a xra ngajinnta.

¹⁰ Ko jian nóna ixi chuxin chijni nduaxin ne e ndo Cristo, ko xro an ngisen nchijí nunte Acaya tsantsjena juaxruxin chonda.

¹¹ ¿Sonda ndachrjan ja in? ¿Á ixi tjaun anta? Ndo Dio no e ndo ixi tsango tjua anta.

¹² Ko xrajaña sinta a tsanchia i tomi ngajinnta ixi tjaun a ixi jaña ni nduaxin a apóstol sinchejié aséen na ixi stencheye e na chujni ixi je e na ndachro na tikinixin en na ndo Cristo ko xraje o ixra nche e na xranchi jan anna.

¹³ Ni me e je a nduaxin apóstol na. Je e na stencheya na ixi ndachro na tikinixien en na ndo Cristo.

¹⁴ Ko kain ji i sinchexronka ina ixi nojna ixi kaxon Xixron anxrée ndachro xa ixi je e xa naa ángel tingasáña ko je a nduaxin.

¹⁵ Jaña kaxon ni nche e xrée Xixron anxrée ncheya na ixi ndachro na jian xra nche e na. Ko nchakon tsjexin kain nge e, tangi tson en na ixi ndakua i juinche e na.

Tangi ton en ndo Pablo ixi ixra apóstol nche e ndo

¹⁶ Íjngo ntatjunta: Tjaun a xrondachronta ixi juintatjáña jáana, ko maski jaña xrokron en, tintunanta xronichja ixi jaña chao sintajíe aséenna naa nchúin.

¹⁷ Síá jaña ntajíe aséenna naa nchúin, ndachrjan i ji i ixi juachaxien Ncháina. Na i. Jaña jan an ndachrjan xranchi xrokjui nduaxin xrojuinchetjáña jáana.

¹⁸ Ste itsjé ni nchejíe aséen ixi nge e no e na, ¿sonda jua i kaxon jan an sintajíe aséenna?

¹⁹ Ko ja anta ndachronta ixi no anta ko juaxruxin taye énta ni nduaxin tsijinchetjáña jaa.

²⁰ Ko ja anta tokuaxinnta tituan annta na ko ntajinta anta na ixra ko tjenga inta na na, tantsja anta na nge e chondanta, ntaya anta na, ko tande e na itun गया ikonnta.

²¹ Maski tosua na jan an xrondachrjan ixi jan anna juinta ina jaña.

Ko ti nchejíe aséen na, jan an kaxon chao sintajíe aséenna, ko ndachrjan ji i xranchi naa ni tsijinchetjáña jaa.

²² Je e na chujni hebreo na. Kaxon jan an. Je e na chujni israelita na. Kaxon jan an. Je e na kuachrjenixin na ndo Abraham. Kaxon jan an kuachrjenixin ndo Abraham.

²³ *¿Á je e na nche e na ixra ngajin ndo Cristo? Jan an nduaxin nta a ixra ngajin ndo Cristo, maski je a jian jan an xrondachrjan. Jan an ícha juinta a ixra, jan an ícha bija na na ndo achjiso, jan an ícha bikaon na ko itsjé vez ndáxrokron enna.

²⁴ Na ó vez ni judío juaya na ngajin; ikántena kóñana na ixi ino.

²⁵ *Níi vez ni tituan an tjanya Roma juaya na ngajin ixi ntasé, naa vez kuaxina na ixro. Níi vez konunte ntábarco ngangí nda, ntábarco ritiki an, naa vez naa tiie ko naa nchakon bake é jan on ngusine ndachaon.

²⁶ *Íkjín no kuaji. Tangi kuatsingatu a ndajitinga, ko naa nchakon ngakona xiche e. Kuatsinga itsjé juachjaon ngajin ni tjanána ko kaxon ni je a tjanána, ko kaxon ti bakji tjanya, ntajíe ko ndachaon ko kaxon xrokóñana na, ni nduaxin a titikaon Ncháina Jesucristo.

²⁷ Tsango juinta a ixra ko itsjé nge e tangi kónna. Itsjé tiie kuarichrin a jian ko itsjé nchakon kuatse jinta, kuen enna inda ko kuachónnda i itsjé manta tsaria, méxin tsango bakongína.

²⁸ Ko maski kain ji i kónna, nai a tjáñana ixi kain ni ngo ko ngujngu nchakon tsango kua juachjaon ixi kain sen xra o ni ngo.

²⁹ Ngisen toni e, ko, ¿á jan an tonina í? Nchakon xrojan ngisen nche e naa nge e ti ndakua i ngajin sen kichuu sen, taa juachjaon ko toña o.

³⁰ Síá chao sintajíe aséenna, sintajíe aséenna ixi soji ana.

³¹ Ndo Dio, Ndotée Ncháina Jesucristo, ngisen tikinixin en kain juasaya,* no e ndo ixi nduaxin nge e ndachrjan.

³² *Nchakon bake é tjanya Damasco, xi baketuen en nti a, xi rey Aretas, kuetuan an xa ixi xrotséna na hora tsachrjexin tjanya ko xrobikaana na ndo achjiso.

³³ Ko sen kichuuna juankayana sen गया naa ntaxrakaxro ko juinchexingajinxinna sen ti jii naa ventana jichónnda tjatu o jii ngandajin tjanya, ko jaña sabinga ko itsé ana na.

12

Nge e ijíe bikon ndo Pablo

¹ Xro an nge e tjachani xronichjani ixi jian je eni. Maski, xrokonda xronichja ko tseki anta nge e bikon ko nge e juinchenóna Ncháina Jesucristo.

² Chuxin naa xi titikaon Ncháina ko chónnda tenoó nano íkjui xa ti núnxin ngajní. Nóna i á cuerpoe xa o aséen xa bikon ko ixi juachaxien espiritue ndo Dio. Je o ndo Dio no e nge e nduaxin kon en.

³ Ko nóna ixi xi me e íkjui xa; nóna i á ixi cuerpoe xa o na i; je o ndo Dio no e ndo.

⁴ Ndo Dio bikao ndo xa ngajní, nti a kuin en xa kaxin nge e tienxin ani ko xro an ngisen chónnda juachaxin xronichja me e.

⁵ Jan an xrojuintajíe aséenna ixi chuxin xi me e, a kondée nge e juinta a jan an, jua i sintajíe aséenna, je o chao xrondachrjan kondée nge e tangi kónna.

⁶ Síá xrojuintajíe aséenna je a ixi juintatjáña jáana. Na i. Ixi nduaxin nge e jian juinta a ko sinta i me e ixi tjaun a xroxraxaon sen ixi ícha nóna. Na i. Cháña je o sintaxraxa on sen nge e nta a ko nge e tin en sen ti juinta a.

⁷ Ixi ti bikon, ti juakona ndo Dio, tsango chaxro me e, méxin tsango xrojuintajíexin aséenna. Ko sinta i me e, ixi kuayá a naa ichin ntau na ko xinhexrée Xixron anxrée tsango ncheni e xa ntau na ixi jaña sintajíe a aséenna.

⁸ Méxin ó níi juanchía a Ncháina Jesucristo tsantsjena ndo ichin me e,

⁹ ko Ncháina ja in ndachijina ndo: “Xro an nge e ícha xrokonda a; je o ti tsango tjua a, ixi ti tsango ijíe juachaxin chonda jan an, ícha tonoxin juachaxin nchakon naa chujni ícha soji a.

Juachaxin chónda jan an tonoxin nchakon jua i nche e ja ua.” Méxin, juaxruxin tsake é nchakon soji ana ixi jaña ícha juasaya tsayé e Nchána Jesucristo.

¹⁰ Ko méxin, ícha juaxruxin ritjén nchakon soji ana, nchakon chujni tjakaxin na ngajin, nchakon xro an nge e chonda, nchakon tengina na, nchakon yaa juachjaon ixi kondée Nchána Cristo; nchakon soji ana, nchakon me e ícha tonsoji aséenna.

Ndo Pablo taa ndo juachjaon ixi sen kichuuna tjajna Corinto

¹¹ Ndako tsijintatjáña janáa nchín ixi nichja nge e jian junta a. Ja anta chondanta ijje ixi ja anta xrokonda jian xronichjanta ixi najan an. Ko jan an je a ícha nuntena ixi xi apóstol kuintekij, xi ja anta nta anta juaxruxin rue énta, maski jan an xro an tjinteena.

¹² Ti konchrje ana junta a ixra ngakjen ennta ko kain ixra ijje ko kain ixra chaxro junta a ixi juachaxien ndo Dio ixi jan an nduaxin naa apóstolna.

¹³ Ko kain ja anta nge e ti ícha juntanunnta ixi íkaxin sen kichuuna jii ikaxin ni ngo, ixi sen jaán bingijnanana sen. Ko jan an tjaun a bingijnaninta ixi tjaun a xrokuajonntaxin xra ngajinnta. Tjáña anta ti ndako a junta a ixi juanchia inta xrobingijnaninta.

¹⁴ Jai ó richon an ixi tsjasotsja anta nínxin vez ko jai kaxon tsajonndaxin a xra ngajinnta ixi jan an tjée a tsayá a tomianta. Na i. Jan an tjée ja anta ixi ja anta ícha tjinteenta. Ixi je a ichjan tjatsin in xjan tomi tsayé e ndotée xjan. Na i. Ndotata me e ndo xrokonda tsjatsi in ndo tomi tsayé e xjan.

¹⁵ Ko jan an tsango ijje juaxruxin chonda ixi sintexianxin tomina ixi ja anta, ko jan an kaxon, maski ícha taka tsondaxína, ixi sinta a ixra ngajinnta ixi jan an tsango tjua a asáanta, ko maski jan an ngujngu nchakon ícha tjua anta ko ja anta ícha tjaun antana.

¹⁶ Ko maski kaxin sen ndachro sen ko titikaon sen ixi jan an kuajondaxin a xra ngajinnta ko ikaxin sen me e kaxon ndachro sen ixi jan an tsango nóna ntaya me e imao kuantjsa anta tomianta.

¹⁷ ¿Á juntaya anta nchakon xruan annta xrojan ngisen tingijnana?

¹⁸ Nchakon ntatjan ndo Tito xrokuijitsja anta ndo, je e ndo ko inaa ndo kichuuna, ndo Tito, ¿á juntaya anta ndo? ¿Á nduaxin a ixi kayui jan anna xraje o jian ixra nta ana ko xraje o Espíritue ndo Dio nta axinna xra?

¹⁹ Ja anta stexraxaonnta ixi jan anna nichjana ja in ixi tja onna ja anta xroxraonnta ixi jian jan anna, ko je a nduaxin me e. Na i. Jan anna ja in nichjana ko ixra rinta ana jitikon ndo Dio ko Nchána Cristo, kain me e nta ana ixi tja onna ícha tsitikaonnta Nchána Cristo ixi tsango tjua ananta.

²⁰ Jixronkana ixi nchéxin nchakon tsjasotsja anta, stenche anta xranchi jan an tja on ko kaxon ja anta já sinta inta juaxruxin xranchi xronichja jan an. Nchéxin stetetoku u kichuunta, tochjuya anta nge e chónda inaa sen kichuunta, stetoña e kichuunta, stenchejé asáanta, stetjakaxin kichuunta ko stencheke to kichuunta.

²¹ Jixronkana ixi nchakon tsjasotsja anta, jan an tsango tsosua na ngajinxin* ndo Dio ko xrotsjanga ixi kondaxin ja anta ixi xratintue anta kain ti ndako a kuanche enta, ti chondanta nchri je a janchri anta ko xi je a ndoxi anta.

13

Juexin kuetuan an ndo Pablo

¹ Jai ó nínxin vez tsjasotsja anta. Xraxaonnta nge e ndachro chijnie ndo Dio: Kain nge e tsochjian xrokonda tsake e yuu o níi sen bikon nge e kon en.

² Ó sa ó ntatjunta ko jai íngo ntatjunta maski ritjén a ngajinnta, ja in tsikjin ngajin sen ndako a nche e ko sen kaxin ixi ti nínxin tsjaso jai tsango tsoña e sen ndako a nche e.

³ Ko nduaxin ja anta tjaunnta tsono anta á nduaxin nichja jan an ixi juachaxien ndo Cristo. Je e ndo nduaxin tsoña e ndo ko nduaxin sintaña anta ndo ijje.

⁴ Je e ndo juako a ndo juachaxien ndo ti kuen en ndo nganito ntácrú, ko je e ndo jichón ndo ixi juachaxien ndo Dio, jaña kaxon jaina kuasoji a asééjna, ko jai juasie ndo Dio ixi juachaxien ndo, kaina stéchónna ko nta ana ixra ngajinnta.

⁵ Xraxaonnta, ¿á chao stenta?, ko, ¿á nchijí asáanta chuntianta Nchána Jesucristo? O, ¿á tonoa inta ixi ndo Jesucristo jii ndo ngajinnta?, o, ¿á nduaxin a kuaye enta ndo gaya asáanta?

⁶ Ko tja on tsono anta ixi nduaxin jan anna titika onna Nchána Jesucristo.

⁷ Tjancha ana ndo Dio ixi xro an nge e ndakua i stenche enta ko tjaun ana ixi xron-dachrjanna ixi jian juntakuan annanta. Na i, jaña ndachrjanna ixi tja onna sinche enta ti jian maski xrondachro ikaxin na ixi jan anna je a jian juakona.

* 12:21 ngajinxin delante de

⁸ Jan anna xro an sinta ana ixi tsoomé e ti nduaxin. Ko kain nge e sinta ana me e ícha tsichuxinnta ti nduaxin.

⁹ Tsango chá nana ixi ja anta xraxaonnta ixi jan anna soji ana, ko ja anta tsango sojinta. Ko jan anna tjancha ana ndo Dio ixi ja anta ngujngu nchakon ícha jian tsitikaonnta ndo.

¹⁰ Méxin, ja in kjin annta jai ti ritjén ikjín ixi nchakon tsjasotsja anta xrokonda i ícha tsuyakutéenta. Ixi jan an chonda juachaxin, juachaxin chjána Ncháina, ko juachaxin me e xrokonda tsingijnaxinnta ixi ícha tsitikaonnta ndo ko je a ixi sincheni e asáanta.

¹¹ Jai kichuuna, take énta juaxruxin, tingijna kichuunta ixi jian tsinteenta, naxraje o xraxaonnta, tetokui a kichuunta ko ndo Dio, ndo tsango tjaunna ko chjajna juaxruxin, tsake e ndo ngajinnnta.

¹² Chje é kichuunta juajna ko kainnta chonde enta kichuunta juasaya.

¹³ Kain sen titikaon Ncháina ste nti i xruan annta sen juajna.

¹⁴ Juachaxien Ncháina Jesucristo, ti tjua anta ndo Dio ko juachaxien Espiritue ndo tsake e ngayá asáanta kainnta. Jaña tson en.

Xroon tsikjin ndo Pablo xruen en ndo sen ste tjajna Galacia

Ndo Pablo ikjin ndo xroon kuayé e ni ngo nunte Galacia

¹ Jan an, Pablo, Ncháina Jesucristo kuinche ena ndo nta a xrée ndo Dio ko je a chujni nunte nti i kuinche ena. Na i. Jan an kuinche ena ndo Jesucristo ko Ndotáina Dio, ndo juinchechón ndo Jesús.

² Jan an ko kain sen kichuuna steki an nti i xruan anna juajna ngajin sen ni ngo nunte Galacia.

³ Ndotáina Dio ko Ncháina Jesucristo sinchenchaonnta ndo ko juaxruxin tsake enta.

⁴ Ndo Jesucristo kuenxin ndo ixi jajna ixi xrokuitjáñaxin ana kondeexin nge e ña i jii nunte xasintajni ixi jaña jueñaó Ndotáina Dio.

⁵ Ndotáina Dio tikinixin en ndo kain juasaya kain nchakon. Jaña tson en.

Naáko naa chijni nduaxin, tsechonxinni

⁶ Jan an tsango chonda juachjaon ixi ja anta taka jitjáña anta ti kuetuan an ndo Dio, ndo kuiya anta ixi tsango tjua anta ndo Cristo, ko jai ja anta rirue énta inaa chijni ti xraxaonnta tsoxéxin jánta.

⁷ Ko je a nduaxin jii inaa chijni tajon juachaxin tsechónna kain nchakon. Na i. Jan an ndachrjan ixi kaxin na tjaun na sintaya antana ko jaña tsindoxinnta chijni tjintee ne e ndo Cristo, chijni tajon juachaxin tsechónxinni kain nchakon.

⁸ Ko siá xroxan ngisen o jan anna o naa sen ángel tsí xín ngajni sintakuan annta inaa chijni xrondachro sen tsachrjengéxin ti ndakua i juinche enta, ko je a xraje o ti juintakuan annanta, sen me e tsitsingata a sen nchijí jíee ndo Dio.

⁹ Ko ó sa ó ndachrjan ko jai i jngo: Siá naa chujni sintakuan annta naa chijni je a xraje o chijni tachrjengéxin ti jíe sinkani, ti ja anta ó kuaye enta, ni me e ndo Dio tsjankata a ndo na ijíe kain nchakon.

¹⁰ Ko jai, ¿á tja on jan an ixi chujni tsitikaon na nge e nta a o ndo Dio tsitikaon ndo?, o, ¿á tja on ixi chujni sinche e juaxruxin nge e nta a? Siá me e xrokjuinta a jan an, í je a naa nchexrée ndo Cristo jan an.

Ndo Dio kuinche e ndo ndo Pablo

¹¹ Kichuuna, jan an ntano anta ixi chijni tajon juachaxin toméexin ti sínká chujni ti juintakuan annta, chijni me e je a naa chujni juincheña chijni.

¹² Ko jan an xro an chujni cháina chijni ko xro an ngisen juinchekuanna. Na i, Ndo Jesucristo juinchenóna ndo chijnie ndo.

¹³ *Ja anta ó kuin ennta nge e juinta a ó seno, ti jan an batitika on ley ne e sen judío, méxin kuarua a ko bakon in sen baktitikaon chijnie ndo Cristo ko tja on xrokuitjáña sen.

¹⁴ *Ko jan an nchakon baktitika on ley ne e sen judío, jan an ícha baktitika on ixi kain sen tjajnána, sen yaxinki an nano, ko ícha banta a nge e tsiketuan an sen tachri ina xranchren.

¹⁵ *Ko nchakon jueñaó ndo Dio, je e ndo kuinche ena ndo ti xrariao tse e janána ko tsango jueñaona ndo méxin kuiya na ndo.

¹⁶ Ko je e ndo Dio juakona ndo Chjen en ndo ixi jan an xrojuintekuan an chijnie xjan ngajin chujni je a judío. Ko nchakon me e jan an xro an chujni juanchangi a á sinta a xrée ndo o na i.

¹⁷ Ko juí a ngajin sen sa ó banche e ixra xranchi apóstol, sen jii tjajna Jerusalén. Jan on tuinxin sakjui nunte Arabia, ko tjume e ikjanna tjajna Damasco.

¹⁸ *Ko kuatsinga ní nano, tjume e sakjui Jerusalén ixi tsichuxin ndo Pedro ko nti a bake e tena ó nchakon.

¹⁹ Ko bikon a ikaxin sen apóstol; je o bikon ndo Jacobo, ndo kichuu Ncháina.

²⁰ Ndo Dio jitsje e ndo ixi nduaxin nge e ikjin.

²¹ Tjume e sakjui no tjajna Siria ko tjajna Cilicia.

²² Ko sen kichuuna titikaon Ndo Cristo ste ni ngo Judea xranai a chuxinna sen.

²³ Je o tsikin en sen ixi ngisen tjaun sa ó xrokóñaxón sen ko barué e sen ko tjaun naaxrokuitjáñaxón chijni me e, jai je e ndo tjako ndo chijni tajon juachaxin tsechónxinni, ko chronga ndo ixi xrochúntiani Ncháina.

²⁴ Ko kuajon sen juasaya ngajin ndo Dio ixi jan an ó titika on Ncháina Jesucristo.

2

Sen sa ó kuayé e ixrā apóstol kuayé e sen ndo Pablo

¹ *Kuatsinga tenoó nano, tjume e íjngo sakjuí tjanya Jerusalén ko sabiki an ndo Bernabé ko kaxon ndo Tito.

² Jan an ikjui nti a ixi ndo Dio juako na ndo ixi xrokonda itsji tjanya Jerusalén, ko imao juao je o sen ícha tituan an, sen tjako chijnie Ncháina ko ntatjan sen nge e tjako a sen je a judío. Jaña nichja ixi tjaun a xrondachro sen xruenxon junta a ixrā ko jaña tsikonni ixi naakua naa nge e tjakona.

³ Ko ndo Tito, ndo chrjiki an, je e ndo tjanya griego ndo, juinchekateya i sen ndo ixi xrokua ndo chji e ni judío.

⁴ Maski kaxin sen ndachro ixi kichuuna sen ko je a nduaxin. Ni me e imao tsijike e na ngakjen en sen kichuuna ixi stesaya na xranchi tajonni juasaya* ngajin ndo Cristo ko ti tjaun na íjngo xrokjanna tsitikaonna ley. Ni me e tjaun na xrokua sen kichuuna chji e ni judío.

⁵ Ko ninaa nchiín kuitikaon ana sinta ana ti ndachro na ixi tjaun ana tsintu enta chijni tajon juachaxin tsechónni kain nchakon.

⁶ Ko sen ni ngo titaan en sen kichuuna, xro an nge e natjúá juako na sen. Ko jan an kondana i á nduaxin tituan an sen o na i ixi jan an nóna ixi ndo Dio tinche a ndo kaxion chujni ixi á no e o á noe a.

⁷ Ko sen tituan an, je e sen kuitikaon sen ixi jan an kuetuanna ndo Dio sintakuan an chijni jian ni je a judío, xranchi kaxon ndo Pedro kuituen en ndo sinchekuen en ndo ni judío.

⁸ Ko ndo Dio xruan an ndo ndo Pedro xranchi apóstol sinchekuen en ndo sen judío, ko je e ndo Dio kaxon xruan ana ndo xranchi apóstol ne e ni je a judío.

⁹ Méxin, ndo Jacobo, ndo Pedro ko ndo Juan, sen me e tituan an sen kichuuna, kuitikaon sen ixi ndo Dio chjána ndo ijíé juachaxin tsjako chijnie ndo. Ko chjána sen itjáa sen ko juinche e sen juaxroxin ixi jan an ko ndo Bernabé itsjina sintakuan ana ni je a judío ko je e sen sinchekuen en sen ni judío.

¹⁰ Je o juanchianana sen xrotjáana ina ixi tsingijna sen nóa, ko me e ícha nta ana, kain nchakon tjingijnana sen nóa.

Ndo Pablo kuyakutee ndo ndo Pedro

¹¹ Ko nchakon kuiji ndo Pedro tjanya Antioquía, jan an kuyakutee ndo ixi je a jian jinche e ndo.

¹² Ixi ícha sa ó banekao ndo ikaxin sen kichuuna, sen je a judío, ko nchakon kuiji kaxin sen kichuuna xruan an ndo Jacobo, sen judío, ndo Pedro ó konchjino ndo ko i bajinekao a ndo sen je a judío ixi xrakon en ndo sen kichuuna judío, sen titikaon ixi xrokonda tsaani chji eni.

¹³ Ko sen kichuuna judío kaxon juinche e sen xranchi ndo Pedro, ko kaxon ndo Bernabé jaña juinche e ndo.

¹⁴ Ko nchakon bikon jan an ixi stenche a sen xranchi nchekuainana chijni jian ne e Ncháina, ntatjan ndo Pedro ko stetin en kain sen ni ngo: "Ja a judíoa, ko rinche e xranchi nche e ni je a judío ko kaxon nche a xranchi sen judío. ¿Xranchi tjaun sinchekateya sen je a judío sinche e sen xranchi sen judío?"

Tsechonna síá je o xrochuntiana ngajin Ncháina

¹⁵ Jajna xra jungíexonnna judíoa, je a xranchi ikaxin ni tjanya jii ngata a xasintajni, ni je a judío, ni ndako a nche e.

¹⁶ *Ko noína ixi chujni jua i tsomé e jíee na síá tjaun na sinche e na kaxin xrā xranchi ndachro ley. Na i. Je o tsomé e ijíé síá xrochuntiana ndo Jesucristo. Kaxon jajna titika onna ndo Jesucristo, jaña me e tsomé e jíeina ixi chuntiana ndo Jesucristo ko je a ixi sinche ena ixrā ndachro ley ixi síá tsitikaonna ley, jua i tsomé e jíee chujni.

¹⁷ Síá tjaunna ixi Ndotáina Dio sinchemé e ndo jíeena ixi titika onna ndo Cristo, ko tjume e tikonni ixi chondana ijíe. A me e xrondachro ixi ndo Cristo nchekateyana ndo sinche ena ti ndako a. Na i, je a jaña.

¹⁸ Síá ó kuintu ena ti tetuan an ley ko tjume e ikjan tsitika onna ley, me e ché nduaxin tsamana ijíe.

¹⁹ Ko jan an ixi ti tituan an ley ndakuen enna ko jai ley í jua i tsituanna ixi jai tsarichon ixi juachaxien ndo Dio.

²⁰ Ixi kuen enna xranchi kuen en ndo Cristo nganito ntacru ko jai jan an í tetuan i ngaya aséenna. Na i, jai ndo Cristo tituan an ndo. Ko jai ti nta a, nta a xranchi chujni stechón,

ixi chuntia ngajin chjen en ndo Dio, ndo Cristo, ixi je e ndo tjua na ndo ko kutuexin ndo kuen en ndo ixi jan an.

²¹ Ko jan an jua i xrondachrjan ixi xro an tjintee juachaxien ndo Dio, ko jan an titika on ixi juachaxien ndo Dio bingijnana, ixi siá kondeexin ti tetuan an ley xrokoméexin ijie, me e íxro an tjintee ti kuen en ndo Cristo ixi jaina.

3

Tsitikaonni ley o xrochúntiani ndo Cristo

¹ Kichuuna tjajna Gálatas, tsango nintana. ¿Ngisen juintaya anta ixi í tsitikakon anta chijni nduaxin? Jan anna juako ananta jian xranchi kuenxin ndo Cristo nganito ntáçru.

² Tjate enta, ¿á kuayéeximnta Espíritue ndo Dio ixi kuitikaonnta ley tsiketuan an ndo Moisés?, o, ¿á kuaye enta Espiritu ixi kuitikaonnta chijni jian kuin ennta?

³ ¿Sonda tsango nintana? Siá ó kuitikaonnta chijnie ndo Dio ixi juachaxien Espíritue ndo, ¿sonda jai tjaunnta xrochuntianta nge e xraxaon ja anta, a me e sinchemé e ti ndakua i juinche enta?

⁴ ¿Á xro an juinta anta ti tangi kon annta nchakon kuitikaonnta chijni jian ne e ndo Cristo? Xrokonda xraxaonnta ixi je a xruenxon.

⁵ Nchakon ndo Dio kuajon ndo Espíritue ndo ko juinche e ndo itsjé nge e jian bikonta, ¿sonda jaña juinche e ndo? Juinche e ndo ji i, je a ixi tsango kuitikaonnta ley. Na i. Jaña juinche e ndo ixi chuntianta chijni jian kuin ennta.

⁶ *Ndo Abraham chuntia ndo ndo Dio, méxin ndo Dio ndachro ndo jian ndo Abraham.

⁷ *Méxin, xrokonda tsono anta ixi sen nduaxin chuntia ndo Dio, sen me e nduaxin chjen en ndo Abraham.

⁸ Xroon jitaxin chijnie ndo Dio tsichronga ó seno ixi ndo Dio kaxon xrojuinchemé e ndo jíee sen, sen je a judío ixi chuntia sen ndo Dio. Jaña sa ó ndo Dio tsindache ndo ndo Abraham: “Kainxin chujni tjajna tsonchaonxin na ixi ja a chuntiana.”

⁹ Méxin, kain sen chuntia ndo Dio xraje o tsonchaonxin sen xranchi ndo Abraham ixi chuntia ndo.

¹⁰ Kain sen xraxaon ixi tso méxin jíee sen ixi tsitikaon sen ley tsikjin ndo Moisés, sen me e ndo Dio tjankata a ndo sen ijie ixi ndachro xroon chijnie ndo Dio: “Kain ni tsitikaon a kain nge e jitaxin ley, ni me e tsjankata a ndo Dio ijie.”

¹¹ Méxin, ngisen tjaun tsitikaon ley jua i tomé e ti ndako a nche e sen ngajin ndo Dio ixi nduaxin ndachro xroon jitaxin chijnie ndo Dio: “Sen tsonjtúá aséen ixi chuntia* sen ndo Dio, sen me e tsechón sen kain nchakon.”

¹² Ko ley ndachro a ixi xrochúntiani ndo Dio. Ndachro xroon chijnie ndo Dio: “Ni titikaon ley ixi ley me e tsechónxin na.”

¹³ Ndo Cristo kuantsjexinna ndo ti xrobikaonxinna kondee ley. Ndo Cristo kuenito na ndo ntáçru kondeexin jiejna. Ixi ndachro xroon chijnie ndo Dio: “Ndo Dio tsjankata a ndo ijie kain ni tenito naa ntáç.”

¹⁴ Jaña kon en ixi ti tsindachro ndo Dio, tsonchaon ndo Abraham, ko kaxon tsjacha ni je a judío tsonchaon na ixi je e na kuenxin ndo Cristo Jesús. Ko jaña kaina tsayé ena Espíritue ndo Dio ixi chuntiana ndo ixi jaña tsindachro ndo.

Ley ko nge e ndachro ndo Dio xrokuayé e chujni

¹⁵ Kichuuna, ndachrjan naa nge e xranchi naa chujni. Nchakon naa chujni tsijnchekonchjian naa xroon ndachro ngisen tsayé e kain nge e chónða na, ko xroon me e siá chónða firme na, í jua i tomé e o tsindoxin.

¹⁶ Méxin, ndo Dio tsindache ndo ndo Abraham ixi tsajon ndo naa nge e tsayé e chujni juachaxin tsachrjenixin ndo. Ko xroon chijnie ndo Dio nichja i ixi kain chujni tsayé e na me e. Na i. Ndachro ixi naa ndo tsachrjenixin ndo Abraham tsayé e juachaxin me e, ko me e, ndo Cristo.

¹⁷ Ti ndachrjan me e: Ndo Dio tsindache ndo ndo Abraham naa nge e nduaxin tsayé e ndo, ko ji i xranchi naa xroon chónða firme ndo Dio. Ko kuatsinga noó ciento ko ikánte nano ko tjume e kuji ley ne e ndo Moisés. Ko ley me e jua i sinchemé e nge e tsindachro ndo Dio ó sa ó ko xrondachro a ixi tjinte a.

¹⁸ *Ko siá xrokitikaonna ley me e, ixi xrokuajon ndo Dio nge e ndachro ndo, me e í tjinte a nge e tsindachro ndo ó sa ó. Ko ndo Dio tsindache ndo ndo Abraham ixi nduaxin tsayé e ndo naa nge e ixi je e ndo Abraham chuntia ndo ndo Dio ko me e xro an nge e xroxenka na.

¹⁹ Méxin, ¿nge e tsonda ley tsikjin ndo Moisés? Ndo Dio tsikajon ndo ley me e ixi tsonoexin na ti ndako a kuanche e na. Ji in tsochrje en tsija ngisen tsachrjenixin ndo Abraham, naa sen tsikinche e ndo Dio, ko jaña xroxetja ti tsindachro ndo Dio. Ko ley me e tsichronga sen ángel ko ndo Moisés je o tsikjin ndo.

²⁰ Ko xro an ngisen nichjaxin ndo Dio ngajin ndo Abraham ixi ndo Dio je o ndo nichje e ndo ndo Abraham.

Sonda bake e ley

²¹ Ko, ¿á ley tingakuenxin ti nge e ndachro ndo Dio tsajon ndo? Na i. Siá xrobake e naa ley xrokuajon juachaxin tsechónxinni kain nchakon, ko me e xrokoméexin jjeina siá xrokuitikaonna nge e tetuan an ley me e.

²² Ko xroon jitaxin chijnie ndo Dio ndachro ixi ti ndako a nche e chujni me e tituan an गया aséen. Ko jaña je o sen chuntia ndo Jesucristo, sen me e tsayé e sen ti ndachro ndo Dio tsajon ndo.

²³ Ko ti xrachonda ina ndo Cristo, ley baketuaina stechuenjana xrokonoxin ti xrochuntiana Ncháina Jesucristo.

²⁴ Ko ley me e baketuaina xranchi naa chujni tetuen en ichjan ti tsija Ncháina Cristo. Ko jaña chuntiana ndo Cristo me e chao tsonchjiñe ena ngajin ndo Dio.

²⁵ Ko jai ó kuji ndo Cristo ko jaña chuntiana ndo, méxin ley inai a tsetuajna.

²⁶ Méxin jai kainnta chuntiana ndo Jesucristo, jai kainnta ó chjen en ndo Dio ja anta.

²⁷ Ko kainnta ti bikitéexinta nombre ndo Cristo, jai nche enta xranchi nche e je e ndo.

²⁸ Méxin jai, í tjinte a á ni judío o ni je a judío, o á ni nche e ixra o á ni tetuan an o á ni xi o ni nchri. Kainna chjen en ndo Diona ixi naakua ndo Cristo tikiñixinna.

²⁹ *Ko ti tikiñixin enna ndo Cristo, me e nduaxin tsikachrjenixinna ndo Abraham ko tsayé ena nge e tsindachro ndo Dio tsajon ndo.

4

¹ Ti tja on xrondachrjan me e ji i. Naa chjan nchakon tsikitu e xjan nge e kuachónnda ndotée xjan, xjan me e xranchi naa ni nche e ixra jii xjan, ixi xrachjan xjan, maski nduaxin je e xjan tituen en xjan kain nge e.

² Ste ni tayakon en xjan ko tayakon en na ixra ne e xjan tsitjaja nchakon tsindachro ndotée xjan tsayé e xjan kain nge e tikiñixin en xjan.

³ Ko jaña bakon en ngajinna kaxon nchakon xrakuichuxin ana ndo Cristo, jaña bati-tikaona kain nge e tajon nunte xasintajni.*

⁴ Ko kuitjaja nchakon tsindachro ndo Dio, xruan an ndo Chjen en ndo kuji xjan, jongéexin xjan naa nchri, ko je e xjan kuitikaon xjan kain nge e tituan an ley kuayé e ndo Moisés.

⁵ *Jaña kuji xjan ixi sinchemé e xjan ti ndako a juinto una ixi baketuaina ley me e. Ko jaña ndo Dio kuayeina ndo xranchi chjen en ndo.

⁶ Méxin, ndo Dio ixi tsjakoxin ndo ixi jaña chjen en ndo, xruan an ndo Espiritue Chjen en ndo, ndo Jesucristo, ixi xrochondana Espiritu गया aséeina, ko Espiritu me e tiyexinna ndo: "Ndotána ja anta."

⁷ Méxin ja anta chjen en ndo Dio, je a naa xi nche e xra tetuan i ko ja anta ó chjen en ndo Dio méxin tikiñixin annta tsaye enta kain ti chonda ndo Dio ixi titikaonnta ndo Jesucristo.

Ndo Pablo yaa ndo juachjaon ixi sen titikaon Ncháina

⁸ Ja anta sa ó kuachuxin anta ndo Dio, méxin bakitikaonta naa dio je a nduaxin dio.

⁹ Ko jai ó kuichuxinnta ndo Dio, o ícha jian xrondachroni ixi je e ndo chúxinnta ndo. ¿Xranchi íjngo xrokjannta xroxaxaonnta ti kuanche enta ko me e íjngo tsindoxin ti xraxaonnta?, me e jaña xrokjannta xranchi naa xi nche e xra tituen en na.

¹⁰ Ja anta xrotjaunnta titikaonnta nchakon ko nchanitjao ko nano ko kiée ngujngu nchakon.

¹¹ Jan an ríaa juachjaon ko rixraxa on ixi ti juintakuan annta xro an konda.

¹² Kichuuna, nche enta xranchi jan an jian titika on Ncháina ixi jan an jian jui i ngajinnta ko nta a xranchi ja anta ko ti kuanche enta, xro an ti me e juinchenina.

¹³ Ko ja anta ó no anta ixi nchakon ntajtunta chijni tajon juachaxin tsechónni, jan an ríaa naa chin nchakon me e.

¹⁴ Ko ichin kuachonda tsango tangi bake é ko ja anta kuinduna ininta. Na i. Ja anta jian kuiyananinta xranchi xrokuji naa sen ángel ne e ndo Dio o xranchi xrokuji ndo Jesucristo.

¹⁵ Ko jai, ¿no jii ti juaxruxin kuachondanta? Ko chao xrondachrjan ixi nchakon me e ja anta xrokuantsjengínta naa ikonnta ko xrochjánanta.

¹⁶ Ko jai, ¿á ikjanna naa xi ningakon ennta ixi ntajtunta nge e xrondachro chijni jian?

¹⁷ Ni ntakateyánta tsitikaonnta ley íjngo, je e nã tsango jian nichja anta nã. Ko je a nduaxin me e ixi je e nã tjaun nã tsantsjendantana, ko tjume e ja anta xrorué enta nã.

¹⁸ Ko chao tsiye eni kaxin sen kichuuni siá je o sinche eni ti jian ngajin sen. Ko nduaxin nichje enta sen kichuuna kain nchakon; je a je o nchakon ritjén jan an.

¹⁹ Chjan na, íjngo jinchenína ixi ja anta xranchi naa nchri jinchejongí e chjen en, ko jaña tson en hasta ti jian tsitikaonnta ndo Cristo ngaya asáanta.

²⁰ Jai tuinxin xrojueña o xrobake é ngajinnta ko chaxro xronichja anta, ko jai nóna i nge e ícha xrondachrjan.

Juakoxin ndo Pablo ixi nchri Agar ko jan Sara

²¹ Ja anta ti tjaunnta tsitikaonnta ley chronga ndo Moisés, ndachijininta, ñnge e ndachro chijnie ndo Dio ixi ndo Abraham?

²² Ko ja in ndachro ixi ndo Abraham kuichónnda ndo yuu chjan. Naa xjan ngajin nchri nchexrã ko naa xjan ngajin janchri e ndo.

²³ Chjen en nchri nchexrã jongí e xjan xranchi tjongí e kain chjan. Ko chjen en janchri e ndo jongí e xjan ixi jaña xrokron en nge e tsindachro ndo Dio xrokuaon ndo.

²⁴ Chijni ji i tjako ixi yuu nchri tjakoxin yuu chijni tsindachro ndo Dio. Naa chijni konchjianxin ijnã Sinaí; chijni me e xrondachro ixi nchri Agar, me e kuachrjenixin sen nche e xrã, sen tituan i.

²⁵ Ixi nchri Agar xranchi xrokjui ijnã Sinaí jii nunte Arabia ko jnã ji i xranchi xrokjui tjajna Jerusalén, ko tjajna me e kain chujni ste nti i ko xrokonda titikaon nã ley, je e nã ko chjen en nã.

²⁶ Ko tjajna Jerusalén jii ngajni ti no tituan i ley, me e tjajnaina.

²⁷ Ko ndachro xroon chijnie ndo Dio:

Take é juaxruxin ja a nchri ti jua i nchejongí e ichjan.

Tuyakua ixi tsango chá a ixi ja a kuichuxin a ti tangi tíin nchri nchejongí e ichjan.

Ixi nchri tsikintu e ndoxi e, ícha itsjé chjen en nchra

ixi nchri chónnda ndoxi e.

²⁸ Kichuuna, jaina stena xranchi ndo Isaac ixi kain jaina chjen en ndo Dio ixi jaña tsindachro ndo tson en.

²⁹ Ko xranchi sa ó chjen en nchri Agar, baningakon en xjan, xjan jongíexin ixi juachaxien Espíritue ndo Dio, xjan ndatin in Isaac, chjen en jan Sara. Ko jaña jiton en jai.

³⁰ Ko ndachro xroon chijnie ndo Dio tsindachro ndo ndo Abraham: “Tengia nchri nche e xrã, satsji nchra ko kao chjen en nchra, ixi chjen en nchra jua i tsayé e xjan nge e tikinixin en chjen en jan chónnda ndoxi e.”

³¹ Méxin, kichuuna, jaina je ana xranchi chjen en nchri Agar nche e xrã. Na i. Jaina stena xranchi chjen en jan Sara chónnda ndoxi e.

5

Ndo Cristo juinchemé e ndo ti ndako a juinche enta

¹ Ndo Cristo juinchemé e ndo ti ndako a juinche ena ko jai ley í jua i tetuajna. Méxin, jian titikaonnta ndo Cristo ko tintue anta ixi ley tsetuan annta íjngo.

² Tin ennta, jan an Pablo, ndachrjan ixi siá xrokuaanta chji e ni judío, me e íxro an xrokuite ti tsitikaonnta ndo Cristo.

³ Tja on xrondachrjan íjngo ixi siá xrojan chujni tsaa chji e ni judío, ni me e xrokonda tsitikaon nã kaxon kain nge e tituan an ley kuayé e ndo Moisés.

⁴ Ko ja anta ti xra xraxaonnta ixi siá titikaonnta ley me e tsooméxin jíanta, ja anta xranchi ó xrokuuntu enta ndo Cristo ko ti tjua anta ndo Dio.

⁵ Ko jaina ixi juasie Espíritue ndo Dio ko ti chuntiana ndo, me e, nojna ixi tsechónna kain nchakon* ixi ó komé e jieina.

⁶ Ko siá jaina chuntiana ndo Jesucristo, í tjinte a siá chondana o chonda ina chji e ni judío. Ko ti ícha tjintee, me e ti xrochuntiana Ncháina Jesucristo, ko ti chuntiana me e tsingijnana tsinteena jian ko xrotjee e kichuuna.

⁷ Ja anta ó jian stetitikaonnta. Ko jai, ñngisen juntakateyanta ixi ítsitikaon anta chijni nduaxin?

⁸ Ji i je a nge e tjaun ndo Dio, ixi je e ndo kuiya anta ndo.

⁹ *Jian xraxaonnta ixi naa nchichjaon ti nchetja in chu u, me e nchetja in kain chu u.

¹⁰ Jan an chuntia ixi Ncháina tsingijnanta ixi tsindoxin anta nge e xraxaonnta. Ko ndo Dio tsjankata a ndo ijje ngajin ngixe i ni ntekateyanta tsitikaon anta jian.

* 5:5 tsechónna kain nchakon vida eterna 5:9 1Co. 5:6.

¹¹ Kichuuna, siá jan an xrondachrjan ixi xrokonda xrokuaanta chji e ni judío, ni judío xroningakona ina nã. Ko kaxon xroningakuen a nã chijni jian juako anta chronga xranchi kuen en ndo Cristo nganito ntacru.

¹² Ko ni ntakateyanta tsaanta chji e ni judío, cháña je e nã naa xrochrjinxón nchijji e nã.

¹³ Ja anta kichuuna, ndo Dio kuincha anta ndo ixi ítsama inta ijje. Méxin, nchekateya i asáanta siche enta ti ña i. Cháña tingijnanta ko tjue enta sen kichuunta.

¹⁴ Ixi kain ti tituan an ley, me e xrondachro naakua nge e tsitikaonnta: “Xrotjue enta sen kichuunta xranchi tjue enta asáanta.”

¹⁵ Ko siá ja anta to in kichuunta ko ningakon en kichuunta, jian xraxaonnta ixi basinchetjáña ngujngu asáanta.

Xranchi titikaonni Espíritue ndo Dio

¹⁶ Jan an ntatjunta ji i: Nche enta xranchi tjaun Espíritue ndo Dio, ko jaña tsitikaon anta nge e tjaun cuerpoanta ko sinche anta ti ña i.

¹⁷ *Ixi nge e ña i tjaun cuerpoanta sinche e, tẽtõka o Espíritue ndo Dio, ko nge e tjaun Espíritue ndo Dio sinche enta tẽtõka o nge e ña i xraxaonnta. Ko kayui, me e tinteke tẽ kichuu. Méxin, ja anta jua i nche enta nge e ti jian.

¹⁸ Ko siá tsitikaonnta ti nge e tjaun Espíritue ndo Dio, ítsetuan i ley ngajinnta.

¹⁹ Tuinxin tikonni kain nge e ña i nche e chujni: ti tjaun nã xrochõnda nã inaa nchri o inaa xi ti je a tsikute e nã, ko ti sinche e nã ti ña i, ko xraxaon nã ti ndako a,

²⁰ ko ti chõnde e nã juasaya ídolo, ko itji nã ngajin ni tuso, ko ningakon en nã inaa chujni, ko tochjio nã, ko tuinxin toñaõ nã, ko tjaun nã je o nã xrochõnda nã ítsjé nge e, ko nchekateya kichuu nã ixi tsachrendáa nã,

²¹ ko chjuye e nã, ko ni naatóñaxón kichuu, ko ni kuan, ko ni tsango xengo, ko ikaxin nge e nche e nã. Ko ó sa ó ndachrjan ko jai íjngo ntatjunta ixi ngisen jaña nche e, sen me e tsayé a sen juachaxin tsake e sen ti no tetuan an ndo Dio.

²² Ko Espíritue ndo Dio tajon ixi xrotjue e kichuuna, ko juaxrxuxin tsojuna, ko tsetõ ana, ko taka i xrochjajna juañaõ, ko jian nichje e kichuuna, ko tjaunna tsingijnana inaa chujni ko nche ena kain nge e ndachrona,

²³ ko nchejié a aséjina, ko jian tsetuen en aséjina sinche ana ti ndako a. Siá sinche ena jaña, xro an ijje tsamana.

²⁴ Ixi ngisen ó tixinixin en Ncháina Cristo, í jua i sinche e sen nge e ndachro cuerpoe sen ko kain nge e ti ndako a xraxaon sen.

²⁵ Ixi siá sinche ena nge e tjaun Espíritue ndo Dio, xrokonda tsintu ena ixi Espíritue ndo Dio tsitaujina nti a.

²⁶ Xrokonda sinchejié a aséjina ko sincheñaõ a kichuuna ko tsochjuye ana ngajin kaxin sen kichuuna.

6

Tingijna kichuunta

¹ Kichuuna, siá tsikonta xrojan ngisen ndako a jinche e, ja anta ti chondanta Espíritue ndo Dio, xrokonda tsingijnanta sen ko jian nichje enta sen ixi í sinche a sen ti ndako a. Ko tsje enta jian xranchi nche e ja anta, nchéxin ja anta sinche enta ti ndako a kaxon.

² Tingijna kichuunta nchakon chondanta xrojan juachjaon, ko jaña tsitikaonnta ti tetuan an ndo Cristo.

³ Ko siá xrojan ngisen ndachro ixi je e sen tsango no e sen ko nduaxin a, sen me e je o sen jincheye e aséen sen.

⁴ Ngujngu ngisen xrokonda sa ó xrotsje e sen á jian jinche e sen. Ko siá nduaxin chao jinche e sen, me e chao xroché e sen ixi no e sen ixi jian jinche e sen, ko xrotsje a sen xranchi nche e inaa chujni.

⁵ Ixi ngujngu sen xrokonda sinche e sen nge e tixinixin en sen.

⁶ Ngisen jitangi chijni jian, xrokonda tsingijna sen ngisen juinhekuen en sen, ko tsajon sen nge e jian chõnda sen.

⁷ Ja anta ncheye anta asáanta ixi xro an ngisen ncheye e ndo Dio ixi ti tenga chujni, me e tsandáa sen.

⁸ Ixi siá tenga sen nge e ña i xraxaon aséen sen, kaxon tsandáa sen nge e ti ña i kuenga sen, ko me e tsenxin sen. Ko sen tenga nge e tjaun Espíritue ndo Dio, tsandáa sen nge e tajon Espíritue ndo, me e tsechón sen kain nchakon.

⁹ Méxin, xrokonda tsonchrjen ana sinche ena nge e jian, ko siá nduaxin sinche ena jaña, tsjachana tsayé ena nge e jian.

¹⁰ Méxin xrokonda ngujngu nchakon tsingijnana kain chujni ko ícha jian tsingijnana sen kichuuna, sen chuntia Ncháina Jesucristo.

Ndo Pablo juexin nichja ndo

¹¹ Tsje enta ixi tsango ijié letra rikjianxinnta tjáana.

¹² Ko ni ntakateyanta ixi tsaanta chji e ni judío, ni me e je o tjaun na ixi xrondachro chujni ixi jian nche e na ko tjaun a na tangi tson en na kondeexin ti ntacru kuenito ndo Jesucristo.

¹³ Ko ni tsikaa chji e, je e na nche a na kain nge e tituan an ley. Ko je e na tjaun na tsaanta chji e ni judío ixi me e sinchejiéxin aséen na ixi juacha na juinchekateyanta na tsaanta chji e.

¹⁴ Ko jan an ninaa nge e tjaun a sintajiéxin aséenna. Jan an je o tja on sintajié aséenna ixi ndo Cristo kuenxin ndo ixi jan an nganito ntacru. Ko ixi je e ndo kuen en ndo ti ntacru, méxin, jan an í xro an nge e tja on kondee nunte xasintajni ixi jan an kaxon xranchi ó xrokuen enna.

¹⁵ Ko siá titika onna ndo Jesucristo, í xro an tjintee á yaana chji e o na i. Ti ícha tjintee, jaina chujni natjúána.

¹⁶ Ko kain sen nche e jaña tsayé e sen juaxruxin ko ndo Dio tsikonóe e ndo sen.

¹⁷ Ko jai tjaun a ixi xrojan ngisen sincheni e aséenna ixi jan an ó tsikoni e cuerpona me e chronga ixi jan an nta a xrée Ncháina Jesucristo.

¹⁸ Kichuuna, Ncháina Jesucristo sintanchaonnta ndo kainnta. Jaña tson en.

Xroon tsikjin ndo Pablo xruen en ndo sen ste tjajna **Éfeso**

Ndo Pablo ikjin ndo xroon kuayé e sen ni ngo tjajna Éfeso

¹ *Jan an, Pablo, apóstol tikinixinna ndo Jesucristo ixi jaña jueñaio ndo Dio kjin annta ja anta titikaonnta ndo Dio ko titikaonnta Ncháina Jesucristo, ja anta ti stenta ni ngo tjajna Éfeso.

² Ndotáina Dio ko Ncháina Jesucristo sintanchaonnta ndo ko tsajon ndo juaxruxin ngajinnta.

Tsayé ena nge e jian kondee ndo Cristo

³ Tajonna juasaya ngajin ndo Dio, Ndotée Ncháina Jesucristo, ixi je e ndo juinche e ndo ixi titika onna Ncháina Jesucristo ko kuajon ndo kain nge e jian kuj x̄in ngajni.

⁴ Ndo Dio kuinchajna ndo ixi tsitikaonna ndo Cristo ti xrako a nunte xasintajni ko juinchemé e ndo ijie kuachondana ko kontjúá aséeina ixi jaña chao tsake ena ngajin je e ndo.

⁵ Tsango tjuajna ndo Dio, méxin kuinchajna ndo me e xrokjanna chjen en ndo ixi titika onna ndo Jesucristo, ko jaña jueñaio ndo Dio.

⁶ Méxin kain nchakon tsajonna juasaya ngajin ndo Dio ixi ijié juachaxin kuajon ndo ti juinchenchaonna ndo ixi tsitikaonna chjen en ndo, xjan tsango tjue e ndo.

⁷ *Ndo Dio tsango tjuajna ndo, méxin, kuajon ndo Chjen en ndo, ndo Jesucristo kuen en ndo, ko jaña juenga ndo na ti sinkana.

⁸ Ndo Dio tsango tjuajna ndo méxin kuajon ndo juachaxin tsienxinna ko tsonojna kain nge e jian.

⁹ Ko jai juinchenojna ndo nge e je o je e ndo kuano e ndo, nge e tsixraxaon ndo ó sa ó ixi xrokonoxin ndo Cristo.

¹⁰ Ko kain nge e ti tsixraxaon ndo me e tson en tsitjaja nchakon tsindachro ndo. Ko nchakon me e ndo Dio tsajon ndo juachaxin ixi ndo Jesucristo tsetuen en ndo kain nge e jii ngajni ko nge e jii nunte nti i.

¹¹ Ixi nduaxin titika onna ngajin ndo Cristo, ndo Dio ó sa ó kuinchajna ndo ixi tsayé ena nge e tsajon ndo. Kain ji i jaña tson en xranchi xraxaon ndo Dio.

¹² Jaña juinche e ndo ixi kain jajna ti sa ó kuitikaonna ndo Cristo, tsajonna juasaya ngajin ndo Dio ixi ijié juachaxin chónnda ndo.

¹³ Ko kaxon ja anta, ti ó kuin ennta chijni jian, chijni me e juinchemé e jianta, me e kuitikaonnta ndo Cristo, méxin ikjannta sen tikinixin en ndo Dio ixi kuaye enta Espíritue ndo ko jaña kon en xranchi tsindachro ndo.

¹⁴ Ti kuaye ena Espíritue ndo Dio, me e nduaxin nojna ixi tsayé ena kain ti ndachro ndo tsajon ndo nchakon naa tsantsjexon ndo kain ti ndako a ngajin sen tikinixin en ndo. Méxin, je o je e ndo tsayé e ndo juasaya ixi ijié juachaxin chónnda ndo.

Ndo Pablo tjanchia ndo ixi sen titikaon Ncháina

¹⁵ Méxin, ó kujn an ixi ja anta tsango chuntianta Ncháina Jesús ko tsango tjue enta kain sen titikaon ndo Dio

¹⁶ Ko jan an kain nchakon nichja a ndo Dio ixi ja anta ko tajon juasaya ngajin ndo.

¹⁷ Kuinóatáana ngajin ndo Dio, Ndotée Ncháina Jesucristo, Ndotáina tsango chónnda ndo kain juachaxin, ixi Espíritue ndo sintanchaonnta ixi jaña tsienxinnta jian chijnie ndo ko ícha xrochuntianta ndo.

¹⁸ Méxin, tjánchá a ndo Dio ixi jian xroxraxaonnta ixi jaña xrochon énnata ti ndachro ndo tsajon ndo ixi kuincha anta ndo ixi tsango tjintee nge e sinchekj̄t̄on en ndo sen tikinixin en ndo.

¹⁹ Ko kaxon tja on tsono anta ixi juachaxien ndo tsango ijié ko me e jua i tsjexin. Juachaxin me e nche e ixrā ngaya aséeina ixi jajna titika onna ndo. Ji i xraje o juachaxin juako ndo Dio

²⁰ nchakon juinhexechón ndo ndo Cristo. Tjume e kuajon ndo juachaxin tsake e ndo Cristo ndatsjonxin jian ti jii je e ndo Dio ngajni.

²¹ Ko kuayé e ndo juachaxin tsetuen en ndo kain nge e ko kain juachaxin jii ngajni ko nunte xasintajni jai ko kain nchakon.

²² *Ndo Dio kuajon ndo juachaxin ixi ndo Cristo tsetuen en ndo kain nge e jii, ko kuajon ndo juachaxin ixi ndo Cristo xranchi xrokjui jáa ni ngo tsetuen en ndo kain sen tikinixin en ningue ndo.

²³ Ixi ni ngo me e cuerpoe ndo Cristo, ko je o je e ndo tetuen en ndo kain nge e ko kain nge e tikinixin en ndo.

2

Kuayena juachaxien ndo Dio ixi tsechónna

¹ *Ndo Dio kuajon ndo juachaxin tsarichonnta nchakon ja anta bake enta xranchi tsiken ennta ixi kuanche enta ti ña i ko ti ndako a.

² Ko sa ó jaña kuanche enta ixi kuarue enta ti kuanche e chujni ña i jii ngata a xasintajni ko bakitikaonta Xixron anxrée, ichrji ngataon chrinto, xi tetuen en ikaxin espíritu ña i nchekateya chujni titikaon a ndo Dio.

³ Ko kain jaina sa ó jaña kuanche ena, ko ti ndako a nche e juaxruxin cuerpojna me e kuanche ena. Ti ndako a nche ena ko ti ndako a xraxaonna me e bakitikaona, méxin jaina tikinixinna ijié juachjaon tsaana xranchi ni chúxin a ndo Dio.

⁴ Ko kuen a jaña ixi Ndo Dio tsango bikonóa ina ndo ko tsango tjuajna ndo.

⁵ Ko maski jaina ndatsiken enna kondeexin ti ndako a juinche ena, je e ndo Dio juinchexechónna ndo nganii ndo Cristo ko me e kon en ixi juasie ndo Dio, me e komé e jjeina.

⁶ Ndo Dio juinchexechónna ndo nganii ndo Cristo Jesús ko jaña bake ena ndo ti jii ndo Cristo ngajni.

⁷ Jaña juako ndo ixi tsango tjuajna ndo jai ko kain nano tsii ko bingijnana ndo ixi titika onna ndo Cristo Jesús.

⁸ Ixi juasie ndo Dio juinchekitojna ndo ti tsechónna kain nchakon* ixi chuntiana ndo Cristo. Je a ixi xrojan nge e jian juinche ena. Na i. Juasie ndo Dio ixi je e ndo juinchekitojna ndo juachaxin ji i.

⁹ Je a ixi naa nge e jian juinche ena nti i, ko jua i sinchejié aséeina.

¹⁰ Ndo Dio juinchéñana ndo ixi sinche ena ti jian ixi titika onna ndo Jesús, jaña kon en ixi jaña tsixraxaon ndo ó sa ó.

Juaxruxin tsinteena ixi titika onna ndo Cristo

¹¹ Méxin, xraxaonnta xranchi bake enta sa ó. Ja anta je a chujni judíonta, ko ni judío bakaa na chji e na ko ndachro na ixi ja anta je a chjen en ndo Dio ixi baka inta chji e na.

¹² Sa ó ja anta kuachuxin anta ndo Cristo ko kuajento anta ni tjanya Israel ko kuachuxin anta ti ley tsiketuan an ndo Dio ko ti ndachro ndo tsajon ndo tsayé e chujni. Ko jaña bake enta ngata a nunte xasintajni ko kuachuxin anta ndo Dio, méxin jua i chon énta nge e tsajon ndo.

¹³ Ko jai steniinta ndo Jesucristo ixi ja anta sa ó bake enta ikjin ixi kuachuxin anta ndo Dio. Ko jai ixi kuen en ndo Cristo Jesús, me e chao konchjiñe enta ngajin ndo Dio.

¹⁴ Ndo Cristo chjajna ndo juaxruxin ixi sen judío ko chujni je a judío ikjan sen naakua tjanya ko jai ndo Cristo kuantsje ndo juaña kuachóna sen, ixi me e xranchi naa tjatu o bakingakon en.

¹⁵ *Ndo Cristo, ti kuen en ndo, me e juinchejexin ndo ti baketuan an ley xranchi xrokuin-teena. Ko ti yuu tjanya juinchéña ndo naakua tjanya natjúá tikinixin en je e ndo ko jaña bake e ndo juaxruxin.

¹⁶ *Ixi kuenxin ndo Cristo nganito ntacru, me e juinchejexin ndo juaña kuachóna yui tjanya, ko bake e ndo juaxruxin ngajin je e sen ko ndo Dio ko jaña yui tjanya kóna xranchi xrokui naakua chujni.

¹⁷ Ndo Cristo kujj ndo ko chronga ndo chijni tajon juaxruxin ngajin ja anta ti xrachuxin anta ndo Dio, ko sen judío, sen ste tjenja ndo.

¹⁸ Ko ixi juachaxien ndo Cristo, kainna, sen judío o sen je a judío, chao tsonchjiñe ena ngajin Ndotáina Dio ixi xraje o Espíritue ndo kuaye ena.

¹⁹ Méxin, ja anta í je a chujni tsiki xin tjanya jii ikjin. Ko jai kainna ikjanna chujni ste naa tjanya tjúa tikinixin en ndo Dio.

²⁰ Ja anta stenta xranchi naa nchia tsango ijié jita a naa ixro ijié ti tsikake e sen apóstol ko sen kuachronga chijnie ndo Dio ó sa ó. Ko Ncháina[†] Jesucristo, je e ndo nduaxin ixro ícha tjintee kónaxin nchia me e.

²¹ Ko Ncháina Cristo je e ndo nchesoji nchijií nchia, jaña chao ícha tsajin in nchia xranchi naa ni ngo tjúa tikinixin en Ncháina Jesucristo.

1:22 Col. 1:18. 2:1 Col. 2:13. * 2:8 tsechónna kain nchakon vida eterna 2:15 Col. 2:14. 2:16 Col. 1:20.

† 2:20 Ncháina Señor Ncháina Jesús o Ncháina Dio

²² Jaña ja anta kaxon ti titikaonnta ndo Cristo, kaxon chao tikinixin anta tsoñanta nchia me e, ko ngaxin in nchia me e tsake e Espiritue ndo Dio.

3

Ndo Pablo kuayé e ndo ixra tsjako ndo ngajin ni je a judío

¹ Jan an rixin in ndo achjiso kondeexin tjako chijnie ndo Cristo Jesús ixi jaña jian tsitikaonnta ndo maski je a judío ja anta, ko ritinoatána ngajin ndo Dio ixi ja anta.

² Ko ja anta ó jian xrokono anta ixi juasie ndo Dio kuajon ndo ixra kuayá a ixi sintakuan annta ixi jian tsake enta.

³ Ndo Dio juinchenóna ndo ti xra xro an ngisen no e; me e ó sa ó kjin annta naa nchiín.

⁴ *Ko siá xrotsje enta xroon ji i, tsono anta xranchi jan an ó kuianxin nge e tjaun ndo Cristo, ti xro an ngisen kuano e.

⁵ Ndo Dio xruan an ngisen juincheno e ndo chijni ji i, sen kuintee ó sa ó. Ko jai ixi juachaxien Espiritue ndo, ndo Dio juincheno e ndo sen apóstol ko sen profeta, sen tjuá aséen.

⁶ Ko sen je a judío ko sen judío xraje o tsayé e sen nge e tsindachro ndo Dio ko jaña tsoña sen xranchi xrokjui naakua cuerpo, ko kaxon tsikinixin en sen tsayé e sen kain nge e tsindachro ndo Dio tsajon ndo ixi tsitikaon sen chijni jian ne e ndo Cristo Jesús.

⁷ Ko maski jan an tikinixinna i, kuayá a ixra ji in ixi juasie ndo Dio ixi tsango ijié juachaxin chóna ndo.

⁸ Ko jan an tjinte ana xranchi ikaxin sen kuinche e Ncháina ko juasie ndo Dio chjána ndo ixra sinta a ixi sintakuan an ni je a judío chijni jian ne e ndo Jesucristo, ko chijni me e icha tjintee ixi ikaxin nge e.

⁹ Ko kuetuanna ndo sintano a kain chujni ti sa ó xro an ngisen kuano e ti tsixraxaon ndo Dio, ndo juinchekonchjian kain nge e jii nunte xasintajni.

¹⁰ Ko jai sen ni ngo xrokonda tsjako sen ngajin sen ángel ko sen tituan an ste ngajni ixi ndo Dio tsango no e ndo kainxin nge e.

¹¹ Ko Ncháina Jesucristo juinche e ndo kain nge e tsindachro ndo Dio ti xrangíxixión kain nge e.

¹² Juasie ndo Cristo kuajon ndo juachaxin chao tsonchjiñe ena ngajin ndo Dio ko xroxronka i ixi jaina chuntiana ndo.

¹³ Méxin, tinóatána tsonchrjen anta tsitikaonnta Ncháina Jesucristo maski kuin ennta ixi ngaxin in nduachjiso ritjén, ko ja anta icha sinchesoji asáanta.

Ndo Cristo tsango tjuajna ndo

¹⁴ Méxin, jan an take exin ntatuchi in ngajin Ndotée Ncháina Jesucristo,

¹⁵ ndo juinchéña kain nge e jii ngajni ko nunte xasintajni* ko je e ndo tikinixin en ndo kain chujni.

¹⁶ Tjánchá a Ndotáina Dio, ndo chóna kain juachaxin ko ti tjintee, ixi Espiritue ndo xrotjáxinnta ndo juachaxin ko sinchesoji ndo asáanta.

¹⁷ Ko ixi chuntia Ncháina Cristo, me e tsake e ndo गया asáanta ko jaña tsango soji titikaonnta ndo, ko tsango xrotjue enta kain chujni.

¹⁸ Ko jaña ja anta ko kain sen kichuunta, sen tjuá aséen, tsienxinnta xranchi tsango ijié ko iton, noi ko yaso e ti tjuajna ndo Cristo.

¹⁹ Tjánchá a ndo Dio ixi ja anta icha tsichuxinnta ti tsango ijié tjuajna ndo Dio, ko ji i jua i tsienxin chujni. Jaña xrochondana kain juachaxin tsajon ndo Dio.

²⁰ Ndo Dio chóna ndo kain juachaxin, ko je e ndo tsajon ndo nge e tsjanche ena ndo ko icha ixi juachaxien ndo nche e ixra गया aséina.

²¹ Sen tikinixin en ningue ndo Cristo xrokonda tsajon sen juasaya ngajin ndo Dio kain nchakon. Jaña tson en.

4

Kainna steku u kichuuna ixi Espiritue ndo Dio

¹ Ritjén nti i ngaxin in ndo achjiso kondeexin ixra ne e Ncháina Jesucristo, méxin tinóatána ngajinnta ixi nduaxin tsitikaonnta xranchi tjaun ndo Dio, xranchi xrokonda xrojuinche e kain sen kuinche e ndo ixi jaña tikinixin sinche enta.

² *Nchejié anta asáanta ko jian nichje é kichuunta ko teto a ngajin sen kichuunta; tingijna kichuunta, me e nduaxin xrotjue é kichuunta.

³ Nduaxin jian tinteku u kichuunta ko jaña tsitikaonnta Ncháina Jesús ixi Espiritue ndo Dio tsajon juaxrxin tsake enta.

⁴ Jii naakua ni ngo ko naakua Espíritue ndo Dio, naakua nge e tsechónxinni kain nchakon jaña tjaun ndo Dio.

⁵ Jii naakua Ncháina ko naakua nge e chuntiana ko naakua nombre tsiki texin chujni.

⁶ Ko jii naakua ndo Dio, Ndotée kain chujni. Je e ndo tayakon en ndo kain nge e ko tetuen en ndo kain nge e ko kain chujni ko je e ndo jii ndo ngajin kain chujni.

⁷ Ko ngujnguna chjajna ndo Cristo juachaxin sinche ena xra xranchi je e ndo tjaun ndo.

⁸ Jaña jitaxin xroon chijnie ndo Dio:

Nchakon kuajin in ndo ngajni sabikao ndo ni jichroá

ko kuajon ndo juachaxin ngixe e ixra sinche e chujni.

⁹ ¿Ko nge e xrondachro ixi kuajin in ndo? Xrondachro sa ó je e ndo xingajin ndo ti ícha yaso e.

¹⁰ Ko ndo xingajinxin ngajni xraje o je e ndo bajin in ndo íjngo ti ícha noi ngajni ixi je e ndo tsetuen en ndo kain nge e jii.

¹¹ Je e ndo kuajon ndo juachaxin ngajin kaxin sen sinche e xra apóstol ko kaxin sen xrochronga nge e tjaun ndo Dio, ko kaxin sen xrochronga sen chijni natjúá ne e ndo Jesucristo ko kaxin sen pastor tsendáa ningue ndo ko ikaxin sen tsjako sen chijnie ndo.

¹² Jaña kuinche e ndo sen sinche e ixra, ixi jaña ícha sinchekangi sen ko tsosoji ningue ndo Cristo.

¹³ Ko jaña kainna naakua xrochuntiana Chjen en ndo Dio ko xrochuxinna ndo ícha jian ixi jaña xrokjanna naa chjen en ndo ixi ícha chuntiana ndo ko jaña xrochondana juachaxin xranchi ndo Cristo ícha ijíe juachaxin chónnda ndo.

¹⁴ Ko jaña jaína ísinche ana xranchi xjan nchínchín, xjan jaiko tindoxin nge e xraxaon xranchi chrinto itji nango ko nango, ko méxin titikaon xjan nge e tjako ikaxin chujni ña i ncheye e na xjan ko jaña taxi titikaon xjan kaxin chijni ndako a jii.

¹⁵ Cháña chaxro xrotjue e kichuuna ko xronichjana kain nge e nduaxin, me e jaña sintu una xranchi tjaun ndo Cristo ixi je e ndo nduaxin tetuan an ndo nchiji ningue ndo.

¹⁶ *Ko nduaxin Ndo Cristo tingijinna ndo naxraje o xroxraxaonna ko jaña ícha tsosoji ko tsangi ningue ndo ixi ícha xrotjue e kichuuna.

Ícha tsontjúá aséeina ixi chuntiana ndo Cristo

¹⁷ Ko ixi juachaxien Ncháina Jesucristo tetuan annta í nche anta xranchi nche e ni chúxin a ndo Dio ixi ni me e ndako a xraxaon na.

¹⁸ Ni me e ndako naxixe e ichrji na ixi chúxin a na juachaxin tajon ndo Dio ti tsechónni kain nchakon ixi tsijinchecha aséen na méxin tienxin a na.

¹⁹ Je e na ítosue a na ko je o tjaun na sinche e na kain nge e ña i ko juaxrxin take e na sinche e na kain ti ndako a.

²⁰ Ko ja anta je a jii i kuitjanta ixi chijnie ndo Cristo,

²¹ siá nduaxin kuin ennta chijnie ndo ko kuanginta nge e jian juako ndo.

²² *Méxin tintu enta kain nge e ndako a kuanche enta sa ó ixi me e naa nge e ña i juin-taya anta.

²³ Méxin ja anta xrokonda tsindoxinnta ti xraxaonnta ko tsontjúá kain nge e jii ngaya asáanta.

²⁴ *Ko nche enta xranchi naa chujni natjúá juinchéña ndo Dio, naa chujni jian ko nduaxin tjúá aséen.

²⁵ Méxin ícheye a kichuunta. Kainnta ti nduaxin ndache kichuunta ixi kainna naakua cuerpoe Ncháina tikinixianna.

²⁶ Siá tsoña o kichuunta, tama anta ijíe ixi me e, ko ti koñaonta tsonchrjen a nguixin nchakon

²⁷ ko chje anta juachaxin ixi Xixron anxrée tsetuen enni xa asáanta.

²⁸ Ko ngisen sa ó bakee, í sinche a sen jaña. Cháña itja sen sinche exin sen ixra ixi jaña xrochónnda sen nge e tsingijnaxin sen xrojan chujni nóa.

²⁹ Tenga inta teka. Cháña xronichjana nge e jian ixi me e tsingijna kain sen jitin en.

³⁰ Nchenie anta Espíritue ndo Dio ixi Espiritu kuayé eni tjakoxin ixi ja anta tikinixi ennta ndo ko nchakon tsji ndo tsaye enta juachaxin tsarichonnta kain nchakon.

³¹ Tantsjenta kain juaña jii ngaya asáanta ko ti tuyakuté kichuunta ko ti nichjangí enta kichuunta ko í xraxaon anta ti ña í.

³² *Cháña jian nichje enta kichuunta ko tikonóe énta kichuunta ko tjáña anta xrojan nge e ndako a juincheko kichuunta, ixi jaña kaxon ndo Dio tjáñe e ndo ijíe juinche enta ixi Chjen en ndo kuenxin xjan ixi ijíe kuachónnda kain chujni.

5

Jian tinteenta xranchi ngisen ichrji ti tingasáña xro i

¹ Ja anta ó ikjannta chjen en ndo Dio ko je e ndo tjua anta ndo. Méxin, nche enta xranchi nche e je e ndo.

² Ko tjue enta kichuunta xranchi ndo Cristo tjuaina ndo ko je e ndo kuenxin ndo ixi jieina, ko juinchekao na ndo xranchi naa kutuchjon naakóñaxón na ko nchechján na ko ti chaxro xraxe ba me e tayé e ndo Dio.

³ Ja anta ó tikinxin enta ndo Dio, méxin í xro an nge e ña i xroxraxaonnta o xronichjanta ixi ngixe i naa nchri o naa xi ixi kain ji i ijie ko xro an nge e ña i xroxraxaonnta ko í tjiakuenxin anta ícha itsjé nge e xrochondanta.

⁴ Ko xro an chijni ndako a xrokuachrxjexin ro anta ko nichja inta ti ninta, ko teki anta chijni ndako a ixi ji i íxrokonda i xronichja ja anta. Cháña tájonnta juasianta ngajin ndo Dio.

⁵ Ja anta ó no anta ixi ngisen tsejuakao naa nchri je a janchri e o naa xi je a ndoxi e ko ngisen nche e nge e ña i ko ngisen tjiakuenxin xrochónnda itsjé nge e, ji i xrokjui xranchi xrokuitikaon na naa idolo, ko ni nche e kain me e tikinixien a na tixin in na ti tetuan an ndo Cristo ko ndo Dio.

⁶ Méxin, tintue anta ixi xrojan ngisen sintaya anta ixi chijni ninta nichja na ixi kondeexin me e tsoña ndo Dio, méxin tsjankata a ndo ijie ngajin na ixi titikaon a na ndo.

⁷ Ko tjento anta chujni jaña nche e.

⁸ Ja anta sa ó bakajinta ti naxixe e. Ko jai stenta ti tingasáña ixi titikaonnta Ncháina Jesucristo. Méxin, tjakonta ixi nduaxin stenta ti tingasáña.

⁹ Ixi xro i tingasáña tsingijnana nche ena ti jian ngajin chujni ko xronichjana ti nduaxin.

¹⁰ Méxin, nduaxin tanginta sinche enta nge e tjuan Ncháina.

¹¹ Ko tjento anta ti ña i nche e ni titikaon a ndo Dio, ni ste ti naxixe e. Cháña ndachenta na ixi ndakua i stenche e na.

¹² Ixi tosue eni tekini nge e imao nche e ni ña i.

¹³ Kain nge e ndako a tsonoxixin ixi xro i tsingasáña ixi kondeexin xro i chao tsono eni á jian o na i.

¹⁴ Méxin, ja in tsikjin sen:

Xingama anta ja anta ti xrastechrinnta;

tayanta ja anta ti stenta ngakjen en ni tsiken en

ixi je e ndo Cristo xranchi xro i tsingasáña anta.

¹⁵ Tsje enta jian xranchi tajinta; nche anta xranchi chujni ninta; xraxaonnta jian. Nche enta xranchi naa ngisen jian no e nge e nche e.

¹⁶ *Méxin, chjakon annta ixi sinche enta xranchi tjuan Ncháina Jesucristo ixi nchakon stetjina jai steton en itsjé nge e ña i.

¹⁷ Méxin, nche anta xranchi nche e chujni ninta. Ja anta tjéenta ixi tsienxinnta nge e tjuan Ncháina.

¹⁸ Ko kuan inta, ixi ixran sinchetjáña ko tsonoa inta nge e nche enta. Cháña tájonnta juachaxin ixi Espiritue ndo Dio tsetuan an asáanta.

¹⁹ *Ko tsjaoxin kichuunta ixi salmo ko himno, ko ja in sinche enta ixi nchiji asáanta ko tsajonnta juasaya ngajin Ncháina Jesucristo.

²⁰ Kainxin nchakon tsajonnta juasaya ngajin Ndotáina Dio ixi juachaxien Ncháina Jesucristo kuaye enta kain nge e.

Jian tingijna kichuunta ixi titikaonnta Ncháina

²¹ Xrokuitikaon kichuunta ixi ó titikaonnta Ncháina Jesucristo.

²² *Méxin, nchri ó tsikute e xrokuitikaon nchra ndoxi e nchra xranchi xrokuitikaon nchra Ncháina.

²³ Ko chujni xi chónnda janchri e chónnda xa juachaxin tsetuan an xa xranchi ndo Cristo tituen en ndo ni ngo, ixi je e ndo jaa ni ngo, ko je e ndo tajon ndo juachaxin tsechónni kain nchakon. Jaña ndo Cristo kuenxin ndo ixi sen ni ngo, ixi sen ni ngo cuerpo e ndo.

²⁴ Méxin, xranchi sen ni ngo titikaon sen ndo Cristo, jaña kaxon sen nchri, sen tsikute e, xrokuitikaon sen ndoxi e sen nge e tsetuan an ndo.

²⁵ *Ko sen xi xrotjue e sen janchri e sen xranchi ndo Cristo tjue e ndo sen ningue ndo ko kuenxin ndo ixi je e sen.

²⁶ Ko kuen en ndo ixi juinchetjúá ndo ningue ndo, me e jaña juinchetjúá ndo aséen sen ningue ndo ixi chijnie ndo ko inda bikitéexin sen.

²⁷ Ko jaña tsikon ndo ningue ndo tsango tjúá ko tsango chaxro ko xro an kitja xrochónnda ko tikinixin en je e ndo.

²⁸ Jaña kaxon sen chónða janchri e xrokonda xrotjue e sen jan xranchi tjue e sen aséen sen ixi sen tjue e janchri e, je e sen kaxon tjue e sen aséen sen.

²⁹ Ixi xro an ngisen ningakon en cuerpoe sen ko aséen sen. Na i. Je e sen tsango tayakon en sen cuerpoe sen ixi jaña nche e ndo Cristo ngajin ningue ndo.

³⁰ Ixi jaña ikjanna ningue ndo me e xranchi xrokjui cuerpoe ndo.

³¹ “Méxin xi xrokonda tsintu e xa ndotée xa ko janée xa ixi ó kuitja xa janchri e xa ko jaña xrokjan sen naakua cuerpo.”

³² Ji i naa chijni tsango ijié tienxin a kain chujni ko jan an ndachrjan ixi jaña tjakoxin ndo Cristo ko ningue ndo.

³³ Ko kaxon xrondachro ixi ngujngu ja anta xrokonda xrotjue e janchri anta xranchi xrojueñaonta asáanta, ko kaxon sen nchri tsikute e xrokonda tsitikaon sen ndoxi e sen.

6

¹ *Ko ichjan, xrokonda tsitikaonnta ndotánta ko janáanta ixi jaña tjaun Ncháina Jesucristo sinche enta ixi me e naa nge e jian.

² Chijni ji i sa ó tsiketuan an ndo Dio ixi chujni tsitikaon chijni tsayé e sen naa juachaxin tsajon ndo Dio ko chijni ji i ndachro: “Chonde enta juasianta ngajin ndotánta ko ngajin janáanta,

³ ixi jaña jian tsinteenta ko itsjé nchakon tsarichonnta ngata a nunte xasintajni.”

⁴ *Ko ja anta ndotata, ncheñaõ anta chjan anta. Cháña jian nichje enta xjan ixi jaña jian sinche e xjan kaxon ko nchekuen ennta xjan chijnie Ncháina Jesús.

⁵ *Ko ja anta ti nche enta ixrã ngajin ncháanta jii ngata a nunte, titikaonnta ko chonde enta juasaya ngajin nã xranchi xrojuinche enta xrée Ncháina Cristo Jesús.

⁶ Ko je a je o jian nche enta hora stetsje e nã ixi jaña xraxaonnta ixi je e nã tsikon nã tsango chjakon annta. Na i. Ja anta maski tsikon a nã, jian nche enta ixrã xranchi xrojuinche enta xrée ndo Cristo, ixi jaña tjaun ndo Dio sinche enta.

⁷ Ja anta ixi nchijí asáanta nche enta ixrã xranchi xrojuinche enta xrée Ncháina Jesucristo, ko je a xranchi xrokui je o xrée naa chujni.

⁸ Ko ja anta ó no anta ixi Ncháina tsjengajna ndo nã ngujnguna ixi ti ixrã jian juinche ena, maski á sen nchenche e nã ixrã* o na i.

⁹ *Ko ja anta ti tájonnta ixrã, jian tetuen ennta chujni nche e xráanta ko tuyakuen anta sen. Xraxaonnta ixi ja anta ko je e sen xraje o titikaonnta Ncháina jii ngajni ixi ndo Dio xraje o tjue e ndo kain chujni.

Ti xrokondajna tsetõ xinna ngajin espíritu ña i

¹⁰ Ko jai kichuuna, tonsojinta, ixi juachaxin ijié tajon Ncháina.

¹¹ Ko tjanchianta kain juachaxin tajon ndo Dio nchesoji asáanta ixi jaña soji tsake enta nchakon Xixron anxrée tjaun xa sintaya anta xa.

¹² Ixi jaña je a tsetõku una chujni. Na i. Jaña tsetõku una espíritu Xixron anxrée chónða juachaxin ko ichrji ngata a chrinto ko ngajni. Xixron anxrée tituen en kain espíritu ña i ichrji ngata a nunte ti naxixe e.

¹³ Méxin, tjanche enta kain juachaxien ndo Dio ixi jaña soji tsake enta nchakon tsetõku unta ti ña i, ko nchakon tsjexin tsetõku unta, icha soji tsake e asáanta.

¹⁴ Soji take énta ko titikaonnta chijnie ndo Dio xranchi naa nge e tingatõxin xi soldado ti jitikao kain nge e tsjayaxin xa ko jian sinche enta, xranchi naa xi soldado jiyá xa chika tsingakuenxin ixi jaña sinchenie a nã xa.

¹⁵ Ko jian tanginta ixi xronichjanta chijnie ndo Jesucristo tajon juaxruxin, xranchi xi soldado jian ka te take e xa.

¹⁶ Ko icha soji chuntianta Ncháina Jesucristo xranchi xi soldado tikao xa chika tingakuenxin xa flecha tikao xro i ne e Xixron anxrée.

¹⁷ Ko jian titikaonnta ti juachaxin kuaye enta ixi tsarichonnta kain nchakon, jaña xranchi chika teya jáa xi soldado ixi tsen a xa, ko jian nichjanta chijnie ndo Dio, me e xranchi xrokjui chika espada tajon Espíritu ndo Dio.

¹⁸ Ko tjáña inta nichje enta ndo Dio, kain nchakon tinóatáanta ngajin ndo ko tjanche enta Espíritu ndo ixi tsingijnanta. Ko tonchrje anta nichje enta ndo Dio ko tjanchianta ixi tsingijna ndo kain sen titikaon ndo.

¹⁹ Kaxon tjanche enta ndo Dio ixi tsingijnana ndo, tsake e ndo chijnie ndo गया ro a ixi jaña jian xronichja chijnie ndo ko tsin en chujni nge e kuanoe a nã.

²⁰ Ndo Dio chjána ixrã ji i ixi xronichja chijnie ndo, méxin, ritjén ngaxin in ndo achjiso ko tjanche enta ndo Dio ixi jian xronichja chijnie ndo.

Juexin nichja ndo Pablo

²¹ *Ndo Tiquico, ndo kichuuna, je e ndo jitingijna ndo ixra rinta a kondee Ncháina Jesucristo, ko je e ndo xrochronga ndo xranchi ritjén ko xranchi ti ixra rinta a.

²² Méxin, jan an xruan an ndo tsitsja anta ndo ixi xrochronga ndo xranchi stena nti i ko jaña ícha soji tsitikaonnta.

²³ Ndotáina Dio ko Ncháina Jesucristo tsajon sen juaxruxin tsaye enta kainnta kichuuna ixi ícha xrotjue e kichuunta ko ícha soji xrochuntianta ndo.

²⁴ Juasie ndo Dio, je e ndo sinchenchaon[†] ndo kain sen tjue e Ncháina Jesucristo. Jaña tson en.

Xroon tsikjin ndo Pablo xruen en ndo sen ste tjajna Filipos

Ndo Pablo tsikjin xroon kuayé e sen ni ngo Filipenses

¹*Jan an, Pablo, ko ndo Timoteo, ngisen nche e xrée Ncháina Jesucristo, ikjinna xroon ji i ixi kainnta kichuuna steniinta ndo Cristo Jesús ko stenta tjajna Filipos, ko sen tetuan an ni ngo ko sen tingijna ixra ni ngo nti a.

²Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Ndo Pablo tjanche e ndo ndo Dio ixi sen titikaon ndo Jesús

³Nchakon xraxa on ja anta tajon juasiana ngajin Ndotáina Dio,

⁴ko nchakon nichja a ndo Dio, tsango ché e aséenna ixi tjanča a ndo ixi ja anta

⁵ixi xraje o nche ena xrée Ncháina, ti nchakon kuaxi kuin ennta chijnie ndo Dio ko hasta ti jai.

⁶Jan an nóna ixi ndo Dio juangixin ndo naa ixra jian ngaya asáanta ixi kuitikaonnta ndo, ko jaña sinche e ndo kain nchakon ti xrokjanjan ndo Jesucristo.

⁷Méxin, jian xraxa on ja in ixi ja anta ixi tsango tjua anta, ko xraje o kuaye ena juachaxien ndo Dio. Siá jan an ritjén ngaxin in ndo achjiso o ritjén ti ste ni tetuan an, nduaxin nichja chijni jian.

⁸Ndo Dio no e ixi tsango tjua anta kainnta xranchi ndo Cristo tjua jna ndo.

⁹Tjáanchá a ndo Dio tsingijnanta ndo ixi ícha xrotjue enta ndo ko ícha jian tsono anta ko tsiexinnta kain nge e.

¹⁰Jaña tsono anta nge e ícha jian sinche enta nge e ti jian ko jaña tjúa tsinteenta ixi xro an ngisen tsjankata anta ijie nchakon xrokjan Ncháina Jesucristo.

¹¹Jian nche enta ixi jaña tsjakoxinnta ti titikaonnta ndo Jesucristo, ko jaña ja anta ko kain jaina tsajonna juasaya ngajin ndo Dio.

Ti nche eni xrée ndo Cristo me e ícha jian ko ícha tjintee

¹²Kichuuna, tja on tsono anta ixi kain nge e tangi kuatsinga jan an me e bingijna juakoxin ngajin chujni chijni jian tajon juachaxin tsechónni kain nchakon.

¹³*Jaña kain xi soldado jii nchia tituanxin na ko ikaxin ni ste nti i no e na ixi jan an jija na ndo achjiso ixi jan an chuntia ndo Jesucristo.

¹⁴Nchakon bikon sen kichuuna jija na, itsjé sen ícha chjé sen juaxruxin chronga sen chijnie ndo Dio ko í xrakon a sen ko ícha chuntia sen Ncháina.

¹⁵Nduaxin, jii kaxin sen tjako chijnie ndo Cristo ixi tochjuye e sen kondeexin ixra tjakona chijnie ndo Dio. Ko jii ikaxin sen ixi nduaxin nchijí aséen sen tjako sen chijnie ndo Dio.

¹⁶Ko jii kaxin chujni nichja chijnie ndo Cristo ixi tjaun na nchejé aséen na ko je a ixi nduaxin xrokuachrxjin aséen na. Jaña nche e na ixi tjaun na sincheni e na aséenna ixi xrajija na nti i.

¹⁷Ko ikaxin sen nduaxin stenichja sen chijnie ndo Dio ixi no e sen ritjén nti i ixi rindachrxjan chijnie ndo me e nduaxin.

¹⁸Ko maski á nduaxin ixi nchijí aséen sen nichja sen o na i, jan an ritjén juaxruxin ixi je e sen chronga sen chijnie ndo Cristo.

¹⁹Ko nóna ixi jian tsachrje kain ji i ixi rinichje enta ndo Dio ixi jan an ko Espíritue ndo Jesucristo jitingijnana.

²⁰Jan an tja on ixi tsosuana i nchakon nichja chijnie ndo Dio ixi tja on jan an tsjako xjin juachaxin ijie chjána ndo Cristo, maski á richon o ndatsiken enna.

²¹Jan an richon ixi juachaxien ndo Cristo, ko siá tsen enna naa nge e ícha jian tsjácha.

²²Ko siá xratsake é ngata a nunte xasintajni, ícha sinta a xrée Ncháina Jesucristo. Méxin, nóna i nge e ícha jian tsincha a.

²³Méxin, nóna i nge e ícha jian tsincha a ixi tja on ndaxrokuen enna ixi jaña xrobake é ngajin ndo Cristo ko me e ícha jian.

²⁴Ko ixi kondaxin ja anta, cháña tsen ana ixi jaña chao tsingijnanta.

²⁵Ko jan an jitonóna ixi xratsake é ngajinnta kaxin nchakon, me e tsingijnanta ixi ícha jian tsono anta ko juaxruxin tsake enta ixi ícha xrochuntianta Ncháina Jesucristo.

²⁶Ko íjngo tsake e ngajinnta me e tsake enta juaxruxin ko jaña tsajonnta juasianta ngajin ndo Jesucristo.

²⁷ Xrokonda tsjakoxinnta ixi jian stenche enta xranchi nichja chijnie Ncháina Jesucristo. Jaña siá tsjasotsja anta o na i, jan an tja on tsonóna ixi jian stenche enta ko jian steku u kichuunta ko nduaxin stechuntianta chijni tajon juachaxin tsechónni kain nchakon.

²⁸ Ko xrakuen anta chujni ningakon annta. Ja anta soji tinteenta, jaña tsjakonta ixi chujni me e tsitjáña nã, ko jaña tjako kaxon ixi ja anta tsarichnnta kain nchakon ixi me e ti tajon ndo Dio.

²⁹ Ixi juachaxien ndo Cristo ja anta titikaonnta ndo ko je a je o titikaonnta ndo. Na i, kaxon ja anta juaxruxin tsaye enta nchakon tangi tson annta kondeexin ti chuntianta ndo.

³⁰ *Ja anta ko jan an xraje o tsango tangi stena ixi stechrongana chijnie ndo Jesucristo. Ja anta ó bikonta xranchi tsango tangi bake é ko stetono anta ixi tangi ritjén jai.

2

Sintu una xranchi juinche e ndo Cristo

¹ Méxin, siá ndo Cristo tjingijnanta ndo ko siá ti tjua anta ndo me e juaxruxin take e asáanta ko siá espíritue ndo jii ngajinnta ko siá já tjue e kichuunta ko tikonóe énta chujni;

² me e jan an tsake e juaxruxin ixi nóna ixi jian steku u kichuunta ko kainnta tjue enta kichuunta ixi chondanta espíritue ndo Dio ko naakua xřã sinche enta.

³ Xro an nge e nche enta ixi tjaunnta tsjachanta xrojan nge e ko jaña sinchejé asáanta. Na i. Cháña xraxaonnta ixi ikaxin nã ícha tjintee nã ixi ja anta.

⁴ Ninaa ja anta tjé anta je o jian xrokuake enta. Cháña tingijnanta ikaxin chujni tsake e jian.

⁵ Ja anta xraxaonnta xranchi xraxaon ndo Cristo Jesús.

⁶ Maski je e ndo chónða ndo kain juachaxin xranchi ndo Dio, tjaun a ndo juachaxin me e ixi tjaun a ndo xrobikonni xranchi ndo Dio.

⁷ Ko kuintu e ndo nge e kuachónða ndo, ko kujj ndo nti i nunte xasintajni xranchi ngixe i inaa chujni.

⁸ Ko kuake e ndo xranchi naa xi ko je e ndo juinchenóa aséen ndo kuitikaon ndo kain nge e kuetuan an ndo Dio ko kuen en ndo nganito ntacru xranchi naa chujni yama ijie.

⁹ Méxin, ndo Dio tsango ijie juachaxin kuajon ndo ngajin ndo Jesús ko chjée ndo ndo naa nombree ícha tetuan an, ti chónða i ninaa chujni.

¹⁰ Ko nchakon tsin en nã nombree ndo Jesús kain nã tsake exin nã ntatuchi in nã, sen ste ngajni ko ni ste nunte xasintajni ko ni ste chringi inche,

¹¹ ko kain nã xrondachro nã ixi ndo Jesucristo me e Nchéeni ko jaña tsajon nã juasaya* ngajin Ndotáina Dio.

Sen titikaon ndo Cristo xranchi xro i tingasáña sen

¹² Kichuuna, kain nchakon bake é ngajinnta kuitikaonninta, ko jai ikjin ritjén, ícha jian titikaonninta ko jian xrotsje enta xranchi tsake enta ixi sinchetjáña inta juachaxin tsarichnnta kain nchakon ko tájonnta juasianta ngajin ndo Dio,

¹³ ixi ndo Dio ntaxraxaonnta ndo ko tingijnanta ndo sinche enta ti jian ixi jaña tjaun ndo.

¹⁴ Kain ji in xrokonda sinche enta ko nichjangie a kichuunta ko tetõ anta,

¹⁵ ko jaña xro an ngisen xrondachro ixi chondanta ijie o nge e ndako a juinche enta. Jian nche enta xranchi chjen en ndo Dio, xjan chónða i ijie, maski stenta ngakjen en chujni ña i ko ndako a nche e. Ja anta ti nche enta me e, tsingasáña xranchi xro i ngakjen en chujni ste ti naxixe e.

¹⁶ Ko tjako enta nã chijni jian tajon juachaxin tsechónni kain nchakon. Ixi jaña nchakon xrokjan Ncháina Cristo, jan an tsake e juaxruxin ixi ja anta kuitikaonnta ti juin-takuan annta ko nchakon me e tsonóna ixi jian ixřã juinta a ko je a xruenxon.

¹⁷ Ko maski ndaxrokuen enna ixi ti xřã juinta a, jan an juaxruxin tsake é ixi bingijnanta chuntianta ndo Dio ko ji i xroxetjaxin xranchi naa nge e tsajonnta tsayé e ndo ko tja on ixi ja anta kaxon tsake enta juaxruxin xranchi jan an.

¹⁸ Chá anta ko juaxruxin take énta xranchi jan an.

Ndo Timoteo ko ndo Epafrodito

¹⁹ Ko siá Ncháina tsajon juachaxin, tuinxin xroxruan anta ndo Timoteo tsjikitsja anta ndo ixi jaña tsonóna xranchi stenta ko juaxruxin tsake e tsin an me e.

²⁰ Ko xro an ngisen xraxaon ko taa juachjaon ixi ja anta xranchi ndo Timoteo.

²¹ Ixi ikaxin sen je o tjaun sen jian tsintee sen ko nche a sen nge e tjaun ndo Jesucristo.

²² Ko ja anta ó chuxinnta ndo Timoteo ko bikonta ixi jian nche e ndo ko tingijnana ndo chronga ndo chijni jian xranchi naa chjan tingijna ndotée xjan.

²³ Tja on xroxruan an ndo tsijitsja anta ndo, je o tsonóna xranchi tsonchjian kondeexin jija na.

²⁴ Ko chuntia ngajin Ncháina ixi tuinxin tsjasotsja anta.

²⁵ Ko kaxon xraxa on xrokonda xroxruan anta ndo kichuuna, ndo Epafrodito. Je e ndo kaxon tingijnana ndo nta ana xra ko kayuina tsango tangi bake ena. Je e ndo xruan annta ndo ixi tsingijnana ndo kain nge e xrokondajina.

²⁶ Tsango tjaun ndo kaititsja anta ndo kainnta ko yaa ndo juachjaon ixi kono e ndo kuin ennta koni e ndo.

²⁷ Ko nduaxin koni e ndo ko bananchichjaon ndaxrokuen en ndo ko ndo Dio bikonóe e ndo. Ko je a je o ndo, kaxon jan an bikonóa na ndo Dio ixi íxrokua i ícha juachjaon.

²⁸ Méxin, ícha tja on xroxruan an ndo tsijitsja anta ndo ixi jaña juaxruxin tsake enta tsikonnta ndo íjngo ko jaña jan an kaxon tsa i juachjaon.

²⁹ Juaxruxin taye énta xranchi naa sen kichuunta titikaon Ncháina, ko tjue enta ndo xranchi tjue enta ikaxin sen nche e xrée Ncháina.

³⁰ Ixi je e ndo koni e ndo nchakon jinche e ndo xrée ndo Cristo ko ixi tsango bingijnana ndo ixi ja anta ikjín stenta ko jua i xrobíngijnaninta ja anta, ko méxin ndaxrokuen en ndo.

3

Nge e nduaxin tjintee ixi rué eni ndo Cristo

¹ Jai, kichuuna, take énta juaxruxin ixi titikaonnta Ncháina Jesús ko jan an tonchrje ana xrokjin íjngo ixi ti ikjin jian xrokonda a ja anta.

² Tsje enta jian ixi ste chujni ña i xranchi xrokjui kunia, tjaun na tsonchrijin na ntau eni ixi jaña tsaani chji e ni judío.

³ Sen nduaxin chónda chji e ndo Dio, sen me e jaña ixi jaña nduaxin tajonna juasaya ngajin ndo Dio ixi tingijnana Espíritue ndo, ko tsango chajna ixi jaña tikinixin enna Ncháina Jesucristo. Méxin, chuntia ina ti taani chji e ni judío.

⁴ Jan an kaxon chao xrochuntia ti taani chji eni ko ikaxin nge e, jan an ícha tikinixinna xrochuntia ji i ixi ikaxin na

⁵ *ixi jan an kua chji e ni judío ti kuachonda ijní nchakon, ko jan an tjajna israelita ko tsikachrjenixin sen tjajna tikinixin en ndo Benjamín ko kaxon jan an nduaxin hebreona. Ko jan an sa ó kaxon ikjui fariseo ko bakitika on ley ne e ni judío.

⁶ *Ko jan an tsango bakitika on ti tjako ni fariseo, méxin kuaningakon an ni titikaon ndo Cristo ko jan an tsango bakitika on ley ko xro an ngisen xrondachro ixi nduaxin a juinta a me e.

⁷ Kain me e sa ó ti bakitika on jan an, ndachrjan ixi tsango tjintee. Ko jai ndachrjan íxro an tjintee kain me e ixi jai jan an titika on ndo Cristo.

⁸ Ko kain nge e kuanóna ko kuachonda, tikon jai íxro an nge e tjintee, ixi ícha tjintee chúxin Ncháina Jesucristo. Kain nge e kuachonda, kain me e kuitjáña ko ikjan xineno kondeexin ndo Cristo ixi jai juácha titika on ndo

⁹ ko chao tsake é ngajin ndo. Je a ixi jan an tsango jianna ixi xrokuitika on ley ne e ndo Moisés. Na i. Ndo Dio sinchetjúá ndo aséenna ixi chuntia ndo Cristo.

¹⁰ Ti jan an tja on: nduaxin xrochuxin ndo Cristo ko xrochonda juachaxin xranchi nchakon xechón ndo, ko tja on tangi tsónna xranchi tangi kon en ndo ko xrokue enna xranchi kuen en je e ndo,

¹¹ ko tjume e jaña kaxon jan an chao xroxechónna íjngo.

Ndo Pablo tjaun ndo jian sinchejexin ndo ti jitinga ndo

¹² Ndachrjan i ixi ó juácha jan an kain ji in ko ndachrjan i ixi ó tsango jianna. Na i. Jan an tja on ícha xrorua a ndo Cristo Jesús, ixi tsjácha tsjaso ti tjaun ndo ixi je e ndo kuinche ena ndo ó sa ó.

¹³ Kichuuna, jan an ndachrjan i ixi ó juácha kain ji i. Jan an tja on xrotjáñana kain nge e ó juinta a ko jai xrorua a ícha nge e titjáña sinta a.

¹⁴ Ixi jaña tsjácha sintajexin xraña, ko me e tsjácha tsayá a nge e tsajon ndo Dio jii ngajni ixi je e ndo ndachro ndo tsayá a naa nge e tsajon ndo ixi chuntia ndo Jesucristo.

¹⁵ Ko kainna ti nduaxin chuntiana ndo Jesús xrokonda jaña xroxaxaonna. Ko siá xrojan ja anta xraxaonnta inaa nge e, ndo Dio sintaxaxaonnta ndo ixi jian sinche enta.

¹⁶ Ko xrokonda kainna jaña xroxaxaonna ko jaña sinche ena nge e ó kuangina.

¹⁷ *Kichuuna, nche enta xranchi nta a jan anna, ko kaxon tsje enta xranchi nche e ikaxin sen kichuuna, xranchi jan anna juintakuan annta.

¹⁸ Ó itsjé vez ntatjunta ko jai ritsjanga ntatjunta ixi ste kueya nã ndachro nã ixi tjinte a ti kuen en ndo Cristo nganito ntacru.

¹⁹ Ko ni me e tsjii nchakon tsitjãña nã ixi je e nã je o xraxaonna ti sine nã ko ti tsitsáa nã ko nchejé aséen nã ixi ti ndako a nche e nã ko xraxaon nã nge e jii ngata a xasintajni. Kain ji in xrokjui xranchi naa dio ne e nã.

²⁰ Ko kain jaña tikinixinna tsojuna ngajni ko jai stechon enna Ncháina Jesucristo tsj xìn ndo ngajni, tsajon ndo juachaxin tsechónna nti a

²¹ ixi je e ndo tsindoxin ndo cuerpोजना ti toni e ko je e ndo tsajon ndo naa cuerpo tsango chaxro xranchi chónnda je e ndo. Ko kain ji i tson en ixi je e ndo chónnda ndo ijíe juachaxin ko tituen en ndo kain nge e.

4

Juaxruxin tinteenta ixi titikaonnta Ncháina Jesucristo

¹ Méxin, kichuuna, tsango tjua anta ko tsango jitiye e ña o ixi ja anta ko juaxruxin ritjén ixi ja anta xrokjui xranchi naa nge e tsango tjintee juácha; méxin soji titikaonnta Ncháina Jesucristo.

² Jan an tinóatáana ngajin jan Evodia ko jan Síntique ixi xraje o xroxaxaon sen xranchi kichuu sen titikaon Ncháina Jesucristo.

³ Ko ja anta kichuuna, ti kuingijnanta juinche ena xra, tja on tsingijnanta yui jan kichuuna, sen juinche e ixrã kaxon tjako sen chijnie Ncháina Jesucristo, kao ndo Clemente ko ikaxin sen juinche e ixrã ngajin. Ko nombrée sen ó jitaxin xroon ti no stetaxin nombrée kain sen tsechón kain nchakon.

⁴ Take énta juaxruxin kain nchakon ixi titikaonnta Ncháina Jesucristo; íjngo ntatjunta, take énta juaxruxin.

⁵ Ko kain chujni tsikon nã ixi ja anta nduaxin tingijnanta chujni, ko jaña xrokonda sinche énta ixi Ncháina Jesucristo ó tuinxin tsjii ndo.

⁶ Méxin, xro an nge e taxinta juachjaon. Cháña tjanche énta ndo Dio nge e xrokonda anta ko kaxon tájonnta juasantana ngajin ndo.

⁷ Ko ndo Dio xrotjãnta ndo juaxruxin, ko juaxruxin me e xro an chujni tienxin. Juaxruxin me e tayakon en asáanta ko tsingijna jian xroxaxaonnta ixi stechuntianta ndo Cristo Jesús.

Xraxaonnta nge e ti jian

⁸ Méxin, tsjexixin tjancha anta, kichuuna, xrokonda xroxaxaonnta kain nge e ti nduaxin, kain nge e ti tikinixin juasaya, ko kain nge e ti ndako jii ko kain nge e jian ko nge e chaxro ko kain nge e jian tsayéxinni juasaya. Kain ji i xrokonda xroxaxaonnta.

⁹ Xrotjãña inta kain nge e juako anta ko nge e kuin ennta nichja ko nge e kuetuan annta ko kain ixrã bikonta juinta a. Jaña nche énta ko jaña ndo Dio, ndo tajon juaxruxin, tsake e ndo ngajinnta.

Tomi kuajon sen filipenses kuayé e ndo Pablo

¹⁰ Tsango juaxruxin ritjén ixi Ncháina bingijnanta ndo íjngo xraxaonninta. Ndachrjan i ixi í xraxaon antana. Na i. Je o jua í bingijnaninta ó sa ó.

¹¹ Ko ndachrjan i ixi xrojan nge e xrokondana. Jan an ó juikuana take é juaxruxin ixi je o nge e chonda.

¹² Jan an ó nóna nge e xrondachro chónnda ini ninna nge e, ko kaxon nóna nge e xrondachro chónndani kueya nge e. Jan an ó juikuanna á juiné o juine a jian, o á chonda itsjé nge e o xro an nge e chonda.

¹³ Kain ixrã chao sinta a ixi ndo Cristo tingijnana ndo ko nchesojina ndo.

¹⁴ Ko méxin, jian juinche énta ixi bingijnaninta, kuajonnta nge e xrokondana.

¹⁵ Ja anta ni tjajna Filipos, ó no anta jian ixi nchakon juangíxín juintakuan annta chijnie ndo Dio, ko nchakon sajuixin tjajna Macedonia, ja anta ni ni ngo Filipos xruan annta tomi kuayá a ixi kuinteenta juaxruxin.

¹⁶ *Méxin, nchakon bake é tjajna Tesalónica je a naakua xruannaninta tomi xra o ni ngo bingijnaxinninta ixi nge e xrokondana.

¹⁷ Je a ixi tja on je o tsayá a nge e xruannaninta. Na i Jan an tja on ixi ícha xrochondanta nge e tajon ndo Dio.

¹⁸ Ko jan an kuayá a kain nge e tsixruan annta ko jai ícha chonda. Ko kuayá a nge e tsixruan annta bikao ndo Epafrodito, ko ó jian ritjén. Ti xruannaninta xranchi naa nge e chaxro xraxe tayé eni ko ndo Dio nche e ndo juaxruxin me e.

¹⁹ Ndotáina Dio xrotjáanta ndo kain nge e titjáña xrochondanta ixi je e ndo chónnda ndo kain nge e tsango chaxro tsayé e kain sen titikaon Ncháina Cristo Jesús.

²⁰ Ndotáina Dio tsayé e ndo juasaya tsajon kain chujni kain nchakon. Jaña tson en.

Juexin nichja ndo Pablo

²¹ Tájonnta juajna ngajin kain sen titikaon ndo Jesucristo ste nti a. Sen kichuuna steki an nti i, xruan annta sen juajna.

²² Jaña kain sen ste nti i titikaon ndo Dio ko sen kichuuna nche e xrée xi tetuan an Roma, xruan annta sen juajna.

²³ Ncháina Jesucristo sintanchaonnta ndo kainnta. Jaña tson en.

Xroon tsikjin ndo Pablo xruen en ndo sen ste tjajna Colosas

Ndo Pablo ikjin ndo ngajin sen tjajna Colosas

¹ Jan an, Pablo, Ncháina Jesucristo kuinche ena ndo ixí sinta a xrée ndo, xra apóstol, ixí jaña tjaun ndo Dio, ko kao kuinche e ndo ndo kichuuna Timoteo,

² ikjin xroon jii tsayé e sen kichuuna tjajna Colosas, sen titikaon ndo Cristo ko tikinixin en sen ndo Dio. Ndotáina Dio ko Ncháina Jesucristo sintanchaonnta ndo ko xrotjá anta ndo juaxruxin.

Ndo Pablo tjanchia ixí kain sen titikaon Ncháina

³ Kain nchakon tajonna juasaya* ngajin ndo Dio, Ndotée Ncháina Jesucristo, nchakon nichja ana ndo tjancha ana ndo ixí ja anta

⁴ ixí kuin anna ixí ja anta jian chuntianta Ncháina Jesucristo ko tjue enta kain sen titikaon ndo Dio,

⁵ ixí stechon ennta tsayé enta nge e tsajon ndo Dio ti jii ngajni. Ja anta jaña stechon ennta ixí kuin ennta chijni jian nduaxin ó kuajon ndo Dio.

⁶ Méxin, chijni kuin ennta, chijni me e stetin en kueya chujni nchijí nunte xasintajni, ko jaña ó jitinga ko jitonkueya ni titikaon ixí juachaxin tajon ndo Dio. Jaña kon en kaxon nchakon kuin ennta ko kuitikaonnta ixí nduaxin tjua anta ndo Dio.

⁷ *Ji i juako anta ndo kichuuna Epafras, ndo kuingijnana junta ana ixra, ko jai jii ndo ngajinnta ko jian nche e ndo xrée ndo Cristo.

⁸ Je e ndo bikaonana ndo juajna xranchi tjue é kichuunta ixí Espiritue ndo Dio tingijnanta.

⁹ Méxin, jan anna, nchakon kuin anna xranchi stenta, kain nchakon tjancha ana ndo Dio tsingijnanta ndo ixí jian tsono anta nge e tjaun ndo, ko tjanchiana ixí tsajon ndo juachaxin tsienxinnta kain nge e tjaun ndo.

¹⁰ Jaña chao tsienteanta xranchi tjaun Ncháina Jesucristo ko jian sinche enta xrée ndo ko jaña ícha jian xrochuxinnta ndo.

¹¹ Ko tjanchiana ixí je e ndo sintasojinta ndo asáanta ixí juachaxin ijié chóna ndo ko xrotjáanta ndo juaxruxin, ko soji tsake enta maski tsij juachjaon ngata anta.

¹² Ko tájonnta juasianta ngajin ndo Ndotáina Dio ixí jian jinche e ndo xra ngaya asáanta, me e tsayé ena nge e ti jii ngajni ti tingasáña, ko ji i tsajon ndo ngajin kain sen titikaon ndo.

¹³ Je e ndo kuakintsjexinna ndo ti naxixe e ko chajina ndo juachaxin tsienteena ti tetuan an Chjen en ndo, xjan ícha tjue e ndo, ko jai ti naxixe e ítetuan i ngaya aséejna

¹⁴ *ixí je e ndo kuen en ndo ixí jaina ko kuajon ndo jnié ndo kontjúáxin aséejna.

Chondana juaxruxin ixí ndo Cristo kuen en ndo ixí jaina

¹⁵ Ndo Dio jua i tikonni ko Chjen en ndo, je e xjan juakoxin xjan xranchi jii Ndotée xjan. Ko je e xjan ó sa ó bake e xjan nchakon xrangixixín konchjian kain nge e jii.

¹⁶ Ko ndo Dio chjée ndo Chjen en ndo juachaxin sinchekonchjian xjan kain nge e jii ngajni ko ngata a nunte xasintajni, ko kain nge e tikonni ko ti tikon ani. Kaxon kain nge e tetuan an jii ngata a chrinto ko kain juachaxin jii ngajni, kain me e juinchéña ndo ixí ji i sinche e ixra ngajin ndo.

¹⁷ Ndo Cristo ó bake e ndo ti xro an nge e jii, ko ixí je e ndo chjée ndo juachaxin kain nge e jii ixí chóna ndo kain juachaxin.

¹⁸ *Kaxon je e ndo jaa ningue ndo, ko ningue ndo me e cuerpoe ndo, ko je e ndo tetuen en ndo cuerpoe ndo ixí je e ndo ícha sa ó xechón ndo ngakjen en ni tsiken en ko méxin je e ndo tetuen en ndo kain nge e.

¹⁹ Méxin, ndo Dio bake e ndo juaxruxin ko jaña chjée ndo Chjen en ndo kain juachaxin chóna je e ndo.

²⁰ *Ko kaxon tjaun ndo Dio ixí juachaxien ndo Cristo xrobake e juaxruxin nunte xasintajni ko nchijí ngajni ixí ti kuenxin ndo Cristo nganito ntá cru.

²¹ Sa ó ja anta kuachuxin anta ndo Dio ko baningakon enta ndo ngaya asáanta kondeexin ti ña i kuaxraxaonnta ko kuanche enta. Ko jai juasie ndo Dio kuajon ndo juachaxin ixí juaxruxin tsinteku unta ndo ixí titikaonnta ndo.

²² Ko ti bikaon cuerpoe ndo Cristo ko kuen en ndo ixí jaina, jaña kon en ndo ixí tjaun ndo ja anta tsontjúá asáanta ko xro an ijié xrochondanta, jaña tjaun ndo tsake enta ngajin ndo.

* 1:3 juasaya respeto, honor 1:7 Col. 4:12; Flm. 1:23. 1:14 Ef. 1:7. 1:18 Ef. 1:22, 23. 1:20 Ef. 2:16.

²³ Méxin, xrokonda ícha xrochuntianta Ncháina, ko tsake enta xranchi naa ntaa soji ixi yaso e jii nue e ntaa, ko tintue anta ti jian stehon ennta ixi kuin ennta chijnie ndo Dio. Chijni me e stetin en chujni nchijí nunte xasintajni, ko jan an Pablo tjako chijni me e.

Ndo Pablo nche e ndo xréé ni ngo

²⁴ Jan an ritjén juaxruxin maski ritatsinga juachjaon ixi ja anta, ixi jaña ntaxetaxin ngajin cuerpona ti xranchi tangi kon en ndo Cristo ixi kain sen ningue ndo, sen ikjan cuerpoé ndo.

²⁵ Ndo Dio kuinche ena ndo ixi sinta a ixra ngajin sen ningue ndo, ixi ixra me e kuetu-anna ndo ixi jian tsinteenta ko tjako chijni jian kuajon ndo Dio.

²⁶ Chijni me e sa ó ninaa chujni banoe a, ko jai ndo Dio juincheno e ndo kain sen titikaon ndo.

²⁷ Ko ndo Dio tjaun ndo tsono e sen je a judío ti tjintee kuanoe a sen ó sa ó, méxin Ndo Dio xruan an ndo ndo Cristo ixi tsake e ndo ngajinnta, ko je e ndo tajon ndo juachaxin ixi tsaye enta kain juachaxin ijíé chónda ndo.

²⁸ Jan anna nichjana ngajin kain chujni chijnie ndo Cristo, ko juachaxien ndo Cristo jian ntaxraxa onna chujni ko ntakuan ana na ixi tsienxin na jian. Ko jaña nguungu sen tsitikaon sen ko tsontjúá aséen sen ngajin ndo Cristo.

²⁹ Méxin, jan an soji nta a ixra ixi juachaxin jíé chjána ndo Cristo.

2

¹ Tja on tsono anta ixi tsango taa juachjaon ixi ja anta ko sen ste tjajna Laodicea ko kain sen xra chuxin ana.

² Tja on ixi tsake e juaxruxin ngaya aséen sen, ko xraje o xroxraxaon sen ko xrotjue e kichuu sen. Jaña tsienxin sen jian ko jaña tsono e sen nge e ninaa ngisen kuanoa a ti xraxaon Ndotáina Dio, me e ti kuíi Ncháina, ndo Jesucristo.

³ Ko je e ndo no e ndo kain nge e no e ndo Dio, me e ti ícha tjintee.

⁴ Kain ji i ntatjunta ixi xro an ngisen sintaya anta maski chaxro xronichja na.

⁵ Ko maski ritjén a ngajinnta, jan an kain nchakon xraxaonnta ko chjána juaxruxin ixi tsango jian stenta ko nduaxin stehuntianta ndo Cristo.

⁶ Méxin, xranchi kuaye enta Ncháina Jesucristo, jaña jian nche enta.

⁷ Xranchi naa ntaa yaso e jii nue e ntaa, jaña jian nche enta ko jian chuntianta ndo Jesu-cristo xranchi juinchekua annta sen, ko tájonnta juasianta ngajin ndo Dio kain nchakon.

Ndo Cristo tajon juachaxin ixi natjúá tsojuna

⁸ Jian tsje enta ixi xro an ngisen sintaya anta ixi je e na je o tjako na ti xraxaon na ko ti xraxaon chujni nunte xasintajni, ko tjako a na ti tjaun ndo Cristo.

⁹ Ixi kain juachaxin chónda ndo Dio, me e chónda ndo Cristo nchakon bake e ndo nunte xasintajni.

¹⁰ Ja anta chondanta juachaxien ndo Dio ixi titikaonnta ndo Cristo. Ko je e ndo tetuen en ndo kain juachaxin jii ngajni ko nunte xasintajni.

¹¹ Xakon nchakon kuaxinta kuitikaonnta ndo Cristo, je e ndo tjáanta ndo naa nge e tsichuxixinnta ndo, ko me e je a itja chujni kónaxin. Na i. Je e ndo ixi juinchemé e ndo ijíé kuanche enta, méxin jai tikinixin ennta ndo Cristo.

¹² *Ja anta nchakon bikitéenta, kaxon xranchi ja anta xroxrabaaku unta ndo Cristo. Ko jaña kaxon xrokjui xranchi xroxechónnta xranchi je e ndo xechón ndo ixi chuntianta juachaxien ndo Dio ixi ndo Dio juinchechón ndo ndo Cristo.

¹³ *Ja anta sa ó xranchi naa ni tsiken en jaña bake enta kondeexin ijíé kuachondanta, ko kuachonda inta chji e ndo Dio. Ko jai komé e kain ijíé me e, ko ndo Dio tjáanta juachaxin tsechonnta kain nchakon.

¹⁴ *Ndo Dio juinchemé e ndo kain nge e tsiketuan an sa ó, ti jua i kuitikaonna, ko je e ndo kuantsje ndo kain ijíé kuachondana ixi ndo Cristo kuen en ndo nganito ntaçru.

¹⁵ Ndo Cristo nchakon kuen en ndo nganito ntaçru juacha ndo ko kuantsje e ndo Xixron anxrée kain juachaxin kuachónnda xa ti baketuan an xa, ko jaña juinche e ndo ixi xrokosue e xa ko juinchekatsinga ndo kain ti ña i ngatoxin* ikon itsjé na, ixi xrobikonni ixro an juachaxin chónnda xa, ko jaña juacha ndo.

¹⁶ *Méxin, xro an ngisen xronichjangí anta ixi ti nge e intenta o nge e tin innta o á titikaonnta nchakon kia o nchakon nchanitjao natjúá o nchakon tjoké eni.

¹⁷ Kain nge e ji i me e tsa on kain nge e tsíi. Ko ti tsíi me e ndo Cristo.

¹⁸ Tintue anta ixi xrojan ngisen sintaya anta ixi nche e na xranchi xrokjui na jian na ko tajon na juasie na ngajin sen ángel. Ni me e ndachro na ixi kuxienxin na naa nge e ijíé ko méxin nchejé na aséen na ixi nge e xraxaon na.

19**Ko je e na nduaxin a titikaon na ndo Cristo ixi je e ndo jaa ni ngo ko me e cuerpoe ndo, ko je e ndo tayakon en ndo ni ngo ko nchesoji ndo sen ni ngo, ko jaña nche e ndo ixi naakua xroxaxaonna ixi jaña tjaun ndo Dio.*

20 *Ja anta ó kuen ennta kao ndo Cristo ko kuintu enta nge e xraxaon chujni xasintajni. †*

‡*Méxin, sonda xranche enta xranchi je e na ko titikaonnta nge e tetuan an na?*

21 *Xranchi ndachro na: “Tsé anta ji i, nte anta me e ko tséxin anta tjáanta xrojan nge e.”*

22 *Kain nge e tetuan an na me e kondee nge e tsjexin, ko ji i naa nge e je o xraxaon chujni.*

23 *Nge e titikaon na nche e na xranchi naa nge e nduaxin ixi nchejié a aséen na, ko kaxon ncheni e na ntau e na, ko ixi ti nche e na me e jua i tsintu e na xroxaxaon na nge e ña i.*

3

1 *Méxin, ja anta ó tsixechónku unta ndo Cristo. Méxin, tjéenta nge e jii ngajni ti no jii ndo Cristo ndatsjonxin jian ti jii ndo Dio.*

2 *Xroxaxaonnta nge e jii ngajni ko je a nge e jii nunte xasintajni.*

3 *Ixi ja anta ó kuen ennta kao ndo Cristo ko jai stehon ennta xrochondanta juachaxin tsarichonnta ko tsinteenta kain nchakon ngajni ti jii ndo Dio.*

4 *Ixi ndo Cristo chondaxina juachaxin stehónna ko nchakon xrokjan je e ndo, ja anta kaxon tsake enta ngajin ndo ko tsikonnta juachaxin ijié chónnda ndo.*

Xranchi konjóna sa ó ko xranchi stena jai

5 *Méxin, tintu enta kain nge e ndako a xraxaonnta nti i nunte xasintajni. Ninaánta tarichrinko inta inaa ngisen je a sen tsikuta anta, ko nche anta nge e ña i, ko nche anta ti ndako a xraxaon asáanta, ko kaxon take anta juaxruxin ixi xrochondanta kueya nge e ixi me e xrokjui kaxon xranchi xrokuitikaonnta naa ídolo.*

6 *Kondeexin ji i toña ndo Dio, ko me e ti xjin ti tangi ton enni ixi titikaon ani nge e tituan an ndo.*

7 *Ko kain ji i kuanche enta sa ó.*

8 *Méxin, jai tintu enta kain nge e ña i, ko tintu enta kain juaña, ko nge e ndako a tjaun asáanta, ko ti nichjangí enta kichuunta ko nge e ndako a tachrxjexin ro anta.*

9 **Ncheye a kichuunta ixi ó sa ó jaña kuanche enta, ko jai ína i ixi ja anta ínche anta nge e juinche enta sa ó.*

10 **Me e jai ó tsikjannta chujni natjúa ko Ndo Dio tajon ndo juachaxin ixi xrokjannta xranchi je e ndo, ixi je e ndo juinchekonchjiannta ndo ko tjaun ndo xrochuxinnta ndo ícha jian.*

11 *Ítjinte a á ni judío o á ni griego o á ni tsikaa chji e o á ni tsikí xjin ikjín o á ni no e o á ni noe a o á ni tituen en sinche e ixra o á ni tituan an. Ti ícha tjintee me e ti titika onna ndo Cristo ixi je e ndo tituen en ndo kain nge e.*

12 **Ndo Dio tjua anta ndo ko tsikincha anta ndo ixi xrokjannta ni tikinixin en ndo. Ko ja anta ó kjannta ni natjúa, méxin, tikonóe e kichuunta ko jian tinteenta ko nchejié a asáanta ko taka i toñaonta.*

13 **Ningakuen a kichuunta, ko tjáña anta xrojan nge e ndako a juanta anta chujni, ixi ndo Cristo jaña kaxon je e ndo juinchemé e ndo ijié juinche enta, méxin jaña nche enta kaxon.*

14 *Ko ti ícha tjintee ti xrotjue e kichuunta ko naakua xroxaxaonnta ixi ña jian ko ña nche e ixi kain nge e ndako tsake e.*

15 *Ti juaxruxin tajon ndo Cristo tsetuen en asáanta ixi ña kuiyaxinnta ndo Dio ixi xrokjannta xranchi naakua cuerpoe ndo ko jaña tsajonnta juasianta ngajin ndo.*

16 **Chijnie ndo Cristo xrokuetuen en asáanta. Méxin, nchekuen en kichuunta ko nichje e kichuunta jian ko jian xraxaonnta. Itsjenta salmo ko himno ko itsjenta ngajin ndo Dio, ko tájonnta juasianta ngajin ndo गया asáanta.*

17 *Kain ixra nche enta ko kain nge e xrondachronta, kain me e tjanchixinnta juachaxien nombrée Ncháina Jesús, ko tájonnta juasianta ngajin Ndotáina Dio ixi titikaonnta ndo Jesucristo.*

Tikinixin sinche e sen ti jian, sen titikaon ndo Cristo

18 **Ja anta sen nchri tsikuta anta, tsitikaonnta ndoxi anta xranchi tikinixin sinche enta ixi ó titikaonnta Ncháina Jesucristo.*

19 **Ja anta sen xi, xrotjue enta janchri anta ko ningakuen anta jan.*

20 **Ja anta chjan, titikaonnta kain nge e tetuan an ndotánta ko janáanta ixi jaña tjaun Ncháina Jesucristo.*

21 **Ja anta ndotée ichjan, ncheña anta chjan anta ixi tsoníe a aséen xjan.*

²² *Ja anta ni nche e ixra, titikaonnta ni xrée rinche enta nti i nunte xasintajni. Ko je a je o nchakon jitsje e xi xrée. Na i. Nche anta me e. Cháña ixi nchijí asáanta nche enta ixra ixi titikaonnta ndo Dio.

²³ Kain ixra sinche enta, nche enta ixra ixi nchijí asáanta xranchi titikaonnta Ncháina Jesucristo, je a ixi titikaonnta chujni.

²⁴ Ó no anta ixi Ncháina Jesucristo sintakiton annta ndo nge e chónnda ndo ixi nche enta xrée ndo, ko je e ndo nduaxin Ncháina.

²⁵ *Ko ni nche e nge e ña i tangi tson en na kondeexin ti ña i juinche e na ixi ndo Dio naxraje o tikon ndo kain na, á tituan an na o na i.

4

¹ *Ja anta ti chondanta ni nche e xra kain nchakon, jian nche enta ko jian tetuen ennta ninchexraanta. Xroxraxaonnta ixi kaxon ja anta chondanta Ncháanta jii ngajni.

² Tintue anta nichje enta ndo Dio ko jian xraxaonnta ti ó nichje enta ndo, ko kain nchakon tájonnta juasianta ngajin ndo.

³ Kaxon tjanche enta ndo Dio tsingijnana ndo ixi tsajon Ncháina Jesucristo juachaxin xronichjana nge e banoe a na kondee ndo Cristo. Kondeexin ji i jija na nti i ndo achjiso.

⁴ Tjanche enta ndo Dio ixi tsingijnana ndo ixi jian sintakuan an na xranchi tikinixin sinta ana.

⁵ *Jian nichje enta ni titikaon a ndo Cristo ko jian nche enta ixi jaña tsikon ni xratitikaon a ndo, ko siá chao xronichjanta ngajin na, nichjanta ixi je e na xrochuxin na ndo.

⁶ Nichje entana jian kain nchakon ko xraxaonnta jian xranchi tsjate enta ixi nge e tsjanchangi ngujngu na.

Juexin nichja ndo Pablo

⁷ *Ndo kichuuna Tíquico, ndo tsango tjue ena, je e ndo jian tingijnana ndo xrée Ncháina Jesucristo, ko tsiji ndo xrontatjunta ndo xranchi ritjén jan an.

⁸ Méxin, xruan an ndo tsiji ndo ti stenta ixi tsono anta xranchi stena ko kaxon ixi tsake enta juaxruxin.

⁹ *Kaxon xroxruan an ndo Onésimo, naa ndo kichuuna tjua a ixi jian nche e ndo ixra ngajin Ncháina, ndo me e ndo tjanánta kaxon. Kayui sen tsikitsja anta sen ko tseki anta sen kain nge e jiton en nti i.

¹⁰ *Ndo Aristarco, ndo riki an ndo achjiso, xruan annta ndo juajna ko kaxon ndo Marcos, ndo me e xrakichuu ndo ndo Bernabé. Ó ntatjunta ixi nchakon tsiji ndo Marcos tsikitsja anta ndo, taye énta ndo jian.

¹¹ Kaxon xruan annta ndo Jesús juajna, je e ndo kaxon ndatin in ndo Justo. Je o je e sen ji i, sen judío titikaon Ncháina tingijnana ixra rinta a, ti nichjana kondee ti tetuan an ndo Dio. Ko je e sen tingijnana sen ixi juaxruxin tsake e.

¹² *Ndo Epafras xruan annta ndo juajna. Je e ndo nche e ndo xrée ndo Cristo xranchi ja anta. Je e ndo kain nchakon tinóatée ndo ngajin ndo Dio ixi ndako tsake enta tsitikaonnta xranchi tjauun ndo Dio.

¹³ Jan an bikon ixi ndo Epafras tsango yaa ndo juachjaon ixi ja anta ko ixi kain sen ste tjajna Laodicea ko Hierápolis.

¹⁴ *Ndo Lucas, ndo nchéña xroan, ndo tjua a, * xruan annta ndo juajna ko kaxon ndo Demas.

¹⁵ Tájonnta juajna ngajin sen kichuuna ste tjajna Laodicea ko kaxon ngajin jan Ninfas ko sen xra o ndo a jan.

¹⁶ Nchakon tsjexin sinchekuanxinnta xroon ji i, xruan annta xroon ngajin sen ste ni ngo tjajna Laodicea sinchekuanxin sen xroon ko kaxon nchekuanxinnta xroon kuayé e je e sen nchakon tsiji xroon ti stenta.

¹⁷ *Ndachenta ndo Arquipo ixi tsitikaon ndo jian ixra tsikajon Ncháina sinche e ndo.

¹⁸ Jan an Pablo tjáana kjinxin chijni ji i, chijni nichja anta. Xraxaonnta ixi jan an ritjén ngaxin in ndo achjiso, ko tja on ixi ndo Dio sintanchaonnta ndo. Jaña tson en.

Xroon sa ó tsikjin ndo Pablo xruen en ndo sen ste tjajna Tesalonicenses

Ndo Pablo nichje e ndo sen Tesalónica

¹*Jan an, Pablo, ko ndo Silvano ko ndo Timoteo ikjinna xroon ji i, xruan anna ngajinnta ja anta kichuuna stenta ni ngo tjajna Tesalónica ixi naakua titika onna Ndotáina Dio ko Ncháina Jesucristo. Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Sen Tesalónica chaxro titikaon sen ko jian nche e sen

²Nanaó tajonna juasianana ngajin ndo Dio ixi kain ja anta ko xraxa onnanta.

³Nchakon nichja ana Ndotáina Dio xraxa onnanta ixi jian tjakonta ko nchijíi asáanta chuntianta Ncháina Jesús ko rinche enta xrée ndo Dio ixi ícha tjue enta ndo ko soji stenta ixi stechon ennta xrokjan Ncháina* Jesucristo.

⁴Kichuuna, ndo Dio tsango tjua anta ndo ko nóhana ixi je e ndo ó kuincha anta ndo.

⁵Nchakon juasona tjajnánta juintakuan annanta chijni jian tajon juachaxin tsechónni, méxin nge e nichjana je a je o chijni. Na i. Kaxon ixi juachaxien Espíritue ndo Dio nichjaxinna ko Espíritue ndo Dio juinchenónana ixi chijni nichjana me e chijni nduaxin. Ó no anta ixi jian juakoxinna ngajinnta ixi jian tsake enta.

⁶*Ko ja anta juinche enta xranchi junta a jan anna ko kaxon juinche enta xranchi juinche e Ncháina Jesucristo. Ko nchakon kuin ennta chijnie ndo Dio, ixi nchijíi asáanta kuitikaonnta ndo ko stenta juaxruxin ixi Espíritue ndo Dio bingijnanta maski kueya nge e tangi kuatsinganta.

⁷Jaña ja anta jian juakoxinnta ngajin kain sen titikaon Ncháina nunte Macedonia ko nunte Acaya.

⁸Ixi ja anta itsjé chujni kono e na chijnie ndo Dio, je a je o nunte Macedonia ko nunte Acaya. Na i. Kaxon kain tjajna stetjenka nti a kuin en na xranchi chuntianta ndo Dio, ko jan anna íxrokonda i inaa nge e xronichjana,

⁹ixi jai je e na chronga na xranchi juasona tjajnánta, ko kainnta kuajonnta juachaxin kuinteena nti a ko tjume e kuintu enta kain ídolo ixi kuaxinta kuitikaonnta ndo Dio, ndo nduaxin jichón.

¹⁰Ko kaxon ndachro na ixi ja anta stechon ennta xrokjanxin ngajni Chjen en ndo Dio, me e ndo Jesús, ngisen ndo Dio juinchechón, ko je e ndo tsingijnana ndo ixi xro an nge e tsojna nchakon tsii ijíi juachjaon xroxruan an ndo Dio ngataon nunte nti i.

2

Ixrą tsijinche e ndo Pablo tjajna Tesalónica

¹Kichuuna, kainnta no anta jian ixi je a xruxon juasona tjajnánta.

²*Ó no anta ixi sa ó chujni tjajna Filipos chinga juinchenana na ko nichjanganana na. Ko maski jaña kon en, ndo Dio bingijnanana ko íxronka ina juakona chijnie ndo, chijni tajon juachaxin tsechónna kain nchakon.

³Je a naa nge e ndako a juakona ko je a ndako a nichjana ixi tja onna xrojuintaya ana chujni.

⁴Ndo Dio ndachro ndo ixi jian junta ana, me e chjánana ndo ixrą ixi sintakuan anna chujni chijnie ndo, chijni tajon juachaxin tsechón na kain nchakon, méxin, ndako nichjana. Tjaun ana ixi je o chujni sinche e juaxruxin ixrą nta ana. Na i. Tja onna ixi ndo Dio sinche e ndo juaxruxin, ko je e ndo no e ndo kain nge e xraxaon aséjina.

⁵Ja anta ó no anta ixi nichja ina chijni ícha chaxro ixi jaña xrojuintaya ananta ko xrojuachana kueya tomi. Na i. Ndo Dio no e ndo junta ina jaña.

⁶Tjé ana ixi chujni xrochjana na juasaya, kaxon tjaun ana ixi ja anta ko ikaxin na tsajonnta juasaya ngajinna. Nta ina jaña, maski chondana juachaxin xrojuanchiana jaña ixi ndo Cristo xruan anna.

⁷Jian kuanichja ananta xranchi naa janána jian tayakon en jan chjen en jan.

⁸Tsango tjua ananta ko je a je o chijnie ndo Dio xrotjá ananta. Na i. Kaxon naaxrokuexónna ixi ja anta ixi tsango tjua ananta.

⁹ Kichuuna, xraxaonnta ixi nchakon bake ena tjajnánta tsango juinta ana ixrą tiie ko nchakon ixi jaña juachana tomi sinexinna ixi tjaun ana xrokuajontaxinna ixrą ngajinnta ixi nge e sinena nchakon nichja ananta chijnie ndo Dio.

¹⁰ Ja anta no anta ko no e ndo Dio ixi jian kuinteena ngajinnta ja anta chujni titikaon Ncháina Jesucristo ko xro an ngisen tsjankata ana ijie ixi xrojan nge e ndako a juinta ana.

¹¹ Ja anta no anta ixi jian nichja ananta ixi ícha tsitikaonnta, méxin, nichjana xranchi naa ndotata nichja ngajin chjen en ndo.

¹² Ko ntatjunanta ixi jian sinche enta xranchi tjaun ndo Dio sinche e kain chjen en ndo ixi kuincha anta ndo ixi tsaye enta juachaxien ndo ko tsake enta ti jii je e ndo.

¹³ Méxin, kain nchakon tajonna juasaya ngajin ndo Dio ixi nchakon kuin ennta chijnie ndo, chijni jian, me e nichjana ko kuaye enta chijni xranchi chijnie ndo Dio, je a xranchi chijnie chujni. Ko ji i nduaxin chijnie ndo Dio, chijni nche e ixrą gaya asáanta, ja anta ti titikaonnta ndo.

¹⁴ *Kichuuna, nchakon chjinga juinta anta ni tjajnánta, jaña kon en xranchi kon en sen ningue ndo Dio titikaon Ncháina Cristo Jesús ste nunte Judea, ixi nchakon kuaxi kuitikaon sen ndo, ni judío, ni tjajné sen, kuaxi ną kuaningakon en ną sen ko bengi ną sen.

¹⁵ *Ko ni judío naakóñaxón ną Ncháina Jesús ko jaña kaxon naakóñaxón ną sen kuachronga chijnie ndo Dio ó sa ó, ko jan anna bengina ną. Ko ningakon en ną kain chujni, ko ti nche e ną nche a ndo Dio juaxruxin.

¹⁶ Méxin, nchakon tja onna xronichja ana chujni je a judío chijnie ndo Dio, chijni tajon juachaxin tsechónni kain nchakon, ni judío kuintuna ina ną tsjakona. Jaña ícha tsama ną ijie. Ko jai tangi tson en ną ixi ó tsji juañaue ndo Dio ngata a ną.

Ndo Pablo tjaun ndo saxrokuitsje e ndo sen tjajna Tesalónica íjngo

¹⁷ Kichuuna, maski sakjuixinna ngajinnta kaxin nchakon ko í bikon a kichuuna, xraxa onnanta gaya aséenąna ko tsango tja onna xrokuitsja ananta íjngo.

¹⁸ Tja onna xrojuasótsja ananta; jan an Pablo itsjé tja on xrojuasótsja anta, ko Xixron anxrée bingako ną xa ko jua i juasona.

¹⁹ ¿Nge e stehon enna ko nge e stenchecháxinna?, ko, ¿sonda juaxruxin stena? Ja anta stexin jan anna juaxruxin nchakon tsji Ncháina Jesucristo ixi kuitikaonnta ndo.

²⁰ Méxin, jan anna stena juaxruxin ixi ja anta kuitikaonnta.

3

¹ *Ko tsango koni e aséenąna ixi jua i juasona, méxin xraxa onna cháña kuituna jan on tjajna Atenas,

² méxin xruan anna ndo kichuuna Timoteo tsijitsja anta ndo. Je e ndo naxraje o nche e ndo xrée ndo Dio ko tjako ndo chijnie ndo Cristo. Je e ndo sintaxraxonnta ndo chijnie Ncháina Jesús, me e soji tsake e asáanta,

³ ko jaña ninaánta tsonchrjen a asáanta ixi nge e tangi stetatsinganta. Ko ó no anta ixi xrokonda tsatsinganta juachjaon.

⁴ Ko ti xrobake ena ngajinnta, xrja ngana ixi kainna xrokonda tsatsingana juachjaon, ko jai jaña stetatsinganta.

⁵ Méxin, jan an ícha yaa juachjaon ixi ja anta ko xruan an ndo Timoteo tsijitsja anta ndo xranchi stenta, ixi, ¿á xrastechuntianta Ncháina?, ixi jixronkana ba Xixron anxrée sinchengachruenta xa ko tsintu enta chijnie Ncháina. Ixi siá jaña xrokon en, xruxenon juinta ana xrą ngajinnta.

⁶ *Ko jai ó kjanxin ndo Timoteo tjajnánta Tesalónica ko ndachro ndo ixi jian stenta ko chuntianta Ncháina, ko tsango tjue e kichuunta, ko ndachro ndo ixi tsango xraxaonnanta ko tjaunnta xrobikonnanta xranchi jan anna tja onna tsikonnanta kaxon.

⁷ Méxin, kichuuna, maski tsango tangi stena nti i, tsango ché e aséenąna ixi kuin anna ixi xranchijí asáanta chuntianta Ncháina Jesús.

⁸ Ko kuin anna xranchi stenta, me e ícha ijie juaxruxin kuayé e aséenąna ixi konónana soji stenta ko titikaonnta Ncháina Jesús.

⁹ ¡Ko xranchi tsjenga ana ną ndo Dio ixi tsango ijie juaxruxin kuayé e aséenąna ixi ja anta titikaonnta ndo!

¹⁰ Méxin, tiie, nchakon tinóatánąna ngajin ndo ixi tuinxin tsajon ndo juachaxin tsjasot-sja ananta íjngo, ko me e tsingijnananta ícha xrochuntianta Ncháina.

¹¹ Tjanča ana ndo Dio, Ndotáina, ko Ncháina Jesucristo ixi tsingijnana ndo tuinxin tsjasotsja ananta,

¹² ko tjanča ana Ncháina ixi tsingijnanta ndo ícha xrotjue e kichuunta ko xrotjue enta kain chujni xranchi jan ana tjua ananta.

¹³ Ko tjanča ana ndo ixi sintasojinta ndo ixi nchijí asáanta tsitikaonnta ndo ko jaña xro an ijje xrochondanta ngajin Ndotáina Dio nchakon xrokjan Ncháina Jesús ko tsika o ndo kain sen tjúá aséen.

4

Ndo Dio tjaun ndo jian tsinteena

¹ Jai kichuuna, tinóatánana ko ntaxraxaonnanta ixi juachaxien nombrée Ncháina Jesús ixi jian tsinteena ko tsitikaonnta Ncháina Jesús xranchi juntakuan annanta ko jaña nche enta ngujngu nchakon ícha titikaonnta Ncháina.

² Ko ó no anta kain ti kuetuan annanta ixi juachaxien Ncháina Jesús.

³ Ko ndo Dio tjaun ndo ixi tjúá tsake enta ko xrochonda inta nge e xrotsje enta ngajin naa chujni je a janchri anta o ndoxi anta.

⁴ Ko ngujngu ja anta xrochondanta janchri anta ko jian tsakeku u kichuunta ko xrotjue e kichuunta.

⁵ Je a xrotjaunnta nge e ndako a sinche enta xranchi nche e chujni chúxin a ndo Dio.

⁶ Ninaáanta xrojuinchekao a kichuunta ti ndako a ixi Ncháina sincheni e ndo chujni jaña nche e, ó juintaxraxaonnta sa ó ji i.

⁷ Ixi ndo Dio kuiyana ina ndo ixi ti kitja tsojuna. Na i. Je e ndo kueya ndo ixi tjaun ndo tsontjúá aséeina ngajin ndo.

⁸ Ko sen titikaon a nge e tjakona, je a titikaon a sen ngajin naa chujni. Na i. Je e sen titikaon a sen ngajin ndo Dio, ndo kuajon Espiritu chondana.

⁹ Ko ti xrotjue e kichuuna, íxrokonda i xrokjinna ícha xroon ixi je e ndo Dio ó juintakuan annanta ndo xranchi xrotjue enta kain chujni.

¹⁰ Ja anta kain nchakon jaña nche enta, tjue enta kain sen kichuuna ste nunte Macedonia. Ko tinóatánana ixi ícha xrotjue enta kain chujni.

¹¹ Xraxaonnta juaxruxin tinteenta. Ko ngujngunta xrokonda sinche enta ixrā ixi tjáanta xranchi kuituan annanta.

¹² Jaña tsikon chujni chúxin a ndo Dio ixi jian nche enta, me e jian xronichja anta na xaxon ko jaña tsjanchia inta xrojan nge e ngajin inaa na.

Nchakon tsij Ncháina Jesucristo

¹³ Kichuuna, tjaun ana ixi ja anta tsonoa inta nge e tson en chujni tsen en. Tjaun ana ixi tsoni e asáanta xranchi ni chuntia i ndo Dio.

¹⁴ Ko jaña titika onna ixi kuen en Ncháina Jesús ko xechón ndo, ko xaxon titika onna ixi ndo Dio juinchexechón ndo ndo Jesús, ko nchakon xrokjan ndo Jesús, tjume e sinchexechón ndo Dio kain sen tsiken en, sen chuntia ndo.

¹⁵ *Méxin, ntatjunanta xranchi juako nana Ncháina Jesús ixi siá stechónna nchakon tsij ndo, sa ó xroxechón sen tsiken en ko tjume e jaña satsjina ngajin ndo.

¹⁶ Ncháina Jesús tsj xjn ndo ngajni ko séen xronichja ndo ixi ijíe juachaxin chónnda ndo, ko séen tsin enni xronichja ndo ángel tetuan an, ko xaxon séen tsin enni xrondachro tjao ne e ndo Dio. Ko tjume e kain sen tsiken en, sen kuitikaon Ncháina Jesucristo, xroxechón sen.

¹⁷ Tjume e jaña xrastechónna ko kain sen tsixechón, kaina satsjina ngakjen en tjuj tsutaxinna ndo Jesús. Jaña tsojuna ngajin ndo kain nchakon.

¹⁸ Méxin, chijni ji i nichjaxinnanta ixi juaxruxin tsinteenta.

5

¹ Kichuuna, nchakon tson en ji i, íxrokonda i xrokjinna.

² *Ja anta no anta jian ixi nchakon xrokjan Ncháina, tson en xranchi naa nchakon noe ani xrokui naa xiche e tiie, tsee xa.

³ Nchakon xrondachro na ixi jai juaxruxin ste na ko xro an nge e tson en na, nchakon me e tsij juachjaon ijíe ko ijíe juaxrakon. Tson en xranchi naa nchri yaa ichjan noe ani ngiora tsoni e nchra, jaña tson en chujni, jua i satsinga na.

⁴ Méxin, ja anta kichuuna, je a naxixe e stenta méxin xroxrakon anta nchakon tsij Ncháina Jesucristo ixi je a xranchi xrokui naa xiche e sintaxronkanta xa.

⁵ Jai ja anta stenta ti tingasáña. Jaña je a tiie tikinixinna ko ste ana ti naxixe e.

⁶ Méxin, cháña tarichrin anta xranchi stejua ikaxin na; jaña xrokonda jian xrotsje ena ko jian xroxraxaonna.

⁷ Ixi, ni tejua, tiie tejua na, ko ni kuan, tiie kuan na.

⁸ *Ko jaña stena ngajin ndo Dio, ndo nchengasáña; méxin, xrokonda jian tsojuna ko

xrotjue e kichuuna ko xrochuntiana Ncháina xranchi naa xi soldado teya xa chika ixi tsonié a ntakuin xa ko take e xa naa chika tseyá jaa xa ixi xro an nge e tson en xa, jaña jaina xrochon enna tsii Ncháina tsajon juachaxin tsechónna.

⁹ Ko Ndo Dio je a kuiya ina ndo ixi tsikaonna. Na i. Kuiye e ndo jaina ixi tsechónna kain nchakon* ixi juasie ndo Jesucristo.

¹⁰ Ndo Jesucristo kuen en ndo ixi jaina ixi jaña tsojuna ngajin ndo kain nchakon, á stechónna o tsike enna nchakon xrokjan ndo.

¹¹ Méxin, tingijna ko jian nichje e kichuunta xranchi ó stenche enta.

Ndo Pablo nchexraxaon ndo sen titikaon ndo Cristo

¹² Kichuuna, tinóatánana ixi tsitikaonnta sen stenche e xrée ndo Dio ngajinnta ko chronga sen chijnie Ncháina Jesús.

¹³ Chonde enta sen juasaya ko tjue enta sen ixi ixra jian nche e sen. Ko ja anta jian tinteku u kichuunta.

¹⁴ Xaxon tetuan annta ixi tuyakutéenta sen se e, tjaun a sinche e xra ko tingijnanta sen stenciin aséen, ko tingijnanta sen soji a, ko tuyakute anta chujni.

¹⁵ Jian tsje enta xro an ngisen tsjenge e ngajin sen kichuu ixi ndako a juinchekao kichuu sen. Cháña jian nche enta ngajin sen kichuunta ko ngajin kain chujni.

¹⁶ Kain nchakon juaxruxin tinteenta,

¹⁷ ko nichje enta ndo Dio kain nchakon.

¹⁸ Tájonnta juasianta ngajin ndo Dio maski tangi ritjennta ixi jaña tjaun ndo sinche enta ixi ja anta tikinixin ennta Ncháina Cristo Jesús.

¹⁹ Nchekanga inta juachaxin chónnda Espíritue ndo Dio jii ngajinnta.

²⁰ Nichjangié anta sen kichuuna; chronga nge e tjaun ndo Dio.

²¹ Jian tsje enta nge e chro sen. Ko siá ti ndachro sen me e jian, titikaonnta.

²² Tintu enta kain ti ndako a.

²³ Ko ndo Dio, ndo tajon kain juaxruxin, je e ndo sinchetjúá ndo asáanta ko tsingijna ndo asáanta ko cuerpoanta ko tsingijna ndo xrochonda inta xrojan ijie nchakon xrokjan Ncháina Jesucristo.

²⁴ Ndo Dio, ndo kuiya anta, je e ndo nduaxin nche e ndo ti ndachro ndo.

Ndo Pablo juexin nichje e ndo sen

²⁵ Kichuuna, tjanche enta ndo Dio ixi tsingijnana ndo.

²⁶ Ko tájonnta juajna ngajin kain sen kichuuna nti a.

²⁷ Tituan annta ixi juachaxien Ncháina Jesús xrondachenta sen kichuuna nge e ichro xroon xruan annta.

²⁸ Ncháina Jesucristo sintanchaonnta ndo. Jaña tson en.

* 5:9 tsechónna kain nchakon vida eterna

Xroon yuxin tsikjin ndo Pablo xruen en ndo sen ste tjajna Tesalónica

¹ *Jan an, Pablo, ndo Silvano ko ndo Timoteo xruan anna xroon ngajinnta ja anta kichuuna ni ngo tjajna Tesalónica ti steniinta Ndotáina Dio ko Ncháina Jesucristo.

² Ndotáina Dio ko Ncháina Jesucristo, sintanchaonnta ndo ko xrotjáanta ndo juaxruxin.

Ndo Dio sinchéña ndo ijię ti xrokjan ndo Cristo

³ Kichuuna, kain nchakon xrokonda tsajonna juasiaina xruen ja anta ngajin ndo Dio. Me e tikinixin sinta ana, xruen ja anta kain nchakon ícha chuntianta Ncháina ko ícha tjuje e kichuunta.

⁴ Méxin jan anna jian nichjana xruen ja anta ngajin sen kichuuna, sen ningue ndo Dio, xruen juaxruxin stena xruen ja anta ícha soji chuntianta Ncháina Jesús, maski stetatsinganta juachjaon xruen jii chujni ningakon annta.

⁵ Ji i tjako xruen nduaxin ndo Dio jian nchéña ndo ijię ngajinnta xruen juachjaon stetatsinganta, me e xrondachro xruen tikinixin tsixin innta ti tetuan an ndo Dio.

⁶ Kaxon ndo Dio sinchéña ndo ijię ngajin ni ndako a juinta anta; je e na tsayé e na ijię juachjaon.

⁷ Ko ja anta ti xrustechondanta juachjaon, tsjoka anta xranchi jan anna. Jaña tson en nchakon tsj xruen Ncháina Jesús ngajni ko ngusine xruen i tsonoxin ndo ko tsika o ndo kain sen ángel, sen chóna juachxin.

⁸ Tsji ndo Jesucristo xruen sinchéña ndo ijię ngajin kain chujni kuitikaon a ndo Dio ni ko kuitikaon a chijni jian nichja Ncháina Jesucristo.

⁹ Chujni ji i ijię juachjaon ko tangi tsikon na kain nchakon ko nai a tsjexin ti tsikaon na, ko je e ndo tsengi ndo na satsji na ntá a ko ítsikon a na ti ijię juachxin chóna ndo.

¹⁰ Jaña tson en nchakon tsji Ncháina Jesús xruen kain sen tjúa aséen ko kain sen kuitikaon chijnie ndo, sen me e tsajon sen juasaya* ngajin ndo ko kao ja anta xruen kuitikaonnta ti nichjana.

¹¹ Méxin, kain nchakon tjancha ana ndo Dio xruen jian tsake enta xranchi tikinixin tsake e sen kuinche e ndo; ko tsingijnanta ndo xruen nduaxin tsjachanta sinche enta kain ixra jian tjauunta sinche enta xruen chuntianta ndo.

¹² Jaña ja anta tsajonnta kain juasaya ngajin Ncháina Jesucristo ko kaxon je e ndo jian xronichja ndo xruen ja anta xruen tsikaonnta ndo. Jaña tson en xruen juachxien ndo Dio ko Ncháina Jesucristo xruen tsango jian ndo.

2

Tsonoxin xi ña i

¹ *Jai kichuuna, xronichjana xruen nchakon tsji Ncháina Jesucristo ko tsetanna ndo, tinóatánana ngajinnta

² xruen tindoxin anta chijni jian kuaye enta ko ó kuitikaonnta, ko tintue anta xruen ngixeko chujni xrondachro xruen ó juexin kuitja nchakon tsji Ncháina Jesús, ko tien anta ni ndachro xruen kuayé e na naa xroon xranchi naa xroon xruen an jan anna ti xrondachro xruen ó kuu nchakon me e.

³ Tintue anta xruen xruen sintaya anta jaña, xruen nchakon tsji Ncháina Jesucristo xrokonda sa ó itsjé chujni tsetoka o kichuu na xroningakon en na ndo Dio, ko tsonoxin naa xi tsango ña i, xi me e xrokonda tsitjáña xa.

⁴ Xi ji i, xi ningakon en kain nge e ne e ndo Dio, xroxraxaon xa xruen ícha chóna xa juachxin xruen ndo Dio ko kain nge e tikinixin en ndo, ko xi me e tsjacha xa tsake e xa ngaxin in ningue ndo Dio ko xrondachro xa xruen je e xa ndo Dio xa.

⁵ ;Á xraxaon anta xruen jan an ó ntatjunta nchakon bake e ngajinnta xruen jaña xrokon en?

⁶ Ko jai ja anta ó no anta nge e tingakon en xruen xruen a nchakon tsonoxin xi me e.

⁷ Ko kain ti ña i ó imao jiton en. Je o titjáña satsji ngisen jitingakon en xa.

⁸ Tjume e xiña i tsonoxin xa ko Ncháina Jesús xruen chrinto tsachrjexin ro a ndo tsóñaxin ndo xa, ko jaña tsitjáña xa xruen chjiixro ijię tsika o ndo Jesús tsoenxin ji i.

⁹ *Ko xiña i me e tsika o xa ijię juachxin tsajon Xixron anxré, ko me e tsjakoxin xa xruen sinchexruen en xa chujni ko ikaxin ixra ijię sinche e xa, kain ji i je a nduaxin, je o sincheye e xa chujni.

¹⁰ Ko kain chijni ña i sincheyexin xa kain chujni tikinixin tsitjáña ixi ni me e tjaun a na kuitikaon na chijnie ndo Dio, chijni tingijna tsachrjengí e na ijie ko tsechón na kain nchakon.

¹¹ Méxin, ndo Dio tsintu e ndo na tsitikaon na kain nge e nduaxin a ko kain juancheya tsin en na.

¹² Ko jaña tsama na ijie kain ni kuitikaon a chijni nduaxin ixi ícha juinche e na juaxruxin kain ti ndako a tjako Xixron anxrée.

Sen kuinche e ndo me e sen tsechón

¹³ Kichuuna jan anna kain nchakon xrokonda tsajonna juasianana ixi ja anta ngajin ndo Dio. Ko Ncháina Jesús tjua anta ndo ixi ndo Dio kuincha anta ndo, ixi je e ndo xraxrangíxixión kuincha anta ndo ixi xrokomé e jiana ko jaña tsarichonnta kain nchakon, ixi juasie Ncháina Jesús ko Espíritue ndo tsingijna tsontjúá asáanta ixi chuntianta chijnie ndo.

¹⁴ Je e ndo Dio kuiya anta ndo ixi xrochondanta juachaxin tsarichonnta kain nchakon ixi kuitikaonnta chijnie ndo, chijni juako ananta. Jaña tsaye enta juachaxin tajon Ncháina Jesucristo.

¹⁵ Méxin, kichuuna, soji take énta, ko tjáña inta chijni juntakuan anntana nchakon bake ena ngajinnta ko ti chronga xroon kjin annanta.

¹⁶ Ncháina Jesucristo ko Ndotáina Dio jian ndo ixi tjaunna ndo, ko tajon ndo juachaxin ixi juaxruxin tsake e aséejna ko xrochuntiana ixi kain nchakon tsojuna ngajin ndo.

¹⁷ Ko je e ndo sinchesoji ndo asáanta ko jaña soji tsake enta kain nchakon, ko je e ndo tsajon ndo juachaxin ixi xronichjanta ti nduaxin ko sinche enta kain ixra jian.

3

Tjanche enta ndo Dio ixi jan anna

¹ Ko jai tjanche ananta, nichje enta ndo Dio tsingijnana ndo ixi kain tjajna ngata a nunte taka tsayé e na chijnie Ncháina, ko chujni ji i jian tsayé e na chijni ngaya aséen na, xranchi kon en ngajinnta.

² Ko kaxon tjanche enta ndo Dio ixi tsingijnana ndo ixi ni ningakon en chijni jian, tsingakóna ina na ixi ste kaxin ni chúntia i Ncháina Jesucristo.

³ Ko Ncháina nduaxin jian ndo, je e ndo tsingijnanta ndo ixi soji tsake enta, ko je e ndo tsintue a ndo ixi xiña i sinta anta xa xrojan nge e.

⁴ Ko jan anna chuntiana ixi Ncháina tsingijnanta ndo ixi stenche enta ko sinche enta kain ti jian xranchi kuetuan annanta.

⁵ Ko Ncháina tsingijnanta ndo xrotjue enta chujni xranchi je e ndo juakoxin ndo tjaunna ndo, ko tsingijnanta ndo Cristo ixi soji tsinteenta maski tangi tsatsinganta.

Sen titikaon ndo Cristo xrokonda sinche e sen ixra

⁶ Kichuuna, tetuan ananta ixi juachaxien Ncháina Jesucristo, tjento anta íkaxin sen kichuuna, sen tjaun a nche e ixra ko nche a sen xranchi juntakuan annanta.

⁷ Ja anta ó no anta xranchi sinche enta ti juako ananta nchakon bake ena ngajinnta, ixi jan anna nai a kuintu ana junta ana ixra.

⁸ Ko kain nchakon juengana na ti juinena. Ko junta ana ixra tiie, nchakon ixi jaña kuajondaxin ana ixra ngajinnta ixi ti sinena.

⁹ Maski kuachondana juachaxin xrojuanchia ananta xrobingijnananta, ko junta ina jaña. Jan anna junta ana ixra ixi jaña juako ananta xranchi sinche enta.

¹⁰ Méxin, nchakon bake ena ngajinnta kuetuan annanta ixi: Ngisen tjaun a sinche e ixra, sine a sen.

¹¹ Ó konónana ixi kaxin ja anta nche anta ixra, ko tjikekonta nge e ti konda inta ko nche anta xra.

¹² Méxin, ni me e ntatjana na ixi juachaxien Ncháina Jesucristo ixi xrokonda sinche e na ixra tsjachaxin na ti sine na.

¹³ Ko ja anta, kichuuna, tonchrje anta nche enta ti jian.

¹⁴ Ko siá xrojan ngisen titikaon a nge e ikjinna ngaya xroon ji i, tsje enta jian ngisen me e, ko tjeto anta sen ixi jaña tsosue e sen.

¹⁵ Ko ningakuen anta sen me e. Cháña nichje enta sen xranchi naa sen kichuunta ixi í sinche a sen jaña.

Juexin nichja ndo Pablo

¹⁶ Ko Ncháina, ndo tajon juaxruxin, je e ndo tsajon ndo juaxruxin ngajinnta kain nchakon ko je e ndo tayakon annta ndo kainnta.

¹⁷ Jan an Pablo, tjána kjinxin juajna ji i. Jaña tsatsuan xinnta kain xroon ikjin jan an.

¹⁸Ncháina Jesucristo sintanchaonnta ndo kainnta ixi juachaxien ndo. Jaña tson en.

Xroon sa ó tsikjin ndo Pablo xruen en ndo ndo Timoteo

Ndo Pablo kjin en ndo ndo Timoteo

¹ Jan an, Pablo, nta a xrée Ncháina Jesucristo ixi jaña tjaun ndo Dio, ndo tajon juachaxin tsechón chujni kain nchakon, ko ndo Jesucristo, ndo chon enna tsij lingo.

²*Ja a Timoteo kjin an xroon ji i ko xruan an juajna, ja a chjan na, xjan nduaxin chuntia* Ndotáina Dio ko Ncháina Cristo Jesús. Je e ndo tsikonóa a ndo ko sintanchaoan ndo ko xrotjáa ndo juaxruxin.

Tsij chujni ndako a tsjako chijnie ndo Dio

³Xranchi kuinóatáana ngajian nchakon sakjuj tjajna Macedonia, ja a titu a tjajna Éfeso ixi tsetuen en kaxin ni ste nti a, ni ndako a tjako chijnie ndo Dio, itsjako a na jaña,

⁴ ko tetuen en na tsitikaon a na chijni xro an xrée, chijnie ni bake e sa ó. Chijni me e je o ncheke to na ko tjakaxin kichuu na ko xro an xrée chijni me e, ixi kain me e tingijna i tsichuxin na nge e tjaun ndo Dio ixi je e ndo tjaun ndo ícha xrochúntiani ngajin ndo.

⁵Jan an tetuan an ji i ixi kain sen ícha xrotjue e kichuu sen ixi ti xrotjue e kichuu sen me e ícha tsontjúa aséen sen ko ti jian xraxaon sen ko me e tsjako ixi nduaxin chuntia sen Ncháina Jesús.

⁶ Ko ikaxin sen tjáñe e sen ixi xrotjue e kichuu sen, je o tjakaxin sen ko ji i tingijna i sen.

⁷Je o tjaun sen xrokjan sen xranchi ni tjako ley ko tienxin a sen me e, ko tienxin sen nge e tjako sen xranchi xrokjui chijni jian.

⁸ Ko jaina nojna ixi nge e kuetuan an ndo Dio me e jian, siá jaina nduaxin sinchekuen enna chujni xranchi tjaun je e ndo.

⁹ Ó nojna ixi ley kuetuan an Ncháina, je a jii kondeexin ni jian nche e. Ley kuetuan an ndo Dio jii ley kondeexin ni ña i ko ni titikaon a, ni yama ijie, ni nichjangí e ndo Dio ko ni titikaon a ti nichja ndo ko ni naatónaxón ndotée ko janée ko ikaxin chujni,

¹⁰ko kaxon ni chóna inaa chujni je a janchri e ko je a ndoxi e, ko xi tejuakao xi, ko nchri tejuakao nchri, ni tee ko ni nchekji chujni, ko ni ncheya, ko ni nichjaxin ndo Dio ixi je e na nche e na ti jian ko nduaxin a me e. Méxin ley kuetuan an ndo Dio jii ley ixi tsingijna kain ni titikaon a chijni jian.

¹¹Ixi ji i chijni nduaxin ko jian tajon juachaxin tsechón chujni, ko ji i ti kuetuanna ndo Dio, ndo tjúa, tsjako anta.

Nge e jian juinche e ndo Dio ngajin ndo Pablo

¹²Tajon juasiana ngajin Ncháina Jesucristo ixi juinchesojina ndo ko bikon ndo ixi jian titika on ndo, me e chjána ndo ixra sinta a ngajin ndo.

¹³*Maski seno kuanichjangí a ndo ko baktikaon a ndo ko bakengi sen titikaon ndo ko chinga banichja kondee je e ndo, ko maski jaña junta a, ndo Dio tsango bikonóa na ndo ixi nchakon me e nóna i nge e junta a ko kuichuxin a ndo.

¹⁴Ko Ncháina Jesús tsango juinchenchaonna ndo ixi kuajon ndo juachaxin tsitika on ndo, ko jaña chuntia ngajin ndo ko tjua a[†] sen kichuuna ixi titika on ndo.

¹⁵Ji i ti nduaxin ko xrokonda ixi kainna tsitikaonna ixi ndo Jesucristo kujj ndo ngata a nunte ixi tsantsje ndo ijie chóna kain chujni. Ko jan an ícha ndako a junta a.

¹⁶Ko maski jaña junta a, ndo Dio ícha bikonóa na ndo ixi jaña juakoxin Ncháina Jesucristo ixi je e ndo tsango jian ndo ko kuindoxinna ndo me e jan an juakoxin ngajin kain chujni ixi sen tsitikaon ndo xrochóna sen juachaxin tsechón sen kain nchakon.

¹⁷Méxin xrokonda tsajonna kain juasiajna ngajin ndo Rey tsake e kain nchakon, ndo nai a tsen en ko chujni jua i tsikon na ndo. Ko je o je e ndo Dio tituan an ndo, ndo tsango no e kain nge e. Jaña tson en.

¹⁸Timoteo, ja a chjan na, ko tetuan an ixi tsjacha tsetua ngajin ni ndako a tjako chijni ixi chuntia Ncháina ko jian xraxaon. Ko ja a sinche e ti jian xranchi nichja sen kichuuna nchakon kuaye é xrée Ncháina, sen nichjaxin ixi juachaxien ndo Dio.

¹⁹Ixi kaxin sen ndako a xraxaon sen, méxin juinchetjáña sen ti jian baktikaon sen Ncháina.

²⁰Jaña kon en xi Himeneo ko xi Alejandro, méxin jan an kuajon xa ngajin Xixron anxrée ixi tsikaa jaa xa ko tsono e xa ixi jua i xronichjangí eni ndo Dio.

2

Xranchi xronichje ena ndo Dio

¹ Titikaonnata nge e tetuan annata ixi xronichje enta ndo Dio, ko tinóatáanta ngajin ndo, ko tájonnta juasianta ngajin ndo ixi chao tsintee kain chujni.

² Xrokonda tsjanche enta ndo Dio ixi tsingijna ndo kain ni tetuan an ixi jaña ícha jian tsojuna, me e tsinteketo a chujni ko tsitikaonna ndo Dio ko jian sinche ena.

³ Kain ji i jian ixi jaña tjaun ndo Dio, ndo tajon juachaxin tsechónna kain nchakon.

⁴ Ixi je e ndo tjaun ndo tsechón kain chujni kain nchakon ko tjaun ndo ixi tsono e na chijnie ndo, chijni nduaxin.

⁵ Naakua ndo Dio jii ko naakua ngisen nichjaxin chujni ngajin ndo Dio, me e ndo Jesucristo, ndo konoxin xranchi chujni ngata a nunte xasintajni.

⁶ Je e Ncháina Jesucristo kuajon ndo aséen ndo ko kuen en ndo, me e jaña juenga ndo na jíee chujni. Ji i kon en xranchi ti tsindachro ndo Dio.

⁷ *Ndo Dio tjaun ndo tsono e chujni kain ji i, méxin kuiya na ndo ko kuayá a ixra sintano a chujni, ni je a judío, ixi tsitikaon na Ncháina Jesucristo, ko tsono e na nge e ti nduaxin. Ko jan an ti nduaxin nichja ixi titika on ndo Cristo.

⁸ Tja on ixi kain sen xi xronichje e sen ndo Dio ngixe i ti no ste sen, ko tsjatsi in itja sen ixi tjúa aséen sen, ko tsjakaxin a kichuu sen, ni tsoñao a kichuu sen.

⁹ *Ko tja on ixi kain nchri ndako tsintetsáa nchra ko tsake a nchra manta ntarichi ti ícha sinchexroan ni xi, ko tsite a jaa nchra ixi tsikonni tsango tsoxruanta kui te jaa nchra, ko tsake a nchra ntachika oro o ixro tjintee.

¹⁰ Jaña sinche e sen nchra ti jian xranchi tikinixin nche e kain nchri tajon juasie ngajin ndo Dio.

¹¹ Ko nchakon tsin en sen nchri chijnie ndo Dio xrotenko sen ko tsitikaon sen kain nge e.

¹² Ko tajon a jan an juachaxin ixi sen nchri xronichja sen ti jii kueya chujni ko je e sen tsetuan a sen ngajin ndoxi e sen ko xrokonda xrotenko sen,

¹³ ixi ndo Dio sa ó juinchéña ndo ndo Adán ko tjume e jan Eva.

¹⁴ Ko je a ndo Adán kuitikaon ndo juancheya tsindachro Xixron anxrée. Je e jan Eva kuitikaon jan nge e nichja Xixron anxrée, me e kuama jan ijie.

¹⁵ Ko nchri xro an tson en nchra siá sinchejongí e nchra chjen en nchra ko sinchekangi nchra xjan, ko siá tsitikaon nchra ndo Dio ko siá xrochuntia nchra ndo ko xrotjue e nchra ndo ko jian xroxraon nchra.

3

Xrokonda jian sinche e sen tjaun tsituan an ni ngo

¹ Nduaxin ji i: siá xrojan ngisen tjaun ícha tsituan an sen ni ngo, jian ixra tjaun sen.

² *Méxin ngisen tjaun sinche e ixra ji i ko ícha tsituan an sen, xrokonda jian tsake e sen, jaña xro an chujni xronichjangí e sen ko tsjankata i na sen xrojan ijie, ko kaxon xrochónnda sen naakua janchri e sen, ko jian xroxraon sen nge e sinche e sen, jaña chujni jian xronichja na ixi je e sen, ko jian xronichje e sen ni tsiji ndo a sen, ko jian tsono e sen nge e sinchekuen en sen chujni.

³ Ko xrokonda xrokuan i sen ko tsetokao a sen chujni. Xrokonda tsingijna sen chujni ko jian xronichje e sen chujni ko xrotjue a sen tomi.

⁴ Ko jian tsetuen en sen ndo a sen ko tsetuen en sen chjen en sen ixi tsitikaon xjan ko xrochónnda xjan juasaya.

⁵ Ixi ngisen noe a tituan an ndo a, ¿xranchi tsituen en sen sen ningue ndo Dio?

⁶ Ko ngisen tjaun sinche e ixra ji i, je a naa sen nandá kuaxi kuitikaon ndo Dio, ixi ngisen nandá titikaon ndo ba sinchejé aséen sen ko tsama sen ijie xranchi kon en Xixron anxrée.

⁷ Kaxon xrokonda jian sinche e sen ixi jaña chujni chúxin a chijnie ndo Dio jian xronichja na ixi je e sen, ko jaña sinche a sen ti ndako a tjaun Xixron anxrée.

Xranchi sinche e sen chónnda ixra diácono ngaxin in ni ngo

⁸ Kaxon sen kuayé e ixra diácono, xrokonda jian xronichja na ixi je e sen, ko xrokonda nduaxin sinche e sen ti ndachro sen, ko xrokuan i sen, ko tsayé a sen tomi ixi tson en naa ixra ndako a.

⁹ Jaña kaxon chijni jian kuayé e sen xrokonda jian tsitikaon sen ko jian xroxraon sen.

¹⁰ Sen tjaun sinche e ixra diácono sa ó tsatsinga kaxin nchakon tsjakoxin sen ixi nduaxin jian titikaon sen, ko tjume e chao sinche e sen ixra me e.

¹¹ Jaña kaxon sen nchri xrokonda jian xronichja na ixi je e sen ko xronichja i sen ti juancheya ko ti ndachro sen xrokonda nduaxin sinche e sen.

¹² Sen diácono je o naa janchri e sen xrochónda sen ko jian tsetuen en sen chjen en sen ko sen ndo a sen.

¹³ Ixi sen jian sinche e ixra, chujni xrochónde e na sen juasaya ko tsosue a sen xronichja sen xranchi kuaxi kuitikaon sen Ncháina Jesucristo.

Chijni nduaxin titika onna

¹⁴ Maski tja on tuinxin tsjasotsja a, jai kjin an xroon ji i

¹⁵ ixi siá tsonchrjenna, ja a tsono a xranchi sinche e ixra ngajin sen kichuuna, sen tikinixin en ndo a ndo Dio, ndo jichón. Sen ni ngo xrokonda jian tsitikaon sen chijni nduaxin.

¹⁶ Ko ti chijni nduaxin kuaye ena me e chijni ícha tjintee ko chujni kuachúxin a na chijni ji i ko nduaxin nge e titika onna:

Ndo Jesucristo jongí e ndo nti i nunte xasintajni* xranchi naa chujni;

Ko Espiritue ndo Dio juakoxin ixi ndo Jesucristo jian ndo.

Ko sen ángel bikon sen ndo

ko kaxon nchijí nunte xasintajni kuin en na nge e kuanichja ndo

ko kueya chujni jii ngata a nunte stetitikaon na ndo.

Ko tjume e ndo Dio kuayé e ndo ndo Jesucristo ti jii ngajní.

4

Ni tsitikaon a ndo Dio

¹ Ndachro Espiritue ndo Dio nchakon tsaxi tsjexin nunte xasintajni, kaxin sen kuitikaon ndo Dio tsachrjendáa sen ixi xrorué e sen espíritu xi ña i, xi ncheya, ko tsitikaon sen nge e tjako xi nche e xrée Xixron anxrée.

² Je e sen tsin en sen nge e ndachro chujni ncheya, chujni xraxaon a ndako, ni tsosue a nche e ti ña i.

³ Ko ni ji i tsituan an na ixi tsute a sen ko sine a sen kain nge e ti ineni juinchéña Ndo Dio, ko ti juinchéña ndo Dio chao sine sen titikaon ndo ko chúxin chijni nduaxin, me e tsajon sen juasaya ngajin ndo.

⁴ Ixi jian kain nge e juinchéña ndo Dio ko jua i xrondachrona je a jian; ko hora sinena xrokonda tsajonna juasaya ngajin ndo,

⁵ ixi chijnie ndo ko ti nichje ena ndo, me e sinchenchaonxin ndo kain nge e sintena.

Naa sen jian nche e xrée ndo Jesucristo

⁶ Ko siá ja in sinchekuen én sen kichuuna, me e ja a naa xi jian nche é xrée Ncháina Jesucristo, ko kain nchakon tangia chijnie Ncháina ko chuntia ngajin ndo.

⁷ Titikaon a ngixeko chijni tseki a na ixi xro an xrée me e. Ja a titikáon Ncháina ko ja a nche e nge e tjaun ndo Dio.

⁸ Ko maski chujni tinga o ngixe i ejercicio nche e na ixi cuerpoena ixi jaña tingijna tsonié a na ko ícha tjintee ti tsitikaonni ndo Dio, ixi ji i tsingijna tsjachani jian tsake eni jai ko ti tsechónni kain nchakon.

⁹ Chijni ji i, chijni nduaxin ko chijni ji i xrokonda tsayé e kain chujni.

¹⁰ Méxin jajna nche ena xrée ndo Dio maski chinga nchejna chujni ixi titika onna ko stechon enna tsij ndo Dio, ndo jichón, ixi je e ndo nduaxin tsingijna ndo chujni ko jajna ícha ixi jajna titika onna ndo.

¹¹ Kain ji i tjakua ko tetuen én sen sinche e sen.

¹² Jian nche e ixi jaña tsjakua ngajin sen titikaon Ncháina Jesús. Ja a jian tsje e nge e nichja, ko chónde e sen juasaya,* jian tsje e xranchi tjue e sen kichuua ko xranchi chuntia ndo Dio, xranchi jian tsajia. Ja in sinche e, me e tsjanoai a sen maski tsango chajan ja a.

¹³ Ti xratjaso a jan an, ja a nichja chijnie ndo Dio ixi tsin en kain chujni ko nchexraxaon sen kichuuna xranchi sinche e sen, ko nchekuen én sen chijnie ndo Dio.

¹⁴ Nchetjáña ia juachaxin tjáa ndo Dio nchakon sen tetuan an ni ngo bake e itja sen ngata a jáa. Me e kuayé é ixi juachaxien ndo Dio.

¹⁵ Jian nche é ixra ji i ixi jaña kain chujni xrotsje e na ixi jian rirue é ndo Jesucristo.

¹⁶ Jian tsje e xranchi nche e ko ti nchekuen én sen kichuuna chijni nduaxin, jian titikáon, ko siá jaña sinche é, me e tsarichuan kain nchakon ja a ko kaxon kain sen sinchekuen en.

5

Xranchi xronichje ena sen titikaon ndo Cristo

* 3:16 xasintajni mundo * 4:12 juasaya respeto, honor

¹ Chaxro nichje é sen tachrí; tuyakute a sen. Ko ti xrondache sen, nichje é sen xranchi xronichje é ndotáa. Ko kain chajan nichje é chán xranchi naa xjan kichuua.

² Sen nachrí nichje é sen kaxon xranchi xrokjui janáa. Ko nchrichajan, nichje é nchrichan xranchi nichje é naa nchrichan kichuua; kain sen, jian nichje e sen.

³ Ko tingijna nchri ka an siá nduaxin xro an sen ndo a nchra chónda nchra.

⁴ Ko siá xrojan nchri ka an chónda chjen en nchra o xjantié nchra, je e sen me e tikinixin en sen tsingijna sen nchra ko kaxon xrokonda tayakon en sen sen ndo a sen, janée sen o Ndotée sen, ixi kain ji i nche e ndo Dio juaxruxin.

⁵ Sen nchri nduaxin ka an ko je o sen tsikitu e sen, ícha xrochuntia sen ndo Dio ko ícha tinóatée sen ngajin ndo ko nichje e sen ndo tiie, nchakon.

⁶ Ko sen nchri, sen ka an, ndako a nche e, sen nchri me e xranchi tsiken en sen jii sen maski jichón sen.

⁷ Tetuen én kain sen tsitikaon sen ti nchekuen en sen, ixi jaña xro an chujni xronichja ndako a ixi je e sen.

⁸ Ko siá xrojan ngisen tsingijna i sen kichuu sen ko sen ndo a sen, sen me e tjako sen ixi nduaxin a titikaon sen ndo Dio ko ícha ña i sen ixi ni chúxin a ndo Dio.

⁹ Ko ti tsixintaxin xroon sen nchri, sen ka an, je o tsixintaxin sen chónda ní ti ikán* o ícha nano, ko je o tsixintaxin sen nchri kuachónda naakua ndoxi e.

¹⁰ Kaxon xrokonda tsichuxin na sen nchri, sen ka an ixi ndako nche e sen, xranchi tjaun ndo Dio: sen nchri ka an chaxro juinchekangi sen chjen en sen ko sen ka an jian nichje e sen kichuu sen ko jian kuiye e sen ni kuiji ndo e sen, ko jian bingijna sen sen titikaon ndo Cristo, ko bingijna sen ni ni e, ko kaxon bingijna sen ngajin ni chónda juachjaon, ko juinche e sen kain ixra jian.

¹¹ Ko tasintaxin anta nchri, sen ka an, xranchrícháján, ixi ba sinche e sen juaxruxin tsute e sen íjngo ko tsintu e sen ti ndachro sen xrojuinche e sen ixra ngajin Ncháina Jesucristo.

¹² Kondeexin me e tsama sen ijie ixi sinchejexin a sen ixra xrojuinche e sen ngajin Ncháina.

¹³ Ko kaxon sen nchri, sen ka an, xranchrícháján chrijko sen nchia ko nchia, ko se e sen ko je a je o me e; kaxon teki sen chijni konde a sen ko tajon ro a sen ko nichja sen chijni ndako a.

¹⁴ Méxin tja on ixi sen nchri, sen ka an xranchrícháján cháña tsute e sen íjngo ko xrochónda sen chjen en sen ko jian tayakon en sen ndo a sen. Ko jaña tsajon a sen juachxin ngajin Xiña i ixi tsjangí e xa sen.

¹⁵ Ixi kaxin sen nchri, sen ka an o ngaxiton sen ko sterué e sen nge e tjaun Xiña i.

¹⁶ Siá xrojan sen kichuuna, chónda sen nchri ka an, xrokonda tayakon en sen sen ka an ixi jaña sen ni ngo ísingijna i sen nchri ka an me e, ixi ícha jian tsingijna sen nchri ka an nduaxin xrokonde e.

¹⁷ Ko xronichjana jian ixi sen tituan an ni ngo ko xrokonda xroxenge e sen na ko ícha jian tson en ji i ngajin kain sen nchekuaína ko tjakoína chijnie ndo Dio.

¹⁸ *Ixi chijnie ndo Dio ndachro: “Take anta ino ro a kuxinta nche e ixra”, ko kaxon ndachro: “Sen nche e ixra tikinixin en sen xroxenge e sen na.”

¹⁹ Tian a siá xrojan ngisen tjankata a ijie ngajin sen tetuan an ni ngo siá ko a yuu o ní sen xrochronga nge e nduaxin kon en.

²⁰ Ko sen nduaxin chónda ijie, nichje é sen ngataoxin ikon kain sen ni ngo ixi jaña sen ikaxin jian xroxaxaon sen ko ísinche a sen ti ndako a.

²¹ Tjanča a ngajin ikon ndo Dio ko Ncháina Jesucristo ko sen ángel kuinche e ndo ixi titikáoaan kain ji i ko xraje o nche e ngajin kain chujni a chuxian sen o na i.

²² Ko tinche a jaña ngisen sinche e ixra ni ngo, ícha jian xrotsje e nge e tjakoxin sen, ba kaxon ja a tsama ijie xranchi je e sen. Ko ja a tsje e ixi xro an ijie tsama.

²³ Ko ja a nanaó toni a ixi tíin tsée, ti a je o inda. Cháña ti ia nchíin xranvino.

²⁴ Jíee kaxin chujni sa o tonoxin ti xratóne a na ijie. Ko jíee ikaxin sen ícha taka i tonoxin.

²⁵ Jaña ton en kaxon kaxin chujni nche e ixra jian taka tonoxin, ko ikaxin maski jai tonoxin a, íjngo nchakon xrokonda tonoxin.

6

¹ Ko ngisen nche e ixra xrokonda tsitikaon sen ngajin ni xrée nche e sen, ko jaña xro an ngisen xronichjangí e nombrée ndo Dio ko xronichjangíe a na chijni nichjana, chijnie ndo Dio.

* 5:9 ikán veinte 5:18 Mt. 10:10; Lc. 10:7.

² Ko sen nche e ixra ngajin sen titikaon ndo Cristo, tsintue a sen tsitikaon sen ngajin sen kichuu sen. Ko ícha jian xrojuinche e sen ixra xri ó no e sen xri sen tajon ixra, je e sen naa sen titikaon Ncháina ko xrotjue e kichuu sen. Ja a nchekuen éñ sen kain ji i.

Ixi nge e titika onna tsake exinna juaxruxin

³ Siá xrojan na tjako na nge e ndako a ko take a na juaxruxin xri chijnie Ncháina Jesucristo ko kaxon nge e titika onna,

⁴ ni me e je o nchejé aséen ko xro an nge e no e na. Nichjako na nge e ninta, ko ji i xranchi naa ichin xri ji i ti xri to chujio chujni ko te to na, ko ti nichjangi e kichuu na ko ti tjue a kichuuna kaxon.

⁵ Chujni jaña nche e chaxro a xraxaon na, kain nchakon te to na ko noe a na ti nduaxin. Xraxaon na xri i tsitikaon na Ncháina jaña tsjacha na kueya tomi. Méxin tingaxintuan ngajin chujni jaña xraxaon.

⁶ Ti titika onna Ncháina Jesucristo tsango tjintee, je o xri siá juaxruxin tsake eni xri je o nge e chónDani.

⁷ Ixi nchakon jaña jongína, xro an nge e bikuuna xasintajni ko kaxon nchakon tsen en na, xro an nge e satsiku una.

⁸ Méxin siá chondana nge e inena ko chondana manta stetsána xri me ó xrokujuna juaxruxin.

⁹ Ko sen tjaun kueya nge e xrochónDa, jua i tsjacha sen tsatsinga sen nge e tangi, ko me e nchengachrue sen; xri kueya nge e tjaun sen ko je a jian nge e xraxaon sen, ko me e tsj xri ti tsitjáñaxin sen.

¹⁰ Ko ti ícha tjue eni tomi, me e nue e kain nge e ña i, ko xrojan sen xraxaon sen xrochónDa sen kueya tomi, me e nchengachrue sen ko titikaon a sen Ncháina* Jesucristo, me e tangi tson en sen.

Nge e kuetuan an ndo Pablo ngajin ndo Timoteo

¹¹ Méxin ja a chujni nche e xrée ndo Dio, tintu é kain nge e ndako a ko rué e ti nduaxin ko xri kain asáan xroxraxaon ndo Dio ko titikáon ndo ko tjue é ndo ko xrokonda ningakuen a chujni ko nchejé a asáan.

¹² Tétua ngajin kain nge e ña i xri titika onna nge e jian ko xri nichjii asáan titikáon Ncháina ko jaña tsjacha tsarichuan kain nchakon xri ndo Dio kuiya a ndo ko jian juinche e nti i nge e kuetuan an ko kuitikáon Ncháina Jesucristo ko kuin en ko bikon kueya chujni.

¹³ *Ngatoxin† ikon ndo Dio, ndo tajon juachaxin jichón kain nge e, ko ndo Jesucristo, ndo juako ngajin xi Poncio Pilato xri titikaon ndo ndo Dio, tjancha a

¹⁴ xri tsitikaon ko tatsían kain nge e kuetuan an ndo Dio ko tindoxin a nge e no a, xri jaña xro an chujni tsjankata a ijje tsitjaja nchakon xrokjan Ncháina Jesucristo.

¹⁵ Tsitjaja nchakon kuinche e ndo Dio, ndo chónDa juachaxin tetuan an, ndo Rey tetuen en kain ni rey ko Nché kain chujni, je e ndo sinche e ndo kain ji i.

¹⁶ Je e ndo Dio nai a tsen en ndo ko ti jii ndo tsango tingasáña ko jua i tsonchjii e ninaa chujni ti jii ndo. Ko xro an ngisen bikon ndo ko jua i tsikon sen ndo. Je e ndo tayé e ndo kain juasaya xri je e ndo chónDa ndo kain juachaxin tetuan an ndo kain nchakon. Jaña tson en.

¹⁷ Ko ni chónDa kueya nge e nti i nunte xasintajni, ndache na xri sinchejé a aséen na ko tetuen en na xri xrochúntia i na nge e chónDa na xri kain a nchakon xrochónDa na ti tjintee. Cháña tsitikaon na ndo Dio, ndo jichón, xri je e ndo tsajon ndo kain nge e xri je e ndo tjaun ndo juaxruxin tsintee na.

¹⁸ Ndache na sinche e na ti jian ko tsingijna na ngisen xro an nge e chónDa ko tsonchjeya na nge e chónDa na.

¹⁹ Jaña xrochónDa na nge e tjintee jii ngajni ko tsjacha na tsechón na kain nchakon.

Juexin kuetuan an ndo Pablo ngajin ndo Timoteo

²⁰ Ja a Timoteo, tayakon en ixra tjáa ndo Dio ko tintu e ko tien a nge e nduaxin a nichja chujni. Ndachro na xri ícha no e na ko tjinte a ti no e na.

²¹ Jaña xraxaon na xri noe a na ko tjume e tsingachrue na ko í chúntia a na ngajin Ncháina Jesucristo. Ndo Dio sintanchaoan ndo. Jaña tson en.

* 6:10 Ncháina Señor Ncháina Jesús q Ncháina Dio

6:13 Jn. 18:37.

† 6:13 Ngatoxin delante de

Xroon yuxin tsikjin ndo Pablo xruen en ndo ndo Timoteo

Ndo Pablo nichje e ndo ndo Timoteo

¹ Jan an, Pablo, ndo kuinche e ndo Jesucristo ixi sinta a xrée ndo ixi jaña tjaun ndo Dio, xronichja a chujni xranchi tsitikaon na ndo Jesucristo ko me e nai a tsen en na,

² *ikjin xroon ji i xruan an kichian Timoteo. Ja a xranchi xrokjui chjan na ko tsango tja a. Ndotáina Dio ko Ncháina Jesucristo sintanchaoan ndo ko tsikonóa a ndo ko xrotjáa ndo juaxruxin tsake é.

Chijni tsintua a titikaon ndo Timoteo

³ Ti nichja a ndo Dio tiie nchakon, xraxa on ixi ja a ko tajon juasiana ngajin ndo. Ko ixi aséenna tjúa nta a xrée Ncháina Jesucristo xranchi ixra bajinche e sen tachri ina xranchrjen ó sa ó.

⁴ Ko xraxa on jan an nchakon tsjanga ja a ixi jan an, tja on tsikuan íjngo me e jaña tsake e juaxruxin aséenna.

⁵ Ó nóna ixi jian chuntia Ncháina Jesucristo xranchi sa ó juinche e janachri a Loida ko janáa Eunice ti kuitikaon sen Ncháina Jesús, ko nóna ixi kaxon ja a jaña titikáoaan ndo.

⁶ Méxin, jai ntaxraxaoan ixi nchekangia juachaxin tjáa ndo Dio nchakon bakée tjáana ngata a jáa.

⁷ Ndo Dio kuajon a ndo Espíritue ndo ixi xroxronkana. Na i. Kuajon ndo Espíritue ndo ixi xrochondana juachaxin ko xrotjue ena chujni ko jian xroxraxaonna.

⁸ Méxin tosua ia chronga titikáoaan Ncháina Jesús ko tosua ia ixi jan an jija na ndo a chjiso ixi tjako chijnie ndo. Tosua ia, cháña chon én ti tangi tson an ixi tjakoa chijni tingijna chujni tsechón na kain nchakon ixi kuaye é juachaxin kuajon ndo Dio.

⁹ Ndo Dio kuajon ndo juachaxin tsechónna kain nchakon* ko kuinche e ndo jáina ixi jian tsojuna. Je a ixi jian juintu una me e tsechónna kain nchakon. Na i. Ixi juasie ndo Dio kuinche e ndo jáina tsitikaonna ndo Jesucristo; ti xrako a nunte xasintajni ó tsixraxaon ndo jaña tson en ixi tsango tjuajna ndo.

¹⁰ Jai ó juako ndo Dio ixi tjuajna ndo ixi jii ngisen tajon juachaxin tsechónna, ndo Jesucristo. Je e ndo juinchetjáña ndo juachaxin kuachónna ti tsen en chujni ixi xechón ndo íjngo. Ixi chijnie ndo konojna xranchi tayé ena juachaxin tsechónna kain nchakon ko nojna ixi ti tsechónna jua i tsitjáña.

¹¹ *Ndo Dio kuetuanna ndo tsjako chijnie ndo ko xruan anna ndo sintakuan an chijnie ndo chujni ste kain tjajna.

¹² Méxin tangi ritjén ko tosuana i ixi chuxin jian ngisen titika on. Nóna chónna ndo juachaxin tsayakonna ndo tsitjaja nchakon xrokjan ndo íjngo.

¹³ Xranchi jian juako a, jaña nche e kain nge e jian ko tjue é kichuuna ixi chuntia Ncháina Cristo Jesús.

¹⁴ Ixi juachaxien Espíritue ndo Dio jii ngajian, tintue a tsindoxin na chijni tjáa ndo Dio ko jaña tsitjáñai a.

¹⁵ Ja a ó no a ixi kain sen nunte Asia kuintuna sen ko kaxon ndo Figelo ko ndo Hermógenes.

¹⁶ Tjánchá a Ncháina ixi tsikonóe e ndo sen ste ndo a ndo Onesíforo ixi je e ndo nanaunka bingijnana ndo, ko kosue a ndo maski jan an rixin in ndo achjiso.

¹⁷ Tjume e kuiji ndo tjajna Roma ko juéena ndo ti kuitjajana ndo.

¹⁸ Tjánchá a Ncháina ixi tsikonóe e ndo ndo Onesíforo nchakon xrokjan ndo, ixi ó no a jian xranchi bingijnana ndo ti bake e tjajna Éfeso.

2

Tsujuna xranchi naa soldado jian kondée ndo Jesucristo

¹ Ja a chjan na soji take é ixi juachaxin tjáa ndo Jesucristo ixi titikáoaan ndo.

² Ti kuin en juintakuan an kuin en kueya chujni, ji i tetuen én sen jian tsitikaon Ncháina ko jaña tsjako sen ngajin kaxin chujni.

³ Ja a maski kueya nge e tangi tsatsinga, soji take é xranchi naa xi soldado ne e ndo Jesucristo.

⁴ Xro an xi soldado tjaun xa sinche e xa inaa ixrā ixi je e xa tjaun xa sinche e xa naa ixrā jian ixi jaña nchée xa, ti tetuen en xa, juaxruxin tsake e xa.

⁵ Jaña xranchi naa ngisen tinga, jua i tsayé e sen nge e tixinixin tsjacha sen siá tsitikaon a sen nge e kuituen en sen.

⁶ Kaxon xranchi ngisen tenga chjaka xrokonda sinche e sen ixrā ko jaña je e sen ícha sa ó tsayé e sen nge e kóna ngata a nunte e sen.

⁷ Xraxaoan jian kain nge e ntatjua ko Ncháina tsingijna ndo tsienxian kain nge e.

⁸ Kain nchakon xraxaoan ndo Jesucristo, je e ndo xechón ndo ko kuachrjenixin ndo sen ndo a ndo rey David. Ji i chijni jian tjakō jan an.

⁹ Ixi tjakō chijni jian, méxin tangi ritjén ko xraxin inna nā ndo a chjiso xranchi naa xi ndako a nche e ko chijnie ndo Dio je a jije e chijni xranchi jan an.

¹⁰ Ko tokuaxina kain nge e tangi tatsinga ixi jaña ikaxin sen kuinche e ndo Dio xrochónnda sen juachaxin tsechón sen kain nchakon ixi tsitikaon sen ndo Jesucristo.

¹¹ Chijni nduaxin ji i:

Siá jāina kuen enna xranchi je e ndo, kaxon tsechónna ko kain nchakon tsojonna ngajin ndo.

¹² *Siá tangi tsojuna xranchi juinchekaon nā je e ndo, kaxon tsayé ena juachaxin tsojuna ti tetuan an ndo.

Ko siá xrondachrona chuxin ana ndo, kaxon je e ndo xrondachro ndo ixi chuxin a ndo jāina.

¹³ Maski ítsitikaon ana ngajin ndo, je e ndo tsintuna ina ndo ixi je e ndo ncheya i ndo.

Naa ngisen nche e ixrā jian

¹⁴ Nchexraxaoan sen kain ji i. Ko ndache sen ngajin ikon Ndo Dio ko tsjakaxin a kichuu sen ixi ngixe i chijni ixi tjinte a me e; je o nchetjáñajin chujni tin en.

¹⁵ Nche é jian xranchi naa ngisen chónnda i nge e tsosuxin ngajin ndo Dio ixi ndako tjakoa chijnie ndo.

¹⁶ Nichja ia ngixeko nge e ti nichja ngixeko chujni, ixi ni nichja jaña ícha taka tsitjáña nā.

¹⁷ Ko ti ndako a tjako nā me e xranchi naa ichin renga. Jaña kon en xi Himeneo ko xi Fileto.

¹⁸ Je e xa kuintu e xa chijni jian ixi ndachro xa ó kuatsinga nchakon xechón chujni. Ko jaña ncheya xa ngajin ikaxin sen ó tsikitikaon ndo Cristo.

¹⁹ Ko sen jian titikaon ndo Dio, je e sen ste sen xranchi naa ixro jua i tontengi ko chónnda sen chji e ndo Dio, ko chijnie ndo Dio ndachro: “Ncháina chúxin ndo ngisen titikaon ndo”, ko kaxon: “Kain sen titikaon ndo Cristo xrokonda tsintu e sen kain nge e ti ndako a.”

²⁰ Ko ngaxin in naa nchia ijié, chónnda nā itsjé traste, kaxin tsikóñaxin chika oro ko ikaxin chika plata. Kaxon ikaxin tsikoña ixi ntāa ko ikaxin tsikoña ixi inche, ko kaxin tunda nchakon jii kia ko ikaxin ngixe i nchakon tunda.

²¹ Méxin xrokonda tsintu e sen kain nge e ndako a, jaña jāina kaxon xrokonda tsontjúa aséenna, me e chao sinche ena xrée Ncháina Jesucristo.

²² Méxin ja a tintu é kain ti ndako a nche e ikaxin chajan titikaon a Ncháina. Nche é kain nge e jian ko chuntia ndo Cristo ko tjue é kain chujni ko juaxruxin take é ngajin kain sen tjúa aséen titikaon Ncháina.

²³ Ja a nichja ia chijni xro an xrée ixi ó no a chijni me e ncheketoni.

²⁴ Ixi sen nchexrée Ncháina tetokao a sen sen kichuu sen. Na i. Jian nche e sen ngajin kain chujni. Jian sinchekuen en sen chujni ko xroningakuen a sen chujni.

²⁵ Jian xronichje ena chujni titikaon a ixi jian sinche e nā, xrochon enna ixi nchéxin ndo Dio tsingijna ndo tsindoxin nā ti ndako a xraxaoan nā ko jaña xrochuxin nā chijni nduaxin.

²⁶ Jaña tsantje e ikon nā ko tsienxin nā, me e satsinge e nā ti tjaun Xixron anxrée sinche e nā.

3

Xranchi sinche e ni nunte xasintajni nchakon tsjexixin

¹ Xrokonda tsono a ixi tsaxi tsij juachjaon nchakon tsjexin nunte xasintajni.

² Tsake e itsjé chujni, ni titikaon a Ncháina, je o xrotjue e nā nge e tjaun nā, ko xrotjue e nā tomi, ko sinchejié nā aséen nā ko xronichjangi e nā ndo Dio. Tsitikaon a nā ndotée nā ko janée nā, ko tsajon a nā juasaya ngajin sen, ko tsajon a nā juasie nā ngajin chujni nichja chijnie ndo Dio.

³ Xrotjue a nã ni kichuu nã, ko tsikonóe a nã ni kichuu nã, ko tsango xronichja nã je a ti nduaxin kondee inaa nã, ko jua i tsetuen en nã aséen nã, ko tsango changa nã ko tsango ningakon en nã kain nge e jian.

⁴ Jii chujni jua i chũntiani ngajin nã, ko tosue a nã nge e nche e nã, ko tsango nchejié aséen nã, ko tjue e nã kain nge e ndachro aséen nã ko titikaon a nã ndo Dio.

⁵ Je e nã sinche e nã xranchi sen titikaon ndo Dio ko je a nduaxin me e. Titikaon a nã juachaxien ndo Dio.

Méxin ja a tingaxintuan ngajin ni jaña nche e.

⁶ Ko ste kaxin nã nche e nã juaxruxin tixin in nã ndo a chujni ko ncheye e nã nchri ninta, nchri yama ijie, nchri nche e kain ti ndako a.

⁷ Kain nchakon tjaun nchra tsangi nchra naa nge e natjúá, ko nai a titikaon nchra chijni nduaxin.

⁸ Ko xranchi xi Janes ko xi Jambres batingakon en xa ndo Moisés, ti baketuan an ndo, jaña jai ni me e ningakon en nã chijni nduaxin. Tsango ña i xraxaon nã ko titikaon a nã nge e ti jian.

⁹ Ko tsjacha i nã sincheya nã ixi kain chujni ó tsono e nã ixi ni ñã ninta nã; jaña kon en kaxon kayui ni batingakon en xrée ndo Moisés.

Juexin kuetuan an ndo Pablo ngajin ndo Timoteo

¹⁰ Méxin ja a ó kuangia nge e juntakuan an. Ó no a xranchi bake é ko ó no a ixrã junta a. Ó no a xranchi titika on Ncháina ko no a ixi taka i toña o ko no a xranchi tjua a chujni. Ko no a ixi maski ningakonna nã, kuíntua i xrée Ncháina,

¹¹ *maski bengina nã ko tangi bake é ko kain nge e tangi kuatsinga tjajna Antioquía ko Iconio ko Listra ko ó xrokóñana nã ko tangi bake é, ko jaña Ncháina bingijnana ndo kuatsinga kain ji i.

¹² Kain sen tjaun tsitikaon ndo Cristo Jesús ko tjúá aséen sen, xrokonda tangi tson en sen kaxon.

¹³ Tjume e ni ña i ko ni ncheya, ni me e ícha ndako a sinche e nã ko ícha sincheya nã ko kaxon chujni sincheya ngajin je e nã.

¹⁴ Ja a jian xraxaon ko tindoxin a nge e juntakuan an. Ja a ó chuxian ngisen juintakuan an.

¹⁵ Xranchioan ó kuano a xranchi ndachro chijnie ndo Dio, ko me e noaxian ixi ndo Cristo Jesús tsajon ndo juachaxin tsarichuan kain nchakon.

¹⁶ Kain xroon chijnie ndo Dio tsikóñaxin ixi juachaxien ndo, ko me e tsondaina ixi tsjakona chijni jian, ko ji i tsonóñaxinna xranchi xroxraxaonna ko jian tsjakona chijni nduaxin,

¹⁷ ixi ngisen titikaon ndo Dio jian tsono e sen ko jian sinche e sen kain ixrã.

4

¹ Ngatoxin* ikon ndo Dio ko Ncháina Jesucristo, ndo tsji xranchi rey sinchéña ijie ngajin kain chujni stechón ko chujni tsiken en, tetuan an

² ko ntatsa añaon tsjakoa chijnie ndo Dio ixi nchijií asáan, maski á tsin en nã o na i. Nichje é nã jian ixi tsitikaon nã ko nchexraxaon nã jian. Chon éñ indao tsiénxin nã ko jian tjakoa chijni.

³ Ixi tsji nchakon ítjaun a nã tsin en nã chijni jian. Tsjée nã itsjé ni sinchekuen en nã ko xronache nã ni me e je o tsjako nã nge e tjaun nã tsin en nã.

⁴ Tsintu e nã chijni nduaxin ko tsitikaon nã ngixe i nge e tseki e nã chujni, ti nduaxin a.

⁵ Méxin ja a jian xraxaon ko soji take é nchakon tangi sinta a nã. Nchekuen éñ nã chijnie ndo Dio, ndo tajon juachaxin tsechónna; jian nche é ixrã chonda.

⁶ Ó tsji nchakon jan an tangi sinchena nã ko ó tuinxin tsji nchakon tsen enna jan an.

⁷ Jan an juácha kuatsinga kain juachjaon ko juntajexin xrãna, ko jian chuntia Ncháina Jesús.

⁸ Ko jai je o richon an tsayá a naa corona ixi jian bake é nti i. Ji i tsajon Ncháina nchakon tsji ndo. Je e ndo ndako sinchéña ndo ijie. Ko je a jan on tsayá a corona me e. Na i, kaxon kain sen tjue e ndo ko stechón en sen nchakon tsji ndo.

Ndo Pablo kuetuan an ndo tsitsje e sen ndo

⁹ Chjakon annta ixi taka tsji inta, tsitsjenaninta,

¹⁰ *ixi xi Demas kuintuna xa ixi ícha tjue e xa nge e jii nunte xasintajni ko satsikji xa tjajna Tesalónica. Ndo Crescente sakjui ndo tjajna Galacia ko ndo Tito sakjui ndo tjajna Dalmacia.

¹¹*Je o ndo Lucas riki an nti i. Tijée ndo Marcos ko tsikua ndo ixi je e ndo chao tsingijnana ndo ixra chonda nti i.

¹²*Ndo Tíquico xruan an ndo sakjui ndo tjajna Éfeso.

¹³*Nchakon tsji ia, tsikua manta tsaritsa a kuintu a tjajna Troas ndo a ndo Carpo ko kaxon librona ko kaxin xroon ícha xrokondana.

¹⁴*Xi Alejandro, xi nche e ixra chika, tsango itsjé nge e ndako a juinchenaxa. Ko Ncháina tsetuan an ndo tsjengaxa na kain nge e ti ndako a juinchenaxa.

¹⁵Ja a jian tsje é ba xrojan nge e sinta a xa, ixi je e xa tsango ningakon en xa chijnie ndo Dio tjakona.

¹⁶Nchakon ikjui ngajin ni nchéña ijie ko ntatjan na ixi jan an xro an nge e ndako a juinta a, xro an ngisen bingijnana. Kain sen kuintuna sen jan on. Ko jai tjánchá a ndo Dio ixi tsjankata i ndo sen ijie ixi jan on kuintuna sen.

¹⁷Ko Ncháina bingijnana ndo kuajon ndo juachaxin ixi jian sintakuan an chujni chijnie ndo tajon juachaxin nai a tsen en na. Kaxon kuin en kain chujni je a judío. Jaña Ncháina bingijnana ndo ixi juine ana kujenda.†

¹⁸Ko Ncháina xratsingijnana ndo ixi xro an nge e tsónna. Je e ndo tsayakonna ndo ko chao tixin in ti tetuan an ndo ngajni. Je e ndo tsayé e ndo juasaya kain nchakon. Jaña tson en.

Ndo Pablo juexin nichja ndo

¹⁹*Tájuan juajna ngajin jan Priscila ko ndo Aquila ko sen ndo a ndo Onesíforo.

²⁰*Ndo Erasto kuitu e ndo tjajna Corinto ko ndo Trófimo kuitu e ndo tjajna Mileto ixi koni e ndo.

²¹Chjakon an tuinxin tsji ia ixi xrati a nchakon tonkin. Ndo Eubulo ko ndo Pudente ko ndo Lino ko jan Claudia ko kain sen kichuuna xruan an sen juajna.

²²Ncháina Jesucristo tsake e ngajian, ko ndo Dio sintanchaonnta ndo kainnta. Jaña tson en.

Xroon tsikjin ndo Pablo xruen en ndo ndo Tito

Ndo Pablo nichje e ndo ndo Tito

¹ Jan an, Pablo, nta a xrée ndo Dio ko ndo Jesucristo kuinche ena ndo ixi sintakuan an kain sen kuinche e ndo Dio ko kaxon ixi xrochuxin sen nge e chuntiana ko me e ti chijni nduaxin,

² ko xrochon en sen ti tsechón sen kain nchakon. Ndo Dio, ndo ncheya i, tsindachro ndo nduaxin jaña tson en ti xrako a nunte xasintajni.

³ Ko nchakon tsindachro ndo Dio ixi jaña tson en, je e ndo juinchenojna ndo chijnie ndo ixi ikaxin sen juakojna sen. Ko ndo Dio, ndo nchemé e jiejna, kuetuan an ndo ixi sinta a xrée ndo ko tsjako chijnie ndo.

⁴*Kjin an xroon ji i, Tito. Jan an tikuan xranchi chjan na ixi kayuina chuntiana ndo Jesús. Juasie Ndotáina Dio ko ndo Jesucristo, ndo nchemé e jiejna, je e ndo sintanchaoan ndo ko tsikonóa a ndo ko xrotjáa ndo juaxruxin.

Ixrą sinche e ndo Tito tjajna Creta

⁵ Nchakon kuintu a nunte jii ngusine ndachaoan* ndatin in Creta ixi xroketuen éen sen jii nti a xranchi sinche e sen ko xrojuinchejexian ixrą titjáña ko xrondachrua ngisen tsetuan an ngujngu ni ngo jii tjajna xranchi kuetuan an jan an.

⁶*Xrokonda ixi ngisen jitao en ni ngo jian sinche e sen ixi jaña xro an ngisen tsjankata a na sen ijie, ko xrochóna sen naakua janchri e sen, ko chjen en sen xrokonda tsitikaon xjan Ncháina Jesucristo, ko jaña xro an chujni tsjankata a xjan ijie ko jian tsitikaon xjan.

⁷ Jaña sen jitao en ni ngo, sen me e tikinixin en sen xrondachro sen xranchi tson en xrée ndo Dio, xrokonda naa ngisen jian tsake e ixi jaña tsjankata i na sen ijie. Ko sinchejie a sen aséen sen, ko taka i xrochjée sen juaña. Ko xrokuan i sen, ko tseto a sen ngajin chujni ko sincheya i sen ixi jaña xrotsé sen tomi tjúa i.

⁸ Ko jian tsayé e sen xrojan ngisen tsiji ndo a sen; xrokonda sinche e sen ti jian; jian xroxaxaon sen ko ndako sinche e sen ngajin ngixe i chujni. Ko nchijii aséen sen tsake e sen ngajin ndo Dio ko ixi nchijii aséen sen sinche e sen xrée nchée sen.

⁹ Ko kaxon xrokonda tsintue a sen chijni jian kuayé e sen ixi jaña tsjako e sen ikaxin sen kichuu sen chijni jian, ko kaxon jaña sinchenda sen aséen ni ndachro je a nduaxin nge e tjakona.

¹⁰ Ixi jii itsjé ni titikaon a, ni me e ste ngakjen en ni judío, ni nichja xranchi naa ni ninta ko ncheye e na ikaxin chujni.

¹¹ Ni me e xrokonda tsije eni ro a na ixi nchetjáñajin na kain sen ste naa nchia ixi je o tjako na nge e nduaxin a ko je a jian, ixi jaña tsjacha na kueya tomi.

¹² Naa xi tjajnée sen, tjajna Creta, tsindachro xa: "Kain chujni tjajnána tsango ncheya na ko tsango jie e na ko tsango ine na ko tsango se e na."

¹³ Ti tsindachro xa nduaxin me e. Méxin, Tito, soji nichje é sen kichuuna ixi jian xrochuntia sen ndo Dio.

¹⁴ Nichje é sen ixi tsien a sen kain nge e teki ni judío, ko tsitikaon a sen nge e tetuan an ni ningakon en chijnie ndo Dio, chijni nduaxin.

¹⁵ Ni jian xraxaon, kain nge e nche e na tjúa kaxon. Ko ngisen ndako a xraxaon, xro an nge e jian xraxaon na ko kain nge e xraxaon na, tjúa i.

¹⁶ Ndachro na ixi chúxin na ndo Dio, ko ti nche e na, me e tjakoxinna ixi je a nduaxin ti nichja na. Je e na tsango ña i na ko titikaon a na, méxin jua i nche e na naa nge e jian.

2

Tsjako ndo Tito chijni jian

¹ Kain nge e tsjako xrokonda jian sinchekuen en sen xranchi jitaxin chijnie ndo Dio.

² Nchekuen éen sen tachri ixi xrokuan i sen, jian sinche e sen ko jian xronichja sen ngajin kain chujni. Xroxaxaon sen jian, ko jian xrochuntia sen, ko xrotjue e sen sen kichuu sen ko taka i xrochjée sen juaña.

³ Ko kaxon jaña janachri jian sinche e jan ko xronichja i jan juancheya ko xrokuan i jan. Jian tsjakoxin jan ixi titikaon jan Ncháina,

⁴ ixi jaña tsjako e jan nchrichajan xranchi xrotjue e nchra ndoxi e nchra ko xranchi xrotjue e nchra chjen en nchra,

⁵ ko jian xroxraoan nchra, ko tjúá aséen nchra tayakon en nchra ndo a nchra ko tsingijna nchra kain chujni, ko tsitikaon nchra ndoxi e nchra ixi jaña xro an ngijni xronichjangí e chijnie ndo Dio titika onna.

⁶ Kaxon nchexraoan sen chajan ixi jian sinche e chán ko jian xroxraoan chán.

⁷ Ja a jian nche e kain nge e ixi jaña tsjakoxian ngajin kain sen ixi ja a jian. Ko nchakon tsjakoa, chjente a ko tjakoa ti nduaxin.

⁸ Nichja nge e nduaxin ixi xro an chujni tsjankata a na ijie, ko jaña tsosue e ni ningakon en chijni, ko xro an nge e ti ña i xrondachro na kondee jaina.

⁹ Tetuen én ni nche e ixra ixi tsitikaon na nchéé na ixi jian sinche e na ti kuetuen en na ko xronichjangí a na,

¹⁰ ko xrotsee a na nge e je a ne e na. Ko jaña kain na tsikon na ixi chijnie ndo Dio tsango chaxro chijni ko tajon ndo juachaxin tsechónni kain nchakon.

¹¹ Ixi ndo Dio juakojna ndo xranchi tjuajna ndo ixi je e ndo sinchemé e ndo jíee kain chujni sinká.

¹² Ti tjuajna ndo Dio nchekujna ixi tsintu ena kain ti ndako a ko kain nge e ña i xraxaonna. Ko jian tsake ena nunte xasintajni ko ndako xroxraoanna ko tsitikaonna ndo Dio.

¹³ Kaxon tjakojna ndo xranchi xrochon enna nchakon tsji ndo Dio na ina, ndo Jesucristo, ndo chónnda kain juachaxin ko tajon ndo juachaxin tsechónna kain nchakon.*

¹⁴ *Je e ndo kuen en ndo ixi jaina ixi tjaun ndo tsajon ndo juachaxin tsechónna kain nchakon ixi kuantsje ndo kain ti ndako a chondana, ko tjume e tsayé ena ndo xranchi naa chujnie ndo ko juaxruxin sintu una kain nge e tjaun ndo.

¹⁵ Tito, ji i tjako é sen ko nchexraoan sen ko tetuen én sen ixi juachaxien ndo Dio. Tintue a ixi xrojan ngisen xronichjangí a ko tsjanao sen ixi nge e tjakoa.

3

Nge e sinche e sen titikaon ndo Cristo

¹ Nchexraoan sen tsitikaon sen ni tituan an, ko tuinxin sinche e sen kain ixra jian.

² Ko xronichja i sen ninna nge e ti ndako a ixi sen kichuu sen, ko taka i tsoñao sen, ko xrotjue e sen sen kichuu sen ixi jaña tsjakoxin sen nge e jian chónnda sen ngaya aséen sen, ko jian xronichje e sen kain chujni.

³ Ixi jaina kaxon sa ó juinche ena xranchi ni ninta, ko baktikaon ana ndo Dio. Ndako a juinche ena, bakojuana juaxruxin ixi kain nge e ña i banche ena ko bakochjuyeina, ko baningakoina na, ko jaina kaxon baningakon ena chujni.

⁴ Tjume e ndo Dio, ndo tantsjengí e kain ti ndako a juinche ena, juakojna ndo ixi jian ndo ko tjue e ndo kain chujni.

⁵ Je e ndo juinchemé e ndo ti ndako a kuachondana, je a ixi jaina xrojan nge e jian juinche ena. Na i, ixi je e ndo bikonóajna ndo ko juinchemé e ndo ti ndako a juinche ena ko juinchetjúá ndo aséejna. Jaña jongíexinna íjngo ixi Espíritue ndo ko jai natjúá stechónna.

⁶ Ixi ndo Jesucristo, ndo juinchemé e ti ndako a juinche ena, méxin ndo Dio kuajon ndo Espíritue ndo.

⁷ Ko juasie ndo, juinchemé e ndo jíejna ko jaña tsayé ena juachaxin tsechónna kain nchakon.

⁸ Nduaxin chijni ji i, ko tja on ixi tsjakoa kain ji i ixi kain sen titikaon ndo Dio sinche e sen kain nge e jian. Kain ji i jian ko tingijna kain chujni.

⁹ Ko ndache sen xronichja i sen xrojan chijni ninta, ko tien a chijni teki sen ti juinche e sen tachri ina, ko tintue a sintaketo xin sen ti ley kuajon ndo Moisés. Ti tjakaxin kichuu sen tjinte a ko xro an juachaxin chónnda.

¹⁰ Siá kondeexin xrojan ngisen tjaun xrojan sen ni ngo tsinkaxinton sen, nichje é sen kondeexin me e naa o yuu vez ixi ndako sinche e sen ko siá tsiexin a sen, ndache sen satsjixin sen ni ngo,

¹¹ ixi ja a ó no a ixi sen jaña nche e ndako a xraxaon sen ko ti nche e sen jaña ícha nchekangi sen ijie chónnda sen.

Nge e kuetuan an ndo Pablo

¹² *Nchakon xroxruan an ndo Artemas ko ndo Tíquico tsiji sen. Chjakon an tuinxin tsji ia tsitsjenana tjaina Nicópolis ixi nti a tsake é tsatsingaja nchakon ikin.

¹³ *Ja a jian tingijna ndo Zenas, ndo abogadoe chujni, ko ndo Apolos, ko chje é sen ti xrokonde e sen nchakon satsji sen ixi xro an nge e tsitjáñe e sen.

* **2:13 tsechónna kain nchakon** vida eterna **2:14** 1Pe. 2:9. **3:12** Hch. 20:4; Ef. 6:21, 22; Col. 4:7, 8; 2Ti. 4:12. **3:13** Hch. 18:24; 1Co. 16:12.

¹⁴Ko sen kichuuna xrokonda tsitja sen sinche e sen nge e jian ko tsingijna sen sen kichuu sen nchakon tsake e na juachjaon, jaña tsjakoxin sen ixi tjintee nge e nche e sen.

Juexin nichja ndo Pablo

¹⁵Kain sen riki an nti i xruan an sen juajna. Ko ja a tájuan juajna ngajin kain sen chuntia Ncháina nti a, kain sen tsango tjuajna. Ndo Dio sintanchaonnta ndo kainnta. Jaña tson en.

Xroon tsikjin ndo Pablo xrúen en ndo ndo Filemón

Ndo Pablo nichje e ndo ndo Filemón

¹ Jan an, Pablo, jija na ndo achjiso ixi nta a xrée Ncháina Cristo Jesús, kjin an xroon ji i, ko kao ndo kichuuna Timoteo ixi ja a Filemón tsaye é xroon. Ja a ngisen tjua ana ixi nche ena xrée ndo Dio.

² *Kaxon nichja a kain sen titikaon Ncháina, sen xra o ndúia ko kao jan kichuuna Apia ko ndo kichuuna ndo Arquipo, ndo nche e xrée ndo Dio xranchi jajna.

³ Taye énta juaxruxin tajon Ndotáina Dio ko Ncháina Jesucristo ko je e sen sintanchaonnta sen.

Tjue e Ndo Filemón chujni ko chuntia ndo ndo Jesús

⁴ Kain nchakon tajon juasiana ngajin ndo Dio, nchakon xraxa on ixi ja a hora nichja a ndo,

⁵ ixi kujin an xranchi tjue é ko chuntia Ncháina Jesús ko kaxon kain sen tikinixin en ndo.

⁶ Tjanča a ndo Dio ixi ti chuntia ja a ko jan anna me e sinche e ixi ícha tsienxinna kain nge e jian ti kuajon Ncháina Cristo Jesús.

⁷ Kichian, juaxruxin ritjén ixi nóna ixi ja a tjue é kain sen ko ixi ja a me e juaxruxin ste aséen sen kichuua.

Ndo Pablo nichjixin ndo ndo Onésimo

⁸ Ixi jan an nta a xrée ndo Jesucristo chao tsituan an nge e xrokonda sinche e,

⁹ ko ícha jian je o tinóatáana sinche e ti ntatjua ixi tjua a. Jan an Pablo ó tachrína ko jai rixin in ndo achjiso ixi nta a xrée ndo Cristo Jesús,

¹⁰ *ntatsa añaan ixi ndo Onésimo, ngisen tja on xranchi chjan na jii ngaxin in ndo achjiso kaxon.

¹¹ Ó seno, ndo Onésimo xro an ixra jian juinche e ndo ngajian. Ko jai nóna ixi kuindoxin ndo ko chao tsingijnana ndo yuina.

¹² Jai xruan an ndo Íjngo, taye é ndo xranchi xrokjui jan an.

¹³ Jan an tja on cháña xrokuitu e ndo ngajin xrojuinche e ndo ixra, ti xrojuinche e ja a ti xra ritjén ngaxin in ndo achjiso ixi nichja chijnie ndo Dio.

¹⁴ Ko tjaun a sinta a nge e xrojuinta ia juaxruxin ixi ti juintatsan an ñaoa tjaun a sinche é ixi kuetuan an. Na i, tja on ixi ja a juaxruxin sinche é me e.

¹⁵ Nchéxin ndo Onésimo sajuixin ndo ngajian kaxin nchakon, ixi jai tsitu e ndo ngajian kain nchakon.

¹⁶ Jai í je a tsitu e ndo ngajian xranchi naa chujni xrokonda sinchenche e ixra. Na i. Jai xranchi naa chujni jian nche e ixra, xranchi naa ndo kichuua. Jan an tsango tjua a* ndo ko ja a xrokonda ícha xrotjue é ndo. Je a je o xranchi naa chujni. Na i, kaxon xranchi naa ndo kichuua ixi kao ndo titikaon ndo Ncháina.

¹⁷ Méxin, siá nduaxin tjentona, taye é ndo xranchi xrokjui jan an.

¹⁸ Ko siá xrojan nge e juinta a ndo o xrojan nge e sinka a ndo, jan an tsjenga a na.

¹⁹ Jan an Pablo ikjin ji i ixi tjána ko jan an tsjenga a na, maski jan an chao sintaxaxaoan ixi ja a tasinkanana jan an ixi ja a kuichuxian chijni jian ne e Ncháina.

²⁰ Kichuuna, nche é ti juintatsan an ñaoa ji i ixi titikáan Ncháina Jesucristo, ko jaña tsake e juaxruxin aséenna ixi titika onna Ncháina.

²¹ Kjin an xroon ji i ixi nóna tsitikaon nge e kuituan an ko ja a ícha sinche é.

²² Ko kaxon tjée no tsituna ixi chon an tuinxin tsjaso ixi ja anta ritjanche enta ndo Dio.

Juexixin nichja ndo Pablo

²³ *Ndo Epafras xruan an ndo juajna, ndo tjento nti i ngaxin in ndo achjiso ixi nta ana xrée ndo Cristo Jesús.

²⁴ *Ko ndo Marcos ko ndo Aristarco ko ndo Demas ko ndo Lucas, sen tingijnana ixra, kaxon xruan an sen juajna.

²⁵ Ncháina Jesucristo sintanchaonnta ndo. Jaña tson en.

Xroon kuayé e sen Hebreo

Ndo Dio nichja ina ndo ixi Chjen en ndo

¹ Ó seno ndo Dio nanaó nichje e ndo sen tachrí ina xranchrjen ixi sen kuanichjixin chijnie ndo Dio ko itsjé nge e juako ndo.

² Ko nchakon tsaxi tsjexixin kain nge e ndo Dio nichjixin ndo Chjen en ndo, xjan Jesucristo. Ndo Dio chjée ndo Jesucristo juachaxin juinchekonchjian ndo kain nge e jii xasintajni ko ngajní, ko je e ndo Jesucristo kuayé e ndo juachaxin ixi tsetuan an ndo kain nge e.

³ Ko ndo Jesucristo xraje o chjiixro chónnda ndo xranchi chjiixro chónnda ndo Dio, ko je e ndo naxraje o ndo xranchi ndotée ndo ko ixi juachaxin chonda ndo me e jichón kain nge e. Ko ixi ndo Jesucristo kuen en ndo, méxin juinchemé e ndo kain jéina, ko tjume e bake e ndo ndatsjonxin jian ti jitetuan an Ndotée ndo.

Chjen en ndo Dio ícha tetuan an ixi sen ángel

⁴ Chjen en ndo Dio, kuayé e juachaxin ixi ícha tsetuan an ndo ixi sen ángel ixi je e ndo tikinixin en ndo xrochónnda ndo ícha juachaxin.

⁵ Méxin, ndo Dio ndache a ndo ninaa sen ángel:

Ja a Chjan na,
ko jan an ndachrjan ixi jan an Ndotáa.
Ko kaxon ndachro ndo:
Jan an xrokjanna Ndotáa,
ko ja a chjan na.

⁶ Ko nchakon xruan an ndo Dio chjen en ndo, xjan naakuaxon, ngata a nunte xasintajni, ndachro ndo Dio:

Kain sen ángel na na tsajon sen juasaya ngajin chjan na.

⁷ Ko ndachro ndo Dio ixi sen ángel:

Sen ángel juntáña jan an xranchi chrinto, je e sen,
ko sen nche e xrana xranchi xro i tjama, me e je e sen.

⁸ Ko ndo Dio ndache ndo Chjen en ndo:

Ja a ndo Dio tsetuan an kain nchakon
ko ja a jian tsetuan an.

⁹ Ja a tjue e kain ti jian,
ko ningakon en ti ndako a jii.

Méxin, ndo Dio kuincha a ndo ja a, ndo Dio na a.

Ícha ijié juaxruxin tjáa ndo
ixi ikaxin sen kuajiku a.

¹⁰ Kaxon ndachro ndo:

Ja a Ncháina, juinchekonchjian nunte xasintajni* ti xraxrangíxixión konchjian kain nge e,
ko kaxon juinchekonchjian ngajní,
kain me e tjáa juincheñaxian.

¹¹ Kain ji in tsjexin ko tsontaxi xranchi manta tetsáni,
je o ja a tsarichuan kain nchakon.

¹² Kain ji in xranchi naa manta tetsáni ó tjoké e ko ndá a tjankani,
xranchi chujni tindoxin en manta jiá,
kain me e tsjexin.

Je o ja a kain nchakon tsarichuan
ixi ja a tsjexin a.

¹³ Ndo Dio ndache a ndo ninaa sen ángel ja in:

Take é ndatsjonxin jian ti ritjén jan an, tsakeja jan an ni ningakon an ngangí tutáa.

¹⁴ Kain sen ángel me e espíritu tikon ani nche e ixra ngajin ndo Dio ixi je e sen kuituen en sen tsingijna sen chujni tsitjáña i aséen ko tsechón kain nchakon.

2

Nchetjáña inta juachaxin kuaye enta

¹ Méxin, xrokonda tsienxinna ícha jian chijni kuaye ena ixi jaña tsintue ana cha o jian.

² Chijnie ndo Dio tsichronga sen ángel ó sa ó me e chijni nduaxin. Ko sen kuin en chijni ko kuitikaon a sen, kuama sen ije, ko tangi kon en sen ixi jaña bikinixin en sen.

* **1:10 xasintajni** mundo

³ Méxin, çxranchi satsinge ena nchakon sinchéña ndo Dio ijie, siá je e ndo ó juinchemé e ndo jjeina ko kuajon ndo juachaxin tsen ana ko jaína tsintu ena me e? Chijni ó sa ó tsichronga Ncháina* Jesucristo, ko sen kuin en chíjni chronga sen ixi chíjni me e nduaxin chíjni, ko tjume e jaína kuaye ena chíjni.

⁴ Ko ndo Dio juako ndo ixi nduaxin chíjni me e ko juinche e ndo itsjé ixra ijie ko chjaína ndo juachaxin tajon Espíritue ndo ko kain ji i kon en xranchi je e ndo tjaun ndo.

Ndo Jesucristo tajon ndo juachaxin tsechón chujni

⁵ Ndo Dio chjé a ndo sen ángel juachaxin ixi je e sen tsetuan an sen nunte natjúá, nandá tsii, ti stetjoína jai.

⁶ Xroon chíjnié ndo Dio ndachro xroon:

çNge e tjintee chujni, ixi ja anta Ndotáina Dio tsango xraxaonnta ixi je e chujni?
Ko, çnge e tjintee chujni ixi ja anta tsango taxinta chujni juachjaon?

⁷ Ko ja anta juinche enta kaxin nchakon ixi ícha tjinte a chujni ixi sen ángel, ko tjume e kuajonnta ijie juachaxin ngajin chujni ko tsetuan an na ngajin kain nge e juincheñanta.

⁸ Kain nge e juincheñanta bakéenta ngangi tutée chujni ixi tsetuen en kain nge e. Méxin, chónnda ndo juachaxin tsituan an ndo ko jai xratikon ani me e.

⁹ Ko nojna ixi ndo Jesús, ndo ikjan ícha tjinte a ixi sen ángel kaxin nchakon, ko ndo Dio ixi tjaunna ndo xruan an ndo ndo Jesucristo kuen en ndo kondeexin kain ijie kuachonda jaína ko jai je e ndo ijie juachaxin chónnda ndo ko kain chujni tsajon na juasaya† ngajin ndo ixi ti tsango tangi kon en ndo.

¹⁰ Ko kain tikinixin en ndo Dio ko kain nge e jii je e ndo juinchéña ndo, ko je e ndo tjaun ndo ixi kain chjen en ndo xrochónnda xjan juachaxin tsintee xjan ti tetuan an ndo. Méxin, ndo Dio kuajon ndo juachaxin ixi kuen en ndo Jesús, ixi jaína kuayé e ndo ícha ijie juachaxin, ko jaína kuantsjengi e ndo ijie sinká kain chujni.

¹¹ Ko ndo Jesús tsango tjúá ndo, ko je e ndo nchetjúá ndo aséen sen titikaon ndo, sen me e ko je e ndo, xraje o ndo Dio, Ndotée sen. Méxin, ndo Jesús tosue a ndo ndachro ndo ixi sen titikaon ndo, sen kichuu ndo sen me e.

¹² Ko je e ndo ndache ndo ndo Dio:

Sintano a sen kichian ixi ja anta;
ko kaxon jan an xrotsje,
tsajon juasiana ngajinnta ngusine ti ste sen kichian.

¹³ Kaxon ndachro ndo Jesús:

Jan an chuntia ngajin ndo Dio.

Ko jingo ndachro ndo:

Nti i ritjén ngajin chjen en ndo Dio, xjan chjána ndo.

¹⁴ Kain chujni ste ngata a nunte xasintajni chónnda na ntao ko ijni; jaína ndo Jesús nchakon jongí e ndo kaxon kuachónnda ndo ntao ko ijni xranchi chujni, me e chao kuen en ndo ixi juinchejexin ndo juachaxin kuachónnda Xixron anxrée, xi tituen en ti ten en chujni.

¹⁵ Ko ndo Jesús kuen en ndo me e kuantsjengi e ndo ti kuaxrakon en chujni ti tsen en na ixi baxronka na kain nchakon ixi bakintee na xranchi naa ni stehrúa aséen.

¹⁶ Ndo Jesús kui a ndo ixi tsingijna ndo sen ángel. Je e ndo kuji ndo ixi tsingijna ndo chujni kuachrjenixin ndo Abraham.

¹⁷ Méxin, je e ndo Jesús jongí e ndo xranchi naa chujni, kuitikaon ndo kain nge e ixi jaína tsingijna ndo sen kichuu ndo, ko jaína ikjan ndo naa taana ícha tetuan an ngajinxin‡ ndo Dio, jaína juacha ndo juenga ndo na ti sinká kain chujni ixi kuen en ndo.

¹⁸ Xranchi ndo Jesús tangi kon en ndo ko Xixron anxrée tjaun xa xrojuincheye e xa ndo ixi xrojuinche e ndo xrojan nge e ndako a, méxin jai nchakon Xixron anxrée tjaun xa ixi sincheyajna xa jaína ixi sinche ena ti ndako a, ndo Jesús chao tsingijnana ndo ixi sinche ana me e.

3

Ndo Jesús ícha tetuan an ndo ixi ndo Moisés

¹ Méxin, kichuuna, ja anta ti kontjúá asáanta, ja anta ti kuiya anta ndo Dio ixi xrokjannta chujnie ndo ko jian tsje enta ndo Jesús ixi je e ndo kónna ndo Ndotájaina ícha tetuan an; juasiexin je e ndo, chuntiana ngajin ndo Dio.

² Ndo Jesús tsango kuitikaon ndo ndo Dio, méxin, ndo Dio chjée ndo ndo Jesús naa ixra tsango tjintee, xranchi kaxon ndo Moisés jian kuitikaon ndo ti ixra juinche e ndo ndo a ndo Dio.

* 2:3 Ncháina Señor Ncháina Jesús o Ncháina Dio † 2:9 juasaya respeto, honor ‡ 2:17 ngajinxin delante de

³ Ko ndo Jesús ícha ijíé juachaxin kuayé e ndo ixi ndo Moisés, xranchi naa sen juinçekonchjian naa nchia, ícha tjintee je e sen ixi je e nchia.

⁴ Ngujngu nchia xrojan chujni juinçekonchjian nchia, ko je e ndo Dio ixi juachaxien ndo konchjian kain nge e jii.

⁵ Je e ndo Moisés tsango jian kuitikaon ndo ko jian ixra juinche e ndo ngajin ndo Dio. Ko ti ixra juinche e ndo Moisés me e chronga nge e xrojuinche e ndo Dio ikaxin nano tjume e.

⁶ Ko ndo Cristo, Chjen en ndo Dio, tsango tayakon en ndo ndo a ndo Dio ko nchia me e jaina, siá nduaxin tsitikaonna ndo, xroché e aséejna ko xrochuntiana ixi tsayé ena ti nge e tsajon ndo tsijija nchakon tsjexin kain nge e.

Ti jii ndo Dio, nti a tsjoké e tjajné e ndo

⁷ Méxin, ndachro Espíritue ndo Dio jitaxin xroon:

Siá jai tsin ennta nge e ndachro ndo Dio,

⁸ nchecha i asáanta xranchi juinche e sen tachrí anta ó sa ó, sen juincheña o ndo Dio ti ntajie nchese.

⁹ Ti ndachro sen tachrí anta xranchrjen:

“Tsikonna á nduaxin ndo Dio chóna ndo ijíé juachaxin o na i”,

ko kuitikaon a sen ixi je e ndo naa ndo Dio nduaxin, maski yuukan nano bikon sen ijíé nge e juinche e ndo.

¹⁰ Méxin, jan an ndo Dio koña o ngajin kain sen kuintee nchakon me e, ko ndachrjan:

“Ja anta tsango juinchengachroe asáanta, ko kuitikaon anta chijnina kuetuan annta.”

¹¹ Méxin, nchakon koña o ngajin sen, xraxa on:

“Tsájon a juachaxin tsatsinga sen ti juntakonchjian naa tjajna tsjoké e sen.”

¹² Kichuuna, tsje enta jian, ixi ninna ja anta xrochonda inta naa asáanta ña i, ko tsachrjendáanta ko tsitikaon anta nge e tetuan an ndo Dio, ndo jichón.

¹³ Na i, cháña nichje é kichuunta nguungu nchakon, jai ti xrajii juachaxin tsarichonnta, jaña sintaya inta Xixron anxrée ixi sinchecha asáanta ko xronichjangí enta ndo Dio.

¹⁴ Ko siá soji xrochuntiana kain nchakon xranchi ti xrangixixión kuaxi kuitikaonna chijnie ndo, me e tsikinixina tsajuna ngajin ndo Cristo.

¹⁵ Ja in jindachro chijnie ndo Dio:

Siá jai tsin ennta ti ndachro ndo Dio,

nchecha i asáanta xranchi juinche e sen tachrí anta nchakon juincheña o sen ndo Dio ixi nichjangí e sen ndo.

¹⁶ Sen me e ó kuin en sen té e ndo Dio ko xraña nichjangí sen, kain sen kuantsjexin ndo Moisés nunte Egipto.

¹⁷ Méxin, koña o ndo Dio ngajin sen, yuukan nano, sen me e kuama sen ijie, méxin, kuinteken en sen ti ntajie nchese.

¹⁸ Ndo Dio ndache ndo sen me e: “Ja anta tikinixian inta tsixin innta ti tjajna juntakonchjian ti tsjoké eni.” Sen ndache ndo me e, sen nichjangí ko kuitikaon a sen ndo.

¹⁹ Ko nojna nduaxin kuixin a sen ti tjajna tsjoké eni ixi kuitikaon a sen ndo Dio, ndo nduaxin.

4

¹ Méxin, siá ndo Dio xrajitajon ndo juachaxin tsatsingana ti tsjoké eni ti tetuan an je e ndo, xrokonda jian xrotsje ena xranchi tsajuna ixi ba xrojan jaina tsixin ana ti juinçekonchjian ndo Dio tsjoké eni.

² Kao jaina kuin enna chijnie ndo, chijni jian xranchi kuin en sen tachrí ina, ko je e sen maski kuin en sen chijni jian, xro an konde e sen chijni ixi chúntia i sen.

³ Ko jaina ti kuitikaonna chijnie ndo, me e tsixin inna tsjokejna nti a. Ixi ja in tsindachro ndo Dio:

Ixi juincheñaona sen,

méxin, ndachrjan tsixin a sen tsjoké e sen ti ritjén jan an.

Jaña ndachro ndo ixi maski ó no e ndo ixi jaña xrojuinche e sen ti nchakon xrangixixión koña kain nge e ko nunte xasintajni.

⁴ Ja in nichja xroon chijnie ndo Dio ti joke e ndo nchakon yatō:

Juexin juinche e ndo Dio kain xrée ndo,

tjume e joke e ndo ti nchakon yatō.

⁵ Ko íngo ndachro xroon chijnie ndo Dio:

Tsajon a juachaxin tixin in sen tsjoké e sen ti ritjén jan an.

⁶ Ko xratitjáña tsayé e ikaxin chujni juachaxin tsatsinga sen tsjoké e sen nti a. Ixi sen sa ó kuin en chijni jian, kuayé a sen juachaxin kuatsinga sen ti tsjoké eni ixi kuitikaon a sen chijnie ndo.

⁷ Méxin, ndo Dio íjngo kuajon ndo inaa nchakon, me e jai, ko chijnie ndo ja in ndachro ti tsikjin ndo David ícha tjume e ti ó kuin enna ícha seno:

Siá jai tsin ennta chijni tsinichja ndo Dio nchecha i asáanta.

⁸ Siá ndo Josué xrokuajon ndo ti xrojoke e sen israelita, sen tajnée ndo Dio, íxrondachro a ndo Dio ixi xrokuajon ndo inaa nchakon xrochonda sen juachaxin tsitikaon sen.

⁹ Ko jai xra jii inaa juachaxin tixin in sen titikaon ndo Dio tsjoké e sen ti no jii je e ndo;

¹⁰ Ixi sen tsayé e juachaxin tixin in sen tsjoké e sen ti jii ndo Dio, sen me e ó tsjoké e sen ti ixra kuanche e sen, xranchi ndo Dio joke e ndo ti ixra juinche e ndo.

¹¹ Méxin xrokonda jaina soji tsitikaonna ndo Dio ko jaña tsayé ena juachaxin tsixin inna tsjokejina ti jii ndo, ko sinche ana xranchi juinche e sen tachrí ina, ti kuitikaon a sen ndo.

¹² Ixi chijnie ndo Dio, jichón chijni ko chóna chijni ijíe juachaxin ko ícha yao chijni ixi chika espada yaxin yuxin lado, ko tito o chijni ícha ngaxin in aséejna ko espíritujna. Ko jian nchexraxaonni chijni ko nduaxin no e chijni kain ti nge e tjaun sinche e aséejna.

¹³ Xro an nge e ti juinchéña ndo Dio tsjacha tsemá ngajin ndo, ixi je e ndo chúxin ndo kain nge e, ko kain nge e ti ndako a nche e na maski xroxrabaatja, je e ndo chao tikon ndo, ko ngajin ndo xrokonda xrondachrona kain nge e sinkana.

Ndo Jesús me e ndotaana tsango tituan an

¹⁴ Ndo Jesús, Chjen en ndo Dio, me e ndotánajna ícha tetuan an; je e ndo kuixin in ndo ngajni ti jii ndo Dio. Méxin, jaina xrokonda soji tsojuna ko tsintue ana nge e ti kuin enna ko kuitikaonna.

¹⁵ Ko ndotánajna, ndo ícha tetuan an, chao tsikonóa ina ndo nchakon Xixron anxrée tjaun xa sincheyajna xa xranchi tjaun xa xrojuincheye e xa ndo Jesús ko je e ndo juacha ndo ko xro an ijíe kuama ndo.

¹⁶ Méxin, chao tsonchjiñe ena ti tetuan an ndo Dio ixi je e ndo tsango tjuajna ndo, ko tsikonóa ina ndo ko tsingijnana ndo nchakon xrokondajna xrojan nge e.

5

¹ Chujni bakayé e ixra ndotaana ícha tsituan an, ndo Dio tinche e ndo sen ngakjen en sen xi, ixi xronichjaxin ndo ixi je e sen ngajin ndo Dio. Ixi je e ndotaana tsikao ndo ti tajon tajnée ndo tsayé e ndo Dio, kaxon je e ndotaana tsikao ndo iko, ko iko me e tsen en ba ixi jaña tsoomé e ijíe chóna chujni.

² Ko ndotaana me e kaxon no e ndo ixi tangi tsitikaonni ndo Dio, méxin je e ndo chao tsikono e ndo chujni noe a ko ndako a nche e.

³ Je e ndotaana kaxon chóna ndo ijíe, méxin, xrokonda tsóña ndo iko tsajon ndo ixi jaña tsoomé e jíee ndo, ko tsóña ndo iko ixi tsooméxin jíee chujni.

⁴ Ko xro an ngisen je o sen xrondachro sen ixi je e sen ndotaana ícha tetuan an. Na i, ndo Dio xrokonda tsinche e ndo sen ko je e ndo tajon ndo juachaxin ngajin sen, jaña juinche e ndo nchakon kuinche e ndo ndo Aarón.

⁵ Jaña ndo Cristo, je a je o ndo ndachro ndo ixi je e ndo ndotaana ícha tetuan an. Na i. Ndo Dio kuajon ndo juachaxin me e, méxin, tsindachro ndo:

Ja a chjan na;

ko xrondachrjan jan an jai jan an ndotáa.

⁶ Kaxon ja in jítaxin xroon chijnie ndo Dio:

Ja a naa ndotaana tsake e kainxin nchakon, xranchi bake e ndo Melquisedec.

⁷ *Nchakon bake e ndo Cristo ngata a nunte xasintajni tsango soji kuinóatée ndo ko kuintjí ndakon ndo ngajin ndo Dio, ndo chóna ijíe juachaxin tsingijna ndo ndo Cristo ixi tsen a ndo. Je e ndo Cristo tsango kuitikaon ndo, méxin kuin en ndo Dio ti juanchia ndo.

⁸ Maski ndo Cristo, Chjen en ndo Dio, chinga juinchekao na ndo, je e ndo kuitikaon ndo ndotée ndo.

⁹ Je e ndo tsango tjúa aséen ndo ko kuitikaon ndo kain nge e kuituen en ndo; méxin, je e ndo chóna ndo ijíe juachaxin ko tsajon ndo juachaxin me e ngajin sen titikaon ndo ko tsechón sen kain nchakon.

¹⁰ Méxin, ndachro ndo Dio je e ndo Jesús ndotaana ícha tetuan an xranchi bake e ndo Melquisedec.

Tintue anta chijnie ndo Dio

¹¹ Jan anna chondana itsjé nge e sintakuan annanta ixi chijni ji i, ko tsango tangi xrontatjunanta ixi ja anta tsango indao tienxinnta.

¹² *Ja anta ó chao xrojuincheuken ennta ikaxin sen ixi ja anta ó sée no anta chijni ji i. Ko jai xrokonda íjngo tsaxi tsokuan annta chijnie ndo Dio. Ja anta stenta xranchi naa xjan nchín ne a xjan ti ine sen cha, xrokonda tsi i xjan itsjin.

¹³ Ko sen ti i itsjin, sen me e ste sen xranchi naa xjan nandá tsijongí e, tienxin a sen chijnie ndo Dio, méxin, jua i nche e sen ti jian.

¹⁴ Ko sen tienxin ko no e nge e ti jian ko ti ndako a, sen me e ó ine sen nge e ine ti sen ícha.

6

¹ Xrokonda ícha tsonojna chijnie ndo Dio ixi jaña ícha jian sintu una ko soji tsitikaonna Ncháina. Ko je a je o sinchekuanxinna ti juinchekuajna sen nchakon nandá kuaye ena chijnie ndo Cristo ko íxrokjan ina xroxraxaonna je o xranchi tsintu ena ti ndako a juintu una sa ó ko sinchekuen a kichuuna íjngo xranchi xrochuntiana ndo Dio,

² ko kaxon ti juinchekuajna sen xranchi tsikitéeni, kaxon xranchi tsake e itjani ngata a jaa sen titikaon ndo Dio, xranchi xroxechón sen tsiken en, ko xranchi tsii nchakon ndo Dio sinchéña ndo ijie ngata a kain chujni.

³ Ko chao tjume e ícha tsjakona chijnie ndo Dio siá je e ndo tsajon ndo juachaxin.

⁴ Ixi sen ó kuayé e xro i tingasáña ko juinche e sen juaxruxin nge e kuitun en sen ti kuajon ndo Dio, ko sen me e kaxon tsikayé e sen Espíritue ndo,

⁵ sen ó juinche e juaxruxin tin en chijnie ndo Dio, ko no e sen ixi ijie juachaxin tsake e nchakon tsii nunte natjúá

⁶ ko siá sen me e ikjan sen sinche e sen ti ndako a, sen me e í jua i sinche eni ixi xrokjan tsitikaon sen ndo Dio ixi xranchi je e sen íjngo xrokuasintjian sen chjen en ndo Dio, ndo Jesús, nganito ntáa ko íjngo tsjanao sen ndo.

⁷ Ko sen kuayé e chijnie ndo, sen me e ste sen xranchi inche ti i inda nchakon soji tii ichrin ko chaxro tangi ino ko ika ti tenga chujni ko kueya tsee xejo ixi juinchenchaon ndo Dio nunte me e.

⁸ Ko siá nunte me e je o chá a tsangi, ti binga nti a xro an tjintee, ko chá a me e tsayé e cha jañaue ndo Dio, ko je o jichón en cha xroche cha.

Soji titikaonna ndo Dio

⁹ Maski ja in soji stenichjana, ja anta kichuuna, nónana ixi ja anta tikinixinnta ndo Dio ixi kuantsjengí e ndo ijie kuachónda asáanta.

¹⁰ Ixi ndo Dio tsango jian ndo, me e xrotjáñe a ndo ti jian stenche enta ko ti tingijnanta sen kichuunta, sen tjúa aséen, jaña tjakoxinnta ixi nduaxin tjue enta ndo Dio.

¹¹ Ko tja onna ixi nguingu ja anta tsjakoxinnta ixi juaxruxin nche enta kain me e, jaña tsjakonta ixi stechon ennta nge e ndachro ndo Dio tsajon ndo.

¹² Ko tjaun ana tsaxi tsosa anta. Jan anna tja onna sinche enta xranchi sen nduaxin chuntia ndo Dio, ko sen me e stetayé e sen nge e tsindachro ndo Dio tsitun en sen.

Ti ndachro ndo Dio tsitun en sen

¹³ Nchakon ndo Dio tsindache ndo ndo Abraham ixi tsajon ndo naa nge e tsitun en ndo Abraham méxin je o je e ndo Dio tsinichjaxin aséen ndo ixi xro an ngisen ícha ijie ixi je e ndo, ko ndachro ndo nduaxin tsajon ndo nge e ndachro ndo.

¹⁴ Ko ja in tsindachro ndo Dio: “Nduaxin jan an sintanchaoan, ko kueya ichjan tsachrjenixian ja a.”

¹⁵ Ko ndo Abraham nduaxin chón en ndo, me e kuayé e ndo ti tsindachro ndo Dio tsitun en ndo.

¹⁶ Nchakon naa ngisen nichjaxin inaa ngisen ixi nduaxin sinche e sen ti ndachro sen, xrokonda sen me e ícha ijie sen o ícha tituan an sen ixi jaña sincheye a kichuu sen ko í tsjakaxin a sen.

¹⁷ Ndo Dio tjaun ndo juako e ndo chujni ixi je e ndo nduaxin tsajon ndo ti ndachro ndo, méxin, je o je e ndo nichjaxin aséen ndo, ko ti ndachro ndo xro an nge e tsindoxin ixi je e ndo noe a ndo ncheya ndo.

¹⁸ Jii yuu nge e tsinichja ndo Dio me e jua i tsindoxin: ti je o je e ndo nichjaxin aséen ndo ko ti tsindachro ndo tsitun en sen titikaon ndo, ko ndo Dio jua i sincheya ndo; ko me e ícha sinchesojina ixi xrochuntiana ixi je e ndo xrochjajna ndo ti tsindachro ndo.

¹⁹ Ko ti stechuntiana ndo, me e sinchesoji aséena xranchi chika stechruaxin ntábarco, ko xranchi chika me e jaña jajna chondana nge e stechruaxinna tsatsingatu e tuenxin velo jii ni ngo ti jii ngajni, ko me e nchenojna ixi tsayé ena ti tsajon ndo Dio.

²⁰ Nti a kuixin in ndo Jesús, me e kuantje e ndo cha o tsixin in jaina, me e je e ndo ikjan ndo naa ndotaana ícha tetuan an, ko je e ndo ndotaana tsake e ndo kainxin nchakon xranchi bake e ndo Melquisedec.

7

Ndo Jesús naa ndotaana xranchi ndo Melquisedec

¹ Ndo Melquisedec naa rey kuetuan an tjanya Salem ko ndotaana ne e ndo Dio jii ngajní, kuachrje ndo kuayé e ndo ndo Abraham nchakon kjanxin ndo Abraham ti kuętoka o ndo ikaxin xi rey ko juacha ndo, ko ndotaana Melquisedec juinchenchaon ndo ndo Abraham.

² Jaña kaxon ndo Abraham kuajon ndo ngajin ndo Melquisedec itexin ti kainxin nge e tsijacha ndo ti ikjui ndo kuętoka o ndo juacha ndo ngajin ikaxin xi rey. Ko nombree ndo Melquisedec xrondachro “naa rey tsango jian nchéña ijię”; ko ti rey ne e tjanya Salem, me e xrondachro “naa rey tjaun a tsetoni.”

³ Noe ani ngisen ikjui ndotée ndo Melquisedec ko ngisen ikjui janée ndo ko ngisen ikjui sen tachri e ndo; ko noe ani ngixe e nchakon tsijongi e ndo ko noe ani nchakon tsiken en ndo. Méxin, je e ndo xraje o ndo xranchi Chjen en ndo Dio, ko je e ndo naa ndotaana tsake e kainxin nchakon.

⁴ Jian tsje enta ixi ndo Melquisedec ícha baketuan an ndo, méxin, ndo Abraham, ndo tachri ina xranchrjen, tsichjée ndo ndo Melquisedec ti texin ti kain nge e tsijacha ndo nchakon tsike to ndo ngajin ikaxin xi rey ko chujnie xa.

⁵ Ko ley tsikjin ndo Moisés ixi sen taana, sen tsikachrjenixin ndo taana Leví, je e sen tikinixin en sen tsayé e sen ti texin ti kain nge e chóna chujni, maski kichuu sen, ixi kain sen tsikachrjenixin sen ndo Abraham.

⁶ Ko ndo Melquisedec, maski kuachrjenixin a ndo ndotaana Leví, kuayé e ndo ti texin nge e kuajon ndo Abraham, ko juinchenchaon ndo ndo Abraham, ndo kuitun en nge e ti tsindachro ndo Dio.

⁷ Ko kaina nojna ixi naa sen ícha ijié ko ícha tetuan an, me e sen tikinixin en sinchenchaon* inaa sen.

⁸ Kain sen taana tayé e ti itexin nge e tajon chujni, sen taana me e chujni jii ngata a nunte ko xranchi kain chujni, ten en sen kaxon. Ko xroon chijnie ndo Dio nichja xroon ixi ndo Melquisedec xrají ndo xranchi naa sen jichón.

⁹ Ko chao xrondachroni ixi ndo Leví ko kain sen taana tachrjenixin ndo, sen stetayé e ti texin nge e tikinixin en sen, kaxon je e sen ó juenga sen na ngajin ndo Melquisedec nchakon juenga ndo Abraham na ti texin nge e ngajin ndo Melquisedec ixi je e sen Leví kuachrjenixin sen ndo Abraham.

¹⁰ Ko chao xrondachrona ixi Ndotáina Abraham ó jitika o ndo sen tsachrjenixin ndo ngaxin in aséen ndo, nchakon kuachrje ndo Melquisedec ko kuetan kichuu sen ko juinchenchaon ndo Melquisedec ndo Abraham.

Ndo Jesús xranchi ndo Melquisedec ndo

¹¹ Chujni tjanya Israel kuayé e ley juako sen taana levita, sen kuachrjenixin ndo Aarón, ko siá nduaxin ley me e xrokontjuáxin aséen sen, íxrokonda i xrokonoxin inaa ndotaana; ndotaana me e kuachrjenixin a ndo ndo Aarón, je e ndo xrobake e ndo xranchi ndo Melquisedec.

¹² Ixi xranchi kuji inaa ndotaana ícha ijié, jaña xrokonda tsindoxin ley kaxon.

¹³ Ko ti nichja xroon chijnie ndo Dio ixi Ncháina, je e ndo kuachrjenixin ndo inaa tjanya tikinixin en tjanya Israel, ko tjanya me e ninna sen juinche a sen xra nche e ndotaana.

¹⁴ Ko jaina jian nojna ixi Ncháina tsikachrjexin ndo tjanya Judá, ko ndo Moisés tsichronga i ndo ixi tjanya me e xrokuachrjenixin naa ndotaana.

¹⁵ Ko ícha jian tienxinna ixi ndotaana natjúá tsji me e naa ndotaana tonoxin xranchi ndo Melquisedec.

¹⁶ Ko je e ndo je a ikjan ndo naa taana xranchi nichja ley ixi xrokonda tsinche e sen ngisen tsixin naa sen tsikachrjenixin naa sen tsango jian. Ko je e ndo Jesús naa ndotaana ícha tetuan an ixi nai a tsitjána ndo.

¹⁷ Ko ja in nichja ndo Dio ixi Ncháina: Ja a naa ndotaana tsake e kain nchakon, ko xrochonda juachaxin xranchi ndo Melquisedec.

¹⁸ Méxin, ti baketuan an ley sa ó, jai ó komé e ley me e, ixi itunda i ko íxro an xrée ley me e.

¹⁹ Ti ley kuajon ndo Moisés jua i kuindoxin ti ndako a kuanche e chujni. Ko jai kuaxi inaa ley ícha jian, ko ley me e ícha tsingijnana tsonchjiñe ena ngajin ndo Dio.

* 7:7 *sinchenchaon* bendecir

²⁰ Ko ndo Dio je o ndo nichjabin aséen ndo ixi ndo Jesucristo nduabin naa ndotaana chóna ijíe juachabin

²¹ ixi kabin sen kuayé e sen xréé taana ko ndo Dio nichjabin a ndo sen taana. Ko ndotaana ji i, ndo Cristo, ndo Dio nichjabin ndo ixi aséen ndo ixi je e ndo Cristo xrokjui naa ndotaana, xranchi jitabin xroon chijníe ndo Dio:

Ncháina Dio je e ndo nichjabin ndo aséen ndo ko ti nichja ndo me e tsindoxin a:

Ja a naa ndotaana tsake e kabin nchakon, ko xrochonda juachabin xranchi ndo Melquisedec.

²² Méxin, ndo Jesús je e ndo ndachro ndo ixi juachabin jii jai ícha tjintee ixi juachabin bake e sa ó.

²³ Bake e kueya sen juinche e sen ixra taana ko bakinteken en sen, méxin í jua i juinche e sen ixra me e.

²⁴ Ndo Jesús ti kuayé e ndo ixra me e ne e taana ícha tetuan an, í jua i inaa na tsayé e na ixra me e ixi je e ndo tsechón ndo kain nchakon.

²⁵ Je e ndo chóna ndo ijíe juachabin, ixi chujni tsonchjiñe e ngajin ndo Dio, je e ndo Jesús chao tsantsjengí e ndo ti ndako a nche e sen, ixi je e ndo tsechón ndo kain nchakon ko je e ndo kain nchakon tinóatée ndo ngajin ndo Dio ixi chujnié ndo.

²⁶ Je e ndo Jesús ndotaana ícha tetuan an, me e ndo xrokondajina ixi tsango tjúá aséen ndo ixi xro an ijíe sínká ndo ko tonchjiñe a ndo ngajin chujni ndakua i nche e, méxin ndo Dio kuajon ndo juachabin kuajin in ndo Jesús ngajni ko kuayé e ndo juachabin ícha tsetuan an ndo.

²⁷ Je e ndo xrokonde a ndo tsóna ndo iko xranchi ikabin sen taana, sen xrokonda tsóna sen iko ngujngu nchakon tso méxin jíee sen ko tjume e tsóna sen iko tso méxin jíee chujni tjjanéé sen. Ndotánajna je e ndo je o naa nchakon kuajon ndo jnié ndo ko kuen en ndo ixi jajna.

²⁸ Ley kuajon ndo Moisés, ley me e chronga xranchi bajinche e sen taana ícha tetuan an, ko sen taana me e naa chujni yama ijíe xranchi ngixe i chujni. Ko tjume e je o ndo Dio nichjabin ndo aséen ndo ko ndache ndo Chjen en ndo ixi je e xjan xrokjan xjan naa taana ícha tetuan an ko je e xjan xro an ijíe chóna xjan ixi tsango jian xjan, ko jaña tsake e xjan kain nchakon.

8

Ixi ndo Jesús tj xín naa juachabin natjúá

¹ Ti ícha tjintee stenichjana ixi ndotánajna, ndo ícha tetuan an, jii ndo ngajni, ndatsjonxin jian ti tetuan an ndo Dio,

² ko je e ndo nche e ndo ixra ngaxin in ni ngo tsijinchekonchjian ndo Dio, ni ngo nduabin; je a ni ngo juinchekonchjian chujni.

³ Kain ndotaana ícha tetuan an tsikayé e ndo ixra ixi tsajon ndo nge e tsayé e ndo Dio ko tsóna ndo iko tso méxin jíee ni tjjanéé ndo. Méxin, ndo Jesucristo kaxon xrokonda tsajon ndo xrojan nge e.

⁴ Siá je e ndo xrobake e ndo ngata a nunte xasintajni, je e ndo xrojuinche a ndo xréé naa ndotaana, ixi nti i ó jii ndotaana tajon nge e xranchi tsiketuan an ley kuajon ndo Moisés.

⁵ Sen taana, sen ste nti i nche e sen xra ko stetanseya sen xranchi nge e jiton en ngajni. Ko nojna kaxon ixi me e kuituen en ndo Moisés ixi xrojuinchéña ndo ni ngo manta xranchi ndo Dio tsindachro ndo: "Jian tsje e kain nge e xranchi jii ni ngo juako a ngata a ijna."

⁶ Ko ndotánajna, Jesús, ndo ícha tetuan an, je e ndo kuayé e ndo naa ixra ícha jian me e je e ndo tinóatée ndo ixi jajna, ko me e juinchéña ndo naa juachabin natjúá ko tsajon ndo ícha jian nge e tsayé ena.

Juachabin sa ó itunda i jai

⁷ Siá juachabin sa ó nduabin xrokuindoxin ti ndako a kuanche e chujni, íxrokonda i xrokonoxin juachabin yuxin.

⁸ Je e ndo Dio bikon ndo ixi juachabin sa ó kuitikaon a na ko kuindoxin a ti kuanche e na, méxin, ndachro xroon chijníe ndo Dio:

Ncháina Dio ndachro:

Tsij nchakon jan an tsajon inaa juachabin natjúá ngajin ni tjjana Israel ko ni tjjana Judá.

⁹ Juachabin ji i je a xranchi juachabin sa ó kuajon ngajin sen tachri anta xranchrjen, nchakon jan an kuantsjexin sen tjjana Egipto;

ko je e sen kuitikaon a sen ti juachabin kuetuan an sen, méxin, jan an kuintu a sen, ichro Ncháina Dio.

¹⁰ Juachabin sintaña ngajin tjjana Israel ti tsatsingaja kabin nano,

ja in tson en, ichro Ncháina Dio:
Jan an sintaxraxa on sen ley tsitikaon sen,
ko xrokjin ley me e ngaya aséen sen.
Jan an xrokjanna ndo Dio ne e sen,
ko je e sen, sen tjajnána.

¹¹ Ko íxrokonda i xii ikaxin sen sinchekuen en kichuu sen
xranchi xrochuntia sen Ncháina,

ixi nchakon me e kain ichjan nchínchín ko kain sen ícha icha xrochuxinna sen jan an.

¹² Ko jan an sintama a kain ti ndako a juinche e sen
ko jan an íxroxaxaon a ijie kuachóna sen.

¹³ Ti ndachro ndo Dio xii ti juachaxin natjúá me e xrondachro xii juachaxin sa ó ó jitjexin
juachaxin ko íse a tsitjáña juachaxin me e.

9

Ni ngo jii ngata a nunte xasintajni

¹ Juachaxin sa ó baketuan an xranchi xronichje eni ndo Dio ngaxin in ni ngo jii ngata a
nunte xasintajni.

² Ni ngo manta ja in konchjian: sa ó jii luga ndatin in Luga Tjúá ko nti a jii lugee chika
candeleró ko mesa ti no jita a nutja tsikonchaon tikinixin en ndo Dio.

³ Tuenxin velo bake e luga yuxin, ti ndatin in Luga Tsango Tjúá.

⁴ Nti a bake e naa altar tsikonchjianxon jeoxón chika oro ko ngata a nti a bachexin
tsjoxraxé ko nti a bake e kaxon arca ne e juachaxin ko nchijí arca me e jitsáa jeoxón chika
oro. Nti a jixin in naa ichi jichóna nutja ndatin in maná kuixin ngajni. Nti a jii kaxon
ntakuto e ndo Aarón, ntaá tsixechji; ko jii ixrotabla jitaxin ley tsikajon ndo Dio ngajin
chujni.

⁵ Ngata a arca bake e yuu sen ángel tsikónaxin chika oro ndatin in querubin, ko ti ste
sen querubin me e xrondachro nti i tetuan an ndo Dio, ko sen querubin xii nene e sen
jitabatjaxin sen ntačhja tijexin arca ti bakoméexin jíee sen. Ko jai xrokonda i tseki anta ícha
kondee ji i.

⁶ Ko tsikonchjian kain ji i, ko tjume e sen taana nanaó tixin in sen ni ngo tsikonchjianxin
manta, ti luga tjúá xii tajon sen juasaya ngajin ndo Dio.

⁷ Ko ti luga yuxin, ti ícha tjúá, je o ndotaana ícha tetuan an tixin in nti a, je o naa nchakon
ngujngu nano; ko nchakon tixin in ndo xrokonda tsixin inkao ndo jnié iko, tsoméxin ti
ndako a juinche e ndo ko tsooméxin ti ndako a juinche e ni tjajnée ndo.

⁸ Me e Espíritue ndo Dio ícha tjúá nchenojna xii siá xrají luga tjúá, ko nti a bakayéexin ndo
Dio juasaya, méxin, jua i xrokuixin in ngixe i ngisen ti luga ícha tjúá.

⁹ Kain ji in je o jitjakoxin nge e nojna jai, xii kain nge e ti bakajon chujni ko ti iko ten en
chóna i juachaxin xii tsindoxin ko tsontjúá aséen chujni tajon juasaya ngajin ndo.

¹⁰ Ixi ji i je o tajon juachaxin nge e sineni ko tsi ini o nge e sinche ani xii jaña tsachrje eni
ti ndako a. Kain ji i bingijna tsitjaja nchakon ndo Dio kuindoxin ndo kain nge e ko kuajon
ndo naa nge e ícha jian.

Ndo Cristo kuajon ndo jnié ndo ko kuen en ndo xii chujni

¹¹ Ko ndo Cristo ó kuji ndo, ko jai je e ndo ndotaana ícha tetuan an ko je e ndo chóna ndo
nge e ícha jian ti nandá tsji. Ko ti ni ngo nche e ndo ixra, ni ngo ícha jian xii ni ngo me e je a
konchjianxin itja chujni, ni ngo me e tikinixin a nunte xasintajni.

¹² Ndo Cristo ó kuixin in ndo ti luga ícha Tjúá, ko íkuajon a ndo jnié kubito o jnié
kuxintachjan. Na i. Je e ndo kuajon ndo jnié ndo, naakuaxixion naa nchakon kuixin in
ndo nti a, xii me e juenga ndo na ko me e naakuaxon kuantsje ndo ijie kuachóna chujni,
me e kuayé e jaina tsechónna kain nchakon.*

¹³ Siá nduaxin jnié kuxinta ko jnié kubito ko nteso e kuxintachjan kunchri, tsichexin
ngata a altar, nteso me e tsikitée kain chujni tjúá i, nteso ko jnié iko chóna juachaxin
sinchetjúá je o cuerpoe na.

¹⁴ Siá me e chóna juachaxin, jnié ndo Cristo ícha chóna juachaxin, xii juachaxin
Espíritue ndo Dio jichón kain nchakon, ndo Cristo kuen en ndo xii chujni, ko kuen en ndo
ixi jaña ndo Dio xrokuayé e ndo ndo Cristo xranchi naa nge e tayé e ndo, ko je e ndo Cristo
xro an ijie chóna ndo. Méxin, jnié ndo ícha sinchetjúá asééna ko kain ti ndako a juintu una,
me e jai chao sinche ana ixra ngajin ndo Dio, ndo jichón.

¹⁵ Méxin, ndo Jesucristo, je e ndo nichjaxinna ndo xii naa juachaxin natjúá. Xii je e ndo
Cristo kuen en ndo xii chujni, me e komé e ti ndako a juinche e sen xii batitikaon a sen ley

* 9:12 tsechónna kain nchakon vida eterna

sa ó; ko sen tsikiye e ndo Dio jai chao tsayé e sen ti tsindachro ndo tsitun en sen, naa nge e nai a tsjexin.

¹⁶ Méxin, siá jii naa xroon jitaxin ixi xrojan ngisen tsayé e naa herencia, xroon me e tsaxi tsitee xroon nchakon tsen en ngisen ti tsajon herencia me e.

¹⁷ Xroon xrochjeyaxin herencia, xroon me e tjinte a xroon siá xrajichón ngisen kuituan an kochjian xroon; je o nchakon tsenjan sen, me e tsaxi tsitee xroon.

¹⁸ Méxin, juachaxin xrangixixión tsiketuan an ndo Dio kuaxi kuitee nchakon kuaxi kuintji jnié iko.

¹⁹ Ndo Moisés tsichronga ndo kain nge e ti tsindachro ley jitaxin ixrotabla kuin en kain ni tjajna; ko tjume e kua ndo chjuen kutuchjon, chjon játse, ko kaxon tu o ntáa hisopo, ko tjume e kuataxin jnié kuxintachjan ko jnié kubito ko kuintekjaxin inda, tjume e kuintjtíee ndo xroon jitaxin ley kuituan an ndo Dio ko kuintjtíee ndo kain chujni tjajna.

²⁰ Ko ndo Moisés ndachro ndo: “Ijni ji i tsjakoxin ti juachaxin kuetuan an ndo Dio tsitikaonnta.”

²¹ Ndo Moisés bikitée ndo injni ni ngo ko kain nge e ti tunda ngaxin in ni ngo.

²² Ja in ndachro ley ixi kain nge e xrokonda tsontjúáxin ixi injni; ko jua i tsomé e ti ndako a juinche e chujni siá tsintji a jnié iko.

Ti kuen en ndo Cristo me e tsoméxin ti ndako a

²³ Méxin, xrokonda tsen en iko ixi tsontjúáxin kain nge e ti jii nti i ngata a nunte xasintajni, kain ji i tsjakoxin nge e jii ngajni; ko ti nge e jii ngajni xrokonda naa nge e ti ícha tjintee tsen en ixi jnié iko jii ngata a nunte.

Ti kuen en ndo Cristo me e chao tsantsje jíee kain chujni

²⁴ Ixi ndo Cristo kuixin a ndo ni ngo tsikonchjianxin itja chujni, ko me e je o tjako ixi jii naa ni ngo ngajni, nduaxin tjintee. Me e je e ndo kuixin in ndo ngajni ko jai jii ndo ti jii ndo Dio ko nti a jinichjxin ndo ixi jaina.

²⁵ Ko je e ndo je a kuen en ndo itsjé vez xranchi nche e Ndotaana judío, ndo ícha tetuan an, ixi tixin in ndo luga tsango tjúa nguingu nano me e tsajon ndo jnié iko, injni je a jnié je e ndo.

²⁶ Siá jaña xrojuinche e ndo Cristo xrokonda xrokuen en ndo itsjé vez ti xrangixixión kóna nunte xasintajni. Ko jai ó tuinxin tsjexin nunte xasintajni, me e ndo Cristo konoxin ndo ko kuen en ndo naakua vez ixi sinchemé e ndo ti ndako a juinche e chujni.

²⁷ Méxin, jaña xrokonda tsen en chujni ste ngata a nunte naakua vez, ko tjume e ngajni tsónexin na ijje ti nge e juinche e nguingu chujni.

²⁸ Jaña kaxon ndo Cristo naakua vez kuen en ndo ixi tsoméxin jíee kueya chujni. Ko tjume e tsji ndo íjngo, ko nchakon me e ísinchemé a ndo ti ndako a juinche e chujni. Je e ndo tsji ndo tsajon ndo juachaxin stechón kain chujni stechón en xrokjan ndo.

10

¹ Ixi ley kuetuan an ndo Moisés je o tjakoxin inaa juachaxin ícha jian tsji, ko ti kuetuan an ndo me e, je o konoxin xranchi naa tsa on ko jua i kuantsje ti ndako a kuachóna chujni. Méxin, nguingu nano bakonchjiñe e sen ngajin ndo Dio ixi bakajon sen jnié iko tsiken en.

² Ko siá ley me e nduaxin xrojuinchemé e ti ndako a kuanche e sen, íxroxaxaon a sen nge e ti ña i juinche e sen ko íxrokuajon a sen iko xrokuen en.

³ Ko ti tóna sen iko nguingu nano je o nchexaxaon sen ti ndako a juinche e sen,

⁴ ixi jnié kuxinta ko jnié kubito jua i juinchemé e ti ndako a juinche e chujni.

Ti kuen en ndo Cristo ixi jaina

⁵ Méxin, nchakon ndo Cristo kujji ndo ngata a nunte xasintajni ndache ndo ndo Dio:

Ja anta tjaun anta iko tsen en

ko tjaun anta ninna nge e tsaye enta.

Na i.

Ja anta juincheñaninta xranchi naa chujni

⁶ ixi ja anta nta inta juaxruxin jnié iko ko ikaxin nge e xrokuajon chujnianta, ixi me e xrokoméexin ti ndako a juinche e na.

⁷ Méxin, ja in ndachrjan: “Nti i ritjén jan an xranchi nichja xroon jitaxin chijnie ndo Dio ko jan an tsitika on ti tjaun ja anta, Dio.”

⁸ Ndachro ndo Dio sa ó ixi tjaun a ndo ko nche a ndo juaxruxin iko tsen en ko xro an nge e ti jii ngata a nunte xasintajni tsoméxin ti ndako a juinche e chujni, maski jaña kuituan an ley kuajon ndo Moisés.

⁹ Tjume e ndachro ndo Cristo: “Nti i jui i ixi sinta a ti ja anta tjaunnta, Dio.” Me e xrondachro ndá a tsakéenta ti xrajon jnié iko tsoméxin ti ndako a ixi jai kujji inaa injni ícha tjintee.

¹⁰ Ndo Dio juinchetjúá ndo aséeina ixi ndo Jesucristo kuitikaon ndo xranchi tjaun ndo Dio ko je e ndo kuen en ndo ixi jaína naakua naa vez, ko me e kuitee kain nchakon.

¹¹ Kain ndotaana judío tonchjiñe e ndo ngajin ndo Dio ngujngu nchakon ko tóña ndo iko tsoméxin ti ndako a juinche e ni tjañée ndo, ko ijñi me e chónda i juachaxin tsoméxin ti ndako a juinche e na.

¹² Ko ndo Jesucristo naakua naa vez kuen en ndo ixi jaína ko tjume e bake e ndo ndatsjonxin jian ti jii ndo Dio.

¹³ Ko nti a jichón en ndo tsjexinja kain ni ningakon en ndo tsake e na ngangi tutée ndo.

¹⁴ Méxin, jaña naakua naa vez xrajon ndo, xranchi naa nge e tjintee kuayé e ndo Dio, ixi jaña ícha juinchejian ndo chujni tikinixin en ndo.

¹⁵ Ko Espiritue ndo Dio nduaxin nchenoína ji i, me e tsindachro ndo:

¹⁶ Jan an sintaña naa juachaxin ngajin chujnina tsatsingaja nchakon ji i, ichro Ncháina.

Tsakée chijnina ngaya aséen na,
ko kaxon xrokjin chijni ngaya jaa na.

¹⁷ Ko kaxon ndachro:

Íxroxraxaon a jan an ti ndako a ko ti ña i juinche e na.

¹⁸ Jaña siá ó komé e ti ndako a juuntu una, íxrokonda i xroxrajon ícha ijñi tsoméxin ti ndako a juuntu una.

Xrokonda xrochuntiana ngajin ndo Dio

¹⁹ Kichuuna, jai íxro an nge e tingakoína, ó chao tsixin inna ndo a ndo Dio, nchia ícha Tjúá, juasieixin jnié ndo Jesucristo,

²⁰ ixi je e ndo kuantje e ndo naa cha o natjúá tsayéxinna juachaxin tsechónna kain nchakon; cha o me e tsatsingatu e velo ko me e xrondachro ixi je e ndo kuen en ndo ixi jaína.

²¹ Ndo Jesús, Ndotánajna ícha tetuan an, je e ndo tetuan an ndo ndo a ndo Dio.

²² Méxin, chao tsonchjiñe ena ngajin ndo Dio ixi jaína chuntiana ndo ixi je e ndo ó juinchetjúá ndo aséeina, ko xrokjui xranchi inda tjúa junemáxin ndo cuerpoína, ko me e aséeina ísinchexaxaon ana ti ndako a juuntu una.

²³ Soji chuntiana ko jian tsitikaonna ixi nduaxin tsayé ena ti tsajon ndo ixi je e ndo nduaxin nche e ndo ti ndachro ndo.

²⁴ Jian tsje ena xranchi tsingijna kichuuna, xranchi xrotjue e kichuuna ko je o ti jian sintu una.

²⁵ Ko tsintue ana xroxra una nchakon xra oni ti xrotsjeni ngajin ndo Dio xranchi nche e íkaxin sen. Jaína chaxro xronichje e kichuuna, ixi ó jitonchjiñe e nchakon xrokjan Ncháina Jesucristo.

²⁶ Siá ó kuichuxinna chijni jian ko xrastenche ena ti ndako a, ko ó noína ixi xrojuinche ana me e, íxro an nge e jii tsayé e ndo Dio ixi sinchemé e ndo ti ndako a juuntu una,

²⁷ ko jaña je o xrochon enna tsoña ijje, ko xrochena xranchi xroche chujni ningakon en ndo Dio.

²⁸ Sa ó siá xrojan ngisen baktikaon a ley kuetuan an ndo Moisés, ko siá jii yuu o ní sen bikon nge e kon en, íjua i tsikonóeni chujni me e, xrokonda tsen en chujni.

²⁹ Xraxaonnta xranchi ícha tangi tson en ni xronichja kontree Chjen en ndo Dio, ko ni titikaon a juachaxin chónda jnié xjan. Ni xraxaon jaña kaxon nichjangí e na Espiritue ndo Dio, ndo tjaunna, ko titikaon a na jnié ndo Cristo kuixin juachaxin natjúá, ko ijñi me e juinchetjúáxin ndo Dio aséen sen titikaon chjen en ndo.

³⁰ Noína ixi tsindachro Ncháina: “Jan an tikinixinna sintaña ijje, jan an xrotjá a na ti tikinixin en na ixi ti ndako a juinche e na.” Kaxon tsindachro: “Ncháina sinchéña ndo ijje ngajin ni tjañée ndo.”

³¹ Tsango tangi tson enni siá tsitikaon ani ndo Dio, ndo jichón.

³² Ko ja anta xraxaonnta xranchi tangi juunta anta na nchakon kuaye enta xro i tingasáña ne e ndo Dio, ko soji kuinteenta nchakon me e.

³³ Kaxin ja anta tsango chinga ntatjunta na ko kain ni tjanya bikon na bikaonta ko kaxinnta jaña juunta anta na kaxon.

³⁴ Ko ja anta bikonóe enta kaxon kain sen xraxin in na ngaxin in ndo achjiso, ko tsjangaxin anta ti kuantjsa anta na kain nge e tjintee kuachondanta, ixi no anta ixi ngajni xrochondanta naa nge e ícha jian ko nai a tsjexin.

³⁵ Méxin tintue anta ti chuntianta Ncháina ixi me e tsayéxinnta naa nge e ícha tjintee.

³⁶ Nchakon tsikaonnta ko ti tsuyaku anta na, me e xrokonda soji tsinteenta ko tsitikaonnta ti tjaun ndo Dio, me e tsaye enta ti tsindachro ndo.

³⁷ Ixi jaña ndachro xroon chijnie ndo Dio:

Tuinxin, tsango tuinxin tsji ngisen ndachro xroon xrokjan,

ko ítsónchrjen a tsji ndo Jesús.

³⁸ Sen chuntiana jan an ko tjúá aséen sen, me e sen tsechón kain nchakon;

ko siá xrokjan sen sinche e sen ti ndako a, jan an tsake a juaxruxin ngajin sen.

³⁹ Ko jaína je a xranchi chujni ikjan nche e ti ndako a ko ni me e itsji na ti jii xro i chexin ni ndako a nche e. Jaína tsjachana itsjina ngajin ndo Dio ixi jaína chuntiana ngajin Ncháina.

11

Ti chúntiani

¹ Ti nduaxin chuntiana ndo Dio me e noína ixi tsayé ena nge e stechon enna, ko nduaxin noína ixi jii nge e tsayé ena, maski tikon ana.

² Ndo Dio jian kuayé e ndo sen tachrí ina ixi je e sen nduaxin chuntia sen ngajin ndo.

³ *Ti chuntiana ngajin ndo Dio me e noína ixi je e ndo tsijinchekonchjian ndo nunte xasintajni ko ngajni ko ti tikonni kóñaxin ti tikon ana.

⁴ Ko ti kuachúntia ndo Abel, me e kuajon ndo naa nge e ícha jian kuayé e ndo Dio, ko ndo Caín, na i. Ko ndo Dio jian nichja ndo ixi ndo Abel ixi tsango jian kuanche e ndo, méxin kuayé e ndo nge e kuajon ndo Abel, ko maski ó sée kuen en ndo Abel, ti kuachúntia ndo ndo Dio, me e xrajnichja jai.

⁵ Ixi ti kuachúntia ndo Enoc ngajin ndo Dio, je e ndo kuen a ndo ixi ndo Dio sabikao ndo ndo Enoc ngajni, ko ndakuitja i na ndo ixi sakjui ndo ngajni. Xroon chijnie ndo Dio ndachro ixi ndo Enoc nchakon bake e ndo nti i tsango kuachúntia ndo, méxin, ndo Dio bake e ndo juaxruxin.

⁶ Ko ndo Dio take a ndo juaxruxin ngajinna siá jaína chuntia ina ngajin ndo ixi siá tsonchjiñe ena ngajin ndo xrokonda tsitikaonna ixi je e ndo nduaxin jii ndo, ko tsajon ndo nge e tsayé e sen nduaxin rué e ndo.

⁷ Ti chuntia ndo Noé ngajin ndo Dio, nchakon ndo Dio ndachro ndo nge e xrokron en, ndo Noé maski xratikon a ndo nge e me e, kuitikaon ndo, méxin juinchekonchjian ndo naa ntábarco ixi jaína xrokuitjáña i sen ndo a ndo. Ko ixi ti chuntia* ndo Noé ngajin ndo Dio, je e ndo kuayé e ndo nge e jian tajon ndo Dio ngajin ni nduaxin chuntia ndo, ko ndo Noé nichje e ndo chujni ko je e na kuitikaon a na, méxin, kuitjáña na.

⁸ Ko ti kuachúntia ndo Abraham ngajin ndo Dio, nchakon kuiye e ndo ndo Abraham, je e ndo kuitikaon ndo, ko kuachrjexin ndo tjajnée ndo ko sakjui ndo ti nunte xrokuajon ndo Dio, maski noe a ndo no jii nunte me e.

⁹ Ko ti chuntia ndo Abraham ngajin ndo Dio, méxin, bake e ndo ti nunte kuajon ndo Dio, ko bake e ndo nti a xranchi naa ni tsikí xín ikjín. Ko ndo a ndo naa nchia tsikóñaxin manta, ko kaxon jaína bake e ndo Isaac ko ndo Jacob, ko je e sen kaxon kuayé e sen nge e tsindachro ndo Dio tsajon ndo ngajin sen.

¹⁰ Ko ndo Abraham chón en ndo naa tjajna tsajon ndo Dio, ko tjajna me e tsitjáña i tjajna ixi ndo Dio juinchekonchjian ndo tjajna.

¹¹ Ko jan Sara, janchri e ndo Abraham, kuachúntia jan ndo Dio, ko maski jua i banchejongi e jan ichjan, ko je e ndo Abraham ko jan Sara yui sen ó tachrí sen, je e sen kuayé e sen juachaxin ixi je e jan Sara juinchejongi e jan naa xjan xi, ixi chuntia jan ti ndachro ndo Dio jaína xrokron en.

¹² Kaxon ndo Abraham, maski ó tsango tachrí ndo ko ó mero tsen en ndo, xrabikon ndo ixi tsango kueya chujni tsachrjenixin ndo, ko kain sen ndo a ndo me e tsango kueya sen xranchi nchanotsé jii ngajni o xranchi nchese jii ngande e ndachaon, ko jua i tsekini sen.

¹³ Ko kain sen me e ó kuen en sen ko íkuayé a sen ti tsindachro ndo Dio xrokuajon ndo, ko ixi chuntia sen ngajin ndo, maski bikon a sen ti xrokuajon ndo, je e sen kuitikaon sen, méxin, ché e sen ko kuandachro sen ixi nunte xasintajni je a ndo a sen ixi nti i nchion tinteeni xranchi ngisen tj xín ikjín.

¹⁴ Ko sen jaína nichja ixi nduaxin je a nía sen nti i ngata a nunte xasintajni, méxin ndachroxin xrastetjée sen ti no jii tjajnée sen.

¹⁵ Ko siá tjaun sen xrokjan sen tjajna tsikachrjenixin sen, chao xrokjan sen nti a íjngo.

¹⁶ Ko na i. Je e sen tjaun sen naa tjajna ícha jian, tjajna me e jii ngajni. Ko ndo Dio tosue a ndo ixi xrojuinchekin in sen ndo, ndo Dio ne e sen, ko je e ndo ó juinchekonchjian ndo naa tjajna tsayé e sen.

¹⁷ Ndo Abraham nduaxin chuntia ndo ngajin ndo Dio ko kuayé e ndo nge e kuajon ndo Dio, ko ndo Dio tjaun ndo xrokono e ndo á nduaxin chuntia ndo Abraham ngajin ndo, méxin, ndo Abraham kuajon ndo chjen en ndo, xjan Isaac, xranchi naa nge e tsayé e ndo Dio, maski chjen en ndo, xjan naakuaxixion kuachónda ndo, ko maski tsindachro ndo Dio:

¹⁸ “Xjan Isaac tsachrjenixian itsjé chujni.”

¹⁹ Ko ndo Abraham no e ndo ixi ndo Dio nduaxin chónda ndo ijié juachaxin sinchexechón ndo chujni tsiken en. Ixi kuachúntia ndo Abraham, méxin ndakuen a chjen en ndo ko xranchi íjngo xrokuayé e ndo xjan Isaac, ko jaña kon en xranchi xroxechón xjan Isaac.

²⁰ Ko ixi chuntia ndo Isaac ngajin ndo Dio, me e juinchenchaon ndo kayui chjen en ndo, xjan Jacob ko xjan Esaú, ixi xrokuayé e xjan naa nge e jian tsii kaxin nano tjume e.

²¹ Ko ndo Jacob chuntia ndo ngajin ndo Dio, méxin, nchakon ó xrokuen en ndo, xrachao juinchenchaon ndo ngujngu chjen en ndo José, ko kuajon ndo juasaya ngajin ndo Dio, nchakon me e ntakuto e ndo jitosojixin ndo.

²² Ko ixi chuntia ndo José ngajin ndo Dio, nchakon ó xrokuen en ndo, ndachro ndo ixi tsii naa nchakon sen israelita tsachrjexin sen tjajna Egipto, ko kuetuan an ndo ixi nchakon satsjixin sen tjajna me e satsikao sen kain nte e ndo.

²³ Ndotée ndo Moisés ko janée ndo nduaxin chuntia sen ngajin ndo Dio, méxin, nchakon jongi e ndo Moisés, je e sen kuemá sen ndo ní nchanitjao ixi bikon sen ixi je e ndo naa ichjan tsango chaxro jitsje e xjan ko xrakuen a sen nge e tsiketuan an xi rey ixi je e xa tjaun xa xrokuen en kain xjan xi, xjan israelita.

²⁴ Ixi ti chuntia ndo Moisés ngajin ndo Dio, me e nchakon ó bangi ndo, chro a ndo xronfache na ndo ixi je e ndo chjen en nchrichje en xi rey ne e tjajna Egipto.

²⁵ Je e ndo xraxaon ndo ixi maski chjinga xrojuinckekao na ndo xranchi nckekao na sen tjajnée ndo, ícha jian me e ixi xroché e ndo xrojuincke e ndo ti ndako a nche e ni tjajna Egipto.

²⁶ Ko xraxaon ndo ixi ícha tjintee tangi xrokuatsinga ndo xranchi tangi xrokuatsinga ndo Cristo ícha tjume e ixi xrochónda ndo kain nge e tjintee jii tjajna Egipto, ixi je e ndo jichúntia ndo tsayé e ndo ti tjintee xrokuajon ndo Dio.

²⁷ Ko ixi ti chuntia ndo Moisés, me e sajuixin ndo tjajna Egipto, ko xronka i ndo xrokoñoa xi rey ngajin ndo. Je e ndo cháña chuntia ndo ndo Dio, ko jaña juincke e ndo xranchi xrobikon ndo ndo Dio, ndo jua i tikonna.

²⁸ Ko ixi ti chuntia ndo Moisés, me e kuaxi juinchéña ndo kia pascua, ko kuetuan an ndo ixi xrobingaxin ntáchja ixi ijni, ixi jaña ndo ángel tóna chujni, jua i naaxrokónaxón ninaa xjan sa ó, chjen en sen israelita.

²⁹ Ko ixi ti chuntia sen israelita ngajin ndo Dio, me e chao kuatsingatu e sen Ndachaon[†] Játse, xranchi xrokjui sen ngata a inche xema, ko kaxon ni tjajna Egipto tjaun na xrokuatsinga na, ko je e na kjun en na inda ko kuen en na.

³⁰ Ko ixi chuntia sen israelita ngajin ndo Dio me e jamangi naa tjatu o ijié jingakuenxin tjajna Jericó, ti je e sen kuaji sen ngandajin tjatu o yaato nchakon.

³¹ Ixi nchri Rahab, nchri bikitéxin itsjé xi, je e nchra kuen a nchra xranchi kon en ni kuitikaon a ndo Dio, ixi je e nchra juakoxin nchra ixi chuntia nchra ndo Dio nchakon jian kuayé e nchra sen tjajna Israel, sen tsikii kuitsjáya tjajnée nchra Jericó.

³² ¿Ko nge e ícha xrontatjunta? Tsitja i nchakon ixi tseki anta ixi ndo Gedeón, ndo Barac, ndo Sansón, ndo Jefté, ndo David, ndo Samuel, ko sen kuanichjaxin chijnie ndo Dio ó sa ó.

³³ Je e sen chuntia sen ngajin ndo Dio, me e juacha sen kuetuen en sen ichaxin tjajna ijié, ko jian juinchéña sen ijie ngajin chujni me e, ko kuayé e sen nge e tsindachro ndo Dio xrokuajon ndo, ko kuije e sen ro a kujenda,[‡]

³⁴ ko juinckekanga sen xro i xroxechin sen, ko juacha sablinga sen ixi tjaun na naaxrokónaxón na sen ixi chika espada. Ko sen konchrje, chao juinckesoji aséen sen, ko juacha sen juaya sen ixi tsango konsoji sen, ko juacha sen ngajin kain ni kuaningakon en sen.

³⁵ Ko bake e kaxin nchri chúntia nchra ndo Dio me e íjngo kuayé e nchra sen ndo a nchra, sen tsiken en ixi sen me e xechón sen.

Ko ikaxin sen cháña kuen en sen ixi je e sen tjaun a sen xroquintu e sen ti chuntia sen ndo Dio ixi kono e sen ixi xroxechón sen inaa nchakon ko nti a ícha jian tsake e sen.

³⁶ Ikaxin sen kuaxi na sen ntaq, ikaxin sen juanoa na sen, ko ikaxin sen kuinchruxin na sen nochika ngaxin in ndo achjiso.

³⁷ Ikaxin sen ixro kónaxin na sen, ko ikaxin sen konchrinjindunga na sen ixi chika sierra, ko ikaxin sen kónaxin na sen chika espada ko ikaxin sen chrikao na sen nti i, nda a, ko baketsaa sen ixi tjue é kutuchjon ko tjue é kubito ixi tsango nóa sen, juaxruxin a bake e sen ixi tsango chinga juinckekao na sen.

³⁸ Ko ni nunte xasintajni tikinixien a na xrobikon na sen. Je e sen kuachóna i sen tjajna, ntajie nti a bakintee sen ko ijna nti a bakaji sen, ko ngaxin in itjaq[§] ko ngaya yaso e kóna ndo a sen.

[†] 11:29 Ndachaon mar [‡] 11:33 Kujenda león [§] 11:38 Itjaq cueva

³⁹ Ko ninaa sen kuayé a sen ti tsindachro ndo Dio xrokuayé e sen ko je e ndo juinche e ndo juaxruxin ixi nduaxin kuitikaon sen ndo,

⁴⁰ ixi ndo Dio ó tsixraxaon ndo tsajon ndo naa nge e ícha jian ngajin jaína ti xrustechónna ko kain sen chuntia ndo ó seno, sen chinga juinchekaon na, ixi jaña ngujnguna tsayé ena naa juachaxin natjúá ko jaña tsontjúá aséina.

12

Je o ndo Cristo tsitikaonna

¹ Ko jaína noína ixi chondana ngandajinna kueya sen tjakoxin ixi nduaxin kuachúntia sen ndo Dio, sen kuintee seno, méxin ndá a tsintu ena kain nge e ti ndako a tingakoína ko jaña chao tsingana, xrorué ena ti nge e chuntiana.

² Me e jian tsitikaonna Ncháina Jesús ixi je e ndo tingijnana ndo xrochuntiana ngajin ndo ícha jian, ko je e ndo tjakoína ndo ixi kosue a ndo nchakon kuenito na ndo ntacru ko kuen en ndo ixi je e ndo no e ndo, maski chinga xrojuinchekao na ndo, je e ndo juaxruxin xrobake e ndo ngajin ndo Dio, ko jai ndatsjonxin jian jii ndo ti tetuan an ndo Dio.

³ Méxin, xraxaonnta ti juakoína Ncháina Jesús, itsjé chujni chinga juinchekaon na ndo, ni ndako a nche e, ko juacha ndo kuatsinga ndo kain ti tangi juinchekao na ndo; méxin, ja anta tonchrje anta ko tintue anta ti chuntianta ndo Dio.

⁴ Ixi jai ja anta xraritétoku unta kain ti ndako a ko xratiji a nchakon tsen ennta xranchi kuen en Ncháina.

⁵ Ja anta á ó tjáña anta chijni tjáanta ndo Dio ixi je e ndo nichja anta ndo xranchi chjen en ndo ixi ja in ndachro xroon chijnie ndo Dio:

Chjan na, ja anta toña anta xranchi nichja anta Ncháina nge e sinche enta, ko tsoné a asáanta nchakon tuyakuténa Ncháina.

⁶ Ixi Ncháina tuyakuté e ndo kain sen tjue e ndo

ko tajon ndo juachaxin tangi tatsinga sen tayé e ndo xranchi chjen en ndo.

⁷ Tokuaxin anta nge e soji nichja anta ndo Dio ixi je e ndo nichja anta ndo xranchi chjen en ndo. ¿Á xrojan ndotée naa ichjan xrokuyakuté a ndo xjan nchakon ndakua i jinche e xjan?

⁸ Síá ndo Dio tsuyakute anta ndo xranchi chjen en ndo, me e xrondachro ixi je a nduaxin chjen en ndo ja anta, je a xjan tsikachrjenixin ndo.

⁹ Jaína ti xranchinchina, Ndotáina bakuyakutéena sen ixi bakitikaon ana sen, ixi ndako xrojuuntu una nge e ko jaña batitikaona sen. Méxin, ¿xranchi xrokuitikaon ana Ndotáina jii ngajni?,* ndo chjaína juachaxin tsechónna kain nchakon.

¹⁰ Sen ndotáina bakuyakutéena sen ixi tjaun sen ndako tsitikaonna nge e jian baketuaina sen ti xrastena kaxion nchakon nti i ngata a nunte xasintajni. Ko ícha Ndo Dio, je e ndo nduaxin nchekuaína ndo nge e jian tikinixin sinche ena ko me e tsjachana tsontjúá aséina xranchi je e ndo tjúá ndo.

¹¹ Ko nduaxin ninaa jaína tjaun ana tsikaonna kondeexin ti ndakua i tsijintu una ko take ana xraxaonna ixi ti tsikaonna me e tsingijnana ixi juaxruxin tsinteena ko jaña sinche ena ti jian.

Tsango tangi ton en chujni titikaon ani ti nichja ndo Dio

¹² Méxin, ícha nchesoji tjáanta tsikonchrje ko nchesoji ntatuchi innta ísoji a,

¹³ ko tjéenta cha o jian ko nao itji. Me e tsoxruen en tutéanta ni e ko ítsitaon a tutáanta.

¹⁴ Chaxro ko juaxruxin tinteenta ko jian tjentonta kain chujni, ko nchetjúá asáanta ixi síá sinchetjúá i asáanta jua i tsikonnta Ncháina Jesucristo.

¹⁵ Jian tsje enta ixi kain sen tsayé e sen ti nchekitun enni ndo Dio, ixi síá na i, tson en xranchi naa ika itsjá, ko síá xrojan sen xrokui i ti itsjá me e, tsontsjá aséen sen ko sincheni e sen ikaxin chujni.

¹⁶ Ninaa ja anta tsarichriko inta inaa chujni je a xixi anta o je a nchrinchri anta, ko tintue anta ti jian tjáanta ndo Dio ixi jaña juinche e ndo Esaú, juinchekeji ndo juachaxin tikinixin en ndo ixi je e ndo xjan sa ó ndo, ko juasingíxin ndo juachaxin me e ixi naa laato ndaxrée jma.

¹⁷ Ko ja anta ó no anta ixi nchakon ndo Esaú tjaun ndo xrokuayé e ndo juachaxien ndotée ndo, jua i kuayé e ndo juachaxin me e, maski tsango tsjanga ndo, í jua i kuindoxin ndo ti juinche e ndo.

¹⁸ Ja anta konchjiñe anta ti ijná bake e ndo Dio xranchi konchjiñe e sen israelita, ijná jitjama xro i ko chao xrotséni ijná me e, ko konchjiñe anta ti naxixe e ko ti no jii ichrin ko chrinto soji.

* 12:9 ngajni cielo

¹⁹ Ko ja anta kaxon kuien anta ndachro itjao,[†] ko kuien anta nichja ndo Dio, jaña sen israelita, sen kuin en nichja ndo Dio, kuinóatée sen ixi íxronichja i ndo,

²⁰ ixi tjaun a sen tsin en sen ti ndachro ndo Dio: “Xrokonda tsen en ngisen tsake e tutée ngata a ijna. Ji i xrondachro naatsenxón iko o chujni ixi ntayao o ixro.”

²¹ Tsango ijíe juaxrakon me e, méxin, ndo Moisés ndachro ndo: “Jan an tsango xronkana, méxin rixranga.”

²² Ko je a xranchi konchjiñe e sen israelita, ja anta nduaxin konchjiñe enta ngajin ijna Sión, tjajnée ndo Dio, ndo jichón kain nchakon, tjajna me e tjajna Jerusalén jii ngajni, ko nti a ste itsjé sen ángel, stetajon sen juasaya ngajin ndo Dio,

²³ ko kaxon nti a ste kain chjen en ndo Dio, xjan jitaxin xroon jii ngajni. Ja anta tsikonchjiñe enta ngajin ndo Dio, ndo nchéña ijíe ngajin kain chujni, ko konchjiñe enta ngajin espíritue sen jian juinche e, sen ó tjúá aséen,

²⁴ ko tsikonchjiñe enta ngajin ndo Jesús, ndo nichjaxinna ixi inaa juachaxin natjúá ko jnié ndo, ijni kuintji kuijmaxinna. Ko ijni me e ícha jian nichjaxin ijni, je a xranchi jnié ndo Abel.

²⁵ Méxin, jian tsje enta ngisen jinichja anta ko titikaonnta ndo Dio, ixi sen tjajnée ndo, sen kuitikaon a nchakon kuyakutee ndo sen ngata a ijna jua i sabinge e sen ndo. Méxin, jaña ícha jua i satsinge ena ndo síá sintu una ti ndako a ko tsitikaon ana ndo, ixi je e ndo jinichjaina ndo ko tée ndo jiti xjn ngajni.

²⁶ Nchakon me e, nchakon nichja ndo Dio, kontengi nunte. Ko jai ndachro ndo: “Chao íjngo tson tengi nunte ko je a je o nunte, kao ngajni tson tengi.”

²⁷ Ko ti ndachro ndo “Íjngo”, tienxinni ixi tsitjáña kain nge e ti tsikonchjian, kain nge e ti tontengi, ko je o tsitu e kain nge e ti tontengi a.

²⁸ Juasie ndo Dio ixi juachaxin chjaina ndo, jua i tson tengi juachaxin me e. Ko tsaxexinna ntatuchi inna ko xrokonda tsajonna juasaya ngajin ndo ko xrotjue ena ndo ngaya aséejna xranchi je e ndo nche e ndo juaxruxin,

²⁹ ixi ndo Dio na ina, xranchi naa xro i ndo, xro i tjaaka kain nge e ko xro an nge e titu e.

13

Ti jian sinche ena me e sinche e ndo Dio juaxruxin

¹ Ngujungu ja anta tintue anta ti tjue enta kichuunta xranchi xrokonda sinche e ngujungu chujni titikaon ndo Jesús.

² Chaxro nichje enta sen tsiji ndointa ko tsitu e sen nti a ixi jaña tsjinche e kaxin sen, noe a sen ixi kaxin sen ángel tsichjée sen juachaxin tsikitu e ndo a sen.

³ Xraxaonnta ixi sen steje e ndo achjiso, xranchi ja anta steku unta sen nti a. Xraxaonnta ixi kain sen chinga nchekao na, xranchi ja anta jaña xrojuinta anta na kaxon.

⁴ Xraxaonnta ixi ti kuta anta tsango jian ko tsango tjintee me e, méxin ncheye anta ndoxi anta o janchri anta, ixi ndo Dio sinchéña ndo ijíe ngajin ni ndako a nche e, xranchi ni tejuakao ni je a ndoxi e o janchri e.

⁵ Tjue anta tomi, take énta juaxruxin ixi je o ti richondanta; ixi tsindachro ndo Dio: “Jan an tsintua inta ko xrotjáñana i ixi ja anta.”

⁶ Méxin, chao xrondachrona:

Nchána, je e ndo tingijnana ndo,

méxin, xro an nge e xrakon ana ixi chujni jua i sinchenínana.

⁷ Xraxaonnta ngisen juako anta ko nichja anta sen chijnie ndo Dio; take énta xraxaonnta xranchi jian juinche e sen ngata a nunte nti i ko nche enta xranchi juakoxin sen, xranchi je e sen tsango chuntia sen ndo Dio.

⁸ Ndo Jesucristo, je e ndo xraje o ndo najna, jai ko kainxin nchakon.

⁹ Tintue anta ixi sintakuan annta na ikaxin chijni, chijni je a chijnie ndo Dio ixi je e na tjakona kaxon ley kondee ti sineni ko me e xro an tunda. Cháña nchesoji aséejna ixi ndo Dio tjaunna ndo.

¹⁰ Jaina kuaye ena inaa altar kueta a nge e xrajon ngajin ndo Dio ti tsoméxin nge e ndako a juinche e chujni, ko me e jua i kuayé e sen taana kuanche e ixra ó sée ngaxin in nchia tsango tjúá.

¹¹ Ko ndotaana ícha tetuan an ndo bakikao ndo jnié iku ngaxin in Nchia ícha Tjúá ixi ijni me e xrajon ixi jaña tsomé e ti ndako a kuanche e chujni. Ko ntau e iku me e kuache ngande e tjajnée na.

¹² Jaña kaxon Ncháina Jesús bikaon ndo kuenxin ndo ngande e tjajna Jerusalén, ko jnié ndo me e kuijmaxin ti ndako a kuanche e chujni.

[†] 12:19 *itjao* trompeta

¹³ Tsachrjena ko rué ena Ncháina Jesús ngande e tjajna, ko xranchi kain ti chinga juinchekao na ndo, jaña tsituexinna sinchejna na kaxon.

¹⁴ Ixi ngata a nunte xasintajni nti i chonda ina ninaa tjajna tsake e kainxin nchakon; méxin, stetjéena inaa tjajna, naa tjajna nandá tsji.

¹⁵ Ixi juasie Ncháina Jesucristo me e chao tsajonna juasaya ngajin ndo Dio kainxin nchakon. Ixi juasaya* me e naa nge e tayé e ndo Dio, xrokonda tsajonna juasaya ngajin ndo ixi je e ndo tsango jian ndo.

¹⁶ Tjáña inta ixi xrokonda sinche enta ti jian ko tingijnanta chujni chóna i nge e. Jaña nche enta ixi me e nche e ndo Dio juaxruxin.

¹⁷ Titikaonnta sen tituan an ngaxin in ni ngo, ixi je e sen tayakon en sen asáanta ko nojna ixi je e sen xrochronga sen ngajin ndo Dio ti ixra juinche e sen ngajinnta. Kaxon ncheña anta sen ixi jaña ícha juaxruxin sinche e sen ixra ti kuetuan an ndo Dio; jaña ja anta kaxon juaxruxin tsake enta.

¹⁸ Níche enta ndo Dio ixi jan ana, jian stenta ana ixra kuituannana ko xro an nge e stencheni e aséenana ixi tja onna sinta ana jian kain nge e.

¹⁹ Ko jan an tjanca anta ixi xronichje enta ndo Dio ixi tsajon ndo juachaxin tuinxin xrokjanna ngajinnta.

Ndo Dio sintanchaonnta ndo

²⁰ Ndo Dio, ndo tajon juaxruxin, ndo ncheketo a chujni, ndo juinchehexón Ncháina Jesucristo, ko je e ndo Jesucristo, ndo tingatjiana xranchi kutuchjon, ko ixi jnié ndo me e kuitee juachaxin natjúá tsake e kain nchakon,

²¹ Je e ndo sinchetjúá ndo asáanta, me e jian sinche enta kain nge e ko tsitikaonnta ti tjaun je e ndo; ko je e ndo sinche e ndo ngajin jaina ti je e ndo tjaun ndo ixi juachaxien ndo Jesucristo. Ko kain nchakon ndo Jesucristo tsayé e ndo juasaya. Jaña tson en.

²² Kichuuna, tinóatáana ixi tsaye enta kaxion chijni kjin annta, ko chijni me e tsingijnanta ixi ícha tsitikaonnta.

²³ Ntano anta ixi ndo kichuuna Timoteo ó kuachrjexin ndo ndo achjiso. Siá tuinxin tsji ndo tsjasokian ndo nchakon tsjasotsja anta.

²⁴ Tájonnta juajnana ngajin kain sen titaon anta nti a ko kain sen tjajna chuntia ndo Jesucristo ko taye énta juajna xruan annta sen tjajna Italia.

²⁵ Ko Ndo Dio sintanchaonnta ndo. Jaña tson en.

* 13:15 *juasaya* respeto, honor

Xroon tsikjin ndo Santiago

Ndo Santiago tsikjin ndo xroon tsayé e kain sen tsichjeke e ngata a nunte xasintajni

¹*Jan an Santiago, nta a ixra ngajin ndo Dio ko ngajin Ncháina Jesucristo, tjá anta juajna kain ja anta ti tsikachrjenixinnta ti teyuu chjen en ndo Israel ko tsichjeke enta ngata a nunte xasintajni.

Ndo Dio tajon ndo ti jian xraxaon chujni

²Ja anta kichuuna, maski tangi stetatsinganta ngata a nunte nti i, ja anta take énta juaxruxin.

³Ó no anta ixi siá xrojan nge e tangi tintekon annta, me e tsono anta siá nduaxin ja anta chuntianta Ncháina Jesucristo ko me e ritanginta ko soji tsinteenta.

⁴Ko chon énta ixi ti tangi me e sinche e ixra ngaya asáanta. Me e ícha tsontjúá asáanta, ko jian sinche enta ko xro an nge e tsitjáñe e asáanta.

⁵Ko siá xrojan ja anta titjáña tsono anta nge e ti jian, ja anta tjanche enta ndo Dio, ko je e ndo xrotjáanta ndo tsienxinnta jian, ko je e ndo tjenje a ndo nge e tajon ndo.

⁶Ja anta nchakon tjanche enta ndo Dio naa nge e, chuntianta ixi nduaxin tsaye enta nge e juanchianta, ixi ngisen titikaon a tsayé e sen xrojan nge e tjanchia sen, sen me e ton en sen xranchi ndachaoon toncheka chrinto nango ko nango.

⁷Ixi sen titikaon a, tsono e sen ixi Ncháina Jesucristo tsajon a ndo nge e juanchia sen

⁸ixi jai xraxaon sen naa nge e ko ndúya íjngo nge e xraxaon sen, sen me e je a jian nche e sen.

⁹Sen kichuuna, sen chónða i kueya nge e, sen me e ícha xroché e sen ixi ícha tjintee sen ngajin ndo Dio.

¹⁰Sen chónða kueya nge e, sen me e juaxruxin tsake e sen kaxon nchakon ndo Dio tsajon ndo juachaxin xro an nge e xrochónða sen, ixi kain ni kueya chónða, ni me e tson en na xranchi tsjo e ika.

¹¹Hora xrochrin in nchakon ko tsango tsania chjiixro, ika xroxema ka, ko tsjo e ka xrochjejin tsjo, ko tsitjáña ti chaxro bakikoni ka. Jaña tson en ni chónða kueya nge e ko itsjé tomi, tsen en na ko tsitjáña kain ti ixra juinche e na.

Sen chúxin ndo Dio chao tsatsinga sen ti tangi tsií

¹²Juaxruxin tsake e sen kichuuna nchakon tsií juachjaon ngata a sen ko soji tsake e sen, ixi sen me e tsayé e sen juachaxin tsechón sen kain nchakon, jaña tsindachro ndo Dio tsayé e kain sen nduaxin tjue e ndo.

¹³Nchakon xrojan ja anta tjaunnta sinche enta ti ndako a, ndachro anta ixi ndo Dio tsikake e ndo me e. Ndo Dio jian ndo ko je e ndo nche a ndo ti ndako a jii, ko ni ña i chónða i juachaxin tsakaon na ndo, ko je e ndo take a ndo ngaya aséenni ti ndako a sinche eni,

¹⁴ixi nchakon xrojan chujni tjaun na sinche e na ti ndako a, je o na take e na ngaya aséen na ti ndako a sinche e na.

¹⁵Ko ti ña i xraxaon chujni tjongíexin ti ndako a, ko ti ndako a ícha tangi ngaya aséen na, kondeexin me e teenxin chujni.

¹⁶Jan an tjua anta kichuuna, xraxaon anta ti ndako a.

¹⁷Kain nge e jian ko kain nge e chaxro tayé ena, kain me e ti xin ngajni ti jii Ndotáina Dio, ndo tsijinchekonchjian kain xro i jii ngajni. Ko je e ndo, ti ndachro ndo ko ti xraxaon ndo tindoxin a, ko xro an tsa on jii ngajin ndo.

¹⁸Jaina jongíexinna íjngo ixi ti chijni chajina je e ndo ixi jaña jueña ndo ko jaina ikjanna xranchi naa nge e ícha sa ó juinchéña je e ndo.

Chujni sinche e ti ndachro chijnie ndo

¹⁹Méxin, ja anta kichuuna, kainnta jian tin ennta ko taka i xronichjanta ko taka i tsoñaonta.

²⁰Ixi sen taka toña jua i nche e sen xranchi tjaun ndo Dio.

²¹Ko xrokonda tintu enta kain ti ña i ko ti ndako a nche e ikaxin chujni ko ja anta tsitikaonxinnta ixi nchiji asáanta chijnie ndo Dio kuaye enta, ixi chijni me e xrotjáanta juachaxin tsarichonnta kain nchakon.

²²Ko xrokonda sinche enta ti ndachro chijnie ndo Dio. Je a je o tsin ennta ixi siá je o tsin ennta ko sinche anta, ja onta rincheye é asáanta.

²³Méxin, sen tin en chijnie ndo ko nche a sen ti ndachro chijni, sen me e nche e sen xranchi naa chujni jitsjexin xrosenda ikon sen,

²⁴ me e tsje e sen ikon sen ko hora satji sen, taka tjáñe e sen xranchi bikon sen ikon sen.

²⁵ Ko sen tjáñe a nge e kuin en ko jian jitsje e sen nge e ichro chijnie ndo ixi chijni me e tsingijna sen tsintu e sen kain nge e ti ndako a kuanche e sen, ko soji tsintee sen, sen me e juaxuxin tsake e sen kain nchakon.

²⁶ Siá xrojan ngisen ndachro ixi tsango titikaon sen ndo Dio, ko ndako a nichja sen, sen me e ncheye e sen aséen sen, ko xro an xrée ti ndachro sen titikaon sen.

²⁷ Ngisen nduaxin jian titikaon ndo Dio ko xro an nge e sínká sen ngajin Ndo, sen me e xrokonda jaña sinche e sen: tsingijna sen xjan nóa ko kaxon sen ka an, sen jitatsinga juachjaon, ko sinchekítja i aséen sen ixi kain ti ndako a jii ngata a nunte xasintajni.

2

Xrokonda xraje o xrotjue eni kain chujni

¹ Kichianna, ja anta ti chuntianta Ncháina Jesucristo, ndo tayé e kain juasaya, xrokonda ja anta xraje o xrotjue enta kain chujni ko tinche anta chujni xrotjue enta.

² Nchakon xroxra unta ixi tsajonnta juasaya ngajin ndo Dio ko tsji naa xi, xi chóna kueya tomi ko jian jitsáa xa ko jiá kuchaningo itja xa, ko hora me e kaxon tsji naa xi nóa ko chaxro a jitsáa xa.

³ Ko siá ja anta chaxro xronichje enta xi jitsáa jian ko xrondachenta xa: “Nti i chaxro take énta”, ko xi nóa xronichje anta xa ndako ixi xrondachenta xa: “Ja a tjasian o take é nunte no ndá a.”

⁴ Ja anta me e índako a stenche enta ixi je a xraje o kuiye enta kayui chujni.

⁵ Ja anta kichuuna tsango tjua anta, tin ennta ji i: Ndo Dio tsikinche e ndo sen nóa jii ngata a nunte nti i ixi je e sen ícha tjintee sen ixi chuntia sen ndo Dio, ko sen me e jai tsayé e sen juachaxien ndo ko tsji nchakon tsayé e sen juachaxin tixin in sen ti tetuan an je e ndo ixi jaña tsindachro ndo tsayé e kain sen tjue e ndo.

⁶ Ko ja anta chinga nchekuunta sen nóa ixi tjue anta sen. Ko ni chóna itsjé tomi, ni me e tjenga i na na jian ixra nche enta ko tingakjinnta na ngajin xi tetuan an ixi titikaonnta ndo Dio.

⁷ Ixi ni chóna kueya tomi, ni me e ícha chinga nichjangí e na ndo Jesús, ndo tituan an ja anta.

⁸ Ja anta siá nduaxin titikaonnta ti tetuan an ndo Dio xranchi nichja xroon: “Xrokonda xrotjue enta ni kichuunta xranchi tjue enta asáanta”, me e jian nche enta.

⁹ Ko siá je a xraje o tjue enta ni kichuunta ko tinche enta ngisen tjue enta, me e tamanta ijje ko titikaon anta chijnie ndo Dio.

¹⁰ Siá jii naa sen titikaon kain ti kuetuan an ndo Dio ko naakua nge e kuitikaon a sen, ixi me o tama sen ijje lxi nche a sen kain nge e kuetuan an ndo Dio.

¹¹ Ixi je e ndo Dio ndachro ndo: “Ja anta sen nchri ko sen xi ti o tsikuta anta xrochonda inta inaa nchri o inaa xi, nchri je a jancri anta o xi je a ndoxi anta”, ko kaxon tsindachro ndo: “Jua i naatónaxónnta ni kichuunta.” Ko siá ja anta chonda inta inaa nchri o inaa xi, ko naakónaxónnta naa chujni, me e o kuamanta ijje.

¹² Méxin, xrokonda jian nichjanta ko jian nche enta ixi tsji nchakon sinchéña ndo Dio ijje ngajinnta xranchi nichja chijni chóna ijje juachaxin sinchemé e kain ijje.

¹³ Méxin, sen bikonóe a sen kichuu, sen me e kaxon nchakon tsoña ijje, ndo Dio tsikonóe a ndo sen. Ko sen tikonóe e sen kichuu sen, sen me e kaxon ndo Dio tsikonóe e ndo sen nchakon sinchéña ndo ijje.

Ti chuntiana ngajin ndo Dio, xrokonda sinche ena ti jian

¹⁴ Ja anta kichuuna, xro an tjintee siá xrondachrona ixi tsango chuntianta Ndotáina Dio ko tingijna inta ni kichuunta. Xrokonda nduaxin tsingijnanta ni kichuunta, je a je o xronichjanta. Siá sinche anta jaña, ti ndachrona chuntianta Ncháina, ¿á me e tsingijna inta tsachrje ijje chondana?

¹⁵ Siá naa sen kichuuna, sen xi o sen nchri, xro an nge e chóna sen tsetsáa sen ko xro an nge e chóna sen sine sen ngujngu nchakon,

¹⁶ ko jaina xrondachena sen: “Itjinta jian ko intenta ko tin innta ko jian taritsiinta”, ko siá jaina tajon ana nge e xrokonde e sen, ti nichjana me e tjinte a.

¹⁷ Ixi ti xrondachrona chuntiana ndo Dio xrokonda tsingijnana ni kichuuna. Siá sinche ana jaña, ti ndachrona chuntiana ndo Dio xro an tjintee.

¹⁸ Ko siá xrojan ngisen ndachro: “Ja a chuntia ndo Dio, ko jan an ícha tingijna chujni.” Ja a ndachjijiana xranchi chuntia ndo Dio, ko tingijna ia chujni xrokonde e, ko jan an tsjako a xranchi nduaxin chuntia ndo Dio ixi tingijna chujni.

¹⁹ Ja a titikáoaan ixi je o naa ndo Dio jii ko jaña jian xraxaoan, ko kaxon espíritue Xixron anxrée jaña titikaon ko xraga ixi xronka.

²⁰Ja a tóña ñia ninta, titikáoaan ixi ti chuntiana ndo Dio xrokonda tsingijnana ni kichuuna, ko siá sinche ana jaña, ti ndachrona chuntiana, tjinte a.

²¹Ndotáina Dio ndachro ndo ixi jian juinche e ndotáchri ina Abraham, nchakon kuitikaon ndo, xrokuajon ndo chjen en ndo, xjan Isaac, xrokuen en xjan ngata a ixro xrokuayé e ndo Dio.

²²Méxin, ja anta tienxinnta jian ti juakoxin ndo Abraham, je e ndo chuntia ndo ndo Dio ko kuitikaon ndo ixi xrokuajon ndo chjen en ndo, ko méxin, ti chuntia ndo ícha tjintee.

²³Jaña kon en xranchi jitaxin xroon chijnie ndo Dio: “Je e ndo Abraham soji chuntia* ndo ndo Dio, méxin, ndachro ndo Dio ixi komé e jíee ndo Abraham”, méxin ndachro ndo Dio ixi je e ndo tjento ndo ndo Abraham.

²⁴Xrokonda jian tsiexinnta ixi ndo Dio tsayé e ndo chujni ixi ti jian nche e ko je a je o ndachro sen ixi chuntia sen ndo.

²⁵Jaña kaxon nchri Rahab, maski sa ó kuachóna nchra itsjé xi, nchakon kuiji sen israelita tjañee nchra, je e nchra kuajon nchra juachaxin kuitu e sen ndo a nchra ko bingijna nchra sen sajuixin sen inaa cha o ixi tjaun ni tjañee nchra naaxrokóñaxón nã sen, méxin, ndo Dio jian kuayé e ndo nge e juinche e nchra nchakon je e nchra bingijna nchra sen.

²⁶Jaña ti cuerpoe chujni siá chóna i aséen, me e xrondachro ixi ó tsiken en, ko jaña kaxon siá chuntiana ndo Dio ko tingijna ina ni kichuuna, ti ndachrona ixi chuntiana ndo Dio, tjinte a.

3

Ro anta ndako xronichja

¹Kichuuna, kueya i ja anta tsingakuenxinnta sinchekuen ennta chujni chijnie ndo Dio ixi siá ndako a sinchekuen ennta chujni, me e ja anta ícha soji tsóña anta ijje.

²Kainna ndako a nichjana, ko siá jii ngisen jian nichje e sen sen kichuu sen ko xro an chijni ndako a tachrjexin ro a sen, sen me e ícha tjúá aséen sen ko chao tetuen en sen nchijí cuerpoe sen.

³Ji i jii xranchi naa kunxin, tsake e nã chika ngaya ro a ba ixi jaña chao tsitikaon ba ko ndako itsji ba.

⁴Tsje enta kaxon xranchi ste ntábarco: maski tsango ijje ntã ko tsango soji chrinto toncheka ntã, xi teka ntã chao tituen en xa ntã ixi chóna ntã naa ntã nchíin tekáxinni ntã.

⁵Jaña nejenni kaxon. Maski tsango nchíin, nchakon nichja tsango nchejié nge e nichja, ko ti nichja me e xranchi naa xro i nchíin nchekakiin nchijí naa ijna.

⁶Jaña nejenni jii xranchi naa xro i ko hora nichja ti ndako a, me e ncheni e nchijí aséenni ko cuerpoe. Nge e ndako a nichjani me e tsitjáñaxin kain nge e jian jii ngaya aséenni, ko tsitjáñaxin kain chujni tin en nge e nichjani ixi Xixron anxrée nchekateya xa ixi ndako a xronichjani.

⁷Chujni chao sinchesancho kain iko jie e jii ntajie, ko kain iko tjanga ko kunchee ko iko jingangi ndachaon,* kain iko me e chao tsetuen enni ba.

⁸Ko nejenni jua i tsetuen enni ixi ti nichja chóna xranchi xrokjui xroanyua tsenxin aséen chujni.

⁹Ro ana tajonxina juasaya ngajin Ndotáina Dio ko kaxon ro ana tengexinna teka chujni, chujni juinchéña ndo Dio xranchi je e ndo.

¹⁰Kaxon ixi ro ana tajonxina juasaya ngajin ndo Dio ko kaxon ro ana tjankataxina ijje ngajin ni kichuuna. Kichuuna, nche anta jaña ixi ndako a me e.

¹¹Ti no tachrjetóxin inda, tachrje a inda tsjen ko kaxon nda tsjá.

¹²Kichuuna, ¿á chao naa ntã tu higo tsajon ntã kaxon tu aceituna o ntã tajon tu uva tsajon ntã kaxon tu higo? Kaxon jua i ti no tachrjetóxin nda tsjen tachrjexin nda tsjá.

Ti nduaxin xraxaonna jian tì xìn ti jii ndo Dio

¹³Siá jii xrojan ngisen ngakjen ennta, sen tsango no e ko tienxin jian, sen me e xrokonda sinche e sen jian ko xronichja sen jian ko sinchejié a aséen sen ixi ti tsango jian no e sen.

¹⁴Ko siá ja anta tochjuya anta me e sinchetsjá asáanta, ko siá ja anta tjaunnta sinche enta kain nge e, me e sinchejié a asáanta ixi nge e ti no anta ixi me e xrokjui xranchi xrojuincheyanta ko ndachro anta ti nduaxin.

¹⁵Siá jaña nche enta, ti no anta me e je a ndo Dio kuajon, me e tsjinchiinta ixi chujni jii ngata a nunte, chujni titikaon a ndo Dio ko me e ti tajon Xixron anxrée.

* 2:23 *chuntia* tener fe * 3:7 *ndachaon* mar

¹⁶ Ti no jii chujni chjuye e ko ti tjaun je o tsetuan an, nti a jii ti ncheketoni ko kain ti ndako a.

¹⁷ Ko sen jian tsienxin ko jian xraxaon ti me e t̄j x̄in ngajin ndo Dio: sen me e xrokonda tsjako sen ixi jian aséen sen ko tset̄o a sen ko tsingijna sen chujni ko tsitikaon sen ti jian ndachro sen kichuu sen, ko tsikonóe e sen chujni ko jian sinche e sen, ko xronichja sen ti nduaxin.

¹⁸ Ko sen tjaun tsake e juaxruxin xrokonda tsingijna sen sen kichuu sen kaxon tsake e sen juaxruxin, ko jaña tsintee sen juaxruxin xranchi tjaun ndo Dio.

4

Sen ícha tjaun nge e jii nunte xasintajni

¹ ¿Ti no t̄j x̄in ti ncheke to kichuu tjauna ko ti no t̄j x̄in ti tet̄oku u kichuunta? Kain ji i tachrjexin ngaya asáanta.

² Ja anta tsango tjaunnta xrochondanta xrojan nge e, ko jua i te nanta, me e toñaonta ko tjaunnta naatsónaxónnta chujni. Tochjuya anta ixi jua i chondanta nge e tjaunnta, méxin, tet̄oku unta chujni. Ko jua i taye énta nge e tjaunnta ixi ja anta tjanche anta ndo Dio.

³ Tjanchianta ko jua i taye énta nge e tjaunnta ixi ndako a tjanchianta, ko ti tjanchianta tayé anta ixi je o tjaunnta sinchecháxin asáanta.

⁴ Méxin ja anta ikjannta chujni titikaon a ndo Dio. ¿Á noa i ja anta ixi siá tsango tjue enta kain ti ndako a jii ngata a nunte xasintajni,* méxin ikjannta xranchi ni ningakon en ndo Dio? Ngisen tjento nge e ndako a ton en ngata a nunte, sen me e jua i tsjento sen ndo Dio.

⁵ Á xraxaonnta ixi ti nge e ndachro xroon chijnie ndo Dio tjinte a ixi ja in ndachro: “Ixi Espíritue ndo Dio kuaye ena me e xrondachro ixi je o ngajin ndo xrochuntiana.”

⁶ Ndo Dio tsango tingijnana ndo, ko xroon chijnie ndo ndachro: “Ndo Dio ningakon en ndo kain chujni tsango nchejié aséen, ixi je e ndo tjue e ndo kain chujni nchejié a aséen.”

⁷ Tintu enta ndo Dio tsetuan annta ndo. Titikaon anta ti ndachro Xixron anxrée ko je e xa satsjixin xa ti ste ja anta.

⁸ Tonchjiñe e ja anta ngajin ndo Dio, ko kaxon je e ndo tsonchjiñe e ndo ngajinnta. Nchetjúa asáanta kain ja anta ti tjue enta nge e ndako a jii ngata a nunte ko kaxon tjaunnta xrotjue enta ndo Dio.

⁹ Tsjanganta ko tuyakonta ko ncheni e asáanta. Ko tindoxinnta ti tjanonta ko jai tsjanganta, ko ti chá anta jai tsoni e asáanta.

¹⁰ Nnchenchúin asáanta ngajin ndo Dio ko je e ndo jian xronichja ndo ixi ja anta.

Chungíe anta ni kichuunta

¹¹ Kichuuna, nichja inta kontree sen kichuunta ixi kain sen nichja kontree sen kichuu, xrokjui xranchi xronichja sen kontree chijnie ndo Dio. Ko siá jaña nichja sen ikjan sen xranchi naa xi nchéña ijje, ixi titikaon a sen ti tetuan an ndo Dio.

¹² Ixi je o je e ndo Dio kuajon ndo ley tsitikaon chujni, ko je o je e ndo tikinixin en ndo sinchéña ndo ijje o tsjankata a ndo chujni ijje, ko chónnda ndo juachaxin sinchemé e ndo ti ndako a juinche e chujni. Méxin, ¿sonda ja anta nichjanta kontree ni kichuunta?

Noa inta siá ndúya tsarichonnta

¹³ Ja anta ti ja in ndachronta: “Jai o ndúya itsjina tjauna ijje ko nti a tsojuna nchiji nano ko sintu una ixr̄a ko tsjachana itsjé tomi.”

¹⁴ Ko ja anta noa inta nge e tson en ndúya, á xratsarichónnta o na i. Jaina stena nti i ngata a nunte xranchi naa tjuununte; tonoxin tjuj naa nchion ko tjume e titjáña tjuj.

¹⁵ Ja anta xrokonda ja in xrondachronta: “Siá Ndotáina Dio tsajon ndo juachaxin tsechónna ndúya, me e sintu una ngixe i ixr̄a.”

¹⁶ Ko ja anta hora nichjanta tsango nchejié asáanta, ko ti ndachronta me e ndako a jii.

¹⁷ Ixi ti sen no e nche e ti jian ko nche a sen, sen me e tama sen ijje.

5

Chijni nhexraxaon chujni chónnda itsjé nge e

¹ Tin ennta ja anta chujni chónnda itsjé tomi ko itsjé nge e, ja anta tsjanganta ko tuyakonta ixi ts̄ij juachjaon sincheni e asáanta

² *ixi kain ti tjintee chondanta, tsirenga; ko manta sterianta tsiki i kuchji.

³ Ko tsiki ixien kain chika oro ko kain chika plata richondanta, ko ti tsitjo me e tjakoxin ti ndako a nche enta, ko xro i chexin kain nge e, jaña tsitjáñaxin ja anta. Itsjé tomi ko itsjé nge e kuasintjanta kain nchakon ji i, ko noa inta ixi nchakon ji i ó tsjexin nunte xasintajni.

* 4:4 xasintajni mundo 5:2 Mt. 6:19.

⁴ Sen juinche e xráanta nchakon kuandáanta, jitsjangaxin sen tomie sen tasinke enta sen, ko Ndo Dio, ndo chóna kain juachaxin, kuin en ndo ixi sen nche e ixra stetsjangaxin tomie sen.

⁵ Ngata a nunte nti i, ja anta tsango nchexruantanta, ko kain juaxruxin chondanta, ko xranchi iko tjontao, jaña stetjontao ja anta, ko tuinxin xranchi tsen en je e ba, jaña tsen en ja anta.

⁶ Ja anta juankata anta ijië ko naa kónaxónnta chujni xro an ijië chóna, ko chujni me e xro an nge e juinche e sen.

Nichje enta Ndo Dio ko chon énta tsjate e ndo

⁷ Kichuuna, take énta juaxruxin ixi ó tsji nchakon tsji Ncháina Jesús. Chon énta xranchi sen tenga nokéen, je e sen chón en sen tsji ichrin tsengaxin sen ko ichrin tsicháxin nge e benga sen, ixi tsji nchakon tsandáa sen.

⁸ Jaña ja anta kaxon chon énta ko soji tinteenta ixi ó tsji nchakon xrokjan Ncháina Jesucristo.

⁹ Kichuuna, tjangíe a kichuunta ixi jaña ndo Dio tsjankata inta ndo ijië ixi je e ndo, ndo nchéña ijië, ó tuinxin tsji ndo.

¹⁰ Kichuuna, tsje enta xranchi tangi ko ijië juachjaon kuatsinga sen profeta ko je e sen juaxruxin bake e sen, sen kuachóna juachaxin nichjaxin sen nombrée Ndotáina Dio.

¹¹ Jaina ndachrona ixi je e sen juaxruxin bake e sen maski kuatsinga sen ijië juachjaon. Ja anta ó kuin ennta xranchi ndo Job bikixi en ndo kain nge e kon en ndo, ko xranchi ndo Dio bingijna ndo ti ó juexin kuatsinga ndo juachjaon ixi Ndotáina Dio tsango tjuajna ndo ko tsango tikonóa ina ndo.

¹² *Kichuuna, jan an ntatjunta ndachroxin anta nombrée ndo Dio jii ngajni o nunte nti i o ngixe i naa nge e jii ngata a nunte ixi nduaxin nge e ndachrona ixi nchakon xrondachrona jaán, jaña tson en, ko nchakon xrondachrona na i, jaña tson en kaxon, ko jaña ndo Dio tsjankata inta ndo ijië.

¹³ Siá xrojan ja anta jitoni e asáanta, nichje enta ndo Dio. Siá xrojan ja anta juaxruxin stenta, itsjenta ko tájonnta juasianta ngajin ndo Dio.

¹⁴ *Siá xrojan ja anta ni anta, tiye enta sen stetaon annta, sen chóna sen juachaxin ngaxin in ni ngo, ko je e sen xronichje e sen ndo Dio ko ixi juachaxien Ncháina Jesús tsake e sen ndaxi e ngata a jaa sen ni e.

¹⁵ Nchakon nichje enta ndo Dio ko chuntianta ngajin ndo, me e sen ni e tsoxrueen en sen ko je e ndo Dio sinchekaya ndo sen, ko siá xrojan ijië yama sen, je e ndo sinchemé e ndo kain ti sínká sen.

¹⁶ Méxin, ja anta ndachenta sen kichuunta nge e ndako a juinche enta ixi jaña je e sen xronichje e sen ndo Dio, ko je e ndo sinchexruan anta ndo. Ixi sen ícha chuntia ndo Dio, je e sen nichje e sen ndo ko je e ndo tin en ndo nge e tjanchia sen.

¹⁷ Ndo profeta Elías, bake e ndo xranchi jaina, ko nchakon juanche e ndo ndo Dio ixi nchijí aséen ndo ixi xrokui a ichrin, jaña kon en ko nduaxin kui a ichrin ngata a nunte ní nano ko tu o.

¹⁸ Ko tjume e je e ndo Elías nichje e ndo ndo Dio ínggo ko ndo Dio xrueen an ndo ichrin ngata a nunte ko inche kuajon nge e kuandáa sen.

¹⁹ Kichuuna, siá xrojan ja anta tsachrjendáanta cha o jian ko inaa sen sinchekjannta sen,

²⁰ *tono anta ixi sen juinchekjan kichuu cha o jian, sen me e bingijna sen ixi tsitjáña i aséen chujni me e, ko ndo Dio sinchemé e ndo itsjé ijië kuachóna sen.

Xroon sa ó tsikjin ndo Pedro

Ndo Pedro kjin en ndo xroon sen titikaon Ncháina, sen tsichjeke e ikaxin tjanya

¹ Jan an, Pedro, ndo Jesucristo kuinche ena ndo ko xruan anna ndo sinta a xrée ndo, me e ikjin xroon ji i ko xruan an xroon ngajinnta ti tsichjeke enta ikaxin tjanya xranchi nunte Ponto, Galacia, Capadocia, Asia, ko Bitinia.

² Ja anta, Ndotáina Dio tsikincha anta ndo ixi jaña tsixraxaon ndo ó sa ó, ko ixi juachaxien Espíritue ndo tsikincha anta ndo ixi tsitikaonnta ndo ko jaña tsontjúáxin asáanta ixi jnié ndo Jesucristo. Taye énta juaxruxin tajon ndo Dio ko je e ndo sintanchaonnta ndo.

Stechon enna naa nge e jian

³ Tajonna juasiajna ngajin ndo Dio, Ndotée Ncháina Jesucristo, ixi tsango tjaunna ndo ko bikonóina ndo me e jongí ena íjngo ixi xechón ndo Jesucristo. Ko méxin stechon enna nge e jian tsij.

⁴ Tsaye enta nge e jian tsajon ndo Dio, ti chónnda ndo ngajní, naa nge e jua i tsitjáña, ko jua i tsonkítja, ko jua i xroxé nde xranchi itsjo.

⁵ Ko ixi chuntianta Ndo Dio, je e ndo tayakon annta ndo ko ixi juachaxien ndo chao tsarichonnta kain nchakon xranchi tsixraxaon ndo ó sa ó. Kain ji i tsonoxin nchakon tsjexin nunte xasintajni.

⁶ Méxin, ja anta tsango juaxruxin stenta maski xrojan nge e tangi tsatsinganta kaxin nchakon.

⁷ Ixi ti chuntianta Ncháina, me e xranchi chika oro xrokonda tsatsinga chika chringi xro i, ixi jaña tsonoxin á nduaxin jian chika o na i. Méxin, ícha tjintee xrochúntiani Ncháina, ixi chika oro ixi tjexin chika. Ixi siá titikaonnta Ncháina xrokonda tangi tsatsingaxinnta, ko jaña ndo Dio tsikon ndo á bikixi anta ti tangi, me e chao tsaye enta juachaxin ko jian xronchija ndo Jesucristo ixi ja anta nchakon tsij ndo.

⁸ Ja anta titikaonnta ndo Jesucristo ko tjue enta ndo maski tikon anta ndo ko tsango chá anta ko jua i xrondachronta ti tsango chaxro juaxruxin me e chondanta,

⁹ ixi ja anta ó chondanta juachaxin tsarichonnta kain nchakon, me e juachanta ixi chuntianta ndo Dio.

¹⁰ Nchakon ó sa ó sen kuachronga chijnie ndo Dio juanchangi sen xranchi xrokuechón chujni kain nchakon ko chronga sen ixi ndo Dio xrokuajon ndo juachaxin me e xrokuaye enta ixi tjua anta ndo ko jian ndo.

¹¹ Espíritue ndo Cristo juincheno e sen kuachronga chijnie ndo Dio ó sa ó ixi ndo Cristo tangi xrokon en ndo, ko tjume e tsayé e ndo juachaxin ijíe. Ko je e sen tjaun sen tsono e sen ngisen me e ko ngisa xrokon en nge e ndachro Espíritue ndo Dio.

¹² Ko ndo Dio juincheno e ndo sen ixi nge e chronga sen je a xrokon en nchakon bake e sen. Kain ji i xrokon en nchakon stena jai. Ji i chijní juako anta sen bajako chijní jian ixi juachaxin Espíritue ndo Dio kuxin ngajní. Ko kain ji i sen ángel kaxon tjaun sen xrobikon sen kaxon.

Ndo Dio tjaun ndo ndako tsojuna

¹³ Méxin, jian xraxaonnta nge e sinche enta ko jian tsinteenta. Ko ixi tjua anta ndo Dio, méxin ixi nchijí asáanta chon énta nge e tsajon ndo nchakon xrokjan Ncháina Jesucristo.

¹⁴ Xranchi naa chjan titikaon ndotée, jaña nche enta, ko ínche anta xranchi banche enta sa ó ti kuachuxin anta ndo Dio.

¹⁵ Cháña tjúá ko ndako tsinteenta ixi ndo Dio, ndo kuiya anta, je e ndo tjúá ndo.

¹⁶ Ixi xroon chijnie ndo Dio ndachro: “Ja anta tjúá tinteenta xranchi jan an tjúána.”

¹⁷ Siá ndachronta ixi ndo Dio Ndotánta, ndo jian nchéña ijíe ngajin kain chujni ixi ti nge e juinche e na, ja anta xrokonda tsitikaonnta ndo ko tájonnta juasianta ngajin ndo kain nchakon tsinteenta nti i nunte xasintajni.

¹⁸ Ndo Dio bingijnanta ndo ixi ítsinte anta xranchi bake e sen tsikachrjenixinnta ó sa ó. Ja anta no anta jian nge e kuenaxinnta ndo, je a ixi naa nge e tsjexin xranchi chika oro o chika plata.

¹⁹ Kuenaxinnta ndo ixi jnié ndo Jesucristo, ijní tsango tjintee ko me e kuayé e ndo Dio, xranchi xrokjui naa kutuchjon xro an nge e xe e ba ko je a ni e ba.

²⁰ Ndo Dio ó sa ó kuinche e ndo ndo Cristo ti xrako a nunte xasintajni. Ko jai konoxin ndo ixi sen chuntia ndo jian tsintee sen.

²¹ Ixi kuen en ndo Cristo me e kuitikaonnta ndo Dio, ndo juinchechón ndo Cristo nchakon kuen en ndo, ko je e ndo Dio kuajon ndo ijíe juachaxin ngajin ndo Cristo. Ko méxin ja anta chuntianta ndo Dio ko stechon ennta tsarichonnta kain nchakon.

²² Ko jai ó kuitikaonnta chijni nduaxin ko ixi kuitikaonnta me e kontjúá asáanta, méxin tjue enta sen kichuunta ixi espíritue ndo Dio tingijnanta. Ko xrokonda xrotjue e kichuunta ixi nchijíí asáanta.

²³ Ja anta ó jongí anta íjngo. Je a xranchi tjongí e naa chjen en chujni ten en. Ja anta íjngo jongí anta ixi kuitikaonnta chijnie ndo Dio, ndo jichón, ko xro an ngisen sinchetjáña chijni me e.

²⁴ Ixi ndachro xroon chijnie ndo Dio:
Kain chujni nunte xasintajni xranchi kayua ste na,
ko juachaxin chóna na me e xranchi tsjo e ka,
ixi ika xema ka ko itsjo chjenjin tsjo,

²⁵ ko chijnie Ncháina nai a tsitjáña chijni.

Ko chijni me e tajon juachaxin tsechónni kain nchakon, chijni, me e ó kuaye é ja anta.

2

¹ Méxin, tintu enta kain nge e ña i kuanche enta, Ndachro anta juancheya, tjanoa inta sen kichuunta, tohjuya inta nge e chóna inaa chujni ko nichja inta kontree chujni.

² Nche enta xranchi chjan nchínchin nandá tsijongí e jitayé e xjan itsjin tsi i xjan, jaña ja anta tikakuenxinta tsin ennta chijnie ndo Dio ixi jaña tsjangixinnta sinche enta ti jian ixi jaña tsarichonnta kain nchakon,

³ ixi ja anta ó chuxinnta ixi Ncháina tsango jian ndo.

Ndo Cristo ixro jichón

⁴ Méxin, tonchijne enta ngajin Ncháina Jesús, ixi je e ndo me e xranchi naa ixro jichón. Xro me e kuitikaon a chujni ko je e ndo Dio tsikinche e ndo ixro me e ixi ícha tjintee ixro.

⁵ Ja anta xranchi ixro tsonde e ndo Dio jitonchjianxin ningue ndo, ko ja anta xrokjannta xranchi ndotaana tjuá aséen ndo ko ixi juachaxien Ncháina Jesucristo tájonnta juasianta ngajin ndo Dio.

⁶ Méxin xroon chijnie ndo Dio ndachro:

Jan an tsake é ngajin tjjajna Jerusalén xranchi naa ixro tsango jian tsitexin nchia, naa ixro tsango tjintee.

Ko ngisen tsitikaon ixro me e, nai a tsosue e sen.

⁷ Ja anta ti titikaonnta Ncháina Jesucristo, no anta ixi je e ndo xranchi naa ixro tsango tjintee. Ko chujni kuitikaon a, tson en na xranchi jitaxin xroon chijnie ndo Dio:

Xro kuitikaon a chujni nchekonchjian nchia,
ko jai xro me e tsango tjintee xro.

⁸ Ko kaxon jitaxin xroon chijnie ndo Dio:

Xro me e tontengixin chujni ko texin na nunte.

Ko kontengixin na xro me e ixi kuitikaon a na chijnie ndo Dio ko jaña tikinixin tson en na.

Sen tjjajné ndo Dio

⁹ *Ko ja anta, ndo Dio tsikincha anta ndo me e tsikjannta ndotaana sinche e ixra ngajin ndo Rey, ko ja anta naa tjjajné ndo, naa tjjajna tjuá. Ko ndo Dio kuantsjexinnta ndo ti naxixe e ko kuajon ndo juachaxin tsixin innta ti chaxro tingasáña, ko jaña xrochronganta nge e jian juinche e ndo Dio.

¹⁰ Ja anta seno tikinixian inta tjjajné ndo Dio, ko jai ó tikinixin annta tjjajné ndo. Seno ndo Dio bikonóa inta ndo ko jai je e ndo tsango tikonóa anta ndo.

Ndako sinche ena ixi jaña tsjakoxinna xré ndo Dio

¹¹ Kichuuna, jan an tsango tjjua anta, ko tinóatáana ngajinnta xranchi naa ngisen kujxin ikjin. Chje anta asáanta juachaxin xroxraxaon ti ndako a ko tsikakuenxin nge e jii nunte xasintajni, ixi ti ndako a me e tsetoka o asáanta.

¹² Jian nche enta ngajin chujni chúxin a ndo Dio, maski jai ndako a nichja na ixi ja anta xranchi xrokjuinta naa ni ña í. Jaña je e na tsikon na ixi jian nche enta ko jaña tsajon na juasaya ngajin ndo Dio nchakon je e ndo sinchéña ndo ijie ngajin chujni.

¹³ Ja anta ti titikaonnta ndo Dio, titikaonnta kain ni tetuan an ngujngu tjjajna, ko kaxon xi ícha tituan an tjjajnánta,

¹⁴ ko kaxon titikaonnta kain xi tituan an ngujngu tjjajna ijie ixi ndo Dio kuinche e ndo xa ixi je e xa sinchéña na ijie ngajin chujni nche e ti ndako a ko kronichja xa jian ngajin sen nche e ti jian.

¹⁵ Ndo Dio tjjajun ndo sinche enta ti jian ixi jaña tsikon kain chujni noe a ko ni ninta ixi jaña tsjankata inta na ijie.

¹⁶ Nche enta xranchi xrochondanta juachaxin xro an ngisen xrokuituan annta, ko ndachro anta ixi juachaxin me e chao sinche enta nge e ndako a. Cháña nche enta xranchi naa sen nchexrée ndo Dio.

¹⁷ Jian nichje enta kain chujni. Tjue enta sen kichuunta, ko titikaonnta ndo Dio ko titikaonnta ngajin xi tituan an tjajna.

Nge e xrokonda sinche e ni nchexra

¹⁸ Ja anta ni nchexra, titikaonnta ni xrée nche enta ko nichje enta na jian, ko je a je o ni jian nichja anta. Na i, kaxon titikaonnta ni ña i.

¹⁹ Ndo Dio nchenciaon ndo ngisen titikaon ko tokuaxin en sen tatsinga sen xrojan juachjaon, maski tikinixien a sen tsatsinga sen juachjaon me e.

²⁰ Siá ja anta nche enta naa nge e ndako a ko kondeexin me e tikaonnta, ¿á tjintee ti tokuaxin annta tikaonnta siá tikinixin annta me e? Ko siá nche enta naa nge e jian ko kondeexin me e tikaonnta ko tokuaxin anta, me e naa nge e jian tikon ndo Dio.

²¹ Méxin kuiya anta ndo Dio ixi ndo Cristo tsango tangi kon en ndo ixi jaína, ko jaña juakojina ndo ixi jaña xrokonda sinche e jaína.

²² Je e ndo xro an ti ndako a juinche e ndo ko nai a juincheya ndo.

²³ Nchakon koyaku e na ndo, je a naxraje o juatingíexin ndo; ko nchakon chinga juinchekaon na ndo, je e ndo juanchia i ndo ijie tsama na. Je e ndo bake e ndo ngaya itja ndo Dio nge e jinchekaon na ndo ixi ndo Dio nduaxin nchéña ndo ijie.

²⁴ Ndo Cristo bikao ndo jéina nchakon kuen en ndo nganito ntáru ixi jaína íxro an ti ndako a xrojuuntu una, ko jian sinche ena. Je e ndo tangi juinchekao na ndo ixi jaña jaína xroxruajinna.

²⁵ Ixi jaína kuanche ena xranchi kutuchjon tsingachrue. Ko jai ó kjanna titika onna ndo Cristo, ndo tayakon en aséina xranchi naa ngisen tayakon en kutuchjon.

3

Xranchi sinche e sen tsikute e

¹ *Jaña kaxon ja anta nchri ó tsikuta anta, titikaonnta ndoxi anta. Ko siá xrojan je e xa xratitikaon a xa chijnie ndo Dio, tsikon xa ixi ja anta jian titikaonnta ko íxrokonda i xrondachenta xa ixi tsitikaon xa; je o je e xa tsaxi tsitikaon xa

² ixi tsikon xa nge e jian ko ndako nche e ja anta.

³ *Ti tonchjian ja anta je a je o ixi tsikonni ti chaxro take énta, xranchi ti tsi te jáanta ko tsikakeenta nge e tsikóñaxin chika oro ko manta chaxro ko tsango tjintee.

⁴ Ko ti jian xroxraxaonnta me e tsixin ngaya asáanta ko ti jian xronichjanta. Ji i nai a tsjexin ixi ndo Dio me e nche e ndo juaxruxin.

⁵ Jaña kuanche e kaxin nchri ó seno, kuachúntia nchra ngajin ndo Dio ko kuakitikaon nchra ndoxi e nchra.

⁶ Jaña jan Sara kuitikaon jan ndoxi e jan, ndo Abraham, ko kuandache jan ndo “Nchána”. Ko siá ja anta jian sinche enta ko xro an nge e xroxrakon ennta, xrokjannta xranchi je e jan.

⁷ *Kaxon ja anta sen xi, jian tariku unta janchri anta. Nichje enta jan jian ko xraxaonnta ixi ícha soji a jan xranchi ja anta. Ixi kaxon ndo Dio chjée ndo jan juachaxin tsechón jan kain nchakon xranchi juachaxin kuajon ndo ngajinnta ixi tjua anta ndo. Ko siá jaña sinche enta, ndo Dio tsin en ndo nge e tsjanche enta ndo.

Ti xrokonda sinche e sen titikaon ndo Cristo

⁸ Méxin, xraje o xroxraxaon kainnta. Tikonóe é kichuunta, tjue é kichuunta, tingijna ko tjento kichuunta ko nchejié a asáanta.

⁹ Ko siá xrojan nge e ndako a junta anta xrojan ngisen, ncheku inta na naxraje o. Siá koyaku anta na, ja anta tuyakuen anta na. Cháña tjanche enta ndo Dio sinchenciaon* ndo na ixi ja anta no anta ndo Dio kuiya anta ndo ixi tsaye enta naa nge e jian tsajon ndo.

¹⁰ Ixi jitaxin xroon chijnie ndo Dio:

Ngisen xrotjue e aséen ko tjaun xrochónnda juaxruxin kain nchakon xrokonda xronichja i sen ti ndako a, ko xronichja i sen juancheya.

¹¹ Tsingaxiton sen ti nge e ndako a ko sinche e sen nge e jian, ko tsjée sen juaxruxin tsintee sen ko kain nchakon jaña sinche e sen.

¹² Ixi Ncháina tingijna ndo sen jian nche e ko tin en ndo nge e nichja sen ngajin ndo, ko Ncháina tingijna i ndo ni ndako a nche e.

¹³ ¿Méxin, ngisen sinta anta naa nge e ndako a siá ja anta kain nchakon nche enta ti jian?
¹⁴ *Ko maski tangi tsatsinganta kondeexin ti jian nche enta, juaxruxin tinteenta ko xrakuen anta ninaa ngisen ko ta inta juachjaon.

¹⁵ Cháña tájonnta juasaya† ngajin ndo Cristo ixi je e ndo Ncháina ndo. Jian tjate enta nge e tsjanchangi anta na ixi titikaonnta Ncháina. Ko nchejie a asáanta ko jian nche enta ngajin na.

¹⁶ Ko jian tjakoxinnta ixi jaña ni ningakon annta ko ndako a nichja na ixi ti jian nche enta ixi ja anta titikaonnta ndo Cristo, me e tsikon na ko jaña tsose e na.

¹⁷ Ixi cháña tangi tsatsinganta kondeexin ti jian nche enta ko me e tjaun ndo Dio, ko je a kondeexin ti ndako a.

¹⁸ Ixi kaxon ndo Cristo je o naa kuen en ndo ixi jieina. Je e ndo jian ndo ko kuenxin ndo ixi jaina ni ña i, ixi jaña tsjentona ngajin ndo Dio. Ndo Cristo kuen en cuerpo ndo ko Espíritue ndo Dio juinchexechón ndo.

¹⁹ Jaña kaxon espíritue ndo juincheno e kain espíritu tsiken en ixi je e ndo xechón ndo, ²⁰ espíritue ni me e kuitikaon a nchakon bake e ndo Noé. Ndo Dio chón en ndo na ixi xrokuitikaon na nchakon konchjian ntaq tetaon inda ko je o ijní chujni kuitikaon ko sen me e kuitjáña i sen nchakon chrite e na inda.

²¹ Inda me e xrokjui xranchi ti tikitée chujni ixi jaña tsjacha tsitjáña i. Ko ti tikitéeni je a je o tsjima ntau eni. Na i. Me e xrondachro ixi tsjanche eni ndo Dio sinchetjúá ndo aséenni ko jaña tsono eni ixi xro an ijie chónndani. Ko ti xechón Ncháina Jesucristo me e tsjachani tsechónni kain nchakon.

²² Je e ndo Cristo sakjui ndo ngajni ko jii ndo ndatsjonxin ti jian ti jii ndo Dio ko je e ndo tetuen en ndo kain sen ángel ko kain ti chónnda juachaxin.

4

Tsinteeena xranchi tjaun ndo Dio

¹ Tsango tangi kuatsinga ndo Cristo nchakon bake e ndo nunte nti i, jaña ja anta kaxon xrokonda tsiuaxinta tangi tsatsinganta nchakon tsij juachjaon ixi, siá tangi tsatsinganta, jaña tsaxi tsintu enta ti ndako a kuanche enta,

² ko me e sinche enta xranchi tjaun ndo Dio, ko i je a xranchi kuaxraxaonnta sa ó, xranchi nche e ni ndako a xraxaon.

³ Ixi ó itsje nano jaña kuanche enta. Nchakon me e ndakua i kuaxraxaonnta ko kuanche enta ti ndako a ko kuancheñanta kia ti bakoannta ko kuakətoku u chujni ko kuatjue enta ídolo, ti tjaun a ndo Dio sinche enta.

⁴ Jai ni chúntia i ndo Dio toña na ixi ja anta í chrjiku anta na cha o ña i ichrji je e na. Méxin, chinga nichja na kontraanta.

⁵ Ko je e na xrokonda xrochronga kain ti ndako a juinche e na nchakon tsij na ngajin ngisen jichón en sinchéña ijie ngajin kain chujni jichón ko ni tsiken en.

⁶ Méxin, ni tsiken en kaxon kuin en na chijni natjúá ixi espíritue na tsjacha tsechón xranchi tjaun ndo Dio, maski koñe e na ijie nchakon kuintee na nti i nunte xasintajni xranchi toñe e ijie kain chujni ndako a nche e.

⁷ Ó tuinxin tsjexin nunte xasintajni, méxin, jian tinteenta ko nduaxin nichje enta ndo Dio.

⁸ Ko ti ícha tjintee me e xrotjue é kichuunta. Ko siá tjue é kichuunta me e xrotjáña anta ti ndako a juincheko kichuunta.

⁹ Jian taye énta sen kichuunta nchakon tsij sen ndointa ko tjakaxin a kichuunta.

¹⁰ Ngujngunta jian tingijnanta sen kichuunta xranchi juachaxin tjáanta ndo Dio ko ndako sinche enta ixra kuajon ndo Dio.

¹¹ Siá xrojan ja anta xronichjanta chijnie ndo Dio, nichjanta xranchi tjaun ndo Dio. Ko siá xrojan ja anta tsingijnanta xrojan ngisen, jian tingijnanta sen me e xranchi juachaxin tjáanta ndo Dio. Ixi kain ixra jian nche enta, me e je e ndo tsayé e ndo kain juasaya ixi je e ndo tikinixin en ndo kain juachaxin, kain nchakon. Jaña tson en.

Xrokonda tangi tson en sen titikaon ndo Cristo

¹² Kichuuna, tsango tjua anta, ko xronka inta nge e tangi tsatsinganta ko ndachro anta sonda jaña jiton en.

¹³ Cháña take énta juaxruxin maski jaña tangi tsatsinganta ixi jaña tangi kuatsinga ndo Cristo. Méxin jaña juaxruxin tsinteenta nchakon tsikonnta ijíé juachaxin chónða Ncháina nchakon xrokjan ndo.

¹⁴ Juaxruxin take énta nchakon nichjangí anta na ixi titikaonnta ndo Cristo ixi Espíritue ndo Dio chónða kain juachaxin ko tayakon annta kain nchakon. Je e na nichjangí e na Ncháina, a ja anta tájonnta juasianta ngajin ndo.

¹⁵ Ko siá xrojan ja anta tangi tson annta, je a ixi naakónaxónnta naa chujni o kue enta xrojan nge e o xrojan nge e ndako a juinche enta, ko je a ixi juitexinnta naa nge e tikinix-inta.

¹⁶ Ko siá xrojan ja anta tangi tson annta ixi titikaonnta ndo Cristo, tosua inta. Cháña tájonnta juasianta ngajin ndo Dio.

¹⁷ Ó kuji nchakon tsaxi tsoña ijíé ko xrokonda xroxrangíxixín ngajin sen ikjan chjen en ndo Dio. Ko siá xroxrangíxixín tsóna ijíé ngajin jaína, zá je a ícha tangi tson en chujni titikaon a chijnie ndo Dio?

¹⁸ Ko siá sen jian nche e, tsango tangi tsixixin sen ti tetuan an ndo Dio, ícha tangi tson en ni ndako a nche e ko kuitikaon a chijnie ndo Dio.

¹⁹ Ko ngisen tangi stet atsinga xranchi tjaun ndo Dio, sen me e tsintue a sen sinche e sen ti jian ko tsake e sen aséen sen ngaya tja ndo Dio, ndo juinchéña kain chujni, ixi je e ndo nduaxin nche e ndo nge e ndachro ndo.

5

Nge e kuetuen en sen tetuan an ni ngo

¹ Ntaxraxa on sen titaon en sen ste ni ngo, ixi jan an kaxon titaon an sen ningona xranchi je e sen, ko kaxon jan an nóna ko bikon xranchi tangi bake e ndo Cristo, ko jan an kaxon tsayá a juachaxien ndo Dio xranchi juachaxin tsayé e je e sen nchakon tsíj Ncháina.

² *Tayakon ennta jian sen ikjan xranchi kutuchjoen ndo Dio, sen tikinixin anta tayakon ennta ixi ji i ixra kuaye enta. Juaxruxin tingijnanta sen xranchi tjaun ndo Dio, ko je a ixi xrokonda sinche enta xra me e ko je a ixi tsjachanta tomi. Na i. Juaxruxin nche enta xra me e.

³ Ko nche anta xranchi ja anta tikinixin annta sen titikaon Ncháina. Na i. Tjue enta sen jaña tsjakoxinnta ixi ndako rinche enta.

⁴ Ko nchakon tsíj ndo Cristo, ndo nduaxin jian tingatjia kutuchjoen, ja anta tsaye enta naa corona chaxro, ko corona me e nai a tsjexin.

⁵ Xaxon jaña, ja anta chajan, titikaonnta sen tituan annta ngaxin in ni ngo. Kainnta jian titikaon kichuunta ko nchejíé a asáanta ixi:

Ndo Dio tjaun a ndo sen nchejíé aséen,
ko sen nchejíé a aséen, sen me e ndo Dio tingijna ndo sen.

⁶ *Méxin, nchejíé a asáanta ngajin ndo Dio ixi je e ndo tsango chónða ndo juachaxin, ko jaña tsíj nchakon je e ndo ijíé juachaxin xrotjáanta ndo.

⁷ Ko kain juachjaon chondanta takéenta ngaya itja ndo Dio ixi je e ndo nduaxin tayakon annta ndo.

⁸ Jian xraxaonnta ko kain nchakon tsje enta jian ixi Xixron anxrée, xi ningakon annta, ihrji xa xranchi naa kujenda tsango jie e ko tsango soji tuyako ba ko jitjee ba nge e chujni sine ba jaña nche e xi me e.

⁹ Jian chuntianta Ncháina. Tintue anta Xixron anxrée tsjacha xa tsetuan annta xa, ko jian xraxaonnta ixi kaxon sen kichuunta, sen chuntia Ncháina, ste nguixin nunte xasintajni tangi stetatsinga sen.

¹⁰ Ko siá ja anta ó tangi kuatsinganta kaxin nchakon, ndo Dio sinchemé e ndo ijíé chondanta ko ícha tsingijnanta ndo ixi nai a tsintu enta ti chuntianta ndo. Je e ndo kuiya anta ndo ixi tsariku unta ndo kain nchakon ti no tetuan an ndo Jesucristo.

¹¹ Je e ndo tikinixin en ndo tsayé e ndo kain juasaya ixi chónða ndo juachaxin tsetuan an ndo kain nchakon. Jaña tson en.

Juexin nichja ndo Pedro

¹² *Juasie ndo Silvano, ndo tikon xranchi ndo kichian, je e ndo jian bingijnana ndo ikjin xroon ji i, maski tsjé a nge e ikjin, ko je o ntaxraxa onnta ixi ndo Dio, ndo tjáanta ndo kain juachaxin ko jaña juako ndo ixi nduaxin tjua anta ndo. Ko nai a tjáña anta ixi ndo Dio tsango tjua anta ndo.

¹³ *Sen ni ngo jii tjajna Babilonia, sen kuinche e ndo Dio kaxon xranchi ja anta, xruan annta sen juajna ko kaxon xruan annta ndo Marcos juajna, ndo tikon xranchi chjan na.

¹⁴ Jian chje é kichuunta juajna ko tse e kichuunta tjáanta. Juaxruxin tinteenta ixi chuntianta ndo Jesucristo. Jaña tson en.

Xroon yuxin tsikjin ndo Pedro

Ndo Pedro xruan an ndo xroon ngajin sen titikaon ndo Cristo

¹ Jan an, Simón Pedro, kuincha na ndo Dio ixi sinta a xrée ndo Jesucristo. Ikjin xroon ji i tsayé e kain sen titikaon Ncháina, sen titikaon xranchi jan anna ixi jian ndo Dio ko ndo Jesucristo, ndo nchemé e jjeina.

² Ndo Dio xrotjáanta ndo juaxruxin ko sintanchaonnta ndo ícha ixi chuxinnta ngisen ndo Dio ko ngisen Ncháina Jesucristo.

Jian tsintee sen titikaon ndo Jesús

³ Ixi juachaxin chóna Ndo Dio, kuinchajna ndo ko chjajna ndo kain nge e xrokondajna ixi jaña tsojuna xranchi tjaun je e ndo. Kain ña chjajna ndo nchakon kuichuxinna ndo Jesucristo ixi juachaxin ijié chóna ndo.

⁴ Ko ó chjajna ndo kain nge e jian ko ti nduaxin tjintee ko kaxon ti ndachro ndo tsayé ena tjume e ixi jaña tsake enta xranchi jii je e ndo ko tsintu enta nge e ndako a jii ngataon nunte xasintajni.

⁵ Méxin ti chuntianta Ncháina ko chjakon annta nche enta ti jian, ko ti chjakon annta me e, ícha jian xrochuxinnta ndo Dio.

⁶ Ko ti jian xrochuxinnta ndo Dio, me e tsinkakon en sinche anta kain nge e ti tjaunnta; ko ti tsinkakon en me e sinche anta nge e tjaunnta, me e sintakuan anta xrochon énta ko tjaka i xrotjáanta juaña ko xrochonde enta juasaya ndo Dio;

⁷ me e sintakuan annta xrotjue enta sen kichuunta ko ti xrotjue enta sen kichuunta, kaxon ícha xrotjue enta kain chujni.

⁸ Ko siá jaña sinche enta, je a xruxon chuntianta Ncháina Jesucristo.

⁹ Ko ngisen nche a kain ji i, nche e sen xranchi naa ni tikon a ixi tjáñe e sen ixi Ncháina Jesús juinchemé e ndo kain ijié kuachóna sen.

¹⁰ Méxin, kichuuna, jian nche enta ko soji titikaonnta, jaña xrotjáña inta nge e kuitikaonnta ko nai a tsachrendaxinnta cha o jian.

¹¹ Ko siá jaña sinche enta, ndo Dio xrotjáanta ndo juachaxin tsixin innta ti no tituan an Ncháina Jesucristo, ndo kuenxin ixi jjeina.

¹² Méxin, jan an tsintua i sintaxraxa onnta kain ji i, maski ó no anta ko jian titikaonnta nge e nduaxin juentakuan anntana.

¹³ Ixi ti xrarichón tikinixinna sintaxraxa onnta kain ji i,

¹⁴ ixi Ncháina Jesucristo ó juinchenóna ndo íse a jii nchakon tsen enna.

¹⁵ Ko jan an sintaxraxa onnta ji i ixi maski tsen enna, ja anta xrotjáña inta nge e ntatjunta.

Sen bikon juachaxien ndo Cristo

¹⁶ Nchakon juentakuan annta juachaxin ijié chóna Ncháina Jesucristo ko ti ndachrjanna jingo xrokjan ndo, je a je o kuanichjana nge e bakii ngaya jáanana. Na i. Jan anna bikonxina ixi ikonna juachaxin ijié chóna Ncháina.

¹⁷ *Bikona ji i nchakon Ndotáina Dio kuajon juachaxin ko juasaya ngajin Chjen en ndo, ko kuin anna ngajni* nichjaxin ndo ko ndachro ndo: "Ji in chjan na ícha tjua a. Tsango juaxruxin ritjén ngajin xjan."

¹⁸ Jan anna kuin anna jaña ndachro ndo Dio, kuin anna nichjaxin ndo ngajni nchakon steki anna Ncháina Jesús ti ijna tjúa.

¹⁹ Ko nómana ixi chijni juako sen kuachronga chijnie ndo Dio ó sa ó, me e naa chijni nduaxin. Méxin, titikaonnta nge e kuandachro sen ixi chijni me e jii xranchi naa xro i tingasáñaxin ti naxixe e, tsija nchakon ícha tsingasáña ko tsii chjiixro, jaña tsingasáña asáanta.

²⁰ Ko tjintee tsono anta ji i: chijnie ndo Dio jitaxin xroon, jua i je o naa chujni tsiexin xranchi tjaun,

²¹ ixi sen kuachronga chijnie ndo Dio nichja i sen nge e je o je e sen xraxaon sen. Je e sen tsango kuitikaon sen ndo Dio ko Espiritue ndo bingijna sen kuanichja sen chijnie ndo.

2

*Ni ndakua i kuachronga chijnie ndo Dio
(Jud. 4-13)*

¹ Sa ó bake e ni ndako a kuachronga chijnie ndo Dio tjajna Israel, ko jai ste ni jaña nche e. Je e na imao sintakuan annta na nge e nduaxin a ko me e tsitjáñaxin asáanta ixi xrondachro na ixi Ncháina* jua i sinchemé e ndo ijié chondana. Ko kondeexin me e, je e na naatsitjáñaxónna.

² Kueya na xrorué e na ti tjako ni me e ko kondeexin me e itsjé na ndakua i xronichja na ti chijni jian kuajon Ncháina.

³ Ni tjako jaña tjaun na xrochónda na itsjé tomi, ko tsjacha na tomi me e ixi tsjako na naa chijni nduaxin a. Ko me e tsamaxin na ijié ko jaña tsitjáña na.

⁴ Ndo Dio tjáña e ndo nge e ndako a juinche e sen ángel ko maski ángel sen xruan an ndo sen ti naxixe e, steje e sen nti a ko jichroaxin sen chika cadena tsitjaja nchakon sinchéña ndo ijié ngajin sen.

⁵ Ko kaxon tjáña e ndo Dio ti ndako a juinche e ni kuintee sa ó nchakon bake e ndo Noé. Je e ndo xruan an ndo naa ichrin soji ko kain na kuinteken en na. Je e ndo Noé kuanichje e ndo chujni xranchi jian xrojuinche e na, ko je e ndo ko íjngo yaato chujni xro an nge e kon en sen.

⁶ Kaxon ndo Dio juinchetjáña ndo ni tjajna Sodoma ko Gomorra, iche na ko kao kain nge e ikjan nteso, ixi jaña tsikon chujni ndakua i nche e jai siá tsintue a na ti ndako a nche e na.

⁷ Ko ndo Dio bingijna ndo ndo Lot ixi je e ndo naa ngisen jian ko tsango bakaa ndo juachjaon kondeexin ni tjajna me e ndako a kuanche e na.

⁸ Ndo Lot jian aséen ndo maski kao ndo bake e ndo tjajna me e, ko kain nchakon bakaa ndo juachjaon kondeexin ti ña i bakikon ndo ko baki en ndo ti kuanche e na.

⁹ Ndo Dio jaña tjakoína ndo tsingijna ndo sen titikaon ndo ixi nchijí aséen sen, maski kueya nge e tangi tsatsinga sen. Ko ni ña i, tangi tsintekon en na nchakon sinchéña ndo Dio ijié ngajin na.

¹⁰ Ko ícha tangi tson en ni titikaon a nge e tituan an Ncháina Jesús ko nche e na nge e ndako a xraxaon aséen na.

Titikaon a na ko xrakon a na, nichjangí e na sen ángel chónda juachaxin.

¹¹ Nchakon sinchéña ndo Dio ijié, sen ángel, maski chónda sen ícha juachaxin ixi ni ndako a tjako, tsondachro a sen xrojan nge e ndako a ngajin ni me e.

¹² Ni me e xranchi iko tienxin a ba, jaña ste je e na ko xranchi iko jaña tsen en na kaxon, ixi nichja na ti tienxin a na.

¹³ Juaxruxin tintee na ixi ti ndakua i nche e na ngujngu nchakon ko méxin tsikaon na kondeexin ti ndako a nche e na. Ko tosue eni nge e ndako a nche e na nchakon nteku unta na kia chondanta ixi nti a nche e ndako a nche e na ko stetsje e itsjé chujni.

¹⁴ Ni me e tikakuenxin na kain nchri ko tonchrje a na nche e na ti ndakua i. Ncheye e na ni nandá tjangíxin titikaon ndo Dio ko tjaun na xrochónda na kain nge e ndachro aséen na.

¹⁵ Kuintu e na cha o jian ko rué e na chaoé xi Balaam, chjen en xi Beor. Je e xa bake e xa juaxruxin ixi juacha xa kueya tomi kondeexin ti ña i kuanche e xa.

¹⁶ Ko kondeexin ti ndakua i juinche e xa, méxin, naa kuntajno, kunchri, nichje e ba xa xranchi nichja chujni, ko kuyakutee ba xa; méxin, jaña kuintu e xa nge e ña i kuanche e xa.

¹⁷ Ni ndako a tjako, ni me e ste na xranchi naa tuye yaso e jitjiá i inda, ko xranchi itjuj tikao chrinto soji. Ndo Dio tsajon ndo juachaxin tsikaon na ko tsintee na ti naxixe e kain nchakon.

¹⁸ Ko je e na nichja na chijni chaxro ngajin kain chujni ko me e tjinte a. Je e na tjaun na xrochónda na itsjé nchri ko jaña nchekateyana sinche e chujni ti ndakua i, chujni nandá tjaun tsintu e nge e ndako a.

¹⁹ Ndachro na chao sinche eni nge e tjaunni, ko je e na jua i tintu e na ti ndako a nche e na; ixi ni nche e naa nge e ndako a, ti ndako a me e tituan an aséen na.

²⁰ Ko ni ó chúxin Ncháina Jesucristo, ndo nchemé e jée na kuintu e na nge e ndako a jii ngata a nunte xasintajni. Ko siá tjume e tsajon na juachaxin ngajin xi ña i sincheye e xa na íjngo, jaña ti ndako a ícha tsituan an ngajin aséen na.

²¹ Cháña xrokuichuxin a na chijni jian juako ndo Dio, ke jai chúxin na chijni ko tsintu e na nge e kuetuan an ndo Dio.

²² Ni ña nduaxin nche e na xranchi ndachro naa chijni seno: “Kunia tonkjan ba ko tjume e ikjan ba ine ba i ti konkjan ba”, ko kaxon jii naa chijni ndachro “Kuchinga nandá tsikjengi ba, ikjan ba ngangí nchita o.”

3

Nchakon tsii Ncháina Jesús

* 2:1 Ncháina Señor Ncháina Jesús o Ncháina Dio

¹ Kichuuna tjua anta, ji i xroon yuxin ikjin. Ko kayuxin xroon ntatjunta ixi xroxraxaonnta jian ko ti ndako sinche enta.

² Xraxaonnta nge e tsichronga sen kuachronga chijnie ndo Dio ó sa ó, ko chijni kuetaan an Ncháina Jesús, ndo juinchemé e jieina, chijni me e juntakuan annta sen apóstol.

³ *Xrokonda xrokono anta ji i: ixi nchakon tsjexin xasintajni tsji chujni tsjanao na ti jian kuajon ndo Dio, ko je o tsitikaon na kain ti nge e ña i xraxaon na.

⁴ Je e na tsjanchangi na: “Nge e kon en ti tsindachro ndo Cristo ixi xrokjan ndo, ixi ó kuen en sen tachri ina, sen bake e ó sa ó, ixi naxraje o jii kain nge e xranchi xrangixin nunte xasintajni.”

⁵ Ko ni me e tjaun a na tsitikaon na ixi ti xrangixixión ndo Dio juinchéña ndo ngajni ko nunte xasintajni, ko je e ndo je o kuituan an ndo ko inche kuachrjengixin nche inda.

⁶ Ko kaxon inda juinchetjáñaxin ndo kain nge e bake e nunte xasintajni* nchakon me e.

⁷ Ko ndo Dio ndachro ndo ixi tsiji nchakon ngajni ko nunte xasintajni jii jai, tsitjáña ixi xro i, kain nge e xroche nchakon ndo Dio sinchéña ndo ijie ngajin kain chujni ko sinchetjáña ndo ni ndakua i nche e.

⁸ Méxin, kichuuna, tjáña inta ixi Ncháina Jesús tikon ndo naa nchakon xranchi mil nano ko mil nano tikon ndo xranchi xrokjui naa nchakon.

⁹ Je a ixi Ncháina jitonchrjen en ndo sinche e ndo nge e tsindachro ndo, xranchi jaña xraxaon kaxin na. Na i. Je e Ncháina jichón en ndo ixi xro an chujni tsitjáña, ixi tjaun ndo kain chujni xrochuntia na ngajin ndo.

¹⁰ *Ko nchakon xrokjan Ncháina Jesús, nchakon ninaa jaña xraxaonna tson en ji i, xranchi nche e naa xiche e tixin in xa naa nchia tsee xa. Nchakon me e, naa tsjatexon tsin enni ko ngajni tsatanka ko xroxronkana, ko kain nge e jii ngajni xroche ko kain nge e jii nunte xasintajni ko xasintajni naatsitjáñaxón.

¹¹ Jaña tsitjáña kain nge e, méxin, ja anta jian xraxaonnta ko titikaonnta ndo Dio.

¹² Ko chon énta nchakon tsji ndo Dio ko sinchéña ndo ijie, méxin chjakon annta nchetjúanta asáanta. Nchakon me e tsitjáña ngajni ko nchanotsé ko kain nge e jii noi ixi xro i tsatangaxin.

¹³ *Ko jaña stechon enna naa ngajni natjúá ko naa nunte natjúá, xranchi tsindachro ndo Dio tsajon ndo. Nti a tsango chaxro ko jian tsake e.

¹⁴ Méxin, kichuuna, ti xrastechon ennta tsji nchakon tson en kain me e, ixi nchiji asáanta tjéenta ixi jian nge e sinche enta, jaña tsikon ndo Dio juaxruxin stenta ko chonda inta ijie.

¹⁵ Sintaxiñaonta ixi Ncháina jichón en ndo ixi jaña tsitjáña ina. Ndo kichuuna Pablo kaxon ikjin ndo ji i ixi juachaxien ndo Dio kuayé e ndo.

¹⁶ Kain xroon tsikjin ndo ndachro ja in, maski jii naa chijni tienxin ani. Ko me e, ni noe a ko tienxin a na ko soji a chuntia na Ncháina méxin ndakua i tjako na, ko jaña kaxon ikaxin chijnie ndo Dio tienxin a na, méxin je o na tjée na nge e tsitjáñaxin aséen na.

¹⁷ Méxin, kichuuna, ó no anta kain ji i ko tsje enta jian xranchi nche enta ko jaña xro an chujni ña i sintaya anta, ko tintue anta tsitikaonnta ndo Dio.

¹⁸ Ko cháña nche enta jian, jaña ícha xrochuxinnta Ncháina Jesucristo, ndo nchemé e ijie chondana, ko je e ndo tsingijnanta ndo xrotjue enta kain chujni. Tajonna juasaya ngajin Ncháina jai ko kain nchakon. Jaña tson en.

Xroon sa ó tsikjin ndo Juan

Ndo tajon juachaxin ixi nduaxin tsechón chujni kain nchakon

¹*Jan anna stekjinna xroon ji i nichja ti ndo bake e ó sa ó ti xraxro an nge e bake e ngata a nunte xasintajni. Je e ndo ikjan ndo chijni tajon juachaxin tsechón chujni kain nchakon, ko jan anna kuin anna nichja ndo ko bikonxina ndo ikonna. Ko nduaxin bikona ndo ko tséxinna ndo tjánaana.

²*Ko ixi je e ndo tsechónxin chujni, konoxin ndo nunte nti i. Jan anna bikona ndo, méxin, jaña nichjana. Ko nteno ananta chijni ji i ixi je e ndo tsechónxin chujni kain nchakon. Je e ndo bake e ndo ngajin Ndotáina Dio, ko jai konoxin ndo ngajinna.

³ Ntatjunanta ti bikona ko ti kuin anna, ixi jan anna ko ja anta naakua nge e xroxraxaonna xranchi jan anna nduaxin steniina ngajin Ndotáina Dio ko ngajin Chjen en ndo, xjan Jesucristo.

⁴ Méxin, jaña ikjinna ji i, ixi kainna ícha juaxruxin tsojuna.

Ndo Dio xro i tingasáña

⁵ Ji i chijnie Ncháina Jesucristo juako nana ndo, me e chijni tjako annanta ixi je e ndo Dio xro i tingasáña, ko ti no jii je e ndo je a naxixe e.

⁶ Siá ndachrona ixi steniina ngajin je e ndo, ko xrandako a nche ena, ncheyana, ko je a nduaxin nge e ndachrona.

⁷ Ko siá stena ti tingasáña xranchi ndo Dio jii ndo ti tingasáña, me e naakua nge e xroxraxaonna, ko jnié Chjen en ndo, xjan Jesucristo, sinéma kain ijie chondana ko ti ndako a juuntu una.

⁸ Ko siá ndachrona ixi xro an ijie chondana, jajona ncheye ena aséeina, ko je a nduaxin ti ndachrona.

⁹ Siá xrondachena ndo Dio kain ti ndako a juuntu una, nojna ixi je e ndo tsango jian ndo ko ndako nchéña ndo ijie, méxin sinchemé e ndo kain jieina ko sinchetjúá ndo aséeina.

¹⁰ Ko siá xrondachrona xro an nge e ti ndako a juuntu una, jajna tjakoxinna xranchi je e ndo xrojuincheya ndo, ko me e xrondachro ixi nduaxin a kuaye ena chijnie ndo.

2

Ndo Jesucristo nichjaxinna ndo

¹ Ja anta chjan na, rikji anta chijni ji i ixi sinche anta ti ndako a. Ko siá xrojan ja anta sinche enta ti ndako a, jajna chondana ngisen xronichjaxinna ngajin Ndotáina Dio jii ngajni, ndo me e ndo Jesucristo, ndo jian ko ndako nchéña ndo ijie.

² Ndo Jesucristo kuen en ndo ixi sinchemé e ndo kain ti ndako a juuntu una ko je a je o jieina sinchemé e ndo, kaxon jiee kain chujni jii ngata a nunte xasintajni.

³ Siá tsitikaonna ti kuetuan an ndo Dio, me e chao xrondachrona ixi chuxinna ndo.

⁴ Ko siá xrojan ngisen xrondachro ixi chúxin sen Ndotáina Dio, ko titikaon a sen nge e kuetuan an ndo, sen me e ncheya sen ko ko a ti nduaxin ngaya aséen sen.

⁵ Ko ngisen titikaon chijni kuetuan an ndo, sen me e nduaxin tjaun sen ndo ko chúxin sen ndo. Jaña tsonojna ixi nduaxin steniina ngajin ndo.

⁶ Ko sen ndachro ixi nduaxin titikaon sen ndo Dio, xrokonda sinche e sen xranchi juinche e ndo Jesucristo nchakon bake e ndo ngata a nunte xasintajni.

Chijni natjúá kuetuan an ndo Dio

⁷ *Ja anta kichuuna, je a naa chijni natjúá rikjin. Chijni ji i ja anta ó kuaye enta ti xrangixixión kuin ennta. Chijni ji i ó sée tsiketuan an ndo Dio, chijni ji i ó tsikin ennta.

⁸ Ko chijni ikjinna me e xranchi xrokjui naa chijni natjúá. Ko nduaxin ndo Jesucristo juakoxin ndo ji i ixi tjaunna ndo, ko jaña tjakoxinna kaxon ixó ó jitatsinga ti naxixe e ko jai jitingasáña xro i nduaxin.

⁹ Ko siá xrojan sen titikaon sen ndo Jesús ndachro sen ixi ste sen ti jii xro i, ko xraningakon en sen sen kichuu sen, sen me e xrase sen ti naxixe e.

¹⁰ Ko sen tjaun sen kichuu, sen me e ste sen ti jii xro i tingasáña, ko xro an nge e tontengixin sen.

¹¹ Ko sen ningakon en sen kichuu sen, sen me e ste sen ko ichrji sen ti naxixe e, ko noe a sen no itji sen ixi ti naxixe e juinchentakontsin sen.

¹² Ja anta chjan na, jan an ikjin xroon ji i, ixi juasie ndo Jesucristo ndo Dio juinchemé e ndo kain ijie kuachondanta.

¹³ Kain ja anta ndotée chjan, kjin annta xroon ixi ó kuichuxinnta ngisen bake e ti xrangixixión nunte xasintajni. Ko ja anta xrachájannta kjin annta xroon ji i ixi ja anta juache enta Xixron anxrée. Ja anta chjan na, kjin annta xroon ixi ja anta chuxinnta Ndotáina Dio.

¹⁴ Kjin annta xroon, ja anta ndotée chjan, ixi ja anta ó chuxinnta ngisen bake e ti xrangixixión nunte xasintajni. Chajan, kjin annta xroon ixi sojinta ko kuaye enta chijnie ndo Dio ngaya asáanta ko juache enta Xixron anxrée.

¹⁵ Tjaun anta kain nge e tikonnta jii ngata a nunte xasintajni. Ko siá xrojan ja anta ícha tjue enta ko tikakuenxinta nge e jii ngata a nunte xasintajni, me e xrondachro tjue anta Ndotáina Dio.

¹⁶ Ixi kain nge e ndako a ton en ngata a nunte xasintajni t̄xin a ti jii Ndotáina Dio jii ngajni. Ji i kain ti ndako a nche e chujni: ti ngixeko nche e na ti tjaun cuerpo e na, ko tjaun na kain nge e ti chaxro tikon na, ko ti nchejié aséen na ixi tjaun na kain nge e ti tjintee.

¹⁷ Ko nunte xasintajni ó j̄itjexin nunte ko kaxon kain ti ndako a nche e chujni. Ko ngisen titikaon nge e tjaun ndo Dio, tsechón sen kain nchakon.

Ti nduaxin ko ti nduaxin a

¹⁸ Chjan na ó kuji nchakon tsjexin kain nge e. Ja anta ó kuin ennta ixi ó tsji naa xi ña i, xi xrondachro ixi je e xa ndo Cristo xa. Ko jai ó kueya na ndachro na ixi je e na ndo Cristo, méxin, nóanaxina ixi ó kuji nchakon tsjexin kain nge e.

¹⁹ Je e na kuachrxjexin na ti ste jaina; ko je a nduaxin tsikitikaon na Ncháina Jesucristo, ixi siá nduaxin xrokuitikaon na Ncháina, me e xrokuitu e na nti i ngajin jaina. Ko jaña kon en, ixi tsikonxin ikonni ngisen je a titikaon xranchi jaina.

²⁰ Ko jai ja anta ndo Cristo ó tjáanta ndo Espiritu t̄júá, me e chuxinnta ti nduaxin.

²¹ Kjin annta ji i ixi chuxinnta ti nduaxin, ko je a chuxin anta. Ko ó no anta kaxon ixi xro an ti juancheya t̄xin ti nduaxin.

²² ¿Ngisen ncheya? Me e sen ndachro ixi ndo Jesús je a ndo Cristo tsixrua an ndo Dio. Me e xi ña i ningakon e xa ndo Cristo ixi titikaon a xa Ndotáina Dio ko Chjen en ndo.

²³ Sen titikaon a Chjen en ndo Dio kaxon chúxin a sen Ndotáina Dio, ko ngisen chronga ixi nduaxin ndo Cristo Chjen en ndo Dio, sen me e nduaxin chúxin sen Ndotáina Dio.

²⁴ Méxin, ja anta xrokonda tsjatsiinnta ngaya asáanta chijni kuaye enta ti xrangixixión kuitikaonnta. Ko siá ti kuin ennta, juatsíinta ngaya asáanta, me e steniinta ngajin Chjen en ndo Dio ko ngajin je e ndo.

²⁵ Ko ndachro Ncháina Jesucristo xrochjaina ndo juachaxin tsechónna kain nchakon.

²⁶ Méxin, kjin annta xroon ji i ixi ste chujni tjaun sintaya anta.

²⁷ Ko ja anta chondanta Espiritu t̄júá, tsitjáanta ndo Jesucristo, ko jai ja anta ó tikinixi ennta ndo, ko i xrokonda i ixi xrojan ngisen sintakuan annta, ixi Espiritue ndo Dio sintakuan annta kain nge e, ko kain ti tjako ndo me e ti nduaxin ko xro an juancheya jii. Méxin, soji take énta ngajin Ndo Cristo xranchi juantakuan annta Espiritue ndo.

²⁸ Jai chjan na, soji tinteenta ngajin Ncháina Cristo ixi jaña xroxrakon anta nchakon tsonoxin ndo. Ko je a t̄sosa ina nchakon tsinteena tjenka ndo, nchakon xrokjan ndo íjngo.

²⁹ Ko ja anta ó no anta ixi ndo Cristo je e ndo ndako nchéña ndo ijie. Ko xrokonda tsono anta ixi kain ngisen titikaon ko ndako nche e sen, sen me e chjen en ndo Dio.

3

Sen chjen en ndo Dio

¹*Tsje enta ixi ndotáina Dio tsango t̄juajina ndo, méxin nchekin inna ndo chjen en ndo, ko nduaxin jaina chjen en ndo. Ko kaxin chujni tjaun anana ixi je e na chúxin a na ndo Dio.

² Kichuuna, tsango t̄jua anta, ixi jaina ó ikjanna chjen en ndo Dio, ko xratjako a ndo Dio xranchi tsojuna nchakon tsjexixin kain nge e. Ko ó noina ixi nchakon tsji Ncháina Jesucristo jaina xrokjanna xranchi je e ndo, ixi nchakon me e tsikonna Ndo xranchi jii je e ndo.

³ Ko kain sen nduaxin jichón en nchakon tsji ndo, xrokonda tsintu e sen kain ti ndako a ko jaña t̄sontjúa aséen sen xranchi je e ndo Jesucristo tsango t̄júá ndo.

⁴ Kain sen ndako a nche e tama sen ijie ko kondeixin ti ndako a nche e sen, me e titikaon a sen ti tetuan an ndo Dio.

⁵*Ja anta ó no anta ixi ndo Cristo ó kuji ndo ngata a nunte xasintajni ko me e kuantsje ndo ijie kuachóna chujni, ko je e ndo xro an ijie sinká ndo.

⁶ Ko kain sen soji stenii ngajin ndo, ínche a sen ti ndako a; ko ni ndako a nche e xratikon a na ndo ko chúxin a na ndo.

⁷ Chjan na, tájon anta juachaxin ixi xrojan chujni sintaya anta; ixi ngisen jian nche e, sen me e nduaxin jian sen, xranchi je e ndo Jesucristo nduaxin jian ndo.

⁸ Ko kain ni ndako a nche e, ni me e tikinixin en na Xixron anxrée; ixi Xixron anxrée chónda xa ijie ti xraxrangixixión kóna nunte xasintajni. Méxin, kuji Chjen en ndo Dio ngata a nunte xasintajni ixi sinchetjáña xjan kain ixra ndako a nche e Xixron anxrée.

⁹ Ninaa sen ikjan chjen en ndo Dio ínche a sen ti ndako a, ixi Ndo Dio ó kuajon Ndo juachaxin tsechón sen, méxin ínche a sen ti ndako a ixi je e sen ó ikjan sen chjen en ndo Dio.

¹⁰ Jáña tsonóaxinna ngisen chjen en ndo Dio ko ngisen chjen en Xixron anxrée, ixi ni ndako a nche e ko tjaun a na ni kichuu na, ni me e je a chjen en ndo Dio na.

Xrotjue é kichuuna

¹¹ *Ji i chijni kuin ennta ti xrangixixión kuitikaonnta Ndo Dio, ixi xrotjue ena sen kichuuna.

¹² Ko sinche ana xranchi juinche e xi Caín, xi me e ndako chjen en Xixron anxrée jii xa, ixi kóna xa xi kichuu xa, ndo Abel. ¿Ko sonda kóna xa ndo kichuu xa? Ixi xi Caín kain ti kuanche e xa ndako a jii, ko kain ti kuanche e ndo Abel, me e chao jii.

¹³ Kichuuna, xronka inta ixi ni ste ngata a nunte xasintajni, ni chúxin a ndo Dio ningakon annta na.

¹⁴ *ixi jáina ó kuatsingana ti tsen en aséeina, ko jai jichón aséeina. Jáña nóanaxinna ixi nduaxin tjue ena sen kichuuna ko sen tjue a sen kichuu, sen me e xratsiken en aséen sen.

¹⁵ Kain sen ningakon en sen kichuu, sen me e ikjan sen xranchi naa xi naatóñaxón chujni, ko ja anta ó no anta ixi ninaa ni nche e jáña chónda i na juachaxin tsechón na kain nchakon.

¹⁶ Ó nojna nge e xrondachro ti xrotjue e kichuuni, ixi Ncháina Jesucristo kuen en ndo ixi jáina; ko jáña kaxon xrokonda sintu u jáina, tsen enna ixi sen kichuuna.

¹⁷ Naa sen chónda kueya nge e ko tikon sen ixi naa sen kichuu sen xro an nge e chónda sen, ko xro an nge e tingijnaxin kichuu sen, ¿xranchi xrondachro sen ixi tjue e sen ndo Dio ngaya aséen sen ko tingijna i sen, sen kichuu sen?

¹⁸ Chjan na, ti ndachrona ixi tjue ena sen kichuuna, xrokonda ixi nduaxin jáña sintu una, je a je o xronichjana.

Chao tsonchjiñe ena ngajin ndo Dio

¹⁹ Jáña nduaxin nojna ixi titika onna ndo Dio, ko no e aséeina ixi nduaxin steniina ngajin ndo.

²⁰ Ko siá aséeina tjangíina ixi xrojan nge e ndako a juintu una, Ndo Dio ícha no e nge e xraxaon aséeina ko nge e juintu una.

²¹ Kichuuna, siá tjangia ina aséeina, me e chao tsonchjiñe ena ngajin ndo Dio,

²² ko je e ndo tsajon ndo kain nge e tsjanche ena ndo, ixi titika onna ti kuetuajna ndo ko nche ena ti tjaun ndo.

²³ *Ko ndo Dio tsiketuan an ndo ixi tsitikaonna Chjen en ndo, xjan Jesucristo, ko xrotjue e kichuuna xranchi je e ndo kuetuan an ndo.

²⁴ Kain sen titikaon nge e kuetuan an ndo Dio, sen me e stenii sen ngajin ndo, ko je e ndo jii ndo ti no ste je e sen. Jáña nojna ixi je e ndo jii ndo ti no ste jáina ixi chjajna ndo Espíritue ndo.

4

Espíritue ndo Dio ko espíritue xi ningakon en ndo Cristo

¹ Ja anta kichuuna, titikaon anta kaxin ni ndachro ixi je e na nichjaxin na Espíritue ndo Dio. Ja anta tsje enta á nduaxin nichjaxin na Espíritue ndo Dio o na i. Ixi nti i ngata a nunte jii kueya ni ncheya ixi ndachro na je e na nichjaxin na espíritue ndo Dio ko nduaxin a me e.

² Ko ja anta ja in tsichuxixinnta ngisen chónda Espíritue ndo Dio; kain sen ndachro ixi ndo Jesucristo kuji ndo ngata a nunte xasintajni xranchi naa chujni, sen me e nduaxin chónda sen Espíritue ndo Dio.

³ Ko ni ndachro ixi ndo Jesús kui a ndo xranchi naa chujni, ni me e chónda i na Espíritue ndo Dio. Ko je e na chónda na espíritue xi ningakon en ndo Cristo. Ja anta ó kuin ennta ixi espíritue me e xrokuji ngata a nunte, ko jai ó kuji espíritue me e.

⁴ Chjan na, ja anta ó chjen en ndo Dio ntaq, ko ó juache enta ni ncheya ixi Espíritue ndo Dio jii ngajinnta ícha soji ixi espíritue Xixron anxrée jii ngata a nunte xasintajni soji a.

⁵ Ko ni me e titikaon a na ndo Dio, méxin nichja na ti ndako a. Ko chujnie na naxraje o nichja na méxin tienxin kichuu na.

⁶ Ko jaína tikinixin enna ndo Dio. Ko sen chúxin ndo Dio tin en sen nge e ndachena sen. Ko ni titikaon a ndo Dio, ni me e tjaun a na tsin en na chijnie ndo. Jaña tsichúxinna ngisen chónnda Espíritue ndo Dio ko ni chónnda espíritue juancheya.

Ndo Dio tjue e ndo chujni

⁷ Kichuuna, tsango tjua anta, xrokonda xrotjue e kichuuna, ixí ti tjue e kichuuni, ti me e ti xin ngajin ndo Dio. Ko ngisen tjue e kichuu, sen me e chjen en ndo Dio, ko nduaxin je e sen chúxin sen ndo Dio.

⁸ Ko ngisen tjue a ni kichuu, ni me e chúxin a na ndo Dio ixí je e ndo tsango tjue e ndo kain chujni.

⁹ Ndo Dio ja in juakoxin ndo ixí tjuajna ndo, méxin xruan an ndo Chjen en ndo, xjan naakuaxon, kuji xjan nti i nunte xasintajni ixí je e xjan tsajon xjan juachaxin tsechónna kain nchakon.

¹⁰ Ko ti tjuajna ndo Dio xrondachro ixí je a jaína tjue ena ndo Dio; je e ndo ícha sa ó tjuajna ndo, méxin xruan an ndo Chjen en ndo kuenxin xjan ixí jaína ko jaña kuantsje xjan ijie chondana.

¹¹ Ja anta kichuuna, siá ndo Dio ó tjuajna ndo, jaña kaxon xrokonda xrotjue ena sen kichuuna.

¹² *Xro an chujni bikon ndo Dio. Méxin, siá xrotjue ena ni kichuuna, me e ndo Dio jii ndo ngaya aséejna, ko me e nduaxin ícha xrotjue eni ni kichuuni ngujngu nchakon.

¹³ Ndo Dio kuajon ndo Espíritue ndo chondana, méxin, nónxinna ixí soji steniina ngajin ndo Dio ko je e ndo jii ndo ngajin jaína.

¹⁴ Méxin, jaína bikona ko ndachrona ixí Ndotáina Dio xruan an ndo Chjen en ndo ixí sinchemé e xjan ijie sínká kain chujni jii ngata a nunte xasintajni.

¹⁵ Ngisen titikaon ixí ndo Jesús Chjen en ndo Dio, sen me e jii sen ngajin ndo Dio ko je e ndo jii ndo ngajin sen.

¹⁶ Ko jaña nojna ko titika onna ixí ndo Dio tjuajna ndo. Ko je e ndo tsango tjue e ndo chujni, ko ngisen tjue e ndo Dio ko tjue e sen kichuu sen, sen me e stenii sen ngajin ndo Dio ko ndo Dio jii ndo ngajin je e sen.

¹⁷ Jaña nduaxin jaína ícha jian tjue ena ndo Dio, ko nchakon sinchéña ndo Dio ijie xroxronka ina, ixí jaína ti stena ngata a nunte nti i tjue e kichuuna xranchi je e ndo Jesucristo tjue e ndo kain chujni.

¹⁸ Ngisen tahrjexin ñao tjue e ndo Dio, sen me e xrakon a sen ixí jian tjue e sen ndo Dio, me e satji kain juaxrakon ixí ti nchexronkani me e jitika o ijie, ixí sen xrakon xrachuxin a sen ti jian tjue eni ndo Dio.

¹⁹ Jaína tjue ena ndo Dio ixí je e ndo ícha sa ó tjaunna ndo.

²⁰ Siá xrojan ngisen ndachro: “Jan an tjua a* ndo Dio”, ko ningakon en sen sen kichuu sen, sen me e ncheya sen. Ixi siá chujni tikon sen ko jua i tjue e sen, xranchi xrotjue e sen Ndotáina Dio, ndo jua i tikon sen.

²¹ Ndo Jesús kuetuajna ndo ixí ngisen tjue e ndo Dio kaxon xrokonda xrotjue e sen, sen kichuu sen.

5

Ti chúntiani ndo Dio me e tjache e kain nge e

¹ Ngisen titikaon ixí ndo Jesucristo chjen en ndo Dio; sen me e chjen en ndo kaxon, ko ngisen tjue e ndotée xjan kaxon xrokonda xrotjue e sen chjen en ndo.

² Siá tjue ena ndo Dio ko titika onna ti tetuan an ndo, me e nojna ixí kaxon xrotjue ena kain sen tsikjan chjen en ndo Dio.

³ *Ngisen tjue e ndo Dio xrokonda tsitikaon sen nge e tituan an ndo, ko kain chijni kuetuan an ndo je a tsango tangi tsitikaonni.

⁴ Ixi kain ngisen ikjan chjen en ndo Dio tjache e sen kain xrée xiña i. Ko ti chúntiani ndo Dio, me e juinchesoji aséejna ixí tsjache ena xiña i jii ngata a nunte xasintajni.

⁵ Ngisen titikaon ixí ndo Jesús me e chjen en ndo Dio, sen me e tsjache e sen xrée xiña i jii ngata a nunte.

Ti chronga nge e juinche e Chjen en ndo Dio

⁶ Nchakon kuji ndo Jesucristo bikitée ndo ixí inda ko nchakon kuen en ndo kuintjí nié ndo. Ko je a je o inda. Kaxon inda ko ijni. Ko Espíritue ndo Dio ndachro ixí nduaxin ji i. Ko Espíritue ndo ncheya i.

⁷ Ko jii ní nge e chronga ixí nduaxin: je e Ndotáina, ko Chjen en ndo, ko Espíritue ndo. Ji i ti ní sen chronga, ko ti ní sen me e naakuaxon je e sen.

⁸ Ko nti i ngata a nunte xasintajni jii ní nge e chronga, je e Espíritue ndo, ko inda ko ijnj; ji i ti ní nge e chronga ko kaní ji i xraje o nichja.

⁹ Síá jajna titika onna nge e chronga chujni, ícha tjintee nge e nichja ndo Dio ixi chronga ndo inge e juinche e Chjen en ndo.

¹⁰ Ngisen titikaon Chjen en ndo Dio, sen me e no e sen ngaya aséen sen ixi nduaxin ji i. Ko ngisen titikaon a ndo Dio, sen me e nchéña sen ndo xranchi naa ngisen ncheya, ixi titikaon a sen nge e chronga ndo Dio ti juinche e Chjen en ndo.

¹¹ *Ko ji i ti ndachro ndo Dio ixi chjajna ndo juachaxin tsechónna kain nchakon,* ko juachaxin me e je e Chjen en ndo.

¹² Ngisen titikaon Chjen en ndo Dio, sen me e chónnda sen juachaxin tsechón sen kain nchakon; ko sen chónnda i ngaya aséen sen Chjen en ndo Dio, jua i tsechón sen kain nchakon.

Juexin ikjin ndo Juan

¹³ Jan an kjin annta ji i ixi ja anta ó titikaonnta Chjen en ndo Dio, ixi jaña tsono anta chondanta juachaxin tsarichonnta kain nchakon.

¹⁴ Jajna nojna ko titika onna ixi síá tsjanche ena Ndotáina Dio xrojan nge e ko síá tsjanchiana xranchi je e ndo tjaun ndo, me e je e ndo tsin en ndo ti tjanche ena ndo.

¹⁵ Jaña ó nojna ixi ndo Dio jitin en ndo ti juanche ena ndo, ko kaxon ó nojna ixi tsayé ena nge e juanchiana ngajin ndo.

¹⁶ Ngisen jitsje e ixi naa sen kichuu sen ndako a jinche e sen, ko ijje me e je a ti tsenxin chujni, chao tsjanche e sen ndo Dio sinchemé e ndo ijje me e, ko je e ndo tsajon ndo juachaxin tsechón sen me e, ixi jii naa ijje tsenxin chujni ko ndachrjan jan an ixi tsjanche ani ndo Dio ixi sen me e.

¹⁷ Kain ti ndakoa nche e chujni me e ijje ko jii ijje tsenxin a chujni.

¹⁸ Ó nojna ixi ngisen titikaon Ndotáina Dio ísinche a sen ti ndako a, ixi Chjen en ndo Dio tingijna sen, ko Xixron anxrée í sinchenie a xa sen.

¹⁹ Ó nojna ixi tikinixin enna ndo Dio, ko kain nge e ti ndako a nche e chujni jii ngata a nunte xasintajni me e ti tetuan an Xixron anxrée.

²⁰ Kaxon nojna ixi Chjen en ndo Dio kuu xjan ngata a nunte xasintajni ko juinchekuajna xjan xranchi tsichuxinna ndo Dio, ndo nduaxin ko steniina ngajin ngisen nduaxin, me e je e ndo Jesucristo, chjen en ndo Dio. Ji i Ndo Dio, ndo nduaxin, ko chjajna ndo juachaxin tsechónna kain nchakon.

²¹ Chjan na, tintu enta kain dio tjatu o ixi me e je a nduaxin ndo Dio. Jaña tson en.

Xroon yuxin tsikjin ndo Juan

¹ Jan an, ndo tachríi, ikjin xroon ji i tsayé e sen kuinche e ndo Dio, ko nduaxin jan an tjua a sen; ko je a je o jan an tjua a sen, kaxon kain sen ó chúxin chijni nduaxin.

² Tjua anta ixi ja anta ó kuaye enta ko titikaonnta chijni nduaxin, ko kain nchakon xrochondana chijni me e ngaya aséejina.

³ Ndotáina Dio ko Ncháina Jesucristo, Chjen en ndo Dio, sintanchaonnta ndo, ko tsikonóa anta Ndo ko tsingijnanta ndo ixi ícha tsichuxinnta chijni nduaxin ko xrotjáanta ndo juaxruxin ko xrotjua anta ndo kain nchakon.

⁴ Tsango juaxruxin ritjén ixi bikon kaxinnta stenche enta, xranchi tsiketuan an Ndotáina Dio.

⁵ *Ko jai, kichuuna, tinóatáana ngajinnta ixi xrotjue é kichuunta ko ti rikji anta je a naa chijni natjúá tsaxi tsitikaonnta. Na i. Ji i naa chijni ó kuaye ena ti xrangíxixión kuitikaonna ndo Dio.

⁶ Ko ti xrotjue e kichuuna, me e xrondachro titika onna nge e tsiketuan an ndo Dio, ko ó sa ó kuin enna ti xrotjue e kichuuna.

Tsje enta jian ngixe e chujni ncheya

⁷ Ngata a nunte nti i ste kueya chujni ncheya ko titikaon a na ixi ndo Jesucristo jongi e ndo ko bake e ndo nti i xranchi naa chujni. Ni jaña ndachro, ningakon en na ndo ko ncheya na.

⁸ Méxin tsje enta jian ixi sinchetjáña inta ti ó juachanta ixi ixra juinche enta ko jaña chao tsaye enta nge e ndachro Ncháina Jesucristo.

⁹ Ko chujni tintu e nge e juako ndo Cristo, ni me e tingachrue na, ko chóna i na ndo Dio; ko sen titikaon nge e juako ndo Cristo, Ndotáina Dio ko Chjen en ndo ste sen ngajin sen me e.

¹⁰ Síá xrojan ni me e tsitsja antana, ko tjako na naa chijni je a nduaxin, tájon anta juachaxin tixin in na ndointa ko chje anta na juajna.

¹¹ Ko ngisen xronichje e ni me e ko tsajon sen juajna ngajinna, me e xrondachro ixi kaxon je e sen tsama ijie xranchi je e na ixi ti ndako a tjako na.

Juexin nichja ndo Juan

¹² Jan an chonda ícha kueya nge e xrontatjunta, ko tjaun a xrontatjunta ixi xroon rikjin. Nchakon tsjasotsja anta me e xrontatjunta ko jaña ícha juaxruxin tsojina.

¹³ Sen kichuunta tikinixin en ni ngo nti i, kaxon kuinche e ndo Dio sen, xruan annta sen juajna. Jaña tson en.

Xroon nínxin tsikjin ndo Juan

¹*Jan an ndotáchrí tituen en sen ni ngo, ikjin xroon ji in tsayé e ndo Gayo, ndo tjua a ixi chuxin chijni nduaxin.

²Kichuuna, tjancha a ndo Dio ixi je e ndo sintanchaoan ndo, ko tsingijna ndo kain ixra nche e ko jian tsake e ko ícha tsitikaosan ndo Dio.

³Tsango bake e jan an juaxruxin nchakon kuji kaxin sen kichuuna ko ndachijina sen ixi tsango jian titikáosan chijni nduaxin.

⁴Jan an tsango chjána juaxruxin ixi kujn an ixi sen tja on xranchi chjan na stetitikaon sen chijni nduaxin.

⁵Kichian, ja a nduaxin jian rinche e ixra ixi tingijna sen kichuuna ko ícha tingijna sen t̄j̄ x̄in j̄ee tjajna.

⁶Sen kuingijna ja a tsikeki e sen sen kichuuna, sen xra o ni ngo, xranchi nduaxin tjue é sen. Ko jai tinóatáana ngajian ixi tingijna sen kain nge e xrokonde e sen xranchi tjaun ndo Dio ti tsaa sen cha o.

⁷Je e sen kuachrje sen ixi xrochronga sen chijnie Ncháina ko je e sen kuayé a sen nge e xrokuajon chujni chúxin a ndo Dio.

⁸Méxin, jajna xrokonda tsingijnana sen ixi jaña tsingijnana ícha tsjako sen chijni nduaxin.

Ndako a juinche e ndo Diótréfes

⁹Jan an ikjin naa xroon kuayé e sen ni ngo xra o nti a. Ko ndo Diótréfes titikaon a ndo nge e kuetuan an sen ni ngo ixi je e ndo tjaun ndo je o ndo tsetuan an ndo.

¹⁰Méxin, nchakon tsjaso jan an nti a tsoñaos a ndo sonda jaña nche e ndo ko jincheya ndo. Ko je a je o me e nche e ndo. Kaxon tayé a ndo sen kichuuna tjako chijnie ndo Cristo; ko toñaos e ndo sen tjaun tsingijna sen ko tajon a ndo juachaxin tsingijna sen, ko tengixin ndo sen ni ngo.

¹¹Kichuuna, nche a xranchi nche e chujni nche e nge e ndako a. Cháña nche e ko tjakoa nge e jian. Ixi ngisen nche e ti jian, sen me e chujnie ndo Dio sen. Ko chujni nche e ko tjako nge e ña i, chujni me e chúxin a ndo Dio.

Jian nche e ndo Demetrio

¹²Kain sen ndachro ixi jian nche e ndo Demetrio ko nduaxin me e. Kaxon jan anna ndachrjanna jaña ko ja a no a ixi jan anna ntaya ina.

Juexin nichja ndo Juan

¹³Chonda itsjé nge e xrontatjua ko jai tjaun a xrokin a me e

¹⁴ixi tja on tuinxin tsikon kichuuna ko nchakon me e tsjojna.

¹⁵Juaxruxin take é. Kain sen chuxian nti i xruan an sen juajna. Tjancha a kaxon ndache gujngu sen chuxian nti a ixi jan an xruan an sen juajna.

Xroon tsikjin ndo Judas

¹*Jan an, Judas, nta a xrée ndo Jesucristo, ko jan an ndo kichuu ndo Jacobo, ikjin xroon ji i tsayé e kain sen tjue e ko sen tsikinche e Ndotáina Dio ixi tsitikaon sen ko kaxon ndo Jesucristo tayakon en ndo sen.

²Tja on ixi ndo Dio tsikonóa anta ndo ko xrotjáanta ndo juaxruxin ko tsango xrotjua anta ndo.

Sen ndako a tjako
(2Pe. 2:1-17)

³Kichuuna, tsango tja on xrokjin xroon ji i ixi naakua chondana juachaxin tsechónna kain nchakon. * Méxin, xrokonda xrokjinna xroon ji i ixi tinóatána ngajinnta tintue anta tsitjáña ti chuntianta Ncháina Jesús. Ji i juachaxin kuajon ndo Dio ngajin kain sen titikaon ndo ko nai a tsitjáña juachaxin.

⁴Richonda juachjaon ixi ste kaxin ni ncheya ti no stenta. Ó sa ó nichja xroon chijnie ndo Dio xranchi tangi tson en chujni me e. Je e na titikaon a na ndo Jesús, ndo naakua Ncháina, ko ndachro na ixi ndo Dio tjaunna ndo, méxin, chao sintu una ngixe i nge e ndako a.

⁵Ja anta maski ó no anta ji i, jai tja on sintaxraxa onnta iŋgo ixi Ncháina ndo Dio kuantsjexin ndo sen tjajna Egipto sen israelita, ko tjume e je e ndo juinchetjáña ndo sen, sen kuitikaon a ndo.

⁶Kaxon jaña kon en sen ángel, sen kuitikaon a ti kuetuan an ndo Dio ko kuintu e sen juachaxin tsikajon ndo Dio tsikayé e sen, ko kuintu e sen ti jian kuintee sen ko jai kuetuan an ndo ixi steje e sen ti naxixe e, stechón en sen tsijja nchakon tsoñe e sen ijje.

⁷Kaxon jaña kon en ni tjajna Sodoma ko ni tjajna Gomorra ko ni tjajna tjenka ntí a. Ni me e juinche e na xranchi juinche e sen ángel, kuitikaon a na kaxon, méxin kuama na ijje ixi juinche e na ti ndako a ngajin nchri je a janchri e na ko juinche e na kain ti ndako a, méxin bikaonxin na ixi.

⁸Ji i juako xranchi tson en ni titikaon a, méxin jaña tson en ni ña i, ni ntatjunta ndako a xraxaon. Ncheni e na cuerpoe na ko titikaon a na juachaxien Ncháina ko nichjangí e na sen ángel chóna juachaxin tetuan an.

⁹*Ndo arcángel Miguel kuyakutee ndo Xixron anxrée ko kuetoŋa o ndo xa kondeexin cuerpoe ndo Moisés ixi Xixron anxrée tjaun xa xrobikao xa cuerpoe ndo. Je e ndo ángel maski jaña kon en, kuyakute a ndo xa. Je o ndache ndo xa: "Ncháina sinchéña ijje ngajian."

¹⁰Ko ni ncheya nichjangí e na nge e tienxin a na kaxon, ko nche e na xranchi iko tienxin a, ko je o titikaon na nge e ndachro aséen na, méxin, ti nge e nche e na tsitjáñaxin na.

¹¹Jlastu na!, nche e na xranchi juinche e xi Caín. Tjaun na tsjacha na tomi méxin juinche e na xranchi nge e ndako a juinche e xi Balaam, ko tsen en na xranchi kuen en xi Coré ixi nichjangí e xa sen tjajnee xa.

¹²Tosue eni ixi ni ji i itji na kia chaxro chondanta, ti no xraxaonxinnta Ncháina Jesús. Je e na ine na ko ti i na ko take e na juaxruxin maski xro an juasaya chóna na. Ste na xranchi kaxin ni tetuan an; je o tjaun na tayakon en na aséen na. Stena xranchi itjuí chóna i inda ko nango tikao chrinto tjuj; ko xranchi naa ntaa tajon a itu maski nchakuen ntaa; naa tsikindeken enxon na ko naa tsikachrjengíxin nue e na.

¹³Je e na ste na xranchi ndachaon jie e tsixruji tuchrjo ixi ndako a nche e na ko ji i naa nge e tosue eni. Ko ste na xranchi nchanotsé tsingachrue, itji nango ko nango ko tikinixin en satsji ti naxixe e.

¹⁴Nchakon bake e ndo Adán, tjume e yatuxin ndo me e kují ndo Enoc, ndo nichjaxin juachaxien ndo Dio ko ndachro ndo: "Jan an bikon Ncháina Dio bika o ndo itsjé mil sen ángel chóna ndo,

¹⁵ixi sinchéña ndo ijje ngajin kain ni ndako a juinche e kondeexin kain nge e ña i kuanichjangí e na ndo."

¹⁶Ni me e tjaun a na kain nge e jiton en ko ichrji na nichjangí e kichuu na. Je o chrjitée na nge e je o je e na tjaun na. Ti nichja na nchejie aséen na ko jian tjao na kondee chujni ixi tjaun na ni me e tsingjina na.

Nchexraxaon ndo sen titikaon ndo Cristo

¹⁷Méxin, ja anta kichuuna, xraxaonnta nge e kuandachro sen kuinche e Ncháina Jesucristo,

¹⁸ *ti kuandachro sen ixi nchakon tsjexixin nunte xasintajni tsji ni tsitikaon a ko xronichjangí e na nge e tjaun ndo Dio ko xrotjaun na tsitikaon na nge e ña i ndachro aséen na.

¹⁹ Ni me e tjaun na sintaketonta na ixi je o tjaun na sinche e na nge e ndako a jii nunte xasintajni† ixi chóna i na Espíritue ndo Dio.

²⁰ Méxin, kichuuna, kain nchakon chuntianta ko titikaonnta Ncháina Jesucristo ko xronichjaxinnta ngajin ndo Dio ixi juachaxien Espíritue ndo.

²¹ Jaña chuntianta ixi tjua anta ndo Dio ko chon énta nchakon xrokjan Ncháina Jesucristo ixi juasie ndo xrochajina ndo juachaxin tsechónna kain nchakon.

²² Jian tingijnanta ni xratienxin a ixi tsiénxin na nchakon tsechónni kain nchakon.

²³ Tingijnanta ni titikaon a ixi tsji a na ti xro i nai a tsanga,‡ ko tikonóe énta ni xrokonde e tsikonóe eni ko tsje enta jian ixi ja anta sinche anta ti ndako a nche e je e na.

Juasaya tayé e ndo Dio

²⁴ Naakua ndo Dio jii ko tsango no e ndo kain nge e ko nchemé e ndo ijie chondana ko chóna ndo juachaxin tsayakuina ndo ixi sinche ana ti ndako a, ko nchakon tsjasona ti jii je e ndo xro an ijie xrochondana, ko tsango tsojuna juaxruxin ti jii ndo nti a.

²⁵ Juasie ndo Dio tsango chóna ndo juachaxin tetuan an ndo ko tsajon ndo juachaxin tsechónna ixi juachaxien Ncháina Jesucristo. Je e ndo kain nchakon jichón ndo ko chóna ndo kain juachaxin, juachaxin nai a tsjexin. Jaña tson en.

Nge e chronga ndo Jesucristo bikon ndo Juan

¹ Kain nge e jitaxin nti i ndo Dio juincheno e ndo Ncháina Jesucristo ixi sincheno e ndo kain sen nche e xrée ndo ixi kain ji i xrokonda tuinxin tson en. Ndo Jesucristo xruan an ndo naa ndo ángel ixi sincheno e ndo ndo Juan kain ji i ixi je e ndo Juan nche e ndo xrée ndo Jesucristo.

² Ndo Juan nduaxin chronga ndo nge e nduaxin tsindachro ndo Dio ko nge e chronga ndo Jesucristo ko kain nge e tsikikon ndo xranchi juako ndo Dio.

³ Juaxruxin tsake e sen sinchekuanxin xroon ji i ko tsin en sen chijni chronga nge e tson en, ko kaxon juaxruxin tsake e sen tsitikaon nge e nichja xroon ixi tuinxin tsij nchakon tson en ji i.

Ndo Juan ikjin ndo xroon tsayé e yaato ni ngo

⁴ *Jan an, Juan, ikjin xroon tsayé e yaato ni ngo ste nunte Asia. Ndo Dio tjua anta ndo ko tjáanta ndo juaxruxin. Je e ndo bake e ndo ti xraxro an nge e jii, ko ndo jai jichón ko ndo xrokjan tsij ijngo. Ko juaxruxin ji i tajon yaato espíritu jii ti tetuanxin ndo,

⁵ ko kaxon ndo Jesucristo tajon kain juaxruxin ji i. Je e ndo nduaxin chronga ndo kain nge e; je o je e ndo sa ó xechón ndo, ndo icha tetuan an ixi kain xi rey ko ni tetuan an nunte xasintajni. Je e ndo tsango tjaunna ndo, méxin ixi jnié ndo kuijmaxin kain ijje sinkana.

⁶ *Je e ndo kuajon ndo juachaxin xrokjanna xranchi xitaana ixi sintu una ixra ngajin Ndotée ndo, Ndotáina Dio. Méxin je e ndo tsayé e ndo kain juasaya ko juachaxien ndo tsetuan an ndo kain nchakon. Jaña tson en.

⁷ *Tsje enta. Ndo Cristo tsij ndo ngakjen en itjuj. Ko kain na tsikon na ndo ko kaxon ni ningakon en ndo, ni naakóñaxón ndo ko kain ni tjajna jii nunte xasintajni xrotsjanga na nchakon tsikon na tsij ndo. Jaña tson en.

⁸ **Jan an ti xrangíxixión ritjén ko jan an tsake e ti tsjexixin kain nge e, xranchi letra Á xrangíxixión kain letra ko letra Zeta tjexixín”, jaña ichro Ncháina ndo Dio, ndo tsango tetuan an. Je e ndo jichón ndo jai ko ó bake e ndo sa ó ko ndo xrokjan tsij ijngo.

Ndo Cristo chóna ndo kain juachaxin

⁹ Jan an Juan ndo kichuunta ixi steniina ndo Jesús. Ja anta ko jan an xraje o tangi stetatsingana ko stechon enna tsojuna ti tetuan an ndo Jesús. Jan an bake e naa nche nchún ngusine nda, nche ndatin in Patmos, kondeexin bajako chijnie ndo Dio ko kuanichja chijnie ndo Jesucristo.

¹⁰ Naa nchakon ritájon juasaya ngajin Ncháina, hora me e kuij juachaxien Espíritue ndo Dio ti ritjén jan an ko tuenxinna kuin an naa téé sen, soji xranchi ndachro naa itjao.*

¹¹ Ja in ndachro ndo:

—Jan an ti xrangíxixión ko ti tsjexixin xranchi letra á xrangíxixión ko letra zeta tsjexixin. Ja a ikjian xroon ji i xrochronga kain nge e tsikuan ixi xroxruen en yaato ni ngo ste nunte Asia: ni ngo tjajna Éfeso, Esmirna, Pérgamo, Tiatira, Sardis, Filadelfia, ko Laodicea.

¹² Tjume e ngatjia tsja á ixi tsikon ngisen jinichja na ko tuinxin bikon yaato candelero tsikóñaxin chika oro.

¹³ Ko ngusine ti yaato candelero bikon naa ngisen jitsje e xranchi Chjen en ndo Dio tsijongí e xranchi chujni. Ko manta jiá ndo, me e naa manta jine jikaxin ti tutée ndo ko jiteya ndo naa cinturón tsikóñaxin chika oro.

¹⁴ Ko xrajaa ndo tjúa xranchi tikonni chjuen kutuchjon ko tjúa xranchi tikonni chrinta ko jmakon ndo tóngixin xranchi xro i.

¹⁵ Ko tutée ndo xranchi chika bronco tóngixin tsikachrxjexin naa itja. Ko ti nichja ndo tin enni séen xranchi xroin yee nda jitinga.

¹⁶ Ko itja ndo ti jian, chóna ndo yaato nchanotsé. Ko ro a ndo jitachrxjexin naa chika espada kayui yajin yauxin. Ko ngaya ikon ndo tsango tóngixin xranchi tóngixin chjiixro ngusine nchakon.

¹⁷ *Ko hora bikon ndo, xranchi xrokuen enna, kuaritsinga ti jii tutée ndo. Ko je e ndo bake e ndo itja ndo ti jian ngata ana ko ndachijina ndo:

—Xronka ia. Jan an ti xrangíxixión ko ti tsjexixin kain nge e.

¹⁸ Ko jan an ríchon. Jan an kuen enna, ko jai ríchon ijngo ko jan an tsarichón kain nchakon. Jaña tson en. Jan an tituan an ngajin juachaxin ti tsen en chujni ko richonda chika xitjexin ti jii ni tsiken en.

¹⁹ Méxin ikjian nge e bikuan, ko nge e ritsje e jai ko nge e tson en tjume e.

²⁰ Ji i xrondachro ti yaato nchanotsé bikuan ngaya tjáana ti jian ko ti yaato candelero chika oro: Ti yaato nchanotsé me e sen ángel nichje e sen ti yaato ni ngo ko ti yaato candelero me e xrondachro yaato ni ngo.

2

Chijni kuayé e yaato ni ngo: Chijni kuayé e sen ni ngo tjajna Éfeso

¹ Ikjian xroon tsayé e ndo ángel jitayakon en aséen sen ni ngo Éfeso: “Ja in ndachro ndo chóna yaato nchanotsé ngaya itja ndo ti jian ko ichrji ndo ngakjen en yaato candelero tsikónaxin chika oro:

² Jan an nóna kain nge e nche enta ko nóna ixi jian nche enta ixra ko tintue anta ti titikaonnta, ko juaxruxin a stenta ixi chujni ndako a nche e. Jan an ó nóna ixi ja anta jian tsje enta á nduaxin chujni ndachro ixi je e na apóstol na ko je a nduaxin; ko juakonta ixi ni me e ncheya na.

³ Kueya nge e tangi kuatsinganta ixi titikaonntana ko kaxon tsango jian juinche enta ixra ko tuenxin a konchrjenta ko ngaxin a itonnta.

⁴ Ko jii naa nge e nchena i juaxruxin: ixi jai tjuaana ininta xranchi sa ó.

⁵ Sintexiñaonta xranchi kuinteenta sa ó. Ikjannta titikaonnta ndo Dio íjngo. Tintu enta ti ndako a ko nche enta kain nge e jian ti kuanche enta nchakon nandá kuaxi kuitikaonnta, ixi siá sinche anta me e, jan an tsjaso ko nango tsake e candeleroanta.

⁶ Ko jii naa nge e nchéna juaxruxin nche enta me e ti ningakon ennta nge e nche e ni Nicolaitas ko jan an kaxon ningakon an nge e nche e na.

⁷ *Ngisen chao tin en, tsin en sen nge e ndachro Espíritue ndo Dio ngajin ngujngu ni ngo: Sen tsjacha tsatsinga kain nge e tangi ko tsintue a sen tsitikaonna sen, jan an xrotjá a sen juachaxin sine sen itu tajon ntáa tajon juachaxin tsechónni kain nchakon, ntáa me e jii ntáa ti tetuan an ndo Dio.”

Chijni kuayé e sen ni ngo tjajna Esmirna

⁸ *Ikjian xroon tsayé e ndo ángel jitayakon en aséen sen ni ngo tjajna Esmirna: “Ja in ndachro ngisen jii ti xrangíxixión ko tsake e ti tsjexixin kain nge e, ndo kuen en ko jai jichón:

⁹ Jan an chúxin kain nge e nche enta ko nóna xranchi tangi stenta ko nóanta maski ja anta chondanta itsjé nge e jian ngaya asáanta, ko nóna kaxon ixi chinga nichja na ixi ja anta, ni ndachro judío na, je e na xraxaon na judío na ko je a nduaxin me e; je e na tikinixin en na ningue Xixron anxrée.

¹⁰ Xronka inta kondee ti tangi tsatsinganta ixi Xixron anxrée xroxruxin in xa kaxin ja anta ndo achjiso ixi jaña tsjakoxinnta á nduaxin titikaonntana ko tangi tsatsinganta ite nchakon. Ko tintue anta ti titikaonntana kain nchakon ti tsenjannta, ko jan an xrotjá anta juachaxin tsarichonnta kain nchakon.

¹¹ *Ngisen chao tin en, tsin en sen nge e ndachro Espíritue ndo Dio ngajin ngujngu ni ngo: Ngisen tsjacha tsatsinga kain nge e tangi ko tsitikaonna, xro an nge e tson en aséen sen ti yuxin tsen en chujni.”*

Chijni kuayé e sen ni ngo tjajna Pérgamo

¹² Ikjian xroon tsayé e ndo ángel jitayakon en aséen sen ni ngo tjajna Pérgamo: “Ja in ndachro ngisen chóna espada kayui yajin yaxin:

¹³ Jan an chúxin kain nge e stenche enta ko nóna ixi stenta ti no tetuan an Xixron anxrée, ko ja anta xratitikaonnta. Ko kuintue anta chuntiantana maski nti a kóna na ndo Antipas, ndo jian kuitikaonna jan an.

¹⁴ Ko jii naa nge e nchena i juaxruxin nche enta. Nti a tjajna Pérgamo chondanta kaxin ni chro a tintu e nge e juako xi Balaam, xi me e ndache xa xi Balac ixi sinchekateya xa sen Israelita sine sen nge e tsikajon na ngajin ídoloé na ko ti tjiakuenxin na nchri.

¹⁵ Ko kaxon chondanta kaxin ni tjaua a tsintu e na nge e tjako ni Nicolaítas, ni ningakon an jan an.

¹⁶ Méxin tintu enta ti ndako a ko titikaonnta ndo Dio. Ixi tuinxin tsji i jan an ti stenta ko tsetokianxin chujni ixi espada tachrjexin ro a.

¹⁷ *Ngisen chao tin en, tsin en sen nge e ndachro Espíritue ndo Dio ngajin ngujngu ni ngo: Ngisen tsjacha tsatsinga kain nge e tangi ko tsintuna i sen, sen me e xrotjá a sen juachaxin sine sen naa nutja jichjian ko xrotjá a sen naa ixro tjúa, ko ngata a xro me e jitaxin naa nombre natjúá ti chúxin a ninaa ngisen. Je o ngisen tsayé e ixro tsono e sen xranchi ndatin in sen.”

Chijni kuayé e sen ni ngo tjanya Tiatira

¹⁸ 'Ikjian xroon nge e tsayé e ndo ángel jitayakon en aséen sen ni ngo tjanya Tiatira: "Ja in ndachro Chjen en ndo Dio, ngisen chónda jmakon xranchi xro i jiche ko tutée ndo tóngixin xranchi chika sine jingi xro i.

¹⁹ Jan an nóna kain nge e nche enta ko nóna ixi tsango tjaunninta ko tsango chuntianinta ko nóna jian ixra nche enta. Ko nóna ixi jai icha nche enta ixra.

²⁰ Jii kaxin nge e nchena i juaxruxin nche enta ixi ja anta tájonnta juachaxin tjako nchri Jezabel ko ndachro nchra ixi je e nchra nichja nchra chijnie ndo Dio, ko nduaxin a me e ixi je e nchra nchekateya nchra sen nche e ixra ngajin, sine sen ti tsikajon na ngajin ídoloe na ko nchekateya nchra sen tsjiakuenxin sen kaxin nchri.

²¹ Jan an tjá a nchra kaxin nchakon ixi tsintu e nchra ti ndako a nche e nchra ko ti chónda nchra itsjé xi, ko titikaon a nchra.

²² Ko jai tsajon juachaxin tsanga tsoni e nchra, tsitsingata a nchra kania ko tsango tangi tson en kain sen ndakua i juinche e na ti kuejuakao na nchra ko tsachrje a chin me e tsintueja sen ti ndakua i nche e sen.

²³ Ko chjen en nchri me e sintani a xjan ko tsen en xjan. Ko kain sen ni ngo tsono e sen ixi jan an chuxin nge e xraxaon aséen sen. Ko sintajenga sen na kondee ngujngu ti ndako a juinche e sen.

²⁴ Ko ja anta ko ikaxin sen ste tjanya Tiatira, ja anta ti rue anta ti ndako a tjako nchra ko tjaun anta tsono anta nge e ndakua i kondee chijnie Xixron anxrée, ko ja anta i xrotjá inta inaa juachjaon.

²⁵ Ko nge e ti jian chondanta, tatsiinnta ngaya asáanta ko me e nche enta kain nchakon tsjija jan an.

²⁶ Ko sen tsjacha sinche e kain nge e tja on jan an kain nchakon ti tsjexinja kain nge e jii ngata a nunte xasintajni, xrotjá a sen juachaxin tsetuen en sen kain tjanya.

²⁷ Jaña Ndotána chjána ndo juachaxin tsetuan an, kaxon jaña je e sen tsetuen en sen tjanya ko xrochóna sen naa ntakuto chika tsetuenxin sen tjanya ko xrochjeka tjanya xranchi taki naa ichi tjatu o jaña tson en chujni me e.

²⁸ Ko kaxon xrotjá a sen nchanotsé tingasáña ndúyo.

²⁹ Ngisen chao tin en, tsin en nge e ndachro Espíritue ndo Dio ngajin ngujngu ni ngo."

3*Chijni kuayé e sen ni ngo tjanya Sardis*

¹ 'Ikjian nge e tsayé e ndo ángel jitayakon en aséen sen ni ngo tjanya Sardis: "Ja in ndachro ndo chónda yaatq Espíritue ndo Dio ko chónda yaatq nchanotsé: Jan an nóna kain nge e nche enta, ko nóna ixi ndachro na stechonnta ko nduaxin a me e ixi ja anta ó tsikinteken ennta.

² Xingama anta ko nche enta ti jian ti xrachao sinche enta ixi ritsja a ti stenche enta ti ndakua i jii ngajinxin* ikon Ndotána Dio.

³ *Sintexiñaonta kain nge e jian kuaye enta ti kuajon ndo Dio, tindoxinnta kain ti ndako a kuanche enta ko titikaonnta kain ti jian. Siá sinche anta ti jian, tsjaso ngajinnta xranchi naa xiche e, ixi xi me e noe ani ngiora tsji xa.

⁴ Ko xraste kaxin sen nti a tjanya Sardis xranchejtja i sen manta steyá sen, me e tsetsáa sen manta tjúa ko jan an tsajiki an sen ixi jaña tikinixin en sen.

⁵ *Ko sen tsjacha tsatsinga kain nge e tangi ko tsitikaonna sen, sen me e tsayé e sen manta tjúa tsetsáa sen ko sintamá i xranchi tin in sen ti xroon jitaxin xranchi tin in kain sen tsechón kain nchakon ko jan an xrondachrjan ixi chuxin sen ngajinxin ikon Ndotána ko ngajinxin sen ángel chónda ndo.

⁶ Ngisen chao tin en, tsin en sen nge e ndachro Espíritue ndo Dio ngajin ngujngu ni ngo."

Chijni kuayé e sen ni ngo tjanya Filadelfia

⁷ 'Ikjian nge e tsayé e ndo ángel jitayakon en aséen sen ni ngo tjanya Filadelfia: "Ja in ndachro ndo tjúa, ndo nduaxin, ndo chónda chika xitjeexin ntachja tikinixin en ndo rey David. Ixi nchakon tsantje e ndo ntachja xro an ngisen tsije e ntachja, ko nchakon tsije e ndo ntachja ko xro an ngisen tsantje e ntachja:

⁸ Jan an nóna kain nge e nche enta, ko ngajinxinnta bakée naa ntachja jixrange e ko xro an ngisen chónda juachaxin tsije e ntachja. Nóna ixi maski jíe a juachaxin chondanta, kuitikaonnta kain nge e tja on, ko nai a tosua anta ixi chuxinninta.

* **3:2 ngajinxin** delante de **3:3** Mt. 24:43, 44; Lc. 12:39, 40; Ap. 16:15. **3:5** Ap. 20:12; Mt. 10:32; Lc. 12:8.

⁹ Jan an sinta a ixi ni tsikitikaon Xixron anxrée ko ndachro na ixi judío je e na ko nduaxin a me e, je e na tsaxexin na ntatuchi in na ngajinxin ja anta ixi jaña tsikon na ixi jan an tsango tjua anta.

¹⁰ Ixi nduaxin kuitikaonnta nge e kuatuan annta, jan an tayakon annta nchakon tsii juachjaon ngata a kain chujni ste nunte xasintajni ixi jaña tsikon ndotána Dio á nduaxin tsikitikaon na chijnie ndo.

¹¹ Jan an tuinxin tsji i. Tatsiinnta ngaya asáanta chijni kuaye enta ixi jaña ninaa ngisen tsantsja inta corona juachanta.

¹² *Sen tsjacha tsatsinga kain ti tangi, sen me e tsakée sen xranchi ntásiji jingi e ningue ndo Ndotána Dio ko i nai a tsachrxexin sen nti a. Ko jan an xrokjin ngata a sen xranchi tin in ndo Dio ko xranchi tin in tjanée ndo, tjanya natjúá, tjanya Jerusalén, tsj xjn ngajni ti jii ndo Dio. Kaxon xrokjin xranchi natjúá tsi ina jan an.

¹³ Ngisen chao tin en, tsin en sen nge e ndachro Espíritue ndo Dio ngajin ngujngu ni ngo.”

Chijni kuayé e sen ni ngo tjanya Laodicea

¹⁴ *Ikjian nge e tsayé e ndo ángel jityakon en aséen sen ni ngo tjanya Laodicea: “Ja in ndachro ndo nduaxin, ndo chronga kain ti nduaxin. Jan an bake e ti xrangixixín juinchéña ndo Dio kain nge e. Ndachrxjan ja in:

¹⁵ Jan an nóna kain nge e nche enta. Ko nóna ixi je a kain ti ndachrxjan titikaonntana, je o kaxion nge e titikaonnta. Xrokuitikaonnta kain nge e o cháña xro an nge e xrokuitikaonnta. Ja anta stenta xranchi inda yasondao; cháña xrokjuinta naa nda súa o cháña nda ikin.

¹⁶ Ixi kaxion nge e titikaonnta, me e ja anta xranchi naa inda yasondao itjennta, méxin tsantsjexinnta ro a.

¹⁷ Ko ndachronta ixi tsango itsjé nge e chondanta ko tsango jian stenta ko xro an nge e xrokonda anta. Ko ja anta noa inta ixi xro an juaxrxuxin chónda asáanta ko noa inta ixi turuchu asáanta ko ntakutsinnta.

¹⁸ Méxin jan an ntakateyanta te nanta ngajin jan an oro chaxro tsikachrxexin xro i ixi jaña xrochondanta nge e nduaxin tjintee ko kaxon manta tjúá tsarianta, ko jaña tsikon ani ti turuchunta ko te nanta ngajin jan an xroan colirio tsintjingi ikonnta ixi jaña chao tsikonnta.

¹⁹ *Ixi jan an toña o ko tetuan an tikaon kain sen tjúa a; méxin tintu enta kain ti ndako a ko ikjannta titikaonnta kain nge e tjaun ndo Dio.

²⁰ Nti i ritjén ngandangi nduja, ritinga ntachja ko riteya. Siá xrojan ngisen jitin en téena ko tsantje e sen ntachja, jan an tixin in ndo a sen ko sineki an sen.

²¹ Ko ngisen tsjacha tsatsinga kain nge e tangi, jan an xrotjá a sen juachaxin tsake e sen ngajin ti ritetuan an; xranchi jan an juácha kuatsinga kain nge e tangi ko Ndotána chjana ndo juachaxin tsake e ti tetuan an je e ndo.

²² Ngisen chao tin en, tsin en sen nge e ndachro Espíritue ndo Dio ngajin ngujngu ni ngo.”

4

Sen tajon juasaya ngajin ndo Dio

¹ Tjume e jan an bikon jixrange e naa ntachja jii ngajni.* Ko ti sen nichja kujn an sa ó, nichja sen séen xranchi naa itjao†, ndo me e nichja na ndo íjngo, ko ja in ndachijina ndo:

—Tajian nti i ixi tsjako a kain nge e tson en icha tjume e.

² Tuinxin kujj juachaxien Espíritue ndo Dio ngajin ko bikon naa trono jii ngajni ko naa ngisen jita a trono me e.

³ Ko ndo jita a trono tsango jitóngixin ndo xranchi naa ixro ndatin in jasje o xro cornalina. Ko ngandajin trono me bikon naa kunchecha tsango chaxro tóngixin xranchi naa ixro ndatin in esmeralda.

⁴ Ko kaxon ngande e trono me e bikon íjngo ikán noó trono ko nti a jita a ikán‡ noó ndo tachrii, ko manta tjúá steyá sen ko corona tsikóñaxin chika oro steta a jaa sen.

⁵ *Ko trono tikinixin en ndo Dio tin enni nichja sen, ko tjateé ko tóngixin. Ko ngajinxin trono kaxon jiche yaato xro i ko me e ti yaato Espíritue ndo Dio.

⁶ Ko ngajinxin trono bikon xranchi xrokjui naa ndachao tóngixin xranchi xroxrao.

Tjenka ko ngande e trono ste noó sen jichón ko chóna sen me e itsjé jmakon sen ngajinxin sen ko tuinxin sen.

⁷ Ko ti naa sen jichón tikonni xranchi naa kujenda, ko ti yuxin sen jichón tikonni xranchi naa kuxinta, ko ti nínxin sen jichón tikonni xranchi ikon chujni. Ko ti noóxin sen jichón tikonni xranchi naa kutachikjan jitjanga.

⁸ Ko ti noó sen jichón, ngujngu sen chónnda sen ikáon nenechaan sen ko stechónnda sen itsjé jmakon sen ngandajin sen ko ngaxin in sen, ko tiie, nchakon stendachro sen:

Tjúá, tjúá, tjúá ja anta,

Ncháina ndo Dio, ja anta chondanta kain juachaxin.

Ja anta ndo ó ritjennta sa ó,

ko richonnta jai

ko ja anta xrokjannta tsji inta lingo.

⁹ Sen noó sen jichón kain nchakon tajon sen juasaya, ko juasie sen ngajin ndo Dio, ndo jita a trono, ndo jichón kain nchakon

¹⁰ ko hora jaña nche e sen noó jichón, sen ikán noó tachríi take exin ntatuchi in sen ngajin ndo Dio ko tajon sen juasaya ngajin ndo jichón kain nchakon, ko tjanka sen corone sen ngajinxin trono ko ndachro sen:

¹¹ Nchána ko ja anta ndo Dio na nana,

ja anta tikinixin annta tsaye enta kain juasaya

ko tikinixin annta xrontatjunanta ja anta tsango jiannta ixi kain juachaxin chondanta;

ko ixi ja anta juincheckochjiannta kain nge e ixi jaña jueñaonta.

5

Xroon ko Xjantuchjon

¹ Tjume e bikon ngaya tja ndo ti jian, ndo jita a trono, jitsé ndo naa xroon tsikjin sen ngaya ko tuenxin ko tsikijeexin xroon ixi yaato sello.

² Ko bikon naa ndo ángel chónnda juachaxin ko séen tjanchangi ndo ko ndachro ndo:

—¿Ngisen chónnda juachaxin tsintjian sen sello ko tsantje e xroon?

³ Ninaa ngisen jii ngajni ko nunte xasintajni ko chringi inche jua i tsantje e sen xroon ko jua i tsje e sen nge e ndachro xroon.

⁴ Ko jan an tsango tsjanga ixi kuichue a ninaa ngisen chónnda juachaxin chao xrokuantje e xroon o je o xrobikon sen nge e ndachro xroon.

⁵ Tjume e naa sen tachríi ndachijina:

—Itsjanga ia, ixi nti i jii Kujenda kuachrjenixin tjajna Judá ko kuachrjenixin ndo Rey David. Ndo me e juacha ko chónnda ndo juachaxin chao tsantje e ndo ko tsintjian ndo ti yaato sello chónnda xroon.

⁶ Tjume e ngajinxin trono ko ti ste noó sen jichón ko ngusine ti ste sen tachríi, nti a siin naa ndo xrokjui xranchi Xjantuchjon,* tikonni xranchi naatsikóñaxón na xjan ko chónnda xjan yaato nte e xjan ko yaato jmakon xjan. Me e xrondachro yaato Espiritue ndo Dio tsixruan an ndo itsji nchijii nunte xasintajni.

⁷ Ko Xjantuchjon konchjiñe e xjan ti jii ndo jita a trono ko itsé xjan xroon jiá itja ndo ti jian.

⁸ Ko nchakon itsé xjan xroon me e, ti noó sen stechón ko sen ikán no sen tachríi bake exin ntatuchi in sen ti jii tuté Xjantuchjon. Ko ngujngu sen chónnda sen naa arpa, ko copa tsikóñaxin chika oro jichre inda chaxro xraxe. Me e xrondachro kain ti nichje e sen ndo Dio, kain sen tikinixin en tjajnée ndo.

⁹ Ko sen noó jichón ko sen ikán no sen tachríi itsje sen naa soon natjúá:

Je o ja anta tikinixin annta tsaye enta xroon

ko tsintjiannta ti sello chónnda libro;

ixi ja anta naakóñaxónnta na

ko jnianta kuenaxinnta chujni ste kain tjajna, sen nichja kain ngigua, tjajna nchínchín ko tjajna ndua ixi xrokuayé e ndo Dio sen.

¹⁰ *Ja anta kuajonnta juachaxin ixi xrokjanna rey ko taana sinta ana ixra ngajin ndo Dio na nana,

ko kaxon kuajonnta juachaxin tsetuan anna nunte xasintajni.

¹¹ Tjume e tsja a ko kuin an téé itsjé sen ángel ste sen ngande e trono ko no sen jichón ko ikán no sen tachríi. Ko ste itsjé millones sen.

¹² Séen itsje sen:

Xjantuchjon, naakóñaxón na xjan,

méxin tikinixin xjan tsayé e xjan kain juachaxin tsetuan an xjan

ko tsayé e xjan kain ti tjintee,

ko kain nge e tsono e xjan,

kain juachaxin ko kain juasiajna.

* 5:6 *Xjantuchjon* Cordero de Dio; Jesús 5:10 Ap. 1:6.

¹³ Kaxon kuin an ixi kain nge e juinchéña ndo Dio jii ngajni, nunte xasintajni, jii chringi inche ko kain nge e jii chringi ndachaon ndachro: Kain ja anta tájonnta juasaya ngajin ndo jita a trono ko ngajin Xjantuchjon ixi tikinixin en sen kain juachaxin ko kain nge e jian ko kain juasaya kainxin nchakon.

¹⁴ Ko noó sen stechón ndachro sen:

—Jaña tson en.

Ko sen ikán no sen tachríi bake exin ntatuchi in sen, kuajon sen juasaya ngajin ngisen jichón kain nchakon.

6

Yaato sello

¹ Tjume e bikon ixi Xjantuchjon kuintjian xjan naa sello ti yaato sello ko kuin an nichja naa sen noó jichón ko nichja sen séen xranchi tjateé ko ndachro:

—Xrokuia ko tsje é.

² Ko jan an ritsja a ko bikon naa kunxin tjúá. Ko ndo jita a kunxin me e jichónnda ndo naa arco ngaya itja ndo ko tsikayé e ndo naa corona ko je e ndo juacha ndo ti kué to ndo ngajin kain ti ña i ko jaña sinche e ndo kain nchakon.

³ Ko Xjantuchjon hora kuintjian xjan sello yuxin, kuin an ti yuxin sen jichón ndachro sen:

—Xrokuia ko tsje é.

⁴ Ko kuachrje inaa kunxin játse. Ko ndo jita a ba kuayé e ndo juachaxin tsantsje ndo kain juaxruxin jii ngata a nunte xasintajni ko jaña tsóña kichuu nguungu chujni, ko kuayé e ndo naa chika espada yao tsango ijié.

⁵ Ko Xjantuchjon kuintjian xjan ti nínxin sello ko kuin an nichja sen nínxin jichón ko ndachro sen:

—Xrokuia ko tsje é.

Ko ritsja a ko bikon naa kunxin tiie ko ndo jita a ba jichónnda ndo ngaya itja naa balanza.

⁶ Ko kuin an nichja naa sen ngusine ti ste ti noó sen jichón ndachro:

—Je o naa kilo trigo tsinaxin ixi naa tomi denario ko níi kilo cebada ixi naa tomi denario kaxon. Ko nchetjáña inta aceite ko vino.

⁷ Ko Xjantuchjon kuintjian xjan ti noóxin sello, tjume e kuin an nichja ti noóxin sen jichón ndachro:

—Xrokuia ko tsje é.

⁸ Ko ritsja a ko bikon naa kunxin sine ko ti jita a ba ndatin in Muerte. Ko tuenxin ti me e jirué e ti tetuan an ti no xrabaa ni tsiken en. Ko kayui me e kuayé e juachaxin tsetuan an ti noóxin parte nunte xasintajni ixi tsóña na chujni ixi chika yao ko tsenxin na jinta, ko tsenxin na ichin ko iku jie e tsóña chujni.

⁹ Ko Xjantuchjon kuintjian ti naoxin sello ko bikon chringi trono aséen sen tsiken en ixi kuanichja sen chijnie ndo Dio.

¹⁰ Ko séen ndachro sen:

—Ja anta Ncháina tjúánta ko jiannta ko kain nchakon ndachrona nge e nduaxin. ¿Ngisa sinchéñanta ijié ngajin ni kóñana, ni ste nunte xasintajni?

¹¹ Ko kuayé e sen manta tjúá ko kuetuen en sen ixi xrochon en sen ikaxin nchakon xroxetjaja sen kichuu sen, sen nche e xra ngajin ndo Cristo, tsintekenjan sen me e xranchi kuinteken en je e sen.

¹² *Ko bikon Xjantuchjon kuintjian xjan ti ikjaon sello, ko tsango tsanga kontengí nunte. Ko chjiixro konaxixe e xranchi naa manta tiie. Ko nchanitjao konjátse xranchi ijni.

¹³ Ko nchanotsé jii ngajni kuitsinga ngata a inche xranchi ntaaj tajon tu higo tintjí tuée ntaaj, nchakon chrinto tontsjenga ntaaj.

¹⁴ *Ko ngajni kuitjáña xranchi naa xroon xeeya. Ko kain ijna ko nunte nchínchin jii ngusine ndachaon kuindoxin no bake e.

¹⁵ Ko kain xi rey jii nunte xasintajni, ni tetuan an, ni chónnda itsje tomi, xi tetuan an xi soldado, ni tsango chónnda juachaxin ko kain ni nchenche e na ixra ko ni na i, kuintekema na ngaxin in itjao* ko ti ixro ntandoá ste ijna.

¹⁶ *Ko ndache na ijna ko ixro ntandoá:

—Titsingata aninta ixi jaña tsikon ana ndo jita a trono ko Xjantuchjoen ndo Dio tsjankata ina ijié ixi tsango jitoñao xjan,

¹⁷ ixi ó kuji nchakuen ndo Dio ko Xjantuchjoen ndo sinchéña sen ijié ko, ¿ngisen tsikixin en tsango ijié juachjaon tson en?

7

Sen israelita chónda sello

¹ Tjume e bikon noó sen ángel stexin tutée sen, ngujngu sen stetsje e sen ngujngu ti noó lado chónda nunte xasintajni: ku e, níjin, retuya ko chjuya, sen me e stetingakon en sen chrinto ixi tsonchikau a chrinto ngata a inche, ngata a ndachaon ko ngata a ntaa yua.

² Ko kaxon bikon inaa ndo ángel kujxin chjuya ko chónda ndo sellue ndo Dio, ndo jichón kain nchakon. Ko ndo ángel me e séen kuyako ndo ngajin ti noó ángel kuayé e juachaxin sincheni e nunte xasintajni ko ndachaon,*

³ ko ndachro ndo:

—Nchenié anta inche, ndachaon, ko ntaa yua, tsjexinja tsakéena sello ntatjen sen nche e ixra ngajin ndo Dio.

⁴ Ko kujin an ngijan in sen tsikaa sello, ko sen me e ciento yuu ikán ko no mil, sen tsikachrjenixin ndo Israel.

⁵ Teyuu mil sen tsikaa sello tsikachrjenixin ndo Judá ko teyuu mil sen tsikachrjenixin ndo Rubén ko teyuu mil sen tsikachrjenixin ndo Gad,

⁶ teyuu mil sen tsikachrjenixin ndo Aser, teyuu mil sen tsikachrjenixin ndo Neftalí ko teyuu mil sen tsikachrjenixin ndo Manasés,

⁷ teyuu mil sen tsikachrjenixin ndo Simeón ko teyuu mil sen tsikachrjenixin ndo Leví ko teyuu mil sen tsikachrjenixin ndo Isacar

⁸ ko teyuu mil sen tsikachrjenixin ndo Zabulón ko teyuu mil sen tsikachrjenixin ndo José ko teyuu mil sen tsikachrjenixin ndo Benjamín. Kain sen ji i tikinixin sen tjanée ndo Dio ko kuayé e sen sellue ndo.

Kueya chujni steyá manta tjúa

⁹ Tjume e bikon kueya chujni tikinixin en nchijí nunte xasintajni, ko xro an ngisen chao tsekí ngijan in sen me e. Kainko tjanya ndoa ko kain tjanya nchínchin, kain ngigua stexin sen tutée sen tjenka trono ko ngajin Xjantuchjon† ko steyá sen manta tjúa ko गया itja sen stetsé sen kajne.

¹⁰ Ko kain sen séen stetoyako sen ko ndachro sen:

Ndo Dio chónda jaina,
ndo jita a ngata a trono
ko kaxon Xjantuchjon,
kuajon sen juachaxin tsechónna kain nchakon.

¹¹ Kain sen ángel stexin sen tutée sen ngandajin trono ko ngandajin sen tachrí ko ti noó sen stechón bake exin ntatuchi in sen ko kuisée sen ngata a inche ngajin trono ko kuajon sen juasaya ngajin ndo Dio

¹² ko ndachro sen:

Jaña tson en.
Tsajonna juasaya ngajin ndo Dio
ixi tsango no e ndo ko tsango tetuan an ndo
ko tikinixin tsajonna juasiajina ngajin ndo.
Ixi tikinixin xrochonde ena ndo juasaya ixi tsango chónda ndo juachaxin
ko tsango tituan an ndo,
jaña sintu una kain nchakon. Jaña tson en.

¹³ Tjume e naa sen tachríi juanchangina ko ndachro sen:

—Sen steyá manta tjúa, ¿ngisen ña?, ko, ¿tinó kuj xin sen?

¹⁴ *Ko jan an juata a:

—Nchána, ja anta no anta.

Ko je e ndo ndachro ndo:

—Sen ji i tsikj xin sen ti jii juachjaon ko tsango tangi kuatsinga sen, sen tsikijmáxin mantée ko tsikotjúáxin aséen sen ixi jnié Xjantuchjon.

¹⁵ Méxin jai ste sen tjenka trono ne e ndo Dio, ko tiie, nchakon stenche e sen ixra ngaxin in ningue ndo ko je e ndo tayakon en ndo sen ko xro an nge e tsintekon en sen.

¹⁶ Ko je e sen itsen a sen jinta ko tsen a sen inda ko xrochján i sen ixi sué nchakon, ko chjixro sinchekhján i sen kaxon.

¹⁷ Ko Xjantuchjon jii ngusine trono tayakon en ndo sen xranchi xrokjui kutuchjoen ndo, ko tsajikao ndo sen ti no jitinga inda tajon juachaxin tsechón chujni ko ndo Dio sinchexémá ndo ndakon sen.

* 7:2 ndachaon mar † 7:9 Xjantuchjon Cordero de Dio; Jesús 7:14 Mt. 24:21; Mr. 13:19.

8

Yatuxin sello

¹ Tjume e Xjantuchjon kuintjian yatuxin sello chónða xroon ko xro an nge e kuin enni ngajni xranchi tu o hora.

² Tjume e jan an bikon yaato sen ángel siin sen ngajinxin ndo Dio ko ngujngu sen kuayé e sen ngujngu itjao.

³ Ko kuñi inaa ndo ángel jitsé ndo naa i nti tsikóñaxin chika oro, kuixin tjenka altar ko kuayé e ndo itsjé tsjoxraxé tsjaaka ndo ixi ji i tsikao oración ne e kain sen tsikjan chjen en ndo Dio ko tsake e ngata a altar tsikóñaxin oro ti jii ngajinxin trono.

⁴ Ko nchie tsjoxraxé bajinxin itja ndo ángel ikjui ti jii ndo Dio ko kao oración ne e chjen en ndo Dio.

⁵ *Ko ndo ángel kua ndo i nti, nti me e juinchekaon ndo ixi xruitja jii ngata a altar ko juanka ndo i nti me e ngata a nunte xasintajni. Me e kuin enni juatee ko kongíxin ko tsango kontengí nunte.

Itjao

⁶ Tjume e sen yaato ángel, sen chónða yaato itjao*, konchjiñe e sen ixi tsanoa sen itjao me e.

⁷ Ko ndo ángel sa ó kuanoa ndo itjao chónða ndo ko kuaxi kuania ngata a nunte xasintajni tuni ko xro i tsikintekjanxin iññi. Ko iche ti nínxin parte nunte ko ntãã ko iche kain kayua.

⁸ Tjume e ti yuxin ndo ángel kuanoa ndo itjao chónða ndo ko naa nge e xranchi naa iññã iññi jiche kuitsinga ngangí ndachaon ko nínxin parte ndachaon ikjan iññi.

⁹ Ko kuen en nínxin parte kain nge e jii ngangí ndachaon ko kaxon nínxin parte kain ntãbarco kuitjãña.

¹⁰ Tjume e ti nínxin ndo ángel kuanoa ndo itjao chónða ndo ko naa nchanotsé iññi xingajinxin ngajni jiche nchanotsé xranchi naa xro i iññi kuitsinga ngata a nínxin parte ndajitinga ko ti no jítachrjetoxin inda.

¹¹ Ko nchanotsé me e ndatin in Itsjá, méxin ti nínxin parte inda kontsjá inda ko kueya chujni kuen en ixi ti kontsjá inda me e.

¹² Tjume e ti noóxin ndo ángel kuanoa ndo itjao chónða ndo ko ti nínxin parte chjiixro, nínxin parte nchanitjao ko nínxin parte nchanotsé konaxixe e ko í bingasáña i. Méxin tingasáña i chjiixro ko nchanitjao ko nchanotsé nínxin parte nchakon ko tiie.

¹³ Tjume e bikon ko kuñi an naa kutachikjan jitjanga ba ngusine ngajni ko séen jitoyako ba:

—¡Lastu, lastu, lastu sen ste nunte xasintajni nchakon tsanoa íjngo ní sen ángel tjao e sen ko ó tsaxi tsanoa sen tjao e sen jai!

9

¹ Tjume e ti naoxin ndo ángel kuanoa ndo itjao* chónða ndo ko jan an bikon naa nchanotsé kuitsingaxin ngajni ngata a nunte xasintajni ko nchanotsé me e kuayé e chika xitjeexin tuye yaso e ko naxixe e.

² Ko nchanotsé me e kuantje e tuye yaso e ko kuachrje i nchi xranchi i nchi tachrxjxin naa itja ko i nchi me e juinchekonaxixe e chjiixro ko chrinto.

³ Ko kuachrjxin i nchi me e kuchjua ko kain ba bingó ba ngata a nunte ko kuayé e ba juachaxin xranchi juachaxin chónða kulantajoon jii nunte xasintajni.

⁴ Kuetuen en ba ixi sincheni e ba kayua jii nunte xasintajni ko ninna nge e yua ko ninna ntayua. Je o sincheni e ba ni chónða i sellue ndo Dio ntatjen na.

⁵ Ko kuayé a ba juachaxin naatsóñaxón ba chujni. Je o sincheni e ba na ó nchanitjao, ko ti tsoni e na me e xranchi tsoni e ni tsijine e naa kulantajoon.

⁶ Nchakon me e chujni tsijine e ba, xrojueñaõ na xrokuen en na ko jua i tsen en na ixi ti tsen en chujni satsinge e na.

⁷ Ko kuchjua me e ste ba xranchi kunxin tikao na nchakon tẽ tẽ na, ko ngata a jaa ba chónða ba xranchi naa corona chika oro ko ikon ba tikonni xranchi ikon chujni.

⁸ Chónða ba xrajaa ba xranchi xrajaa naa nchri, ko neno ba xranchi neno kujenda.

⁹ Ko je e ba chónða ba naa chika tingakuenxin ixi xro an nge e tson en ba. Ko ti xroin nene e ba tin enni xranchi xroin itsjé carreta tingakjin itsjé kunxin nchakon itji na tinteke tẽ na.

¹⁰ Ko ntanée ba chónða ba chá a xranchi chónða kulantajoon ko ixi ché ba sincheni e ba chujni nguixin na ó nchanitjao.

¹¹ Ko xi tetuen en kuchjua me e naa ángel tikinixin en tuye yaso e ko naxixe e. Ángel me e ngigua hebreo ndatin in Abadón ko ngigua griego ndatin in Apolión ko ji i xrondachro sinchetjáña kain nge e.

¹² Ko me e juachjaon sa ó kuatsinga ko xratitjáña íjngo yuu juachjaon ijíe.

¹³ Ko ti ikjaon ndo ángel kuanoa ndo itjao chónnda ndo ko kuin an naa tée sen nichja kuachrxjxin ngusine ti noó nte e altar chika oro ti jii ndo Dio.

¹⁴ Ko ti tée sen nichja me e ndache ti ikjaon ángel kuanoa itjao chónnda ndo:

—Toxindange e ti noó sen ángel jixrite e ngande e inda jitinga tsango ijíe ndatin in Eufrates.

¹⁵ Ko xindange e ti noó sen ángel ixí naatsóñaxón sen ti nínxin parte chujni jii nunte xasintajni ixí ndo Dio jaña juinchekonchjian ndo sen ixí sinche e sen nge e kuetuen en sen hora, nchakon, nchanitjao ko nano me e.

¹⁶ Ko kuin an ngijan in ni soldado jita a kunxin e na, ni tse to, me e doscientos millones ni me e.

¹⁷ Ko jaña bikon konoxin itsjé kunxin ko ni steta a ba chónnda na naa chika ntakuin na tingakuenxin ixí xro an nge e tson en na, chika me e játse chika ko yua xranchi ngajni ko sine. Ko jaa kunxin tikonni xranchi jaa kujenda ko ro a ba tachrxjxin i nchi ko xro i ko azufre.

¹⁸ Ko ti nínxin parte chujni kuinteken en na ixí kaní nge e kuachrxjxin ro a kunxin me e xro i, i nchi ko azufre.

¹⁹ Ko juachaxin chónnda kunxin me e tachrxjxin ro a ba ko ntané ba. Ko ntané ba jii xranchi kunchee chónnda jaa me e sinchenéxin ba chujni.

²⁰ Ko chujni kuenxin a ixí i nchi, xro i ko azufre, ni me e kuintue a na juinche e na ti ndako a ko kuintue a na kuajon na juasaya ngajin Xixron anxrée ko tsango jueña na ídolo tsikóñaxin chika oro, chika plata, chika bronce, ixro ko ntaq, ídolo me e jua i tikon, tien a ko chrji a.

²¹ Ko ni me e kaxon kuintue a na ti ndako a kuanche e na, ti naabakóñaxón na chujni ko kuintue a na kuitikaon na ichin tuso ko ti chónnda na inaa nchri je a janchri e na ko ti te e kichuu na.

10

Ndo ángel ko naa xroon nchíin

¹ Tjume e bikon inaa ndo ángel tsango chónnda ndo juachaxin xingajinxin ngajni, ndo me e jitsia ndo naa itjuí ko naa kunchécha jii ngata a jaa ndo ko ikon ndo tóngixin xranchi chjiixro ko tutée ndo jitsje e xranchi xro i jiche.

² Itja ndo jitséxin ndo naa xroon nchíin jixrange e, ko tutée ndo ti jian bake e ndo ngata a ndachaon ko tutée ndo ti ikjon bake e ndo ngata a inche.

³ Ko séen kuyako ndo xranchi tojie e naa kujenda, ko ti juexin kuyako ndo, kuin enni tée yaqto juatee.

⁴ Ko juexin ndachro ti yaqto juatee, jan an ó xrokjin nge e kuin an ko tuinxin kuin an naa sen nichja jii ngajni ko ndachro:

—Tasintaxin a nge e ndachro ti yaqto juatee, ja ua tsono a ji i ko xro an ngisen xrondache.

⁵ Ko ndo ángel tsikake e naa tutée ngata a ndachaon ko naa tutée ndo ngata a inche juatsi in ndo itja ndo jian ngajni.

⁶ Ko nichjaxin ndo ixí ndo Dio, ndo jichón kain nchakon, ndo juinchekonchjian ngajni ko nunte xasintajni, ndachaon ko kain nge e jii ko ndachro ndo ángel:

—Í tsonchrjen a tson en kain ji i.

⁷ Nchakon xronichja yaqtoxin ndo ángel ko tsanoa ndo tjao e ndo, ó tsikon en kain ti tsindachro ndo Dio sinche e ndo, ti xro an ngisen kuano e ko sinche e ndo kain ti tsindache ndo sen nche e xrée ndo, sen kuachronga chijnie ndo ó sa ó.

⁸ Ti tée sen ó kuin an kujxin ngajni, íjngo nichja na ko ja in ndachro:

—Itjia ko chjijá xroon nchíin jixrange e jí itja ndo ángel kuixin ngata a ndachaon ko ngata a inche.

⁹ Tjume e ikjui ko juanchia a ndo ángel xroon nchíin ko je e ndo ndachro ndo:

—Itsé ko inte xron. Ngaya ro a tsojni xranchi tsjeen kunoa, ko ngaya tsej itsjá tsono a.

¹⁰ Jan an itsé xroon nchíin jii ngaya itja ndo ángel ko juiné xron, ko nduaxin ngaya ro a xe e xranchi tsjeen kunoa ko ngaya tse e kontsjá.

¹¹ Ko tuinxin kuituanna:

—Xrokonda xrochrja ngana íjngo nge e tson en, ti nge e sinche e ndo Dio ngajin kain tajana, kain chujni, kain ngigua ko kain xi tetuan an.

11

Yuu sen xruan an ndo Dio xrochronga nge e tson en

¹ Tjume e kuayá a naa ntáa tjatichuaxinni ko kuituanna:

—Itjia ko tjatichu a ningue ndo Dio ko altar ne e ndo ko tsje e ngijjan in sen ste nti a, sen setajon sen juasie sen ngajin ndo.

² *Ko tjatichua ia ntasién ningue ndo Dio ixi nti a tsayé e ni je a tjanéé ndo Dio, ixi tsetuen en ná tjana Jerusalén ko xrochónde a ná juasaya tjana, ní nano ko tu o.

³ Jan an xroxruan an yuu sen nche e xrána, tseyá sen manta tiie, xrochronga sen chijnina, chijni nduaxin, ní nano ko tu o.

⁴ Kayui sen me e xrochronga chijnina, sen me e kayui ntáa olivo ko kayui candelero ste ngajin ndo Dio, ndo tetuan an nunte xasintajni.

⁵ Ko siá xrojan chujni tjaun sincheni e sen, je e sen tsantsjexin sen ro a sen xro i, xro i tsjaakaxin sen chujni tjaun sincheni e sen ko tsen en ná.

⁶ Ko je e sen xrochónde sen juachaxin tsije e sen ngajni ixi tsania i ichrin nchakon xronchja sen chijnie ndo Dio ko xrochónde sen juachaxin ixi sinchekjan sen inda ijni ko sincheni e sen inche ixi itsjé ichin kain nchakon tjaun sen.

⁷ *Tjume e nchakon tsjexin xrochronga sen chijnina, chijni nduaxin, tjume e kuée Xixron anxrée tsachrxjexin ba tuye yaso e ko tse tō ba ngajin sen ko tsjacha ba naatsóñaxón ba sen.

⁸ Ko cuerpoe sen tsitsinga ti chaoé tjana ijié ti tsikoña ná Ncháina Jesús nganito ntácru, ko nti a nchekin in ná Sodoma ko Egipto.

⁹ Ko ní nchakon ko tu o, kain ni tsixin jée tjana, ni nichja jée ngigua ko nación tsikonna sen tsiken en sen jitsinga sen ko tsintue a ná sen xroxrabaa sen.

¹⁰ Ko ni nunte xasintajni juaxruxin tsintee ná tsikon ná tsiken en sen, ko sinchéña ná kia ko sinchekjton en kichuu ná itsjé nge e ixi juaxruxin ste ná ixi tsiken en sen, sen tsixruan an ndo Dio, ixi nchakon kuintee je e sen tsango tangi kuintektsinga ná.

¹¹ Ko kuatsinga kaní nchakon ko tu o, tjume e ndo Dio juinchexechón ndo kayui sen kuachronga chijnie ndo, ko bingatjen sen ko ni bikon tsango xronka ná.

¹² Ko kayui sen kuin en sen séen nichja naa ngisen jii ngajni ko ndachro:

—Tajiínta nti i.

Ko je e sen kuajin in sen ngajni, naa itjuj juinchengajin in sen. Ko kain ni kuaningakon en sen, bikon ná sen.

¹³ *Ko hora me e tsango kontengi nunte, ko texin parte tjana ijié chjenjin ko yaato mil chujni kuinteken en ná. Ko kain ni jichón, ni kuitu e, tsango xronka ná ko kuaxi ná kuitikaon ná ndo Dio jii ngajni ko kuajon ná juasie ná ngajin ndo.

¹⁴ Ná ti kon en yuxin juachjaon ko tuinxin tsij juachjaon nínxin.

Itjao yaqtuxin

¹⁵ Tjume e yatuxin ángel kuanoa ndo itjao * chónde ndo ko ngajni kuin enni séen nichja itsjé ngisen ndachro:

Kain juachaxien nunte xasintajni tikinixin en ndo Dio ko ngisen kuinche e je e ndo, me e ndo Cristo,

ndo tsetuan an kain nchakon.

¹⁶ Ko ngujngu sen ikánoó tachrii ste ngata a ntachaon en sen ngajinxin ndo Dio kuisée sen ko kuajon sen juasie sen ngajin ndo Dio.

¹⁷ Ko ndachro sen:

Ncháina ndo Dio, tsango chondanta kain juachaxin.

Ja anta ti ó sa ó bake enta, ti richónnta jai

ko ja anta tsji inta lingo.

Juasianta ixi juakonánanta kain juachaxin chondanta

ko ó kuaxinta kuetuan annta nchijíi nunte xasintajni.

¹⁸ Kain chujni ste nunte xasintajni koña ná,

ixi ó kuji nchakon ja anta sinchéñanta ijié ngajin ná

ko ngajin ni tsiken en.

Ko nchakon me e tsajonnta nge e jian ngajin sen juinche e xráanta, sen kuachronga chijnianta

ko ngajin sen titikaonnta,

chujni tsango tituan an ko chujni na i.

Ko sinchetjáñanta ni juinchetjáña chujni bake e nunte xasintajni.

¹⁹ *Tjume e xitje e ntachja ningue ndo Dio ti jii ngajni, ko ngaxin in ni ngo tikonni ti

jitjinga nge e tsiketuan an ndo Dio. Ko tsango kongíxin ko tsango juatee ko tsango kontengi nunte ko tsango kuania tuni.

12

Nchri ko kudragón

¹ Tjume e konoxin ngajni naa nge e tsango ijie ti chuxin ani: konoxin naa nchri ko manta jia nchra tóngíxin xranchi chjiixro ko chringi tutée nchra jii nchanitjao. Ko jaa nchra jita a naa corona chóna teyuu nchanotsé.

² Ko je e nchra yaa nchra ichjan ko tuyako nchra ixi tsango tiin nchra ixi ó sinchejongi e nchra chjen en nchra.

³ Kaxon konoxin ngajni naa nge e ijie ti chuxin ani: naa kudragón játse ko chóna ba yaato jaa ba ko ite nte e ba ko naa corona jita a ngujngu jaa ba.

⁴ Ko ntané ba bingajinxin ba ti ninxin parte kain nchanotsé jii ngajni ko juanka ba nchanotsé ngata a nunte ko kuíxin ba ngajinxin je e nchra ixi sine ba chjen en nchra tuinxin tsjongi e xjan.

⁵ Ko je e nchra juinchejongi e nchra naa xjan xi, xjan me e tsetuen en xjan kain tjajna jii nunte xasintajni ixi naa ntakuto chika. Tjume e kuachrje e nchra chjen en nchra, sakjui xjan ngajin ndo Dio ti tetuan an ndo.

⁶ Tjume e je e nchra sabinga nchra ntajie ko nti a ndo Dio tsijikonchjian ndo no xrobake e nchra ko nti a tayakon en ndo nchra ní nano ko tu o.

⁷ *Tjume e kuinteke to sen ángel ngajni. Ndo ángel Miguel ko sen ángel tetuen en ndo kuinteke to sen ngajin kudragón ko ni ángel tetuen en ba.

⁸ Ko ixi juacha i ba íxro an juachaxin chóna ba tsitu e ba ngajni.

⁹ *Méxin kuantsjexin ndo Dio kudragón ngajni, me e kunchee ntaxi nchekin in na Xixron anxrée. Je e xa ncheye e xa chujni ste nunte xasintajni. Je e xa ko kain ni ángel tetuen en xa kuitsinga ngata a nunte.

¹⁰ Tjume e kujn an naa sen séen nichja ngajni ndachro sen:

—Ó kuji juachaxien ndo Dio na ina tsantsje ndo ijie ko kuji juachaxin tsetuan an ndo Cristo ixi ó kuachrjexin ngajni Xixron anxrée tjankata a ijie ngajin sen kichuuna, tiie, nchakon, je e xa tankata a xa ijie ngajin sen, ngajinxin ndo Dio na ina.

¹¹ Sen kichuuna juacha sen ngajin xi me e ixi jnié Xjantuchjon* ko ixi chronga sen chijni kuayé e sen ko xronka i sen maski xrokuen en sen.

¹² Méxin jai juaxruxin tsintee kain sen ste ngajni. Ko lastu sen ste ngata a nunte xasintajni ko kain ti jichón chringi ndachaon ixi Xixron anxrée tsango koña xa ixi xingajinxin xa ngajni ixi ó no e xa íxro an itsjé nchakon chóna xa.

¹³ Ko ti kono e kudragón ixi ó kuitsinga ba ngata a inche, kuaxi ba rué e ba nchri tsijinchejongi e xjan xi.

¹⁴ Ko ndo Dio kuajon ndo yuu nenechaan kutachikjan ngajin nchra ixi chao tsjanga nchra satsinge e nchra kudragón, satsji nchra ntajie ti no tsikasinchjian ndo Dio ko nti a tayakon en ndo nchra ní nano ko tu o.

¹⁵ Ko kudragón tsango yee inda kuantsjexin ro a ba ko juinchéña ba naa indajitinga ixi jaña tsingakjin inda nchri me e.

¹⁶ Ko inche bingjna nchra ixi xitje e nche, nti a bikia inda kuachrjexin ro a kudragón.

¹⁷ Tjume e tsango koña kudragón ngajin nchra, méxin ikjui ba kueto ba ngajin ni kichuu nchra, ngajin sen titikaon nge e tsiketuan an ndo Dio ko xratitikaon sen chijnie ndo Jesucristo.

¹⁸ Ko ti kudragón chón en ba ngande e ndachaon.

13

Yuu iko jie e tsango chjinga ste

¹ *Hora juasin ngande e ndachaon, bikon kuachrjexin ndachaon naa iku tsango chjinga jii, iku me e chóna ba yaato jaa ba ko ite nte e ba, ko ngujngu nte e ba chóna naa corona ko ngujngu jaa ba chóna naa chijni nichjangi e ndo Dio.

² Iku tsango chjinga jii bikon jii ba xranchi naa kutigre ko tutée ba ste xranchi tutée kuoso ko ro a ba jii xranchi ro a kujenda. Ko kudragón kuajon ba kain juachaxien ba ngajin iku tsango chjinga jii.

³ Ko naa jaa iku tsango chjinga tsango tsikoni e, xraxrokuenxin ba ixi ti tsikoni e me e, ko ó tsikoxruen en ba. Ko kain chujni ste nunte xasintajni tsikikon na ixi tsikoxruen en ba, méxin juaxruxin rué e na ba.

⁴ Ko kuajon na juasaya ngajin kudragón ixi je e ba kuajon ba juachaxin ngajin iku tsango chjinga jii, ko kaxon kuajon na juasaya ngajin iku tsango chjinga jii ko ndachro na:

— ¿Ngisen xrokjui xranchi iku tsango chjinga ko ngisen xrojuacha ngajin ba?

⁵ Ko iku tsango chjinga kuayé e ba juachaxin xronichjangí e ba ndo Dio ko kain nchakon tsetuan an ba yuu kán ko yuu nchanitjao.

⁶ Ko jaña juinche e ba, nichjangí e ba ndo Dio ko nichjangí e ba xranchi tin in ndo ko ti jii ndo ko kain sen ste ngajin ndo.

⁷ Kaxon tsikayé e ba juachaxin tsetoka o ba sen titikaon ndo Dio ko tsjacha ba tsetuen en ba sen, ko kuayé e ba juachaxin tsetuen en ba kain chujni, kain tjajna, kain ngigua ko kain nación.

⁸ Kain ni nunte xasintajni kuajon na juasaya ngajin iku tsango chjinga jii, kain ni jitaxin a xranchi tin in na ngaya xroon ti jitaxin kain sen tsechón kain nchakon ti xrako a nunte xasintajni, me e xroen Xjantuchjon, Xjantuchjon tsikajon ndo Dio kuen en.

⁹ Ngisen chao tsin en, xrokonda tsin en sen.

¹⁰ Ni tije e ndo achjiso inaa chujni, kaxon je e na tikiñixin tsije e na ko ni naatóñaxón naa chujni ixi chika espada, kaxon je e na chika espada tsenxin na. Ji i xrondachro ixi sen tjajnée ndo Dio tsikixin en sen tsatsinga sen kain ti tangi ko tsintue a sen xrochuntia sen ndo Dio.

¹¹ Tjume e bikon kuachrjetaon inche inaa iku tsango chjinga jii, chóna ba yuu nte e ba xranchi nte e kutuchjon ko nichja ba xranchi nichja kudragón.

¹² Iku yuxin tsango chjinga jii chóna ba kain juachaxin xranchi juachaxin kuachóna iku sa ó ko kuanche e ba xreé iku chjinga jii sa ó. Nchekateya ba kain chujni jii ngata a nunte xasintajni xrokuajon na juasaya ngajin iku tsango chjinga jii sa ó, iku tsikoxruen en ti tsikoni e ba.

¹³ Kaxon juinche e ba itsjé ixra ijié xranchi ti xingajinxin ngajni xro i ngata a inche ngajinxin ikon kain chujni.

¹⁴ Iku yuxin tsango chjinga jii juincheye e ba itsjé chujni ixi ti ixra ijié juinche e ba ixi tsikayé e ba juachaxin tsikajon iku sa ó tsango chjinga jii, ko juinchekateya ba chujni ixi sinchéña na naa tjatu o xrotsje e xranchi jii iku sa ó, iku tsikoni e ixi chika espada ko kuen a ba.

¹⁵ Ko iku yuxin tsango chjinga jii kuayé e ba juachaxin ixi tjatu o tikonni xranchi iku sa ó tsjinchekonchjian chujni, tsayé e juachaxin tsechón ixi jaña chao xronichja ba ko chao tsetuan an ba ixi tsen en kain ni tsajon a juasaya ngajin ba.

¹⁶ Kaxon kuetuan an ba ixi kain chujni xrochóna na naa chji e na, itja na ti jian o ntatjen na, kain chujni, ijié ko ichjan, ni chóna tomi, ni nóa ko ni nchejinche e na ixra, ko ni tetuan an, kain na xrochóna na chji e na.

¹⁷ Ko xro an ngisen chonda juachaxin tse na o sinchekji siá chóna i na chji e na, ti xrondachro xranchi tin in iku tsango chjinga jii o númeroe ba.

¹⁸ Ji i xrokonda ícha xrokuixninnta. Ngisen tienxin chao xrokono e sen número chóna iku tsango chjinga jii ko número me e xrondachro xranchi tin in chujni, número me e ikjaon ciento sesenta y seis (666).

14

Soon xrotsje ciento cuarenta y cuatro mil chujni

¹ *Tjume e jan an bikon Xjantuchjon jixin tutée xjan ngata a ijna Sión. Nti a jikao ndo ciento cuarenta y cuatro mil chujni jitaxin ntatjen sen nombre Xjantuchjon ko nombre Ndotée ndo.

² Ko kujn an naa ngisen nichja, té sen kujxin ngajni, tin enni xranchi xroin yee inda jitinga o xranchi séen tjateé, ko xranchi tin enni ti ste kueya sen, sen stetinga sen arpa.

³ Ko stetsje sen naa soon natjuá tjenka trono, ti ste noó sen jichón ko sen ikán ko no tachrri. Xro an ngisen chóna juachaxin chao xrotsje soon me e; je o sen ciento cuarenta y cuatro mil, sen tsikayé e juachaxin tsechón kain nchakon ti xrabake e sen nunte xasintajni.

⁴ Sen ji i ó kuachóna i sen inaa nchri je a janchri e sen ko tsango tjúa aséen sen, ko kuarue e sen Xjantuchjon nguixin ti no bakaji ndo. Sen ji i kuinche e ndo Dio sen xranchi naa nge e sa ó xrokuayé e ndo ko Xjantuchjon.

⁵ Je e sen nai a juincheya sen ko xro an nge e ti ndako a juinche e sen, je e sen tjúa aséen sen.

Nge e chronga ní sen ángel

⁶ Tjume e bikon inaa ndo ángel jitjanga ngusine ngajni jichrónga ndo chijni jian, chijni nai a tsjexin, ti tsin en kain ni nunte xasintajni ko tsin en kain naci6n, kain chujni, kain ngigua ko kain tjanya.

⁷ Ndo ángel me e séen kuyako ndo ko ndachro ndo:

—Xrakuen anta ndo Dio ko tájonnta juasaya ngajin ndo ixi ó kuji nchakon sinchéña ndo ijie. Tájonnta juasaya* ngajin ndo, ndo juinchéña ngajni ko nunte xasintajni ko ndachaon ko no jitonoxixin inda.

⁸*Tjume e kuji inaa ndo ángel, ko ndachro ndo:

—Ó kuitjáña, ó kuitjáña tjanya Babilonia, tjanya ijie. Ni tjanya me e juincheateya kain naci6n xrokui i na vino, ko tjume e juinche e na kain ti ndako a, ti ch6nda na inaa nchri je a janchri e na.

⁹ Tjume e konoxin ndo ángel n6nxin ko séen nichja ndo:

—Siá xrojan ngisen tsajon tsuasaya ngajin iku sa ó tsango chjinga jii ko ngajin tjatu o tsikachrjeya ba o kaxon siá tsituexin na tsayé e na chji e ba ntatjen na o itja na,

¹⁰ méxin tsayé e na kain juañaue ndo Dio ko tsango tangi tson en na. Tsikaonxin na ngajinxin sen angéel ndo Dio ko ngajinxin Xjantuchjon ixi xro i ko ixi azufre jiche.

¹¹ I nchi tachrxjin xro i nai a tsjexin nchi. Kain nchakon tsajin in i nchi ko ni kuitikaon iku sa ó tsango chjinga jii ko tjatu o tsikachrjeya ba ko kaxon ni jitaxin ngata a xranchi tin in ba, tiie, nchakon jua i tsjoké e na.

¹² Méxin nchakon tsji ji i xrokonda sen titikaon ndo Dio tsikixin en sen tsatsinga sen kain ti tangi, ko tsintue a sen xrochuntia sen ndo ko tsitikaon sen nge e kuetuan an ndo ko xrokonda tsjako sen ixi chuntia sen ndo Jesús.

¹³ Tjume e kuin an naa tée sen nichja kuixin ngajni ko ndachro:

—Ikjian ji i: “Jai xrangixin juaxrxin tsake e sen titikaon Ncháina ko tsen en sen.”

Jaán, ndachro Espiritue ndo Dio, ixi je e sen tsjoké e sen, ísinche a sen ixra tangi kuanche e sen ixi ndo Dio tsjenge e ndo sen na ixi ti jian ixra juinche e sen.

Xrangixin xroxra nge e k6ña ngata a nche

¹⁴ Tjume e bikon naa itjuj tjúá ko nti a jita a naa ndo jitsje e xranchi Chjen en ndo Dio, xjan jongí e xranchi chujni, ko naa corona chika oro jita a jaa ndo ko yaa ndo naa joso tsango yao.

¹⁵ Tjume e inaa ndo ángel kuachrjexin ndo ni ngo ko séen nichje e ndo ngisen jita a itjuj ko ndachro ndo:

—Tjangixian tonchrijian ixi joso ixi ó kuji nchakon tsandáa ixi ó tsicha nge e tsikoña nunte xasintajni.

¹⁶ Ko ndo jita a itjuj juinchekatsinga ndo joso nguixin nunte xasintajni ko juá ka ndo nge e tsikoña.

¹⁷ Tjume e inaa ndo ángel kuachrjexin ndo ni ngo jii ngajni ko kaxon tikao ndo naa joso tsango yao.

¹⁸ Ko ti altar kuachrjexin inaa ndo ángel, ndo me e tetuan an ndo xro i ko séen ndache ndo ndo ángel ch6nda joso yao:

—Tonchrijian ixi joso yao itsje tu uva tsikoña nunte xasintajni ixi ó tsichje itu.

¹⁹ Ko ndo ángel juinchekatsinga ndo joso ngata a nunte ko konchrijin ndo tu uva tsikoña nunte ko bengachjian ndo tu ti no tseeneni tu. Ji i xrondachro, ndo Dio toña ndo ngajin chujni.

²⁰*Ko kuayáa na tu uva ngande e tjanya ko ti no kuenexin na tu kuachrjexin tsango yee ijni, kuji ijni noi ti jikaxin chika teya ro a kunxin ko ní ciento kil6metro binga ijni.

15

Yaato ángel ko yaato ichin tsjexixin tsonixin chujni

¹ Bikon ngajni inaa ixra ijie: yaato ndo ángel ch6nda ndo juachaxin ngajin yaato ichin tsonixin chujni nunte xasintajni. Ji i xrondachro tsango jitoña ndo Dio.

² Kaxon bikon naa nge e xranchi naa ndachaon tsikjan xranchi xroxrao tsintekjanxin ixi xro i. Tjenka nti a siin sen juacha kuatsinga kain nge e juinche e iku tsango chjinga jii ko ti tsikachrjeya xranchi je e ba ko kaxon número xranchi tin in ba. Sen me e siin sen ngata a ndachaon ko stetsé sen arpa tsikajon ndo Dio ngajin sen.

³ Ko itsje sen soon kuantsje ndo Moisés, ngisen juinche e xree ndo Dio, ko sóen Xjantuchjon, ndachro:

Tsango ijie nge e nche enta

ko tsango jian kain nge e tsijinchéñanta.

* 14:7 juasaya respeto, honor 14:8 Ap. 18:2. 14:20 Ap. 19:15.

Ja anta Nchána ndo Dio, ndo chóna kain juachaxin.

Ndako ko nduaxin chao nche enta kain nge e.

Ja anta Rey tetuan annta kain nchakon ngata a nunte xasintajni.

⁴¿Ngisen xroxrakon a ngajinnta, Nchána?

¿Ngisen tsajon a juasaya ngajin ja anta?

Je o ja anta tsango tjúanta.

Kain ni nchiji nunte xasintajni tsajon na juasaya ngajinnta

ixi bikon na kain ixra jian tsijinche enta.

⁵Tjume e bikon ngajni ko nti a xitje e ni ngo ti jitinga nge e tsiketuan an ndo Dio.

⁶Ko ni ngo kuachrxexin yaato ndo ángel tikao sen yaato ichin. Steyá ndo manta tjintee tjúá ko chaxro tóngixin ko steyá ndo cinta chika oro.

⁷Naa sen noó stehón kuajon naa copa jitjiá vino kuayé e nguingu yaato ndo ángel, ko yaato copa me e xrondachro ti toña ndo Dio, ndo jichón kain nchakon.

⁸Ko ngaxin in ni ngo kaon i nchi ti ti xin ti ijié juachaxin chóna ndo Dio ko xro an ngisen chóna juachaxin tsatsinga ngaxin in ni ngo tsatsingaja ti yaato ichin tikao ti yaato ndo ángel.

16

Yaato copa tjinga juañaue ndo Dio

¹Kujin an naa téé sen nichja tsango séen kujxin ni ngo, ko ndache sen yaato ndo ángel:

—Itjinta ko tjintjinta ngata a nunte xasintajni ti jitjiá yaato copa juañaue ndo Dio.

²Tjume e ndo ángel sa ó kujni ndo ko kuintji ndo ti jitjiá copee ndo ngata a nunte xasintajni ko ngata a kain chujni chóna chji e ne e iku tsango chjinga jii, ko ni bakajon juasaya ngajin ti tjatu o tsikachrjeya ba, ko ti tjia copa me e naa ichin ña i ko tsango ixra chin.

³Ndo ángel yuxin ikjui ndo ko kuintji ndo ti jitjiá copee ndo, ngata a ndachaon ko ndachaon ikjan inda ijni, xranchi jnié naa ti tsiken en ko kain nge e jichón ngangí ndachaon nda kuen en.

⁴Ko ndo ángel nínxin kuintji ndo ti jitjiá copee ndo ngata a ndajitinga ko ngata a ti no jitonoxixin nda ko ikjan nda ijni.

⁵Tjume e kujin an nichja ndo ángel tetuen en inda ko ndachro ndo:

—Ndo Dio jian ja anta. Nchána tsango tjúá ja anta, ndo Dio, ndo jichón sa ó ko ndo jichón jai ko ndo jian nchéña ijje,

⁶ixi ni ningakon annta kóna na sen kuachronga chijnianta ko sen tjúá aséen, méxin jai ja anta tájonnta ijni tsi i na ixi kondeexin ti ndako a juinche e na.

⁷Kaxon kujin an téé naa sen kujxin altar ko nichja sen:

—Ja anta nduaxin Ncháina, ndo Dio, ja anta chondanta kain juachaxin ko jian ko ndako nchéñanta ijje.

⁸Tjume e ndo ángel noóxin kuintji ndo nge e jitjiá copee ndo ngata a chjiixro, ko chjiixro kuayé e juachaxin sinchehján kain chujni ixi xro i.

⁹Kain na tsango ichján na ko maski jaña kuintekon en na, kuitikaon a na ndo Dio ko kuajon a na juasaya ngajin ndo; cháña nichjangí e na xranchi tin in ndo, ndo chóna juachaxin ngata a kain ichin me e.

¹⁰Tjume e ndo ángel na óxin kuintji ndo ti jitjiá copee ndo ngata a trono ne e iku tsango chjinga jii. Tjume e ti no baketuanxin iku tsango chjinga jii, nti a konaxixe e. Ko chujni juinetja na nejan na ixi tsango tiín na.

¹¹Ko ixi tsango tiín na ko tsango tangi kon en na, ni me e kuintue a na ti ndako a banche e na ko ícha nichjangí e na ndo Dio, ndo jii ngajni.

¹²Tjume e ndo ángel inkjaoxin kuintji ndo ti jitjiá copee ndo ngata a ndajitinga ijje ndatin in Eufrates. Ko nda me e xema inda ixi chao tsintekatsinga xi rey tsj xin chjuya.

¹³Ko bikon ixi ro a kudragón, ro a iku tsango chjinga jii ko ro a xi ndako a bajako kuachrxexin ní espíritu ña i tikonni xranchi kurrána.

¹⁴Espíritu ji i, espíritu Xixron anxrée kuanche e ixra ijie. Kuintekachrje espíritu ji i ixi tsja o kain xi rey ste nunte xasintajni ixi tsj to xa nchakon ndo Dio sinchéña ndo ijje ngajin kain chujni, ni ste nunte xasintajni.

¹⁵*Méxin ndo Dio ndachro ndo: “Jan an ó tuinxin tsji i xranchi naa xiche e. Juaxrxin tsintee sen teja i ko steyá mantée sen ko je a turuchu ste sen, ixi jaña tsosue a sen ixi turuchu ste sen.”

¹⁶Ko espíritu ña i jua o kain xi rey nunte ndatin in Armagedón, ngigua Hebreo xrondachro ji i.

¹⁷ Tjume e yatuxin ndo ángel kuintjé nge e jitjiá copee ndo ngataon chrinto, ko ngaxin in ni ngo jii ngajni kuin enni naa té sen nichja tsango séen ndachro:

—Ó juexin kon en kain nge e.

¹⁸ *Ko kongixin ko kuin enni tsango séen juatee ko tsango kontengí nunte xranchi nai a bikon chujni kontengí nunte.

¹⁹ Ti tsango soji kontengí nunte ní xitje e inche tjajna Babilonia ko kain tjajna jíé ste nunte xasintajni chjenjin tjajna. Ko ndo Dio xraxaon ndo ixi xrojuinchení e ndo ni tjajna Babilonia ko tsango juincheni e ndo na ixi tsango koñaó ndo ngajin na.

²⁰ *Ko kain nunte ste ngusine ndachaon ko ijna naakuitjáñaxón.

²¹ *Ko ngajni kuaniaxin tuni tsango ndantua, xranchi yuu kán kilo yexin ngujngu tuni. Ko chujni ícha nichjangí e na ndo Dio ixi jaña kon en, ixi xratja na tuni.

17

Tsikaon nchri chóna itsjé xi

¹ Ti yaḡo ndo ángel chóna yaḡo copa, naa ndo me e ndachro ndo:

—Xrokuia ko tsjako a xranchi tsikaon nchri chóna itsjé xi, nchri jii ngata a ndachaon.

² Xi rey tetuan an nunte xasintajni kuejuakao xa nchra, juinche e xa ti ndako a ko ni nunte xasintajni koanxin na ixi vino tsikajon nchra ngajin na ko ndakua i juinche e na.

³ *Tjume e Espiritue ndo Dio juinchenoxin ndo naa nge e bikon ko ndo ángel biki an ndo ntajie ko bikon naa nchri jita a naa iku játse tsango chjinga jii, ko nchijii ba jitaxin chijni nichjangéxin na ndo Dio ko chóna ba yaḡo jaa ba ko ite nte e ba.

⁴ Ko je e nchra já nchra manta tiie játse ko kaxon játse, ko tsikitojin nchra kueya nge e tsikónaxin chika oro ko ixro chaxro tsango tjintee ko kaxon ixro perla. Ko ngaya itja nchra já naa copa chika oro jichrexin ijie ko ti ndako a ko kain ti ña i tsijinche e nchra.

⁵ Ko ntatjen nchra jitaxin naa chijni xro an ngisen tienxin ko ja in jitaxin: “Tjajna ijié ndatin in Babilonia, me e xrokjui xranchi janée kain nchri tejuakao itsjé xi ko kain ni nche e ti ndako a jii nunte xasintajni.”

⁶ Ko bikon ixi je e nchra tsikaon nchra ixi jnié kain sen titikaon ndo Dio ko sen tsiken en ixi kuachronga sen ti titikaon sen ndo Jesús. Ti bikon ji i tsango juinhexronkana.

⁷ Tjume e naa ndo ángel ndachijina ndo:

—¿Sonda xronka? Jan an xrontatjua nge e xrondachro ti nchri ji i ko ti iku tsango chjinga jii jita a nchra chóna ba yaḡo jaa ba ko ite nte e ba, ji i xro an ngisen no e.

⁸ *Iku tsango chjinga jii bikuan ó seno bake e ba ko jai íko a ba. Ko iku me e ó mero tsachrexin ba tuye yaso e ko ti naxixe e ko je o tsachre ba ixi ndo Dio sinchetjáña ndo ba. Ko ni ste nunte xasintajni, ni jitaxin a xranchi tin in na ngaya xroon, xroon ó jitaxin xranchi tin in sen tsehón kain nchakon, xroon me e ó jii xroon nchakon xro an nge e bake e ngata a nunte xasintajni, je e ni me e xroxronka na hora tsikon na ba lingo iku tsango chjinga jii; iku me e ó seno bake e ba, ko jai ko a ba ko xrokjan tsii ba.

⁹ Ngisen chao tsienxin ji i xrokonda jian tsienxin sen: Ti yaḡo jaa ba xrondachro ti yaḡo ijna jita a nchri chóna itsjé xi.

¹⁰ Ko kaxon ti yaḡo jaa ba xrondachro yaḡo xi rey, ko na ó xi rey me e ndakuen en xa ko naa xi rey xrajitetua an xa ko í naa xi rey xrati a xa. Ko nchakon tsii xi rey me e, tsjé a nchakon tsetuan an xa.

¹¹ Ko iku tsango chjinga jii ó bake e ba seno ko jai tikon ani ba, me e ti jnixin xi rey; je e xa tikinixin en xa ti yaḡo xi rey ko xi me e tsitjáña xa.

¹² Ko ti ite nte e ba bikuan me e ite xi rey xrati a nchakon tsinteketuan an xa. Ko tjume e tsintekayé e xa juachaxin, xranchi naa hora tsetuan an xa ko kaxon tsetuan an iku tsango chjinga jii.

¹³ Kain ite xi rey ji i naakua naa nge e xrondachro xa ixi tsajon xa juachaxin ícha tsetuan an iku tsango chjinga jii.

¹⁴ Kain xi me e tseto xa ngajin Xjantuchjon ko Xjantuchjon* tsjacha xjan ngajin kain xi me e ixi je e ndo Nchée kain chujni ko je e ndo naa Rey tetuen en kain xi rey. Ko sen ste ngajin ndo, ndo Dio tsikiye e ndo sen ko kuinche e ndo sen, ko sen me e jian chuntia† sen ngajin ndo.

¹⁵ Kaxon ndachijina ndo ángel:

—Ndachaon bikuan, nda jita a nchri chóna itsjé xi, me e xrondachro kueya tjajna, kueya chujni, kueya nación ko kueya ngigua.

¹⁶ Ko ti ite[‡] nte e iku tsango chjinga jii bikuan ko je e ba xraningakon en ba nchri chónda itsjé xi, tsjánka ba nchra ko sinchetorucho ba nchra ko sine ba ntau e nchra ko tsjaaka ba nchra ixi xro i.

¹⁷ Ixi ndo Dio bake e ndo ngaya aséen kain xi rey me e sinche e xa ti tjaun je e ndo, jaña naakua nge e xrondachro xa ixi tsajon xa juachaxien xa ngajin iku tsango chjinga jii, ti xroxetjaja nchakon tson en kain nge e tsindachro ndo Dio.

¹⁸ Nchri bikuan, me e tjajna ijíe tetuen en kain xi rey jii nunte xasintajni.

18

Kuitjáña nchijí tjajna Babilonia

¹ Tjume e bikon inaa ndo ángel xingajinxin ndo ngajni, je e ndo tsango chónda ndo juachaxin, ko nunte xasintajni tsango bingasáña ixi tóngixin ndo ángel me e.

² *Ko tsango séen kuyako ndo ángel ko ndachro ndo:

—Kuitjáña, ó kuitjáña tjajna ijíe, tjajna Babilonia. Nti a ikjan ndo a ni ña i ko nti a jii kain espíritu Xixron anxrée. Nti a ste kakée iko ña i, iko tjanga ko tsango tonchi eni.

³ Kain tjajna koanxin na ko juinchetjáñajin na ixi vino ndakoa juinчекji nchra, ko kain xi rey nunte xasintajni kuejuakao na nchra juinche e na ti ndako a. Kain ni te na ko nchekji itsjé juacha na me juinchetjáña aséen na.

⁴ Tjume e kuin an inaa ngisen nichja tée kuixin ngajni ko ndachro:

—Tachrxjinnta ña ixi ja anta titikaonntana ixi tsama inta jíee na ko ja anta tsikaon anta ko xro an nge e tson annta xranchi tson en je e na.

⁵ Ixi tsango itsjé ti ndakoa juinche e nchri me e, ko kuiji ijíe me e ngajni. Kain ti ndako a kain ña i kuanche e nchra, méxin koña ndo Dio ixi xraxaon ndo kain ji i.

⁶ Chje énta nchra xranchi je e nchra juinche e nchra ngajin ikaxin na. Kain ti juinche e nchra yuu tjenge enta nchra na. Ko ti copa juinчекonchjian nchra ixi vino ndakoa, jaña yuu tikie enta nchra kaxon.

⁷ Je e nchra tsango juinचेjié aséen nchra ixi kuachónda nchra kain nge e tjaun nchra, méxin jai ícha ijíe juachjaon tsatsinga nchra ko tsango xrotsjanga nchra. Ixi je e nchra ndache aséen nchra: “Nti i ritjén xranchi naa nchri tsango tituan an, ixi je a kán ana ko nai a tsikon ti tangi.”

⁸ Méxin naakua nchakon tsii kain juachjaon ngata a nchra, ko tangi tson en nchra, juachjaon ko jinta tsatsinga nchra ko tjume e xro i xrochexin nchra ixi Ncháina ijíe juachaxin chonda ndo ko sinchéña ndo ijíe ngajin nchra.

⁹ Kain xi rey ste nunte xasintajni, xi kuejuakao nchra ko kaxon juinche e xa ti ndako a xranchi je e nchra, chinga tsono e xa ko xrotsjanga xa ko tsuyako xa ixi tsikon xa i nchi jitachrje ti jichexin nchra.

¹⁰ Xroxronka xa méxin ikjin tsikonxin xa xranchi jitikaon nchra ko tsuyako xa ko xrondachro xa:

—Lastua ja a tjajna ijíe, tjajna Babilonia, tjajna tsango baketuan an. Lastua ixi tsango taka kuitjáña juachaxin kuachonda ja a, ixi naakua hora tsonchrjen en ti tsjenga na ja a ixi nge e juinche e.

¹¹ Ko ni te na ko ni nchekji xrotsjanga na ko tsuyako na ixi tjajna me e, ixi xro an ngisen tse na na nge e kuanчekji na,

¹² chika oro, chika plata ko ixro tjintee ko chaxro tsje e, ixro perla, manta lino tsango chaxro, manta seda játse tiie ko kaxon kain ntaa, ntaa chaxro xraxe ko nge e tsikóñaxin neno kuelefante, chika ko chika bronze ko ixro mármol.

¹³ Kaxon ntaa canela ko xroan chaxro xraxe, tsjoxraxé, xroan mirra, vino, aceite, kueen jian tsikontsinga, ko noa trigo ko kutama, kutuchjon, kunxin, carreta, ko chujni nchenche e na xra.

¹⁴ Ko xrondache na tjajna me e tjajna Babilonia:

—Í chonda ia kain nge e tjintee kuachonda ko kain ti icha tjakuenxian, ko juinchetjáña kain ti tjintee kuachonda, ko ínai a tsinchia.

¹⁵ Kain ni bakena a nge e kuachonda, ni juacha itsjé tomi ixi nge e bake na na ko nge e banchekjina ngajin tjajna me e, ikjin tsikonxin na kain juachjaon tson en tjajna me e ko xroxronka na. Xrotsjanga na ko tsuyako na.

¹⁶ Ko ja in xrondachro na:

—Lastu tjajna ijíe. Tjajna bake e xranchi naa nchri tsikitsá ixi manta lino tsango chaxro, manta játse tiie ko tsikitsojin nchra ixi ntachika oro ko ixro tsango chaxro ko tsango tjintee ko xro perla.

¹⁷ Naakua hora kuitjáña kain nge e tjintee kuachónda nchra.

Ko kain ni teka ntábarco, ni bakjixin ntábarco ko ni nche e ixrā ngaya ntāq me e, ikjin kuixin nā.

¹⁸ Ko nchakon bikon nā i nchi kitachrje ti jiche tjanya, kuyako nā:

—¿Ngixe e íjngo tjanya bake e xranchi tjanya ijíe ji i?

¹⁹ Ko bikitée nā nteso ki i ngata a jaa nā ko tsango juincheni e nā, méxin tsango kuyako nā ko tsjanga nā ko ndachro nā:

—Lastu tjanya ijíe tjanya Babilonia. Nti a chujni kuachóna ntábarco tsango itsjé tomi juacha nā, ixi tjanya me e itsjé ti tjintee kuachonda tjanya ko jai naakua naa hora ó naajuexinxion kuitjáña kain nge e.

²⁰ Juaxruxin tinteenta ja anta ti tjúá asáanta ko sen ste ngajni sen kuarue e Ndo ko sen kuachronga chijnie ndo Dio ixi je e ndo ó juankata a ndo ijíe ngajin tjanya me e, ixi jaña ó kóna anta ijie.

²¹ Tjume e naa ndo ángel chóna ijíe juachaxin kua ndo naa ixro tsango ijíe xranchi naa xrochri, ko juanka ndo xro chringi ndachaon ko ndachro ndo:

—Jaña naxrajeo tsitjáña tjanya Babilonia, tjanya ijíe ko ínai a tsikon chujni tjanya me e.

²² Nai a tsin enni suen arpa, ko suen ntaxro, suen itjao* ngaya chaoa, ko nai a tsikonni chujni nche e xrā ngajian ko kaxon nai a tsin enni xranchi xroin xrochri nchetsinga ngajian.

²³ Ko ínai a tsingasáña xro i ngajian ko nai a tsin enni tsute e chujni nti a. Ixi ni bakena a nge e juinчекjia, ni tsango baketuan an nunte xasintajni ixi itsjé tomi juacha nā ko ixi ichin tuso juinчeyexin nā kain nación.

²⁴ Ko nti a kuchuexin jnié sen tsiken en, sen kuachronga chijnie ndo Dio, ko sen tjúá aséen ko sen kuarue e ndo ko kain ni kuinteken en kondeexin tjanya ji i, ni kuintee ngata a nunte xasintajni.

19

Itsje sen ngajni

¹ Ko kuatsinga ji i, tjume e kuin an nichja kueya chujni ste ngajni ko séen nichja sen, ndachro sen:

¡Juasaya!

Juasie ndo Dio ixi je e ndo kuajon ndo juachaxin stechónna

ko je e ndo tsango tetuan an ndo.

² Ixi je e ndo tsango jian ndo

ko jian nchéña ndo ijíe;

méxin juinчejenga ndo nchri kuejuakao kueya xi ixi tsango ndako a juinche e nchra,

ixi je e nchra juinчekateya nchra itsjé chujni nunte xasintajni,

méxin ndako a juinche e nā,

ko ndo Dio jai juenge e ndo

ixi kondeexin nchra kuen en sen kuanche e xrā ngajin ndo.

³ Ko íjngo ndachro sen:

—¡Juasaya! ¡Juasie ndo Dio! Ixi i nchi jitachrexin ti jiche nchra nai a tsjexin tsachrje nchi.

⁴ Tjume e sen ikán no tachrri ko sen noó stechón bake exin ntatuchi in sen ko kuisée sen, ko kuajon sen juasaya ngajin ndo ndo Dio ndo jita a trono ko ndachro sen:

—¡Jaña tson en! ¡Juasaya ko juasie ndo Dio!

⁵ Tjume e kuin an tée naa sen nichja kuixin ti jii trono ko ndachro:

Tájonnta juasaya ngajin Ndotáina Dio,

kain sen nche e xréé ndo,

kain sen jo on ko kain ichjan.

Kia ixi tsute e Xjantuchjon

⁶ Kuin an xranchi xronichja kueya chujni, xranchi tin enni xroin ye e inda jitinga ko xranchi ti séen tjateé jindachro:

—¡Juasaya! Juasie Ncháina Dio,

ixi ó kuaxi tetuan an ndo,

ndo chóna kain juachaxin.

⁷ Juaxruxin tsojuna,

ko xroché e aséejina

ko chaxro tsajonna juasaya ngajin ndo

ixi ó kuji nchakon tsute e Xjantuchjon.

Ko jan tsute e xjan ó tsikonchjian jan.

⁸ Ko je e jan kuayé e jan juachaxin tsísáa jan manta lino chaxro tjúá ko chaxro tóngixin.

* 18:22 itjao Trompeta

Ko manta lino me e xrondachro ti jian juinche e sen tikinixin en ndo Dio.

⁹*Tjume e ndo ángel ndachijina ndo:

—Ikjian ji i: “Juaxruxin tsintee sen kuayé e juachaxin tsake e sen ti kia tsute e Xjan-tuchjon.”

Ko ja in ndachro ndo ángel:

—Ji i ndachro ndo Dio, ko kain ti ndachro ndo me e nduaxin.

¹⁰ Tjume e jan an bake xin ntatuchi in tutée ndo ángel ixi tja on tsajon juasaya ngajin ndo, ko je e ndo ndachro ndo:

—Nche a jaña ixi jan an kaxon nta a xra ngajin ndo Dio xranchi ja a, ko xranchi sen kichuua sen kuintue a kuitikaon chijni jian chronga ndo Jesús. Je o tájuan juasaya ngajin ndo Dio.

Ixi je e ndo Jesús, me e xrondachro ti kuachronga sen kuanichja ó sa ó chijnie ndo Dio.

Ndo jita a naa kunxin tjúa

¹¹ Tjume e jan an bikon jixrange e ngajni ko nti a jii naa kunxin tjúa, ko ndo jita a ba ndatin in ndo tsango Jian ko Nduaxin, ixi je e ndo jian nchéña ndo ijie ngajin chujni ko tē to ndo ngajin ti ña i.

¹² Ikon ndo jitóngixin xranchi xro i, ko jaa ndo jita a kueya corona ko nti a jitaxin xranchi tin in ndo ko je o je e ndo tienxin ndo me e.

¹³ Jitsáa ndo naa manta yaa ijni ko ti xranchi tin in ndo me e xrondachro Chjen en ndo Dio.

¹⁴ Ko sen ángel tē to ste ngajni tikinixin en ndo, sen me e stetsáa sen manta lino tjúa ko tsango tjúa manta me e ko sterué e sen ndo ko ngujngu sen steta a sen kunxin tjúa.

¹⁵ *Ko ro a ndo jitachrxexin naa chika espada tsango yao, ko chika me e sincheníexin ndo kain nación ko sincheñen ndo na ijie ixi naa ntakuto chika, xranchi ngisen tene tu uva ixi tutée sen, ko sincheki i ndo na juañaue ndo Dio ndo chóna kain juachaxin.

¹⁶ Ko manta jitsáa ndo jitaxin:

“Je e ndo Rey tetuen en kain xi rey ko je e ndo Nchée kain chujni.”

¹⁷ Tjume e bikon naa ndo ángel siin ndo ti jii chjiixro ko séen kuyaku e ndo kain kuxe jitjanga ngusine ngajni:

—Xrokuiinta ko xra onta ixi ndo Dio jai tsajon ndo sintenta.

¹⁸ Sintenta ntau e xi rey, ntau e xi tituan an chujni tē to, ntau e ni jie e, ntau e kunxin ko ntau e ni jita a ba, ko ntau e kain chujni, chujni tetuan an ko chujni nchiín nche e na xra ko kaxon ntau e ichjan ko ntau e ni tsicha.

¹⁹ Tjume e bikon iku tsango chjinga jii ko xi rey tintekitua an nunte xasintajni ko chujnie xa tsixra o ixi tsinteke to na ngajin ndo jita a kunxin ko ngajin chujnie ndo.

²⁰ *Ko itsé sen iku tsango chjinga jii ko kuintee sen ba ko kaxon xi ndako a bajako chijnie ndo Dio, ko bancheye e xa chujni ixi kaxin ixra ijie juinche e ngajinxin ikon iku tsango chjinga jii, jaña kuancheye e xa chujni tsikaa chji e ba, ni kuakajon juasaya ngajin tjatu o tsikachrjeya ba. Ko iku tsango chjinga jii ko xi ndako a bajako chijnie ndo Dio ngayui jichón juanka ngi sen ngangí nda jichexin ixi azufre.

²¹ Ko ikaxin chujni kuenxin na ixi chika espada kuachrxexin ro a ndo jita a kunxin, ko kain kuxe, konkje e ba ixi juine ba ntau e chujni me e.

20

Naa mil nano

¹ Tjume e bikon naa ndo ángel xingajinxin ndo ngajni jitsé ndo chika xitjeexin ntachje e tuye yaso e ko naxixe e ko itja ndo jitjikaoxin ndo naa no chika ijie.

² Ko ndo ángel itsé ndo kudragón ko kaxon ndatin in ba kunchee ntaxi, me e Xixron anxrée, ko kuenchruxin ndo xa ixi nochika naa mil nano.

³ Ko juankaya ndo xa ngaya tuye yaso e ko naxixe e ko bije e ndo xa ko kaxon bije e ndo tuye yaso e ko naxixe e ko bake e ndo chji e ndo ixi jaña ísincheye a xa kain nación xroxetjaja mil nano. Ko tsatsingaja mil nano, tjume e xroxindange e xa ikaxin nchakon.

⁴ Tjume e bikon kaxin trono ko ngujngu sen steta a sen trono tikinixin en sen, sen tsikayé e sen juachaxin sinchéña ijie. Ko kaxon bikon aséen sen tsikonchrijin na jaa ixi tsichronga sen chijnie ndo Dio, chijni juako ndo Jesús. Sen me e kuajon a sen juasaya ngajin iku tsango chjinga jii ko ngajin tjatu o tsikachrjeya ba ko kaxon tsikintuexin a sen kuenito chji e ba ntatjen sen ko itja sen. Ko sen tsichrijin jaa ikjan xechón sen ko kuetuan an sen kao ndo Cristo naa mil nano.

⁵ Ko ikaxin ni tsiken en xechón a ña ti tsitjaja mil nano. Ji i ti sa ó xrangíxixión xroxechón chujni.

⁶ Juaxruxin tsake e sen tjúa aséen, sen sa ó xroxechón. Ko xichononte í chónða i xa juachaxin tsóña xa sen íjngo ixi je e sen xrokjan sen ndotaana tikinixin en ndo Dio ko ndo Cristo ko tsetuankao sen ndo naa mil nano.

⁷ Ko ti xroxetjaja mil nano, tjume e xi Xixron anxrée xroxindange e xa íjngo.

⁸ Ko sincheye e xa chujni ste ngata a inche. Ko sincheye e xa tjajna Gog ko tjajna Magog. Ixi nti a xroxra o xa ixi sindeke to xa ko xi tsintekte to jua i tsekini xa ixi tsango tsjé xa xranchi nchese chónða ndachaon.

⁹ Ko tsintekjixin xa nchijí nunte xasintajni ko tsingatjandajin xa tjajnée ndo Dio, tjajna tsango tjue e ndo. Ko tjume e ndo Dio xruan an ndo xro i tsj xjn ngajní, jaña xroche kain ni ña i ko tsitjáña ña.

¹⁰ Ko Xixron anxrée, xi juincheye e chujni, juanka ndo xa ngaya tuye yaso e ti jii xro i, xro i jiche ixi azufre, kaxon nti a jii iku tsango chjinga jii ko xi ndako a bajako chijnie ndo Dio ko xro i me e nai a tsjanga xro i, tiie, nchakon xroche xa.

Tsóña ijie ti trono tjúa ngajin kain chujni

¹¹ Ko bikon naa trono tjúa, tsango ijie ko ndo jita a trono. Ngajinxin ndo kuitjáña nunte xasintajni ko ngajní ko i xruan an ngisen bikon.

¹² Tjume e bikon sen tsiken en, sen ndoa ko sen nchínchín, stexin tutée sen ngajinxin ndo Dio, ko xitje e kaxin xroon ko xitje e inaa xroon jitaxin xranchi tin in ngujngu sen komé e jíee. Nti a koñe e ijie kain sen tsiken en xranchi jitaxin xroon nge e ixra juinche e sen.

¹³ Ko ndachaon konkjan kain sen tsiken en kuachonda, ko kaxon xichononte* ko ti no stexrabaa chujni tsiken en konkjan xa chujni ko xra o chujni ti jii ndo Dio ixi kaxon tsoñe e na ijie kondeexin kain nge e juinche e na.

¹⁴ Tjume e juachaxin kuachónða xichononte ko ti no kuixrabaa chujni tsiken en juanka ngi ndo Dio ti jiche xro i, me e ti xrondachro ti yuxin tsen en chujni.†

¹⁵ Ko ni jitaxin a xranchi tin in ña ngaya xroon ti jitaxin sen tsechón kain nchakon, ni me e juanka ngi ndo ña ti jiche xro i.

21

Ngajni natjúá ko nunte natjúá

¹ *Tjume e bikon naa ngajní ko naa nunte natjúá ixi ngajní ko nunte sa ó bake e ó tsikitjáña ko ndachaon iko a kaxon.

² *Jan an Juan bikon naa tjajna ijie ko tjúa, me e tjajna Jerusalén natjúá, xingajinxin ngajni kuixjn ti jii ndo Dio, ko kain sen tjajna me e tsikonchjian sen xranchi naa nchrichajan tsute e, tsango chaxro tsikitsojin nchrichan ixi tsj ndo tsute e nchrichan.

³ Tjume e kuin an séen nichja naa téee sen kuixjn ngajni ko ndachro:

— Ndo Dio jii ndo ti ste chujnie ndo, ko je e ndo tsekaon ndo sen ko je e sen xrokjan sen tjajnée ndo ko je e ndo ndo Dio tikinixin en sen.

⁴ Je e ndo tsoni ndo ndakon sen ko nchakon me e xruan an ngisen tsen en, ko xruan an ngisen xrotsjanga, ko tsonie a sen ko xruan an juachjaon xrochónða sen ixi kain nge e kon en sa ó ó juexin kuatsinga.

⁵ Ko ndo jita a trono ndachro ndo:

— Jan an ntakonchjian kain nge e natjúá.

Ko kaxon ndachro ndo:

— Ikjian ji i ixi ji i chijni nduaxin, chijni chao tsitikaon chujni.

⁶ Tjume e ndachro ndo:

— Kain nge e ó juexin kon en. Jan an ndo xrangíxixión kain nge e ko jan an ndo tsjexixin kain nge e, xranchi letra xrangíxixín letra Á ko letra tjexixín letra Zeta. Ngisen kuen en inda, jan an xrotjá a sen inda tsi i sen, ko inda tajon jan an me e tsechónxin sen ko xro an nge e tsjenga sen ña.

⁷ Ngisen tsjacha tsindue a xrochuntiana, jan an xrotjá a sen kain ti jian, ko jan an xrokjanna ndo Dio tikinixin en sen, ko je e sen xrokjan sen chjan na.

⁸ Ko ni xronka, ni titikaon a, ni ndako a nche e, ni naatónaxón chujni, ni chónða inaa nchri o inaa xi, je a janchri e o ndoxi e, ni tajon juasaya ngajin ídolo, ni tuso ko ni rué e chin tuso, ni ncheya, kain ni me e tikinixin en ña itsji ña ti jii xro i jichexin ixi azufre ko nai a tsjexin. Ji i xrondachro ti yuxin tsen en chujni.*

* 20:13 xichononte muerte † 20:14 ti yuxin tsen en chujni segunda muerte 21:1 2Pe. 3:13. 21:2 Ap. 3:12.

* 21:8 ti yuxin tsen en chujni segunda muerte

Jerusalén natjúá

⁹ Tjume e kuii ndo ángel yatuxin chónnda copa yatuxin jikaon ixi ichin tsjexixin tsikaon chujni ko ja in ndachro ndo:

—Xrokuia tsjako a sen tsute e Xjantuchjon.

¹⁰ Tjume e bikon ixi Espíritue ndo Dio biki an naa ntajie ijié ko juako na ndo tajna ijié, tajna Jerusalén tjúa xingajinxin ngajni jiti xin ti jii ndo Dio.

¹¹ Ko tóngixin tajna xranchi chjiixro nchengasáña ndo Dio, tsango tóngixin xranchi naa ixro tsango chaxro, xro jaspe chaxro tikonni xranchi xroxrao.

¹² Ngandajin tajna tsikité naa tjatu o, tsango noi ko chónnda teyuu ntachja ko ngujngu ntachja jii naa ndo ángel ko nti a jitaxin xranchi tin in ti teyuu sen tsikachrjenixin ndo Israel.

¹³ Níi ntachja jii ndatsjonxin chjuya ko níi ntachja jii ndatsjonxin ku e, níi ntachja jii ndatsjonxin retuya ko íjngo níi ntachja jii ndatsjonxin níjin.

¹⁴ Ko ngandajin tjatu o tsikité na chónnda teyuu ixro jichroxin tjatu o, ko ngata a ixro me e jitaxin xranchi tin in ti teyuu sen kuajikao Xjantuchjon.

¹⁵ Ko ndo ángel jinichjana chónnda ndo naa ntakuto chika oro, jitatichua xin ndo tajna, ko ntachje e tajna ko tjatuéé tajna.

¹⁶ Tajna me e xraje o tonxin ko jinexin tajna, ko ndo ángel juaticho a ndo tajna ixi ntakuto ko chónnda yuu mil ko yuu ciento kilómetro.

¹⁷ Ko juaticho a ndo tjatu o níi kán ko na ó metro noixin, xranchi jtatichu a ni nunte xasintajni, jaña juaticho a ndo ángel.

¹⁸ Ko ixro tsikóñaxin tjatu o me e ixro jaspe ko tajna tsikóñaxin jeoxón chika oro jian, xroxrao tóngixin oro me e.

¹⁹ Ko ixro tsiki texin tjatuéé tajna me e tsikitsojin ixi ixro tsango chaxro: ixro jaspe, ixro yuxin zafiro, ixro nínxin ágata ko ixro noóxin esmeralda,

²⁰ Ixro na óxin ixro mármol, ixro kjaunxin ixro cornalina, ko ixro yatuxin crisólito, ixro jníxin ixro berilo, ixro naxin topacio, ko ixro texin crisopraso, ko ixro tenaá jacinto, ko ixro teyuu amatista.

²¹ Ko ti teyuu ntachja me e teyuu perla kaxon, ko ngujngu ntachja tsikóñaxin naakua perla. Ko cha o ijié chónnda tajna tsikóñaxin jeoxón chika oro, xranchi xroxrao tikontu uni.

²² Ngaxin in tajna me e bikon a ninna ni ngo, ixi Ncháina ndo Dio, ndo chónnda kain juachaxin, je e ndo ko Xjantuchjon je e sen me e ni ngo.

²³ Ko tajna xrokonde a tajna chjiixro ko nchanitjao tsingasáñaxin. Ixi nti a tingasáña ndo Dio ko Xjantuchjon ixi je e sen xro i tingasáñaxin tajna.

²⁴ Ko chujnie kain nación, chujni kuayé e juachaxin tsechón kain nchakon, tsaji sen ti tingasáña tajna me e, ko sen rey nunte xasintajni tsajon sen ti tjintee chónnda sen.

²⁵ Ko ntachje e tajna nai a tsije e ntachja taa nchakon, ixi nti a nai a tsontie.

²⁶ Ko kain sen kain nación nti a tsikaan sen nge e chaxro kuachónnda sen nunte xasintajni.

²⁷ Ko nti a jua i tixin in nge e tjúa i ko ti ncheya. Je o chao tixin in sen jitaxin xranchi tin in ngaya xroon jitaxin kain sen chónnda juachaxin tsechón kain nchakon, me e xroon chónnda Xjantuchjon.

22*Inda jitinga tajon juachaxin tsechónni*

¹ Tjume e ndo ángel juako na ndo naa inda jitinga, nda tjúa, ko nda me e tajon juachaxin tsechón chujni. Ko tikonni nda xranchi naa xroxrao, ko kuachrjexin inda ti jii ntachaon en ndo Dio ko Xjantuchjon.

² Ko ngusine cha o ijié chónnda tajna ngujngu lado ti jitinga nda tjúa jii ntaá tajon juachaxin tsechón chujni ko ngujngu nchanitjao tajon ntaá itu, ko chaan ntaá me e xroan tsoxruxin chujni kain nación.

³ Ko nti a íxro an nge e ti ningakon en ndo Dio tsake e. Ko sen nche e xrée ndo Dio tsajon sen juasie sen ti jii ntachaon en ndo Dio ko tronoe Xjantuchjon* ti tajna nti a.

⁴ Ko je e sen tsikon sen ikon ndo Dio ko tsenito ntaaten sen xranchi tin in ndo.

⁵ Ko nti a tsake a tie ko í xrokonda i xruie naa foco ko xruie chjiixro tsingasáñaxin ixi Ncháina ndo Dio je e ndo tsingasáña ndo, ko je e sen tsetuan an sen kain nchakon.

Ko ndachro ndo Jesucristo ixi tuinxin tsii ndo

⁶ Ko ndo ángel ndachijina ndo:

* 22:3 Xjantuchjon Cordero de Dio; Jesús

—Chijni ji i, chijni nduaxin, chijni xrokonda tsitikaonnta. Ko je e Ncháina,[†] ndo Dio, ndo nchexraxaon sen nichja chijnie ndo, xruan an ndo ndo angéel ndo ixi tsjako ndo ngajin sen nche e xrée ndo Dio, nge e ó taka tson en.

⁷—¡Jan an tuinxin tsji i!

Juaxruxin tsake e sen titikaon chijnie ndo Dio, chijni jitaxin xroon ji i ko chronga nge e xrokonda tuinxin tson en.

⁸ Jan an, Juan, kuñ an ko bikon ji i. Ko juexin kuñ an ko bikon, tjume e bake exin ntatuchi in tutée ndo ángel ixi xrokuajon juasaya ngajin ndo ixi je e ndo juako na ndo kain nge e bikon.

⁹ Tjume e je e ndo ndachro ndo:

—Nche a jaña, ixi jan an kaxon nta a xrée ndo Dio xranchi ja a ko xranchi sen kichuua, sen nichja chijnie ndo, ko kain sen nduaxin titikaon ti jitaxin xroon ji i. Je o ndo Dio tikinixin en ndo tsayé e ndo juasaya.

¹⁰ Kaxon ndachijina ndo:

—Tema ia kain ti bikuan ko kuin en, ti jitaxin xroon ji i, ixi chijni kuin en tuinxin tson en kain ji i.

¹¹ Tintu e ni nche e ti ña i, ndanche e ña ti ña i ko ni ndako a nche e, ntanche e ña ti ndako a, ko sen nche e ti jian, sinche e sen ícha jian, ko sen titikaon xranchi tjaun ndo Dio, ícha tsitikaon sen.

¹² —Jian tin ennta, jan an tuinxin tsji i ko tsikian kain ti tikinixin tsayé e nguñgu sen xranchi ixra juinche e sen.

¹³ *Jan an ngisen xrangixín kain nge e ko ngisen tsjexixin kain nge e, xranchi letra Á xrangixín ko xranchi letra Zeta xrangixín.

¹⁴ Juaxruxin tsintee sen tsjinemá manta jitsáa sen ixi jaña xrochóna sen juachaxin tsonchijñe e sen ngajin ntaq tajon juachaxin stechón chujni, ko kaxon chao tsixixin sen ntaçhe e tjajna tjúa.

¹⁵ Ko nduja tsitu e chujni ña i, ti nche e xranchi kunia, ko kain chujni rué e ichin tuso, ni chóna nchri o xi je a janchri e o ndoxi e, ni naatóñaxón chujni, ni tajon juasaya[‡] ngajin ídolo ko kain ni ncheya.

¹⁶ —Jan an ndo Jesús xruan an ndo ángel tikinixinna ixi xrochronga ndo ngajin kain sen ni ngo kain ji i. Jan an kuachrjenixin ndo rey David ko jan an me e nchanotsé tingasáña ndúyo.

¹⁷ Espíritue ndo Dio ko sen titikaon Xjantuchjon ndachro sen:

—Xrokuiinta.

Ko sen tsin en kaxon xrondachro sen:

—Xrokuiinta.

Ko ngisen kuen en inda tsij sen ko tsi i sen inda tajon juachaxin tsechónni kain nchakon, ko sen tsij xro an nge e tsjenga sen na.

¹⁸ Kain sen tin en chijnie ndo Dio, chijni jitaxin xroon ji i ko chronga nge e tson en, sintano a sen: Siá xrojan ngisen tsasintaxin inaa nge e ti jitaxin a xroon ji i, ndo Dio sincheni e ndo sen xranchi jitaxin xroon ji i.

¹⁹ Ko siá xrojan ngisen tsantsjende e xrojan chijni jitaxin xroon ji i, ndo Dio sinchemé e ndo xranchi tin in sen jitaxin xroon chóna juachaxin tsechónni kain nchakon ko tsajon a ndo juachaxin tixin in sen tjajna natjúá xranchi jitaxin xroon ji i.

²⁰ Ko ndo chronga chijni ji i ndachro ndo:

—Ó tuinxin tsji i jan an.

Jaán, jaña tson en. ¡Tuinxin xrokjui inta, Ncháina Jesús!

²¹ Ncháina Jesucristo sintanchaonnta ndo kainnta. Jaña tson en.

[†] 22:6 Ncháina Señor Ncháina Jesús o Ncháina Dio

22:13 Ap. 1:8; Ap. 1:17; 2:8.

[‡] 22:15 juasaya respeto, honor